

唐大诏令集

宋敏求

文硕阁

wenshuoge.com

目录

关于我们	5
提要	7
原序	8
卷一	9
卷二	13
卷三	21
卷四	25
卷五	33
卷六	41
卷七	50
卷八	54
卷九	58
卷十	66
卷十一	72
卷十二	76
卷十三	81
卷十四之卷二十四并阙文	86
卷二十五	87
卷二十六	92
卷二十七	100
卷二十八	105
卷二十九	110
卷三十	117
卷三十一	127
卷三十二	132
卷三十三	141
卷三十四	148
卷三十五	155
卷三十六	162
卷三十七	169
卷三十八	176
卷三十九	187
卷四十	193
卷四十一	201
卷四十二	210
卷四十三	219

卷四十四	223
卷四十五	230
卷四十六	237
卷四十七	243
卷四十八	250
卷四十九	257
卷五十	264
卷五十一	272
卷五十二	279
卷五十三	288
卷五十四	293
卷五十五	298
卷五十六	304
卷五十七	310
卷五十八	317
卷五十九	324
卷六十	332
卷六十一	338
卷六十二	345
卷六十三	351
卷六十四	361
卷六十五	366
卷六十六	374
卷六十七	383
卷六十八	388
卷六十九	391
卷七十	396
卷七十一	403
卷七十二	406
卷七十三	412
卷七十四	417
卷七十五	426
卷七十六	431
卷七十七	436
卷七十八	444
卷七十九	451
卷八十	459
卷八十一	467

卷八十二	472
卷八十三	479
卷八十四	483
卷八十五	487
卷八十六	490
卷八十七之卷九十八并阙文	499
卷九十九	500
卷一百	507
卷一百一	514
卷一百二	520
卷一百三	526
卷一百四	532
卷一百五	539
卷一百六	544
卷一百七	556
卷一百八	563
卷一百九	569
卷一百十	574
卷一百十一	582
卷一百十二	588
卷一百十三	593
卷一百十四	601
卷一百十五	607
卷一百十六	613
卷一百十七	619
卷一百十八	625
卷一百十九	634
卷一百二十	642
卷一百二十一	651
卷一百二十二	657
卷一百二十三	661
卷一百二十四	669
卷一百二十五	676
卷一百二十六	684
卷一百二十七	690
卷一百二十八	695
卷一百二十九	701
卷一百三十	708

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 史部六

唐大诏令集 诏令奏议类一【诏令之属】提要

【臣】等谨案唐大诏令集一百三十卷宋宋敏求编敏求字次道赵州平棘人参知政事绶之子进士及第官至史馆修撰龙图阁直学士事蹟具宋史本传敏求尝预修唐书又私撰唐武宗以下实录一百四十八卷於唐代史事最熟此集则本其父绶手辑之本重加订正为三十类熙宁三年自为之序称缮写成编会忤权解职顾翰墨无所事第取唐诏令目其集而弃藏之云云盖其以封还李定词头由知制诰罢奉朝请时也其书世无刊本转辗抄传讹误颇甚中阙卷第十四至二十四八十七至九十八凡二十三卷参校诸本皆同其脱佚盖已久矣唐有天下三百年号令文章灿然明备敏求父子复为裒辑编类使一代高文典册眉列掌示洵足为考据之资其中不尽可解者如裴度门下侍郎彰义军节度使宣慰等使制据旧唐书其文乃令狐楚所草制出後度请改制内剪其类为革其志改更张琴瑟为近辍枢衡改烦我台席为授以成算宪宗从之楚亦因此罢内职是当时宣布者即度奏改之辞今此集所载尚仍楚原文不依改本未详何故又宝历元年册尊号赦据敬宗本纪时李绅贬官李逢吉等不欲绅量移乃於赦书节文内但言左降官已经量移者量移近处不言未量移者宜与量移翰林学士上疏论列帝命追赦书添改之今此集所载只及赦罪一条而无左降官量移之文疑亦有所逸脱又旧唐书所载诏旨最多今取以相校其大半已入此集而亦有遗落未载者如纪号则改元天佑诏除授则尹思贞御史大夫李光弼兵部副元帅诸制追赠则张说赠太师杨绾颜真卿李绹赠司徒郭暖赠太傅郑朗赠司空田布赠仆射诸诏优礼则杜佑萧俛致仕诸诏奨劝则劳解琬奨李朝隐褒美令狐彰奨伊西北庭二镇诸诏谪降则王毛仲韩臯吕渭张又新李续之熊望贬官诸诏诛窜则决杀长孙昕流裴景仙裴茂诸勅皆关朝廷举措之大者而此集并阙而不登以敏求博洽不应疎於蒐采或即在散佚之中亦未可定?不免於放失不完之憾然唐朝实录今既无存其诏诰命令之得以考见者实藉有是书亦可

称典故之渊海矣乾隆四十四年九月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

唐大诏令集原序

唐大诏令集者先君宣献公景佑中书第三【阙】所纂也先公以文章名世更内外制之选而朝廷典册多以属之及入陪宰政仁宗数面命撰述於是有中宫册文三后不迁及条列兵农置睦亲宅朝集院等诏机务之隙因裒唐之德音号令非常所出者彙之未次甲乙未为标识而昊天不吊梁木遽坏小子不肖大惧失坠秘其书於家楹者盖有年矣仆射王文安公累以为问谓当垂世不朽乃绪正旧藁十三类总一百三十卷文安见许序而名之未果而公薨治平二年先皇帝简拔孤陋寘在西掖固欲澡雪蒙滞而鑽仰衆制方繕写成编会忤权解职顾翰墨无所事第取唐大诏令目其集而弃藏之云熙宁三年九月晦右谏议大夫宋敏求谨序

卷一

钦定四库全书

唐大诏令集卷一

宋 宋敏求 编

帝王

即位册文

太宗即位册文

肃宗即位册文

德宗即位册文

顺宗即位册文

宪宗即位册文

穆宗即位册文

敬宗即位册文

文宗即位册文

宣宗即位册文

懿宗即位册文

哀宗即位册文

即位册文

太宗即位册文

维武德九年岁次丙戌八月丙辰朔九日甲子【云云】夫天生蒸民树以司牧三灵辅德百姓与能粤自夏殷传业祚轨物长世罔不由兹朕祗膺灵命肇开宝历声教所覃无思不服然而万几填委九区辐凑明发不寐考极观书听政劳神经谋损虑深思闲旷释兹重负咨尔聪明神武实天生德君人之量爰备夙成王业初基云雷伊始英谋独断秘策潜申及拓定关陇澄清河洛北通玄塞东静青丘宏图遐举元功克茂氛雾廓清鲸鲵斯静泽沾方外声畅无垠总统机衡百工以义敷弘德化四门允穆讴歌所属宇内宅心象纬告徵灵命斯在朕是用上稽苍昊俯顺黔黎推而弗居永垂显号今传皇帝位於尔躬命司空魏国公寂尚书左仆射宋国公瑀齎玺绶授尔其纂成洪绪对扬休命式隆宝祚以康四海

肃宗即位册文

维天宝十五载岁次丙申七月癸丑朔十二日甲子皇帝若曰咨尔元子某维天为大惟人君则之顺乃德故舜禹揖让而履皇极咈乃道故丹朱商均不能保鸿业是以咨有惠迪而夏嗣焉隋有乱纪而唐受焉五圣之御极皆勤俭兢业日慎一日故能享祚长久垂庆无穷洎予六叶忝位四纪厌于勤倦缅慕汾阳当保静怡神思我烈祖玄元之道是用命尔元子某当位嗣统於戏尔有忠孝之诚拯於君父尔有友爱之义信于兄弟尔有仁恕之行通于神明尔有戡难之才彰於兆庶予懋乃懿绩嘉乃神武天之历数在尔躬汝惟推诚祸乱将冀尔而能清汝惟从谏社稷将冀尔而复寧佞言为疵直言惟师任贤勿贰去邪勿疑民非后何戴后非贤罔与守邦钦哉慎乃有位无忝我祖宗之丕烈

德宗即位册文

维大历十四年岁次己未五月辛丑朔二十三日癸亥皇帝若曰於戏昊天有命皇王受之立嫡以贤春秋之义传之於子汉氏成规宗庙社稷实赖其庆咨尔皇太子适稟天地之仁含日月之耀道光三善孝着十伦顷者国步多艰委以戎律理军靖难保大定功克复帝图廓清妖孽既表建侯之策俾承守器之重仁孝之德夙夜惟寅朕天命有终弗兴弗寤非至公无以主天下非至德无以临四海是用命汝陟於元后嗣守皇业上继宗祧下安羣望其命门下侍郎同中书门下平章事常袞奉册即皇帝位於戏宜遵太宗之法度肃宗之俭约任贤勿贰去邪勿疑与衆守邦只敬予训

顺宗即位册文

维贞元二十一年岁次乙酉正月辛未朔二十三日癸巳皇帝若曰於戏天下之大实惟重器祖宗之业允属元良咨尔皇太子诵睿哲温恭宽仁慈惠文武之道稟自生知孝友之诚发於天性自膺上嗣毓德春闱恪慎于厥躬只勤於大训必能诞敷至化安勤庶邦朕寢疾弥留弗兴弗寤是用命尔继统俾绍前烈宜陟元后永绥兆人其命中书侍郎同中书门下平章事高郢奉册即皇帝位尔惟奉若天道以康四海懋建皇极以熙庶工无忝我高祖太宗之休烈

宪宗即位册文

维永贞元年岁次乙酉八月丁酉朔九日乙巳太上皇若曰咨尔皇太子纯惟皇上帝降休於我家用集大命克绥厥猷惟后只率大典兹惟艰哉朕承累圣休德膺守邦之重不蒙天佑降疾在躬上不能昭事郊丘只见烈祖下不能临视庶政保绥兆人是用命尔当位嗣统宜陟元后代予忧勤今遣使检校司徒平章事杜佑副使门下侍郎平章事杜黄裳持节册命於戏尔有光大之德敷於万邦尔有仁孝之诚型于九族慈和宽简克飨天心玄符不可以固违明命不可以不畏尔惟察纳忠直子惠困穷咨於正言慎乃俭德临庶官以信安庶狱以情允执厥中无忝我祖宗之丕训

穆宗即位册文

维元和十五年岁次庚子闰正月甲辰朔三日丙午皇帝若曰於戏上天降鉴保佑於我国家十圣丕承光宅四海鸿休大业以逮予一人严恭只畏惧弗克荷赖宗社垂庆生灵乂安今朕寝疾弥留弗兴弗寤神器所付属之元良咨尔皇太子恒孝友聪明温文?哲自主七鬯日新厥德必能缵予勤志绥靖万邦是用命尔陟于元后宜令中书门下侍郎平章事令狐楚奉册即皇帝位懋建皇极无忝我祖宗之休烈

敬宗即位册文

维长庆四年岁次甲辰正月辛亥朔二十六日丙子皇帝若曰惟天辅唐德我祖宗克答天意迈德勤道绍休大业泊予一人嗣守四海只事天地爱育万类罔或怠惰於兹五年今寝疾弥留不兴不寤获以重器付之元良咨尔皇太子湛列祖储庆自天生德孝友慈惠温良敬恭必能辑宁家邦辉光绪业是用命尔陟於元后宜令中书侍郎平章事牛僧孺奉册即皇帝位尔有广厚之量可以奉天地尔有孝敬之志可以事神祇和惠可以抚万邦仁爱可以亲九族任贤尚德远佞去邪尔惟钦承无忝我祖宗之休烈

文宗即位册文

维宝历二年岁次丙午十二月甲午朔十二日乙巳太皇太后若曰大行皇帝?哲英灵对天明命方夏底绩夷蛮贡庭罔有不端大康有截宜荷九庙之重永享亿年之祿岂虞奸妖窃发矫专神器蛊惑中外扇诱羣萌骇动神人衅深泉境咨尔江王某聪哲孕粹清明敏和智筭机开玄谋电发躬率义勇大清凶徒且膺当璧之符爰摅枕戈之愤既殲巨害当享丰福是用命尔陟於元后宜令司空平章事裴度奉册即皇帝位永惟高祖太宗之剪定隋乱玄宗之寢渍利泽宪宗之豎拔蠹孽艰难险阻勗乃负荷小心以事上帝俭德以型家邦懋於令闻持久如始敬之哉

宣宗即位册文

维会昌六年岁次丙寅三月壬寅朔二十六日丁卯皇帝若曰惟玄穹降祚启我唐运奕叶重晖赫羲纂承列圣顾瞻敷佑冲昧获承大宝君临兆人惧不能任夙夜竞厉只事九庙於今七

年实赖宗社之灵台袞之辅忠良毕力内外协心北剪山戎东殲孽?不失传付之业方期仁壽之宁属颐护或亏寒暑致恙禱神餌药有加无繆乃亲贤而委家国皇太叔权勾当军国政事温慈?哲孝友端明蘊东平为善之心尚河间好学之志必能煮煦天下穆清大中於戏惟敬惟和克敏克寬斥去奇邪亲任仁人是用终陟元后宜令某官奉册即皇帝位钦若天道缉熙帝图懋哉敬哉

懿宗即位册文

维大中十三年岁次己卯八月甲申朔十三日丙申皇帝若曰眷彼羣生必有司牧纘承丕构允属元良故命嗣惟贤立贤则长夏禹惟公於圣子汉文终守其成规兹乃万国攸同百王不易之道也朕以菲薄获奉宗祧十有四年未臻至理惟天示譴降疚于躬药石无功弥留斯迫历数云在天命有归咨尔皇太子朕之元子幼有圣质孝敬温文弘博慎敏稟天地之仁【阙】含日月之贞明承训向方秉礼抱义是用命尔陟於元后宜令摄中书令中书侍郎兼礼部尚书平章事萧朗奉册即皇帝位邦家以寧统绪以正惟严恭祗畏可以事天地惟寬明睿哲可以御臣下惟慈惠钦和可以抚黎庶惟道罔拂惟贤必亲实尔生知岂埃训海着於典册无事文词懋昭耿光绍休前烈於戏敬之於戏戒之

哀宗即位册文

维天佑元年岁次甲子八月壬辰朔十五日丙申皇后若曰高祖太宗拨乱返正奄有天下垂三百年重熙累圣莫不功光祖业克绍丕图予遭家不造变起宫奚虽号恻期至於终天而负荷实先於立嗣咨尔皇太子监国事天资岐嶷神授英明孝比东平之苍学富陈留之植恭谦守政和顺称仁友爱闻於弟兄令誉播於区宇比则隆元帅深畅戎机今乃位储宫益归羣望是用爰循旧典上纂鸿基既允集於天下当钦承於宗社宜即皇帝位於戏万几不可以久旷四海不可以乏君膺绍宝图光践皇阼节俭以励戎夏文德以戢干戈无怠无荒克慈克悌永保厥躬用扬祖宗之丕绩休命可不敬哉

唐大诏令集卷一

卷二

钦定四库全书

唐大诏令集卷二

宋 宋敏求 编

帝王

即位赦上

神尧即位赦

太宗即位赦

中宗即位赦

睿宗即位赦

明宗即位赦

肃宗即位赦

代宗即位赦

顺宗即位赦

穆宗即位赦

敬宗即位赦优赐诸军诏

即位赦上

神尧即位赦

诏曰舜禹殊时禅代存乎揖让殷周异世革命事乎干戈至於据龙图握凤纪统御皇极抚拯黎民奄有四方朝宗万国垂法作则其揆一焉朕以寡薄属彼浇季大业末年纲维废弛三光

改耀九服移心既戡定时难缉和庶绩一匡海内再造黎元隋氏以天禄永终历数攸在敬禅厥位授於朕躬顾惟慙德属当景运惧甚履冰櫛乎御朽上答苍灵之睠俯顺亿兆之心宝历初基普天同庆宣布兹宽惠咸与惟新可大赦天下改隋义宁二年为武德元年自五月二十日昧爽以前罪无轻重已发露未发露皆赦除之子杀父奴杀主不在赦限百官及庶人赐爵一级义师所行之处给复三年自余给复一年孝子顺孙义夫节妇旌表门闾孝弟力田鰥寡孤独量加赈恤

太宗即位赦

诏曰惟天为大七政所以授时惟辟奉天三才所以育物故能弥纶宇宙经纬乾坤大庇生民阐扬鸿烈我大唐诞膺嘉运载协休期丕受龙图肇开凤纪太上皇徇齐作圣睿哲钦明奄有八荒光宅四表牢笼轩昊蹀跨殷周金镜俯临玉烛遐被然而至德弗宰成功不居高谢万邦委兹重器郊禋旷典士民翘瞩钦惟宗社义存享献朕以寡昧实膺统绪辞不获免式纂洪业灵命既臻是昇宝位居临兆庶继轨百王若涉大川罔知攸济方咨令哲共康至道今绍祚伊始奉答天休思俾惠泽被於黎献可大赦天下自武德九年八月九日昧爽已前罪无轻重已发觉未发觉囚徒系者悉从原免武德元年以来流配者亦并放还凡厥庶寮进爵一级其五品以上先无爵邑者封开国男六品以下各加一转关内及蒲芮虞秦陕鼎六州免二年租调自余率土普给复一年年八十以上各赐米二石绵帛五段百岁以上各赐米四石绵帛十段仍加版授以旌尚齿鰥寡孤独不自存者量事优恤其有至孝纯着达於乡党徵诸阙廷厚加褒擢节义之夫贞顺之妇州府列上旌表门闾高年硕学直言正谏所在长官随状荐举亡命山泽挟藏军器百日不首复罪如初以赦前事告言者以其罪罪之

中宗即位赦

门下天地盈虚四时有消息之度皇王兴替五运有迁革之期称号斯殊骊颀亦异受明命者罔不由兹我大唐高祖神尧皇帝圣期首出天与神器有大功於区夏有大造於生灵太宗文武圣皇道则继明业推构极类商汤之起亳若姬发之承周弹压九皇牢笼万古高宗天皇大帝上圣御图大明司契手调元气心运洪鑪齐五纬而平太阶应三神而登日观网罗开辟包冠义胥大猷备阐能事斯毕仙驾不追逆臣开衅敬业挺灾于淮甸务挺潜应於沙场天柱将摇地维方挠非拨乱之神功不能定人之危矣则天大圣皇帝亶聪成德睿哲应期用初九之英谟开太一之宏略振玉铃而殪封豕授金钺而斩长鲸受河洛之图书当昊义之历数惠育黎献并登仁壽既而凝怀问道属想无为以大宝为劳生遂复忝於明辟且有後命俾承先绪光启大唐之图用崇兴复之基交际在辰情深感慰奉高祖之宗庙遵太宗之社稷不失旧物实在於兹业既惟新事宜更始可改太周为唐社稷宗庙陵寝郊祀礼乐行运旗帜服色天地等字台阁官名一事已上并依永淳已前故事其神都依旧为东都北都依旧为并州大都督府永昌来庭两县并从废省其百姓依旧分属河南洛阳两县周朝宗庙陵寝及官宜令所司商量处分朕之远系出自老君灵佑所资贍庆长久宜依旧上尊号为玄元皇帝省司差使册告天下村落佛堂并令开门洒扫不得因兹聚斂创加修葺庠序之规风教之首京都两学尚且阙修欲令四方何以取则其京都学馆及先圣庙堂所有破坏未营造者逐要修葺速令毕

功不得浪有劳扰乐府之设国风所系岂惟易俗抑且和神至若丝竹繁声倡优杂伎深乖礼则并宜量事减省国之礼仪已经改撰随时逐变务在弘通宜令礼官重加详审於行事有不便者即从损益制勅删定处分已久宜从易简务速施行设官固须量才称职比来委任稍亦乖方遂使鞫狱推囚不专法寺撰文修史岂任秘书营造无取於将作句勘罕从於比部多差别使人着判官在於本司便是旷位并须循名责实不得越守侵官皇家亲属籍没者则天大圣皇帝虽已溥畅鸿恩其先有任五品已上官枉遭?害者并宜加改葬式遵典礼若有後嗣还其资?其别勅安置并左贬者亦复其属籍量还官爵仍遣诸流移人除犯赃贿及畜蛊毒造伪避讐并反逆缘坐勘会不免者余并放还天下军镇不要者多转输艰辛府库虚耗事须改弊不可循常宜简内外官人有材识者分为充使巡边按覆须留镇遏及应减一事已上并委使人共所管详度还日具利害闻奏其应支兵先取当土及侧近人仍随地配割分州定数年满差替各出本州永为格例不得踰越五品以上致仕曾伏事先朝者赐爵一级曾任州府幕府及任洛州牧日官人并勘责闻奏经任东宫官僚见任六品官计阶应入五品者特宜不拘年限余依常例三卫细引主帅直司行署番官七絶等通前各减二年劳考满日各加勲一转合得官者稍与处分中书门下官人计阶考入五品者优量令史番官准羽林例处分分直者及外司官典二十二日诛贼之时缘只承在中书省者各赐勲一转诸司有品直司宜加一阶无品直司赐勲一转礼官缘即位修执仪注者各赐物二十段正月当番三卫监门等於武成衙内明福门外南衙及诸门者赐物十段左右羽林及东宫北门厨供膳及匠准例各赐物十段正月量追三卫细引监门细引直长飞骑杂技飞骑各赐物十段东宫北门官及三卫细引监门直长各赐物二十段仍类例功夫多少奏闻其引玉册及輦册读册等官人各赐物五十段授册使人赐物一百段书册人各赐物十段其輦腰輦官人赐物二十段飞骑各赐物十五段其輦香蹬三卫及輦宝人各赐二十段顷者户口逃亡良田差科繁剧非军国切要者并量事停减若要和市和雇先依时价付钱自非省支勒索不得辄有进送诸贡物皆须任土当处无者不得别求仍於常数每事量减缘百姓间所有不稳便者并委州府具状奏闻朕当亲览即为厘革天下百姓并免今年租及地税自今以後租庸准符配定更不须徵折脚价钱其已前未徵得者亦即免放天下宗姓并准旧式房州百姓宜给复三年其诸司官员并杂色役掌幕士门役之徒兼音声人及丁匠等非灼然要籍并量事减省所司速为条制廐马数多皆须秣饲食人之粟日费滋深广殿中诸闲廐马量支留以外抽送外州马坊及本监牧其东宫诸王公主等马应官供者亦令随事减省奢侈淫伎巧实为蠹弊皆因节日宗属婚亲王公妃主竞相贺遗或造珍丽妄为进奉锦彩异饰雕镂奇文假撰楼台伪装禽兽诸如此类深是害时宜明勅格严加禁断衣服采章一准令式夫邹缨齐服尚且变俗移风朕率先百僚必期化成兆庶东都正月当上番兵年至五十五即放出前赦及今制处分有不尽者并令所司类例续奏布告遐迩咸使知闻主者施行【神龙元年二月五日】

睿宗即位赦

门下朕闻自古帝王光膺图籙则尊尊亲亲之义着於典制朕谅在至公盖非获已我大唐乘时抚运累圣重光当四海之乐推受三灵之眷命大行皇帝奄弃?县痛结仇讎朕志扫巨逆保寧嗣主今皇帝哀?在疚托於朕躬勲恳再三愿成兹意朕以不德猥承丕绪念今追昔载感於怀若涉大川罔知攸济思荷宗祧之业属此维新式扬涣汗之恩与之更始可大赦天下

明皇即位赦

朕承累圣之鸿源荷重光之积庆昔因多难时属遘屯宝位深坠地之危神器有缀旒之惧事殷家国义感神祇吟啸风云恭行雷电致君亲於尧舜济黔首於休和遂以孟秋允昇储贰旋承内禅继体宸居拜手之请空勤让王之诚莫展恭临亿兆二载於兹上禀圣谟下凝庶绩八荒同轨瀛海无波不谓奸慝潜谋萧墙窃发逆贼窦怀贞等并以庸妄擢在朝廷毫髮之效未申丘山之衅仍积共成梟獍将肆奸回太上皇圣断宏通英谋独运命朕率岐王范薛王业等躬事诛锄齐斧一麾凶渠尽殪太阳朗耀辟氛霭於天衢高风顺时彰肃杀於秋序人灵叶赞夷夏相欢四族之愿既清七百之祚方永爰承後命载辟休期揔军国之大猷施云雨之鸿泽承乾之道既光被於无垠作解之恩思式覃於品物当与亿兆同此惟新可大赦天下大辟罪已下咸赦除之邠王守礼加实封二千户宋王成器申王成义各加实封一千户岐王范薛王业各加一阶内外官人被诸道按察使及御史所通恶状咸宜洗涤选日依资叙用【先天二年七月】

肃宗即位赦

朕闻圣人畏天命帝者奉天时知皇灵眷命不敢违而去之知历数有归不获已而当之在昔帝王靡不由斯而有天下也乃者安贼乱常京阙失守天未悔祸羣凶尚扇圣皇久厌大位思传眇身军兴之初已有成命予恐不德罔敢祇承今羣工卿士佥曰孝莫大於继德功莫大於中兴朕所以治兵朔陲将殄逆寇务以大者本其孝乎须安兆庶之心敬顺羣臣之请乃以七月癸丑朔十二日甲子即皇帝位於灵州敬崇徽号上尊圣皇曰上皇天帝所司择日昭告於上帝朕以薄德谬膺重任既荷承天之礼宜覃率土之泽可大赦天下改元曰至德大辟罪已下常赦所不免者咸赦除之其逆贼李林甫王琕杨国忠近亲合累者不在免限百姓官吏能率亲属去逆归顺有官加优獎斩得逆贼父子不问首从当赐爵土别有褒崇其有直言极諫才堪牧宰文词博達武艺絶伦孝悌力田沉沦草泽委所在长官闻荐诣阙自陈者亦听东宫官属既会昌期合承宠命量加改转诸色勾徵逋租悬调及官钱在百姓腹内并宜放免灵州改为灵武大都督府上县为望中县为上官寮等一切便授天下耆壽各赐物五段侍老版授太守县令有差各赐物五段天下诸道百姓本道采访使差郡县官存问四方将士各赐马一匹六品以下赐物十段天下寺观各度七人太守并限三考然後转御史取曾任郡县理人官者後可荐用所有弹奏一依贞观故事官吏犯枉法赃终身勿齿自古圣帝明王忠臣烈士五岳四瀆名山大川并令所在致祭孝子顺孙义夫节妇旌表门闾内外文武官九品以上各加两阶赐勲两转三品以上赐爵一级

代宗即位赦

高宗嗣兴谅陰成受终之礼康王承统翌日奉顾命之书况万事尚殷萧墙有衅苍生伫理社稷谋安教虽达于通丧礼有变於金革顺人听政僊僊从权朕顷侍銮舆率彼西夏佐成草昧俾掌戎车国步艰难睿图广运再清?县重复宗社稟成命以受律敢贪天以为功圣慈弘深册践明两奉若廷训敢有怠心呜呼不吊昊天殃咎荐至皇祖之哀未释穷崩之罚奄锺攀号罔

极若无天地誓终丧纪企及前王百辟抑予俾恭遗训俯遂衆望嗣膺丕烈钦兹大宝惧不胜任若蹈春冰如集乔木日者先圣哀损朕在问安而?墙构灾凌长成祸阍闾作孽闾寺滔天职为乱阶潜置巫蛊将行窃弄覆我邦家赖良弼匡戴爪牙同德天道助顺神理害盈昭此共工之心终貽管蔡之辱舍彼有罪咸服其辜废於离宫寘於城颍今天衢虽泰率土未康式協公卿之心仰遵易月之命奉时斯在先甲未孚宜允人神覃兹涣汗可大赦天下自宝应元年五月十九日昧爽已前大辟罪已下已发觉未发觉已结正未结正系囚见徒常赦所不免者罪无轻重咸赦除之自开元已来所有诸色犯累者并宜雪免左降官并诸色流人及罚镇效配军团人等一切即放还其中有见任刺史县令及正员者并依本任其四月十五日已後诸色流贬者与量移近处逆贼史朝义已下有能投降及率衆归附者当超与封赏天下禁囚不得过五日所有推劾不得分外拷掠亦不得信支证便结罪名诸色文武官应在凌霄门内谒见者并飞龙射生等并宜以宝应功臣为名诸州刺史与一子官刺史县令入五品减两考内外文武官三品以上赐爵一级四品以下各加一阶诸州刺史父母在无官者与致仕官及父母邑号已亡歿者追赠诸州防御使并停天下子为父後者各赐勲一转州县官自今已後宜令三考一替太官饗饈等特宜减省有涉奢侈一切宜停天下百姓逋租悬调贷粮种子诸色欠负官物一切放免开元乾元等钱并宜準一文用不须计以虚数益昌郡王邕进封郑王延庆郡王迴进封韩王故庶人皇后王氏故庶人太子瑛郢王瑶光王琚宜并复封棣王琰永王璘及应安禄山誖误反状等并宜昭雪建昌王追封齐王崇恩王追封卫王灵昌王追封郢王其有明於政理博综典坟文可经邦谋能制胜及孝悌力田诸州刺史并宜搜扬闻荐投匭者不须勘以停处姓名务招直言以副朕意

顺宗即位赦

朕纂承天序嗣守鸿业以不敏不明托於万国兆人之上永惟高祖太宗肇造区夏列圣休德洽於人心肆惟寡昧膺受多福大惧不克负荷为宗庙羞若涉大川罔知攸济思与羣公卿士方伯连帅祇若丕训惟怀永图内熙庶绩外弘至化以弼予理臻於大中俾怀生之类各遂其性咸得自新导迎休和荡涤瑕累可大赦天下自贞元二十一年二月二十四日昧爽已前大辟罪已下罪无轻重已发觉未发觉已结正未结正见系囚徒常赦所不原者咸赦除之左降官量移近处如复资者任依常调选如有亲故在上都任於所司陈状便与处分别勅责受降资正员官者亦与追改亡官失爵放归不齿者量加收叙流人放还僧尼道士移隶者罪人已亡歿家口未许归者一切放归如自情愿住者勿抑令归如先有勅云纵逢恩赦不在放还限者及别勅安置者并宜放还其安置人五品已上奏待进止左降官及流人亡歿有官者各还本官今日已前?累禁锢及反逆缘坐者一切并与洗滌应缘山陵制度及丧仪礼物博询可否务遵礼度必诚必信副朕衷怀桥道置顿并以内库钱充诸有费用先给工价仍以见钱及不折物不得辄令科配天下百姓应欠贞元二十一年二月三十日已前榷酒及两税钱物诸色逋悬一物已上一切放免京畿诸县州应今年秋夏青苗钱并宜放免天下诸州府应须夫役车牛驴马脚价之类并以两税自备不得别有科配仍并以两税元勅处分仍永为恒式不得擅有诸色榷税常贡外不得别进钱物金银器皿奇纹异饰雕文刻镂之类若已发在路者并纳左藏库清浄者理国之本恭俭者修己之端朕临御万方方弘此道苟可济物予何爱焉宫掖之中宜先省约其後宫细人子弟音声人等并宜放归亲族应缘宫市并出正文帖仍依时

价买卖不得侵扰百姓所缘诸宫要你母并取食粮户充税不得科配寺观诸军先擒吐蕃生口配在诸处者宜资给还本国天下官吏应行鞭捶本罪不至死者假以责情致令殒毙每念及此良增惻然宜切加察访内外文武见任及致仕官并诸道将士等赐爵加阶赐勲有差二王三恪褒圣侯各与一子官大长公主嗣王各与一子官及出身有差宗子中有才用者委宗正卿以名闻量才叙用皇王等已上亲赐爵加阶有差陪位者年十五已上并放出身武德以来配飧功臣张巡许远南霁云颜杲卿颜真卿等各子孙中与一人正员官故尚父子仪赠太师晟太尉秀实子孙中各与一人正员五品官及诸州府长官及京常参官父见在未官者并与五品致仕官及阶父歿母存者与邑号父母亡歿量与追赠陕州元从宝应功臣兴元元从奉天定难功臣赐爵勲有差亡歿者与追赠中书门下节度使东都留守度支盐铁等使京兆尹观察招讨等使及神策神威金吾六军将军大将军英武威远镇国军使陇右经略军使节度留後各与一子官有差其神策神威六军英武军等使并与加官神策神威六军英武威远营左右金吾及皇城将士及缘御楼立仗将士等赐物及爵阶有差应东宫官及侍读侍书教授在正月二十六日以前者国已【阙】职掌行事及册命官受顾命撰制诏及修册文并写制诏官等赐爵加阶勲进改有差蕃客等共赐物一千八百四十五匹义武军节度下官健在城立仗共赐物三千八百四十五匹立仗将士等量加改转内侍省及内坊官正诸道进奏院及奏事官赐爵勲阶有差内外五品以上文官及台省常参官宜至四考满与转中外通迁量才叙用其中政绩尤异须甄升者不在此限常参官及诸州刺史有先得替及假百日经丧去官未授官者并即与进拟百司及在城诸使息利本钱粮徵放多年积成深弊内外官科钱职田等厚薄不均两税及诸色榷税钱物重轻须有损益并宜委中书门下与所司商量其利害条件以闻不得擅开采禁钱务令通济诸色人中有才识兼茂明於体用者经术精深可为师法者达於吏治可使从政者宜委常参官各举所知其在外者长吏精加访择具以名闻仍优礼发遣朕当询事考言审其才实如无人论荐者即任自诣阙廷内外官及诸色人任上封事极言时政得失才有可观别当甄獎百姓九十以上版授及赐各有差仍令官吏就家存问顺孙孝子义夫节妇旌表门闾重加优恤

穆宗即位赦

着大明者日也出乎震而见乎离则八紘开朗万象昭焕涣大号者风也发厚地而鼓羣动则氛蒙荡涤郁伏舒散王者如日之照临故圣功作而庶类覩如风之号令故德音降而兆人从朕以寡薄方兹嗣服荷天地之眷佑承祖祧之祚运夙夜祗励惧不克周永惟风教之流弊毗俗之疾苦思布济时之政宜弘利物之泽庶有以导迎和气感兹欢心宜申在宥之恩用启自新之路可大赦天下自元和十五年二月五日昧爽已前大辟罪已下罪无轻重咸赦除之唯官典犯赃及故杀人者不在免限左降官量移近处已经量移者更与量移如复资者即任依常调选责授降资正员官者亦与追改亡官失爵不齿者量加收叙流人及僧尼道士移隶者节级放还及移近处诸色得罪人中如有先勅去纵逢恩赦不在放还限者并与量移若曾任五品已上官者奏待进止左降官及流人先有官者如已亡歿各还本官自今日已前曾有痕累禁錮等一切并与洗涤永怀罔极弓剑不留号奉终天用深哀感应缘山陵制度及丧仪礼物宜委中书门下及诸司长官等博询故实务遵礼度必诚必信副朕哀怀所缘山陵造作及桥道置顿所须并以内库钱充不得辄令科配百姓度支诸州府监院从贞元八年已後至元

和十年已前共计欠钱壹百壹万伍千玖百余贯盐鉄使诸监院应欠元和十三年已前钱物除准前制疏理外共计一百八万八千六百余贯石等户部诸州府从建中三年已後至元和十三年已前应欠在州贫穷并遭水旱逃亡百姓腹内兼连接淮西河南贼界并烧劫散失及贷百姓钱物五十万九百余贯石等京兆府从元和五年已後至十三年已前应欠诸色物共肆十一万九千六百余贯石【阙】东等州府监院百姓欠负但在官典所由腹内者一切放免诸州府除京兆河南府外应有官庄宅舖店碾磑茶菜园盐畦车坊等宜割属所管州府诸道除边军营田处其军粮既出其正税米分给其所管营田自为军中资用不合取百姓营田并以瘠薄地回授百姓浓肥地其军中如要营田任取食粮健儿不得辄妄招召天下百姓等自属艰难弃其乡井户部版籍虚系姓名建中元年已来改革旧制悉归两汉税法久则奸弊滥生自今已後宜准例三年一定两税非论土着俗居但据资产差率其择刺史县令宜委门下中书尚书省御史台官有所谳知即具闻奏如赃污残人当坐举主榷税之法虽合同遵疮痍之余姑欲寛假其河北盐宜委度支与榷盐使审细商量具条流闻奏内外百官食料钱一倍至五倍以上节级放免仍每经十年即内外百司各赐钱一万贯充本各据司额大小公事闲剧及当司贫富作等第给付应属诸军诸使诸司人等在村乡及坊市店舖经纪者宜与百姓一例差科不得妄有影占如有违越所司具所属司并人名具奏如闻度支盐鉄盐院等所在影占富商高户庇入院司不伏州县差科疲人偏苦事转不济如有此色仰当日勒归州县诸道除正勅率税外不得妄托进奉擅有诸色榷率天下州府除两税合送上都钱物及所司常贡外辄不得别进钱物并方镇得替後至城亦不得辄有进献掖庭籍没罪人妻女等宜放归亲族其诸军先擒获吐蕃生口配在诸处者并放归本国愿住者亦听内外文武见任致仕官三品已上赐爵一级四品以下加一堵诸军将士等普恩之外赐阶爵有差二王三恪文宣王及公主县主嗣王节级赐与一子官及出身宗子有才行者悉以名闻奏仍委中书门下量才叙用皇【阙】五等已上亲皇太后二等已上亲并赐阶爵武德已来配飧及第一等功臣并张巡许远南霁云顔杲卿顔真卿等尚父子仪赠太师晟赠太尉秀实子孙中与一子官有差其中有才行堪任台省者量才叙用中书门下并诸道节度使诸州府长官东都留守及京常参官诸军使等父母祖父祖母并节级与追赠父母存者与官封已经追赠者更与改赠兴元奉天功臣及蔡郛立功将士普恩之外更赐勲爵亡歿者与追赠中书门下及节度等使东都留守度支盐鉄使京兆尹诸州刺史等赐一子官有差在城诸军将士节级赏赐仍加阶爵京西京北及振武天德八道节度及都防御使下神策一十二镇将士等共一十八万六千七百余人并赐物一百八万一千八百余匹东宫官及侍读普恩之外赐爵加阶仍并与进改自国哀及行事命职事官普恩之外赐阶爵及勲其受顾命撰制诏及册

文并写制【言】官等特加一阶赐爵一级并赐上柱国优与进改书册官特加一阶尊亲之礼既展於徽章广爱之恩宜申其庆赐皇太后诸亲委中书门下量第等节级优赏文武常参官及外官职事五品已上有母者并加邑号如已至郡太夫人国太夫人者许回授周亲缘皇太后册礼职事官并节级赐物天下百姓有父母高年者赐粟皇城内蕃客等并节级赐物今年正月二十八日至闰正月三日宫苑诸门子守捉西内立仗将士等量加改转应内侍省及内坊宫正等并赐勲爵常参官及诸州刺史少尹赤令有先得替因病假满百日解官并终制未授官者及致仕官并与进拟天下诸道州不得擅有闭籾禁钱务令通济内外文武官及诸色人等任上封事极言时政得失才有可观别当甄獎应流外色役人等赐勲有差

敬宗即位优赐诸军诏

朕以寡昧祇膺宝位载怀悼惧岂所克堪而羽卫爪牙禁营司旅昼巡夜警叶力悉心自始衔哀至於踐阼忠勤匪懈诚节用彰将图锡赉务欲丰厚属频年旱歉御府空虚如闻边上将士至今未给衣赐永言遐虑深切寤寐沾恤之时所期切济两军宫健各宜赐彩十匹钱十千畿内诸镇各赐绢十匹钱五千军吏及城内诸军赏物节级有等仍於内库更出彩绢共二百万匹付度支充边军春衣并天下州府赋税如要蠲放者并委所司约此数均融取济凡百将士宜悉朕怀长庆四年正月

唐大诏令集卷二

卷三

钦定四库全书

唐大诏令集卷三

宋 宋敏求 编

帝王

即位赦下

武宗即位赦

宣宗即位赦

懿宗即位赦

改元上

改元贞观诏

改元总章诏

改元弘道诏

改元光宅诏

即位赦下

武宗即位赦

朕粤自蕃邸来握乾符銜哀受遗当宁兴感永惟我高祖太宗艰难创业其後列圣奕叶重光
英睿相继逮於先帝秉文之德光阐皇猷将洽理平甫臻仁壽顾予冲昧叨承大统祇命若临
於泉谷思理未详於政刑空怀济物之心将纘已成之业所尚者节俭所宝者忠良肆眚法解
网之仁厚生敷流泽之惠上凭灵祉下便物情期中外以叶心冀遐迩而咸乂爰遵典训特霈
鸿恩谅表政於惟新敢忘忧於馭朽可大赦天下自开成五年二月八日昧爽已前大辟罪已
下罪无轻重咸赦除之惟十恶叛逆故杀人官典犯赃不在此限

宣宗即位赦

天分四时必始发生之德帝临九有是先荡涤之恩故雷雨作而万物滋荣庆泽行而兆人悦服皇王之典今古所遵朕以眇身获纂丕业上承宗社之眷佑下系生灵之安危夙夜祇勤庶臻於理永惟黎元之困赋役之繁干戈未宁输发尚急流移未复冤滞犹多刑狱未平奸诈斯起进献无度淫巧竞生思思与蠲除俾从开泰将以导迎和气咸致欢心爰因大庆之晨式举惟新之令可大赦天下会昌六年五月

懿宗即位赦

门下朕闻龙之腾天汉也则必乘风云鼓雷电以濡六合君之践大位也则必敷仁惠焕号令以泽万方是以地不间於幽遐事罔计於轻重洪圣兴而皇渥溥德音振而庶类苏故僭咎咸除枯沉尽起斯皆前代令典国朝成规委饬谅戒於惠奸凝命始怀於布泽顾予寡德嗣纘丕图夙夜乾惕若俯泉谷永惟我高祖太宗之艰难締构又惟我列圣之慈俭统承思所以克绍休明弘济亿兆剗末俗之弊清理化之源启祥导和应天顺物致驩心於率土和恭已以临民爰申在宥之恩因洽维新之庆可大赦天下自大中十三年十月九日昧爽已前大辟罪无轻重已发觉未发觉已结正未结正及系囚见徒常赦所不免者咸赦除之唯犯十恶叛逆及故杀人官典犯赃及持杖行劫并不在此限其故杀人者已伤未死已死更生意欲杀伤偶得免者并同已杀人法处分又刑狱之内官吏用情推断不平因成冤狱无问有赃无赃不在原免之限

改元上

改元贞观诏

诏曰朕遐观方册历选前王大道既隐至公斯革莫不思树风声以隆鼎命太皇膺籙受图功成治定鄙圣人之余事顾天下而窅然永言俗累高居物表爰以大宝俯授微躬自肃奉神器亟移灰律属三正在旦万国来庭长世之术既弘惟新之命方始体元居正今则其时可改武德十年为贞观元年

改元总章赦

朕以寡薄忝承丕绪奉二圣之遗训跨亿兆以初临馭朽兢怀推沟在念而上玄垂佑宗社降休岁稔时和人殷俗阜车书混一文轨大同检玉泥金升中告禋百蛮执贄万国来庭朝野懽娱华夷胥悦但为郊?严配未安太室布政敷化犹阙合宫朕所以日昃忘疲中宵辍寝讨论坟籍错综羣言采三代之精微探九皇之至蹟斟酌前载制造明堂栋宇方圆之规虽兼古制肆筵陈俎之法独运裁成宣诸内外博考详求度其短长冀长闻见而鸿生硕儒俱称尽善宜命有司急及时赴作务从折中称朕意焉今阳和在辰景风扇物昆虫草木咸获康宁朕之百姓尚多劳止恩覃惠泽与其更新可大赦天下改乾封二年为总章元年大辟罪已下皆赦除之

改元弘道诏

朕以寡昧谬膺丕绪未尝不孜孜访道战战临人驭朽怀秋驾之危负重积春冰之惧日慎一日三十四载於今矣何则足寒伤心人劳伤国下安即上逸时弊即君忧所以身处九重而情周万姓建本之怀遽切抑末之念弥深今虽庶绩已宁淳源未洽履素归厚者遂寂寥而靡闻徇华趋利者尚驰骛而不息顾以薄德有谢移风永睠羣方在予多愧况朕之绵系兆自玄元远叶先规光宣道化变率土於壽域济含生於福林属想华胥载劳寤寐所冀内外寮案各竭乃诚敦惟黎民俱崇简质旧染薄俗咸与惟新凭大道而开元共普天而更始宜申霈泽广被八紘可改永淳二年为弘道元年大赦天下前後责情流人并放还老人年百岁已上者版授下州刺史妇人版授郡君九十已上者版授上州司马妇人版授县君八十已上者版授县令并归节级量赐粟帛孝子顺孙义夫节妇表其门闾终身勿事鰥寡孤独笃疾不能自存者量加赈给仍天下诸州置道士观上州三所中州二所下州一所每观各度七人又比天后事条深有益於为政言近而意远事少而功多务令崇用式遵无怠见任内外官五品已上经四考及守五品经三考六品已上计满三考政用清勤状无私犯者各加一阶

改元光宅赦

鸾台朕闻上皇建极体元气以育羣生大圣承天法阳门而陶庶类与时舒卷叶三正而推移随道污隆应五干以通变故能牢笼宇宙埏埴人灵符景运而财成契休期以光宅昔有隋标季率土沦胥豺狼肆吞噬之灾亿兆被刘之酷高祖神尧皇帝披图汾水仗钺参墟靡氛祲而安四维扫揜抢而清六合太宗文武圣皇帝负日月而膺运鼓雷霆之震威荡海夷山功浹八荒之外救灾拯溺仁沾万域之表乐和礼洽天平地成茂绩光於邃初鸿名冠於开辟高宗天皇大帝云房诞睿虹渚降灵受绿错之祯符应朱绂之景命飞车乘毳臣轩项之不臣没羽浮金服禹汤之未服所以开边服远更阐寓於先基富贵宁人重增辉於前烈抚璇当宁调五气於明堂考瑞升中朝百神於日观茫茫衆俗宁观覆焘之恩蠢蠢庶氓孰辨陶甄之力固已千年启旦三圣重光历选前书无闻往载岂谓道隆金镜运迫鼎湖方延翠渚之祥遽托白云之驾以社稷之大任属荒眇之微躬歛奉遗言载深悲惧遂以兹菲德开导嗣王式综万几载宣风化所赖王公卿士各竭乃诚若济巨川实资舟楫然自恭临朝序已积炎凉教靡致於移风道尚慚於变俗良以哀迷在疚荼棘纏心陵庙未安匪皇专虑今者凤京遥践龙驭上升既因大礼之终宜更中区之始朕居临赤县求瘼之志每盈子育苍生恤隐之怀镇切惟欲励精为政克己化人使宗社有北辰之安区致南风之泰以斯酬眷命用此报先恩冀上不負於尊灵下微申於至恳夫五行通用列代相承欲崇其德先遵所尚故夏以金运乘骊而尚玄周以火行贵騂而尚赤将隆母德必欲子扶近者地不藏珍山无秘宝皇家土德胜气弥彰宜从白赭之象以辅黄中之运自今已後旗帜皆从金色仍饰之以紫画以杂文其应合改者所司详依典故供奉帷幙咸用紫色自録府卫所旗并改以皂八品已下旧服青者并改以碧其在京诸司文官职事五品已上清官并六品七品清官并每日入朝之时常服袴褶诸州县长官在公衙亦准此自余官朔望朝参皆依旧其色皆依本品又镇星之在太微已历年载着土清之美应表坤祚之元符宜同感帝以时荐享又东都改为神都宫名太初宫但列署分司各因时而立号建官置职咸适事以标名而今曹僚之中称谓多爽宜改尚书省为文昌台左仆射为文

昌左相右仆射为文昌右相吏部尚书为天官尚书户部尚书为地官尚书礼部尚书为春官尚书兵部尚书为夏官尚书刑部尚书为秋官尚书工部尚书为冬官尚书门下省改为鸾台中书省改为凤阁侍中改为纳言中书令改为内史太常寺改为司礼寺鸿胪寺改为司宾寺宗正寺改为司属寺光禄寺改为司膳寺太府寺改为司府寺太仆寺改为司仆寺卫尉寺改为司卫寺大理寺改为司刑寺司农寺依旧左右卫亦依旧左右骁卫亦为左右武卫左右武卫为左右鹰扬卫左右威卫为左右豹韬卫左右领军卫为左右玉铃卫左右金吾卫依旧其余曹司及官僚名未改者所司速制名奏闻又司隶之官监郡之职所以巡省风俗刺举愆违今人物殷烦区宇遐旷而所在州县未能澄肃可置右肃政御史台一司其职员一准御史台专知诸州按察其旧御史台改左肃政御史台专知在京有司及监诸军旅并出使其诸州录事参军宜依旧令在京五品已上清官每日章善显福等门各一人待诏朕当亲访政道详求得失又玄元帝者皇室之源韞道德而无为冠灵仙而不测业光衆妙仁覃庶品岂使宝允见御宸居先母竟无尊位可上尊号曰先天太后宜於老君庙所敬立尊像以申诚荐又洛州界内所有帝王之陵及自古清直之臣忠廉之佐并令州县就其莹域一申祭享又自武德已来元勲佐命或以忠鯁事主或以道德臣君非身在有犯缘子孙絶封者前诏虽已处分或恐仍有阙遗宜降霈泽重申前命又往日先朝圣武荡定遐方日月照临咸为郡县皆荷生成之惠无复远近之殊朕矜抚之怀岂隔中外每念其殄嗣愍愴良深继絶兴亡实惟本志各宜求其後胤立之以承享献其诸都护汉官及镇兵等并悉放还其营奉山陵使及鹵簿使等并依别勅处分又两京之所徭赋实繁亦令所司作优量法使劳逸得所灵驾所涉千里斯遥在路黎民莫不哀奉念其劳敝情增感惻其缘供顿及山陵者并免今年课税又比来诸道军行叙勲多滥或端居不出以货买勲真伪相蒙深为巨蠹自今以後所司宜明具条例务令禁断责成斯在可不勉欤如更有违必越法科处分又比来放出宫女已降诏书然以在内多时咸悉愿住但念其各有亲属岂可久致分离宜准前恩即令放出又隆平日久户口滋多物务既烦欺隐斯衆其上州三万户已上大县万户已上各宜析出别置州县惟雍洛二州不在此限又济时之道求贤是务其官人及百姓等或器标瑚璉材堪栋干或在职清慎或抱德幽栖或武艺驰声或文藻流誉宜令京官九品已上诸州长官各举一人咸以名荐务取得贤之实无貽滥收之讥又前者有诏具述内外官寮备陈行事以申劝沮但恐百官在职尚有亏违今欲重降深恩更垂寛宥弃瑕録用罔责於前非滌罪论功必期於後善若又不悛已过重挂疎罗当使置以严刑倍加其罚思与士庶共此维新可大赦天下改文明元年为光宅元年自九月五日昧爽已前大辟罪已下罪无轻重已发觉未发觉已结正未结正系囚见徒皆赦除之流人未達前所者放还其犯十恶官人枉法受财监临主守自盜所监临刼贼杀人故杀人谋杀人反逆缘坐并军将临戎挫威丧律镇遏失所亏损师徒及常赦所不免者并不在赦例亡官失爵量加收叙诸年八十以上各赐粟貳石绵帛二段九十以上赐粟三石绵帛三段百岁已上赐粟五石绵帛五段并依旧例版授孝子顺孙义夫节妇咸表门闾鰥寡惇独笃疾之徒不能自存者并加賑恤亡命山泽挟藏军器百日不首复罪如初敢以赦前事相告言者以其罪罪之布告天下咸使闻知其诏书内事有未尽者仍令所司作条例处分

卷四

钦定四库全书

唐大诏令集卷四

宋 宋敏求 编

帝王

改元中

改元载初赦

改元开元赦

改元天宝赦

改天宝三年为载制

改元上元赦

去上元年号赦

改元永泰赦

改元大历赦

改元中

改元载初赦

朕闻元皇纂历则天地以裁规大圣握图法陰阳以施化故能牢笼品类陶铸生灵敷景运於休期阐宏基於光宅有隋失驭率土分崩赤县为禾黍之場苍生遇涂炭之酷我高祖神尧皇帝龙兴汾晋凤起寰区除梟獍而安八荒剪鲸鲵而清四海太宗文武圣皇帝膺昊穹之历数鼓雷电之雄威服远冠巢燧之前开边越羲农之际鸿名迈於三五茂绩隆於往初高宗天皇大帝稟雷泽之祯符降天纵之神器湛恩所被匝乾坤覆载之乡至化所覃尽舟车所通之境抚璇丹极辑瑞苍岩天平地成淳风启千年之运乐和礼备宝祚隆三圣之基逖听王猷馨闻

帝载朕以虚薄?奉睿图夙怀兢业不遑寝食幸穹昊贻佑宗社延祥河荐合天之符洛出永昌之籙时和岁稔远肃迺安斯皆先德所延屡彰嘉贶自恭临亿兆已积炎凉尚想希风未臻於至道顾循菲德媿切於深衷思弘顾托之恩再阐混元之始夫以玄穹列象三辰所以丽天厚载含章五行於焉纪地易曰三五以变错综其数通其变遂成天下之文极其数遂定天下之象火水相变其卦为革彖曰天地革而四时成言五德更相生变革万物故帝者改政施教明受之於天下定之於人者也仲尼曰其或继周者虽百代可知盖以文质相因法度相改故矣是以伏羲高阳有周皆以建子之月为正神农少昊陶唐有殷皆以建丑之月为正轩辕高辛夏后汉氏皆以建寅之月为正後虽百代皆可知者以此虽遭遇不同步骤殊致未有不表明轨物以章灵命之符者也我国家创业有意乎改正朔矣所未改者盖有由焉高祖草创百度因循隋氏太宗纬地经天日不暇给高宗嗣位将弘丕训改作之事屡发圣謦言犹在耳永怀无及自五帝纘统三王驭宇或父子相承同体异德或金木迭改应天顺人故纳麓登庸粤受终於文祖干戈革命必理历於明时然则开元配永肇自阳来之旦统历履端基於朔易之首孳萌发内气律由中品物任而昭苏生类荡而敷革是知夏之人统不逮殷之地正殷之地正有殊周之天统元命所苞实在兹矣周公稽古制礼於成王之日汉高握德改元於武皇之代则知文物大备未遑於上业损益之道谅属於中平朕所以式遵礼经奉成先志今推三统之次国家得天统当以建子月为正考之羣艺厥义明矣宜以永昌元年十有一月为载初元年正月十有二月改腊月来年正月改为一月自载初元年正月一日子时已前大辟罪已下罪无轻重已发觉未发觉已结正未结正系囚见徒皆赦除之其叛逆缘及子孙杀祖父母父母部曲容女奴婢杀主不在赦限其与敬业虺冲并诸虺友或有往还其魁首已伏诛其支党事未发者并特从原免不得更相告言内外见任文武九品以上职事官并赐右爵之级天下百岁以上老人版授下州刺史米粟五石帛十段九十以上版授上州司马米粟四石帛七段八十以上版授县令逋租悬调并丁夫杂匠卫士及有番地等达番及逃走应陪番及徵课调者并特宜免放其欠负官物及盗诈三库物并不在赦限鰥寡孤独笃疾等不能存立者量加赈恤孝子顺孙义夫节妇旌表门闾终身勿事天下百姓年二十一身为户头者各赐右爵之级女子百户赐以牛酒明堂役工人未被恩者付司郎类例定等级奏闻十五日内使了缘供明堂致死人其有未沾勲赐者亦宜准例酬给今年麦不熟处及遭霜涝之处并量放庸课州县好加检校勿使饥馑新年宣差科百姓稍有辛苦亦宜量加优恤蠲其徭役所司类例处分供象州军百姓艰辛处未得复者宜给复一年洛州军谷徭役繁多代朔并忻等州行军及诸州供明堂木及铜处所司各类例节级给复皇亲诸陪位未出身者量材处分已出身者赐勲一转富商大贾衣服过制丧葬奢侈损废生业州县相知捉搦两京兼委金吾检校天下百姓皆须嫁娶以时勿使外有旷夫内有寡女战亡人格外赠勲两转回授葭亲其子孤嫠者州县给粮安养征镇人家口州县存恤劝课殷有之家助其营种勿使外人侵欺仍令所司刊定正礼乐删定律令格式不便於时者内外官五品已上各举所知九经文字集学士详正革其讹舛亡官失爵量加叙録长流人移别勅流人移贯人降授官人反役缘逆人用当及造罪过特处分者虽未至前所并不在赦限西府功臣及晋府子孙屈滞者量加收叙所司奏闻亡命山泽挟藏军器百日不首复罪如初敢以赦前事相告言者以其罪罪之率土之内赐酺三日赦书日行五百里朕又闻之人必有名者所以吐情自纪尊事天人是故以甲以乙成汤为子孙之制有类有象申繻明德义之由朕今怀柔百神对扬上帝三灵眷佑万国来庭宜膺正名之典式敷行政之躅宜朕以璽爲名自卦演龙图文开鸟迹万人以察百工以义所以弘敷政道宣

明礼乐指事会意改易异涂转注像形屈伸殊制周宣博雅史籀兴古篆之文尼父温良丘明述春秋之传自诸侯力争姬室寢微离为二周分成七国法律异令田畴异亩言语异声衣冠异制秦兼天下剋灭古文隶卒屡兴兵车岁动官狱繁鸞爰创隶书自着秦文肇兴八体刻符兼於大篆摹印逮於爰书两汉因之九千余字张敞杜邺讲学於前杨雄甄丰校理於後魏晋以降代乏名儒穿凿多门形声转缪结造新字附会其情古今讹舛稍益繁布书画无端平之体鱼鸟增奔放之容转相仿效日滋月甚遂使後生学徒罔知所据先王载籍从此湮沉言念浇漓情深悯悼思返上皇之化伫移季叶之风但习俗多时良难顿改特创制一十二字率先百辟上有依於古体下有改於新文庶保可久之基方表还淳之意昔在包牺开木德之运轩辕应土行之序循环终始布在方册莫不绩着帝猷功宣皇道方列三微之统乃膺五行之历虽则盛比共工强踰嬴政齐桓晋文之业大彭豕韦之美才为霸者岂登帝籙自炎精荡覆王风哀思汉氏蒙尘中原离析当涂逆取但肆兵威典午专权无闻德化故三国鼎峙五胡幅裂或道乖嗣德或业匪孙谋良由取之不以乐推失之在乎虐用者也及齐梁窃据僻在江淮周魏勃兴奄宅咸洛虽变夷从夏号令惟行於境内而智小谋大声教不通於天下隋之御极陈氏犹存开皇之中才闻混一嗣主失道俄至分崩七八年间生人泯絕秦项之酷犹未之半开辟已来盖未之有我国祖宗积德文武重光仁风被於四表英猷冠於三代易不云乎天地之道恒久而不易者也仲尼曰善人为邦百年可以胜残去杀则知圣王久於其道而天下化成矣自魏至隋年将四百称皇僭帝数十家莫不废王道而立私权先诈力而後仁义勲未踰於列国德不渐於霸图虽复时合诸侯一匡区域而晋武践祚茂烈多惭於水官隋帝乘时雄图不逮於秦氏惟彼二君闰位况区区者岂宜当三统之数者乎朕逖听皇纲幽求帝典定王伯之真伪洗生人之耳目庶叶三推之美光宣五帝之次况当布政景化维新太初开历上元伊始宜以发挥大宝申明历数恢皇家正土之符继炎刘真火之序摛之罔极垂之无穷以周汉之後为二王仍封舜禹成汤之裔为三恪有司求其苗裔即加封建其周隋宜同列国其嗣使祭焉布告遐迩咸知朕意主者施行

改元开元元年大赦天下制 苏頌

黄门圣人无心同於吹万上皇有道契於明一居天下之尊者莫大休其大以照临成天下之务者至公顺其公以康济故能稽昌历考元符通於神祇格於上下鸿名不可以深拒盛典不可以固违斯岂在予而徇於物也朕以菲德丕承圣训扫除櫓枪保卫宗稷内问安以承志外听理以推诚始自朝廷纳之以轨物加於蛮貊泊之声教欲令跂行喙饮含齿戴髮去其夭札蠲其疵厉每兢兢於紫座宁自贵於黄屋而凡我羣辟顾斯兆庶以为人谋协从天意钦若王者人所归也帝者天之号也归之者以德号之者以功然号以功成则功不可以不表归以德厚则德不可以不励朕猥属与能之运遂忘冲让之私将逮建寅之岁首甫释建子之天统是用发挥景命受兹礼册夫循名者责实谋始者虑终勉而全之非敢自满所以克己思政惟怀永图惧弗胜荷用多慙惕赦令所作其来尚矣是则奸人之幸尝思奔马之喻朕但欲令其畏恶化之为善庶比屋可封岂开罗为惠朕之此志每用形言自昨冬序颇愆农泽泊简辰?日有司备礼则上天同云北风雨雪意者将乘广庆必得湛恩宜凭宥过之典以叶随时之义可大赦天下改先天二年为开元元年自开元元年十二月一日昧爽以前大辟罪已下已发觉未发觉已结正未结正系囚见徒咸赦除之云云礼尚於俭书戒於奢朕方归敦朴以存劝沮至

於乘輿服御及土木之功蠲除樽节贵从简省王公已下宜识此心将欲先自朕躬冀能化行海内薛伯阳以凶魁之子合寘严刑缘尚主之恩特令远贬旋念从夫之礼深矜自我之出宜复旧婚再承新命可唐州别驾员外置同正员郭元振往立大功保护於朕顷因閱武颇失军容责情放逐将收後効可饶州司马员外置同正员朕闻罪不相及先王之制叔向岂坐於凶弟展禽见称於哲兄刘?不以刘伟获辜王导不以王敦废职崔涤为其兄湜构祸每进欵诚事朕有年心则无隐忠邪既判赏罚宜均俾践储卿式彰臣节可太子仆员外置同正员国初以来宰相及实封功臣子孙一房沈翳未承恩者令所司访择有才用者量加擢用周朝酷吏来俊臣周兴之徒残害宗枝毒害良善永言及此深所叹恨其酷吏有身在及酷吏子孙亦令所司勘会甄别处分诸军将士有年岁深久所由要籍或不得选集及未叙劳効咸委军将据实奏闻仍令所司早勘处分及诸军将佐摠管以上自今已後冬正束帛一准京官例给亡命山泽挟藏军器百日不首复罪如初敢以赦前事相告言者以其罪罪之赦书日行五百里布告遐迩咸使知闻主者施行

改元天宝赦

古先哲王之致理也皆上顺天心下稽人事时令赞发生之德灵符叶纪年之称考彼前载斯为大猷恭惟烈祖玄元皇帝天宝锡庆象帝之先垂裕後人重光五圣自朕嗣守丕业洎三十年实赖宗社降灵昊穹孚佑万方无事六府惟修寰宇晏如庶臻於理然则乾元在上仁覆为首皇王临下惠化攸先恩弘善贷用广滋育尊道宝而建元畅玄风於不宰况属阳和布气献岁发生宜覃在宥之恩式降惟新之泽可大赦天下改开元三十年为天宝元年自天宝元年正月一日昧爽已前大辟罪已下罪无轻重已发觉未发觉已结正未结正系囚见徒常赦所不原者咸赦除之诸色左降官并其流人未经量移者亦与量移禁麤卵以遂生成自今已後每年春天下宜禁弋猎采捕如闻百姓之内或有户高丁多苟为规避父母见在乃别籍异居宜令州县勘会其一家之中有十丁以上者放两丁征行赋役五丁已上者放一丁即令同籍共居以敦风教天下侍老八十已上者宜委州县官每加存问仍量赐粟帛侍丁者令其养老孝假者矜其在丧此王政优容俾申情礼而官吏不依令式多杂役使自今後不得复然国之急务莫若求才顷者虽屡搜扬士庶尚虑遗逸更宜精访以副虚怀其前资及白身人中有儒学博通及文词秀逸或有军谋越衆或武艺絶伦者委所在长官具以名荐若乃弘我风化实惟方岳必伫其人以膺共理其京文武官五品以上清资并郎官据资历人才堪为刺史者各任封状自举但文宣垂训事必正名而黄钺古来以金为饰金者应五行之数有肃杀之威去金称黄理或未当其黄钺宜改为金钺副威武之义焉内外文武九品已上各赐勲两阶前王重典在乎祭祀况属惟新事宜昭告五岳四瀆名山大川诸灵迹及自古帝王忠臣义士并令所司由本州县致祭

改天宝三年为载制

履端正名义取垂范体元设教在乎变通虽俗革从宜罔不稽古朕纘复兴运恭守睿图常恐至化犹微淳风尚薄未臻华胥之俗莫登可封之人故未明求衣日昃忘食励精为理思致讎和历观载籍详求前制而唐虞之际焕乎可述是用钦若旧典以叶维新可改天宝三年为三

载今春事将兴阳和布泽发号施令之日革故履新之时宜弘在宥之恩以助生成之化其天下见禁囚徒应杂犯死罪者宜各降一等自余一切放免其十恶及造伪妖妄头首官吏犯赃并奸盗等害政既深情难容恕不在免限凡诸郡县仍令太守县令劝课农桑先处分太守县令在任有增减户口成分者所由司量为殿最自今已後太守县令兼能勾当租庸每载加数分成者特赐以中上考如三载之内皆有成分所司録奏超资与处分其丁户仍须按实不得取虚挂之名使亲隣代纳受其奸弊凡在黎献实资存恤一失生业则流庸不归每轸於怀深可怜悯诸色当番人应送资课者宜当郡县具申尚书省勾覆如身至上处勿更抑令纳资致使往来辛苦从闰二月至六月已来其当上人中单贫老弱者委郡县长官与所由计会便放营农诸军征镇及防人有尪羸疾病者委节度?择放归中外庶寮勉修其职各副朕意宣布遐迩咸使闻知【正月一日】

改元上元赦

自古哲王恭承景命莫不执象以御宇历时以建元必当上稽乾符下立人极者也朕承累圣之鸿绪绍大中之宝位属蠹孽干纪王师尚劳乾乾之心岂忘鉴昧一物失所每轸纳隍之忧万邦未宁深怀馭朽之惧赖上玄垂福宗庙降灵百辟卿士同心戮力方冀干戈载戢区宇义安常励躬於帝图恒取则於天道属天人叶纪景象垂文爰遵革故之典将契维新之命义存更始庶有应於天心泽被无私宜载覃於率土可大赦天下改乾元三年为上元元年自上年元年闰四月十九日昧爽已前大辟罪已下已发觉未发觉已结正未结正系囚见徒罪无轻重常赦所不免者咸赦除之其与逆贼元谋及胁从受驱使惧罪而来降并潜藏不出者已频处分但能归顺舍罪除元恶之外一无所问其史思明心能改图束手来款亦当洗其瑕衅议以勲封内外文武官赐爵各有差其六军及飞龙闲廐加赐物其成都灵武元从扈从通加有差在外诸军各録赏物阵亡将士优加褒赠行人家口所在赈给定祸乱者必先於武德拯生灵者谅在於师贞周武创业克宁区夏惟师尚父实佐兴王况德有可师义当禁暴稽诸古昔爰崇典礼其太公望可追封武成王有司依文宣王置庙仍委中书门下择古今名将同文宣王置亚圣及十哲等享祭之典自古帝王钦慎刑法盖以法者人之命刑者国之权苟或失其科条固难措其手足顷或奸臣擅命中兴不修造次便行哀矜何在自今已後其有犯极刑者宜命本司依旧三复庶平反之际人谓不冤幽明之间理皆无滥又书称羣望咸秩诗曰祀事孔明爰自遐代尤崇祭祀朕深维古义必在至诚苟德之不修神亦无据故知精诚有感黍稷非馨而况宋璟发言固三从而可验汉文深诚为千载之明徵事可遵行理当变革有司所立秘祝之法或移於岁或移於人君人之心宁所忍也自今已後削去此法其中祀并杂祭祀事一切并停其诸应合祭祀列於恒典所用祭科一依古制务从减省以副朕心又车服以庸有虞盛典威仪以等周礼旧章往属承平多历年所下至于公卿列位中外在官多以奢僭为心流弊成俗宜命所司定王公以下车服产业各详古制及令式作节限闻奏自顷戎车未息残孽犹虞军吏献功务陈首级且四海之内孰非王人岂以苟从昏迷陷在夷戮一朝授首悬彼藁街朕志存好生悯其驱胁其诸军所获首级除元恶之外一切不须传送又设官分理本在安人通迁之政务於利物今寰瀛之内兵革未清加以时或不登物皆涌贵军储是急廩稍靡供冗官之流固甚劳弊其京闲司官等材堪厘务者宜命守中书门下即类例量资出授外官王者设教择贤以理广徵岩穴用副薪粢宜令中外五品已上文武正员官各举贤良方正直

言极谏一人武艺文才俱堪济理者亦任状举其或文乏词策武非骑射但权谋可以集事才力可以临戎方圆可取亦任通举并限制到一月内奏毕自古明王圣帝名山大川并委州县长吏择日致祭义夫节妇孝子顺孙旌表门闾终身勿事

去上元年号大赦

为人上者与衆守邦自古哲王惧其满假聪明睿哲罔不在躬文武圣神乃以为号顾予菲薄运属经纶一旅成师复其旧物圣皇纳人壽域游意道源神器之重传归於朕获守丕业若履春冰敢忘谦冲日益招损欲垂范而自我亦去华而就实其乾元大圣光天文武孝感等尊崇之称何德以当之以钦若昊天定时成岁春秋五始义在体元惟以纪年更无润色至於汉武饰以浮华非王者之茂典岂永代而为则三代受命正朔皆殊周宗之王实得天统阳生元气之本律首黄钟之尊制度可行叶用斯在自今已後朕号惟称皇帝其年但号元年去上元之号其以今年十一月为天正岁首使建丑建寅每月以所建为数承天陟稽古临人必由革故之源方合大中之道风行?县泽被无涯钦上帝之心锡苍生之庆可大赦天下自二年九月二十一日昧爽已前大辟罪无轻重已发觉未发觉已结正未结正见系囚徒常赦所不免者咸赦除之其十恶五逆及伪造头首官典犯赃法实难容刑故无小并不在免限其史朝义若能翻然改图背逆归顺罪无所问加以勲封自乾元元年已前开元已来应反逆连累赦虑度限所未该及者并宜释放有官者降资与官无官者依本色例收叙内外官三品已上赐爵一级四品五品各加一阶六品已下赐勲两转成都府及灵武元从普恩之外三品已上更赐爵一级四品五品各加一阶六品以下更赐勲一转眷及勤劳俾其卓叙每以田功在谨农事惟勤不有司存何成重谷诸州等各置司田参军一人令主农事每县各置田正二人於当县拣明闲田种者充务令劝课国之大事郊祀为先贵其至诚不美多品黍稷虽设犹或非馨牲牢空多未谓能享今以元玄孚佑至道为心将臻太和不欲多杀礼乐殊制孝敬同归圆丘方泽任依恒享宗庙诸祠但临时献熟用怀明德之馨庶合西隣之祭唐虞之代肇有九州王者所都文无异制其京兆府河南府太原府三京之号宜停其凤翔先为西京亦宜準此所设谏曹欲闻讽议允副从绳之望须成削藁之书其谏官令每月一上封事指陈时政得失若不举职事当别有处分其诸州别驾可依旧却置每除京官五品已上正员清望官及郎官御史诸州刺史皆令推荐一两人以自代仍具録行能闻奏观其所举以行殿最京文武官等赐物各有差自今已後有隐欺须勾剥者宜勾当年若事连去年亦在通勾其隔年者不在勾限官典隐赃在腹内不在此例其氏姓虽得之久远有与格讳及隐疾同声者宜改与本族望所出大姓自逐稳便名山大川明王圣帝所在庙祠各委州县长官?诚致祭其天下侍老先版授者更改与版授未版授者与版授鰥寡惻独不能存立者委刺史县令量加赈恤义夫节妇孝子顺孙旌表门闾终身勿事赦书有所未及者各令有司速勘会类例条件闻奏

改元永泰赦

叶五纪者建号以体元授四时者布和而顺气天心可见人欲是从爰立大中之道式授维新之命朕嗣膺下武获主多方顾以薄德承兹艰运戎师问罪今已十年饮至策勲虽凶渠之授首劳师黜武岂人主之用心况乃军役屡兴干戈靡定茫茫士庶毙於锋镝噫皇穹以朕为子

苍生以朕为父至德不能以被物精诚不能以动天俾我生灵挤於沟壑非朕之咎谁之过欤朕所以馭朽县旌坐而待曙劳怀罪已之念延想安人之策亦惟羣公卿士百辟庶寮咸听朕命叶宣乃力履清白之道还淳素之风率是黎元归於仁壽君臣一德何以尚兹廼者刑政不修惠化未洽既尽财力良多抵犯静惟哀敬实軫於怀今将大振纲维益明惩劝肇举改元之典弘敷在宥之泽可大赦天下改广德三年为永泰元年自永泰元年正月一日昧爽以前大辟罪已下罪无轻重已发觉未发觉已结正未结正系囚见徒常赦所不免者咸赦除之仆固怀恩战伐有功訐谟任重不终臣节辄肆奸凶妄诱异番同为不轨朕惟责已情重旧勲如能翻然来归必从寬宥其下偏裨等因被驱驰不获已者及所在山谷草窃反侧未安者如能束身而来一切并无所问自广德元年已前天下百姓所欠负官物一切放免在官典腹内者不在免限其百姓除正租庸外不得更别有科率刺史县令与朕分忧凋瘵之人切须抚字一夫不获情甚纳隍有能招辑逃亡平均赋税增多户口广濶田畴清节有闻课効尤着者宜委所在节度观察具名闻奏即令按覆超资擢授其有理无能政迹涉赃私必当重加贬夺永为殿累农政本也食人天也方春之首重於农作除军兴至急余一切并停令百姓得专营农事其逃户复业及浮客情愿编附者仰州县长吏亲就存抚特矜赋役全不济者量贷种子务令安集孝悌力田怀才抱器遗逸未经荐達者各委州府闻奏亲当策试量能叙用应见立仗诸军将士等宜共赐钱五万贯书称咸秩诗美怀柔仰惟衆灵念兹多佑其五岳四瀆名山大川宜令所管牧宰精诚致祭中外寮吏各扬其职无或旷官克副朕意

改元大历赦

王者钦若昊天诞受丕命莫不叶五纪而乘运稽三微以体元上齐璿玑下立人极乃颁历於惟岁更覃恩於率土朕嗣守洪业恭临宝位顷时当寇难运属干戈誓衆兴师为人除害实赖宗社降福寰宇小康用兴淳朴之风庶洽雍熙之化乾坤敷佑大庇生灵文武叶心用力王室非朕薄德而臻於此乃者金革所聚绵历岁时征赋颇繁人犹凋瘵是用疚心疾首当宁兴怀罪以在予馭朽而貽惧每思弘济之道用拯黎元之敝月纒星昴律中黄鍾合天正之符承日至之永祥云在瞩既当伯赵之司惠泽布和宜顺一阳之气建元发号革故惟新俾及履长之节用深行庆之典可大赦天下其永泰二年宜改为大历元年自大历元年十二月十二日昧爽已前大辟罪已下已发觉未发觉已结正未结正系囚见徒罪无轻重常赦所不免者咸赦除之长吏犯赃不在免限夫从简之道大易至言薄赋之规前王令范朕志遵俭约务欲息人徵歛无期诚为劳弊天下百姓除正租庸及诸军器用须外不承正勅一切不得辄有科率国以人为本人以农为业顷因师旅征税殷烦编户流离田畴荒废永言牧宰政切亲人其刺史县令宜以招辑户口垦田多少用为殿最每年终本道观察节度等使按覆闻奏如课绩尤异当加超擢或政理无闻必寘科贬逃亡失业萍泛无依特加招绥使安乡井其逃户复业者宜给复三年如百姓先货卖田宅尽者宜委州县取逃死户田宅量丁口充给仍仰县令亲至乡村安存措置务从乐业以贍资粮王畿之间赋歛尤重百役供亿当甚艰辛哀哉疲人良深悯念盍彻之税着自周经未便於人何必行古其什一税宜停周徵俊造汉辟贤良垂之典籍永代作则天下有安贫乐道孝悌力田未经荐用者委所在长官具以名闻朕当亲自策试量才叙用其立仗将士等宜赐物五万匹五岳四瀆名山大川祀典攸存神理昭着宜以礼致祭

唐大诏令集卷四

卷五

<史部,诏令奏议类,诏令之属,唐大诏令集

钦定四库全书

唐大诏令集卷五

宋 宋敏求 编

帝王

改元下

改元建中勅

奉天改兴元元年赦

改元贞元并招讨河中李怀光淮西李希烈赦

改元元和赦

改元太和赦

改元开成赦

改元广明赦

改元天复赦

改名

武宗改名诏

改元下

改建中元年勅

勅春秋有五色之统盖王者踰年建号体元居正上以继业反始下以书事布策示不忍有变於中年也朕以不造銜泣在疚而三事大夫迫至公之命喻大孝之道实夺予哀为衆所戴恐坠祖宗之遗烈不若先帝之前训如履薄将陷如乘奔失御濡露之感忽焉岁初罔极之怀瞻天靡及旧物未改常典惟新勉而从之良增感奉其以大历十五年改为建中元年所司准式庶協履端於始载符皇极之义也

奉天改元建中五年为兴元元年正月一日赦

门下致理兴化必在推诚忘己济人不悛改过朕嗣服丕构君临万邦失守宗祧越在草莽不念率德诚莫迫於既往永言思咎期有补於将来明徵厥初以示天下惟我烈祖迈德庇人致俗化於和平拯生灵於涂炭重熙积庆垂二百年伊尔卿尹洎亿兆人衆代受亭育以迄於今功存於人泽垂於後肆予小子获纘鸿业惧德不嗣罔敢怠荒然以长於深宫之中暗於经国之务积习易溺居安忘危不知稼穡之艰难不察戎役之劳苦泽靡下?情不上達事既壅隔人怀疑阻犹昧省已遂致兴戎徵师四方转饷千里赋车籍马远近骚然行齎居送衆庶劳止或一日屡交锋刃或连年不解甲胄典祀乏主家室靡宁死生流离怨气凝结力役不息田莱多荒暴令峻於诛求疲氓空於杼轴转死沟壑离去鄉閭邑里丘墟人烟断絶天譴於上而朕不悟人怨於下而朕不知驯致乱阶变兴都邑贼臣乘隙肆逆?天曾莫愧畏敢行凌逼万品失序九庙震惊上累於祖宗下负於黎庶痛心腩面若坠泉谷赖天地降佑人神叶谋将相竭诚爪牙宣力屏逐大盜载张皇维将弘丕猷必布新令朕晨兴夕惕惟念前非乃者公卿百寮频抗章表猥以徽号加於朕躬固辞不获俯遂輿议昨因内省良用瞿然体陰阳不测之谓神与天地合德之谓圣顾惟浅昧非所宜当文者所以化成武者所以定乱今化之不被乱是用兴岂可更徇羣情苟膺虚美重予不德祇益怀惭自今以後中外所上书奏不得更称神圣文武之号夫人情不常系於时化大道既隐乱狱兹丰朕既不能弘道得人又不能一法齐衆苟设密网以罹非辜为之父母实增愧悼今上元统历献岁发生宜革纪年之号式敷在宥之泽与人更始以答天休可赦天下改建中五年为兴元元年自正月一日以前大辟罪已下罪无轻重已发觉未发觉已结正未结正系囚见徒常赦所不原者咸赦除之李希烈田悦王武俊李纳等有以忠劳任膺将相有以勲旧继守藩维朕抚馭乖方信诚不着致令疑惧不自保安兵兴以来海内骚扰皆由上失其方而下罹其灾朕实不君人则何罪屈已弘物余何爱焉庶怀隐匿之诚以治好生之德李希烈田悦王武俊李纳及所管将土官吏等一切并与洗涤各复爵禄待之如初仍即遣使诸道宣谕朱?虽与朱泚连坐路远未必同谋朕方推至诚务欲弘贷如能効顺亦与维新其河南河北诸军兵马并宜各於本道自固封土勿相侵軼朱泚大为不道弃义灭恩反易天常盗窃名器暴犯陵寢所不忍言获罪祖宗朕不敢赦其应被朱泚胁从将土官吏百姓及诸色人等有遭其煽诱有迫於凶威苟能自新理可矜宥但官军未到京城以前能去逆効顺及散归本军本道皆并从赦例原免一切不问天下左降官即与量移近处已经量移者更与量移流入配隶及罚藩镇効力并缘罪犯与诸使驱使官兼别勅於州县安置及得罪人家口未许归者一切放还应先有痕累禁锢及反逆缘坐承前恩赦不该者并宜洗雪亡官失爵放归勿□量加收叙未复资者更与进叙诸色降黜配隶人中有才能着闻者特加録用勿拘常例将士等或百战摧敌万里勤王扞固金城驱除大憝济危难者其节着复社稷者其业崇我图尔功特加彝典锡名减赋永永无穷并赐名奉天定难功臣身有过犯遞减

罪三等子孙有过犯减罪二等本户有差徭使役一切蠲除其功臣虽已后身老病患不在军旅当分粮赐并宜全给身亡之后十年内仍回给家口其有实食封者子孙继代无绝其余收录及功赏条件待收京日并依去年十月七日十一月四日勅处分诸道诸军将士等久勤扞御累着功勲方镇克宁惟尔之绩应在行营者并超三资与官仍赐勲三转其累加勲爵仍许回受周亲内外文武三品已上赐爵一级四品已下各加一阶仍并赐勲两转见危致命先哲攸贵掩骼埋胔礼经所先虽效用之或殊在惻隐而何间诸道将士有死王事者各委所在州县给通送赴本管官为葬祭其有因战阵杀戮及捕获伏辜暴骨原野者亦委所在逐近便殡葬应缘流贬犯罪未收葬者并许其家口各据本官品以礼收葬自顷军旅所给赋役繁兴吏因为奸人不堪命咨嗟怨苦道路无聊汔可小康与之休息其垫陌及税间架竹木茶漆榷铁等诸色名目悉宜停罢京畿之内属此寇戎攻劫烧焚靡有宁室王师仰给人以重劳特宜减放今年夏税之半朕以凶丑犯阙遽用于征爰度近郊息驾兹邑供储克办师旅攸宁式当褒旌以志予过其奉天宜升为赤县百姓并给复五年尚德者教化之所先求贤者邦家之大本永言兹道梦想劳怀而浇薄之风趋竞不息幽栖之士寂寞无闻盖诚所未孚故求之不至天下有隐居行义才德高远晦迹丘园不求闻达者委所在长吏具名闻奏朕当备礼邀致诸色人中有贤良方正能直言极谏及博通坟典达於教化并识洞韬略堪任将帅者委常参官及所在长吏闻荐天下孤老及鰥寡惻独不能自活者并委州县长吏量加优恤其有年九十以上者刺史县令就门存问义夫节妇孝子顺孙旌表门闾终身勿事大兵之后内外耗竭贬食省用宜自朕躬朕当节夫乘舆之服御绝宫室之华饰率已师俭为天下先诸道贡献自非供宗庙军国之用一切并停应内外官有冗员及百司不急之费委中书门下即商量条件停减闻奏布恩行赏抑惟旧章今以余孽未平帑藏空竭有乖庆赐深愧於怀赦书有所未该者委所司类例条奏敢以赦前事相言告者以其罪罪之亡命山泽挟藏军器百日不首复罪如初赦书日行五百里告布遐迩咸使闻知

贞元元年正月改元并招讨河中李怀光淮西李希烈赦

门下王者体元立极钦若乎天地缵承统业严奉乎祖宗所以敬事修诚务本敦孝尊其上以御其下谨其身而训於人百神允怀庶兆永赖国之大典莫重於斯朕烛理不明违道招损往遭大难临陷都国天地宗祧旷而莫主是钦若严奉之义缺矣朕甚惧焉泊再复京师遽将告谢有司以人力耗斁礼物废堕日居月诸岁聿云暮卜其近日甫在上春斋心永怀坐以待曙而百辟卿士抗表上言咸谓人心未宁不足以尽敬寇盗犹在不可以告功迫於羣情俯抑诚愿郊庙孔迺瞻言莫从悼心惭颜胡宁自处重以和平未洽灾沴荐臻去岁旱蝗两河为甚人流不息师出靡居加之以徵求因之以荒饑困穷餒殍转死丘墟而又关辅之间冬无积雪土膏未发宿麦不滋详思咎徵其失安在岂兵戎之后余祲尚在将狱犴之中深冤未息且河中淮右逆将阻兵污胁齐人陷之死地虽欲自雪厥路无由抱义衔冤足伤和气此皆由朕寡德播灾於人为之父母实用愧耻今玄陰已谢春日载阳勾萌毕申幽蛰咸震思与海内同心自新布泽更元用符天意宜改兴元二年为贞元元年自正月一日昧爽已前大辟罪已下已发觉未发觉已结正未结正系囚见徒罪无轻重咸赦除之

改元元和赦

朕闻明王之以孝理也必先之以庄敬由一人之至德鼓四表之欢心臻於太和以育庶类则下知禁而不犯上措刑而不用斯道不远弘之在予朕以寡昧嗣守丕业荷累圣之洪休禀太上之严训夙夜寅畏不敢荒宁承顔而退有万几问寝而下临四海?奉惟眷施於兆人皇王以来孰有斯庆端本之化自予躬行摠百行之源刑四方之理推恩以覆育广敬以昭事王者要道朕亦庶乎则日月之烛临可以率俾昆虫之涵养期於不夭是必家至日见而後化洽刑清图始所难慎终斯勉犹恐下愚之人因循陷辟官司之长教道未明迫於饥寒遂愆礼节诖误之罔顾失政之多途哀矜之怀虽得情而勿喜思与公卿大夫及士庶励翼循省以图将来且因体元之始覃此维新之泽上报於君父下念於苍生颁庆纪年鸿恩斯洽可大赦天下改永贞二年为元和元年正月二日昧爽已前大辟罪已下常赦所不原者咸赦除之京畿诸县今年青苗钱及榷酒钱并宜放免地税率每年量放二升淮江荆襄等十州管内水旱所损四十七州减放米六十万石税钱六十万贯内外文武见任致仕官神策六军诸道将士等各赐爵加勲有差武德以来功臣子孙与官及出身文武常参官观察节度团练经略刺史六军大将等父母亡歿与封赠官至德以来任宰相与封赠及謚陕州奉天元从功臣普恩外更赐爵中书门下及外使宰相宜与一子官七品东宫官并与改官其撰册文官等与一子官及勲爵有差天下百姓高年者赐米帛羊酒国子监祭酒司业及学官并先取朝廷有德望学识者充东都国子监诸管館共置学生百员应天下州府每年所税地子数内宜十分取二均充常平仓及义仓仍各逐处当稳便收贮以时糴糴务在救人

太和改元赦

朕闻古先哲王之为理也修己以安百姓恤刑以矜庶狱端立政以谨始弘厚泽以体仁推其心以及於物诚其中而化於外和气斯洽休徵以臻故兵革不试而四海宁疵疠不作而三灵泰我有唐祖武祖文光宅天下列圣承统遂康区中渐濡丕冒掩轶前载弘兹道以腾英声焕大文以耀中古惟此鸿业属於冲人荷无疆之丕构托於兆人之上昼惕宵儆怒焉如疚抑惟宗社储休神祇協力克靖内难恢复皇纲思布和以立极爰正风於更始因体元纪号之典举肆眚覃恩之命昭我恤隐与人维新可大赦天下改宝历三年为太和元年正月十三日昧爽以前大辟罪已下罪无轻重已发觉未发觉已结正未结正见系囚徒常赦所不免者并除之惟十恶五逆及故杀人官典犯入已赃不在免限左降官量移近处已经量移者更与量移其合复资者五品已上中书门下速与处分六品已下任从常例选丁忧去任在忧未赴贬所者服满日亦与量移如故旧在上都任经本司陈状不必更待州府申请流贬中纵勅不许量移者及言终身勿齿者亦与依例处分亡官失爵各与收叙痕累禁锢并从洗涤其沿去年十二月十八日坐累流隶者不在此限应沿上陵制度及丧仪礼物宜委中书门下及诸司长官博询故实务遵礼度必信必诚副朕哀怀所沿山陵造作及桥道致顿所并以内库钱物充用如不足以度支户部钱充京兆府今年夏税青苗量放一半太皇太后第二等已上亲大行皇帝皇太后第一等亲委中书门下量材叙用九庙子孙陪位者各加两阶仍据始封每王後与一人出身委宗正卿检寻图谱取一房最沉翳者充数具名闻奏内外文武官及诸色人任上封事极言得失无有隐讳天下诸色人中有贤良方正能直言极谏者及经学优深可为师法详闲吏理達於教化军谋宏远堪任将帅者常参官及州牧郡守各举所知无人举者亦听自举并限来年正月上都今年正月上皇太后尊号及撰即位宝册文承旨宣制等官各与一子

正员七品官江王府官去年十二月已前在任者并与进改其去年十二月九日立功将士普恩之外三品已上更赐爵一级四品已下更加一阶其赴难将军军使兵马使都虞候将士等各与改转名衔闻奏

开成改元赦

朕以寡昧祇奉昌图兢业为心不敢自怠庶乎播祖宗之光烈致区宇之康平推诚不疑惟才是用岂谓奸宄背德宗社将危中外叶谋咸加显戮知人则哲虽在帝以犹难罪已兴怀诚为君之不易缅慙上理良用惕然是用因元正御正殿首明罪已乃布鸿恩王守澄累朝掌任久握禁兵陈力虽多僭误难掩交通杂类引进奸邪专弄威权蠹害时政郑注李训引见窃恩二三旧臣诬陷非罪诚於寡昧抑其有由遂使奸恶构连祸起前殿王涯贾餗舒元舆李训宰辅股肱叶谋不轨王璠郭行余节将在京率兵上殿罗立言李孝本纪纲台府深入领徒韩约诱金吾卫兵立成向背魏逢驿骑来往郑注自出成师将相通谋情状咸具上天降佑氛祲已消讨其本因以正刑辟王守澄既已云亡难议深责特进已上官爵及实封并宜削夺衅已终於既往恩宜覃於有截可大赦天下宜改太和十年为开成元年自正月一日昧爽以前大辟罪已下罪无轻重常赦所不免者咸赦除之其左降官量移复资及才用足称者中书门下处分流贬人中元勅不许量移及终身勿齿者并与量移其去年因沿朋党连累并十一月二十一日坐罪流贬者不在此限其身亡伏法者委所在州府量给棺殓任所亲收葬制服其户部度支盐铁应有诸色欠负太和五年以前者并放免诸道贺正端午诞降贺冬进奉起今权停三年其钱充纽放百姓两税所在除药物口味茶果外不得辄有进献百司及诸道应宣索制造一物以上并停三年京畿百姓两税已降凡一岁之内徵取者并百官职田并全放一年其京兆府一年所支用钱物斛斗等并勒盐铁以开成元年直进绫绢充还同州河中绛州去年旱歉赋税不登宜放开成元年夏青苗钱同州赐杂谷六万河中绛州共赐十万石委度支户部见贮粟麦充赐三省九列御史台选黜陟使十人视问风俗进贤退不肖兴行新制务令通俗天下镇戍文武带宪官者解补进退并须奏闻其边州令置译语学官常令教习以达异意内外文武官及诸色人任上封事极言得失有补时政者必加升擢待以不次其有藏器待时终身岩穴奇节特行可激风俗者委常参官及所在长吏各以名闻文武之道合而兼济勲臣子弟有能修词务学应进士明经及通诸科者委有司先加獎引河朔节将以州县归国者张茂昭田弘正程权各与一子官子弟堪任使者委中书门下量加引用应内外文武官进阶加爵有差

改元广明诏

朕祇膺宝命嗣守丕祧夙夜一心勤劳八载实欲驱黎元於仁壽致华夏以升平而国步犹艰羣生寡遂灾迍荐起寇孽仍臻窃弄干戈连攻郡邑虽输降款未息狂谋江左淮南疮痍既甚湖湘荆汉耕织屡空言念疲羸良深軫恻我心未济天道何如赖近者严勅师徒稍闻胜捷皆列圣之佑宁菲德以言功属节变三阳日当岁首仍御正殿爰命改元况及发生是宜在宥继业守文之主握图御宇之君必自正月吉辰发号施令所以垂千载之懿范固百代之洪基莫不由斯道也可改乾符七年为广明元年

改元天复赦

门下三阶彗孛暂移宸极之尊两耀暗昏始表忠正之救朕临御寡德妖孽殊常蒙尘於便殿之中受制於逆臣之手夺玺捫指备肆侵凌挟刃礲胸几罹酷毒闭关行伪则公卿不在其谋悬榜见诬则黎庶不堪其诈害我骨肉杀我嫔嫗悖恶?天古今未有侧陋尝胆幽害下宫皇穹降悔祸之灵将相竭同心之德凤翔节度使尚书令岐王茂贞镇於右辅首激刚肠有食失?飭之惊有车及蒲胥之怒关内之沉几贯日刚纳卫兵夷门之忠愤凌云显惩邸吏三藩唱义四海協词咸以密谋咨於正相於是禁军之内三杰挺生上玄假以良时高庙付其英断月正元日新正吉辰质明而逆首梟悬中旦而凶渠剖裂共申匡复皆着功庸寻下诏书通行赏典而茂贞既平国难来覲天庭驱武旅而簞食争迎驻皇都而秋毫不犯推殊功以荐同志留爱侄而董雄师继筠能稟规程肃清辇毂人神洽庆华裔偕来亦既十旬暨於初夏朕以脱於幽辱复正宸严重守宝图不改旧物上媿於列圣下慙於兆人思弘荡秽之恩仍革纪年之号庶明有罪皆在朕躬可大赦天下改光化四年为天复元年四月十五日昧爽已前大辟罪已下罪无轻重已发觉未发觉已结正未结正系囚见徒常赦所不原者咸赦除之惟十恶五逆屠牛铸钱合造毒药故杀人及持杖行劫者官典犯正入已赃兼以踰滥身名冒伏官秩及刑狱之内官吏用情致成冤滥不问有赃无赃并不在原免之限其刘季述王仲先王彦范薛齐握同谋凶逆徒党支属追宥未到者不在赦原之例其疎远亲属素不通连衆知良善一切不问其左降官非与十一月五日交涉者并与量移元勅不在量移者亦与量移已经量移者更与量移近处其情非蠹政心不挟邪曾经两度量移者便与复资委中书门下酌量处分流人及降流者与移近处如已收叙者量才叙用其左降官与流人已逴贬所者或至亡歿家口欲还及须归葬者任从便如孀幼孤穷不能自济者则委所在州府量与优恤发遣先有官者各还本官上帝降灵将安丕祚中朝多难爰有纯臣登好爵以报殊庸寻行令典锡嘉名而溥大庆用表洪勲静海军节度使检校太保平章事李□昭岭南西道节度使检校司徒平章事李继海宁远军节度使检校司徒平章事李彦弼并早参禁卫累着勲勤生知忠孝之源洞识君臣之义齐心沥血果成复国之功左袒一呼遂定安刘之业叔侄继先臣之烈彦弼稟大父之规据其大勲旷古难比宜加美称以播无穷继昭继海彦弼宜赐号扶倾济难忠烈功臣各加实封一百户六军将士并赐号竭忠定难功臣应接前左右神策及诸军并凤翔兴德两道立仗兵士等各委所司准例各与优赏以报勤劳宰臣司空崔允挥涕入朝含酸?事防切发於超翔之际但勉谋於谭谊之间明大直若屈之机见反经合道之旨忠□爱我奋不顾家始则裂帛为誓合契禁军班列之臣忠良景附再安宗社宁愧古贤虽已畴庸未为报德宜赐回天兴祚平难功臣并加实封一百户仍图形凌烟阁功着定倾名高死难永言风烈詎废赏延故尚父子仪赠太师晟赠太尉秀实赠太保瑊赠司徒杲卿赠太师真卿张巡许远南霁云等家有主祭祀本房子孙中每家各与一子九品正员官功格一时赏延後嗣既配庙廷之享仍传檠戟之门所以励仗节於千秋劝能臣於百代况新诛叛党尤景英风武德贞观以来历朝配享功臣及安金藏等宜委中书门下各搜访本房主祭子孙第其勲?量其人才各与叙用其有进状叙陈者委所司磨勘不得令有僭滥关畿不守先帝西巡惟我辅臣首图义计而故收复京城西面行营诸军都统鄜夏节度使李思恭扬威北鄙决胜东桥佐郑畋匡复之谋倅岐阳统制之命提戈奋勇运策摧凶终成逐雀之功显就回銮之计逮予初位尚洽嘉谋追瞩崇勲宜膺庙食其郑畋已有别勅处分其李思恭宜委中书门下特与加赠仍配享僖宗皇帝庙廷故西面

行营副都统泾阳原节度使程宗楚故收复京城行营都统行军司马前朔方军节度使唐弘夫各持将节来佐台旌争锋而深入王城力屈而衔冤寇垒莫覩归元之貌空留不朽之勲言念竭忠更隆茂典宜委中书门下并与追赠故南面招讨使天平军节度使曹全政顷当强敌克振奇勲弯弧百战於阵前夺槊横飞於马上天时莫救壮气空存宜从超等之褒用劝百夫之特委中书门下优与嘉赠有客之诗前经具载继絶之义历代所先言念於此岂忘旧典介公鄴公各与一子九品正员官其二王三恪後各委有司准旧制修建夫匡国之臣殁身无悔所祈後代雪彼沉冤太和七年故宰相王涯已下二十七家并见?逆名本蒙密旨遂令忠愤终被冤诬六十余年幽魂无诉宜加恩需用慰泉扃宜并与洗雪各复官资如有子孙在人家隐藏者任自诣阙及州府投状如非虚谬则与量材叙用故镇海军节度使李顺节顷岁奸邪乱政慨慷不平偶泄藏谋遂罹横祸仍遭诬构被以罪名虽已行昭雪之文未降褒崇之命宜申缛礼以慰忠魂委中书门下优与追赠寝园之内充奉之间夙夜兢忧应有遗阙其诸陵台令委中书门下切加选用仍令所司给与优料段丁栢子不得别有役使功须陵料以待栽植其每年奉陵诸县差配芟刈人夫不少殊不切用徒为劳扰自今以後但每年芟薙之时委京兆府於本县苗税钱数内酌量功价及於陵令遣自和崔人夫委拜陵官常加检点其下宫宇舍委宗正卿京兆尹差官县司同加检点修饰务致尊严维城之重本支之良叙敦是先渥恩当厚其宗室子孙自兴德行在及光化元年所放出身及合许非时而参选者并委本司准旧例处分施行切令详实不得致令踰滥仍令吏部切加磨勘修集之人辛勤可闵访问旅食动必逾年皆是吏曹及门下省因循致兹留滞始於磨勘远至进黄自冬涉春不得了絶自今委中书门下切提举吏部一事已上并须准旧例程限不得致有淹延自兵兴以来吏道全削办已及期者或衆人恤者几希遂使桑柘日摧荆榛岁茂将救黎元之命宜求抚字之仁应两京畿赤县委中书门下切加选择务在得人诸州府县令録宣三道不得轻有注受切须审以才材畿内编人久罹兵革虽连年丰稔而尚困艰贫念彼疮痍宜加惻隐应光化元年二年三年秋夏税合输纳属府州县及诸州斛斗草钱等所有逋悬并宜放免不得辄令官吏尚有追徵其去年秋所欠即不在此限郊圻之内兵革以来言念凋残固宜矜悯差徭人役须罗挠人在司局中之人又宜集事其京兆府每月合差赴飞龙掌闲虽是轮差诸县不免长挠疲人宜令府司於苗税钱内每月据所差人数目每人支钱送付飞龙司仰自和雇人夫充役途路所先通商是切关畿之地横赋非宜致物价之益高自商徒之难济令盐铁司及两神策军先有两市杂税并令停罢自今以後畿内军镇不得擅於要路及市井漂渡妄置率税杂物及牛马猪羊之类其有违犯者有人纠告以枉法赃论之镇县节度级及诸津渡访问每年兴欺百姓广有邀求致令滞停切念两军京兆府差人觉察显行痛断都市之内屋宇未多闻浮造之人常须更出地课将期招葺宜有指挥应诸坊於公私地内浮造屋宇每月地课不得更有收徵旬服生灵正当雕瘵太仓输纳务在均平悦容厚歛之奸颇失忧人之意自今後太仓所纳斛斗仰司农卿准旧例坐掌校量之际切在奉公不得先任吏人抑屈百姓且朝廷旧制止有榷酒丧乱以来遂行卖麴本自度营利近年兼借两军畿甸之人皆言不便所宜徇衆不废贍军起今年五月以後京畿内任自制造私麴仰度支京兆府依旧例於酒店量户大小逐月纳榷沽钱仍酌量随月依前借军诸司充诸色支用其两军元造麴制下後便勒逐斤减价六月三十日以前货卖官麴其私不得更货卖至七月一日以後不得更卖官麴之限爰自乱离殆将二纪关畿之内掠夺颇多遂令黔首之徒或被丹书之辱睠兹冤抑须杜奸宄旧务买卖奴婢皆须南市署出公券仍经本县长吏引检正身谓之过贱及问父母见在处分明立文券并关牒太

府寺兵戈以来条法废坏良家血属流落他门既远家鄉或遭典卖州府曾不寻勘豪猾得恣欺凌自此准京兆府并依往例处分两市立正印委所司追纳毁弃改给朱记行用其传典卖奴婢如勘问本非贱人见有骨肉证验可据其卖主并牙人等节级科决其被抑压之人便还於本家委御史台切加察定其天下州府如有此色亦仰本道观察防御刺史各行条制务絶沉冤尧悬谏鼓禹拜昌言在明哲之尚然实古今之所重况乍祛蒙昧希钦和平思蹇谔而若疗朝饥虽激讟而亦不加罪谏官举职须务济时其文武常参官素怀术业者任上封章极言得失必当召见亲问所陈其有才识幽深事裨时政者加职升擢或藏器俟时隐於岩谷者委文武朝官所在州县以行实闻荐举衆目者实资於纲领摠庶务者必究乎本根将寻沿革之宜谅系张弛之道其有事不稽古官不易方欲正滥原须遵故实应有诸司法废制坠多时未复旧规者自今後宜委诸司各检举条録闻奏委中书门下详酌处分汉徵极谏晁董陈理乱之端晋策能言洗立贡阙遗之政乃登道广请举公平诚在得人以匡不逮应天下诸色人中有贤良方正能直言极谏博通坟典達於教化军谋宏远政术详明者文武常参官及诸道节度观察等使具姓名闻奏荐至十一月到京朕当亲临策试择其可否施行鲐背燕毛礼经所重即验颁系汉诏所矜克存尚齿之规免致遗年之诮天下高年鰥寡八十以上委所在长吏切加安恤其有不幸者量与葬送仍存抚孤裔呜呼文王美里克建周邦太甲桐居用兴殷道朕不敢忘大甸之辱公侯宜獎成万代之功进忠贤以启政途黜邪佞以惩覆辙庶乎上下共保我高祖太宗之洪基

改名

武宗改名诏

门下王者照临万?名岂尚於难知敬顺五行理宜避於刑克徵诸前史义实炳然昔大汉之兴洛旁去水所都名号犹乃避之况我国家运昌土德岂可常以王气胜於君名所以宪宗皇帝继明之初实以舍水必存冥数叶於贞祥汉宣帝柔服北夷恢弘祖业功德之盛侔於周宣御历十年乃复美称朕远推汉主之事近稟圣祖之谋爰择佳名式遵令典庶承天意永保鸿休宜改名为炎仍令所司择日分命宰臣告天地宗庙其旧名中外表章不得更有回避布告远迩咸使闻知主者施行【会昌六年二月十二日】

臣闻运行之道实本於维新称之为尊必资於前兆此天人相与之明历数陰陽之祥恭惟烈光布在方策伏惟仁圣文武章天成功神德明道皇帝陛下仁深九有道冠三无绍列圣而垂休奄百王而迈德六气虽序重之以调均五音虽和资之以损益使刑刻自消於圣历陰阳未遂於洪炉亦犹周乐去金以享大年之兆汉都罢水用洪继代之光此皆九庙之灵兆人之庆臣等官叨近密职奉丝纶拚跃之诚倍万常品谨奉制如右请奉制付外施行

唐大诏令集卷五

卷六

钦定四库全书

唐大诏令集卷六

宋 宋敏求 编

帝主

尊号批荅

先天二年不允上尊号

依王公等请上尊号制

荅朝集使蒋钦绪等

荅侍中裴光庭等

荅再请表

荅三请表

肃宗荅右仆射裴冕

太上皇荅皇帝上尊号诰

太上皇 荅皇帝上尊号及让大圣字诰太上皇三荅上尊号并辞大圣字诰

太上皇荅上尊号并大圣字诰

太上皇允上尊号诰

宝应二年上尊号荅诏

荅第二表

荅第三表

荅百寮请复尊号

永贞元年荅宰相上尊号

元和二年荅宰臣请册尊号第三表

元和十四年荅南百官上尊号

荅宰相请册尊号第三表

荅第四表

长庆元年荅宰相上尊号

荅第二表

荅第三表

荅第四表

宝历元年荅宰臣上尊号第四表

太和六年荅中书门下上尊号

会昌四年荅宰相上尊号第五表

大中元年荅百僚上尊号第三表

大中三年荅宰相上尊号

咸通十年荅上尊号第四表

光啓元年荅上尊号

荅第三表诏

尊号批荅

先天二年不允上尊号

用观上古之主惟称帝王一字秦汉以来乃兼皇帝朕以薄德嗣守宝图乾乾厉惕惧不克堪岂自崇饰以招谴咎虽迫公卿之请终负平生之心所请加尊号甚无谓也

依王公请上尊号制 苏頌

门下朕闻天授命者为天所予人归德者为人之主故崇高有莫大之尊司牧有非常之号盖承天叙而立人极也我唐丕业冠开辟之初朕以眇身托元元之上绍休圣绪钦若昌图戢多难而极缀旒荡羣凶而夷触柱下安区宇上戴君亲朝廷以义家国以治斯又叶天心而从人愿也太上皇释海内之重负官公私之远情以朕功宣提劔运膺当璧爰奉睿谋揔亲庶政日慎一日问安以庆於三朝为子为臣顺色靡遑於五让?共若厉寢兴是祇赖遐迩宅心戎夷内面奠敦风於寛大思致俗於仁壽而王公卿士献书草议陈帝王之籙考天人之符廼以鸿名加於菲德然则徇至公之议难以私拒当至诚之请不可词夺涉川罔济当宁兴怀敬遂祷祈益增寅畏所请上尊号曰开元神武皇帝者宜依有司可?日练辰?告郊庙详诸旧典备礼进册布告天下咸使闻知主者施行【先天二年十一月十五日】

荅朝集使蒋钦绪等上尊号【开元圣神文武】

礼贵正名法无虚美朕以薄德嗣守丕图常恐不逮安敢自足今羣岳称引衆善劳加荣号闻之增惕奚可当仁惟圣与文焉得轻议况太宗睿宗俱称圣谥予末小子安敢同之宜断来表【开元二十六年】

荅侍中裴光庭等同前初表

卿等思致君尧舜欲加号圣文朕内省虚怀安敢当此又太宗睿祖皆有圣谥纂承祖号安敢同称幸体朕怀宜断来表

荅再请表

圣文之名称号所极卿等致君尧舜亦宜导以冲撝超驾前王弥增夕惕岂朕好誉之心内致自矜之色外形招此假词以相虚美静思反照抚事求心诗云我心匪石不可转也幸悉所守即断来章

荅三请表

惟圣与文洪名极称内省虚缺安敢冒承匪石之心已具前荅方与卿等上调元气下遂苍生致削浮华化归敦朴升崇高之号去满假之端勉建皇极以迎天佑悉此至言宜断来表

肃宗答右仆射裴冕上尊号

朕以眇身敬承明命两遭狂徒扰乱宗社不宁稟上皇至圣之谋当仗钺秉旄之任六师一振残孽无遗上皇厌彼代纷弃兹人事万邦之重畀付朕躬传授宝符乃加徽号朕再三固让实增□俛恭膺典策感庆良深覽卿等来章倍加祇惧依卿等所请【至德二年十二月】

太上皇答皇帝上尊号诰

昊穹垂佑宗社发祥尔往在韶年素彰岐嶷泊乎问寝日增孝敬吾久勤庶务常奉至真特好冲虚寻将付托尔以华戎銳士构定神州功乃格天德惟迈古是用援兹国宝加夫大号典章弘集喜慰盈怀实惟道企前王何必志在让礼克承丕业以副至公即断来表

太上皇再答皇帝上尊号诰

三朝问礼五让丕图用殷后之师载勘牧野同周王之步来入镐京美暎缣緌功侔造化命之守器加以鸿名归景运而有融当乐推而难拒予栖神道要养志真元邦家乂宁自多愉悦

太上皇答皇帝上尊号并让大圣字号

天地肇启皇王聿兴故三王垂御图之迹典坟着牧人之要爰立邦家其来尚矣予承百王之遐运继五圣之丕业亭育区宇宠绥蛮夷罔不率从多历年祀顷者奸臣煽祸中原构衅汝睿略悬於两曜鸿勲格於九天终古莫俦上天是赖故加之大圣建以崇名用膺多福何所与让予夙達古妙远寄真宰凝神澹泊足可自怡至於宗庙陵原常展庆矣郊禋豫动固陈仪焉方期仙於上境已遗荣於中域汝欲归尊於父实在因心爰及朝臣亦同恳愿且无为於冲漠又何取於徽名宜悉此怀用全至道耳矣

太上皇再答上尊号并辞大圣字诰

古者华胥大庭神农黄帝淳俗归於太素正真契於无为虽不累烦纓亦崇其称号吾久寻玄旨远袭仙宗既欣襄野之游更乐瑶池之宴倏然自逸岂在尊名尔亲率百寮至於再请则蒸蒸之孝实冠於当今而荡荡之德独慙於上古頻覽章表恳志难违汝宝命维新鸿勲允集用加大圣之号克副昊天之心若承命无渝万国同欢於翼戴悦固辞不已吾亦有未膺乎册典勿为名让宜協至公朝野之情固多荣幸也

太上皇三答上尊号并辞大圣字诰

道高者必传其迹德着者必享其名汝廓净妖氛载安社稷万灵式叙岂非大乎两仪交泰岂非圣乎吾所以亲受宝符自题徽号宁惟对於列辟谅已闻於率土涣汗之出理不可收締言之行事必有在将固撝谦之道是违亿兆之情天地神祇未以为当宜膺景命即断来章

太上皇允上尊号诏

汝孝以奉亲明以御宇上从君父之命下徇黎元之请既弘茂实爰副洪名千后攸高百王是式循环章奏嘉慰可知予思每集虚心恒遗照方契真宗之旨岂云称号之荣汝就养无违归尊有恪再献从龟之吉复当乙巳之辰已备典章当依来请

宝应二年上尊号答诏

朕嗣守洪名钦承丕构克清多难奄甸万方圣灵在天玄德敷佑南面恭已朕何有焉巨猾削平非予之武言念海内生人至艰兵锋犹虞暴骨未掩日旰忘食宵分疚怀遽称成功良谓虚美玄宫甫毕岂期即及改元宝位至尊何以更言加号宰相之任职在匡弼进劝之词深所不取

答第二表诏

朕内省德薄在於人上绍高祖太宗之天下承上皇先圣之丕业惕然南面常惧君难岂因乐推亦自光大况山陵甫尔濡露增怀?县凋残薰风未畅遽行古制虚受鸿名是用绎思未宜献可五始之义诚在体元三年之道以其无改所陈徽号亦有旧章若更尊崇得非自圣股肱辅弼惟欲致君空动诚请之词未副昌言之理

答第三表诏

年叶五纪成岁以授时君临万邦向明而听政体元不润其色处实不为其宾朕若昔大猷允怀?已务於简易岂曰崇高常深负荷之忧敢忘祖宗之烈卿等摠括羣议昭升旧章周爰典籍之文鈎校天人之理对扬耿命进劝皇图请踰年而改元益正位以加号敢废春秋之义用谐啓沃之心敬允乃诚良多慙德

批百寮请复尊号表

三省来章弥用兢惕再崇大号何以当之前者示怀盖非冲让尚劳敦请岂所宜然卿等博学古今列於朝右思弘献替共致太和岂以虚名重予不德再三循省增慙於怀想尔深衷勿更陈请【贞元六年】

批答宰臣请上尊号

伏以高祖太宗接千载之统垂无疆之休太上皇承九圣之烈传莫大之庆嗣德纘业允文允武弘帝尧之钦明宗玄元之清静付朕天下颐神保和至道光於唐虞至仁合於天地卿等?述休德祇献鸿名循省再三允符朕意朕获守宝位丕承睿训虽?恭寅畏不敢怠遑而泽未洽於羣生理未臻於皇极遽言徽号何以当之虽嘉乃诚难遂来请其上献太上皇尊号宜依所奏

凡百卿士当体至怀

批荅宰臣请再册尊号第三表

朕获承丕绪以抚万邦照临无日月之明膏润无江汉之浸常恐吉蠲虽备未享於天心教道虽勤未谐於人欲谅慙匪德敢议鸿名而宰臣羣公宗后庶尹上引祖宗之丕矩下述黎献之诚心诫子以处泰而思劳告予以爱名而务实陈以恳迫至於再三先典不可以固违羣情不可以屡阻与其守让而繁饰不若纳规而徇公遽抑至怀勉从来请顾惟不称兢惕殊深【元和二年十二月二十二日】

荅南省请上尊号表

朕纂嗣洪业托於王公之上常恐涉道犹浅烛理未明夙夜祇畏罔敢宁逸至於法天象以垂制顺人心而平乱立刑辟而不峻兴礼教而不倦简黜浇薄延纳忠直思济於道保合太和今寰海削平载弢弓矢皆赖辅弼之臣尽规於朝庙将帅之略宣力於邦家循省表章请崇徽号武功文德扬美於予用愧於怀何以及此尚以昆夷未服边鄙犹虞不敢允从宜即断表【元和十四年】

荅宰臣请册尊号第三表

昔我祖宗每崇徽号皆以道侔天地泽被生灵故请之不疑而受之不愧是谓典礼鸿光赫然朕以寡昧祇承宝位?恭惕厉不敢荒宁常惧礼化未敷非以自尊为意若荡清寇孽修举政刑此乃中外英贤叶心所致复於前疏亦已言之卿等善则称君过陈功德表章三至益愧於怀岂大体之必然何恳言之不已沉吟终日未果允从

荅第四表

建崇名加大号必自盛德而因全功苟非其时难以拟议朕绍十圣之统绪遵百代之宪章冕而事天忧勤不暇乃者忠臣敦化良将策勲有寇难而必荡必平用兵戈而不蝗不早此乃多士叶力成此小康岂予一人独运而致卿等四陈章疏每沥肺肝表土庶之诚心徵朝廷之故实愿饰虚美皆为过谈谕而复来势不可止虽重烦典礼殊不自安而深念奏陈亦当从允勉依所请良用愧怀【元和十四年六月七日】

批宰臣请上尊号表

朕以菲德初承大宝严恭夙夜修己临人烛理未明举政多阙虽克展郊禋之礼或未称瑞应之符而俗尚凋讹人未康乂所患德之未立不患名之不尊至於北狄求和西戎即叙南越投戈而率化东夷继踵而来王不候七旬之期自销积纪之弊此皆祖宗垂佑公卿叶赞之力也朕何有焉遽议虚名深愧未称卿等志思将顺诚切忠君宜体至怀勿徇虚美【长庆元年四

月】

批宰臣请上尊号第二表 元稹

朕闻天职生植圣职教化天职举则四时行圣职修则万方理然而天不以行四时而为德故荡荡无名圣不以理万物而为功故谦谦不宰顾朕小子获承丕图上赖祖宗之灵下托股肱之力先定镇冀次来幽燕皆吾日月之所照临车书之所辙迹失之则有以自愧得之则何足以自多况今四方虽清物力方困六戎虽伏边备尚劳百吏虽存官守多旷万目虽设纪律未张有此四者不敢遑宁思与卿等夙夜俾乂卿宜为我提振大法修明政经警蹇戎狄康阜黎庶四者既理名焉用哉朕方以臯夔之务委卿卿宜以尧舜之事教朕骤加徽号深耻近名循省表章难徇来请【长庆元年四月】

批宰臣请上尊号第三表 元稹

昔齐桓议封禅管仲骤谏其未宜晋武平江东何曾深惟其远馭彼二臣者居安思危之志明有犯无隐之诚切也况朕寡德谬膺昌期赖先帝削平之威蒙列圣寢渍之泽聿来燕翼克静华夷既无德而有威实以祥而为惧卿所宜朝夕纳诲警子荒宁虽休勿休日慎一日而乃过为溢美频上鸿名谅多丹赤之诚殊非药石之爱汝为予砺为朕揣摩汝为予舟为朕康济强我懿号不若致我为有道之君加我虚尊不若致我於无过之地宜罢来请用副乃怀

批宰臣请上尊号第四表 元稹

朕以元月正日祇见於九庙对越於上玄千官在前万乘居後覩声名文物之盛望城社宫阙之尊尚念高祖太宗艰难於营制德宗宪宗殷勤於纘复惧不克荷以羞前人寅畏严恭或冀无过而燕赵底定戎獯和宁实惟列圣之休安敢自大其德左右辅弼庶尹师长猥以鸿名愿加薄德三诏执事抑而未行物议逾坚予衷未信四陈章表备列古今且曰告?之时宁忘继志问安之下胡不畏心事有切於显荣理难从於固执於戏允恭克让既见夺於羣情克己为仁庶自勤於三省勉依来奏深用愧怀【长庆元年五月某日】

荅宰臣上尊号第四表

前上三章皆有报旨推本帝王之道研究天人之际可谓尽矣能无谅哉朕辞愈坚来奏愈恳考蓍龟之意酌卿士之心义贵从人事难徇志然体未济之象警慎将然复大畜之文模法往行虞舜勤民以恭已文王事主而小心自厉则鑒乎殷汤盘铭持盈则戒乎周庙欹器还珠却马使无愧於前贤菲食罢台冀有示於来世率是道也庶无悔乎勉遂羣心祇循祖训敬允诚请愧惕良深【宝历元年四月三日】

荅中书门下上尊号

朕以菲德纂承睿图业业乾乾惧不克荷是用发天地无私之道以成化象日月无私之照以烛幽慕唐尧虞舜之为君继贞观开元之致理朕以夕惕宵兴不遑暇逸冀将昭复圣哲保绥华夷至於鸿名尤不轻议尚未审度岂可属心卿等台铉重臣翼宣元化宜匡朕志臻於缉熙今陰雪伤和尚资寬宥乃以文武至德加於朕躬省视奏章难从虚美宜断来表深谅予怀【大和六年正月七日】

批荅宰臣上尊号第五表

前覽四表报皆一词可谓君臣之义至矣天人之理尽矣朕辞益固卿请益坚诚献可之不移奈虚美而难处山虽崇而降地易象明言海虽大而下川玄元深旨文王以小心事帝虞舜以恭己临民盘铭取励於殷汤欹器戒盈於周庙皆以畏惕而自警不闻满足而虚尊卿等以塞北平戎山东殄寇韬兵偃武鑄戟为农郊天之年瑞雪清路册号之夏嘉雨灭灾毁摩足坏法之刑荡并寇乱常之暴此皆上玄厌祸宗社储休至於刑政克明文武具举年登适臻其气顺俗阜实自於官修内承宰辅之谋外尽藩侯之力余虽垂拱且有何功况增鸿徽尤非称德既频推美何以当之然体贵从人事难徇志祇循前训允遂羣情殊不自安谅非纵欲勉尔所请深用愧怀【会昌四年十月七日】

荅百僚请加尊号第三表

朕获承丕绪奄有万方忧物之心常怀惕厉荷天之力渐至救寧此中外元僚文武庶政咸有一德以匡冲人而卿等猥以鸿名加於菲薄拜章沥恳至於再三伏念自列圣以来何尝无今日之请然率不能让者上慰宗庙之灵下迫羣臣之愿粤予小子岂敢久劳卿士之心哉敬允乃诚良深自愧所乞宜依【大中元年十月】

荅宰臣请御丹凤楼上尊号

勅旨没陷河隍百有余岁中原封界咫尺戎疆累圣含容久劳征戍伏思元和中将摠宿愤常欲经营属诛锄叛臣未暇收复今则恭行先志克就前功不远徵兵不劳财力二州之外兼得七关又取维州粗成边业尚以息民解甲未收山外诸州且以肆眚申恩所以颁示天下其御楼依所乞【大中三年十一月二十五日】

荅宰臣曹确等请加尊号第四表诏

夫功合天者称皇德合地者称帝皇帝二者朕已享之况孤寡不谷之名靡遵於玄祖明皇孝德之号久慕於冲人业业兢兢惟惧不称南蛮未讐师旅尤屯东寇虽平疮痍尚大方将罪已曷敢矜功卿等修德銳於皐陶耻君不如尧舜铺陈故事增饰洪名谦恭愈坚表章叠至对扬之际忠恳弥彰弘我以奉先勉我以从衆亦念乙酉之岁坚请不逾今复固违似矜小让名实不副朕当不敢荒宁始终相成卿等勤於献替勉尔来请深用愧怀【咸通十年十月十日】

荅宰臣萧遘等上尊号

朕猥以寡德丕承耿光宵旰虽勤兵戈继作困生灵於豺豕委宫阙於榛芜罪已则深噬脐何及尚赖天地悔祸祖宗降灵内之则公卿大臣外之则方伯元老上凭眷佑下悯蒸黎允叶一心克济四海廓妖氛於?县剗戎垒於郊圻虽复旧都匪遑高枕呜呼大耻才雪羣生未苏文武典章坠无半在威权法制行亦几何土疆徒系於地官征赋罕归於国帑肃恭常祀尤在正辞昭格上玄宁容溢美卿等同匡艰运当识深衷加以虚名斯为不急步骤鎔铄之际自有至公照临显晦之间宁资外獎当勤纳海宜断来章【光启元年五月某日】

荅第三表诏

朕以寡昧嗣守丕图思臻太和不敏宁处干戈载戢稼穡少登礼乐中兴声教遂被是用郊上玄以报本解密网以缓刑岂非九庙降灵羣贤叶力共赞薄德致兹少康永惟眇躬实惧虚饰卿等上稽天意下采人謡旁访典谟俾奉明训以为天地之道既不让於强名皇王之心宜屈已而从物累贡殷勤至於再四虽凿井耕田未及勲华之理而乐推欣服难违亿兆之情既狗衆词终疑溢美勉尔来请深用愧怀

唐大诏令集卷六

卷七

<史部,诏令奏议类,诏令之属,唐大诏令集

钦定四库全书

唐大诏令集卷七

宋 宋敏求 编

帝王

尊号册文上

应天神龙皇帝册文

开元神武皇帝册文

开元天宝圣文神武应道皇帝册文

开元天地大宝圣文神武应道皇帝册文太上皇加光天文武大圣孝感皇帝册文睿圣文武皇帝册文

元和圣文神武法天应道皇帝册文

尊号册文上

应天神龙皇帝册文

维神龙三年岁次丁未九月丙申朔五日庚子具官某及文武羣臣等谨昧死再拜稽首奉册言爰自厥初肇兴司牧皇矣抚极蒸哉察道莫不因时适变改物殊徽推五运而陟崇高步三微而应历数天地人皇之称立始别洪荒唐虞夏帝之君尊渐详文质姬水以椎轮发号烈山以斲耒增祥然後仁被德宣功昭业远历访前古兹为旧式大唐受乾坤之胜命当?县之讴歌奄有黎庶遂光宸象应天皇帝陛下垂旒御宇截海披图承四业之休光握三灵之宝契虞舜蒸蒸之德永锡羣方周文翼翼之心其凝庶绩驱齐人於仁壽致雅俗於醇醲六府咸修五戎不用航海梯山之客奉贄输琛耕田凿井之夫击壤鼓腹中外静谧表里雍熙而孽子?天乱臣干纪谋同触瑟祸剧弄兵不虞之灾忽生於肘腋无象之鑒独愤於神祇於时凶?逼楼圣君凭檻威灵下济觉封豕之周惶丑逆上瞻见神龙之辅翼宝仗以亿千之卫天仪成丈六之容衆

瑞共临羣妖大骇尽迷方而夫据咸夺气而忘精顾盼而斩馘輦屍指麾而水消雾释虽复草为兵甲秦师惊蒋帝之神树作藩屏释主屈魔王之衆虵軀之变媧后蛟影之随汉高未足以匹此奇徵方斯伟应自非冥符幽赞睿感?通何以承波若之护持享高明之福助昔者伏牛之主遂号牺皇名鸟之君仍题凤纪法身用马鸣成道上士以龙德为仙敢托元符爰资故实谨上尊号曰应天神龙皇帝鸿猷载肇昌历惟新庶以仰顺乾心俯从人欲天长地久更隆四大之尊名玉振金声恒为百王之称首盛矣美矣皇哉唐哉臣某等诚欢诚喜顿首死罪死罪再拜以闻

开元神武皇帝册文 苏頲

维先天二年岁次癸丑十一月辛酉朔二十八日戊子摄太尉臣某等六千五百一十四人言臣闻厥初生人首出庶物物不自理惟后所以康乂后不自尊惟人所以归往古先哲后安人育物表功崇号不可辞也皇矣上帝临於巨唐降氤氲垂耿光重熙而累盛至太皇而授圣皇臣等敢稽首而言曰曩者景龙之末长虵纵祸陛下虑宗社之坠提劔夷之则因亲以尊主问者朝有贼臣天罚大愍陛下拯邦家之难援旗剿之则错枉以举直戮不及嗣恶惟其身思与王公卿士等下逮元元扬闔泽而布和气臣又闻之轩梦华胥尧期姑射未有一其道而顺太皇之心文王昭事武王纘绪未有一其时而居圣人之位褰裳释重至公也端扆向明至孝也使九族惇叙百工允厘东西南北砥砺声教彼灵有四招翠黄而可乘我宝有三指珠玉而不御然犹发挥礼乐驰骛典坟论思献纳进善从谏日慎於一日矣上指天意下考人谋卓哉協元符而铄灵命而已夫开者泰也罔弗亨元者善也罔弗利神者圣也罔弗通武者威也罔弗服臣等不胜大愿昧死上尊号曰开元神武皇帝谨上玉册玉玺臣等诚惶诚恐死罪死罪谨上

开元天宝圣文神武应道皇帝册文

维天宝七载岁次戊子五月庚午朔十三日壬午摄太尉银青光禄大夫守刑部尚书兼京兆尹上柱国颍川郡开国公臣蕃昊及文武百僚等谨稽首奉开元天宝圣文神武皇帝陛下臣闻惟道至大王者均其名惟天丕应圣人光其德陛下弘启玄宗绍开皇运淳化既洽劳谦有恒每涤览真经?心明祀将以荅三灵之眷命为万姓而祈福故得玉芝敷白鱼见卿云降仙传对扬之休必有不可让者也於是公卿宗子耆艾法流诣阙奏章愿增徽号至於再至於三伏奉甲戌诏曰祜祥者所以合天人鸿名者所以彰德业今封章继至诚请甚勤敬膺神休允荅人望臣等不胜大庆谨上加尊号曰开元天宝圣文神武应道皇帝伏惟开辟之功简易之德与道同运体乾无极

开元天地大宝圣文神武应道皇帝册文

维天宝八载岁次己丑闰六月癸亥朔五日丁卯摄太尉开府仪同三司行尚书左仆射兼右相吏部尚书崇玄館大学士集贤院学士修国史上柱国晋国公臣林甫特进行左相兼兵部尚书崇玄館大学士太清宫太微宫使上柱国臣希烈及文武百官正议大夫检校礼部尚书

上柱国清河县开国男赐?金鱼袋臣崔翹等谨再拜稽首奉册开元天宝圣文神武应道皇帝陛下臣闻自昔帝王与道同功者道宝降焉与天合德者天命彰焉陛下功冠九皇德包三古而犹朝乾夕惕朝礼上清复玄化之雍熙致苍生於仁壽故昊穹眷命烈祖垂休玉芝再产於宸居瑶圃悬记於仁洞混成微旨允属圣躬陛下推美广孝克崇祖宗之礼羣臣以公议纳忠庶叶承天之意乃有卿云散彩瑞日重轮对扬大号固不可辞让者也於是公卿宗子耆艾法流顒然诣阙奉章陈请陛下犹怀谦冲之德至於再至於三伏奉景辰诏曰陰隲既启公议屡陈惟怀永图敬依来请臣等不胜大庆谨上加尊号曰开元天宝圣文神武应道皇帝伏惟覆载之功广大之业丕膺鸿烈宝祚无疆也太上皇加光天文武大圣孝感皇帝册文

维至德三载岁次己亥正月甲戌朔五日戊寅太上皇若曰古之握乾符建皇极社稷不可无主帝王惟有归往尧禅舜舜禅禹畏天命也后嗣禹武嗣文从人望也革命易姓举至公於国纂戎继统用不私於亲斯美大矣朕承五圣之丕业宅万国而为君膺时抚运载将四纪梦帝与龄实受多福曷尝不?恭至道亭育羣生早厌黄屋之勤每怀?霄之馭惟父知子我有元良惟君安人久思付托皇帝天纵睿哲日跻孝敬率性之至通於神明财成之道冠於宇宙朕往以萧墙之难克保宗社故先帝裨予以主鬯顷者中原之祸期辑邦家我於是命尔以仗钺当经纶云雷之际栒沐风雨之时思契宿心累有成命而义不奉诏谦不踰尊至於再三明兹恳让洎即戎致讨观兵朔漠驱馭豪杰用服乃功於明辟天亦集大命於尔躬推之至公终陟元后夫名以制义器以昭德今羣公卿士咸旅於庭明听朕言敷厥成训於戏奄有四海克康兆人光天之业也经纶天地勘定祸乱文武之功也雄图英算大圣也保国安亲孝感也今加徽号於皇帝曰光天文武大圣孝感皇帝授传国宝符受命宝符各一上副於天中契於神下叶於人三者朕无愧焉永保累圣之鸿绪对一人之休命朕将访道峒山追踪汾水超然金阙之上终以玉京之游不其至哉良愿毕矣宜令所司择日即行册礼

睿圣文武皇帝册文 李吉甫

维元和三年岁次戊子正月癸未朔十一日癸巳摄太尉银青光禄大夫守兵部尚书兼御史大夫上柱国赵郡开国公臣李巽及文武官五千七百九十四人等言臣闻自天玄而升地黄其凝皇王之道尧舜首出典故谟述焉自尧及唐历纪三千致理之君不过十数升平之运不至五百天人之交际不其难欤我唐运之兴昌期是膺四海一统十圣丕承以至於皇帝则君十一而年二百矣历考前代丁於斯时皆王泽已竭君明寢替未若我后之惟新厥命我唐之中兴厥祚顾视周汉不其蔑欤伏惟皇帝陛下绍太宗之英武稟德宗顺宗之寅畏乾乾翼翼若不满志故爱於文母顺色之孝也睦於兄弟因心之友也崇谏议察迕言去疑谋杜谗说俾王道正直砥为夷涂发前圣之韞匱披人文之光耀而气有沴者反时为妖若黎崇之不恪苗人之逆命或诞敷文告或震叠武功圣造不疾而速非陛下畴能之然後奉四表之欢心摠百神之受职蠲祀於清庙严禋於上玄天地察而神祇着矣臣闻之君人者谦逊静慤则天应之以福故休祥出焉慈和爱育则人应之以诚故鼓舞从焉王者因人心稽天意天下俱应而徽号加焉至公之道不可辞也臣等所以勤勤恳恳至於再至於三愿奉鸿徽以彰休德陛下犹三揖而五让之久而罔已始降俞诏於是百辟卿士洎四方侯卫之臣上言曰陛下诞睿圣之姿膺会昌之期经天地之谓文禁暴乱之谓武臣等不胜大愿谨奉玉册玉宝上尊号曰睿圣

文武皇帝惟陛下懋一德勤万邦干禄百福垂唐之无疆

元和圣文武法天应道皇帝册文 崔羣

维元和十四年岁次己亥七月丁丑朔十三日己丑摄太尉金?光禄大夫检校司空兼太子少保上柱国郑国公食邑三千户臣绶及文武官五千七百一十八人等言臣闻惟天惠人惟元后作人父母大宝曰位至公者名帝皇尊称肇自三五其义尚矣尧舜禹汤文武成康垂於典籍为万代法非名欤殷有天下武丁大其业周有天下宣王嗣其训在汉七叶亦称盛强中兴之美与我不类皇唐统天二百有二载祖宗崇光四海一家礼文宪章矩矱大备元符昌历畀付有在洎我后之握图也齐心於穆清垂意於大宁文昭武烈冠今迈古始负固不若者莫匪颠踣输忠来附者克保蕃祉天宝之季孽臣干纪灵诛亟扫余氛未弭兵不得戢六十五年於兹矣元和致理思囊弓矢睿谋前定所向风靡两河既清泰阶砥平戴白之老欣感出涕不其盛欤伏惟睿圣文武皇帝陛下德配天地明并日月严荐於宗庙尽敬於郊禋孝通於神祇仁浹於动植内睦於九族外怀於四夷乙夜观书日昃听政恤刑懋赏劭农劝学历选列辟英声茂实其何以加焉日者淄青不恭告让罔悛任下推诚出师徂征玉垒金陵之遐阻悬瓠营丘之险域或肆於都市或悬於藁街其余琐细盖不足纪上以摅列圣之愤下以叶千龄之庆然後辟四门贞百度会?县之玉帛旅梯航之贡篚咸曰不图贞观开元之化复覩於今日矣陛下劳谦祇畏不自暇逸让德於上天推功於羣臣访阙政修坠典不以龟龙为瑞以贤俊为瑞不以珠玉为宝以慈俭为宝卓哉煌煌信可假玄穹而蟠厚载者已是宜尊徽名膺显号以光於典册以顺於人心以荅於天意不可辞也臣又闻之居安思危纳谏从下远谗慝旌说直爱养黎庶敦尚朴素斯皆高祖太宗顺宗之遗训也而陛下躬行之造次必於是寤寐必於是实万姓之福无疆之休僉曰功成而礼不崇德广而名未称臣子之罪也於是百辟卿士藩卫耆耄稽首上言至於四三陛下深秉谦冲诏谕往复不得已而从之伏以纪年之盛冠於大号厥有旧典书不云乎乃圣乃神乃武乃文传曰惟天为大惟尧则之则法也王者昭事上帝取法於天道德经曰天法道道生一唯上圣至德兼则利物行清静自然之道为能应之臣等不胜大庆谨奉玉册玉宝上尊号曰元和圣文武法天应道皇帝伏惟陛下景福是膺如日之昇虽休勿休翼翼兢兢对越鸿名丕赫成能万寿百祥罔不丰登天祚圣唐惟圣丕承臣绶等诚欢诚跃顿首顿首谨上

唐大诏令集卷七

卷八

钦定四库全书

唐大诏令集卷八

宋 宋敏求 编

帝王

尊号册文下

文武孝德皇帝册文

文武大圣广孝皇帝册文

仁圣文武至神大孝皇帝册文

仁圣文武章天成功神德明道大孝皇帝册文

应乾圣壽太上皇册文

尊号册文下

文武孝德皇帝册文

维长庆元年岁次辛丑七月乙未朔十八日壬子金?光禄大夫检校司空兼太子少保上柱国郑国公食邑三千户严绶文武官六千二百七十七人等言臣闻天以万物付圣人圣人本天意而保乂之惟牺农先天而贞惟轩辕奉天而行惟尧舜法天而明莫不綑緼粹精昭建鸿名以至於夏殷周汉谦俭服义仁爱忠利亦着称谓代济其美当隋之末我高祖神尧皇帝救拯焚溺应天立极荡氛昏扬凯泽父教而母育恩德高肌骨维天宝季岁贼臣案常尘起幽陵毒流四方累圣含弘视人如伤余栢势滋专土擅强宪宗因天时顺人心举武经明大刑连拔坚险颠踣同恶冥冥沉沉犹恃榛秽干戈不得息者绵六十七祀逮我后之御历绍太宗之求贤审官举直错枉体玄宗之尊师敬道清静致理法肃宗之循名求实刑赏用中广德宗之亭毒含容博采虚受而後展严於配天夷思於法宫从物无私推诚至公霈矣乎广受寂然乎感通神武不杀而天下会同昔少康祀夏聿修皇祖之训周武继统务广文王之声爰泊宣王克服蛮荆劳来安集泊汉光武既平陇蜀听政忘寐伏惟皇帝陛下以至圣之姿诞启昌运重明之业绍开中兴岂无避违从风悦化而自革岂无氛翳大明昇中而自除皇泽畅於九围文命敷

於万国则向之数王何足称哉尚复孜孜庶本不遑劳谦日昃讲道求贤议狱恤刑去谗进直以利物勤人为政本以检身戒惧为化先自诚而明日慎一日是以天道惟新於景命玄德亟闻於四方亿兆咸曰大哉君心复曰懋哉君功降延禧之主扬仁壽之风恢帝图廓皇纲崇鸿名显无疆不然者何以荅上灵之眷命乎何以惠庶氓之悬望乎於是垂白之老缙黄之衆与侯甸藩卫之士守阙稽顙日以上请臣等所以勤勤恳恳敢固以言陛下犹坚秉撝揖至於三四不得已而降前诏於是百辟卿士考天人之意稽典礼之义进而言曰陛下崇儒问道恭默致化文之明也保大安义感怀夷夏武之彰也严恭寅畏博爱广敬孝之大也宣慈惠和忠恕利物德之盛也臣等不胜大愿谨上玉册玉宝上尊号曰文武孝德皇帝伏惟陛下敬天之锡昭圣之功高明有严慎德无穷赫赫融融与天比崇臣绶等诚欢诚惧稽首顿首

文武大圣广孝皇帝册文 李逢吉

维宝历元年岁次乙巳四月甲戌朔二十日癸巳摄太尉银青光禄大夫检校右仆射兼太子少师上柱国天水郡开国公食邑二千户臣赵宗儒及文武官六千五百四十一人等言臣闻自古王者之御极也必上奉乎天地丕承乎庙祧法天地所以宅八紘严宗祧所以垂万叶非休声震越不足以齐焘载非尊称超卓不足以光祖宗则名实之际不可诬也肇自上古质文未具号兼三五事本嬴刘其後正闰相承南北更王僉事因袭而罔图旌别苟鸿猷既洽徽数莫申贻诸裔昆靡所称谓抑当时臣子之罪非所谓纳君於善者皇唐列圣备有典常高宗而降代享丕号以至於玄宗之治平肃宗之荡定德宗之烈文宪宗之戡剪先圣之克荷重熙累盛震迈古昔未有不由斯者已伏惟皇帝陛下濬哲自天寬仁在躬圣龄方富睿德咸称行懋於朱邸声飞於青宫始践祚而虞舜之大孝闻焉既郊天而文王之小心着焉竭爱敬於西宫示仪型於四海慎简名傳优宠直言自嗣位以来百度维新九围式叙边烽罔不罢属国罔不来灵化有肸向之助风雨无伏愆之候至玄至赜可胜道哉由是百辟羣司耆儒硕士文武臣庶缙黄幼艾殊形一心异声同辞隳肝沥胆奉上徽称其诚至矣吾皇犹惕然三让不得已而俞焉斯谦尊而光卑而不可踰者也夫经纬天地曰文则二仪交泰矣克定祸乱曰武则八蛮顺轨矣格於上下非圣欤通乎神灵非孝欤臣等恭考庶言强名圣德不胜大愿谨奉玉册玉宝上尊号曰文武大圣广孝皇帝伏惟陛下祗上帝之眷命荷累圣之储休外顺四夷内从百辟时承昌运昭受鸿名然後躬大易不已之义思礼经日新之旨鑒拜休之至诚考无过之格言以缉熙庶绩重其文以斥去羣邪盛其武以日達四聪载大其圣以慎守九庙益广其孝克俭克勤有初有终所疎者佞所近者忠畋游必省献替必从无忘我高祖太宗之丕烈以永家邦臣宗儒等诚欢诚惧顿首顿首谨上

仁圣文武至神大孝皇帝册文 李德裕

维会昌二年岁次壬戌四月乙丑朔十四日戊寅摄太尉光禄大夫守司空兼门下侍郎同中书门下平章事臣德裕银青光禄大夫守尚书左仆射兼门下侍郎同中书门下平章事臣夷行金?光禄大夫守尚书右仆射兼中书侍郎同中书臣珙银青光禄大夫守中书侍郎同中书门下平章事臣绅及文武百官金?光禄大夫检校司徒兼太子太保臣僧孺等六千五百七十四人等言臣闻羲皇首太古之号成汤显圣武之称我高祖皇王是宪尊名若古诒厥丕训为

子孙之法岂不善始善述哉矧乃巨唐受命继体天业理运将至大君以兴昊穹所以开至圣也曩者明两未定帝华不协舍允传圣深惟至公先后所以昭天命也亦犹尧发於唐侯文兴于代邸神明之祚不其难乎伏惟皇帝陛下清明博鬯光耿四海玄德莫隣天休大赉日角见表志气如神爰初定命正心理物如辰居其极而天下无邪矣由是昭德塞违尊贤远佞禹不自满成不敢康罔游於田不迓於色自闺闼以施王教由家道而刑国风去比周核名实揽权纲择圣纪修旧典协诚质扞嘉坛欵太一进正臣以端治表礼故老以求说言远无蔽狱近无留令祈玄祖而膏雨降祀灵岳而嘉谷登省刑罚而蓬蒿消发仓廩而螽螟息去岁龙旗承祀大辂亲郊捧玉瓚而一献光灵来格振金石而六变魄宝昭临然犹古训是学缉熙於道天文炳焕云汉其章温恭敬逊承太任之教和乐恺悌洽戚藩之心德风偃於羣黎威震动於絕域又以敬养不逮於长乐昭配未升於祔宫每怀嗣徽蒸蒸而慕所以奉若慈训对越两仪因心立制永锡其教寬底劇之罪兴惻隐之心回霜收电为之反汗及单于慕义景附朔边耀德戢兵谦临是受至於备文物展国容莫不先甲而布甘泽丁辰而廓陰翳和景晏温卿霽網緼斯所谓神祇之心应矣天人之际交矣於是服冕之士戴鵷之伦暨藩卫邦伯黄髮台背不谋而进曰陛下玄默天晬辉光日新大矣孝熙四极爰臻诚宜玉版温润镂鸿名之德神宝焜耀荐万斯之年丕天大典不可辞也陛下犹谦退固拒至於三四羣臣不已乃曰俞哉夫徧覆包含之谓仁极深研几之谓圣宪度着明之谓文蛮夷震叠之谓武感而遂通之谓神无思不服之谓孝臣等不胜大愿谨奉玉册玉宝上尊号曰仁圣文武至神大孝皇帝伏惟陛下乾健不息谦尊而光乐戒其耽禽戒其荒壽乃侔於殷宗俗乃厚於成康貽燕後昆受福无疆臣德裕等诚欢诚惧顿首顿首谨言

仁圣文昌天成功神德明道大孝皇帝册文

维会昌五年岁次乙丑正月己酉朔一日己酉夫守太尉兼门下平章事臣德裕光禄大夫守尚书右仆射兼门下侍郎同中书平章事臣惊朝议大夫检校尚书右仆射兼中书侍郎同中书门下平章事臣李让夷朝议大夫守中书郎中兼户部尚书同中书门下平章事臣崔铉及文武百官大中大夫守太常卿臣孙简等六千一百二人等言臣等闻在昔周宣狁狁内侵四牡薄伐以定王国则诗人大其功暨乎汉宣北夷乖乱呼韩慕义郅支远遁则简册着其美惟此二代称为中兴间者开成之末星孛如云螟飞蔽天先帝威之黎人惧焉乃授至圣遗大投艰迄兹成功厥有冥数伏惟仁圣文武至神大孝皇帝表应龙翼粹含乾刚神全而正气凝宇定而天光发智烛千里动必察微心镜万机物来斯应於是五材用四维张建中和之极缀前圣之纲重枢机修法制刑御家之理无出梱之言销谗邪远奸佞斥背公之党退好径之人内严体貌增堂阶之峻外絕締交去辅车之势古所谓受命於天惟舜独也已又曰一心定万物服惟陛下得之曩者北狄矜功耗蠹中国种类盘牙根柢封殖异术肺附縞衣如荼朋邪作蛊浸淫宇内倒悬不解百有余年既而龙祠湮灭携国欵塞质帝女蹙汉疆有狼顾平城之心鲸吞盛乐之志爰命梟将搴旗刈兵麇穹庐火烈荆榛扬闕幙碎輶輶六羸遯逃贵主生还剗灭妖迹剿除丑类故名王结髮冠带入臣坚昆稽首鞞译来献而又奸臣放命二纪陆梁据太行之固下窥洛邑通故绛之道旁睨近关树其遗孽以窃兵柄议者金曰精甲十万积谷十年泉鱼不察汤网宜悬陛下雄断霆声羣疑水释扬清风以扫云鼓迅雷以破山任冯异则拔天井而震上党仗吴汉则发突骑而倾邯鄲壶关失嶮山东夺魄属有戍边叛将窃发参墟人心摇

荡异议放肆陛下临朝而言曰二寇获罪於天予所不舍未三旬而定晋阳才期年而灭潞子不以金购豨将多降不劳师克粤首驰报非至德感物孰能臻此乎由是台宰百辟藩屏将帅上言曰成伐东夷而肃慎来贺景剪七国而王室乃安莫不始於武功终致刑措将以禋上帝荐祖宗宜受鸿命以荅玄祝陛下犹谦而五让之勤请罔已乃屈已以俞之云汉为章所以昭法度也神明其德所以成教化也巍巍乎有功帝尧之则也勤於大道玄祖之训也臣等不胜大愿谨奉玉册玉宝上尊号曰仁圣文武章天成功神德明道大孝皇帝伏惟陛下不有其名以保其成不德其功以成其盈享殷宗之福致周道之平熙我王度玉振金声臣德裕等诚欢诚跃顿首顿首谨言

应乾圣壽太上皇册文 张弘靖

维永贞二年岁次丙戌正月丙寅朔皇帝臣某稽首再拜奉册言臣闻上圣玄邈超乎希夷强名之极犹存乎言象岂足以表无为之化光不宰之功然称谓所施简册攸着涵泳德泽感於精诚愿奉鸿徽有以自竭伏惟太上皇陛下道侔玄元业纂皇极膺千载之休历承九圣之耿光宣昭化元发扬大号政有敦本示俭庆有格天漏泉恩翔春风仁育羣品而成功不处褻裳去之付神器於冲人想汾阳之高蹈体尧之德与神同符其动也天其静也地巍巍事表无德而言焉顾兹寡昧属膺大宝惧忝传归之业莫申继述之志夙夜兢畏惟怀永图今天下幸安皆睿训所被而未极徽号孰报君亲是以台臣庶官文武之列抗疏於内方伯藩守亿兆之衆同词於外请因壽历以播鸿名臣不胜大愿谨上尊号曰应乾圣壽太上皇当三朝献壽之辰应五纪启元之始光膺徽称允叶神休斯天下之庆也臣稽首再拜

唐大诏令集卷八

卷九

钦定四库全书

唐大诏令集卷九

宋 宋敏求 编

帝王

册尊号赦上

开元二十七年册尊号赦

天宝七载册尊号赦

天宝八载册尊号赦

天宝十三载册尊号赦

乾元元年册太上皇尊号赦

广德元年册尊号赦

册尊号赦上

开元二十七年册尊号赦

勅古之执大象建皇极者必籍彝训而受鸿名所以应乎天而顺乎人也朕嗣守丕业二十七年受命之初既膺明号尚多祗惧已谓崇高公卿宗子缙黄耆艾披诚沥恳诣阙上言僉以为乃圣乃文祖宗大业恭惟纘服必在钦承顾以休名施於薄德抑而不许凡已十年爰迨於今又陈八请上迫奉先之义下稽从衆之言将存至公不可固拒以今日敬依大号曰开元圣文神武皇帝勉从典册良增感惧维新之号既不私於朕躬非常之泽宜普覃於率土可大赦天下自开元二十七年二月七日榜牒昧爽已前大辟罪已下罪无轻重已发觉未发觉已结正未结正系囚见徒常赦所不免者咸赦除之自开元以来诸色逋负痕累人等咸从洗涤令许自新所司更不须以此为累其有别勅停官及亡失爵者放归不齿之类量加叙恤左迁官及诸色流人并稍量移近处朕每念黎甿常恐失所求其困乏必在及时比来诸州或有损处所在赈给例逼春农比及奏报又淹时月既无救於悬絶亦何成於惠养自今以後每年至秋收

後即宜遣使分道宣慰仍与采访使及州县相知巡检百姓间或有乏絕不自支济者应须蠲放及赈给便量事处置讫奏闻天下百姓宜放今年地税古者三载考绩黜陟幽明允叶大猷以劝天下比来诸道所通善状但优仕进之辈与为调选之资责实循名或乖古义自今以後诸道使更不须通善状每至三年朕当自择使臣观察风俗有清白政理着闻者当别擢用宗庙致敬必先於如在神人所依无取於非族深惟至理用切因心其应缘太庙五享宜於宗子及嗣郡王中拣有德望者令摄三公行事其异姓官吏不须令摄其草泽间有殊才异行文堪经国为衆所推如不求闻達者所由州长官以礼徵送皇太子璵男宜并封授官邠王守礼宁王宪各与一子三品官其内外文武三品以上赐爵一级四品以下各加一阶长公主及嗣郡王各与一子官郡主县主各放一子出身二王後及诸方蕃客宜各赐物诸致仕官量与进改依前致仕天下耆老百岁已下版授下州刺史妇人版授郡君赐粟五石绵帛五段九十已上版授上州司马妇人版授县君赐粟三石绵帛三段八十以上版授县令妇人版授乡君赐粟两石绵帛两段京城父老等宜共赐物三千段僧道等赐物一万匹天下观寺每六斋日宜转读经典惩恶劝善以阐大教率土之内赐酺三日

天宝七载册尊号赦

惟天法道惟后奉天既合德以降符必执象以明本则上玄眷命有以丕承大宝鸿名斯为公义朕纘宗社之重扬文武之烈克勤匪懈服道齐心允迪兹猷聿求至理日慎一日三纪於兹属区夏太宁灵祇集贶而公卿宗子耆艾法流金曰玉芝白鱼神日瑞景天之应也敦信兴礼务本崇儒人之应也化洽而风俗休宁气和而疵厉不作天启道运不可让也上答元符愿增徽号披诚诣阙累上封章至请逾勤恳词难夺以今日敬膺典册曰开元天宝圣文神武应道皇帝式副人神感惧交集宜广恩於善贷俾叶度於维新可大赦天下自天宝七载五月十三日昧爽已前大辟罪已下罪无轻重已发觉未发觉已结正未结正系囚见徒常赦所不免者咸赦除之其左降官及流移配隶安置罚镇効力之类并稍与量移亡官失爵放归不齿及诸色被停与替非衰老疾病者宜所司量加收叙人和年登休运斯属轻徭省赋惠政攸先将治小康必弘厚贷其天下百姓来载租庸并宜放免及诸色勾徵等亦一切放免自古帝王建邦受命必敬先代以修旧章周备礼文既存三恪之位汉从损益惟立二王之後自兹已降且复因循将广继絕之恩式弘复古之道宜於後魏子孙中简择诸属灼然相承者一人委所司勘实淮鄴公介公例定为三恪陵庙所奉典职维崇事虽更於有司任岂循於恒秩其宗正卿与太常卿同品其少卿及丞亦宜准此又上古之君存诸号氏虽事先书契而道着皇王缅怀厥初宁忘咸秩其三皇以前帝王宜於京城共置一庙仍与三皇五帝庙相近以时致祭自古受统之主创业之君皆经济艰难戡定祸乱虽道谢於往古乃功施於生人用率典章亦崇禋祀其历代帝王发迹之处未有祠宇者宜令所由郡县置一庙以时享祭仍取当时将相德业可称者二人配祭仍并以图画立像如先有祠宇未沾享祭者亦宜准此式间表墓追贤纪善事有功於当时义无隔於异代其忠臣义士孝妇烈女史籍所载德行弥高者所在亦置一祠宇量事致祭古者鄉有塾党有序所以明尊卑之仪正长幼之序风化之道义在於兹先置鄉学务令敦劝如闻郡县之间不时训诱闾巷之内多亏礼节致使言词鄙少长相凌有点清猷何成雅俗自今以後宜令郡县长官申明条式切加训导如有礼仪兴行及纲纪不立者委采访使明为褒贬具状闻奏道教之设风俗之源必在弘门以敦风俗须列四经之科冠九流之首

虽及门求道颇有其人而覩奥穷微罕闻達者岂专精难就为劝獎未弘天下诸色人中有通明道德经及南华等四经任於所在自举各委长官考试申送其崇玄生出身自今以後每至选日宜減於常例一选以为留放朕每以道元有属思竭精诚经教所存岂忘崇奉且从其道者师其人行其教者尊其礼晋琅琊王公府舍人杨真人护军长史许真人丹阳上计掾许真人皆道着妙门感通玄阙降高真之迹为上清之宗後汉张天师教达元和德宗太一正一之道幽贊生灵梁中散大夫贞白陶先生高尚尘表博達玄微综缉真经传裨後学并令有司审定子孙将有封植以隆真嗣天师册为太师贞白册赠太保其天下有洞宫山各置天坛祠宇每处度道士五人并取近山三十户蠲免租税差科永供洒扫诸郡有自古得道昇仙之处虽令醮祭犹虑未周宜每处度道士三人其灵迹殊尤功应远大者度三人永修香火其茅山?阳观取侧近百姓二百户太平崇元二观各一百户并蠲免租税差科长充修葺洒扫应天下灵山仙迹并宜禁断樵采弋猎如闻山林学道之士每被搜寻且法之防邪本有所以至於宿宵妖讹亡命聚衆诱陷愚人故令禁断郡县遂一槩迫逐至学道者不得安居自今以後审知清洁更不得恐动以废修行其五岳四瀆名山大川各令本郡长官致祭朕刻意真经?诚至道冀凭玄佑永锡黔黎每朝礼三清则宵衣忘寝或斋戒一室则蔬食属厌不以勤躬为倦务以徇物为心况於宰杀尤加惻隐自今以後天下每月十斋日不得辄有宰杀闻闾阎之间例有私社皆杀生命以资宴集仁者之心有所不忍亦宜禁断且因亲设教式本於人伦自叶流根必逮於荣养内外文武职事官有五品已上其父祖见在而无官者各授一官仍听致仕其祖母见在准母例处分京官五品已上正员官如父母已歿未有官者亦宜追赠所司勘会即与处分睦亲之义因心不忘前开府仪同三司窦???顷以容纳微人颇亏典宪永怀舅氏追感渭阳宜申国恩再复荣秩可开府仪同三司仍放优闲不须朝会王泽无私岂殊於中外天瑞有庆频属於京輦寬大之典则已溥覃惠施之恩特申曲被其京城父老宜各赐物十段七十以上仍授本县令其妻版授县君六十已上版授本县丞天下侍老百岁已上版授上郡太守妇人版授郡君九十已上版授上郡司马妇人版授县君八十已上版授县令妇人版授鄉君仍并量赐酒麵内外见任文武官九品已上宜各赐勲两转其京文武官见在京及致仕并陪位官诸方通表使及月番官等一品赐物一百匹二品三品并八十匹四品五品五十匹六品七品三十匹八品九品二十段两京留守各八十匹其节度使采访使并诸官称充使未回并同在京例赐物贵妃杨氏稟性柔和因心忠孝克恭克慎蹈礼循诗加以勤志玄宗叶成严奉率励宫掖以迪关雎宜赐物三千匹嫔御等赐物有差太真观虽先度人住持尚少宜更度道士七人太子璵赐物二千匹庆王琮已下各有差率土之内赐酺三日

天宝八载册尊号敕

自昔皇王受祚必降於元符天人協心乃章於大号朕纘承玄绪?奉睿图何尝不精意真宗励心庶政幸以边隅底定风雨时若人和岁稔且洽於雍熙极瑞殊祥荐臻於昭应故得玉芝再产秘牒玄通斯皆至道降休先圣储祉菲德曷以克当是用祇荐崇名永扬鸿烈而羣公百辟援义比事诚请不已固辞不获以今日敬膺典册曰开元天地大宝圣文武应道皇帝徽章载茂寅畏增深宜因稽古之典式布维新之泽可大赦天下自天宝八载闰六月五日昧爽已前大辟罪已下罪无轻重已发觉未发觉已结正未结正系囚见徒常赦所不免者咸赦除之朕永惟风俗之本渐冀返朴至於弘贷之名亦思复古天下百姓丈夫为户头者宜各赐爵一

级征镇之役其来自久虽存素备谅在变通顷者用兵盖非获已今西戎摧殄北敌归降南蛮东夷咸皆稽颡亦可谓四海无事万里廓清减戍息人思弘善贷其诸军镇兵非切要可均减者宜令本道节度与所司商量处置闻奏其百姓有频经征镇者已後差点之次不在取限高年给侍本属存养因时定式务广仁恩其天下百姓丈夫七十五已上妇人七十已上宜各给中男一人充侍仍任自简择至八十已上依常式处分唐虞省刑画冠不犯秦汉制法密网唯烦理乱之间得失斯在朕长想远古务崇敦朴刑期不滥政叶无为岂惟守於平邦庶有臻於大道顷者详诸条目已从简易至於结断尚虑深刻所贵从宽示其知禁宜令中书门下与刑部大理法官更详定法律之间有所非便者具条目奏禘祫之礼以存序位质文之变盖取随时国家系本仙宗业承圣祖重熙累盛既锡无疆之休合享祭神宜弘不易之典自今每遇禘祫并於太清宫圣祖前设位序正上以明陟配之礼钦若玄宗下以尽?恭之诚无违至道比来每缘禘祫时享则停事虽通於从宜礼或亏於必备自今已後每缘禘祫其时享无废又奉先追远礼惟昭德崇福展敬义在因心自今已後献祖宣皇帝宣庄皇后忌日宜令京城一日设斋太祖景皇帝景烈皇后代祖元皇帝元贞皇后忌日京城三日行道玄宗妙本实备徽言垂范传学时宏至化朕所以发求道之使远令搜访因听政之余亲加寻閱既刊譌谬爰正简编必在阐扬以敦风教今内出一切道经宜令崇玄馆即缮写分送诸道采访使令管内诸郡转写其官本便留采访郡太一观持读圣人垂训盖先乎道学者崇本必有其师丈宣王与圣祖同时俱为教首虽考言比德理在难明而问经序礼迹彰亲授思广在三之义用崇得一之尊宜於太清太微宫圣祖前更立文宣王像与四真人列侍左右且道降真符天有成命藏之於密则取固名山彰之以类则发祥星洞况灵仙所集宜表殊休太白山可封为神应公所由四时祭祀其金星洞改为嘉祥洞所管华阳县改为真符县仍於洞所置一祠宇仙人台下置一观两京并十道於一大郡亦宜各置一观仍并以真符玉芝为名每观度道士七人修持香火户部侍郎兼御史中丞王珙以才受委以忠奉上顷命精求玄论克叶神心宜旌廼诚俾正章绶特与三品其李浑等四人既亲传真诰因获元符当有甄明用旌福应宜令中书门下量其所能具状闻奏当别处分夫九州之镇实着礼经三代之典必崇望秩事既属於报功义有弘於锡命其九州镇山除入诸岳外宜并封公仍各置祠宇如先有祠宇者量更增修以时致祭其五岳四渎虽载常祀储庆发祥当申昭报宜令所在长官各陈祭礼名山大川亦量事致祭天下侍老并量赐酒麵内外见任文武官职事官三品已上赐爵一级四品已下各加一阶其京文武官见在居京诸色陪位官通表使等赐帛有差率土之内赐酺三日

天宝十三载册尊号赦

王者事天明事地察修身慎行孝德彰矣故风化天下和睦兴焉致敬宗庙祖考来格是则礼莫大於严享孝莫大於扬名有以通於神明有以光於四海朕承真之道纘圣之业钦若先训惟怀永图宝俭宝慈无为而理自南自北有截来威五教聿兴家服仁孝四灵感应物必纯诚百郡公卿万方夷夏金奉玄贶徵长发於真源屡荐鸿名愿昭彰於至德封章守阙至于再三加以圣祖锡符玄中啓迪天心垂裕荣光降临敢不丕承固执冲让乃展因心之义以弘推尊之典?上册礼斋肃思诚入室僊然敢忘於目出户而听庶几有闻扬美諡於无疆展永怀於罔极典从拜後礼既尊先式副羣心允成古义以今日敬膺典册曰开元天地大宝圣文武证道孝德皇帝大号载崇祇若增惧宜因布和之时式弘在宥之泽可大赦天下自天宝十三载

二月九日昧爽已前大辟罪已下罪无轻重已发觉未发觉已结正未结正系囚见徒常赦所不免者咸赦除之官人犯入已赃不可更令却上後不须为累其左降官并稍量移近处其反逆缘坐流配诸色宜与量移其王珙李林甫柴崇耀阿布思等并寄任非轻包藏特甚原情议法深所难容况日月未淹罪坐尤重即从宽宥何以惩肃应缘亲累流配者并不在该及之限左降官承前遭忧皆不得离任孝行之道所未弘通情礼之间深可哀恤如有此类宜并放归仍申省计至服满之日准法处分自今以後编入常式其中有非反逆缘坐及情理切害有父母老年不任相随无昆弟养者许停官归侍及有身已衰老先罹谴责情愿停官者委本道采访简择具名牒中书门下然後放还鰥寡惸独乏絶者量加赈给三载黜陟百王令典殿最之迹廉问攸归欲更别遣使臣虑有烦扰今岁宜委本道采访使具官人善恶奏闻以申劝沮自临御以来四十余年棫朴延想寤寐求贤林藪无遗旌招不絶犹虑昇平已久学业增多至於徵求或遗僻陋其博通坟典洞晓玄经清白着闻词藻宏丽军谋出衆武艺絶伦者任於所在自举仍委郡县长官精加诠择必取才实相副者奏闻朕崇尊先谥霜露增感於以孝思无忘锡类其内外见任官阶俱是三品已上父未有五品官及无官已亡歿者宜各赠五品及母无邑号者亦与追赠其见任四品五品清官官阶是五品已上者亡父母先无官号者亦准此追赠且厚其风俗五教之旨聿兴责於丘园十翼之风斯在其士庶间有衆推孝悌累代义居高尚确然隐遁岩穴者委采访使博闻访荐其孝义之人已经旌表雍睦无易纯至有终着美郷闾深可嘉尚各赐勲两转以彰德行天下侍老百岁已上版授本郡太守妇人版授郡夫人各赐绵帛五段粟三石八十已上版授县令妇人版授县君令各赐帛两段粟两石太清宫阙圣贤仙居频降休徵屡贻启迪不有优异岂表殊常其本宫道士宜各赐物三十段道门威仪王虚贞赐物五十段陪位大德各赐物二十段因心推崇增上美谥惟官统职必在正名今以太常尊事宗庙安可列署为名礼不逼尊情期達敬五陵署改为台其献陵台等五令及丞并昇一阶以彰崇奉五岳四瀆及名山大川并灵迹之处先贤祠庙各委郡县长官致祭其有陵墓祠宇颓毁者量事修葺亚献皇太子赐物一千段终献荣王琬赐物五百段其余各赐阶爵有差其郡守县令职在亲人必务公勤用康黎庶凡所推择皆竭乃诚宠锡之间须甄异等普恩之外太守等并赐爵一级县令赐勲两转庶期勉励以表朕心其京文武官一品赐物一百匹二品八十四匹三品七十四匹四品五品五十四匹六品七品各三十四匹八品九品各二十四匹东京北京留守节度采访使并京官准勅出使未回者所赐物并同见在例左相陈希烈纯粹之道载穆朝廷文儒之风式瞻师表且叶和时令翊赞昇平柔嘉其德克壮元老与一子五品官赐物五百匹摄太尉奠瓚上册书宝册读册右相杨国忠当朝正色百寮纪纲励节遗身三阶柱石况发挥孝理润色鸿猷金玉王度典礼增缉不有殊等何用为劝宜与一子三品仍与一子五品官更赐物五百段左仆射安禄山以贞一之心搃文武之任出清北落入赞南宫既押登歌又挥宝册与一子官赐物四百匹摄太尉张均太清宫祠及修仪注等使普恩之外又赐物一百匹武德功臣贞观初宰辅等缅想忠义感会风云用集大勲肇兴王业其有子孙零落冠冕陵夷无任官者宜令所司勘责依资与一人京官唐初功臣绩参締构録劳念旧每寘於怀普恩之外宜放一子出身如已出身所司依资与一官率土之内赐酺三日

乾元元年册太上皇尊号赦

古者父有天下传归於子子有天下尊归於父有国所以继统立身莫若扬亲其义远矣我太

上至道圣皇天帝惟皇降衷敷佑於上允文允武乃圣乃神道合乎乾坤德明乎日月粵若增崇九庙巡謁五陵天子之孝也严禋二郊升中东岳圣人之表也制礼作乐阐学明刑帝皇之业也勘定多难怀柔百蛮霸王之功也於是乎为而不宰成而勿居神超象外之光心契合漠之境释负于小子俾承於丕构讨伐叛逆绥怀四方岂朕之能皆圣皇之训也顷者亲授宝符载锡美称顾朕不德何以克荷君父之命若登於天祖宗之绪恐坠於地一昨与羣公百僚庶尹衆士图惟帝载钦若圣謨自古以来百王垂统文明濬哲孝友寬仁岂有如我开元之盛也乃稽大典上徽号曰太上至道圣皇天帝累日陈请不蒙许纳至於数四今兹俯从允膺天休克副人望朕迫严?曲被殊私迎春之初承奉嘉命圣皇所赐曰光天文武大圣广孝皇帝名以制义亦为实宾卑不踰尊是昭物则恭惟圣造何敢当仁初以洪业载昌有亏公议复以大圣二字深僭皇猷让非饰词言必形泣承顺顏色而宸睠不固祇膺宠光乃夕惕增励今惟新景命礼洽於尊亲诞受徽章敬在於顺上发生万物行庆其时孚佑兆人缓刑斯在宜弘沛泽以布阳和可大赦天下改至德三载为乾元元年自二月五日已前大辟已下罪无轻重常赦所不免者咸赦除之其两京文武官应三司先推勘者本罪中逋减一等处分其合放者三司具条件奏闻自开元以来将相大臣非反逆及犯名教枉法赃罪者流死许其家人以礼收葬其在贼境为其杀戮未经追赠者据本官追赠公主及嗣王郡王郡主县主等已上亲被逆贼杀害者各与子孙一人官使瘞藏失骸骨者令招魂葬身歿王事者三品已上各与追赠仍各与一子官五品已上一子出身六品已下量事追赠其元从圣皇天帝至成都府之武官五品已上宜与一子官六品以下超资进改圣皇至成都府後到官及灵州宁州首末扈从三品已上与一子官五品已上放一子出身情愿回授周亲及近亲者亦听六品已下量与转改凤翔府已归顺前者普恩外加一阶车驾出城後任官?藏不仕逆贼即与处分开元功臣普恩外赐爵一级身亡歿者与子孙一人加一阶其诸道节度下将士三品已上与一子官六品已上放一子出身六品已下量与转改勲业高者各委本使奏闻诸道留後将士普恩外赐勲三转自开元以来宰辅之家不为逆贼所污者与子一人官自贼?两京文武常参官及诸州刺史有絶脰仰药不事叛人为衆所知者量加优赠有脱身贼庭妻子被屠戮者委所在勘会闻奏其天下孝义门各与一子官委采访使具名闻奏量文武处分其左降官非反逆缘坐及犯恶逆名教枉法强盗赃如有亲年八十已上及疾患在床枕者不堪扶持更无兄弟者许其停官终养其流人亦准此自今以後应以鑿术入仕者同明法例处分其天下百姓今年租庸并放免其百司及府县诸色杂供各宜减半其杂役非切要者一切并停其天下州县有遭逆贼攻击坚守不下竟以获全其官人百姓中有诚効灼然为衆所知者宜令本道使按验奏闻据状迹酬其官赏身亡歿者重加褒赠有父母存者仍与一官及邑号无父母者与一子官有一家丁壮尽被屠害者其父母妻子仍令州县以官物賑恤并量造屋宇使得安存其州因城?被杀戮者残毁者委本道使勘责取实各量免其三二年租赋自寇逆以来有匹夫匹妇节义可称者并旌表其间墓其流亡户复业者委本道使与刺史勾当賑给并与种子犁牛仍免三年租赋内外文武官三品以上各赐爵一级四品以上及四方通表使各加一阶五品已下有父歿者各赐勲两转其刺史上佐録事参军县令委中书门下速於诸色人中精加访择补拟判司丞已下宜令所由先於两京有潜藏不事逆贼及故托疾病官中简择资考深才堪者詮注续发遣皇五等已上亲及九庙子孙有才学政理委宗正等简择闻荐其有任伪官及掌兵马军将能即来还各还本官仍别优赏其左降官诸色流移配隶安置罚镇効力之类亡官失爵解退後放归田里及安禄山支党缘坐不在免限李林甫王鉞杨国忠等一房去年十二月十五日制後

所犯并准前制处分

广德元年册尊号赦

惟高祖太宗敷大德於天下覆载之内湛恩茂育累圣同道康乂兆人宝位重光深其德泽被服渐渍洽於生灵者百五十年之间兵不作而刑将措矣自寇虐横厉山东不开衅起渠魁毒流区宇三军七萃之士豪杰忠良之徒制在风波遭其驱劫由是干戈不息狂贼实烦哀我人斯并罹灾患悯兹有犯无罪万方朕上戴皇天下临黔首奉先圣之成命集一切之大勲元恶既除羣生思义是欲镜清六合纲决八紘庶齐大道之时克复太平之理至化犹鬱兵严初解百辟卿士中外重臣并进昌言请上徽号曰宝应元圣文武孝皇帝朕涉道日寡慙德良多恐阻乐推之心自增神器之重俯膺典册敬受鸿名便欲谒报昊天展事郊庙又以孟秋多稼垂及西成王畿之间人实劳止辍兹大礼式候玄冬切为踰年改元之制缵承鸿业敢废旧章博采羣公之议乃贞协用之纪其宝应二年改为广德元年爰属履端乃弘肆眚救兹汤火俾云行而雨施涤其瑕秽将玉振而金声宜广更始之恩用明向劝之福可大赦天下自广德元年七月十一日昧爽已前大辟罪已下罪无轻重已发觉未发觉已结正未结正见系囚徒常赦所不免者咸赦除之左降官即量移近处亡官失爵各与收叙诸色流人罚镇効力安置配隶等一切放还其安禄山史朝义亲族应在诸道一切原免并无所问天下所有诸色结聚羌浑党项等但能悔过自陈各归生业一切并舍其罪其中有头首能劝率并束手来者并加官赏仍令本道防御使本管刺史县令分明晓谕所有到者各録奏诸道百姓逋租悬调及一切欠负官物等自宝应元年十二月三十日已前并放免一户之中有三丁放一丁庸调地税依旧每亩税二升天下男子宜二十五成丁五十五入老应徵租税刺史县令等据见在户徵科其逃亡死絶者不得虚擲隣保河北百姓复三年应是回纥行营经历处免今年租税内外文武三品已上赐爵一级四品已下加一阶各赐勲两转天下兵马元帅雍王智谋夙成忠孝纯至恭行讨伐亲总元戎抚外藩以仁训羣帅以义班师献捷勲茂武成宜兼尚书令加实封二千户回纥可汗册为颉咄登密施舍俱缘英义建功毗伽可汗可敦册为娑墨光亲丽华毗伽可敦可汗可敦及左右杀内外宰相已下共加实封二万户令御史大夫王翊持节就衙帐礼册左右杀胡禄都督并封为王诸部督并封国公河北副元帅怀恩宜兼太保仍与一子二品官一子四品官并阶更加实封五百户河南副元帅光弼与一子三品官并阶加实封三百户幽州节度怀仙与一子三品官并阶加实封二百户李抱玉郭英义辛云京侯希逸田神功孙志直白孝德令狐彰并各与一子三品官并阶加实封二百户李宝臣薛嵩田承嗣张献诚等各与一子五品官并阶加实封二百户鱼朝恩寄崇师律程元振勲高佐命各加实封二百户仍与一子五品官并阶仆固瑒高彦崇浑日进李建义李光逸杨崇先李怀光张如岳白元光温如雅拓跋澄泌高晖卢钦友成惟良曹楚玉等各与一子五品官加实封一百户仍各赐鉄券以名藏太庙画像於凌烟之阁并寇难已来将相勲业高者其名籍图画亦准此子仪与一子三品官并阶加实封二百户苗晋卿刘晏裴遵庆元载各与一子四品官并阶加实封一百户仪王及彭王已下男未有官者并准旧例与官及封永穆并长乐已下长公主及郡县主嗣王等各与一子官皇亲五品已上诸亲三等已上各与一子出身二王後各与一子官诸道节度使及立功将士其父见在无官者依子文武与官已歿者追赠阵亡将士袭父官爵河南河北有怀材抱器安贞守节素在丘园不仕为衆所知委所在长官具名闻荐应援伪官等□昭洗

矜才宥过宜有甄拔委所由勘会本官名衔资历闻奏量才处分文武正员常参官并诸州刺史父母无官邑号者宜与致仕官及邑号赠者更与改赠刺史县令已後改转刺史三年为限县令四年为限员外及摄试官一切不得厘务谏官每月一上封事无所回避河北伪度僧尼道士女冠并与改正度天下刑狱须大理正卿断刑部详覆不得中书门下便即处分诸色人中有孝悌力田经术通博文词雅丽政理优长本州各以名荐

唐大诏令集卷九

卷十

钦定四库全书

唐大诏令集卷十

宋 宋敏求 编

帝王

册尊号赦下

元和十四年册尊号赦

长庆元年册尊号赦

宝历元年册尊号赦

会昌元年册尊号赦

会昌五年册尊号赦

大中二年册尊号赦

乾符四年册尊号德音

痊愈

太上皇康复诏

疾愈德音

太和八年疾愈德音

咸通八年痊愈救恤百姓僧尼勅

册尊号赦下

元和十四年册尊号赦

朕闻惟人戴后，因事必极於推尊，惟辟奉天，有善必归於让德，式敷景化，以荅玄功。居有劳谦之思，进多满假之惧。缅自远古，何尝不由是而致理焉？朕获纘睿图，祇膺神器，上奉大祭，下安羣生，恭已临轩，兢怀馭朽，志欲周於四海，念常切於一夫，旰食宵兴，惟恐失坠，运属休泰，时丁小康，方隅廓清，氛祲销荡，斯乃上荷乾坤之垂佑，宗社之降灵，下赖卿士之协心，戎臣之宣力，端拱向道，推诚任能，岂予寡昧，用集丕绩，况至化犹鬱，勤忧未宁，而中外诸臣文武多士，累陈恳疏，并进昌言，愿献鸿名，以增虚美，抑衆心而率吁，转切顾眇，身而内愧，靡安，乃撰吉辰，爰受典册，禋告於清庙，闻於昊天，当兹盛仪，夕惕增励，於戏朕自御极，再加景号，在徽章而孔备，谅浮实而多慙，宜因行庆之辰，诞布惟新之泽，与物咸遂，永孚於休，可大赦天下。自元和十四年七月十三日昧爽已前，大辟罪已下，咸赦除之。惟故杀人及官典犯赃，不在此限。左降官量移近处已经量移者，更与量移如复资者，即任便赴选。集亡官失爵放归不齿者，量力收叙。前资见任官，因瑕累未经録用，并左降官事情可恕，才行足称者，宜简拔奨用。淄青旧管内官吏等，将士百姓等，纵有迹同恶逆，挂涉流言，事在往时，一切不问。京畿今年秋税青苗及榷酒钱，每贯量放四百文。从元和五年至十年已前，诸县百姓欠负钱物斛斗等，委京兆府疎理，减放淮南浙江东道宣歙江南西道湖南福建山东南道荆南等九道今年秋税钱，合上供者，每贯量与减放度支盐铁户部应有逋悬，并委本司疎理，具可放数，闻奏。比来州县并不定户贫富变易，遂成不均，前後频有制勅，长吏不尽遵守，今宜三年一定，必使均平。内外文武见任及致仕各官三品已上，赐爵一级；四品已下，加一阶，仍赐勲两转。神策六军金吾皇城威远诸道将士，经淮西淄青两度立功者，更赐勲两转。二王三恪及文宣公神策六军金吾皇城威远等诸军，应在城内蕃客并节级赐物，侍中韩弘读册官崔羣读宝官皇甫鑄并各加一阶，已至三品者，赐爵二级。撰册文官崔羣与一子正员官，其余应职掌行事，加阶赐勲有差，故尚父子仪赠太尉秀实及张巡许远南霁云颜真卿杲卿子孙，各与官及出身。宝应兴元功臣各赐勲爵，天下诸色人有贤良方正能直言极谏，博通坟典，達於教化，军谋宏远，堪任将帅，详明政术，可以理人者，委内外官各举所知，当亲自策试中书门下，选黜陟使分巡天下，百姓高年者，颁赐有差。

长庆元年册尊号赦 元稹

我高祖太宗化隋为唐，奄宅区夏，包举四海，全付子孙，其何事哉？彼昏盈而我劳，劬也明皇承之，能大其业，六戎八蛮罔不贡奉，由是庶尹弛政，庶吏弛刑，视人不勤，视盗不谨，燕寇勃起，洞无藩篱，六十有七年兵革大试，其何事哉？据易安而怠渐萌也。逮我圣父勤身披攘，斩断诛除，天下略定，曾是幽冀，赐予怀来，荷赖皇灵，丕训不坠，环岁之内，二方平宁，粤予何功？时帝之力而卿大夫猥以大号加予，眇身让於四三，益甚其请，皇太后始闻其事，欢然慰心，慈旨丕临，臣诚上迫，祇受典礼，懍乎予怀，尚念昔者七十二君，莫不升中庆成，自以为尧舜莫已若也，然而不为尧舜之行，者来代无传焉。朕尝推是为心，不欲名浮于实，今卿大夫谓我为文武孝德矣，其将何道以匡予？予其业业兢兢，日慎一日，慕陶尧虞舜之行，以自勉，思文武宪章之道，以自勤，予苟不思，无忘纳诲於戏，溢美之名，既不克让，润物之泽，夫何爱焉？可大赦天下。自长庆元年七月十八日昧爽已前，罪无轻重，咸赦除之。惟故杀人并官典犯赃，不在此限。应左降官及流人未经量移者，宜与量移近处，有左降官流人本因犯赃得罪者，宜依今年正月三日制处。

分京畿诸县及度支盐铁户部负欠各疎理放免有差应经战阵之处所在州县收瘞遗骸仍量事与樁榷兼以礼致祭李师道吴元济自絶於天并从诛灭念其祖父尝事先朝坟墓所在并不得令人擅有毁废爱人本於省赋虽在必轻国用出於地财又安可阙今淮蔡并山东率三十余州约数千里颁赐或踰於钜万给复有至於连年应河北等州给复限满处置宜委所在长吏审详垦田并桑见定数均输税赋兼济公私每定税讫具所增加申奏其诸道定户宜委观察使刺史必加审实务使均平京兆府亦宜准此其百司职田在京畿诸县者访闻本地多被所由侵隐抑令贫户佃食蒿荒百姓流亡半在於此宜委京兆府勘会均配务使公平其京兆百姓属诸军诸使者宜令各具挟名勅下京兆府一户之内除已属军使余父兄子弟据令式年几合入色役者并令京兆府明立籍簿普同百姓一例差遣频年已有制勅处分委京兆府举明旧章条件闻奏刑狱所系理道最切如闻比来多有稽滞一拘囹圄动变炎凉自今以後宜令御史台切加访察每季差御史巡囚事涉情故或断结不当有失政刑具事由闻奏其天下州县并委御史台并出使郎官御史兼诸道巡院切加察访近边所置和采皆给实价如闻顷来积弊颇甚美利尽归於主掌善价不及于村闾或虚招以奉於强家或广僦用资於游客若不严约弊何可除宜委度支精择京西京北应供粮军并和采院官并营田水陆运使切加访察仍作条疏检辖速具奏闻应停诸道年终勾并不许刺史上使并録事参军不得擅离本州委御史台切加纠举内外文武见任并致仕官赐官爵有差神策六军金吾威远皇城将士普恩之外各赐勲三转大长公主公主嗣王郡主县主神策六军金吾威远皇城等诸军将士统军以下兼将士等长行立仗及守本军本营者各赐物有差鸿臚礼宾院应在城内蕃客等并节级赐物陰山贵女来迓天孙会王明庭克观盛典念吾妹之将远於礼宾而宜加其迴纡公主别有赐物摄侍中读宝户部侍郎平章事杜元穎中书侍郎平章事崔植各加一阶撰册文官与一子正员官奉册奉宝授书玉册书宝官各加两阶进宝授进册中进中严外辨礼习仪赞导押册押宝授舁宝册官各加一阶其余应职掌行事官并写制书官太常修撰仪注礼官并内定行事中使三品已上各赐爵一级四品已下加一阶仍并赐勲两转镌造玉册并填金事造宝装宝官等各赐五十段尊师重傅有国常经李逢吉韦绶薛仿丁公着等普恩之外各加一阶如已至三品四品者赐爵一级天下百姓九十已上者委所在长吏量加存恤孝子顺孙义夫节妇先以旌表者亦量加优恤五岳四渎名山大川并自古圣帝明王忠臣烈士各令所在以礼致祭

宝历元年册尊号赦

门下朕闻奉天地之大统必酌於人心荷祖宗之诚训必参於国典顾惟眇身守任重器道未能被物德不足蓄身赖于宗公硕老辅导承弼享祧奉鬯熏燎告玄履历正元敷施大号庶万方咸若四表穆然皇祖披攘之基列圣焦劳之业恬焉而有泰焉而居昼以度心夜以省已其何德以堪之方将法乾以行健体咸而致和执冲以固高守约以持满而文武百辟章奏四上以为人心不可以曲让国典不可以矫违亦用慰於太皇太后皇太后之意屈而後俞谅非获已岂不以子非生知欲以徽称懿号诱掖劝慕之乎将使循名而勉其实力实而应其名乎然则予方且以为韦弦方且以为箴诤懋於皇极庶无尤违是宜与物同利惟新大泽可大赦天下自宝历元年四月二十二日昧爽已前大辟罪已下已发觉未发觉已结正未结正击囚见徒罪无轻重咸赦除之惟故杀人及官典犯赃不在此限

会昌二年册尊号赦

门下昔我高祖太宗始造区夏辟乾坤以覆载揭日月以照临盛德耿光格于上下昊天有成命我二后受之列圣丕图光大其绪文綏武靖奕叶连枝逮予缵修罔敢失坠诚欲追踪往昔贻范将来陶未俗於至和返太朴於已散而道不足以居域中之大文不足以成天下之化恭己南面夙兴夕思遐想古理歉然予怀至於嗣岁丰穰寰海康静妖沴灭息华夷大同兹实鉴佑自天匡救在下谅非己出安敢自多而三台百辟陈忠沥恳加我大号其何以堪谓予守文宜述先志抑而不行者三请确而不拔者羣诚岂贪在己之名姑念从人之欲祇膺典册良深惕厉於戏顔子匹夫也犹曰舜何人也矧有其位行其教化而不思齐其道也尚念交修俾克用乂今维夏长养之时动植之物莫不自遂思有以导迎和气生活吾民是用稽牺爻之作解法虞书之肆赦推恩宥过与物同休可大赦天下自会昌二年四月二十三日昧爽已前大辟罪已下已发觉未发觉已结正未结正繫囚见徒罪无轻重咸赦除之惟犯十恶叛逆已上故杀人及官典犯赃不在此限

会昌五年册尊号赦

门下王者事帝必严禋祀之容臣下归功爰极推崇之义既膺显号式展盛仪因时布和顺岁更始前圣垂范逮予是遵矧以眇身幸逢昌运虽履冰惟惧而涉道未周繫我辅臣泊兹列岳内尽交修之志外分共理之忧乃者敌衆乖离部族欵附收帝子於羶裘之所致名王为冠带之臣坚昆来朝不远万里蛮貊向化克同九州重以上党狂童窃袭叛迹问罪之师既集元凶之首遂梟廓清乱风洗涤污俗翦逆弁而故都底定甯摩尼而坏法永除由是退恶进贤化行令举刑奸赃之吏破黥货之家此皆宗社降灵助成时政岂朕凉德独擅厥功而中外诸臣文武多士累陈恳疏再举鸿名辞不获从被此虚美是用?告清庙明禋上玄烟燎所升灵贶如答既展郊礼重申国经宜因行庆之辰诞布维新之令同我景福永孚於休可大赦天下自会昌五年正月三日昧爽已前大辟罪已下罪无轻重已发觉未发觉已结正未结正系囚见徒常赦所不免者咸赦除之

大中二年册尊号赦

门下我国家披皇图以立极执文象以升中睿嗣神宗重熙累盛逮予稽古考圣绍复中兴洗滌宿氛廓开昌运天命不易赐予元符荷祖宗之耿光致寰瀛之小泰干戈载戢风雨顺时北狄来宾西戎効欵岂予菲薄汔此肃清皆中外元寮文武多士同心协赞而使之然益用兢慙以戒盈满而乃累陈丹恳愿上鸿名牢让不从沥陈弥切於戏昔贤有云舜何人也我何人也苟或让之不遂予亦敢不思齐今百执事谓予曰圣敬敢忘汤武日跻之诗谓予曰文思敢忘放勳钦明之典谓予曰和武敢忘保大之功谓予曰光孝敢忘?志之义以是自勉庶无悔焉浮实之名既不获已乘春之泽当务惟新可大赦天下自大中二年正月三日昧爽已前大辟罪已下已发觉未发觉已结正未结正系囚见徒罪无轻重咸赦除之惟犯十恶五逆已上故杀人及官典犯赃不在此限

乾符四年册尊号德音

天地运无私之道以遂羣生帝王宏在宥之仁是章含垢得不广沾沛泽昭洽寰区爰施解网之恩用布垂衣之化朕君临大宝子育含灵前岁中外臣僚藩方将帅献我徽号询於典章虽云前赦不遥既受鸿名咸施庆泽稟列圣之法嗣致兆人之劝康然以赦宥恐频变通宜审权停旧典再及新春每念贬降遐荒迁流裔土倾心望阙延颈祈哀系於朕怀常深惻悯宜顺阳和之候追行荡涤之恩自乾符四年正月五日已前京畿及天下州府大辟罪已下见禁囚徒各委长吏通减二等限五日决遣唯十恶五逆故杀人及官典犯入已赃持刀行劫合造毒药不在此限於戏朕居亿兆之上於今四年兢兢业业如履冰馭朽苟有阙教道可致时雍未尝不更自劳心尤思致理况允契羣臣之望钦承列圣之规特降鸿恩获遵彝典今则已覃惠泽俾洽生成复遇阳春同均煦育宣布中外深体朕怀

痊愈

太上皇康复诏

书不云乎一人有庆兆民赖之朕?奉大安爰敬崇极永言之养只栗斯在近日圣躬违豫寝膳有亏忧惧在怀不遑宁处博求医术备尽蠲疗祈告明灵具陈恳笃上玄降福遂蒙昭佑应时康愈万福咸宜喜幸之隆实兼家国思班恺乐洽于卿士然而尚齿崇孝德教所先飧饩是加义超常等诸州都督刺史及文武官人老人八十已上并孝子旌表门闾者并宜节级赐物以申飧宴庶使万国之内同此欢心施於四海皆知朕意【贞观四年七月】

疾愈德音

朕遐思三古旁考百王迈德彰仁在於兢慎故诗称翼翼易美乾乾惟此之格言岂忘於终日况天地之仁莫先於利物朕乃者膳饮非适兴居不时风霜所侵遘厉疴疾赖上玄降鉴列圣垂休寻克有瘳至於安节深慙慎德重切贻忧爰因康复之初式表兢勤之至况江淮旱歉滑郢水灾方念恤人宁忘约已应缘御服及器用在淮南浙西宣歙等道各供进者并端午降诞常例进献等一切权停其诸道每年准旨条合贡者委度支商量疏理如非切要涉於冗废者一切停进夫适情悦目肆巧雕文翫好虽充农桑实蠹朕将斋服省用每念黎元应诸道除常贡外不得别进翫好之物近日诸道多奏祥瑞且休徵所感灵迹所昭必验祥经应玄化自今已後除合准式申奏外余一切不得妄有进献虚为烦费卑宫菲食常遵大禹之心驰骋畋游每奉玄元之诫朕劳思惜费恭念好生将欲济人期於尅己每日供御及供宫内食料等一物已上各委本司商量节减仍具所收费用数速分析闻奏当付度支管计以添充经用五坊鹰狗之类量留充备蒐狩之外一切尽放其淮南等道当临遣使臣别有处分於戏天鉴在上敢不严恭人视在下敢不兢畏既验有喜之兆永怀无逸之规凡在中外宜表朕意【长庆二年二月】

大和八年疾愈德音

朕祇若天命繼承睿圖正統紀以清庶方序彝倫以貞百度栗栗寅畏於茲九年雖儉已飭躬推誠育物懼有未至不遑安寧屬节气交時疾恙攬體列聖垂佑涉旬復初既上慶於兩宮宜覃恩於兆姓庶與寰宇同茲福祥自大和八年二月九日昧爽已前天下應犯死罪降徒流已下罪遞減一等唯官典犯贓及諸色人所由破用官物故殺人十惡等罪不在此限左降官流人宜准去年八月十九日勅即與處分為政之要必在去煩厚下之恩莫先已責應度支戶部鹽鐵積欠錢物或囚系多年資產已盡或本身淪沒展轉攤徵簿書之中虛有名數囹圄之下常積滯冤言念於茲所當矜恤其度支戶部鹽鐵應有懸欠委本司具可徵放數條流聞奏不得容有奸濫在京諸司使食利錢已納利計五倍已上者本利並放其有攤徵保人納利計兩倍已上者其本利亦放免京邑之內本無酤屬貞元用兵之後費用稍廣始定店戶等第令其納權況万方所聚私釀至多禁令既不可施推利自無所入徒立課額殊非惠人其長安萬年兩縣見徵推錢一萬五千一貫八百文若先欠者並宜放免其推酒錢起今亦宜停比者滄寇干紀稽誅數年諸道興師累獻戎捷時方討叛難議釋縲免死戍邊已有恩貸今滄州一道久被朝章念其懷土之心必有向隅之嘆俾之遂性用洽優恩其諸道所送滄州將健配流及邊鎮營田役使者並委本道據見在人放歸本管如有已効軍職及自有生業不願去者亦任便住董昌齡自邕州累平溪洞兵威所向首惡皆擒言念蒼生無非赤子況在荒徼尤當撫循其溪洞如有未歸附者向後非因侵擾更不用進討仍加存撫各使懷安所獲黃洞百姓並分配側近州縣令自營生不得沒為奴婢將賞充給如元是奴婢者即任充賞南海蕃舶本以慕化而來固在接以恩仁使其感悅如聞比年長吏多務徵求嗟怨之聲達於殊俗況朕方寶勤儉豈愛遐琛深慮遠人未安率稅猶重思有矜恤以示綏懷其嶺南福建及揚州蕃客宜委節度觀察使除舶脚收市進奉外任其來往自為交易不得重加率稅天下諸州府如有冤滯未申宜委御史台及出使郎官察訪聞奏朕百靈所佑獲遂痊和奉神休敢忘昭報其五岳四瀆天下名山大川各委所在長吏致祭仍加丰潔以副精誠朕以寡德上承丕構宗社流慶玄穹叶靈微恙和旋就康復渥澤恩及于人瘼敬戒先自於朕躬俾我華夷共歡富壽中外臣庶宜體予懷

咸通八年痊復救恤百姓僧尼勅

勅朕俾寒暑致疾綿滯經時今旬朔之間寢膳已復蒙天地保佑宗社寵靈既疾痛之有瘳念被羸之無告為之父母得不憫傷慮赦令之或頻則奸人之得計倘恩惠之遠布冀窮氓之稍蘇應天下百姓僧尼道士女冠等有年七十已上疾病症痼委頓牀榻者宜各賜絹兩匹在軍旅行陣經敵傷害手足眼目不能營生亦各賜絹兩匹應州縣病坊貧兒多處賜米十石或數少處即七石五石三石其病坊據元勅各有本利錢委所在刺史錄事參軍縣令糾勘兼差有道行僧人專勾當三年一替如遇風雪之時病者不能求丐即取本坊利錢市米為粥均給飢乏如疾病可救即與市藥理療其所用絹米等且以戶部屬省錢物充速具申奏候如定數即以藩鎮所進賀疾愈物支還所司此勅到仰所在州縣寫錄勅牒於州縣門并坊市村間要路其州縣所給恤絹米恐下吏之所隱欺仍委刺史縣令設法頒布不得令不到本身所在給恤之後一一分析聞奏俾令速濟疾病稱朕意焉【咸通八年十一月六日】

唐大詔令集卷十

卷十一

钦定四库全书

唐大诏令集卷十一

宋 宋敏求 编

帝王

遗诏上

神尧遗诏

太宗遗诏

天帝遗诏

肃宗遗诏

代宗遗诏

德宗遗诏

宪宗遗诏

穆宗遗诏

遗诏上

神尧遗诏

呜呼夫受命终毕人之大伦修短之所共同圣贤之所不免朕往逢丧乱思济黎元栉风沐雨东征西伐克平宇内从此乐推遂膺景命恭承宝历但蒙犯矢石羈乘戎旅久厌干戈常思闲逸是以拂衣高谢归老栢阳爰委万机属之才子所授得人遐迩宁辑四海清宴八表来庭养志怡神於今十载但去秋已来夙疾咸发自尔弥留至於大渐皓首归全斯何恨矣洮颿凭几略陈素志朕每览汉文遗诏殷懃叹焉以为当今之世咸嘉生而恶死厚葬而破业重服以伤生吾甚不取且朕既不德无以佐百姓今崩又使重服久临以罹寒暑之数以重吾之不德谓

天下何吏民令到出临三日皆释服无禁嫁娶饮酒食肉此岂非深達天命哀矜百姓者欤又魏文终制亦有可取朕虽德愧古人岂忘景行属纊之後三日便殓文武官人三品已下三日朝晡哭临十五举音事讫便出四品已上临於朝堂殿中当临者非朝夕临时无得擅哭其方镇岳牧在任官人各於治所举哀三日且今王师四讨军机急速小殓既竟嗣子宜於别所视事军国大事不得停阙寻常闲务任之有司其服轻重悉从汉制以日易月於事为宜其园陵制度务从俭约斟酌汉魏以为规矩百辟卿士孝子忠臣送往事居勿违朕意焉【贞观九年五月六日】

太宗遗诏

夫天命之重緑错奉其图书天子之尊赤县先其司牧而功兼造化桥山之树已陰业致昇平苍梧之驾方远至於平寇乱安黎元洒洪灾攘大患黄帝之五十三战商汤之二十七征以此申威曾何足算昔者乱阶斯永祸鍾隋季罄宇凝氛暝昏辰象绵区作梗摇荡江河朕拂衣於舞象之年袖剑於斩蛇之地虽复妖千王莽戮首輓车凶百蚩尤衅尸军鼓垂文暢於炎野余勇澄於斗极前王不辟之士悉请衣冠前史不载之乡并为州县再维地轴更张乾络礼义溢於寰瀛菽粟同於水火破舟船於灵沼收干戈於武库辛李卫霍之将咸分土宇縉绅廊庙之材共垂带绶至於比屋黎元关河遗老或羸金帛或赉仓储朕於天下士大夫可谓无负矣朕於天下苍生可谓安养矣自栒风沐雨遂成弭沴忧劳庶政更起沉痾况乃汉苦周勤禹偏尧腊以矜百姓之所致也道存物往人理同归掩乎玄泉夫亦何恨矣皇太子某大孝通神自天生德累经监抚熟達机务凡厥百僚羣公卿士送往事居无违朕意属纊之後七日便殓宗社存焉不可无主皇太子即於柩前即皇帝位依周汉旧制军国大事不可停阙寻常闲务任之有司文武官人三品已上并三日朝晡哭临十五举音事毕便出四品已下临於朝堂其殿中当临者非朝夕临无得擅哭诸王为都督刺史任者并来奔丧濮王莱王不在来限其方镇岳牧在任官人各於任所举哀三日其服纪轻重宜依汉制以日易月园陵制度务从俭约昔者霸陵不掘则朕意焉辽东行事并停太原元从人见在者各赐勲官一级诸营作土木之功并宜停断【贞观二十三年五月】

天帝遗诏

朕闻皇极者天下之至公神器者域中之大宝自非乾坤幽赞历数在躬则凤邸不易而临龙图难可輒御所以荣河緑错彰得一之符温洛丹书着通三之表稽前古期道同归朕之圣祖神宗降皇虹而稟枢电乘时抚运逢海沸而属山鸣濡足横流极苍生之已溺援手四岳救赤县之将焚重称九寰止麟鬪而清日月再安八极息龙战而荡风波自彼迄今六十六载黎元无烽柝之警区?恣耕凿之欢育子长孙击壤鼓腹遐迩交泰谁之力欤朕以眇身嗣膺鸿绪钦若穹昊肃雍清庙顾諟明命载廸彝伦嘉与贤士大夫励精为政勗已想蛟冰之惧为善慕鸡鸣之勲幸戎夏义安中外禔福亘月竊以覃正朔匝日域而混车书端拱无虞垂衣有截其天意也岂人事乎每导俗匡时既弘之以礼让恤刑薄罚复跻之於仁壽闻九农之或爽则亏膳以共其忧见一物之有违则撤乐以同其戚斯亦备诸耳目非假一二言也忧勤之至庶有感於明灵亨育之怀谓无负於黔庶永言薄德邁疾弥留往属先圣初崩遂以哀毀染疾久嬰风

瘵疾与年侵近者以来忽焉大渐翌日之瘵难冀赐年之福罕再但存亡者人之晦明生死者物之朝夕常情所滞唯圣能通脱屣万方无足多恨皇太子哲握褒履已敦敏徇齐早着天人之范夙表皇帝之器凡百王公卿佐各竭乃诚敬保元子克隆大业光我七百之基副兹亿兆之愿既终之後七日便殡天下至大宗社至重执契承祧不可暂旷皇太子可於柩前即皇帝位其服纪轻重宜依汉制以日易月於事为宜园陵制度务从节俭军国大事有不决者兼取天后进止诸王各封一百户公主加五十户内外文武九品已上各加一阶三品已下赐爵一级永徽以来入军年五十者并放出军天下百姓年五十者皆免课役废万全芳桂等宫【弘道元年十二月四日】

肃宗遗诏

勅帝王享国天命有常大历传归皇纲无易朕幸以凉德继承宗祀在常乐问安之日属元凶开衅之初南奉圣皇北集戎事赖将相同德社稷降灵爰发五原成师一旅丕图克振华夏义宁旰食之心每勤思於兆庶晨昏之礼尝不匮於庭闱而天祸上延神心未悔正当金革罹此凶灾遂遭膏肓惟几大渐及兹理命获着誓言庶安国以保人岂嘉生而恶死审以大计属於公卿皇太子豫仁孝元良聪明齐圣佐成大业能事神祇朕既弥留可守宗社宜令所司当日具礼於柩前即皇帝位应缘朕丧事制度并准圣皇遗诏其诸道节度使都督刺史等并不须赴哀又为兵革未宁邮驿艰弊一切不须专使奉慰朕执丧在疚不食荤羶所设馈奠皆须如在有违本意神亦不歆其祭祀之礼一切不得宰杀且国储非广虚费稍多宫掖之间须有厘革所有三宫内人宜量事减省及至德已来籍没家口非切要者并与放出诸王院内亦宜准此其文武官僚合须褒赏天下百姓宜在优矜每当变易之时皆下惟新之命并委皇帝节级处分呜呼股肱勲臣敬保元子事居送往谅在於兹宣示万邦宜从朕意【宝应元年四月十八日】

代宗遗诏

朕以眇身祇奉鸿业不能光宣大训嘉靖万邦奉祖宗重熙之德答公卿寅亮之勤旰食宵衣痛心疾首呜呼天地之理死生常数疾既大渐弥留日臻惟怀永图嗣守丕业皇太子元良继明睿哲齐圣宜陟元后保守宗祧宜令所司当日具礼於柩前即皇帝位仍以司徒兼中书令汾阳郡王子仪摄冢宰其丧仪及山陵制度务从俭约并不得以金银锦彩为饰天下节度观察团练等使刺史等并不须赴哀祭祀之礼亦从节俭其三宫内人宜令量事减省诸王院亦宜准此其天下人吏勅到後出临三日皆释服无禁婚娶祠祀酒肉其宫殿中当临者朝夕各十五举音礼固从宜丧不可久皇帝宜三日而听政十三日小祥二十五日大祥二十七日而释服获奉宗庙之灵永终天禄所痛不得与佐命勲贤庶尹卿士顾命永诀以托万方内外腹心之臣文武忠良之士敬保元子以安家邦呜呼其听朕命【大历十四年五月】

德宗遗诏

朕承八圣之休德荷上天之眷佑嗣守丕训不敢荒宁赖宗庙之灵羣后之力戡定大难以康

兆人严恭寅畏二十有七载今天降疾不兴不寤是用审训宜听朕言皇太子诵元良继明睿哲齐圣孝友和惠恭敬温文必能覲祖宗之耿光绍邦家之大业宜於柩前即皇帝位呜呼朕常奉圣祖玄元清静之教励精至道保合太和每忘已以爱人岂嘉生而恶死咨尔将相卿士方伯连帅其敬保元子永绥万邦各有叶心同底於道无废我高祖太宗之休命诸道节度使观察防御等使及诸州刺史等膺镇守之任有军旅之事所寄尤重不可暂旷不须赴丧以日易月之制宜遵旧典文武官等朝晡哭临十五举音朕每览汉史至孝文薄葬之诏未尝不叹息嘉尚缅慕其风园陵制度务从俭约百辟卿士孝子忠臣送往事居无违朕意【贞元二十二年正月】

宪宗遗诏

朕以薄德嗣膺宝祚执珪璧以奉九庙垂衣裳以临万邦十有六年於兹矣赖天地敷佑宗社降灵内有百辟多士外有州牧方伯文武并用忠贤叶心以弼予一人以康彼兆庶戡剪羣慝廓清九围方保和平共登仁壽而万务所逼六气咸侵遘疾有加至於大渐用申顾命式合典谟皇太子恒天纵睿哲日跻诚敬惟孝惟友克宽克仁必能承祖宗之丕训守邦家之鸿业宜令所司具礼於柩前即皇帝位仍以司徒兼中书令弘摄冢宰应诸道节度观察防御等使及诸州刺史寄任尤切并不须赴哀皇帝易月之制皆依旧典文武官等朝晡哭临十五举音其丧仪及山陵制度务从俭约呜呼始终常礼奚可甚哀汉文至言朕所遵慕咨尔将相洎中外腹心爪牙之臣其敬保元子惟怀永图以缵我高祖太宗之耿光毋废朕命【元和十五年正月】

穆宗遗诏

勅朕以眇身嗣守丕构虽勤求理道不敢荒宁而保慎或乖遘兹厉疾赖上玄垂佑宗社降灵洎中外庶臣克辅寡德服饵颐养踰於周星而阳气熇烦宿恙暴作顷刻之际至於弥留伊死生之理必有其分顾托有所予何恨焉皇太子湛睿哲温恭孝友明敏自膺储贰休德日新必能嗣於耿光绍我先业宜令所司备礼於柩前即皇帝位咨尔卿士洎方伯连帅敬辅元子永绥万邦宜叶乃心用底於道宜令门下侍郎平章事李逢吉摄冢宰诸道节度观察防御等使及诸州刺史守镇任重戎旅事殷并不须赴丧易月之制宜遵旧典文武官等朝晡哭临十五举音山陵制度务从俭约无禁婚嫁祭祀饮酒食肉其医官等念其勤瘁亦可矜怜并不须加罪宜便释放将相卿士中外臣寮送往事居无违朕意【长庆四年正月】

唐大诏令集卷十一

卷十二

<史部,诏令奏议类,诏令之属,唐大诏令集

钦定四库全书

唐大诏令集卷十二

宋 宋敏求 编

帝王

遗诏下

文宗遗诏

武宗遗诏

宣宗遗诏

懿宗遗诏

僖宗遗诏

遗诰

睿宗遗诰

明皇遗诰

顺宗遗诰

遗诏下

文宗遗诏

勅朕以寡昧祇承丕业慕贞观之至化希开元之中兴十有五年勤劳宵旰虽俗未臻於仁壽而物或近於乂宁斯乃羣后叶心岂朕独致自谓励精未已治平可期誠不感通宿疾重邁药

石无补至於弥留惟怀懿图宜有顾托是用审训其听予言皇太弟瀟睿哲明裕孝友温文忠正寬仁博達周敏必能绍祖宗之休烈闡皇王之令猷宜於柩前即皇帝位仍以門下侍郎平章事楊嗣復攝冢宰軍國務殷豈可久曠以日易月宜遵旧章皇帝三日而听政二十七日释服天下节度观察防御等使及监军诸州刺史职守非轻并不得离任赴哀天下人吏百姓告哀後出临三日皆释服无禁婚嫁祠祀饮酒食肉释服之後无禁举乐文武官等朝晡临时皆十五举音宫中当临者非时毋得擅哭汉文薄葬朕实慕之奉营山陵务从俭约勿以金银锦彩缘饰丧具医士之徒夙夜劳苦深可矜念不须加罪仙韶乐官放归本司五坊鷹犬并宜解放呜呼生死常期今古无异予素知達何足甚哀咨尔将相卿士内外腹心爪牙之臣其敬保我太弟辑宁邦家成朕素怀克底於道布告遐迩咸使闻知【开成五年正月】

武宗遗诏

朕以寡德祇守丕业恭临万宇迨兹七年夙夜忧勤聿修大政剷除黠寇通欵坚昆诛殄至关擒弁并部去摩尼坏法革释氏邪风免蠹生人式兹正教渐移时俗庶及和平抚育黎元冀成理道行化逾切亲政益勤寒暑所侵厥疾斯邁药石无补以至大渐皇太叔叔父之亲贤长之顺天资睿哲圣敬日跻光扬祖宗善继休烈而能内睦九族外临万机德可以宁庶邦仁可以安百姓朕之推择无愧神明付托得人顾复何恨宜令所司具礼柩前即皇帝位仍令太尉平章事德裕摄冢宰軍國事重不可暫闕以日易月抑惟旧章皇帝三日而听政二十七日而释服天下节度观察防御使监军诸州刺史职守非轻并不得擅离任赴哀天下人吏百姓告哀後出临三日皆释服无禁婚嫁祠祀饮酒食肉释服之後无禁举乐文武官朝晡临时十五举音宫中当临者非时无得擅哭汉文薄葬尝所慕之营奉山陵备从俭约勿以金银锦彩缘饰丧具医人陆行周夺章服及官与赵全素任从所适医官郭玄已下三人释放依前翰林收管五坊鷹犬除留备蒐狩外并解放噫生也有归人之大数修短定分天理惟常虽古圣贤无能免者在乎守其道而知其终全其义而归其正节哀顺变存者不至於伤生委化观空逝者无劳於哀痛素達此理何足兴嗟咨尔元老大臣内外庶位敬奉皇帝保宁邦家布告遐迩咸使知悉【会昌六年三月】

宣宗遗诏

诏曰死生之理修短之期古往今来是其常也爰以宗祧所系嗣续有归眷彼臣僚宜申顾托我先朝宪宗昭文彰武大圣孝皇帝承十圣之基构翼翼为心平五道之寇讎孜孜不怠虽长庆促运宝历生奸文宗扬其耿光武宗付朕鸿业自临亿兆十有四年每思偃武修文庶几圣德要道赖诸良弼罄乎嘉猷或陈无逸之篇或进勿休之说东后毕覲西旅继来克复河湟拓疆三千里外告成宗庙雪耻二百年间仅称太平咸曰丕变顾朕寡昧何以堪之今也天命靡常冥数先定与我之龄虽尽卜世之年甚长趣彼若归遇天命而非天释然何虑貽厥孙而有谋皇太子湓羽翼早成春秋已盛既膺主鬯克荷承祧宜於柩前即位仍以門下侍郎平章事令狐綯攝冢宰軍國務殷豈可以久曠以日易月宜遵旧制皇帝三日而听政二十七日而释服天下节度观察防御等使及监军诸州刺史职守非轻并不得离任赴哀天下人吏百姓告哀後出临三日皆释服无禁婚嫁祠祀饮酒食肉释服之後无禁举乐文武官等朝晡临时皆

十五举音宫中当临者非时无得擅哭前汉与後魏二文俱从薄葬朕甚慕之营奉山陵稍减常制勿以金银锦彩缘饰丧具医术之徒夙夜劳苦深可矜念不须理问五坊鹰犬并令解放咨尔内外将相爪牙腹心之臣其敬保我令子緝宁我邦家成朕素怀克底於道布告遐迩咸使闻知【大中十三年八月】

懿宗遗诏

朕祇事九庙君临四海夕惕如厉宵分靡宁必求政化之源思建大中之道至於怀柔夷貊偃戢干戈皆以德绥亦自驯致冀清静之为理庶治平之可臻自秋以来忽尔婴疾坐朝既阙踰旬未瘳六疾斯侵万几多旷医和无验以至弥留呜呼数哉有穷圣贤之所必明於斯言是为達节载申顾命式叶典谟皇太子权勾当军国事性稟寬和生知忠孝德包?哲圣表徇齐必能扬祖宗之重光荷邦家之丕构宜令所司具礼於柩前即皇帝位以司空门下侍郎平章事韦保衡摄冢宰军国务殷岂可久旷以日易月之制行之自古皇帝宜三日而听政二十七日释服诸道节度观察防御团练等使及监军诸州刺史委寄至重并不得离任赴哀文武常参官朝晡临时十五举音宫中当临者非时不得擅哭天下人吏百姓告哀後出临三日皆释服勿禁食肉饮酒婚姻祭祀释服之後无禁举乐薄葬之礼宜遵汉魏之文其山陵制度切在俭约并不得以金银锦綉文饰丧具五坊鹰犬等除蒐狩外余并解放其医官段璲赵玘符?林马汲等并释放咨尔将相卿士中外臣僚竭力尽忠匡予令嗣送往事居无违朕志布告遐迩咸使闻知【咸通十四年七月】

僖宗遗诏

门下朕以冲眇祇荷鸿基每惟祖宗之締构艰难念中外之始终匡辅常同馭朽岂忘纳隍而乃重去庙朝两违陵寢始则黄巢犯阙後则朱玫敷天险阻道望苍黄播越唯思罪已但念劳人宗社降灵妖氛寻荡六龙回轡万乘还宫方将陈玉帛以充庭会蛮夷而向阙宁期殷忧成疹宵旰夺神走羣望而靡徵希勿药而罔効臣僚爱我攻疗无遗曾未小瘳以至大渐呜呼修短定分古今常期着在格言斯为達理是用降兹训誓祇听朕言皇太弟知军国事听政明敏孝友天资聪明神助龙顏表异日角标奇居大麓而风雨不迷辅中兴而山河备历寬弘及物清明在躬必能保守宗祧奉承天地内抚百姓外镇四夷实亿兆之念同固威灵而是属付托无恨予复何忧宜令所司备礼於柩前即皇帝位仍以太保兼侍郎韦昭度摄冢宰军国事重不可暂阙以日易月抑惟旧章皇帝三日而听政十三日小祥二十五日大祥二十七日?服天下节度观察防御?使使监军诸州刺史守职非轻并不得离任赴哀应天下人吏百姓告哀後出临三日皆释服无禁婚嫁祠祀饮酒食肉释服之後无禁举乐文武官朝晡临时十五举音宫中当临者非时不得擅哭五坊鹰犬除备蒐狩外余并解放医官及伎术人等昼夜劳苦知无不为宜各安存勿或加罪噫朕念兵革以来耕农久废尤伤畿甸莫不流亡岂堪复土之规独昧吊人之旨且累朝遗制毕及山陵以汉文薄葬之词为列圣循常之命约锦绣金银之饰禁奢华雕丽之工皆例作空文而并违先旨今者流离若是痛毒堪悲仗百姓即百姓一空捐国用则国用无取不可踵从前之计度因此日之生灵俾朕厚顔下见先帝应缘山陵事务宜令中外商量比从来每事十分各减六七桐棺瓦器朕所慕之况在合晨勿欺大夜咨尔股肱

重臣内外文武爪牙之士腹心之徒合志同心辅予令弟布告天下咸使闻知【文德元年三月】

睿宗遗诰 苏頌

诰朕闻古之建皇极承大序者虽创业垂统则至公之器固不可违而居常待终则必定之期固不可易况朕以薄德累承圣绪常愿致虚守靖用遂其真至於崇高富贵本非所重故三为天下推三以天下让盖从人之欲方御於万邦知子既明复传於七庙爰命皇帝寄之司牧观其体自舜禹以成厥政则朕飘然汾水无负於时何尝不问寝以侍膳候顔而顺色孝已達於神明爱已兼於君父成朕之志何庆如斯然朕顷感旧疾倏焉大渐圣贤共尔修短其分古无不歿同谓之归付托得人夫复何恨属纊之後三日便殯以日易月行之自久厚葬伤生可以深诫其丧纪及山陵制度一依汉制故事社稷务重皇帝不可諒闇自居小殯之後宜即别处视事军将及岳牧等所在发哀并不须来赴百辟卿士孝子忠臣送往事居无违厥意主者施行【开元四年六月二十日】

明皇遗诰

惟天鉴下享年有期惟人奉天获没为善予嗣承丕业敬守宗祧中昵憊人几沦大宝赖皇帝拨乱反正戡难济时幸以暮年复兹安养常惧有悔以羞先灵今病既於弥留殆将不寤其国务之事非予所图哀制之间兹审遗训者皇帝不豫厥疾未瘳礼贵适时或无封执宜令天下吏人令到出临三日皆释服无禁婚娶祠祀饮酒音乐其殿中当临者晓夕各十五举音礼毕而罢皇帝宜三日而听政十三日小祥二十五日大祥二十七日而释服以日易月固有前闻人子之念皆所未忍而艰难之际万国事殷其葬送之仪尤须俭省特宜裁改无守常规呜呼万方勿乖予志【上元元年七月】

顺宗遗诰

朕闻生死者物之大归修短者人之常分古先哲王明於至道莫不知其终以存义顺其变以节哀故存者不至於伤生逝者不至於甚痛谓之達理以贯通丧顷存弱龄即敦清静逮於近岁又婴沉痾尝亦亲政益倦於勤以皇帝天资仁孝日跻圣敬爰释重负委之康济而能内睦於九族外勤於万几问寝益严视膳无旷推此至德以安庶邦朕之知子无愧天下今厥疾大渐不寤不兴付托得人顾复何恨四海兆庶亦奚所哀但圣人大孝存乎善继枢机之重军国之殷纘而承之不可暂阙以日易月抑惟旧章皇帝宜三日而听政十三日小祥二十五日大祥二十七日释服方镇岳牧不得离任赴哀天下吏人诰至後出临三日皆释服无禁嫁娶祠祀饮酒食肉宫中当临者朝晡各十五举音非当临时禁无得擅哭释服之後勿禁举乐他不诰中皆以类从事伏以崇临仙寝复土才於旬邑疲人休功未几今又重劳营奉朕所哀矜况汉魏二文皆着遗令永言景行常志夙心其山陵制度务从俭约并不得金银锦彩为饰朕寢疾岁久以至弥留医药伎术之人夙夜无懈念其尽瘁颇谓极诚必在优容务令得所百辟卿士宣力尽忠克申送往之哀宜展事居之礼布告天下明知朕怀【元和元年正月十九日】

唐大诏令集卷十二

卷十三

钦定四库全书

唐大诏令集卷十三

宋 宋敏求 编

帝王

諡议上

高宗天皇大帝諡议

德宗神武孝文皇帝諡议

顺宗至德大圣大安孝皇帝諡议

宪宗圣神章武孝皇帝谥议

穆宗睿圣文惠孝皇帝諡议

敬宗睿武昭愍孝皇帝諡议

諡议上

高宗天皇大帝諡议

窃闻星回日薄悬象着明之谓天龙跃凤翔握镜乘时之谓圣天以不言为德非言无以畅其神圣以无名会道仁名然後筌其用营窟櫓巢之代犹昧典章如云类海之君方崇号谥所以阐扬功美荣镜古今伏惟大行皇帝禀枢电以降灵膺星虹而延睿以大圣而乘圣克昌宝历之基由至德而纂德载广金图之运对日之岁穷象外之微言弄田之辰尽天下之能事逮入膺储副养德春闱恒侍禁中问安之道斯极长居?下候色之诚逾励因心隆於爱敬率性感於神明此先圣之孝德也洎乎正位旒宸光宅区县孚俗軫如伤之念负重怀若励之心求瘼恤隐寒扇渴浆追夏禹之焚甲袭殷汤之解网一物有违则满堂兴虑一夫非获则推沟寘怀此先圣之仁德也无幽不察观六合於目前无远不招视八紘於掌内循机授政则旁烛於九围命将出师则坐知其万里此先圣之明德也寅畏上玄肃雍清庙以义制事以礼制心提衡均馭朽之危履石同蹈冰之惧虽处泰而弗泰固乘休而弗休此先圣之恭德也卑宫菲食土簋

茅檐身好弋绋之衣手无金玉之玩翬裘必焮?袂可安撒土星而莫施却超影而勿驭此先圣之广德也荣河绿错朗宸监而生知温洛丹青澡璇襟於性奥汾水秋风之唱仰天翰而扶轮妨汭丛云之譔钦睿词而拥簪此先圣之文德也【缺】无远而不怀以我伐戎有征而必伏提封所亘招地位於邹瀛正朔所通辟境踰於亥步此先圣之威德也为於无事动於自然鸣銮访道【阙】拜小童之言修德就闲载感大庭之梦此先圣之玄德也体至道而调一气舒卷陰阳运冲和而契两仪发挥风雨将百灵以交际亦万物而通诚珍瑞普彰休徵毕应此先圣之神德也以兹九德上则九玄顾连陆於後尘掩胥燧而高视若乃子育羣方之惠财受赐於玄符封岳没金之勲复推功於文帝巍巍荡荡无得而名方冀千祥翊圣万瑞讚德长居北极之尊永契南山之壽岂谓十枝坠景遽沦悬晷之辉八柱倾天奄落闔阳之构云輿在御仙路方遥攀号无再奉之期摧殒深百年之痛鼎湖弓劍逾增日远之悲璇寝衣冠空怆月游之感顾以虚菲夙承乾?既忝彰明之地常怀辅佐之诚荐萤烛以助光引鹤露而添海而圣德虚受无来不应每听览余暇侍奉诰言论道德则洞启玄枢语忠孝则广通心极叙轩项之淳化积若神交述尧禹之清风宛成晤对在位三十五载功超七十二君图象所莫传开辟所不覩罄楚越之竹书善未穷极泉云之才颂德难尽自贤猷厌俗缙律亟移祸变相仍荒梗弥切正惟凭几之夕爰及启钦之际神情湛正顾托殷勤痛道貌之既远惧先旨之无述所以偷延荒息强终彝伦望霄汉以兴摧瞻宸筵而永慕今者龟谋既袭蛰?将临敬上尊号之仪燕叶大名之典谨按自然覆育曰天明一合道曰皇无所不包曰大谨状上议曰天皇大帝庙称高宗

德宗神武孝文皇帝諡议

皇莫大於羲轩帝莫加於唐虞姒氏商镐亦续宪度咸纪名諡以扬昭光徵儒臣之议所以本至公也号全德之尊所以节一惠也发挥茂曜如揭日月伏惟大行皇帝文思睿哲天纵神授大明继圣大孝尊亲服道稽古洗心藏密巍巍易简赫赫功造严祖宗而上下昭假仁亿兆而飞跃表灵始者蓊寇残魂戎旌未偃方由雍邸出摠虞师刷讎耻而戴君父超维城而位少海元良有问历数诞膺同商宗而心在谅陰泣汉制而礼从权令然後諏咨对越端拱而理时丁祲沴益起泚烈宸筭独复云雷骏奔浹旬底定鲸燎殲洗反已哀痛大猷弥尊阪泉威武止杀吊人之志也边方朔陞猓獯昆夷超超犷悍不敢不率丹穴南裔扶桑东极自古未化占风而至镜照广及无思不服之德也大本達道是为中和鼓而舞之名我至乐变革繁淫以贞神人奉顺圣元侯甸继献九成八佾圣作明述垂衣脱剑欣合猗那之奏也观文化成匠物研精四始六义勤谐风雅洪音丽制焜耀皦绎立言垂训丹青玄鸟之作也【缺】保全壽夭之門方疏传赐日之广利机瘥不闻长养推仁施济天地如保赤子之诚也教由德礼人乃耻格古作训夏我箴政刑载弘哀敬用息刀锯利见大循本愧心之旨也躬信厚而偷薄以革体清明而贪饕以惩纳匪躬之直无毁校防川之谟推辅弼之功有辐辏并进之叹泥金方革仙鼎忽成汗漫无从希夷永閼哀同轨之将会仰鸿名之可易铺衍至蹟锡乎无穷谨按经义参诸諡法曰应物无方之谓神保大定功之谓武尊仁安义之谓孝经天纬地之谓文大行皇帝变化无穷枢衡在握神莫过焉整旅善师豺狼扰驯武莫威焉承休继志永锡不匮孝莫大焉辉焯玉度焕乎黼藻文莫逾焉考坟史而徵德实请上尊諡曰神武孝文皇帝庙号曰德宗

顺宗至德大圣大安孝皇帝諡议

臣上稽太古皇帝之建尊謚也咸揭盛德以旌至公备礼於郊即天成命大易名之典也故尧不称巍巍成功而以传圣为盛德禹不称乃锡玄载而以成功为盛德此则五帝三王统天作謚之大范也伏惟大行太上皇天作睿哲生知太和扬九圣之耿光开万纪之休运云行雨施不俟终日广爱博教克成浹辰泽万物德大乎羲轩公天下道高乎尧舜原夫君人之表教於岐嶷造物之用先乎蓍龟在物播为善之乐主器流作贞之庆视膳有法文之孝抚军有戡羿之庸毓全德於春闱积大望於覆育垂三十载矣三善方齐乎圣敬六气遽婴乎沉痾德宗皇帝虑继明之重深唯疾之忧积其不悵至於大渐天崩地坼当暝眩之辰流沙渐海有震动之惧而大行太上皇明德动天神化无朕上?九庙下恤兆人深冀翌日之瘳大庆即端之作於是建冢嫡以发大号赦天下以壮皇猷圣作明述周流灌注若乃奄岩穴以搜贤才能官则哲之道也黜进献以艺贡赋籍田任土之利也涤疵瑕而复放甯解网泣辜之仁也蠲逋责而惠困穷寬大易简之义也用能垂拱而神人交泰玄默而动植?安巍巍荡荡圣德如风烈雷迅不崇朝而益乎八紘矣犹以为黎猷之富教未洽陵寢之制度未成深图甘害於恬颐力政不憚於增剧既而同轨毕至万邦咸宁奉先之孝克终传圣之义斯举释负宝位栖神玉清追姑射之高踪乐华胥之妙道大矣哉与天地合其德则不为而成与变化合其神则不疾而速圣造盘薄玄风汪洋所谓天授非人力也方陋唐虞之异族乐文武於同时振耀重光永清四海孰谓初阳变候素疾弥留徵秘术而俞扁必臻走羣望而圭璧斯罄何翠华之不驻乘白云而上仙攀号刀劒哀震寰区皇帝悼极忧以致养痛大数之不延外遵易月之命内茹终天之酷词不朽於礼謚旌罔极於受恩敢?圣德垂鸿惇史谨按易曰天地之大德曰生圣人之大宝曰位謚法曰寬裕和平曰安敬慎所安曰孝大行太上皇乘运统天端拱造物可谓至德感神翊运光明正位可谓大圣永图丕构传圣保和可谓大安九族安之兆人赖之可谓大孝下采华夷之望上合神祇之心请上尊謚曰至德大圣大安孝皇帝庙曰顺宗谨议【元和元年六月】

宪宗圣神章武孝皇帝謚议

王者崇高以配天广大以法地章明以象日月诚信以合四时谓之令王謚以全德所以名盛烈昭至公尧舜禹汤文武成康是也伏惟大行皇帝由疏封以继明自前星而受命以四海为养以万乘问安稽古法天自家刑国穆穆俊德煌煌大明焕乎人神塞乎天地国家天宝之季宿兵中原强侯专地往往而有号令不一朝廷包羞元和燁威霆击簪扫戡夏剪蜀擒潞殄吴夷蔡取齐朝沦纳定光千载之期运平六叶之梗俗动也用轩辕之干戈静也戢武王之弓矢圣神之道其至矣乎以无方之能行不宰之用济天下之务施天下之仁夷狄之情伪遐裔之虚实揣其变化权其後先屈指前筭若合符契多士济济任其器略文武俊杰毕力致用纲目张而万化具斟酌明而百事宜委庶务於庙堂之上壽百姓於循良之府开直言之路庶无蔽听施广大之恩物无违性宥怨刑狱哀惠困穷省薄徭役尊礼老耆约已恭俭推心平明公卿大夫任德终始近狎贵宠畏忌守法采纳羣正听断精慎忠直树立谗邪不行巍巍成功赫赫在上春秋左氏传曰武有七德禁暴戢兵保大定功安人和衆丰财之谓也殲夷奸宄灾害訖息禁暴也淮河底定大赦疵人戢兵也归马於汝南汉南散卒於齐梁淮楚保大也封有劳爵有德定功也寬天下之蚕丝举域中之方正安人也赦生致之寇虏爵拒命之戎将和衆也乘輿服御俭而有制赐与供给惠而中节丰财也神武不杀之德其若是焉不登羲轩年不享尧舜壽百姓思慕如丧考妣同轨毕至相庭有时敢奉官常尊名称德谨按謚法兵禁残暴曰圣

应变无方曰神洪度大明曰章为人除害曰武慈惠爱亲曰孝戮鲸鲵而清四海不曰圣乎裁造作而刑一德不曰神乎洞明哲而贞百度不曰章乎推仁义而服万物不曰武乎载尊亲而谐五典不曰孝乎书曰惟天聪明惟圣时宪法也敏也谨酌之谥法质诸大经谨上尊谥曰圣神章武孝皇帝庙号宪宗谨议

穆宗睿圣文惠孝皇帝谥议

臣佑议曰臣闻绍天人之盛美庖牺建其极含昊穹之正气金天侔其称仁圣或异号谥则殊至於兼包二体昭宣一德有自来矣我今因之爰徵克类以腾茂实伏惟大行皇帝睿鉴通微神智周物平由藩邸式践储闈诞膺眷命用建皇极纘承丕绪克绍洪勲允厘帝载光被王度以易简凝庶绩以仁和壽蒸人明遂事而虚受进昌言而不拂清庙严荐中壺问安彰爱以诚因心则着永言恭默思致雍熙敷佑庶氓宗承古训徵特性之盛礼蘊祈谷之至诚亲率公卿祇奉郊祀爰畀大辂俯及端门休祥告应非烟在上轮囷五色回复半空六轡时按百辟称贺迨圆丘展敬天感乐和柴燎告终人神胥悦於是雷雨作解惠及万方布乘春之煦育行惟新之颁赐详延庄彦敷纳正辞纳哀敬之书用寬大之典鲐背是恤繆狱斯平优赉困穷矜蠲逋赋三光增耀羣物昭苏葳蕤汪濊之泽不可得而名也东寇猖狂在浚为畔有征之日殲厥渠魁此所谓王者之师不战而尅也昆夷恃衆崆峒骋武亟为边患时渐睿谟烦戍己之戍劳癸庚之修自我新命咸归旧封歟塞旁午求成修好俯从坎血之悬猥加筑館之荣弓矢载囊亭障罢警倚成辅弼清一区宇无私之覆既均不宰之功遽化矧乃优游乎文史之内精穷乎草隶之源崇杖席而选文儒设官司而尊侍从所谓勤求为务听纳居多遵三代之盛猷垂亿载之休烈虽疾留圣体而虑发宸衷每求衣夙兴太阳但出没金是请方事撝谦凭玉俄闻奄承末命年冀踰於尧舜时忽从於轩鼎六龙飞盖以上昇万姓号天而靡及今因山既卜同轨将臻爰德威式循典礼周书曰睿作圣文前儒【阙】睿圣也谨按谥法曰敬礼祀享施为於人皆曰圣大行皇帝恭郊庙軫志黎元教尚不严化行无朕不为圣欤又慈惠爱人道德博闻皆曰文赦三就之刑采百氏之奥仁恕育物寬明致理不为文欤又慈仁好与柔质虚受皆曰惠博锡贫窶哀及鰥寡开延纳之路容说直之言不为惠欤又曰秉德不回慈惠爱亲皆曰孝文以继明圣资统御服勤不替就养无方不为孝欤考古谥而符德教请上尊谥曰睿圣文惠孝皇帝庙号曰穆宗谨议

敬宗睿武昭愍孝皇帝谥议

定尊号考圣烈终古之重事有司宜用大者远者上 贝百王之明例下开千载之成法参天人之意极臣下之诚约而举之以正大諡故称天以诔大莫加焉微臣得议公莫至焉所谓大者远者盖揔夫一朝之治化四海之惠泽夷夏之率职元元之受赐皇明所临之远近睿断所系之巨小何如耳其他苟不足以升降盛德者固可略而不论伏惟大行皇帝以英睿之姿绍膺丕历启皇辉於磐石浴圣德於少海钦承册命天下感悦既即尊位孝惠逾显列圣之道率履无违礼行乎郊禋敬達乎宗庙富四海以致养荣西宫以问安推恩广爱累霈鸿渥发号施惠洽於百灵而又天姿严正睿德沉毅时海内承宪宗穆宗威灵德泽之後朝野无事生人休息初临大宝委政宰庭虽当春秋至富而远蓄刚辩既阅庶务四聪益達英断自己任贤不疑故

卒能光启承明载安天下横议或炽圣衷逾坚忠勲内外叶赞雄略於是举兵食之大计示经营乎四方而不康之藩首自夷獠励忠奋节待帅於朝祇承风化遐迩耸动夫不怒而威不战而胜王者之武也推是大指引而伸之则未形之用可见矣惜乎道未光乎天地泽未浸乎四海而变生非虑遐迩号天於戏生灵之愤其可既乎七月将至同轨既集臣谨上稽国典傍考物情约以经义合诸謚法表功节惠庶叶大中书曰睿作圣夫以睿哲之材经圣明之业而祖宗成式修举罔坠礼百神而亲九族尊儒术而容谏诤铺鸿阐号德用章明非睿而何謚法威强睿德曰武制胜朝堂之上而棱威远馭不俟车甲非武而何昔汉昭帝之所以为昭知臣而已謚法亦曰明德有功曰昭大行皇帝虽谦让然终任其刚断以显明德非昭而何夫愍者臣下迫悦惋之诚所深切者也謚法在国逢难曰愍圣朝既讨讎戡乱明告四方有司所宜率亿兆之心极君亲之义荐诚旌感非愍而何謚法慈惠爱亲叶时肇享皆曰孝孚爱敬於率土刑家邦之孝理躬亲严配之典奔走职来之助广慈至德非孝而何传曰临之以庄则敬又记曰庄敬则严威拟盛烈之形容参历古之训典谨上尊謚曰睿武昭愍孝皇帝庙号敬宗

唐大诏令集卷十三

卷十四之卷二十四并阙文

唐大诏令集卷十四之卷二十四并阙文

卷二十五

钦定四库全书

唐大诏令集卷二十五

宋 宋敏求 编

妃嫔

册杨?道女为婕妤文

册崔弘道女为才人文

册萧铿女为美人文

册萧铄女为美人文

起复上官氏婕妤制

皇帝良姊董氏等贵妃诰

睿宗皇妃豆卢氏等食实封制

赵国夫人一品制

册元妃某氏弟为贵妃文

良姊杨氏等为贵妃诏

册独孤颢女为贵妃文

许氏等才人制

郑氏才人制

赠你婆元氏颍川郡太夫人制

婕妤王氏为淑妃刘氏为贤妃制

吴氏等昭仪制

王氏才人制

册杨?道女为婕妤文

维贞观某年月日皇帝遣使某官某持节册命曰於戏惟尔前魏王府谘议参军杨?道第三女
门袭锤鼎训彰礼则幽闲表质柔顺为心备职後庭实为通典是用命尔为婕妤往钦哉其光
膺徽命可不慎与

册崔弘道女为才人文

维贞观某年月日皇帝使某官某副使某官某持节册命曰於戏惟尔兼徐州都督府司马崔
弘道长女门称着姓训有义方婉顺为质柔明表行宜升後庭备兹内职是用命尔为才人往
钦哉其光膺徽命可不慎与

册萧铎女为美人文

维贞观年月日【云云】於戏惟萧铎第二女幼习礼训夙表幽闲曹出鼎族誉闻华闱宜遵
旧章授以内职是用命尔为美人往钦哉其光膺徽命可不慎与

册萧铎女为美人文

维贞观年月日【云云】於戏惟萧铎第二女禀训冠族着美家声习礼流誉镜图有则宜升
後庭允兹令典是用命尔为美人往钦哉其光膺徽命可不慎与

起复上官氏为婕妤制

门下易着鸣谦礼称辞贵所以崇让而退满推心自得其道弥光前昭容上官氏相门积善儒
宗雅训文学冠时柔嘉顺则内守恬淡外防奢侈发於少长持以周旋乐无靡嫚衣必澣濯珠
玕不珍坟籍为宝故能诚切一室功宣两朝说议日闻屡援楚笔忠规岁纳方轻汉辇惟此邦
媛郁为宫师遂能德综十伦孝高百行顷罹创巨爰命权夺秩茂左嫔思被光宠志齐班女
陈撝挹而贤明之业经济之才素风逾迈清辉益远不成厥美将蔽斯言今依表奏以宪图史
可起复婕妤主者施行【景龙二年十一月二十九日】

皇帝良娣董氏等贵妃诰

关雎之化始於国风贯鱼之序着於大易用能辅助王道叶宣陰教皇帝良娣董氏良姊杨氏良媛武氏等门袭鍾鼎训彰礼则器识柔顺质性幽闲美誉光於六宫令范成於四教宜升徽号穆兹朝典董氏可贵妃杨氏可淑妃武氏可贤妃【延和元年十月】

睿宗贵妃豆卢氏等食实封制

有德者位崇有功者秩厚事本关於国体理无隔於邦媛故周母有乱臣之名汉嫔有比侯之爵睿宗贵妃豆卢氏贤妃王氏性质陰礼实毗内政训行九御誉满六宫岁祀虽淹徽音未昧宜后非常之命特赐汤沐之邑可各食实封二百户

赵国夫人一品制

门下问君以礼乃受齐封免主於厄方延汉渥贤妃启邑荐古【阙】时赵国夫人义范端肃操履坚正四德聿修六宫攸仰承恩兰掖累变葭灰送往事居备尽忠勤之节利人益国每陈匡赞之规顷属二?构凶九重起乱将危宗社谋害圣躬属申逐乌之诚克励鷹鷂之志方効节於松竹宜宠锡於苴茅可一品

册元妃某氏弟为贵妃文

维年月日皇帝若曰易着六位正天下者先齐於家诗本二南厚人伦者理成於国垂芒耀於帝极符纪粲乎河图蠲洁庄齐祇奉织紵膺是典册宜归淑明咨尔元妃某氏濬源洪宗灵???茂绪植性懿哲稟姿端柔竭奉两宫总理衆御弘古以行已逮下以率入循师傅之严躬勤俭之训色不恃贵言无矜骄和以能容逊以自牧致兹兰馥洽於椒房是宜守四星以居元冠三妃以推应今遣使某官某副使某持节册命为贵妃尔惟公乃视听底於聪明听靡有偏视靡有惑言违而志必观其诚匡顺而心必观其佞妇顺之化资汝而彰陰教之端资汝而正敬之戒之无替成命可不慎与

良姊杨氏等为贵妃诏

诏曰六位时成方祇所以载物四始爰着樛木於焉逮下故能风化聿定肃雍昭被皇后??粲盛仪刑邦国咏螽斯而阐业閱关雎而蹈礼迈樊姬而进善踰邓后之推贤去岁及兹累陈表疏以为内职未备有亏前代之礼朕祇奉天命君临庶邦居紫宸之重若驭朽以秋驾处黄屋之尊犹履冰於春旭志崇简约性靡徵求絶良家之选旷後庭之例宁惟矫正百王亦将垂镜千祀皇后所陈甚切理在难辞式顺徽音敬依来请良姊杨氏良姊于氏并家承鍾鼎心标婉淑夙侍储闈从升天禁久淹岁月先着?勤咸拟职上台分荣中壺杨可贵妃于可淑妃于可德妃良媛陈为昭仪良媛阎为充仪良媛陆为充容崔氏为修仪

册独孤穎长女为贵妃文

维大历三年岁次戊申月日皇帝遣使某官某册命曰於戏位亚长秋坐论妇道听天下之内治序人伦之大端御于家邦式是风化惟尔赠礼部尚书独孤颖长女祥会鼎族行高邦媛体仁则厚履礼惟纯有冲敏之识不资姆训有淑慎之行自成嫔则蕴此贞懿灼其芳华选躬之初奉承先命肃恭之仪克称尊旨銮舆北幸侍从勤诚祇事壽宫备申哀敬能尽其节实同我心久奉椒涂载扬惠问勤於道艺每鉴图书动有箴规必脱簪珥进贤才以辅佐知臣下之勤劳谦让益勤记功惟最声流彤管道洽紫庭克副宫教载修壺职眷求贤淑用峻等威百辟抗辞六宫归美宜崇礼册俾举彝章是用册曰贵妃往钦哉无或居上而骄无或处贵而逸降情以逮下诚事以防微洁其粢盛服其澣濯敬循礼节以率嫔御膺兹嘉命可不慎与

许氏等为美人制

勅许氏尹氏段氏等素称柔顺式稟惠和颇娴闺壺之仪早备组紃之训服勤有素宠秩宜优是嘉内范之良并命中宫之职许氏可美人尹氏段氏可才人

郑氏为才人制

勅古者天子设六宫以诏内理是以关雎乐得淑女忧在进贤将听鸡鸣之诗岂惟鱼贯之序郑氏山东令族海内良家每师班女之文尝慕樊姬之德桃姿焜耀兰行馨香爰用择才冀无伤善勉当选进之重无忘平和之心可才人

赠你婆元氏颖川郡太夫人制

古者缘情立礼着慈母之制盖圣人示德无不报之义而汉宣帝亦追录掖庭羣侍尝有阿保之勤以功深浅并授封赏记於前典历代是之故你婆元氏朕在襁褓赖其抚育推燥就湿慈爱特深可谓仁人厚惠茂德者矣可赠颖川郡太夫人【大历八年六月】

婕妤王氏等为淑妃制

门下礼重内朝国有彝制德既备於宫壺位宜峻其等威婕妤王氏刘氏并体坤顺之德循姆师之训齐庄之礼淑慎有仪扬懿轨於中闱表柔明於内则惠流宸禁芳霭椒涂慕辞辇之智弘逮下之德宜极宠数以彰徽猷必能重正闾仪助修陰教无愧於女史之诫国风之诗王氏可淑妃刘氏可贤妃仍并令所司择日备礼册命主者施行【开成五年二月二十一日】

吴氏等封昭仪制

吴氏可封昭仪张氏可封婕妤晁氏梁氏并可封美人罗氏史氏并可封才人钱氏可封长城郡夫人曹氏可封武威郡夫人勅位亚长秋毗於内理必资懿范方被宠章吴氏等佩服礼经周旋法度有柔婉之行既表於天资有?俭之仪可施於嫔则慕班氏之辞辇伟冯媛之当熊思在进贤义高前史是用列於紫殿冠彼後宫俾洽彤管之荣式俟金环之庆可依前件【会昌

六年五月二十三日】

王氏为才人制

勅王氏性禀惠和行推柔顺自备宫闈之选颇彰令淑之才组紉献茧馆之功图史服椒庭之训既嘉懿范爰锡宠章宜修九御之教以正三星之位可才人

唐大诏令集卷二十五

卷二十六

钦定四库全书

唐大诏令集卷二十六

宋 宋敏求 编

追諡

皇太子諡孝敬皇帝诏

寧王諡让皇帝诏

端德太子諡奉天皇帝诏

齐王諡承天皇帝制

册諡文

册諡孝敬皇帝文

册諡殇皇帝文

册諡让皇帝文

册諡恭皇后文

册諡承天皇帝文

哀册文

孝敬皇帝哀册文

哀皇后哀册文

让皇帝哀册文

恭皇后哀册文

奉天皇帝哀册文

承天皇帝哀册文

承天皇后哀册文

追諡

皇太子諡孝敬皇帝诏

朕肃承鸿绪无忘馭朽之怀?奉圣谟每切临深之惧幸穹昊垂佑宗社降灵公卿尽协赞之谟黎庶遂怀生之望故得乾坤交泰日月休徵垂衣而晏九瀛端拱而家六合方将回銮峒岫体高尚於轩皇脱屣汾川追逸轨於伊后成功勿处思遵象帝之规守器斯传用申知子之授皇太子弘生知诞质惟几毓性肃敬着於三朝仁孝闻於四海若使负荷宗庙宁济邦家必能永保昌图克延景历岂谓遽嬰雾露遂至弥留顾惟辉掌之珍特切锤心之念庶其痊复以禅鸿名及膝理微和将逊於位而弘天资仁厚孝心纯确既承朕命掩歆不言因兹感结旧疾增甚亿兆攸系方崇下武之基五福无臻俄迁上宾之驾天性之重追怀哽咽宜申往命加以尊名夫諡者行之迹也号者事之表也慈惠亲爱曰孝死不忘君曰敬可諡为孝敬皇帝仍遵典故式备徽章布告遐迩使知朕意【上元二年四月】

宁王諡让皇帝制

勅能以位让为吴太伯存则用成其节歿则当表其名非常之称旌德斯在故太尉宁王宪诞含粹灵允膺大雅孝悌之至本乎中诚仁和之深非因外獎率由礼度雅尚文儒谦以自牧乐於为善比两猷而有光与二南而合德自出临方镇入配台阶逾励忠勤益闻周慎实谓永为藩屏以辅邦家曾不愍遗奄焉亡歿友于之痛震动良深惟王朕之元昆合昇主嗣以朕奉先朝之睿略定社稷之阽危推而不居请予主鬯又承慈旨焉敢固违不然者则宸极之尊岂归於薄德茂行若此易名是凭自非大号孰副休烈按諡法推功尚德曰让德性寬柔曰让敬追諡曰让皇帝宜令所司备礼册命【开元二十九年十一月】

靖德太子諡奉天皇帝制

门下圣人立号天下至公膺其美者必归有德有其德者或无其位苟徽烈可纪则追崇之典行焉况义贯因心礼优加等稽夫往策抑有前闻盛业鸿猷久不可替故靖德太子琮庆锤霄极亲则朕兄性与天通行高时望宣慈惠和聪明睿哲四科兼综一以贯之而福寿不遐既随往运?惟友爱实軫予心朕昔践储宫顾诚非次於君父之命所不敢违以少长而言岂忘其序每思恳让竟莫获从遽顺圣慈守兹宝位安可不申夙志有阙推恩宜加尊异之名载茂哀荣

之典敬用追諡曰奉天皇帝妃窦氏曰恭应皇后宜委有司即择日册命更以礼葬仍令右仆射冕充使监护少府监窦履信为副主者施行【九年建寅月】

齐王諡承天皇帝制

勅藩屏之諡古无鸿名先朝亲亲则有殊礼自我立制垂万代法嗣位以长天睠在予崇德报功固当升号况时逢多难首建大册进昌言以启圣聪告成命以开皇运易名之仪特异常典故齐王倓承天祚之庆保鸿名之光降志尊贤高才好学艺文博洽智略宏通断必知来谋皆先事识无不达理至逾精廼者寇盗横流銮舆南幸先圣以宸扆之恋将侍君亲惟王以宗庙之重誓寧家国克叶朕志载符天时立辨羣议之非同献五原之计中兴之盛实藉奇功景命不融早从厚窆天伦之爱震痛良深流涕追封胙於东海顷加表饰未极哀荣夫以参旧邦再造之勲成天下一家之业而存未峻其等歿未尊其称非所以旌徽烈明至公也朕以眇身纘膺大宝不及让王之礼莫申太弟之嗣所怀靡从追想逾切非常之命宠锡攸宜敬用追諡曰承天皇帝与兴信公主故第十四女张氏冥婚諡曰恭顺皇后有司准式即择日册命加以礼葬【大历三年五月七日】

册諡文

册諡孝敬皇帝文

维上元二年八月五日皇帝若曰於戏咨夫御图籙者至圣荷提衡之业承宗庙者元良膺受命之期渺?千古之外纵观百王之表成功不处高让之躅惟崇在贤斯授则哲之风逾远睠彼勲华鼎祚传於有德洎夫汤武宝历归於孟侯揖前载之宏模成後王之茂范者也炎精失驭巨猾挺突普天?涂炭之危万姓遭?狼之毒我高祖神尧皇帝应天御物拨乱反正斩白蛇而定天下誓苍兕而会诸侯底绥万邦义寧六合太宗文武圣皇帝循机统极出震开阶炼彩石而补乾纲拯横流而恢地络远穆近肃时清颂平朕式纘昌基钦承睿绪幸凭累圣之福高居兆人之上灵符叶赞天命允集是以昭报先功镂玉於升中之观聿崇严配禋珪於布政之宫俗阜岁丰化淳刑措幽明以之郊社夷夏由其义安驭朽逾兢寢绳多愧尝以人之所宝者位虽处位以思冲心之所存者道希察道而求逸是以载想褰裳虚襟脱屣凝神不滓宣游汾水之阳涤虑无为访道襄城之野咨尔故皇太子弘克岐克嶷有德有行事亲以孝爱敬极於寝门奉上以忠恭慎形於驰道孝慈不犯惠以及人载隆三善之规无俟八繁之诫发挥弦诵逊业之道弥光黼藻温文承祧之望攸重抚军监国大阐良图百揆万几伫令居摄庶几乾坤交泰主鬯之业方新日月重光继照之明斯远顷炎象戒节属尔沈疴实冀惟痊释予重负恩因疾降告以斯怀尔忠恳特深孝情天至闻言哽咽感絶移时因此弥留奄然长逝伊川可望泣笙驾之无追瑶岭难跻痛琴风之永絶循环念往震悼良深然事欲必行礼虽崇而徒设德惟可尚身已谢而宜尊加以尊名允符心许是用諡尔为孝敬皇帝式昭典册俾夫位光一德叶帝载於将来名参四大播芳声於奕?尔惟明灵若存享兹宝命呜呼哀哉

册諡殇皇帝文

维开元二年岁次甲寅八月【缺】辰朔日皇帝若曰於戏咨尔襄王象月降灵自天生派弱不好弄长而勤书衣冠待明有清河之畏慎狗马不玩得淮南之恭俭往以中宗晏驾嗣位登皇制於凶逆是膺虚器惧深祸乱躬为扫除推位太皇诚靖恳到至公克遂雅怀惟虚宜其受兹多福享彼遐龄而腠理俄纒膏肓不救感念亲懿用隐悼於厥心夫避德与能传圣永祚承万方之大福在三让之高节周之太伯王则有焉岂可礼均藩臣名齐列国等昌邑之厌毒同营阳之沦弃者哉是用超於旧典享以荣号远推仁慈之心特伤短折之寿可諡为殇皇帝仍遣某乙持节授册宜膺宠灵式慰泉壤呜呼哀哉

册諡让皇帝文

维开元二十九年岁次辛巳十一月戊申朔二十五日壬申皇帝若曰於戏古者崇德考行犹谦大名饰终追远亦膺徽册况乃元昆之戚天伦之重岂循恒典者哉咨尔故太尉寧王宪纯粹秉灵冲和成量孝友之性发乎天然仁义之道彰乎日用加以好学不倦乐善有闻休问扬於间平清猷光於鲁卫实谓仪刑邦国保义藩维景命不融奄从薨逝兴言震恻哀疚纒怀惟王地居元子合膺主鬯昔朕上禀先训克清羣凶遂固守撝谦恳让储副然则深仁厚德茂行已表於生前壹惠尊名盛礼寧忘於歿後是用諡王为让皇帝今遣使尚书左丞裴耀卿副使太常卿韦韬等持节礼册因心之感备物饰情瞻典策而哀深想棣华而望絕所冀幽窆嘉兹宠荣呜呼哀哉

册諡恭皇后文

维开元二十九年岁次辛巳十一月戊申朔二十五日壬申皇帝若曰於戏尊名备礼所以悲友于也因亲袭号所以申悼往也让皇帝故妃元氏门承华烈代袭清猷柔范夙着徽音允穆自伉俪天人能修壺训克茂诗箴之教载修图史之文岂谓福善无徵遽先殂逝天伦有感追悼兼怀福贵从尊事资饰赠有行梁苑早膺藩邸之荣将祔寿原允叶椒房之位是用册妃为恭皇后今遣使尚书左丞相裴耀卿副使韦韬持节礼册章服式陈典章攸备永惟神格嘉是哀荣

册諡承天皇帝文 常袞

维大历四年岁次己酉五月甲辰朔十二日乙卯皇帝遣使某官某乙持节册命曰於戏稽於古典考於諡法戚藩升号礼或阙文爰自先朝特追尊号盖以长而教顺岂私亲而立制合之殊礼允属元勲天下至公不可废也尔故齐王某?稟霄极气陶元和孝彰纯行忠表令德学师申穆文友徐陈答东平之诏尤推达礼辨南阳之牒可谓知微静而有谋敏亦能断往以王室多故翠华西巡?怀家邦首建大义上戴君父诏开中兴会五原之兵车复四海之疆宇懋此伟烈屈於流运爱深同气痛结中肠顷虽褒扬犹未殚允言念经启之功载加饰终之数爰革旧典追崇大名是用册王曰承天皇帝改置园邑从飨清庙赠以黄屋左纛龙旆九旒必备王者之仪用极送哀之礼庶荣厚窆有怙於怀呜呼明灵尚服休命

哀册文

孝敬皇帝哀册文 薛元超

维上元二年夏四月己亥皇太子弘薨於合璧宫之绮云殿年二十四五月戊申诏追号諡为孝敬皇帝八月庚寅将迁葬於恭陵有司奏哀册文曰呜呼赫矣皇统昭哉帝晷光膺宝历大启瑶图昌原?镜隤址不渝钦惟妙质诞灵居震若木资芳咸池毓润韶襟日湛英姿岳峻裕玉摘华铺金协韵肇外作翰爰归养德衢室成规轩庭稟则圣敬斯践温文匪忒傍照四方下贞四国?诚问寝鸣谦齿胄洞淹儒城横披礼囿璧流扬彩环林擥秀飞遁来仪鸿生入授率性谓道收纵自天明踰视牍文冠题鞭裁山耸仞缔席开延絶简时绎精义咸甄豪飞紫露言控晒泉务殷监抚寄深社稷鲍俎不陈龙隼在侧聪达有裕愉婉兼极瑜佩增辉金华动色乾慈衍渥廼眷储皇惟天下之重器将释负於岩廊竭因心之孝辞受终之礼躋厚载以兢魂局层穹而攀涕冲旨但闻逾恳神鉴曾不留少微告谢大渐无瘳方劭尊师之业奄从宾帝之游呜呼哀哉大象潜运灰飞缙幕经霜賁兮文梓寒高飈起兮仙桂落未戢归巢之燕空对栖关之鹤呜呼哀哉玉灵献兆蜃隧合陰拖仪旌之委郁翊羽骑之森沉轹汤渠而回鹜指豪改以遥临楚挽惊而疑断悲笳咽而复?萧索动风云之气苍茫感天地之心呜呼哀哉流日黯以西倾奔川淼而东度地拟桥山之曲【阙】如【阙】陌之路攀宇宙而无追仰容顏以纏慕呜呼哀哉瀛区有变天柱终飞怀苍梧而日远望白云而不归沉沉陇树漠漠泉闋竭五音而载笔藹千祀而腾徽呜呼哀哉

哀皇后册文 宋温璩

维开元六年岁次戊午五月甲午朔三日丙申哀皇后裴氏梓宫启自先殡将迁祔於恭陵之山莹礼也皇上御寰区而翼翼缙洪绪而亲亲感上仙於周副痛未从於虞嫔攀鹤驾於终古赠銮輅而增新时无远而推吉物有容而必陈纂芳伸思徵幽寄神载扬清懿之烈爰属有司之臣其词曰月丽云昇灵叶爽冯 乡茂族晋邑丕承土厚河广祥发庆膺公侯必复绂冕攸兴良精兑象室家化国昌胄延和荣门诞德淑问不已柔顺允塞素里扬英清闺仰则一人元良万邦大本天作之合兴能烈壺家本楸於汉封地先归於晋袞主馈旌善贺酒腾欢承晖养德奉景访安摇金羽之频频结环佩之珊珊賁日月之光色妙灵象而无端於是含章握文因此敬微慎独崇法服於輦组接懿筐於蚕簇覲皇英而上亲祇霄烛而下睦庶无违於信顺期有冯於福灵忽亏光於轮月奄落彩於前星爽仁寿於偕老邁天祸而期丁瞻神宇之惟漠感灵衣之靡形惊回风於虚殿宿衆鸟於空庭顾长御以攀涕甘自殉於山扃制立时而遽终情循节而恒苦草骄春而绕砌虫吟秋而入户限百刻之不延调六脉其谁补呜呼哀哉徂谢?其永久气节浸以流换感窀穸之幽偏軫皇情以凄叹稽旧章之典礼崇新命之纶焕齐天地而德合综神灵而道贯呜呼哀哉日吉兮辰良玉佩兮金章命骐校以进驾翊龙輶而上骧代灵靴於河鼓建参旗於太常号宫女之噉噉遣使臣之皇皇腾鱼轩兮背北渚乱凤管兮越南冈当赫?之畏日如徒靡之秋光望曾城而不返遵厚夜而何长呜呼哀哉神理惟昧万物同宅人生有终驷马过隙讯虞妃於前古闻嫔帝於在昔感伊洛之山川怀灵仙之影迹彼销形於天壤云谁同兮金石惟彤管之芳辉与青史而无斲呜呼哀哉

让皇帝哀册文 徐安贞

维开元二十九年岁次辛巳十一月戊申朔二十四日辛未寧王薨於西京之邸第旋殯於正寝之西阶翌日有制册王为让皇帝盖景龙岁先帝即位王嫡长将立为皇太子让大功於我皇泊薨落让存有追崇之义粤若天宝元年夏五月乙巳朔十七日庚申将迁座於惠陵礼也龟策先远龙輶此时呜呼哀哉皇帝遣金紫光禄大夫守尚书左仆射摄太尉上柱国许平县开国侯耀卿奉宵载奠祖筵以申天伦之憾也乃命词臣序之典册其词曰昔真人之述作表高节於让王太伯闻乎有周皇昆昭於圣唐古往今来身退业昌没而不朽扬乎耿光玄祖锡庆重熙累盛兹豕嗣之谦德迨遗灵而受命童孺之辰初王寿春开国方大进封於蔡以委亲贤是兼中外奄有於宋复迁於寧正畴庸於地理配明德於天星或建符节言归阙廷既睦天爱承欢帝乐东扈温泉西侍平乐风雅属和论思辨博晨超北上谒紫殿於蓬莱夕息南归对琼楼於花萼莫匪恩遇周爰咨度坐而论道实惟三公登太尉兼仪同拜司徒命司空仪刑作孚宣和国风稽以前事?怀逝者五王同日曜大君之一龙万国来朝无梁王之驷马让则有之崇名可追踰周盟之礼会七月之期太史造时遣奠於兹自藩王之邸第建天子之旌旗度春明而春尽下长乐而长辞经灞川与渭川惨容卫兮迟迟当苑门之宫观使吾君兮望思呜呼哀哉高寝林间陰堂昼闲代谢今昔神之往还列昭穆兮斯在奉忠孝於桥山呜呼哀哉

恭皇后哀册文

维开元二十八年岁次庚辰月朔日寧王妃元氏薨於西京之第旋窆於某莹天未忘也相次徂落其明岁十一月二十四日王薨在殯制册为让皇帝且有後命追諡妃为恭皇后盖以王有让统之实而妃有恭德之美所以考其行追崇皆圣人天伦笃爱有光於古先者也粤天宝元年五月乙巳朔十七日庚申将迁祔於惠陵王薨及葬凡为七月天子之礼也乃命侍臣叙以册书其词曰皇矣有熊处乎玄宫衣冠所在祉胤无穷以武而兴复於上中以文始大元气比崇礼侔周恪庆渐柔风展我邦媛伦昭有融至静委和如天克令莫莫中谷天天作咏黄纁导容素沙增映鉴图閱史陰仪壺政帝宠元昆妃承累命降家人之礼拟陰安之盛【汉书文纪陰安侯高帝】鹊桥行化人伦以正或几望於终古故守冲而益敬祥开梦兆服媚兰荪女延汤邑男受推恩缘车齐軫彩戟盈门各禀柔训常贻话言天授戩谷无非【阙】归賸事凶毁台【阙】团月忽蚀朝云亦霁彩灭【阙】韶阳收华邸第呜呼哀哉鲁宫未考津门遽哀帝以让而追諡后从夫而永陪輦揄暂举璋璣谁开用小君之备物怨吾王之不来呜呼哀哉娥轮半上唇轂将移追双旒兮迟迟卷六衣兮披披青门一别兮不驻素滻既济兮相随入松柏顾远兮参差司马门兮垒垒?后坟兮在斯呜呼哀哉

奉天皇帝哀册文 王缙

维元年建寅月二十六日故靖德太子諡曰奉天皇帝妃窦氏諡曰?应皇后自细柳将迁座於新丰望黄山而入上苑过紫极而出天门傍临凤阙双引龙輶乃诏左仆射冕祖饗於行宫礼也今上孝悌通於神明追崇徽諡用达皇情陟冈目送避殿涕盈爰命述者以振休声其词曰昔在高祖文思武德龙战必胜海飞争息威加八荒奄有万国累业继圣惟天是则昌运斯

应睿哲乃生爰自弱岁有如老成秤象知小测日言轻率尔之对略而不行问安内?岂独重明深居邸第亦称惟城礼乐不执艺或可游聯行鲁卫虚伫应刘雁鹜非好神仙不求为善自乐俾躬处休行成於内声闻於外性实匪骄迹能用晦朝野多欢兄弟高会上客曳裾闲园飞盖仁者当壽天道何昧小山未倾盘石忽碎呜呼哀哉天慈罔极宠命犹新前星告位少海迁神黄公谁客音容自春空悲天牒独有芳尘正位乎内进贤【阙】肃肃令妃幽公之子家自汉室代为戚里百两比肩四教盈耳不艺珩佩能循沼沚传训公宫留箴女史旋称未亡身誓之死柔质泯焉徽音不已呜呼哀哉帝念元昆人无间言不及让国於是追尊惟储出震惟俪居坤备陈服御更起陵园来九重兮复去动万乘兮还静挽凄楚而凝哀驾迤迟而转影别青门之早春背素滻之斜景路已穷於咫尺时不延於俄顷呜呼哀哉神辉永戢轩曜长零窆圜椒闼泉户彤庭开壽宫兮寂寂虚玉座兮冥冥宾上帝於宵眇陪五后之明灵海为田兮岸为谷德不朽兮惟馨呜呼哀哉

承天皇帝哀册文 常袞

维大历三年岁在戊申四月丁未朔六日壬子故齐王諡曰承天皇帝兴信公主季女諡曰?顺皇后初天宝十五载会有国难王首建大义扈先帝於朔陲以其年八月薨於行在某年某月追封齐王今上亲亲念切册赠大号以大历三年六月迁座於咸阳银槩传曙金根在馭出仙禁兮逶迤泊横桥兮西去乃诏礼仪使工部尚书祖奠於行宫礼也圣慈友爱痛结天伦爰命作册授之儒臣其词曰天祚我唐帝系其昌鸿明皇皇子孙保光长发其祥倬生贤王英华外扬五色含章聪敏明粹孝友纯至文丽春华神清颢气所全者德不有其贵昔在开元锡羨其蕃储后爰子天皇弄孙胜衣走拜即启东藩山委庆赉云翔渥恩紫殿丹台兮相属临洞音宵兮沉沉联日元以金友炜芳萼於瑶林甲观宴兮承顔数寝门侍兮鍾爱深既闲详於占对亦自守於冲退忘外事之婴拂服前言之箴诲谓欢娱之末更何艰否之相会云雷邁屯关洛扬尘乘輿南幸定义北巡上戴君父协於天人中兴之业实赖经纶如何上玄不假之年丹误金鼎樽空玳筵軫於震恻泽漏重泉东负苍海锡其土田顾谋始之言博谓饰终之恩薄崇章大号自我天作锡梁国之旌旗用鲁侯之礼乐备物宫庭巍巍宠灵宝符玉牒照曜青瑩仙驾帝仪上升紫冥邦媛之妹妇道不踰遽辞金屋久门珠襦锡以象服合於鲋隅呜呼哀哉出国门兮苍山转辞白日兮长安远惊飈落於桂宫零落沾於兰坂建翠凤兮葳蕤瞻落乌兮迟迟壽宫闭兮与天毕玉尘深兮无晓时嫔嫗俨兮侍新寝鳬雁游兮非故池戢神辉之杳霭结吾君之眷思唯鸿勲之不泯渺然终古兮同斯

承天皇后哀册文 杨炎

维大历三年岁次戊申四月丁未朔六日壬子故齐王諡曰承天皇帝妃张氏諡曰?顺皇后天宝末贼臣构难王从二圣南幸成都自以武功定策禁中扈先帝於灵武以是年八月薨於行在今上録功追远诏諡鸿名以大历三年六月迁座於咸阳礼也云幡宿悬天鷄切响建翠凤以双引度苍龙而长往皇帝恻极天伦齐於闲馆望桂屿之萧飒抚兰台之伤断爰诏近臣遗音是纂其词曰皇图氛氲丽於天文本支百代联华千载维王斯会其祥则大祖武之烈宗文之配令德纯粹温?慈爱和必有节动而无悔持盈以中明道若昧金玉是式鼓鍾於外伊昔庆

衍维黄握图天孙载弄甲观晨趋善问居讲严师服儒琼林秋实宝藻晴敷皇用锡土苴茅剖
符大邦之翰沧海之隅遥分朱邸近植青梧爱鍾嘉惠宠被宸渥从侍寝门观风大学礼闻齿
让听辨声乐历运中否鲸灾构昏帝从避狄圣有昌言王叶羣议天回乘輶适於磻碭之野进
於闾阖之门云趋河北电扫中原方从庙告言守藩垣忽川逝於东海怨夜长於西园呜呼哀
哉志操见於素履勲名流於天壤成宗禋之有圣悲欢爱之易丧独精聚而魂游奉君亲以长
往展我邦媛德容可仰鲁馆而家齐风是长翟拜三月輶归百两岂风吹以有归而虹销之无
像呜呼哀哉帝念伊始睟容生忧伤桂色之幽蠹望山河之林丘解剑龙而追恸烛鸿徽以冥
搜驾之辂旗服以冕裘俨千官於天衢将合祔而从周呜呼哀哉笳鼓宵陈河山晓发地缺北
兮声远天空南兮影没入幽隧之穹林伏盘原之宫阙呜呼哀哉考至公与至性见为子兮为
臣临难不忘其社稷感时致思其君亲短而非病逝岂同尘惟芳名与盛德可观法以求仁呜
呼哀哉

唐大诏令集卷二十六

卷二十七

钦定四库全书

唐大诏令集卷二十七

宋 宋敏求 编

皇太子

立太子

立秦王为皇太子诏

立中山王为皇太子诏

立晋王为皇太子诏

立代王为皇太子诏

立平王为皇太子诏

立郢王为皇太子诏

立忠王为皇太子诏

立宣王为皇太子诏

立广陵郡王为皇太子诏

立邓王为皇太子诏

立遂王为皇太子诏

立景王为皇太子诏

立鲁王为皇太子诏

立陈王为皇太子诏

立德王为皇太子诏

立太子

立秦王为皇太子诏

储贰之重式固宗祧一人元良以贞万国天册上将太尉尚书令陕东道大行台尚书令益州道行台尚书令雍州牧蒲州都督领十二卫大将军中书令上柱国秦王某气质冲远风猷韶茂宏图昔着美业日隆孝惟德本周於百行仁惟任重以安万物王迹初基经营締构戡剪多难征讨不庭嘉谋独举长筭必尅敷政大邦宣风区奥功高四履道迈二南任总机衡庶绩惟允职兼内外彝伦载穆遐迩属意朝野具瞻宜承鼎业允膺守器可立为皇太子所司具礼以时册命【武德九年六月】

立中山王为皇太子诏

尚书奏议以为少阳作贰元良治本?奉宗祧式固邦家中山王承乾地居嫡长天姿岐嶷仁孝纯深业履韶茂早闻睿哲幼观诗礼允兹守器育养春宫朕钦承景业嗣膺宝图宪则前王思隆正绪宜依衆议以答企望可立承乾为皇太子【武德九年十月】

立晋王为皇太子诏

昔者哲王受图上圣垂范建储贰以奉宗庙总监抚以寧邦国既议在於至公亦事兼於权道以贤而立则王季兴周以贵而升则明帝定汉详诸方册岂不然乎并州都督右武侯大将军晋王治地居茂亲才惟明德至性仁孝淑质和惠夙着梦日之祥早流乐善之誉好礼无倦强学不怠今承华虚位率土系心畴咨文武咸所推戴古人云知子莫若父知臣莫若君朕谓此子实允衆望可以则天作贰可以守器承祧永固百世以贞万国可立为皇太子所司备礼册命【贞观十七年四月】

立代王为皇太子诏

洵雷扬祉承祧之道爰着重离阐曜守器之方斯存故能抚寧军国永保邦家详览瑶图?瞻遐册继业垂统咸率兹典代王弘道居嫡胤天纵英姿器质冲华神鉴昭远?谦表志仁孝居心夙彰睿哲之风早通诗书之业朕以虚薄方启无疆之祚永传不朽之基取则前王思隆正绪宜升上嗣养德东宫可立为皇太子仍令所司择日备礼册命【永徽七年正月】

立平王为皇太子诏

舜去四凶而功格天地武有七德而戡定黎元故知有大勲者受神明之福仗高义者为匕鬯之主朕?临宝位亭育寰区以万物之心为心以兆人之命为命惟承继之道咸以冢嫡居尊而无私之怀必推功业为首然後可保安社稷永奉宗祧第三子平王隆基孝而克忠义而能勇比以朕居藩邸?守国彝贵戚中人都无引接羣邪害正凶党实繁利口巧言谗说罔极韦温延秀朋党竞起晋卿楚客交构其间潜结回邪排挤端善潜贮兵甲将害朕躬隆基密闻其期先难奋发挺身鞠旅衆应如归呼吸之间凶渠殄灭安七庙於几坠济羣生於将陨方舜之功过四比武之德逾七灵祇望在昆弟乐推一人元良万邦以定为君副者非此而谁立为皇太子有司择日备仪注册命【唐隆元年六月】

立郢王为皇太子诏

树之后王所以辑寧黎献承之储副所以安固宗祧故能崇四术之科为万国之本长幼君臣之序齿胄知归温文?敬之风羣生攸属古之制也其在兹乎郢王嗣让聪睿夙成端庄特秀三雍礼乐必也生知五官词藻居然暗合体道为器非假於学问资灵受德自符於神解夏弦春诵地义天经立人之道既彰为子之诚益着今升平在运中外咸寧将有事於元良固不踰於三善宜光近日之敏俾冠前星之耀宜以来年正月四日备礼册为皇太子所司准此【开元二年十二月十七日】

立忠王为皇太子诏 孙逖

门下大宝曰位实在乎丕承万邦以贞必建於明两朕嗣守鸿业祇严永图?惟匕鬯之主岂舍人神之望开府仪同三司兼单于大都护河北河东行军元帅朔方节度使兼关内度支营田盐池押诸藩部落等大使上柱国忠王璿天假聪明生知仁孝君亲一致孝悌三成温文之德合於古训敬爱之风闻於天下尝亦视其所以察其所安考言有章询事皆中知子者父允叶於元良以长则顺且符於旧典宜膺择嗣之举俾受升储之命可立为皇太子仍取来月内择日册命所司准此【开元四年十月十四日】

立宣王为皇太子诏

主器者莫若长子继明者必建储贰既已传重亦以崇本则君亲之大义帝王之弘范无先於此矣朕以眇身纘承丕绪夕惕祇畏惟怀永图承八叶之耿光居四海而称大则匕鬯之主粢盛之重树元贵嫡有邦之先宣王诵生知古训既贤且长聪敏明博孝顺?友不自满假率由宪章庆发高祿兆由甲观为子之道惟父能知审观其志宜承大统固能总戎监抚载乎鼎实不絶驰道谦敬益崇问安必自於因心立学因知其让齿昇兹上嗣庶贞万国可立为皇太子宜令所司择日备礼册命【建中元年正月】

立广陵郡王为皇太子诏 郑絪

万国之本属在元良主器之重归於长子所以固社稷正邦统古之制也广陵郡王淳孝友庄

敬慈仁忠恕博厚以容物寬明而爱人祇服训辞文皆合雅讲求典礼学必承师居有令闻动无违德朕获纘丕绪祇若大猷惟怀永图用建储貳以承宗庙以奉粢盛爰举旧章仍俾茂典宜册为皇太子改名纯仍令有司择日备礼册命【贞元二十一年二月】

立邓王为皇太子诏

门下朕闻君天下者纘承统业何尝不树储建貳安固邦家况长子有主器之义元良贞立国之本上以严宗社之重下以顺恒久之宜历考前载率由斯道邓王寧性与忠敬生知孝友秉寬洪之度体慈爱之心学师训誓词尚经雅动皆中礼虑不违仁稽以旧章允膺上嗣朕获纘丕绪夙夜??常惧神明未歆政理多阙旷兹茂典亟涉岁时今属方内甫寧品物咸遂览皇王之制询卿士之谋时瞻大猷莫此为甚是用授之匕鬯位以青宫钦为永图俾奉休命宜册为皇太子令有司择日备礼册命主者施行【元和四年四月】

立遂王为皇太子诏

门下承庙祧之尊固邦国之本重其绪业贞以元良斯今古之通制也乃者春宫旷位已涉岁时裸献阙主鬯之仪胶庠虚齿学之道其何以怀寧方夏彰示教源稽诸往册用举彝典遂王宥孝敬忠肃寬明惠和遵保傅之言佩经训之旨友于兄弟睦于宗亲博爱而恕已以诚慎行而飭躬以礼载观所履克慎厥谋宜升储闈以对休命朕祇若成宪惟怀永图法三王垂统之规绍十圣重光之烈致严禋配俾奉粢盛式昭上嗣之荣庶叶明离之吉宜册为皇太子改名恒仍令有司择日备礼册命主者施行【元和七年十月】

立景王为皇太子诏

门下朕闻王者敬承庙祧钦若天命必建元子用寧邦家所以光叶继明严当主鬯朕纂承圣绪寅奉丕图惟怀国本之安爰在皇储之重而青宫久旷望苑未开则何以表式元良昭宣鸿业稽於往册用举彝章长男景王湛孝爱?和忠敬诚懿慈惠特稟寬仁夙彰言通典谟动合仪矩睦友宗属遵承传道克修令闻日茂佳猷宜践储闈以承休命君尊父严每推乾道闻诗学礼用首人伦嘉翼翼於诚心覩蒸蒸於孝敬古称知子无让前修俾奉粢盛式昭元嗣宜册为皇太子有司择日备礼册命主者施行【长庆二年十二月七日】

立鲁王为皇太子诏

礼重承祧义承继体思崇守器必务建储王者所以固大本而贞万国也鲁王允温仁寬明聪敏孝爱动若至性居无放心乐善承顏旷度容衆?勤诗书之教率由忠厚之风懿兹猷徽光我胤嗣朕纂承宝位丕寧永图钦若典章用建储貳爰俾主鬯以率问安统正龙楼之荣昭宣甲观之兆宜膺茂典允属元良宜册为皇太子宜令所司择日备礼册命【太和七年八月】

立陈王为皇太子诏

門下古昔哲王之有天下也何尝不正國本而承天序建儲貳而主重器朕以寡昧祇荷丕圖?寅畏思固洪業慎擇令懿曠於旬時而卿士獻謀龜筮告吉以為少陽虛位愿舉盛儀列聖垂休俾合予志選賢而立式表无私敬宗皇帝第六男陳王成美天假忠孝日新道德溫文合雅謙敬保和裕端明之體度尚詩書之訓辭言皆中禮行不違仁是以順考旧章欽若成命授之匕鬯以奉粢盛宜回朱邸之榮俾踐青宮之重可立為皇太子宜令所司擇日備禮册命【開成四年十月十四日】

立德王為皇太子詔

我國家尚法夏殷遠遵漢魏爰設儲貳式固宗祧既明兩而作離在立嫡而惟長矧茲冲眇獲嗣丕基將弘永圖宜舉令典德王佑朕之元子孝敬日躋早茂溫文克將岐嶷屬者朝廷多故兵革尚興怀柔方務於舞干典禮未行於主器而羣臣獻議百辟上言請建元良至於三四以奉祖宗之教必在前星系億兆之心宜崇嗣體由是考彼史册詢於蓍龜厥惟旧章乃建嘉命爾其嚴奉師傅敬慎威儀必使流慶萬邦垂芳三善稟教諭之道作圖牒之祥勿怠令猷克光帝載服我明訓永孚於休可册為皇太子仍改名裕令所司擇日備禮册命【乾寧四年正月】

唐大詔令集卷二十七

卷二十八

<史部,诏令奏议类,诏令之属,唐大诏令集

钦定四库全书

唐大诏令集卷二十八

宋 宋敏求 编

皇太子

册文

册晋王为皇太子

册代王为皇太子

册平王为皇太子

册郢王为皇太子

册忠王为皇太子

册成王为皇太子

册雍王为皇太子

册广陵郡王为皇太子

册邓王为皇太子

册遂王为皇太子

册景王为皇太子

册鲁王为皇太子

册德王为皇太子

册文

册晋王为皇太子文

维贞观十七年岁次甲辰四月某朔日於戏惟尔并州都督右武侯大将军晋王治忠肃懿宣慈惠和仁孝出於自然信义备於成德祯祥夙着睿哲日新永言少阳匕鬯是寄畴咨朝列卿士协从是用命尔为皇太子往钦哉尔其思王道之艰难遵圣人之炯戒勤修六德勉行三善无或举非法度忘俭而好骄奢无或理乖彝伦远忠良而近邪佞非履道无以彰名非任贤无以成德尔身为善国家以安尔身为恶天下以殆睦九族而礼庶僚怀万邦而忧遐迩兢兢业业无怠无荒克念尔祖宗以宁我社稷可不慎与

册代王为皇太子文

维永徽七年岁次丁巳正月丙寅朔六日辛未於戏夫明两载象道贯三才元良表德业隆千古是以夏启作贰光阐高猷姬诵升储发挥王道详求典册式瞻匕鬯固本垂统允归正绪惟尔代王弘猗兰毓祉乔桂凝华岐嶷表於天姿符瑞彰於神授器业宏远风鉴昭朗践嘉义而总深仁舍幼志而标成德爱资玉裕早振金声朕奉灵图肃膺丕业仰惟七庙之重思隆万叶之庆畴咨列辟钦若前修是用命尔为皇太子往钦哉尔其祇奉宪章率由轨度尽谦於齿胄审方俗於迎郊春礼冬诗趋庭靡懈三善六德勛志无愆絶骄奢之心纳忠良之谏播徽猷於外宇申敬奉於中闈允睦周亲务殷尧族永隆四术式宁万类无荒无怠保我宗基可不慎与

册平王为皇太子文

维唐隆元年岁次庚戌七月庚申朔二十日己巳皇帝若曰天有不命集宝位於朕躬所以奉若天道建兹元嗣其明听朕言咨尔平王隆基幼而聪允长而宽博有夙成之量焉夫礼以修外乐以修内者是务於文也春夏学干戈秋冬学习鹵者是兼於武也系於百姓闻於天下者是由於仁也一日三朝尝药侍膳者是资於孝也尔有文武仁孝之德以知父子君臣之道朕甚休之闻者贼臣构逆窥窃神器则我有唐之祚危若缀旒尔义宁邦家忠卫社稷诛其凶恶以之康济主匕鬯者非尔而谁是用命尔为皇太子古人有言曰尔身克正罔敢不正人心罔中惟尔之中昭昭临下不可不畏慎简乃僚允迪端士俭惟德远於儉人则万邦以贞答扬我四圣之鸿烈敬之哉

册郢王为皇太子文

维开元三年岁次乙卯正月甲申朔四日丁亥皇帝若曰於戏书不云乎一人元良万邦以贞易不云乎黄离元吉得中道也将以守监从抚主器承祧执经陈东序之容端冕见南郊之礼本支百世宜哉福祿咨尔郢王嗣谦忠肃懿元良利贞遵在镐之惠慈稟生谯之祥应学能知

道孝乃因心书及春卿悬推早秀言穷淑誉远愧生知当试象之年备成人之敏九玄赞命百姓与能正位少阳钦惟大典是用命尔为皇太子其在靖恭尔位聿修厥德诗书礼乐敦说为本父子君臣威仪罔忒寝门问?必视寒暄望远招贤用资端直使三灵合契四海系心延我累圣之业积尔重辉之庆必敬必戒无怠无荒往钦哉可不慎与

册忠王为皇太子文

维开元二十六年岁次戊寅七月戊寅朔二日己卯皇帝若曰於戏受天命者皇王之业大为国本者储副之位崇所以上承宗祧下固黎献咨尔开府仪同三司单于大都护河东河北道行军元帅朔方军节度大使兼关内度支营田盐池押诸藩部落等使上柱国忠王璿幼而夙成长有宏量佩服仁义周旋礼乐忠孝极於君亲友爱闻於兄弟正以率下谦以持盈识洞於微知周於物通刑政之大体负文武之殊能果於积德乐於为善凡此数德尝试皆能然岂矜知子之明谅曰至公之义况复仰稽天道俯察人心立长则顺天所助也议才则贤人之望焉是用命尔为皇太子往钦哉尔其敬膺典策无忘戒慎思创业之多难知守器之为重作贞万国允协重明以扬列祖之耿光永贻多嗣之承式可不慎与

册成王为皇太子文

维乾元元年岁次戊戌十月庚子朔五日甲辰皇帝若曰於戏自昔圣王咸建储贰盖将嗣守神器?奉宗祧是以礼经着元贞之德易象载重明之义朕纂服鸿绪丕承前烈爰升匕鬯之贤是符当璧之命咨尔太尉成王俶道备文武生资睿哲温文彰於日就孝友稟於天成往以凶丑乱华干戈集事是能出陪戎驾入奉庙朝克符丹水之师实剪绿林之盗所谓功定社稷义宁君亲今万邦以贞三善斯属宜膺上嗣之典俾践少阳之位是用命尔为皇太子以副朕躬尔其思王业之艰难遵圣人之炯戒非尊贤无以成德非广孝无以承亲远斥便佞询谋正直兢兢业业庶保於大猷然後无忝於祖宗克宁我邦国往钦哉丕膺景命可不慎与

册雍王为皇太子文 潘炎

维广德二年岁次甲辰三月戊辰朔二日己巳皇帝若曰昔者哲王必建元子上以奉宗庙下以系生民固本乃安立长乃顺经明者是称其两乐善者不止於三资於君父之间运在神明之侧稽古承式肆予命汝天下兵马元帅尚书令雍王适智崇天锡德茂日新文实志经武兼讲艺性深於孝尤切於问安识蕴其明更精於简牍奉辞伐叛稟命成师积稔逋诛一戎底定业着於内功加於时万方以贞朕志允定是用命尔为皇太子以践於储宫往钦哉无以不副忘其?无以不会易其度观图书之得失思締构之艰难夙夜惟寅主兹匕鬯永怀我高祖太宗之丕命可不慎与

册广陵郡王为皇太子文

维贞元二十一年岁次乙酉四月庚午朔六日乙亥皇帝若曰建储贰者必归於上嗣固邦本

者允属於元良咨尔元子广陵郡王某幼挺岐嶷长标洵淑佩诗礼之明训稟忠孝之弘规居常保谦动必循道识达刑政器含温文爱敬奉於君亲仁德闻於兆庶神祇龟筮罔不协从是用命尔为皇太子於戏惟我列祖之有天下也功格於上帝祚流於无穷光缙洪绪逮予十叶?寅畏日慎一日付尔以承祧之重励尔以主鬯之勤以贞万国之心以扬三善之德尔其尊师重傅亲贤远佞非道勿履非礼勿行对越天地之耿光丕承祖宗之休烈可不慎与

册邓王为皇太子文

维元和四年岁次己丑十月癸酉朔十八日庚寅皇帝若曰於戏昔禹有圣子克承父业故三王代袭以天下为家我唐受天明命垂二百年钦惟十圣?嗣宝历亦罔敢越予不知传序相受以及予一人获奉珪币事上帝承宗庙夙夜祇惧不敢荒宁永惟负恩思建储贰须假五载相时一德允属於尔元子邓王寧惟尔两曜分辉五行总秀体资上哲性被至仁粵在幼冲挺然岐嶷寬厚之量匪由师训温文之德稟自生知爰抚藩封式崇盘石河间之泉懿决策不穷东海之开明视牒能辨陪享宗祀赞猷郊禋展礼克诚执事惟敬勤供子道左右朕志旋观表识宜践青宫讯於蓍龟灵命不二谋及卿士人心协同尚膺匕鬯允事监抚是用命尔为皇太子往钦哉莫尊匪君尔为之臣莫亲匪父尔为之子爱敬诚矣忠孝并焉尔其虚受以下贤斋肃以成德无以崇广处已无以怠忽临人继明四方作贞万国永言配命可不慎与

册遂王为皇太子文

维元和七年岁次壬辰十月丙戌朔十七日壬寅皇帝若曰於戏建立储嗣崇严国本所以承祧守器所以继文统业钦若前训时惟典常越我祖宗克享天禄奄宅九有貽庆亿龄肆予一人序承丕构纂武烈祖延洪本支受无疆惟休亦无疆惟恤负荷斯重祇勤若厉永怀嗣训当副君临咨尔遂王恒体乾降灵袭圣生德教深蘊瑟气叶吹铜早集大成不屑幼志温文得於天纵孝友因於自然符采昭融器业英远爰膺锡祉实寄维城懿河间之不羣慕东平之最乐自顷离明辍曜震位虚宫地德可尊人神攸属式稽令典载焕徽章是用册尔为皇太子往钦哉有国而家有君而父义兼二极重系万邦何好非贤何恶非佞何行非道何敬非刑居上勿骄从谏勿拂懋昭乃德惟怀永图用陪贰朕躬以对扬休命可不慎与

册景王为皇太子文

维长庆二年岁次壬寅十月丁亥朔二十日丙午皇帝若曰於戏惟辟奉天必建储位率命上嗣以立人极所以大一统而贞万邦也粵我祖宗乃圣乃神继体垂休奄宅四海泊予寡昧祇荷丕绪夙夜兢励深惟永图用稽古命嗣以承无疆之庆咨尔元子景王湛粹哲自天温文在躬夙成厚德勿形幼志爰谋表社克彰孝?敏事居敬日新其度是用命尔为皇太子尔其钦哉主善勿懈由礼勿违勉以入德勤以聚业修志罔怠自诚而明则可以刑於邦家對於上下用光我烈祖之休命可不慎与

册鲁王为皇太子文

维太和七年岁次癸丑八月甲申朔七日庚寅皇帝若曰钦若天道君临万方必崇上嗣以固邦本所以尊守器而重承祧也我祖宗受天明命光宅区夏玄光被於生灵利泽霈於遐荒逮予寡昧继缙鸿序?畏寅惧不克负荷思崇大典用建元良俾膺主鬯之重式叶奉先之庆咨尔元子鲁王永惟哲淑聪明温文粹和风表岐?生知孝敬泊茅苴分社磐石启藩蕴东平乐善之心慕河间大雅之操天纵宏量日新令猷人神协志蓍龟献兆是用命尔为皇太子往惟钦哉修已有度敬事无违居必思义动必率礼讲道励学亲师尚贤则可以正耀於前星配德於重海以承列祖以奉粢盛恢弘懿图无忝丕命可不慎与

册德王为皇太子文 薛庭珪

维乾宁四年岁次丁巳三月癸卯朔十七日巳未皇帝若曰夫立爱惟明建善则固先王盛躅有国丕图承祧仰镜於前星守器适当乎长子遐瞻载籍眇覲洪荒虽步骤随时质文异制逮於传序罔不率循国家高视百王同符三代平一区宇统和人神垂三百年历十八叶暨朕寡昧祇荷景灵属天步艰难岱宗牢落蒸人未乂旧典爰旷庶尹卿士藩辅元僚思正储闈式固鸿业咨尔长子德王裕象叶肯构明启少阳温文在躬睦友成性博闻强识无愧於老成学礼读书庶资乎师训廼辑羣议爰咨旧章是用命尔为皇太子嘻毓问承华重辉望苑永贞万国明照四方入则有师出则有保无怠三善往崇四术务亲正人诚近邪僻淑慎尔止峻防所岐勉尔厥猷罔坠丕训

唐大诏令集卷二十八

卷二十九

钦定四库全书

唐大诏令集卷二十九

宋 宋敏求 编

皇太子

册太子赦

景云元年册皇太子赦

开元三年册皇太子赦

开元二十六年册皇太子赦

立成王为皇太子德音

贞元二十一年册皇太子赦

元和四年册皇太子赦

元和七年册皇太子赦

长庆二年册皇太子德音

太和七年册皇太子德音

加冠

皇太子加元服制

皇太子加元服宴百官诏

改名

皇太子诸王改名勅

齿胄

皇太子国子监释奠诏

皇太子诣太学诏

册太子赦

景云元年册皇太子赦

天下公器非上圣无以运其机域中大业非元良无以固其本朕钦若灵命寅奉神宗屈己顺人用安四海承祧主鬯实贞万国顷者象臻大悯在疚为忧□獍满朝豺狼塞路武职戎政必任凶徒国要时权咸畀逆党社稷之守望絶苞桑忠义之怀谁其艾棘阶祸稔恶伺隙乘间烦言碎辞所不称述皇太子讳正气凝姿端命毓德自家刑国英徽日湛移孝为忠雄谋电发北军驰入扫搀抢於紫衢南宫反正开日月於黄道平乱寧夏翼戴朕躬一旅不劳功逾复禹百神咸举事邈兴周声应吹铜望归当璧今遣司空读册命侍中授玺实由立义岂曰尚亲承华肇开元嗣以建宜申浚雷之泽仍纪景云之瑞可大赦天下改唐隆元年为景云元年内外官子为父後者赐勲一转公卿各举孝友忠正堪任东宫官一人

开元三年册皇太子赦

黄门朕闻王者神器天之大业震百里而崇孟侯昭四方而建元子其所由来尚矣我国家参天贰地济以丰功祖武宗文承於密命顾循菲德寅畏鸿名太上皇帝服以位卿大夫辅朕之阙金率先自述稽古为新国本不可以不立故宵衣当宁闻义是将朝服升阶择贤而举皇太子嗣谦生知礼乐性成仁孝子孙之爱则敬不絶驰问?之安则恭而至寝观其言精视牋思敏题鞭固以覆东序之讨论契南山之调护今少阳践位献岁发春草树自乐乾坤交泰副君之榜已别其宫太史之书更藏於府帝图斯永人望所归庶符知子之明岂独在予之庆用施寬诏光於政理今望苑初开端僚是切天下有高才懋德硕学纯儒比迹春卿齐名夏启具以徵辟【正月】

开元二十六年册皇太子赦

制曰自昔圣人恭有神器必立储两崇其继明所以尊宗庙而重社稷也朕获纘休运丕承宝历五圣之业敢不克勤万邦之本期诸永固是以式尊彝训乃择元辰太子璿植性温?因心孝友文武之道既着君亲之义以弘有命之初咸闻庆跃兴言士庶能叶朕心是用择以吉辰申之册命思惠率土以畅休期可大赦天下自开元二十六年七月二日昧爽以前大辟罪已下罪无轻重已发觉未发觉已结正未结正系囚见徒常赦所不免者咸赦除之比年以来十道

采访使道官人恶状以其微瑕为终身之累岂得永无甄叙许以自新宜令御史台及刑部大理寺参详所犯轻重类例条奏内外文武职事官九品以上各赐勲一转五品以上子为父後者亦赐勲一转其忠王府官及侍读侍文侍书除赐之外二品以上赐爵一级四品以下各加一阶仍并即与改转缘册命行礼官各赐物有差今月番见上飞骑万骑监门直长三衢引驾细仗执扇黄衣长上等各赐勲一转彍骑番兵各放免一番天下耆老八十以上各赐粟三石帛三段百岁以上赐粟五石帛五段并加板命至如磧西行人途路遥远往复劳敝颇异诸军其中愿长往者已别有处分讫年镇向满应合放还未到之间稍宜优假其家内诸色差料并宜放免如有营农不自办者州县量事借助各使存济京畿近辅百役所出虽庶务简省终异於诸州其百姓等应单贫下户者特放今年半租率土之内赐酺三日

立成王为皇太子德音

守器为重择贤而立万国由其永贞百王以之垂范盖以重社稷而奉粢盛也朕纘承鸿绪惟怀永图丕膺皇极既符域中之大茂建元储用崇天下之本皇太子俶植性恭懿因心孝友文武之德克闻於日跻君亲之诚实表於天性时属艰阻义扶宗社故能外清氛祲内复皇图由是肇启承华懋昭嘉绪今撰辰斯及册命攸行宜承继明之庆俾广浚雷之泽可大赦天下顷者频兴大典累洽殊私率土之间屡经荡涤犹虑近有抵犯或滞狴牢其天下见禁囚徒以上罪一切放免内外文武官三品以上赐爵一级四品以下各赐加一阶五品以上官子为父後者赐勲两转顷缘国用不足颁赐未周今所铸新钱数盈於万其京官文武五品以上及常参官六军将士东北京留守及诸道节度将士等各赐有差其唐元功臣成都元从及朕元从功臣等普恩之外更赐一爵四品以下更加两阶其在灵州及寧州至凤翔者仰所司类例更通加一等皇亲及诸色陪位人各赐勲两转其鸿臚番客共赐绢一千疋天下义夫节妇孝子顺孙旌表门闾终身不事京官五品以上各举忠正孝友文儒周慎堪任东宫官者务取实才不得滥荐今余寇未殄有胁在贼中未归顺者一切不以为罪其有受贼节制能以兵降者酬其封爵且为政之要求贤是急比令中外荐举多非实才所以询事考言登科盖寡犹虑岩穴之内尚有沉沦宜令所在州县更加搜择其怀才抱器隐遁丘园并以礼徵送如或不赴具以名闻凡与前诏科目相当一切委内外文武五品以上有所知者不限人数任各荐闻如自举者亦听於所在投状有堪任用不限常资其行人家及羸老单贫鰥寡惸独已频有处分宜令州县长官倍加优恤应缘册礼职掌要重者及撰册书舁宝官礼官等普恩之外赐勲两转其礼仪使特赐一阶副使普恩之外赐爵一级勅文有不该者所司类例奏闻【乾元元年十月】

贞元二十一年册皇太子赦 郑絪

门下惟先哲王光有天下必正邦本以立人极必建储贰以承宗祧所以启迪大猷安固鸿业斯前代之令典也皇太子纯继体秉哲恭敬温文德协元良礼当上嗣朕奉丕训宪章成式永惟社稷之重载考春秋之义授之匕鬯以奉粢盛爰以令辰俾膺茂典今册礼云毕庆感交怀思与万方同其惠泽可大赦天下贞元二十一年二月二十四日已後至四月九日昧爽已前天下应犯死罪特降从流流已下递减一等文武常参官并州县府官子为父後者赐勲两转古之所以教太子必茂选师傅以翼辅之俾法於训辞而行其典礼左右前後罔非正人是以

教谕而成德也给事中陆贽中书舍人崔枢积学懿文守经据古夙夜讲习庶叶於中可充皇太子侍读天下孝子顺孙先旌表门闾者委所管州县各加存恤五岳四渎名山大川委所在长吏量加祭祀

元和四年册皇太子赦

朕丕承宝图抚有方夏夙夜寅畏不敢荒宁永惟祖宗之鸿业历考前王之令典思所以垂统立极事神保人推明至公安固大本尊庙祧而主匕鬯严社稷而奉粢盛俾开春闱乃命元子斯古今之通谊也皇太子宁清明体仁庄敬好礼服典谟之谊一君亲之诚允谐询谋用建储贰爰以吉日册於明庭鼓钟载和文物大备盛礼云毕庆感良深是宜布泽申恩自中达外厥有前躅举而行之自元和四年十月十八日昧爽以前天下应犯死罪非杀人者降从流流罪已下逋减一等左降官未经量移者与量移文武常参及诸州府长官子为父後者赐勲两转应缘册礼行事官赐阶及勲爵有差邓王府官量与进改夫辅翼元良教谕成德使目睹正事耳闻正言形於施为渐於心术非斋庄忠慤之士不在兹选工部侍郎归登给事中吕元膺并践履端正行义修洁通於经训而得其要达於教化而蹈其中侍讲承华师范磐石访乃公议副予精求并可充皇太子诸王侍读登宜加一阶元膺宜赐紫金鱼袋天下孝子顺孙先旌表门闾者委所管州县各加存恤五岳四渎名山大川委所在长吏量加祭祀

元和七年册皇太子赦 崔羣

王者司牧黎元绍膺统绪必建储贰以贞家邦故春秋垂冢祀之文易象着震方之位朕属承景运嗣守丕图稽前王之令模奉列圣之懿训上以严宗祧之顾下以繫亿兆之心无疆之休用崇主鬯祇荷成宪敢怠於怀皇太子恒忠孝温文率义由礼寬粹庄重自诚而明庆灵所积姿器夙茂能辨南阳之牒允符东海之贵承华载启命以居之选吉展仪神人允洽举是典册授之轩墀百辟在庭四方来贺以言承序所感则深永惟固本为庆滋大宜弘钦恤之令以覃命赐之恩与衆共之无思不被自元和七年七月十七者昧爽以前天下应犯死罪非杀人者逋减一等左降官流人并与量移如因流贬所亡没及得罪之人并任归葬文武常参官及诸州府长官子为父後者赐勲两转应缘册皇太子行事官加阶赐勲爵有差文武常参官及陪位官并宗主诸亲赐勲一转遂王府量与进官春闱毓德肇锡嘉名磐石聯华义深敦序澧王寬宜改名恇深王察宜改名惊洋王寰宜改名忻绦王寮改名悟建王密改名恪夫习近迁性圣贤所慎详观古昔辅正元良必惟其人朝夕讲训然後明君臣父子之道通礼乐教化之情自非学究宗源行可师范则无以应兹茂选式是仪型其皇太子及诸王侍读宜委中书门下精择以二人具名奏闻天下孝子顺孙先旌表门闾者及高年废疾者委所在州县各加存恤五岳四渎名山大川委所在长吏量加祭祀布告遐迩咸使闻知

长庆二年册皇太子德音

朕上奉庙祧下宁邦国承列祖垂鸿之庆当累圣奕叶之尊祇膺宝图敬守丕业体明离立象之重表青宫建嗣之崇元良以贞国本斯固皇太子讳恭孝温文生知夙稟日者春闱尚旷东

序未兴朕常训以义方举明严敬匪资调护已达诗书克保承休爰当主鬯膺兹异礼庆感良深夫践位少阳允孚明命用弘惠泽庶洽兆人自长庆二年十二月二十日昧爽已前天下应罪合死犯除贓降从流流罪以下逡减一等左降官及流人并与量移亡歿者任归葬文武常参官及诸州府长官子为父後者赐勲两转缘册太子摄太尉称贺侍中承旨宣制进中严外辨摄中书令读册授册各赐爵一级其行事职掌官及书宝昇举册宝礼仪使礼官等三品已上赐爵一级四品以下加一阶撰册文官特加一阶仍并赐物有差导引官各加一阶镌造册宝及礼生等赐勲有差文武常参官及陪位并宗子诸亲赐勲一转景王府官量与进改夫师严友善庶发清明习近性迁必资弘道所以慎简师傅用保元良其太子侍读宜委中书门下精择二人具名闻奏

太和七年册皇太子德音

门下帝者承天地贞邦国法明离之象固鸿业之本必命元子以备储闈斯皇王之令谟古今之不典朕祇受眷佑?恭宝图钦若彝章光修圣绪皇太子永幼稟仁智生知孝爱体温文以立德资敏哲以保躬寛裕有常贞慎无怠爰膺盛礼俾奉青宫严宗庙主鬯之仪遵朝夕视膳之节册命云毕感悦良深问安既庆於寝门布泽宜覃於天下自太和七年八月七日昧爽以前天下应犯死罪从流流以下罪逡减一等惟官典犯贓及故杀人刼狱夺囚持杖强盗者不在此限左降官流人并与量移如因贬及诸色得罪人所在亡歿并任归葬宗周之盛实在於维城二汉之隆亦由於磐石自开元以後累圣子孙皆长於深宫罔知稼穡曾不得习诗书以修礼乐交气类以叙人伦虽有间平之才莫施鲁卫之政永言沦废深疚朕怀诸王等宜以今年已後相次出阁具授紧望已上州刺史上佐观其才能续有序用人伦所先婚礼为重笄年许嫁别有明文其十六宅诸县主亦宜选择良偶以时出适仍委吏部於诸色选人中取情愿者?择具名闻奏亦当别加优獎令其就礼汉代用人皆由儒术故能风俗深厚教化兴行近日苟尚浮华莫修经艺先圣之道堙鬱不传况进士之科尤要厘革虽乡举里选不可复行然务实抑华必有良术既当甚弊思有改张今寰宇义宁干戈已戢皇太子方从师傅授六经一二年之後当令齿胄国庠以兴坠典宜令国子监於诸道搜访名儒置五经博士各一人其公卿世族子弟明年已後不先入国学习业不在应明经进士之限其进士学宜先试帖经并略问大义取经义精通者次试议论各一首文理高者便与及第其所试诗赋并停其试帖经官便以国志监学官充礼部不得别更奏请弘文两馆生斋郎并依令式试经毕仍差都省郎中二人覆试须责保任不得辄许替代苟涉情故必加罪责卿大夫者羣下之所视远方之所傲若非恭俭克己廉贞化人而望其服从固不可得况朕不宝珠玉不御纖华逮於六宫皆务俭薄卿大夫得不叶朕此志率先兆民比年所颁制度皆约国家令式去其甚者稍谓得中而士大夫苟自便安身於习俗因循未革以至於今百官士族起今年十月服冬裘以後其衣服舆马并宜准太和六年六月十七日勅处分如故违制度九品以上量加黜责其布衣五年不得举选百姓军人各委州府长吏渐施教化使自遵行不要便为禁制令其惊扰惠养疲民本於廉吏阜其生植在絶贪求其诸道方镇刺史等有聚歛货财潜行馈遗者委御史台纠察以闻仍委度支盐铁分巡院同为访察不得容蔽亲民之官切在守长久於其道政乃有成方镇刺史三考已下不得辄议替换如理有异等委中书门下访察就加宠獎如的然可録者别与甄昇其或政理有乖害及百姓者即不在满三考限易讥丰屋传美卑宫雕刻磨砢先贤有戒近者官

才昇於郎署位始置于郡符莫不高其閤闼广以池榭非唯僭侈踰制实亦耗蠹伤财其百官第宅已造成者并许仍旧今日以後如更有创立新宅及屋宇高大者并委御史台弹纠必严加黜责御史台所置六察分纠百司比来因循纠绳举职起今以後诸司如有身名伪滥盗官钱及违法等事他时发觉者本察御史各并当贬斥考课之法前王所重盖以综核吏理励精政途名实苟违将何劝激宜准故事署内外知考使兼令中书舍人给事中各一人监考百姓困穷弊由奸吏政苟不扰民皆自安其司农寺供宫内及诸司厨冬藏菜并委本寺自供其菜价仍委京兆府纳每年时价支付更不得配京兆府和市其诸陵守当夫宜委京兆府以价直送陵司令自顾召并不得差配百姓寒食杏仁鸡子月进土苏白麦树栽选场棘针修桥梁木便於本户税钱内尅折不得更令和市天下诸州县应纳义仓及诸色斛?除准式每斗二合耗外切宜禁断仍委度支盐铁分巡院及出使郎官御史切加访察如闻今岁所在丰稔其义仓斛?先有借用处委户部勾当并须及时填足文武常参官及诸州府长官子为父後者赐勲两转缘册太子摄太尉称贺摄侍中承旨宣制进中严外辨摄中书令读册授册各赐爵一级其行事职掌官及书宝昇举册宝礼仪使礼官等三品以上赐爵一级四品以下加一阶撰册文官特加一阶仍并赐物有差导引官各加一阶造册宝金字装宝人赐勲两转行事流外及礼生等各赐勲一转文武常参官及陪位官并宗子诸亲各赐勲一转鲁王府官未经进改者量与进改其皇太子侍读宜委中书门下精择二人具名闻奏天下孝子顺孙先旌其门闾者及年高废疾者委所管州县各加存恤五岳四渎名山大川委所在长吏等量加祭祀布告遐迩咸使闻知

加冠

皇太子加元服制

元良所以主匕鬯奉社稷贞于万国祝以三加皇太子居长德之地务亲仁之道爰就师保克修志业寝门问安而资敬太学齿胄而徵善大猷且酌元服宜申史称周诵之年传记鲁襄之礼粵若敬始谓之成人逮乎建正式展嘉事可以来年正月加元服所司择日奏闻礼官博士详考故实允符令典【开元七年十二月】

皇太子加元服宴百官诏

皇太子以守器之重有成人之业属阳和肇岁甲子惟日加元服乃循于旧章庆因雷洊欢洎云上王公卿士中外来寮布以慈惠广兹匪颁应在会官一品一百疋二品九十疋三品八十疋四品六十疋五品五十疋六品五十疋七品四十疋八品二十疋九品二十疋诸州都护都督刺史上佐诸军及副使亦同在会例宜以当处物给【开元八年正月】

改名

皇太子诸王改名勅

勅古之名子必有象类人道之大可无慎乎皇太子鸿及庆王潭以下往所制名或亦未协今以德命悉宜更之太子鸿为瑛庆王潭为琮忠王浚为璵棣王洽为琰鄂王涓为瑶荣王涣为琬光王浹为琚仪王澹为璲颖王澧为璫永王泽为璘壽王清为瑁延王洞为琦济王湓为环信王沔为理义王泚为玼陈王濯为珪丰王澄为珙坦王漼为璵凉王浞为璿汴王滔为璫及惠宁王文太子惠宣太子之子皆改从王【开元二十三年二月】

齿胄

皇太子国子监释奠诏

庠序之兴教自元子礼经之最奠始先师中古迄今斯道无替皇太子隆基天资圣敬日就文明弦诵之业已高元良之德斯茂自外储博望主器承华执经之问虽勤用币之仪未展今仲丁献告有事两塾备礼三尊宜遵旧章俾缉徽典【景云二年八月】

皇太子诣太学诏

儒道有百王之政元良乃万国之贞属太学举贤宾庭贡士当其谒讲故行齿奠所以弘风阐教尚德尊贤宜有颁锡以成光宠陪位官一品宜赐五十疋二品三品四十疋五品三十疋六品七品二十疋八品九品十五疋缘行礼及别职掌者各递加一等六品以下五疋为等三品以下十疋为等座主加二等学生赐物三疋得举者及诸方贡人各赐五疋【开元七年十二月】

唐大诏令集卷二十九

卷三十

钦定四库全书

唐大诏令集卷三十

宋 宋敏求 编

皇太子

监国

神尧命皇太子决断庶政诏

太上皇崩命皇太子承乾知军国事诏太宗征辽命皇太子监国诏

太宗破高丽回怡摄命皇太子决断机务诏高宗命皇太子领诸司启事制

则天太后命皇太子监国制

睿宗命皇太子监国制

允皇太子奏让政事诏

明皇命太子监国总师从东讨诏

肃宗命皇太子监国制

顺宗命皇太子勾当军国勅

穆宗命皇太子检校军国勅

文宗立颢王为皇太弟勾当军国勅

武宗立光王为皇太叔勾当军国勅

宣宗立郢王为皇太子勾当军国勅

懿宗立晋王为皇太子勾当军国诏

僖宗立壽王为皇太子勾当军国诏

昭宗命皇太子监国制

何皇后立辉王为皇太子监军国令

传位

神尧传位皇太子诏

神尧命皇帝正位诏

睿宗命皇太子即位诏

睿宗令明皇总制军刑政诏

明皇令肃宗即位诏

肃宗命皇太子即位诏

顺宗命皇太子即位诏

顺宗传位皇太子改元诏

何皇后命皇太子即位诏

监国

神尧命皇太子决断庶政诏

朕君临率土劬劳庶政昧旦求衣思弘至道而万几繁委成务殷积当晨日昃实疲听览皇太子世民夙稟生知识量明允文德武功平一海内九官惟叙四门以穆朕付托得人义同释负遐迩寧泰嘉慰良深自今以後军机时务兵仗仓粮凡厥庶政事无大小悉委皇太子决断然後奏闻既溥天同庆宜加惠泽为父後者若有封爵皆令袭继诸赤牒拟授职事官见任者并即为真其已得替者参选之日听依阶叙亡官失爵者量加擢用逋租宿赋及先贡官钱物悉从蠲免文武官人节级颁赐务存优洽称朕意焉【武德九年六月】

太上皇崩命皇太子知军国事诏

朕以不天夙罹偏罚假息旦暮分沉苦壤仰赖先皇慈恩鞠育爰自幼年至於成家未及弱冠仍属乱离翼奉义旗身当矢石克平多难任居藩屏遂复委以万几膺兹景命祇惧虚薄弗克负荷日夜兢兢不遑寧晏加以气患屡幸九成晨昏定省废於朝夕今岁停行尽行养礼不谓殃罚深重太行崩背号天叩地无所逮及伏奉遗诏追迹汉文以日易月降其常期顾命之旨诚不可违然三年之丧自天子达殷周以来罔弗遵用汉文变古有乖前式但慈颜日远忻謁无由俯就之文理即遵奉然朕之情切不可抑荼毒之心何可堪忍皇太子承乾年过志学秉性聪敏频年治国理务允谐今欲於东宫平决朕得尽哀庐室终其丧纪望羣公卿士股肱王室兴言及此唯增哽絕朝多君子恕朕哀心【贞观九年五月】

太宗征辽命皇太子监国诏

朕以寡薄君临区夏奉神祇之永命当亿兆之重责宵衣旰食忧六宫之未安寒心销志惧一物之失所矜况僻远豺狼纵毒元恶尚稽乎天罚遗黎久於坑穽朕是以发自瀟澗言巡辽碣命元戎以先驱播凯泽於遐裔省方之务既劳於躬亲监国之重允属於储贰皇太子治温文表德睿哲日跻仁孝之诚彰於温清弦诵之美着於胶庠礼义既茂徽猷弥远委以赏罚之权任以军国之政详诸前载实惟令典发定州巡辽左之後宜令太子治监国其宗庙社稷百神咸令主祭军国事务并取决断【贞观十九年正月】

太宗破高丽回怡摄命皇太子决断机务诏

朕粤在渺年时逢道丧怀生之类尽涂原野是用疚心疾首攘袂救焚以战場为俎豆以戎戈为章服夕不遑寧思济四方饥不及飡推移一纪幸赖上玄幽赞下土宅心忝承嗣历励精求政蠲百王之积弊振千纪之颓纲旰食宵衣百龄行半泊乎至道方泰荼毒遽侵自九年以来亟罹哀恤又属高丽逆乱毒被韩夷微物不安无忘隐惻遂复躬行吊伐远涉遐荒时历暄寒体亲风雨虽复靖氛海外有慰深衷久倦征辽乃多虚弊方今兆庶殷阜六合廓清垂拱无为允在兹日而皇太子某令德远彰所有几务并可断决百辟卿士咸宜受其节度朕当亲调五药暂屏万几三两月间且自怡摄【贞观二十年三月】

高宗命皇太子领诸司启事诏

东台贰极之基道光於上嗣贞国之本事表於元良故能创北摇之风敬东序之业功少海而逾润浮前曜而增华皇太子弘寢门标美壽街腾懿三善夙茂瑜佩以之含饴四学早优班翰以之凝映正以年在冲幼未从监抚虽调护方勤助琢磨之器而稼穡靡喻爽德教之途然为政之方义资素习宜令皇太子弘每五日於光顺门内坐诸司有奏事小者并启皇太子主者施行

则天太后命皇太子监国制

鸾台多难兴王殷忧启圣萧墙之祸自古有之朕以虚寡宿承先顾社稷宗庙寄在朕躬亲理万几年逾二纪幸得九玄垂祐四海乂安何尝不日昃忘食夜分辍寝战战而临宝位??而握圣图忧百姓之不寧惧一物之失所久亲庶政勤倦成劳顷日以来微加风疾逆竖张易之昌宗兄弟比缘薄解调链久在园苑驱驰锡以殊恩加以显秩不谓豺狼之性潜起梟獍之心积日包藏一朝发露皇太子显元良守器纯孝奉亲知此衅萌奔卫宸极与北军诸将戮力齐心剿扑凶渠咸就梟斩斯乃天地之大德幽明所赞叶者乎岂惟朕躬之幸抑亦兆庶之福朕方资药餌冀保痊和几务既繁有妨摄理监临之寄属在元良宜令皇太子显监国百官总已以听朕当养闲高枕庶获延龄可大赦天下【神龙元年正月】

睿宗命皇太子监国制 张说

维天生人牧以元后维王立国贰以储君将以保绥家邦安固後嗣者也朕纂承鸿业钦若宝图夜分不寐日昃忘倦茫茫四海惧一心之未周蒸蒸万方恐一物之失所虽卿士竭诚守宰宣化?怀庶域仍未小康皇太子隆基仁智因心温?成德深达理体能辨皇猷宜令监国俾尔为政其六品以下授官及徒罪以下并取处分【景云二年二月】

允皇太子奏让政事诏

朕?临宸极嗣守丕图承九服之康寧当二仪之交泰眚然汾水愿遂放勋之游皇太子讳孝德茂於周储?慎超於两汉翼宣景化允辅朕躬顷以宇宙事殷宗社事重委以几务叶赞谋猷志切承师情殷问道夏弦春诵心存德艺威刑庆赏罔不当仁循省奏章嘉而不夺【景云二年四月】

明皇命皇太子监国亲总师徒东讨诏

诏曰通三立极正维之业大明两作离继照之功博是以贞我万国必在元良弼予一人归之上嗣将寄丈人之律实资长子之师亦既戒严当除羣慝皇太子亨仁明植性孝友因心稟上德之粹灵宅中和之正气?敬之?岂伊桥梓刚柔之适无取韦弦韞公忠而事君总文武而行已既不絶驰之美可称问膳之勤心以三善之明助百揆之务迺安远肃天平地成属凶险负恩称兵向阙人神共愤命尔抚军将徼福於宗祧以保安於社稷凭天之德何向不济顺人之心所战必尅庶清彼氛沴以寧我国家宜令太子监国仍即亲总师徒以诛叛逆取今月二十三日先务所司准式务从省便无使劳烦布告遐迩咸令知悉【天宝十四年十二月】

肃宗命皇太子监国制

门下天下之本属於元良四方之明资其继照是有传归之义必膺监抚之重克广前烈与人守邦非君父之独亲俾生灵之同戴朕号慕弓剑寢居縗絰顷以疾苦未能康寧残寇犹虞中原多垒军国大务理须参决乃眷?鬯共承宗祧皇太子豫天纵聪明日跻德业中兴締构已有大功问安内寝占九国之梦制胜戎阃高五官之才时方艰难礼在諒闇其以庶政委之元

子宜令权监国又以上天降宝献自楚州神明告历数之符奎璧定妖灾之气总集瑞命祇承鸿休因以体元叶於五纪其元年宜改为宝应元年建巳月改为四月其余月并依常数仍旧以正月一日为岁首受兹福应行以升平因日月之重光布云雨之渥泽其天下见禁囚徒罪无轻重并已发觉未发觉已结正未结正四月十五日昧爽以前一切放免左降官宜量移近处流人即一切放回有司更不得轻有类例条件其楚州刺史并出宝县官及进宝官等量与进改随进宝官等典倅各量与一官宣示中外咸知朕意主者施行

司徒兼中书令【阙】户部侍郎同中书门下平章事兼知中书事臣元载宣德郎检校中书舍人臣杨绾奉行特进行侍郎上柱国韩

国公臣晋卿【阙】银青光禄大夫行黄门侍郎同中书门下平章事臣遵庆朝请大夫守给事中臣液等言臣闻明两作离所以照天下游雷为震所以贞万邦故书美元良易昭?鬯伏惟皇帝陛下圣德广被仁风大洽匡复宗社弘济艰难孝道纯深圣怀罔极居忧致毁恭默何言伏惟皇太子承累圣之资禀自天之训问安有礼无阙三朝保大成功已申七德是命守邦之重允彰知子之明况神其告符天不秘宝克昌景命必静妖氛岂谢金滕启翌日之期玄符告彝伦之叙是故统元立极复旧惟新因瑞以表年顺人而定嗣宥过无大囹圄皆空俾人迁善遐荒必被休徵昭其灵贶官吏沐其鸿私臣等叨侍轩墀?承典礼感戴之极倍万恒情无任恳欸之至请奉制付外施行谨言

顺宗命皇太子勾当军国勅

勅朕承九圣之烈荷万邦之重顾以寡德涉道未明?恭寅畏惧不克荷常恐上坠祖宗之训下貽卿士之忧夙夜祇勤如临於谷而积疚未复至於经时怡神保和常所不暇永惟四方之大万务之殷不躬不亲虑有旷废加以山陵有日霖潦踰旬是用警於朕心思答天戒其军国政事宜权令皇太子纯勾当百辟羣后中外庶僚悉心辅翼同底於理宣布朕意咸使闻知【永贞元年七月】

穆宗命皇太子检校军国勅

勅朕获嗣祖宗祇荷重器常恐失坠若?泉谷而万务所系忧勤是切宿疹在体不遑自安阳气歊蒸沉恙复作不能日临庶政亲领万几皇太子湛睿哲温文孝敬明敏其军国政事宜权令检校百辟卿士中外臣僚宜竭乃心辅我元子同底於道以寧邦家宣布朕意庶使知悉【长庆四年正月】

文宗立颢王为皇太弟勾当军国勅

勅朕顾以眇身获承丕构严?寅畏十有五年列圣鸿猷朕岂能荷涉冰匪惧馭朽非难虽宇内小康而大道犹郁方自砥砺期臻洽平天不祐予夙婴疾疹政虑多阙心靡遑安近者凝沍所侵久而寢剧臣僚爱我内外一心祷祀毕为药石备至亟换旬朔有加无瘳惧不能躬总万几

日厘庶政稽於古训谋及大臣用建亲贤以贰神器亲弟潁王玮朕昔在藩邸常同师训动成仪矩性秉寬仁俾奉昌图必谐人欲可立为皇太弟应军国政事便令权勾当百辟卿士中外庶臣宜竭乃心辅成予志陈王成美先立为皇太子以其年尚冲幼未渐师资比每念重难不行册命回践朱邸允叶至公可依前复封为陈王呜呼万务不可以久旷万方不可以乏统惟义所在朕不敢私宣布中外咸令知悉【开成五年正月二日】

武宗立光王为皇太叔勾当军国勅

勅朕以微眇获守宗祧祇荷鸿休惧不克济乾乾夕惕若涉春冰旰食忘疲宵分假寐而阳和布候同陰交争寒暑所侵乖於摄理忽婴疾疢羸已经时渐觉衰羸药餌未效臣僚爱我中外叶心祷祝毕为针石备至皇子冲幼未经师资军国事重须选贤德稽於训典谋及大臣用建明哲以贰神器亲叔光王怡宜改为忱植性忠孝翼翼小心礼乐生知聪明天纵温文敏裕博厚寬仁言必依经雅符於诗礼动不违矩式合於典谟俾奉丕图必惬人欲可立为皇太叔应军国政事便令权勾当百辟卿士中外庶官宜竭乃心辅成予志呜呼万几不可以久旷兆人不可以乏统惟义是守朕不敢私宣布中外咸令知悉【会昌六年三月二十一日】

宣宗立郢王为皇太子勾当军国勅

勅朕以寡昧获承丕构洁己以奉九庙恭己以临兆人宵旰在怀罔敢暇逸而忧劳所迫蒸暑或加疾恙未瘳既踰旬朔万几繁重不能躬亲询於大臣稽以古训永惟负荷之重思建储贰之贤用举徽章式固大本长子郢王温宜改名漼濬哲天纵孝敬日跻秉德不回出言可法英姿齐圣粹厚而恭道叶继明义符立长可以贰於神器增辉前星宜立为皇太子权勾当军国政事咨尔三事百辟内外臣僚宜协乃心敬辅元子罔违於道俾致时雍布告遐迩咸令知悉【大中十三年八月九日】

懿宗立晋王为皇太子勾当军国诏

勅曰朕守大器之重居兆人之上日慎一日如履如临旰食劳怀寢兴思理涉道犹浅至化未弘而摄养乖方寒暑婴厉实有虑於阙政且无暇於怡神恙未少瘳日以寢剧万务繁综须有主张考之旧章谋於列辟思阐鸿业式建皇储第五男普王俨改名僊孝敬温?寬和博厚日新令德天纵英姿言皆中规动必由礼俾崇邦本允洽人心宜立为皇太子权勾当军国政事咨尔中外卿士洎於腹心之臣敬保胤子辅成予志各竭乃心以安黎庶布告中外知朕意焉【咸通十四年七月十七日】

僖宗立寿王为皇太弟知军国诏

门下朕幼荷丕构夙夜不遑盖以三百年之鸿基十七圣之大业守文重事偃武贞期惟惧冲人不克页荷果致干戈四处寇盗连年再省藩维两违陵庙上媿高祖太宗之締构下慙中外羣后之匡扶既积殷忧俄成疾疹而上天降祐中道获痊万乘还宫六龙挽驾御端门而肆赦

閱諸夏而駿奔雖有愧中興而克全舊物繫爾中外方俟報功寧期瘡疾未瘳尚嬰沉痾徒思勿藥詎報有徵腴理是加連綿莫療永惟八方之大萬務之殷既不躬親固當壅滯朕親弟壽王杰天資穎悟生稟溫文孝友通於神明仁愛格於上下必能體朕憂惕濟我艱難用叶和平得就頤養宜冊為皇太弟知軍國政事咨爾內外大臣羣方庶尹悉宜听監國處分尽心輔戴寧國安人酌變從宜同底於理布告天下咸使聞知【光啓四年三月六日】

昭宗命皇太子監國制

門下朕以眇身祇膺大宝十有三載懼不克勝上荷祖宗之靈托於兆人之上虛受謙益每勵於勤示儉守文靡忘其宵旰而乃兩經播越荐興兵革生類莫躋於仁壽理道未致於洽平尚賴左右大臣奠獎侯伯共戡多難歸復神州豈我眇冲拯此艱運念高祖睿宗玄宗順宗或經多難或苦沉痾遂厭萬几授於令嗣是使進退無爽孝慈兩全人心盡服其至公天性克彰於其美近者忽嬰疾疹旦夕未瘳雖思養襟靈而亦循典故皇太子裕溫有立和粹積中蘊孝悌以性成稟聰知而夙慧動惟樂義進則思賢必能廣繼絕之心副傳歸之命萬几至重不可暫闕宜令皇太子裕監軍國事咨爾中外匡弼將相卿士輔朕元子永孚於休凡厥庶務悉宜听監國處分布告遐邇當體朕意主者施行【光化一年十一月六日】

何皇后立輝王為皇太子監軍國令

門下我國家化隋為唐奄有天下三百年之盛業十八帝之耿光聖上自纂丕圖垂將二紀雖勤無怠屬運數多艱致寰宇之未康觀兵戈之屢起賴勲賢叶力宗社安豈意宮闈之中禍亂忽作昭儀李漸榮河東郡夫人裴貞一等潛為逆節輒肆凶謀傷疾既深久及朕革萬几不可以久曠四海不可以乏君神鼎所歸頃有纂紹輝王祚幼彰岐嶷長實端貞哀然不羣予所鍾愛必能克奉丕訓以安兆人宜立為皇太子仍改名祝監軍國事於戲孝愛可以承九廟儉可以安萬邦無樂逸游用寧寰宇百辟卿士佐茲冲人揚我太宗之休烈主者施行【天佑元年八月】

傳位

神堯傳位皇太子詔

乾道統天文明於是馭歷大宝曰位宸極所以居尊昔在勲華不昌厥緒揖讓之禮旁求歷試三代以降天下為家繼體承基流朔相襲故能孝飡宗廟卜世長遠貽慶後昆克隆鼎祚朕膺圖受理握國闡極大拯橫流載寧區夏然而昧旦丕显日昃坐朝馭朽兢懷履水在念忱勞庶政九載於茲今精華已竭耄期倦勤久懷物表高蹈風云釋累遺塵有同脫屣深求閑逸用保休和皇太子世民早契禎符夙彰奇表天縱神武智蘊深機自云雷締構霸業伊始義旗之舉首創成規京邑克平莫非其力及皇極已建天步猶艱內發謀猷外清氛祲英圖冠世妙筭窮神伐暴夷凶無思不服薛舉負西戎之衆武周引北狄之兵蝟起蜂飛假名竊號元戎所指折首傾巢王世充藉府庫之資凭山河之固信臣精卒承間守險建德因之同惡相濟金鼓才振

一纵两擒师不逾时戎衣大定夷刘閔於赵魏覆徐郭於谯兖功格穹苍德孚宇宙雄才宏略振古莫俦造成大唐繫其是赖既而居中作相任隆羣后百揆时总三阶以平地居元良实惟国本万邦咸正庶兆乐推晷纬呈象休祲允集华夏载伫讴讼知归今传皇帝於某所司备礼以时册授公卿百官四方岳牧爰及长吏下至士民宜悉祗奉以称朕意夫政惟通变礼贵从宜利在因民义存适要条章法度不便於时者随事改易勿有凝滞昔汉祖拨乱身定大功羣臣推奉光宅帝位而事父资敬五日一朝备礼尊崇称号太上朕方游心恬淡安神玄默无为拱揖宪章往古称之为仪一準汉代庶宗社之图申锡无疆天祿之期永安勿替布告天下咸使知悉【武德元年八月】

神尧命皇帝正位诏

书曰知人则哲惟帝难之易曰通变则久使民不倦故太伯端委周道以隆东海就国汉祚方永立权致治可不然乎朕世济缙衣家传鼎鼐佐魏匡周勤劳王室有隋御历地居戚里常以补天在虑纳揆为心大业道丧皇极如毁倾维折柱天下分崩涂炭纳隍黔黎殆尽顾兹九有锋镝纵横静念一匡计无所出世民幼怀大度性合天道蕴经纬之奇才抱汤武之宏略深谋秘策沃朕拯溺之心壮志雄图起予救焚之志因其感激益广经纶纠合义师投袂而起车反於平阳之郊剑及於孟津之会元戎所至冰销雾卷曾未浹旬廓清京邑定非常之业建不世之功三古以来未之闻也朱旗西指则仁杲丧元白羽东临则世充泥首摧武周如拉朽收建德若拾遗至於黑闥逋诛圆朗小丑三捷七擒不可胜计一人之力冠今超古暴之遐迹岂待昌言以建成嫡长冀其养德日就不谓罔思友于忌能毁善谗言屡发始至铄金赖天启朕心宗社降福密悟凶邪指麾殲殄朕愧受浸润深念元功乃敬授帝图先天传政惧其溢满骄上未称三灵之心纵欲肆情不恤万方之重朕故仍居紫极处之肃成或察其复礼观其齐政露往霜来四载於兹矣比闻思我王度克艰克难昧旦丕?去奢来泰朝夕视膳蒸蒸之性日严仄景忧民翼翼之情愈笃南越献贄北狄欵关四海宴然五兵偃戢招君章之党止用天书屠师都之城无亏寸刃公卿辑睦远迩义安金鼓絶於疆場玉镜悬於亿兆尽善尽美吾无间然匪天佑之孰能至此令月吉辰风调雨顺朕俯观人事仰答穹昊自当养性便宫使其正居宸极宜令有司具礼务在周备朕得脱屣高蹈拟迹於轩辕授历传玺爰属於夏启大宝既固卜年惟永付托有所何乐如之百辟卿士等或晋阳徒御同披荆棘或幕邸故吏早预艰难至以德举言扬进忠显効保乂社稷天平地成惟当带砺山河与国休戚可以悉心匡弼无党无偏罔或隳哉替尔丕绩善事元首称朕意焉【武德九年八月】

睿宗命皇太子即位制 贾曾

朕以寡昧?奉鸿休本殊王季之贤早达延州之节昔在圣历已让皇储之尊爰暨神龙终辞太弟之授岂惟衣冠所睹抑亦兆庶咸知顷属国步不夷时艰主幼大业有缀旒之惧宝位深坠地之忧议迫公卿遂司契象日慎一日已至於今一纪之劳勤亦至矣万方之俗化渐行矣将成夙愿脱屣寰区昔尧之禅舜惟能是与禹以命启匪私其亲神器之重允归公授皇太子某有大功於天地定阽危於社稷温文既习圣敬克跻委之监抚已逾年岁时政益明庶工惟叙朕之知子庶不负时历数在躬宜陟元后可令即皇帝位有司择日授册朕方比迹洪古希风

太皇神与化游思与道合无为无事岂不美欤三公百寮宜识朕意【延和元年七月】

睿宗令明皇总军国刑政诏

大宝之尊谅殊於为已神器之重必在於与能自昔兴王率由斯道我国家运光五圣业盛百龄大赉合於人心淳风偃於区外而道不恒泰时更小屯朕以菲薄属兹多难抑让王之宿志顺公议於羣情丕业既康天保斯定皇帝神武攸纵睿哲克跻安宗社於缀旒拯生人於在溺用遵旧典令总朕师夙夜在勤刑政益理昨者奸臣构衅窃犯禁闈凶党布於萧墙飞变闻於惟辰朕虑深仓卒爰命讨除皇帝遂与岐王范薛王业等励兹孝心率彼义勇戮鲸鲵於阙下扫欃枪於天路元恶大憝罔不伏诛人神用康功业弥广信可总璿衡之大政守家国之鸿绪能事备矣朕又何忧自今以後军国刑政一事已上并取皇帝处分其岐王范薛王业宜各实封一千户朕方高居大庭?怀汾水无为养志以遂素心凡百卿士泊於黎庶宜体朕怀各尽臣节布告遐迩咸使闻知【先天二年七月】

明皇令肃宗即位诏 贾至

勅帝王受命必膺图籙上叶天道下顺人心不可以智求不可以力取是故我国家之有区夏也乾符叠委人瑞荐臻土应其德山呼其祚高祖当宝运太宗定鸿业高宗寧蒸黎中宗复旧绩睿宗弘至理朕?五圣之谟训师三代之淳朴常以道德为念不以富贵为心爰自弱龄即尚玄默属神龙之际邦家中否是用愤发扫除欃枪翼戴先皇再正宸极盖宗庙是为岂朕私躬哉先帝以朕有戡难之功命朕掌主鬯之任辞不获已遂践皇极聿来临御垂五十载常思我烈祖玄天之道保其清静之宗伊万方事殷或日昃不暇食昔尧厌倦勤尚以禅舜高居汾阳况我元子某睿哲聪明恪慎克孝才备文武量吞海岳付之神器不亦宜然今宗社未安国家多难其英勇雄毅摠戎专征代朕忧勤斯为克荷宜即皇帝位仍令所司择日宰相持节往宣朕命其诸礼仪皆准故事有如神祇简册申令须及者朕称诰焉衣冠表疏礼数须及者朕称太上皇焉且天下兵权制在中夏朕处巴蜀卒应则难其四海军郡先奏取皇帝进止仍奏朕知皇帝处分讫仍量事奏报寇难未定朕实同忧诰制所行须相知悉皇帝未至长安已来其有与此便近去皇帝路远奏报难通之处朕且以诰旨随事处置仍令所司奏报皇帝待克复上京已後朕将凝神静虑偃息大庭纵姑射之人绍鼎湖之事於戏禅让之礼圣贤高躅前代明王非不慕之皆享祚短促而不暇也唯唐虞灵长能擅厥美俱革命易姓宗庙失尊非一其心万古不易之道也朕之传位有异虞典不改旧物其命维新奉禋祀於祖宗继雍熙於宇宙布告亿兆咸使闻知【至德元年八月十六日】

肃宗命皇太子即位诏 杨綰

於戏奉天地者是称大宝承宗庙者必在元良吾以薄德纂承丕绪今以忧劳所积遘疾弥留用申顾命诫尔元子尔性稟生知幼有明德蒸蒸之孝言必因心温恭睿哲允文允武往在西土爰讨凶渠命尔总戎克宣王略收复中夏唯尔之功遂昇以储闈将中我鸿业尔有令闻万方宅心吾大渐之後即宜膺宝位夫天下至广神器所重丕承累圣之德?奉大中之道必当任

贤勿贰去邪勿疑以慈惠为心开谏诤之路兢兢业业无怠无荒呜呼戒之无替厥命

顺宗命皇太子即位诏

勅惟皇天佑命烈祖诞受方国九圣储祉万邦咸休肆予一人获纘丕业严?守位不遑暇逸而天祐不降疾恙不瘳将何以奉宗庙之灵展郊禋之礼畴咨庶尹对越上天内愧於朕心上畏於天命夙夜祗栗深维永图一日万几不可以久旷天工人代不可以久违皇太子纯睿哲温文寬和慈惠孝友之德仁爱之诚通於神明格於上下是用举皇王至公之道遵父子传归之制付之重器以抚兆人必能宣祖宗之重光荷天地之休命奉若成宪永绥四方宜令皇太子即皇帝位朕称太上皇居兴庆宫制勅称诰所司择日册礼布告中外令知朕意【贞元二十一年八月】

顺宗传位皇太子改元诏 郑絪

门下天下者传归於子前王之制也钦若大典斯为至公式扬耿光用体文德朕获奉宗庙临御万方降疾不瘳庶政多阙乃命元子代予守邦爰以令辰光膺册礼宜以今月元日册皇帝於宣政殿仍令检校司徒平章事杜佑充册使门下侍郎平章事杜黄裳充副使国有大命恩俾惟新宜因纪元之庆用覃在宥之泽宜改贞元二十一年为永贞元年自永贞元年八月五日昧爽已前天下应犯死罪特降从流流罪已下各减一等布告中外咸使闻知

何皇后命皇太子即位令

予遭家不造急变爰臻祸生女职之徒事起宫奚之輩皇帝自罹锋刃以至弥留不及顾遗号恻徒切定大计者安社稷纂丕国者择贤明议属未亡人须尔建长策承高祖之宝运繫元勲之忠规仗尔股肱以匡冲昧皇太子祝宜於枢前即皇帝位其哀制并依祖宗故事中书门下准前处分於戏送往事居古人之令范行令报旧前哲之格言收淚宣布言不能喻【天佑元年八月】

唐大诏令集卷三十

卷三十一

钦定四库全书

唐大诏令集卷三十一

宋 宋敏求 编

皇太子

纳妃

纳苏亶女为皇太子妃诏

开元十九年皇太子纳妃制

开元二十一年皇太子纳妃勅

令两京选皇太子妃勅

册妃嫔

册皇太子苏妃文

册皇太子韦妃文

册章怀太子张良娣文

退让

降太子忠为梁王诏

废退

废皇太子承乾为庶人诏

废皇太子瑛为庶人制

追复

息隐王追复皇太子诏

赠废太子承乾恒山愍王制

赠重俊皇太子制

纳妃

纳苏亶女为皇太子妃诏

配德元良必俟邦媛作俪储贰允归冠族秘书丞苏亶长女门袭轩冕家传义方柔顺表质幽闲成性训彰图史誉流邦国正位储闈实惟朝典可皇太子妃所司备礼册命主者施行【贞观年】

皇太子纳妃制

龙楼内范辅成元良之德凤邸中闱克谐乐善之美自非门地兼茂容则事修何以式副好逑允兹华选薛绹第六女窦希瑊第四女戚里承休渭阳传庆婉顺成性柔闲有容言必图史之规动遵珩佩之节惠问兰郁心清玉映足以俪青宫之宠伉朱邸之义式昭阃训用光嫔则姝女可皇太子妃瑊女可庆王妃仍令所司备礼至都册命【开元十九年十月】

皇太子纳妃勅 张九龄

勅礼有谨於初义亦重其本凡是姻媾且犹正於人伦况在元良更将承於宗祀皇太子鸿储副是属仁孝自然爰从吉辰式备嘉礼上事下继君子重之言告言归朕岂无慰非独在予之庆宜申与衆之泽天下囚徒死罪特宜免死配流岭南远处流罪降至徒徒以下罪并宜释放其造伪头首勾合知情受伪人等罪虽徒流仍便隶为百姓至彼勿许东西诸道征行人家及鰥寡孤独委州县长官检校矜放差科使安其业中间有不支济者量事赈给仍量助其营种长安万年两县百姓及今月当上彊骑卫士杂匠掌闲幕士驾士工人乐人供膳官马主食弓?并免其家今年地税三卫细引飞骑监上门长及礼生有职掌者各减一年劳在京文武官九品已上见在外官因公使及当上在京新除五品已上外官未辞并致仕官朝朔望者各赐勲一转东宫官九品已上及诸有司缘礼会祇供官等更加勲一转五礼使兵部尚书兼中书令萧嵩特封徐国公礼会使黄门侍郎同中书门下平章事韩休特与三品阶礼会使少府监冯绍正赐紫金鱼袋诸副使及判官更加勲一转礼官宾者夹侍官及孔目官使典主旌节等择日优与处分仗内马家内侍省级使教坊音声人缘太子礼会祇供者各赐勲一转皇太子舅尚辇奉御赵迴遵特与三品仍改与三品官前右威卫骑曹赵迴进特与五品仍改与五品官皇太子侍读侍书等各加一阶其太子谕德潘肃特与五品太子妃兄通事舍人薛愿特与五

品仍改与五品官兄吏部常选怱与五品仍与五品官今日应预会官等各节级赐物即宜领取晏慰者所以宣其情愿锡者所以将其意公卿百辟庶知朕心【开元二十一年五月二十一日】

令两京选皇太子妃勅

冢嗣其良家国之庆人伦之始宜娶元妃虽吉事尚须待年而嘉耦宜深善教志於先定冀及义方属在德门遂成好合在东京委裴度西京委宰臣及申旨谕令本宗家长举言十岁已来嫡女及妹侄孙女两月内送中书门下务令宜称无有不尽【开成元年八月】

册妃嫔

册皇太子苏妃文

维贞观年月日【云云】於戏惟尔秘书丞苏亶长女族茂冠冕庆成礼训贞顺自然言容有则作合春宫冀协正善曰嫔守器式隆万叶备兹令典抑惟国章是用命尔为皇太子妃往钦哉

册皇太子韦妃文

维开元二十六年岁次戊寅七月戊辰朔十二日乙卯皇帝若曰於戏天下之本实在於元良人伦之瑞是先於内则咨尔忠王妃韦氏门承鼎盛质稟贤和勲中环佩之节言成图史之训克明女宪无假於师氏能勤妇道自合於国风固可以齐体储位正位妃壺伫闻六行之美以引三善之德是用册尔为皇太子妃往钦哉尔其祗服宠章光膺茂典协和以逮下?俭以率先式昭徽猷永保祚胤可不慎与

册章怀太子张良娣文 沈佺期

维景云二年岁次辛亥十月壬寅朔十日辛亥皇帝若曰於戏咨尔故章怀太子良娣张氏家承閼閼世袭徽猷法度有章言容克备始应良选入奉元储柔规缉於上下淑问扬於中阍恩絶宾帝七日无归义申从子百龄先谢言念窀穸悯悼良深追崇徽号典故斯在是用命某官某乙册尔为章怀太子良娣魂而有灵膺兹宠数

退让

降太子忠为梁王诏

诏曰昔泰伯高让载昌姬宗东海之藩克隆汉祚故能业传端委作锡龟蒙飞茂实於前英播清虚於远叶皇太子忠分景扶木稟庆大津早加宠树礼絶羣后比因朝见屡陈撝挹论嫡庶

之分守贵贱之礼以贵则皇后有子以贤则不敢当仁前後数四辞情恳恻义高旷古道迈前修宜遂雅怀以成厥美可封梁王食邑二万户持节都督梁洋集璧四州诸军事梁州刺史仍别食二千户赐物二万段甲第一区梁州仍置都督府【显庆元年正月】

废黜

废皇太子承乾为庶人诏

诏曰肇有皇王司牧黎庶咸立上嗣以守宗祧固本忘其私爱继世存乎公道故传季历而树姬发隆周享七百之期黜临江而罪戾园炎汉定两京之业是知储副之寄社稷繫以安危废立之规鼎命申其轻重详观历代安可非其人哉皇太子承乾地惟长嫡位居明两训以诗书教以礼乐庶弘日新之德以永无疆之祚而邪僻是蹈仁义蔑闻踈远正人亲昵羣小善无为而不背恶无大而不及酒色极於沉荒土木备於奢侈倡优之技昼夜不息狗马之娱盘游无度金帛散於奸慝捶楚遍於仆妾前後愆过日月滋甚朕永鉴前载无忘正嫡恕其瑕衅倍加训诱选名德以为师保择端士以任宫僚犹冀中人之性可以上下蟠木之质可以为容愚心不悛凶德弥着自以久婴沉痾心忧废黜纳邪说而违朕命怀异端而疑诸弟恩宠虽厚猜惧愈深引奸回以为腹心聚台隶而同游晏郑声淫乐好之不离左右兵凶战危习之以为戏乐既怀残忍遂行杀害然其所爱小人往者已从显戮谓能因兹改悔翻乃更有悲伤行哭承华制服博望立遗刑於高殿日有祭祀营窀穸於禁苑将加改葬赠官以表愚情勒碑以纪凶迹既伤败於典礼亦惊骇於视听桀跖不足比其恶行竹帛不能载其罪名岂可守器纂统承七庙之重入监出抚当四海之寄承乾宜废为庶人朕受上命为帝作人父母凡在苍生皆存抚育况乎冢嗣寧不锤心一旦至此深增慙叹【贞观十七年四月】

废皇太子瑛为庶人制

朕承天命嗣守先业不敢失坠将裕後昆所以择元良策守器为国之本岂不谓然太子瑛幼而鍾爱爰加训诱亲师之范所望日新年既长成与之婚冠而妃之昆弟潜构异端顷在东都颇闻疑议所以妃兄薛愿流滴海隅导之诲之谓其迁善驸马都尉薛綉亦妃之兄也今又煽惑谋逆弟兄朕形之言愧於天下教之不改其如之何盖不获已归诸大义瑛可废为庶人鄂王瑶光王琒等自幼及长爰加抚育为择师资欲其顺而不率训典潜起异端及与太子瑛构彼凶人同恶相济亦既彰露咸引其咎孽由已作义在灭亲并降为庶人驸马都尉薛綉离间骨肉惑乱君亲潜通宫禁引进朋党元良於不友误二子於不义险薄之行遂成门风皆恶迹自彰凶慝昭露据其所犯合寘严诛言念琐姻用申寬典舍其两观之罚俾就三危之窜可长流瀼州百姓【开元二十五年七月】

追复

息隐王追复皇太子诏

诏曰昔戾园败德西都表其諡号楚英干纪东汉锡其汤沐斯皆屈邦国之禁申骨肉之恩故也息隐王地乃居长守器运初自貽伊戚?於祸难日月逾迈松檟成行朕嗣守鸿基??遗烈何尝不陟彼冈而靡覩瞻同体而疚怀恩备哀荣式加礼命可追复皇太子諡仍依前諡曰隐置陵令以下官并加户守卫【贞观十六年六月】

赠废太子承乾恒山愍王制 孙逖

門下理天下者必弘於在宥厚仁德者莫尚於追远故废太子承乾昔在先朝尝?深过因是殛窜至於沦没虽臣子之罪义则不私而骨肉之亲情则无絶况年代浸远典废宜追言念往时已申公葬将崇後命是锡王章式遵仍旧之封更表易名之諡可赠恒山愍王【开元二十四年】

赠重俊皇太子制 苏颋

門下朕闻曾氏之孝也慈亲惑於疑听赵虏之族也明主哀而望思历考前闻率由旧典重俊大行之子元良守器往罹构间困於谗嫉莫顾鈇钺轻盗甲兵有此诛夷无不悲惋今四凶咸服十起何追方伸赤暈之冤以紓其黄泉之痛可赠皇太子主者施行【唐隆元年六月二十五日】

唐大诏令集卷三十一

卷三十二

<史部,诏令奏议类,诏令之属,唐大诏令集

钦定四库全书

唐大诏令集卷三十二

宋 宋敏求 编

皇太子

追赠

邵王赠皇太子制

申王赠惠庄太子制

岐王赠惠文太子制

庆王赠靖德太子制

兴王赠懿太子制

齐王赠怀懿太子制

晋王赠悼怀太子制

册赠

节愍太子諡册文

惠庄太子册文

惠文太子册文

懿太子册文

哀册文

懿德太子哀册文

节愍太子哀册文

惠庄太子哀册文

惠文太子哀册文

惠宣太子哀册文

懿太子哀册文

昭靖太子哀册文

庄恪太子哀册文

罢祭

停官祭赠太子勅

追赠

邵王赠皇太子制

门下悼往兴哀事极於理义饰终追远礼着於经国故邵王重润渐履云霄分辉日月体谦之质蕴忠顺之诚爱敬尽於宫闱仁孝闻於区宇地居长嫡允膺崇树天不憖留奄随运往朕丕膺宝命廼眷承祧瞰朱邸而无从徯青方而结歆宜加赠典正位元储可赠皇太子所司备礼改葬主者施行【神龙元年二月九日】

申王赠惠庄太子制

德盛者必享休名道高者必膺殊典况人伦之重义切因心天属之深情殷追远故司徒申王撝叡哲聪明本乎天性温孝友挺自生知乐善好书清猷迈於两猷深仁厚义美化侔於二南可谓具瞻百寮仪型列辟朕将永康兆庶方自友于天不憖遗奄从薨逝永惟仁范哀恻纏绵用表非常之荣少寄天伦之戚可追赠惠庄太子宜令所司备礼就加册命陪葬桥陵【开元十二年十一月】

岐王贈惠文太子制

褒崇名器所以尊德也光昭典制所以飾終也況天倫之愛親親之至乎故太子太傳上柱國岐王範特稟聰明率由孝友好書不倦樂善無忘固已作則列藩儀型百辟方凭魯衛之政率流雍睦之風豈圖輔德???期殲良奄及想同氣而莫遂望驂駕而何追言念平生情深震恻宜加殊禮之命用寄孔懷之哀可追贈惠文太子所司備禮就加冊命【開元十四年四月】

慶王贈靖德太子制

追終悼往久着於國章考行易名匪私於天屬故司徒兼太原持節充河東道諸軍節度大使度支營田等使上柱國慶王保地居長嫡道茂中和愛在幼冲克光撫挹既着讓賢之美愈聞禮樂之風加之雕琢文艺周旋禮樂固力行以近仁亦因心而為孝自析珪祚土藩翰式崇授鉞分符權略斯遠年方在壯未虞夭喪疾瘵不救憫惜良深宜循加贈之典式寵元儲之位可贈靖德太子應緣喪葬一事已上宜并官供仍令太子少師韋絛充監護使京兆尹裴士淹充副【天寶十一年五月】

興王贈懿太子制

門下厚禮所以飾終易名所以表行況情鍾天屬寵及褒封載疇加等之美式備元儲之贈永懷軫念有惻彝章第十二子故興王僖肅慶璿源分華若木天資仁孝神假聰明河間聚書幼聞樂善之旨延陵听樂早得知音之妙頃以暫嬰沉瘵殆積旬时而資敬益彰穎悟逾爽愛親之戀言不間於斯須苦訣之辭事先符於夢寐顧惟至性深切深衷將祚土析珪載崇藩翰聞詩對易爰就琢磨方冀成立豈期天喪瑤英始茂遽摧落於當春隙駟俄迁忽沉淪於厚夜興言痛悼憫惜良深宜寵賁於青宮俾哀榮於窀穸可贈太子諡曰懿應緣喪葬所司准式仍令兼京兆尹劉晏充監護使少尹陶銳為副主者施行【貞元元年八月】

齊王贈懷懿太子制

夫褒善飾終王者常典況我友于之愛手足之親永言痛悼之懷用錫元良之命故齊王湊孕靈天宇擢秀本枝孝敬知於孩提惠懷洽於親愛將固磐石遂分茅社學探蚁術之精智有象舟之妙好書樂善造次不失其清規置醴尊師風雨不忘其至敬方期鮐菴以保怡怡天胡不仁殲我同氣念周宣好愛之分長痛莫追覽魏文榮樂之言軫懷無已繇是稽諸前典式展追榮特峻徽章表恩泉壤雖禮命之儀則爾而天倫之恨何摅遐想幽魂宜膺寵數可贈懷懿太子仍命有司擇日備禮追冊【開成三年正月】

晉王贈悼懷太子制

王者重統紀尊儲副所以上嚴國本祇叶禮經睦人倫以正邦典崇丕基而昭彝式其或德契元良思當追命道雖間於存歿義有表於哀榮仰惟旧章用摅憫志故開府儀同三司晉王普

先帝冢胤间气夙鍾孝敬发於岐嶷温仁形於襁褓翦珪分社光祝策於参墟锡土启藩假威尊於上党朕顷戡内难谬属与能以王齿在提婴事絕推让方期就傅谓致修龄既因犹子之义俾膺主鬯之选天不憖遗殲我本枝泣悼永往空余典礼嗟乐善而莫报顾十起而何追銜悲长恸此诚无极是用稽诸前训申我宿爱布曩怀於兹日告如在於幽灵式愴虚仪曷瘳深痛可贈悼怀太子仍令有司择日备礼追册【大和三年六月】

册贈

节愍太子謚册文

维景云元年岁次庚戌十月戊寅朔二十九日丙申皇帝若曰咨尔故皇太子重俊业隆继体才膺守器故辨日高视晋储防年遐吞汉两抚军监国皇基攸固齿胄问安圣图惟永顷以谗邪浸润恩礼踈薄外迫伊戾之谋中启骀姬之潛彼则凶计斯甚摇动元良尔乃诚心密运扫除悖德兴晋阳之甲以罪荀寅拥汉阙之兵而诛赵虏呜呼逆首虽殄余党未靖属投杼生疑乱兵旋及朕代天理物推亡固存近剿四凶?怀三善言徵备礼以慰冥魂银榜山门画堂泉室三年遂远上宾之馭不留千载犹生全节之名长在存着徽烈歿有余裕志业若此痛悼良深宜加宠号用旌不朽今册謚尔曰节愍太子魂而有灵嘉兹茂典呜呼哀哉

惠庄太子册文

维开元十二年十一月甲申皇帝若曰於戏夫縟礼所以饰情崇名所以表德义存追远爱洽因亲故司徒申王撝【阙】极稟灵邦家维翰体孝友以成性用淳和而合道沛猷受易率以鸣谦河间聚书时其好学加以出为方伯弘宣六条入登司徒大敷五教天则不愆奄薨於行留邸无期同輿遂远兴言哀痛震动於厥心夫先王演亲亲之恩春秋着加等之义上嗣之位饰终斯在今遣摄太尉侍中源乾曜持节册贈王为惠庄太子宜率茂典以永徽猷魂而有灵式昭哀贈呜呼哀哉

惠文太子册文

维开元十四年四月二十二日皇帝若曰於戏帝室之幹曷降年不永天伦之戚而因心有加饰以徽章孔怀之义也咨尔太子太傅上柱国岐王范孝友至性聰達多才乐善为词言行俱敏好学流誉经传悉通德既训於东宫化且行於南国而辅仁或爽倚福无稽奄忽迁殂震悼何及夫礼以情为体欲增追远之数行以名而尊是图褒德之轨故择兹茂典崇以上嗣言念逝者用申友于今遣工部尚书摄太尉卢从愿持节册王为惠文太子魂而有灵昭是哀贈

?懿太子册文

维上元元年岁次庚子冬十月戊午朔四日辛酉皇帝若曰於戏夫睦亲加等有国之彝训悼亡申恩中心之所切是以增其縟礼汉藩追鸾辂之荣备以徽章魏屏饰龙旗之贈兴言故典

感恻良深第十二子故兴王召庆袭紫庭凭华丹极温良质其性本孝友稟於天成加以神假聪哲身周艺美故方变乐眇音以洞微百家之书经月而成诵年虽在於髫髻学已该於典坟自位列三珪祚班五土緑车爰锡亟承疏邸之荣青社云封实属维城之望岂谓藏舟易往过隙难留顾兰坂而如昨痛梧宫之遂掩况幼有至性实由生知心惟爱亲歿不忘孝幽梦克申於告诀至恳能贯於存亡言念沦丧尤深悯惜是用叶兹纯德赠以元储夫?者行之先懿者文之美易名表称俾永徽猷今遣银青光禄大夫行中书侍郎同中书门下平章事集贤殿崇文馆大学士修国史上柱国姑臧县开国伯李揆持节册命为?懿太子申予至感贲尔宠光虽倚门之怀永銜酸於碣馆而告柩之礼庶延渥於泉扃魂而有灵昭此哀赠呜呼哀哉

哀册文

懿德太子哀册文 李峤

维神龙二年岁次景午夏四月甲戌朔二十三日景申懿德太子粹宫启自洛邑将陪窆於乾陵礼也廡衣夕陈俎奠朝设蜃辂俄軫龙旗按节皇帝嗟蚁庭之寝翕惜凤渚之韬篴抚万乘而怀国本绥六姻而悼乾将情无辍哀礼有加数刻纯懿於金版播芳声於玉牒其词曰灵命将兴元符是膺皇基茂立帝武丕承祥集画堂庆流朱邸棘天延颺桐圭备礼实惟天族载挺人英川宝岳秀虹晖霓精舞象得玄佩觴闻道刻舟敏遽牵衣慧早几神闇体理识宣资心韬锺律情含蔡蓍曰仁曰孝非训非师寛惠深博温良肃祇苞举六文网罗羣籍诗接楚彦赋延梁客淮国传骚云台对易乐善超羣多才掩昔乃崇匡卫实屏实藩乃列朝请为鸿为鹄扬声北路振彩西园仪表姬戚光辉舜门?事阒闐欢迎党族怡色玉润温词兰馥中外克谐亲疎允睦常德有裕间言无譌荣深出幸宠茂留中婉变羣辟调繆二宫陪輿泽厚锡马恩隆西蜀钦义南山向风礼縟天孙望高元嗣重海阙象前星虚位方辍须?行膺主器奄丧门轴俄摧隙驷呜呼哀哉凤下朝阳龙收暝光琼田灭彩桂苑沦芳国軫倾翰朝悲坏梁惟灵徵之寂寂怨天道之茫茫呜呼哀哉玄圣登期恩荣下贲爰命典策式昭名諡匕鬯虽崇粢盛不莅闔壤同戚具寮增歆呜呼哀哉筑恩台兮竟不旋还作室兮复何年访来人兮伤对日瞻云鹤兮感昇天惜明离之虚繇怅凤乐之徒悬怱银榜之留月泣铜楼之送烟呜呼哀哉司兆猷占掌图辨域挽铎初警帷幌既飭引文卫之邐迤度繁笳之凄恻纏永慕於青府结余酸於紫极呜呼哀哉辞交风之近甸出避雨之层峦望八水而遥集怀三川而顾难菱枯兮夏旱花落兮春残林野晦而天无色烟云愁而景欲寒呜呼哀哉税驾昭涂即宫下土执斧供事扬麾按部藏日兮山门埋灯於地户痛平生兮冥漠哀倏忽兮今古视不见兮听不闻天无晓兮夜无分同变化兮光陰尽配阳秋兮兰菊芬呜呼哀哉

节愍太子哀册文

维景云元年十月朔日子节愍太子梓宫自鄠杜粤某日将陪窆於定陵礼也蜃卫初引凤仙将远閼少海而不流赴穷泉而莫返皇帝怀副君之大义降犹子之深慈饰忠烈於逝者备哀荣以送之汉幄虚侍周墙肃事思台空筑幽埏永閼金相兮玉裕揆行兮旌能峻节兮无泯芳声兮有恒其词曰景云流祉白水贞祥祀及百代威加万方勃焉家国赫矣皇王帝子攸降乾

男以将迈德诞灵怀文抱质汉台占雨秦京近日敏对不羣能言罕匹艺该百变词含六律朝霞自举夜月常游醴荐推穆书成重邹典戎仙卫作牧神州是谓元子光膺孟侯少阳正位太学知道春诵夏弦尊师敬老荣承圭玉宠殷瑜佩三善不忘四章旋逮过阙则下入庙斯趋曰仁与孝终始不渝圣敬日跻温文岁广望高周副才优魏两用事有伦出言无党政成中外声溢天壤邪臣作蛊匹夫知愧不顾身游将夷国难忠义期仗猷谋是断获戾宫朝归魂霄汉白驹过隙苍蝇止藩水逝西沼霜凋北园鹤阙谁馭鸩里徒冤瞑目於此伤心诂论呜呼哀哉重日沦辉前星坠彩形神溘谢德音如在物是人非年移运改圣明延鉴徽章有待有待伊何庆逢开辟延鉴伊何恩隆典册即鸣凤之冈岭启占鸟之隧宅人辞中垒之桑鸟思平陵之柏地如伊水山连纪市嗟委化於仙期欲问安於神里五营成列万国銜酸挽铎朝喝旌麾晓寒指牵牛以南渡乘饮龙而北徼顾青舍兮非春掩玄扉兮大暮昔之来兮银榜铜楼今之往矣旷野荒丘冉冉兮辰促苍苍兮道悠惟声华与纯懿比金石而恒留呜呼哀哉

惠庄太子哀册文 张九龄

维开元十二年岁次甲子十一月丁巳朔二十四日庚辰司徒申王薨於行在所册諡惠庄太子旋殯於寢粤闰二月二十七日壬午将陪葬於桥陵之栢城礼也黼幕宵布羽纛宿设西序启攒南省成列皇帝深天伦之蹙崇后储之礼拟容卫於青宫申孔怀於朱邸爰命史氏於稽令则无俾直言不彰遗德其词曰昊天有命先后受之分王子弟藩卫京师克荷成宪罔不肃祗懿哉明哲诞惟纯粹宣慈日闻孝友天至道则昭合迹无自异性则生知学兼时习易微书远诗兴礼立德必有隣善如不及贵而能损重固难挹方伯出镇召南取斯司徒入掌郑武其宜义之所在政务克施物留遗爱事着成规西夏心人东征叶卜韡韡同辇皇图改服疾邁中路凶传左轂寧不慙遗奄锺斯酷呜呼哀哉昔在冲妙具惟兄弟四国并封五王均体游必连骑居则同邸各承命於含饴俱受经於置醴既荏苒而云迈属殷忧於将启实定祸於萧墙遂继明於云陛虽隔深宫之卫常洽家人之体曷徂谢以痛心感平生而流涕呜呼哀哉爰择茂典将崇上嗣表先圣之元良申友于之褒异纷鹵簿以徒设俨文物而空备彼神仪之如在乃羣悲之所萃周礼从祔汉莹是陪先远日而撰吉会同盟以送哀夜漏尽兮暗室扃庭燎残兮晓挽催既三接而徐进将一去而不回呜呼哀哉背朱门兮迟迟驰白骥兮騑騑野苍茫而助惨风萧飈而增悲离离兮素盖寂寂兮画帷遵旧途而何有览陈迹以如疑面都邑於不入侍陵寢兮有期惟光仪之永閤与昭代而长辞呜呼哀哉潜清辉於幽窆昭鸿名於美迹将在皇储之史岂伊诸侯之册播遗芬於兰桂传不朽於金石谅纪言之在兹庶德音之无斁呜呼哀哉

惠文太子哀册文 苏頲

维开元十四年太岁景寅四月乙酉朔十九日癸卯太傅岐王薨於洛册諡惠文太子殯正寝之西阶仲夏景申将祔於桥陵礼也晓陰北清魄月西照列铎挽以严鼓出轩除而减燎皇帝戚深天伦宠异天人追遣奠於将远动哀怀其若新震以贞位文以光諡爰召司存迺甄遗懿其词曰重玄之门唐系居尊五色之土岐封效古瑶图正位兄一弟二宝尊承庇帝三王四尝急难兮特询以事竟扶翼兮能竭其志其志伊何程才则多武以之靖文以之和勇超东牟思

夺东阿是曰其尔曷云其他覃訏守成忠肃鍾美克顺克比为臣为子河书聚学沛易穷理毫使露濡赋令云起出咨岳牧入慎邦纪鲁卫则侔武桓斯拟传於元嗣钦若端士往锡朱旗来朝紫微家人辑穆藩后增辉甘旨不同而不膳珍华不供而不衣楚谋或隐梁藉寧遣属巡岱以封还待升天而庆归猗那兮扬名於後於铄兮循业可久富贵兮於何不有闇忽兮曾莫之寿呜呼哀哉宵半分漏革传於奏天初辨时虑切乎思骏马连 而交使近臣骈命而挟医望君王兮何迟迟俯?檻兮犹若期至不至兮歎长辞莫悲兮惟此悲外皆罢辍兮内独涟洏岂吾季之在哉崇后储以諡之孝依乔岳仁本京师庄洎文兮畴能忍兹灵輶稍发清道徐按整承华之鹵簿愴德阳之宫观树陰陰於国门桥耿耿於天汉盈旧悲以回复蓄新哀以聚散?然嗣王若不胜丧惨天地之何心怨关心之已长夫俭之为德谦固其则存歿是膺惠文是徵存也高台深池之不竞歿也备物重器之不矜呜呼哀哉典册之有凭惠文之有称故奉先皇之松栢成太子之园陵呜呼哀哉

惠宣太子哀册文 韩休

维开元二十二年岁次甲戌七月庚申朔十日己巳故司徒薛王薨於洛册諡惠宣太子翌日殡於正寝之西阶粤八月二日庚寅将陪葬於桥陵礼也凉陰戒秋白露凝夜传哀挽於郊道俨虚容於池榭皇帝痛棣华之既凋覩兰坂而增歎抚彻奠以无及恨潜泉之永閤光於典册昇彼储嗣爰命史臣扬言其懿其词曰於昭帝系濬发玄裔建尧升唐自薛而王粤有成德遂荒东国大启土宇聿崇典则夫其秉灵在初迪哲惟濬惇敏秀铄淳龐淑慎谋謨以成蹈道而顺文英独越武烈惟振百辟式瞻五帝以训惟兹大贤克懋天秩为藩为屏是辅是弼保厘我邦家左右我王室沛献演易楚元说诗艺无不综学罔有遗分以宝玉建其旌旗出弘声政入赞雍熙咨尔公族是惟敦睦主曰介弟宠其车服俾侯於京怡怡弟兄穆以家人之礼崇其藩后之荣曷常不乐彼同輿却东平之归奏询其异政钦北海之能名将以天伦之爱可以昭於载籍友于之谊可以贯於神明宜其善有其庆祸无其胎享此眉寿祐其多才胡勿药以为疾逮弥旬而成灾躬为祷兮靡不至诚以精兮无不备走羣祀以累祈徵上医而毕泊苍黄而晦明未隔门忽而古今斯异呜呼哀哉神理无昧人寰已非想河洛其犹在望淮仙而不归悲由中而自切情限礼而相违怅丙舍之去远饰承华以增辉呜呼哀哉灵龟肇吉服马先路悼津门之永违遵河桥以直度笳哀洛阳之道旒靡咸京之树换忧欢於今昔变风景於新故呜呼哀哉夫行以諡尊恩由礼盛申备物以增饰?贞徽而独映俾重为善之名以彰有後之庆呜呼哀哉庭树槭以惊秋川波咽而不流历神臯兮望国寝背华宇兮归山丘流尘满兮虚榭暗緑苔生兮行径幽惟盛德与鸿烈亦天长而地悠呜呼哀哉

?懿太子哀册文

维上元元年太岁庚子六月己未朔二十六日甲申皇第十二子持节凤翔等四州节度观察大使兴王伉薨於中京之内邸殡於正寝之西阶粤八月丁亥册赠皇太子庙号?懿冬十有一月庚寅诏葬於长安之高阳原礼也鷲隧开封龙輶进轍陈祖载而就位严涂刳而成列皇帝哀玉林之閤景悯璿萼而罹霜瞻蜃綵而增恩怀?池而永伤考諡惟古褒崇有式爰诏史臣恭宣懿德其词曰维天祚唐累叶重光中兴景运再纽乾纲本枝建国磐石疏疆克开圣胤实曰

贤王骊源孕彩日干腾芳深仁广孝蕴艺含章秀发童年惠彰髫齿蹈礼知方尊贤叶旨对日流辨占风继美鲁卫後尘间平絶轨寇孽初构王师未班爰从襁褓载历难艰爱备中掖名崇懿藩居常禀训动不违顔礼及佩觿朝加分器胙土延渥登坛受帅璇室金箱文经武纬乐善为宝崇儒是贵潜哲外朗温文内深阅书成诵观乐表音五经在口六律谐心才优艺洽絶古超今蛇豕犹梗寰区未又总虑其真焚香演偈食去荤血心依定慧庶福邦家俾清凶秽霜露婴疾聪明害神沉痾始遭弥旷盈旬正虑无扰发言有伦在膏方亟问膳愈勤云物告徵星辰变象楚药无救秦医莫仗灵仪杳而上宾徽音邈其长往违旧邸於青社即幽陵於黄壤呜呼哀哉魂气夺兮去何之精灵在兮孝有思痛君亲之永隔托梦寐而来辞延桂宫而震悼贯椒壺而纏悲旌遗芳於碣馆贲新命於储闈呜呼哀哉先远戒候占龟献吉指鹑野而西临背凤城而右出天惨惨而若雾山苍苍而翳日扬薤挽之哀凄盼松楸之萧瑟罗乌伏以礼峻掩黄肠而室密望驰道而长辞赴幽途而永毕呜呼哀哉生为宠王兮宸爱所鍾歿追上嗣兮朝典斯崇昇玉笙於洞府閱银絜於泉宫金石惟固兮人生有终简册攸记兮德音无穷敢陈词以篆美庶永代而承风呜呼哀哉

昭靖太子哀册文 萧昕

维大历八年岁次癸丑正月乙亥朔十七日辛卯开府仪同三司元帥鄭王薨旋殯於内侍省二十七日甲午册諡曰昭靖太子洎十年岁在乙卯十二月庚申朔二十六日乙酉迁窆於万年县细柳之北原乃诏京兆尹黎干监护丧事展饰终之仪礼也呜呼哀哉穷陰肃烈煞景凝沍蜃辂方巾龙骖在御设庭燎以终夕扃攢途而即路皇帝悼贤王之不淑念爱子之云亡齐彭殤以理遣顾形影而神伤録旧勲於藩邸议新諡於太常睠承家於匕鬯追嗣位於元良爰命侍臣式纂遗芳其词曰维昔启土膺兹册命锡爵为王建封於郑梁国宠异鲁邦礼盛明哲在躬温良成性国步艰难遭兹师旅克生才艺允是文武乃拜元戎俾殲丑虜职思靖乱功期御侮守师律以殿邦振威声而先举问安内竖视膳寝門随肩明两顺色晨昏光辉棣萼友爱鵠原率礼不违人无间言招贤南楚爱客西园宗子维城王室以藩乐善未终沉痾斯起羣望并走衆鑒咸理有加无瘳兰销玉毁驰光度隙逝川閱水軫皇慈之恒化嗟国人之罢市呜呼哀哉畴庸未纪度德则优崇以徽号阐其谋猷善则可旌礼无不酬吉凶同域神理难求列前星之储位招甲观之灵旂撰日月以有时备涂刍之将命卜龜从吉辨方居正塋原霜若从阡雪映起寢庙之崇严制园陵之尊盛呜呼哀哉輶车发轫緹骑前旌祖載奠撤嘯笳哀鸣挽出离宫路回直城羽仪以列徒馭不惊越素滻以东指背东山而北征聯冈走以回抱远树靡而低倾对骊宫以立表依细柳以开营閼重扃於窆壤悲执紼於桓楹川杳杳以暝色野稍稍以寒声仰清芬之不泯实昭晰於鸿名呜呼哀哉

庄恪太子哀册文

维大唐开成三年岁次戊午十月乙酉朔十六日庚子皇子起薨於少阳苑十七日辛丑迁座於大吉殿十一月乙卯朔二十四日戊寅命册使太子太师兼右仆射門下侍郎国子祭酒平章事鄭覃副使中书侍郎平章事楊嗣復持节册諡曰庄恪十二月乙酉朔十二日景申葬於骊山之北原庄恪陵礼也玉琯岁穷金壶漏尽祖奠告撤哀笳将引庭灭燎而月寒路搖旂而

风紧皇帝念主鬯之缺位悼佩觿之夭年铜楼已闭银榜徒悬方追思於对日遽冥冥而宾天典册具举文物咸备爰诏侍臣显扬上嗣其词曰皇矣帝绪肇基绵古种德尊道宗文祖武上圣开成天下和平储祉发祥是先元良覃訏之初岐嶷用彰蘊才游艺玉裕金相既免孩提是加封殖伊维城於东鲁锡介珪於上国辞荣朱邸正位青宫尊师重保养德含聪畏驰道而不絶问寝门而益招贤警戒齿胄谦冲冀日跻於三善奉天慈於九重汉明好学既於外魏丕能文方循於内美不二於顔过嘉得三於鲤退焜燿甲观铿锵瑜佩方积善於为山何反真而游岱呜呼哀哉忧兢损壽沉疴始遭羣望并走百灵宜佑吴客之问徒为越人之医靡救占前星之掩耀知东朝之降咎天垂象而则然人由已而何有呜乎哀哉税驾承华兮即宫夜台凤笙长絶兮蜃辂徐来启青门而东出历元霸而左回度凋林兮魂断入旷野兮心摧水助挽而幽咽云带翼而徘徊悲佳城之已掩见新庙之方开呜呼哀哉授经兮曷期执紼兮增歆九原作兮何嗟及七日还兮安可希有少海之波逝无西园之盖飞商山之羽翼已散望苑之宾客咸归瑟彼玉简閤於泉扉用传信於文字愿不泯於音徽呜呼哀哉

罢祭

停官祭太子勅

勅诸赠太子顷年官为立庙并致享祀虽礼欲归厚而情且未安蒸尝之时子孙不预若专令官祭是以疎间亲遂此为常岂云敬孝其诸赠太子有後者但官为置庙各令子孙自主祭其祭署及官悉停若无後者宜依旧【开元二十二年七月】

唐大诏令集卷三十二

卷三十三

钦定四库全书

唐大诏令集卷三十三

宋 宋敏求 编

诸王

封建

封周王显制

封申王成义等制

封郯王嗣直郢王嗣谦制

封陕王嗣昇制

改封宁王宪制

封济王湓等制

广平王进封楚王制

改封雍王适制

封睦王建等制

封钦王谔等制

封邓王宁等制

封沔王恂等制

封晋王普制

封鲁王永制

封梁王休履等制

封蒋王宗俭制

封棣王惲制

封鄂王润制

封卫王灌等制

封蕲王缉等制

封棣王祔等制

封景王秘等制

封雅王祎等制

封建

封周王显制

昔周武垂则汾邑启维城之固汉文承统睢阳树磐石之基所以作镇邦家克隆景业第七子显毓粹云峯分辉日观风仪秀举神识冲和挺玉质而含章振金声而发彩夙遵教於诗礼方导德於间平既表岐嶷之姿宜申珪社之贶可封周王食邑一万户【显庆二年二月】

封申王等制 苏頌

门下古者帝王受命以临万国子弟建封用尊五等其所由来尚矣右卫大将军衡阳郡王成义等敦诗执礼本仁祖义名教之乐自得几深温良之容发於忠孝晨趋魏阙则望掩轩霞夕赋曹园则思含澄景朕祇奉历数旁稽载籍克辅王室所谓通邑大都俾为唐藩故能带河砺岳分膺往命咨尔眷欵可依前件仍各食实封一千户【唐隆元年六月二十七日】

封郯王郢王诰

诰昔在姬刘分王子弟用能本枝硕茂算祀遐长皇帝元子嗣直嗣谦等若木分晖咸池疏???孝爱成性佩服天经岐嶷诞灵风仪遐举奉闻诗之宝训资乐善之芳规锡命惟崇已申緑车

之宠登庸在运宜开朱邸之蕃嗣直可封为郯王嗣谦可封为郢王【先天元年八月】

封陕王诰

诰皇孙之宠礼絶於诸侯帝王之制封殊於列国爰自前代兹义存焉皇帝第三子嗣昇岐嶷夙成聪明天假东海壽街之对昔未云奇琅琊日远之谈今可连类允宜胙兹茅土光彼磐石永固鸿业式继维宁可封为陕王【先天六年九月】

改封宁王制

爰分宝玉载锡綬章必在亲贤致之侯甸开府仪同三司兼涇州刺史上柱国宋王宪仪表硕望忠肃令名艺总经书才推礼乐列上公之位兼大藩之宠瞻彼行围旧称茅邑敦如北地今还西都宜考良日之封用弘景命之及可改封宁王食邑三千户余如故【开元七年九月】

封济王等制

王者之制畴庸展亲古之道也迺眷诸子非曰私之第二十三男溢等藉庆昌源致兹繁祉始自内保渐乎外傳四方六甲辨志离经可以识君臣之义可以接朝廷之礼宜建以方社锡之分器肆予有命克慎厥猷其封溢为济王沔为信王泚为义王濯为陈王澄为丰王漼为恒王淀为京王滔为涇王【开元二十一年九月】

广平王进封楚王制

自寇戎奸宄王师未振瞻言境邑尚聚犬羊广平王俶修学好古令德孝?志安邦家誓雪讐耻爰鞠其旅克复二京可封楚王食实封二千户【宝应元年三月】

改封雍王制

锡瑞剖珪义先藩屏篱疆画野礼叙推恩必因时以命拜协天性以为辅天下兵马元帅特进上柱国鲁王适识度明敏执心仁恕智侔对日位偶前星顷以俾侯於鲁兼掌戎车修礼检身流谦自牧元良有裕忠孝可嘉且传称知子之道礼擅内举之文眷彼龟蒙僻居东夏乃惟洛雍近接西周宜改邑於京关列维城於上国可改封雍王食邑一万户依前充天下兵马元帅本官勲如故【宝应元年八月】

封睦王等制

虞夏之制诸子疏封汉魏以还十连授律是用析珪班瑞磐石开疆信通邑之纪纲为中都之屏翰然则旄钺之寄惟择攸难因亲之任各膺其命第四子述第五子逾第六子连韩王迥第八子遘第十三子造第十四子暹第十五子运第十六子遇第十七子遹第十八子通第十九

子達第二十子逸等敏茂纯懿稟於衷誠溫良孝恭形於進對動皆合義居必有恒可以附衆靖人抚封宣化而总列城之賦擅分閫之謀允勤公家允輔王室今則均茅社之寵盛槐庭之儀授鉞登車副茲朝典維城之固爾其懋哉述可封睦王充嶺南節度支度營田五府經略觀察處置?大使逾可封郴王充渭北鄜坊等州節度大使連可封信王韓王迴可汴宋等州節度觀察處置等大使邁可封鄜王造可封忻王充昭義軍節度觀察處置等大使遲可封韶王運可封嘉王遇可封端王遙可封循王通可封恭王達可封原王逸可封雅王仍并可開府儀同三司【大历十年二月】

封欽王等制

王者之制子弟畢封所以固藩輔而重社稷古今之通義也第十弟諤等寬簡忠厚生知孝敬行皆由禮志不違仁樂善本於性情好賢宗於師傅朕承天之序稽古展親宜舉徽章俾開土宇第十弟諤封欽王第十一弟誠封珍王男建康郡王渙封郟王改名經洋川郡王沔封均王改名緯臨海郡王洵封淑王改名列弘農郡王浼封莒王改名紆漢東郡王泳封密王改名綱晉陽郡王湜封郇王改名总高平郡王淑封邵王改名約云安郡王滋封宋王改名結宣城郡王淮封集王改名緇德陽郡王濬封冀王改名列河東郡王浥封和王改名綺第十七男絢封衡王十九男纁封會王二十男綰封福王二十二男紘封抚王二十三男緄封岳王二十四男紳封袁王二十五男綸封桂王二十七男綽封翼王【貞元二十一年四月】

封鄧王等制

門下昔周室制法備建宗盟漢代垂統畢封子弟其盛也二南教化首在國風其詳也九國土疆載於侯表朕嗣守丕業?惟令圖永言磐石之固宜本介人之重男平原郡王寧等孝友忠敬溫文惠和稟其樂善之姿強於好古之學君親之教罔敢失墜保傅之言亦惟佩服由是寡悔至於通方庶可膺茲典章列是藩屏疏爵以冠於侯伯分茅以錫其山川用明至公且叶前訓男平原郡王寧可封鄧王同安郡王寬可封涇王延安郡王宥可封遂王彭城郡王察可封深王高密郡王寰可封洋王文安王寮可封絳王十男审可封建王宜令所司擇日備禮册命主者施行【元和元年八月七日】

封沔王等制

門下朕承天序欽若前訓用建藩輔以明親賢斯古先哲王之令典也弟憬等孝友寬厚溫文肅敬行有枝葉道無緇磷踐君子之中庸?賢人之義理情惟樂古志不近名纂間平之令德希曾閔之至行宜分建茅土衛我邦家叶於展親永固磐石是用舉其成命錫其徽章第十弟恂可封沔王第十一弟恠可封婺王第十二弟愔可封茂王第十三弟怡可封光王第十四弟協可封淄王第十五弟儋可封衡王第十六弟悅可封澶王長男湛可封鄂王第二男涵可封江王第五男灋可封潁王宜令有司備禮擇日册命主者施行【長庆元年三月】

封晉王制

門下昔周室之興也藩戚并建式資於維城漢氏之興也皇子畢封用固於磐石斯所以載弘丕緒惟懷永圖且茂德於本枝遂推恩於後嗣況祇荷眷祐屬當長賢宜承龍章允膺旧典長男普幼稟異質夙膺嘉祥既表岐嶷之姿日慕恭良之性朕以寡昧奉宗祧庶明父子之親以及君臣之義命以樂國錫其分圭用敷可久之基爰叶至公之道可封晉王宜令有司擇日備儀冊命主者施行【寶曆元年十一月】

封魯王制

朕承寶位欽若璿衡兢業戒懷懼忝洪構今皇嗣誕秀既流慶於天枝白茅后封宜分王於土宇用崇大典式固不圖長男永植性端莊稟靈聰哲神氣挺於岐嶷和粹精於儀形姿范藹然是用嘉慰將奉聞詩之教冀彰樂善之風俾洽寵恩允膺錫命庶表祥於麟趾爰建社於龜蒙敬哉戒哉無忝我烈聖之休德可封魯王仍令有司擇日備禮冊命【太和四年正月】

封梁王等制

王者胙土畫疆封建子弟所以承衛帝室藩茂本枝祖宗成式朕曷敢廢況天付正性夙奉丕訓尊賢好善體仁由禮是可舉建侯之命膺分社之榮親親賢賢于是乎在敬宗皇帝第二子休復第三子執中第四子言揚第六子成美皆氣蘊冲和行推敬慎游泳【原闕】

坟素佩服師言

宜開土宇之封用申睦族之典休復可封梁王執中可封襄王言揚可封杞王成美可封陳王宜令有司擇日備禮冊命【開成二年八月】

封蔣王制

周宅土中藩衛并建漢有天下子弟畢封朕承烈聖之鴻構托於兆人之上順考古道用保乂於皇家第二男宗儉孝友齊莊肅明懿蹈師氏之典訓佩古人之格言動必有程稚不好弄遵道誠資於積習樂善寔本於生知洪量不矜芳猷自穆是宜光分茅社作我藩翰式發麟趾之祥欽若犬牙之制爰舉成命錫其寵章可封蔣王仍命有司備禮冊命【開成二年八月】

封棣王制

門下朕聞王者建極子弟胙以茅土將以藩昌磐石深固本根周漢之隆率由此道及我列聖每用旧章所以撫安生靈保佑中外朕承天序敢案前規爰加立愛之恩庶廣推公之義憲宗第十八子惲生則溫柔性惟聰達神迈氣朗聞禮知方蘊積中之粹和資奉上之孝敬必能副於友愛始終令圖以耀金枝以輔王室是命俾開朱邸盛建戚藩載啓唐虞之風用崇麟趾之慶於戲惟茲盛典用別親賢必思繼美二南紹休五等佩維城之重思外屏之尊無怠無荒服我不命可封棣王仍令擇日備禮冊命【大中六年十一月】

封鄂王制 蒋仰

门下周家受命诸子疏封汉氏造邦二等垂训式崇藩屏思固本根逮於国朝必稽典宪太宗创久长之业乃建亲贤列圣遵守成之文广分土宇朕获承丕构敢废旧章非惟永保於皇基盖亦无私於天下第六男润生而聪敏性则温?孝敬夙彰诚明自至能服诗书之教居然礼义之姿虽在幼年勤由义训周旋知为善之乐谦和无自伐之心是可以膺犬牙之封厚麟趾之庆授以茅社锡其桐圭俾尔威藩以辅王室亦宜维二南之庆躅习三雍之旧仪敬服斯言用光礼命可封鄂王令所司备礼册命【大中五年六月】

封卫王灌等制

门下朕闻先王建万国亲诸侯也周汉封藩树屏我国家以锡土分茅冲人敢易彝制爰稽典礼式固家邦第三男灌等生则岐嶷幼而狗齐忠厚实见其天资才识若符於神授敦诗闻礼不假其师严践义由仁罔劳於庭训术通六艺之妙学奥百代之书是宜敷桐叶之策举梓材之诰胙以土宇誓以河山我图尔居以谨王度无懈其位永孚於休第三男灌可封卫王第四男灋可封广王宜令有司择日备礼册命主者施行【大中十一年六月二十八日】

封蕲王等制

门下朕祇承祖业获奉宝图常欲茂枝叶於千龄壮根本於九族所以建兹茅社分命亲贤参酌令仪用垂嘉称顺宗皇帝第十八子缉宪宗皇帝第二十子情瑶源挺秀朱邸传芳生於宫壺之中雅得诗书之奥加以温?成性孝敬日闻不假保傅之严已彰间平之德是宜疏封大国屏卫本朝锡介圭於明庭固磐石於清庙於戏谨尔侯度敬我典章无怠无荒往承休命缉可蕲王情可荣王仍令所司择日备礼册命【咸通二年十一月】

封棣王?王沂王遂王制 陆扈

门下我国家奄宅中区光启祖业析珪胙土惟贤与亲故本根茂而枝叶荣王室尊而藩屏壮逮予眇末罔获纂承愿至道之玄慈锺列圣之余庆顾兹胤嗣实谓蕃昌爰稽典谟用建邦土第三男昶星辰毓粹岳渎降灵早彰岐嶷之姿克稟狗齐之庆第五男禔龟龙应瑞鵬鸞凌空温?自得於天和穎悟实由於神赋第六男璿琳挺秀鸞鸞呈祥爰当好弄之年雅号夙成之器第七男纬珠玕耀彩籥露含贞风神潜茂於端庄质性已彰於敏惠而皆生知孝敬志乐文儒问安靡旷於晨昏稟训每由於诗礼智有刻舟之妙辨多对日之奇是宜分以白茅锡其朱邸叶犬牙於汉制光麟趾於周诗厌次名邦境连於齐鲁南康奥壤土接於荆吴琅琊敦儒素之风遂寧实阜殷之俗咸称重地各服徽章於戏器以琢成道由学显勉稟君亲之教敬承友傅之规勿追平乐之欢无好任城之勇懋建厥德无怠无荒昶可棣王禔可?王璿可沂王緯可遂王仍令所司择日备礼册命主者施行【乾宁元年十月】

封景王辉王祁王制

門下昔明王臨御之理立德於至道茂緒於惟親朕嗣守丕圖祇若鴻訓未嘗不稽古建於邦家厲精以奉宗祖況泊漢而還封冊之重抑有前典煥乎彝章當知子之敢私亦內舉之良媿第八男秘粹和包美謹厚自居踐禮樂之德文佩詩書之義府第九男祚生而向善夙賦好謙克明教導之風蔚有端莊之質第十男祺後星增潤甲觀呈祥妙彰岐嶷之姿雅得聰明之性又并標嘉器皆稟溫文慰沃且多寵數宜舉爰擇重地式崇其名於戲乃修持服諸訓順俾盛磐石之固允膺典禮之崇勉樹令徽各欽休命秘可封景王祚可封輝王祺可封祁王【乾寧四年十月】

封雅王琮王制 張元晏

門下成周之建藩翰也本以宗盟大漢之分茅社也先諸子弟推強干弱枝之義遵自家刑國之文用能夾輔公朝尊獎王室朕上承宗廟下撫黎元固安萬邦惠綏羣品事必在於師古理寧系於徇私爰舉舊章式於令典十一男祜忠肅挺志清明在躬孝敬本於生知端粹資乎神授蘊題鞭之妙思纂置醴之前規第十二男祥美秀呈姿溫文毓德體寬雅以成性恃愿而立身踵為善之懿圖繼好學之休嘗咸在韶趾克守義方必當益茂清徽俱為令器是用各分圭瑞并列封疆申以渥恩委之善地於戲當綺紈之歲膺茅土之榮雁序聯芳犬牙錫壤爾宜簡以位衆儉而在公善友應徐敬師申白交修魯衛之政俾取虞芮之風往惟欽哉服我丕謀祜可封雅王祥可封琮王仍令所司擇日備禮冊命主者施行【光化元年十一月】

唐大詔令集卷三十三

卷三十四

钦定四库全书

唐大诏令集卷三十四

宋 宋敏求 编

诸王

册文

册梁州都督汉王元昌文

册徐州都督徐王元礼文

册荊州都督荊王元景文

册潞州都督韩王元嘉文

册遂州都督彭王元则文

册雍州牧左武侯大将军越王泰改封魏王文

册洛州刺史郯王恽改封蒋王文

册岐州刺史许王元祥改封江王文

册扬州都督沛王贤文

册殷王旭轮文

册翼王轮文

册汴王邕文

册鲁王求文

册魏王侑文

册凉王傔文

册蜀王佖文

册景王秘文

册辉王祚文

册祁王禕文

册雅王禎文

册琮王祥文

册文

册梁州都督汉王元昌文 岑文本

维贞观十二年四月己卯皇帝使某副使持节册命曰於戏夫易陈利建道贯三才传称夹辅业隆百世是以周之鲁卫式固维城汉之梁赵克隆磐石惟尔使持节都督梁洋集璧四州诸军梁州刺史汉王元昌幼闻教义器识聪敏早开土宇礼数优崇邇矣南郊襟带西蜀按部之重茂亲是寄持民之誉期月有闻是用锡以茅赋备兹典册爰誓山河永作藩屏朕闻曰事君尽礼资於孝敬为政以德始於仁厚故士无贵贱由之者扬名时无古今背之者殄行钦哉尔其执心於忠孝践行於俭约无好逸豫以犯非礼无纵嗜欲以迓宵人明率旧章永保疆土可不慎欤

册徐州都督徐王元礼文

於戏惟王建都惟圣垂范安兆民者实敦亲戚固鸿业者必树藩卫惟尔使持节都督徐谯泗三州诸军事徐州刺史徐王元礼器能明敏业履详和幼闻诗礼早膺车服海岱及淮俗兼齐鲁胙土按部金曰尔谐是用斟酌前代率由令典俾屏迺辟传尔後昆朕闻曰友于兄弟施於有政弗学面墙莅事维烦?求大训兹为要道往钦哉尔其执心於忠孝践行於俭约无好逸豫以犯非礼无纵嗜慾以迓宵人明率旧章以保疆土可不慎欤

册荊州都督荊王元景文

夫建官之道实资明德列尊之义必俟茂亲故晋郑佐周功宣於寅亮间平辅汉业崇於藩屏

惟尔业高雍肃器怀懿幼稟庭训早膺朝宠仁恕闻於封畿廉平着在方岳荆衡作镇江汉为纪包括巴汉之域跨蹑吴越之郊塞帷尔谐分珪金属备兹令典锡以休命奄於楚甸代为唐辅可不慎欤

册潞州都督韩王元嘉文 岑文本

维贞观十二年於戏肇自黄唐洎乎汉晋莫不敦穆亲戚任用能贤咸胙疆土世为藩翰惟尔持节潞沁韩泽四州诸军事潞州刺史韩王元嘉识量沉厚德业尚修整夙稟趋庭之训早膺锡珪之宠上党奥壤地连秦晋开国之典攸归按部之誉允穆是用率由故实光备典章式固维城传之永世朕闻诗书礼乐仁义之府也孝友忠信人伦之基也是以河间之贤在於修学东平之誉成於为善往钦哉尔其览载籍之旨求圣贤之训戒兹邪僻以仁厚为心傲彼怠荒以重慎为德明乃服命勿替敬典可不慎欤

册遂州都督彭王元则文 岑文本

於戏盖五等肇自帝轩殷周不改其制六条创於有汉魏晋必循其道是知选贤建戚莫先於藩卫经邦致治允资於创举惟尔使持节遂普果合四州诸军事遂州刺史彭王元则幼称岐嶷夙稟义方褰帷汝颍之地声绩可纪建旗巴蜀之境民俗以康是用率由令典锡兹宠命传尔子孙长为唐辅朕闻为臣子者践行继於忠孝处富贵者貽戚在於骄奢故能播美当时垂芳後裔往钦哉尔其鉴於经籍询於蓍龟见善如不及见恶如探汤无违礼以害身无纵欲以败俗夙夜匪懈罔有後羞可不慎欤

册雍州牧左武侯大将军越王泰改封魏王文

维贞观某年月某日甲子皇帝若曰於戏在昔哲后受命君临并建茂亲以为藩卫然古之列国今之按部循名或异立政则同皆所以共治黎元俱獎王室克隆鼎祚咸必由之惟尔雍州牧左武侯大将军越王泰生而韶敏幼而好学乐善不倦才艺日新地则维城礼优分器惟彼三魏寔号五都非亲勿居夹辅攸属是用命尔为使持节都督相卫黎魏洛邢贝七州诸军事相州刺史改封魏王传之子孙长为藩翰古人有言皇天无私惟德是辅民心无常惟惠之怀往钦哉尔其鉴兹无自骄奢无迹邪佞兢兢业业以保尔茅土可不慎欤

册洛州刺史郯王恽改封蒋王文

於戏朕光膺宝图钦若前典崇穆亲之义固维城之业并锡之以土地授之以刺史爰誓山河永作藩翰惟尔洛州刺史郯王恽幼称岐嶷蚤闻诗礼式开土宇允备车服惟彼汉湘地兼旧楚作镇之重金议攸归是用命尔为使持节襄州诸军事襄州刺史改封蒋王传之子孙长为唐辅朕闻立身之基曰忠与孝为政之本曰礼与德行之则成名违之则丧道详求大训莫此为先往钦哉尔其祇承诏命敦悦典经无奢侈以乖节俭无逸豫以亏谨肃聿修厥德垂徽永世可不慎欤

册岐州刺史许王元祥改封江王文

於戏盖王者受命圣人作则垂法度以经邦选贤戚以布政作屏王室莫先於胙土共治天下寔寄於班条惟尔岐州刺史许王元祥幼禀义方早有志尚地惟邢晋礼优河裴姑苏奥壤旧吴是宅既作建牧必俟懿亲是用命尔使持节苏州诸军事苏州刺史改封江王传之子孙世为唐辅朕闻孝敬忠贞人之美行也礼让仁恕政之善经也是以奉上者戒於邪僻御下者傲於骄傲然後能保其疆土和其民人往钦哉尔其鉴持身之规求为邦之道尊五美而屏四恶近君子而远小人祇畏兢兢无替乃训可不慎欤

册扬州都督沛王文

维龙朔元年岁次辛酉十月癸亥朔十七日巳卯皇帝若曰於戏夫剪商统历建侯以崇藩卫纂尧开运分土以光震闻故廼族茂麟趾经国之令图地利犬牙裁化之明準惟尔雍州牧幽州都督上柱国潞王贤穎擢玄枢轴荣紫极姿仪映彻占对淹凝机悟韶敏风徽简令雕熔信义振英挺於觚年苑囿文辞标秀发於髻日艺优楚沛道驾天人繇蚁层台舞鹤悬镜湛清襟於篁沼鼓芳誉於苹风是用命尔为沛王使持节都督扬和滁润常宣歙等七州诸军事扬州刺史左武侯大将军牧及勲官并如故而徐方奥壤泗水名区荣耀虞珪赏延汉砺加以作牧淮海式道京畿申大雅而厘风资乐善而扬德必宜靖?廼位克懋声猷光被宠重可不祇欤

册殷王旭轮文 上官仪

维龙朔二年岁次壬辰十二月丙戌朔六日辛卯皇帝若曰於戏夫握镜黄道经邦盛於建侯司契紫宸体国昭於宗翰故乃祚延郑鼎之业历峻丰社之基惟尔第四子旭轮疏景星躔导源天汉继重离而接耀承少海而分澜秀质瑶华芳声金润天人之望夙彰髻绮大雅之规遽形襁褓幼智该於玄表潜识冠於黄中舟象垂风方慚性与封蚁宣誉终谢生知是用命尔为殷王上柱国往钦哉将用齐衡两猷比迹二南雕藻珪璋粉泽仁义竹池逾浚棣屏增华受兹茅土可不祇欤

册冀王轮文

维总章二年岁次乙巳十一月景午朔二十二日丁卯皇帝使银青光禄大夫守司戎太常伯上骑都府崔余庆副使中御大监上柱国灵丘县开国男万俟肃持节册命曰於戏夫天垂景宿上躔帝子之宫地载兼山下列乾男之域是以圣人之登必则大哲王之立遂开阶莫不?磐石於周亲树良翰於宗懿故黄神命社降若水以疏封苍精建侯奄中都而锡壤用能克久宝祚式固鸿基茂绪蔼乎龙图盛业光於麟趾惟尔冀州大都督右金吾卫大将军上柱国豫王轮层汉毓灵上枝摘景瑶光甫荐允摽坠燕之祥玉牒初闻遽叶占熊之兆中和在已仁义为资洽艺通玄验贲驹之人【阙】潜几应物见巨象之浮舟识茂髻辰神清绮岁趋庭承训孝敬极於观乔金殿传经敏学踰於括羽擅三雍之雅对韞七步之閎才足以道架河书声芬邺颂暨龙荒北镇鴈水东临海食之渠稟稜威而革暴鸣弦之俗感惠化以迁讹制杼垂风舍唐

流咏若乃西河之地寔曰奥区就日分郊莅唐虞之旧国均霜辟野总虞夏之余盟式图尔居形胜斯在是用命尔为冀王其余官勲如故往钦哉尔其劳谦勉志乐善居心膺丹□之徽章崇緑车之宠秩受兹中壤用保大藩允迪前修无或僭度维城之寄可不慎欤

册汴王邕文 苏頌

维景龙四年岁次庚戌五月辛亥朔二十八日戊寅应天神龙皇帝若曰易不云乎义崇於利建书不云乎道尚乎敦睦故知树藩屏者以奉先王之言强宗室者乃归诸父之胤咨尔光禄大夫行秘书监检校殿中监知陇右三使仗内诸闲廐上柱国嗣虢王邕尔门膺鲁拜地冠虞封本以忠孝仁义之规成乎宣慈惠和之业恩穷占雨沛经不测其精词高赋月陈诗莫踰於丽匪惟政修中夏称於虢叔固以姻连外戚宠则吾姨遂能在位不骄卑谦自牧造次何者宁忘服儒从容谓之最乐为善加以望隆才位声軼典司动则有常静而能晓载刊三豕厨委於杀青爰捧六龙廐填於伏皐故可以荣絶乎四履位微乎九就夫陈留者徙梁之邑在浚之郊井邑遂割於鸿沟舳舻远通於巨壑虽帝尧遗俗国中承重厚之风而王武旧邦天下擅膏腴之地亲既贤矣我图尔居是用命为汴王於戏尔其敏厥行祇厥典思不怠畏不法取则前鉴罔貽後羞作我唐藩以惠於汴土慎之哉其保朕之休命

册鲁王永文

维太和四年岁次庚戌二月景午朔十二日丁巳皇帝若曰咨尔元子其敬听朕命我国家累叶重光绍休昌运奄有区宇垂二百年良以亲亲无私建立子弟克固磐石作藩王家洎予践位敢忘丕训是用酌於旧典谋及台臣撰兹吉日锡以青社惟尔道扶正性天假令仪已彰岐嶷之名嘉载信厚之器持公之道且不愧於知子举守藩之命亦将教於事君爰择乐郊俾王曲阜环以沂水遂荒海邦今用命使兵部尚书平章事牛僧孺副使左散骑常侍吴士矩持节册尔为鲁王於戏尔宜守正闭邪去奢昭俭害於德者不作逆於耳者必听无昵宵人无远端士纂东平之乐善师河间之好古日慎一日行之为难敬尔有国无坠我休命

册魏王侑文

维咸通三年皇帝若曰夫剪珪分器事着周经裂地疏封道光汉册莫不克隆磐石作固本枝并建亲贤以崇藩翰朝有定制朕安得私爰稽盛时俾荣锡社咨尔长男侑通晖日月稟庆霄汉?若木之凝华???璿源之积润天姿岐嶷神质聪明早彰乐善之规夙有辨牒之智卓尔器度藹然徽猷宜荷宠章以开土宇今遣使门下侍郎兼吏部尚书平章事杜悰副使左散骑常侍赵格等持节册尔为魏王於戏河外名都漳?奥宅尔其竭奉上之孝敬慎临下之仪刑守道宜鉴於远名尊贤无忘於置醴用新鲁卫之政以绍间平之德服我休命可不慎欤

册凉王佺文

皇帝若曰夫维城作扞实隆定鼎之业犬牙列国以盛建瓴之功故广树戚藩毕王子弟历朝

茂典列圣宏规举而行之朕不敢废咨尔第二男倓分晖紫极挺质丹宫器度沉详姿容端粹藹有成人之量形乎佩鞶之年志玩楚诗情通沛易不劳师傅之训动形忠孝之规爰嘉令猷俾建侯社今遣使门下侍郎兼吏部尚书平章事杜惊副使左散骑常侍赵格等持节荣絕乎四履位徼乎九就册尔为凉王尔其奄长洪河大启西土绍於前烈扶我旧疆敬慎於朱邸之间谨睦於玳筵之上靖其位克广其心无纵非彝服我休命

册蜀王佖文

皇帝若曰夫尧序九族周列五等事高维翰道在睦亲况居帝子之尊宜荷封王之典用彰庆美以固鸿基咨尔第三男佖符彩昭融姿容朗悟腾英日域渐秀星枢已多秤象之能才是胜衣之岁静不好弄言必成文曾无纨绮之心每服诗礼之训嘉其幼智锡以大封今遣使门下侍郎兼吏部尚书平章事杜惊副使左散骑常侍赵格等持节册尔为蜀王尔其宅於坤维建兹赤社疏以江汉镇以岷嶓列为侯王还我宫禁以谨恭而接下秉忠孝以律身服是宠光终於戒慎

册景王秘文

维年月日皇帝若曰周官八统其一亲亲制皇子为王得使立社於国固本之大哲后皆然咨尔第八男秘当保抱之间有敏惠之性亦既总角遂能胜衣默识天经潜资日就未尝玩物可以疏封乃告守龟具闻叶吉来受兹典永为东藩今遣某官某乙持节册尔为景王见不贤而能思贤尔则必贤矣知可逸而能无逸尔则常逸矣是宜广洪绪永丕休敬而听之罔失厥度

册辉王祚文

维年月日皇帝若曰古君子笃於其亲者使天下兴於仁也故二王五子之封非独立爱而已咨尔第九男祚克岐之质见善欲迁稟训道而必开故戏言而不爱一隅已達四卫可陈乃申胙土之章俾奉成人之祀今遣某官某乙持节册尔为辉王於戏为臣为子偕在尔躬有器有名敢私国典锡类则非孝不可远耻则非不能无替聿修以光利建白茅金匱昭物具焉尔其夙夜循思用称休命

册祁王祺文

维年月日皇帝若曰庙立之重天序可承将茂本枝式遵悬法爰就至公之体谅非各子之心咨尔第十男祺赋性惟和挺材亦秀饬躬罔念於纨素乐善欲忘於钟鼓析壤之休自天而启临轩之命秉礼则安今遣某官某乙持节册尔为祁王於戏保在深宫鲜知正范任之作傅我必择人苟有如韦至之讽谕安国之辅导者尔当俯听其言勤行其教使我公家之训克彰於万年而固尔建社之宠不其大哉

册雅王禎文

维年月日皇帝若曰周家之嗣分茅土者十五国汉景之代书简册者十三王朕以寡昧之资奉神灵之统每顾诸子寔惟天休期训导之将成谅封建而可享咨尔第十一男祜方当稚齿复在深宫有知忧知惧之心见学礼学诗之性自然而稟最乐不渝遂诏有司往申旧典今遣某官某乙持节册尔为雅王於戏受册之命重属汝躬列圣在天百辟在位在位在天必听在位必观罔怠交修用承多祜

册琼王祥文

维年月日皇帝若曰不废懿亲大封同姓吾尝观於经籍矣然而历代贤君正名用典必择才行使之光昭其可以子弟之私恩冒先王之成宪朕虽不德必有不为咨尔第十二男祥於儿戏之间多幼敏之智谓之材也不曰近乎处昆弟之间有推让之性言其行也不曰类乎是宜疏封且命申诰今遣某官某乙持节册尔为琼王噫作德日休尔则逸作伪日拙尔则劳择利而行令名斯至

唐大诏令集卷三十四

卷三十五

钦定四库全书

唐大诏令集卷三十五

宋 宋敏求 编

诸王

除亲王官上

秦王大尉陕东行台制

秦王兼凉州总管制

秦王益州道行台制

秦王天策上将制

秦王领左右十二卫大将军制

秦王兼中书令制

齐王元吉司徒制

荆王元景等子孙世袭刺史制

郢王元裕等除官制

安州都督吴王恪等除官制

相州都督魏王泰雍州牧制

邓王元裕等刺史制

相王并州牧制

相王雍州牧制

相王太子左卫率制

宋王成器太子太师制

宋王成器太尉等制

岐王范华州刺史等制

邠王守礼等兼襄州刺史等制

郯王嗣直安北大都护等制

岐王范太子少师等制

邠王守礼等兼晋州刺史制

除亲王官

秦王大尉陕东行台制

论道经邦任惟勲德分陕作伯实寄亲贤尚书令雍州牧右武侯大将军上柱国秦王某器宇冲深智谋英果义师云举首赞奇谋亲率熊罴搴旗斩将廓清函夏忠效克彰狡寇逋诛刘四上总戎薄伐戡剪无遗策尚雄远谋猷沉密宜在鼎司肃清槐路今区宇方缉巩洛犹芜镇俗治戎允资望实可大尉使持节陕东行台其蒲州河北诸道总管及东讨诸府兵并授节度余官悉如故【武德元年十二月】

秦王兼凉州总管制

京室殷阜鈎陈严秘肃遏警巡职务尤重然而玉门遐阻控御八荒金城冲要尉侯攸属宣风作牧亲贤是寄太尉尚书令雍州牧陕东道行台左武侯大将军上柱国秦王某地实藩枝任惟心膺职参三事功着二南识度优闲性理匡济元戎敷化声绩备举宜摄九门总司八校抚莅河右允兼望实可左武侯大将军使持节凉甘瓜鄯肃会兰河廓九州诸军事凉州总管其太尉中书令雍州牧陕东道行台右武侯大将军上柱国王如故【武德二年五月】

册秦王益州道行台制

蜀郡沃野田惟井络控驭邛笮临制已渝求瘼宣风朝寄尤重总司岳牧是属懿亲太尉尚书

令陕东道行台雍州牧左武侯大将军使持节凉州总管上柱国秦王某器宇冲深体识明允专征阃外茂绩克宣敷政京畿嘉声已着镇抚岷汉金论攸宜可益州道行台尚书令【武德三年四月】

秦王天策上将制

德懋懋官功懋懋赏经邦盛则哲王彝训是以华袞宠章允洽希世之勲玉戚朱干实表宗臣之贵太尉尚书令雍州牧左武侯大将军陕州道行台尚书令凉州总管上柱国秦王某缔构之始元功夙着职兼内外文教聿宣薛举盗寇秦陇武周扰乱河汾受朕专征屡决妖丑然而世充僭擅伊洛未清建德凭陵赵卫犹梗总戎致讨问罪三川馭以长筭凶党窘蹙既而漳滨蚁聚来渡河津同恶相求志图抗拒三军爰整一举克定戎威远畅九围静谧鸿勲盛绩朝野具瞻申锡宠章实允金议宜崇徽命位高羣品文物所加特超恒数建官命职因事纪功肇锡嘉名用标茂实可授天策上将位在王公上领司徒陕东道大行台尚书令增邑一万户通前三万户余官并如故加赐金辂一袞冕之服玉璧一双黄金六千斤前後鼓吹九部之乐班剑四十人【武德四年九月】

秦王领左右十二卫大将军制

御侮折冲朝寄尤切任惟勲德实仁亲贤天策上将太尉领司徒尚书令陕东道大行台益州道行台尚书令雍州牧凉州总管左右武侯大将军上柱国秦王某宇量凝邈志识明邵爰始缔构功参鼎业廓清秦陇茂绩以彰戡定周韩成威遐畅河朔余寇取若拾遗济代逋诛克同振朽宣风都摯综务朝端政术有闻纲目斯举宜加褒宠式兼常秩总摄戎机望寔惟允可领左右十二卫大将军余并如故【武德五年十月】

秦王等兼中书令制

丝纶枢秘寄任帷宸纳献职惟显要望实兼隆亲贤斯属天策上将太尉兼司徒尚书令陕东道大行台尚书令雍州牧十二卫大将军秦王某宇量冲深风神爽悟任兼文武声绩着闻司徒并州大将军稷州刺史左领军大都督右武侯大将军上柱国齐王元吉器怀淹密业绍英茂内外政务克举加珥蝉緌朝典攸宜某可中书令元吉可侍中余如故【武德八年十一月】

齐王元吉司徒制

三台望重仰協辰曜五教任隆俯安邦国实资懿德式寄亲贤侍中并州大都督左卫大将军上柱国齐王元吉宇量凝邈风神爽迈徽猷夙着嘉誉早隆出莅方岳政绩兼懋入侍帷宸献替斯允推轂阃外备展勲庸职司禁旅戎章已缉燮理之任朝典尤宜可司徒余如故【武德九年二月】

荆王元景等子孙世袭刺史制

门下皇帝受命步骤之迹已殊经籍所纪质文之道匪一虽治乱不同损益或异至於设官司以制海内建藩屏以辅王室莫不明其典章义存於致治崇其贤戚志在於无疆者也朕以寡昧丕承洪绪寅畏三灵忧勤万姓考往哲之余论求经邦之长策帝业之重独任难以成务天下之广因人易以获安然则侯伯肇於自昔州郡始於中代圣贤异术沿革随时复古则义难顿从循今则事不尽中遂规模周汉斟酌曹马采按部之嘉名参建侯之旧制共治之职重矣分土之实存焉已有诏书陈至理继世垂范貽厥後昆维城作固同符前烈荆州刺史荆王元景等或地居旦奭夙闻诗礼或望及间平早称才艺并爵隆土宇宠兼车服诚孝之心无忘於造次风政之誉克着於期月宜冠常典胙以休命其所任刺史咸令子孙世世承袭有司仍准前诏详为条制奏闻俾克本枝之盛随天地而长久刺举之荣巩山河而无絶【贞观十一年六月】

授郅王元裕等官制

门下膏腴之地允属茂亲藩屏之重寄深磐石郅王元裕譙王元名并器怀韶令业尚明敏望兼梁赵誉冠鄴郾并建之议可归按部之职斯重加兹宠命仰惟国章元裕可使持节邓州诸军事邓州刺史改封邓王元名可持节壽州刺史改封舒王食邑并如故【贞观十一年正月】

授安州都督吴王恪等官制

门下体国经邦资懿亲而作屏设官分职俟方岳以宣风用能式固本枝克隆磐石前安州都督吴王恪等并识量明允体业贞固礼高彝器望重维城学艺之誉日新忠孝之风早茂分命有典金议攸归可依前件

相州都督魏王泰雍州牧制

门下牧伯之重莫先畿甸周卫之职任切巡警详求今古必俟贤戚相州都督魏王泰器业凝远文藻夙成好学见称乐善不倦入作卿士抑有前规重司文武允膺金议可雍州牧

授邓王元裕等刺史制

门下维翰之寄允属茂亲藩屏之重必资令望邓州刺史邓王元裕襟神韶令理识清明壽州刺史舒王元名体业夷雅志尚淹和并夙膺朝宠早莅藩任政绩着於谣俗嘉誉洽於缙绅宜加荣命允兹朝典元裕可梁州刺史元名可许州刺史封并如故

相王并州牧制

鸾台神畿缉化咨牧所难天府屯兵命将为重惟贤是辟非亲勿居太子左千牛卫率安北都护相王旦黄道承晖紫庭趋训仪表瓌杰识量虚明资忠孝以立身仗经书而致德勇高卫霍词优杨史必能外振威声内清戎政宜膺夹辅之寄兼司羽翼之重可并州牧余如故【长安二年五月】

相王雍州牧制

鸾台京辅才难神畿化首四方取则万邦承流自非明德懿亲何以宣风翊政并州牧太子左千牛卫率相王旦紫庭趋训青社疏封雅度冲深瓌资秀杰忠孝天假

礼乐日宣【阙】

声高卧护怀共理之干有兼辨之能宜纒朝綍用清都輦可雍州牧【长安二年七月】

相王太子右卫率制

鸾台宫寮之任朝选所难相王旦地在懿亲躬此明德持沛猷之法度河间之儒雅元良肇建博望初开徽章既陈禁旅增肃宜纒金玺之重式掌铜楼之卫可依前件

宋王成器太子太师制

门下孟侯之礼虽归於冢【胤】太伯之风实尚於高节左卫大将军宋王成器幼而聪敏长而温仁礼乐同归质文相半孝以为政每用因亲忠以立诚所期尊主故能乐於为善好在儒服占蚁穴以探微登雀台而成赋自奄有梁宋作藩邦家其仪孔臧其德可大朕之元子当践嗣君以隆基有大功神祇金属由是朕前悬让言在必行天下至公诚不可夺奚有立季之典庶协从人之愿况别为九州必资於牧伯贞夫万国允伋於师傅式副金谐之求仍光不拜之宠可太子太师雍州牧扬州大都督别加实封二千户赐物五千段紬马二千疋奴婢十房金银器皿二百事甲第一区良田三十顷余如故主者施行【唐隆元年六月二十五日】

宋王成器太尉等制

门下古有知通於道情辨於物可以调陰阳节风雨者委之三事以康万人鼎鼐之谓也司空兼扬州大都督上柱国宋王成器益州大都督兼右卫大将军申王成义单于大都护兼右金吾卫大将军邠王守礼等并明德茂亲崇儒乐善为国翰屏当朝羽仪岂其朱芾之诗美则缙衣之咏寧止爱均花萼礼锡苴茅而已哉必能论道经邦佐朕为政俾允升台之望宜膺补袞之阙成器可太尉兼扬州大都督成义可司徒兼并州大都督守礼可司空勲如故主者施行【先天二年八月九日】

岐王范华州刺史等制

黄门周以鲁卫之亲夹辅王室汉以间平之亲来朝京师旁稽旧章允迪前训太常卿兼左卫率并州大都督岐王范荊州大都督兼秘书监薛王业等朕之同气邦之伟才周旋礼乐佩服儒雅爰职奉常则坠典咸秩是司外史则羣言罔遗光我耄猷敷於事典日同问安之庆时归受制之连出入重於楚元终始钦於沛献家人抚爱虽属於从梁国史垂声必期於分陕迺眷畿辅不远闔閭漆沮既从河华作镇削桐所寄磐石攸宜遂其至公之请伫听牧人之术范可使持节华州诸军事兼华州刺史大常卿勲封如故业可使持节同州诸军事兼同州刺史秘书监勲封如故至州日须稍优游不可烦以细务自非大事及奏事余并令上佐知主者施行【开元二年十月二十九日】

邠王守礼等兼襄州刺史等制

黄门树於藩屏莫非亲属居以形胜必任亲贤司空兼陇州刺史邠王守礼德比间平贤於鲁卫动不忘於仁恕言必备於忠肃入聯花萼拥駟来朝出割竹符凭熊往镇睠兹樊邓是称汉沔惟城池之枕倚乃川陆之雄要故鸣驲戒路建隼为邦副朕陕东之美更闻岷南之政可使持节襄州诸军事兼襄州刺史司空勲如故至州日须稍优游不可烦以细务自非大事及奏事余并令上佐知主者施行【开元三年十二月九日】

郾王嗣直安北大都护等制

黄门虞放三苗允归於敷德周称二陕用切於闻政顷以骄子天亡匈奴运尽愿为臣妾者望塞欵门编我?黎者云属波委北穷大漠西被流沙抚而柔之金曰分命郾王嗣直陕王嗣升聪察天假英明日新忠肃恭懿寛仁孝友探沛易之象象自诣精微读楚诗之比兴能传丽则故可扬威怀之旨宣镇静之风畀以藩翰俾清疆场嗣直可安北大都护仍充安抚河东门内陇右诸蕃部落大使嗣升可安西大都护仍充河西道四镇诸蕃部落大使右卫大将军兼安北大都护上柱国长平郡开国公张知运右羽林大将军兼安西大都护四镇经略大使上柱国潞国公郭?瓘等国之老臣朝之宿将长策子房所以运筹安边远图充国所以言事必能寛则得衆惠以养人各绥一方兼委佐贰知运可安北大都护仍兼郾王府长史及安抚诸蕃副大使?瓘可安西副大都护仍兼陕王府长史安抚诸蕃副大使余如故主者施行【开元四年正月二十一日】

岐王范太子太师等制

黄门赞翼皇储允归师保崇敬叔父谅属亲贤虢州刺史岐王范秘书监兼幽州刺史薛王业等明允笃诚温良恭俭忠孝光於令典儒雅伟於成业自为我藩翰拥其干旌雅门邵伯之诗尤美鲁公之政虽颁条是务而道理兼资因入拜於承明伫来仪於博望范可太子太师兼虢州刺史业可太子少保兼幽州刺史勲封等各如故主者施行【开元四年六月七日】

邠王守礼等兼晋州刺史制

礼着睦亲书称分命镇彼黎猷莫如兄弟司空兼滑州刺史上柱国邠王守礼开府仪同三司兼潭州刺史上柱国宋王宪司徒兼虢州刺史上柱国申王撝太子少师兼郑州刺史上柱国岐王范太子少保兼卫州刺史薛王业等朕之花萼人之珪璋文儒在躬孝友成性入践朝列望优植武出综藩条声均鲁卫鳧在泾水鸞鸣岐山新田拟於晋汾旧陕邻於虢国眷兹翰屏密迩京都宜扇百城之风伫延九野之润守礼可使持节晋州诸军事兼晋州刺史范可持节泾州诸军事兼泾州刺史撝可使持节绛州诸军事兼绛州刺史范可使持节岐州诸军事兼岐州刺史业可使持节虢州诸军事兼虢州刺史余各如故务非灼然要重者各令上佐知【开元元年十二月】

唐大诏令集卷三十五

卷三十六

<史部,诏令奏议类,诏令之属,唐大诏令集

钦定四库全书

唐大诏令集卷三十六

宋 宋敏求 编

诸王

除亲王官

庆王潭凉州都督制

庆王琮司徒制

荣王琬安北大都护制

命三王制

停颍王等节度诰

越王系天下兵马元帅制

奉节郡王适天下兵马元帅制

普王谊荆襄江西等道兵马都元帅制?王谅申光节度制

彭王仅等河西节度大使制

嘉王运横海军节度制

抚王紘河东节度制

嘉王运等检校司空制

遂王宥彰信军节度制

濮王泽成德军节度制

昭王汭成德军节度制

抚王紘开府仪同三司守司空制

蜀王佖西川节度制

建王震魏博节度制

除亲王官

庆王潭凉州都督制

朕钦承丕绪司牧黎元讼息刑清远安迺肃恩谊弘备式树藩维列镇而考其政声谋帅而训其戎旅徵皇汉之故事并建亲贤采分陕之遗尘化行江汜爰崇磐石永固宗祧庆王潭等并禀秀玉林分华苑凤彰韶誉久践义方闋礼敦诗好贤乐善履忠肃而无替遵法度而不愆器蕴谋猷才兼文武任兹连帅统彼元戎干略攸归能贤是择分麾作镇受钺专征式茂朝章宜嘉命以庆王潭为梁州都督兼河西节度大使忠王浚为单于大都护朔方节度大使棣王洽为大原以北军州节度大使鄂王润为幽州大都督兼河北诸州节度大使荣王湜为京兆牧兼陇右节度大使光王琕为广州都督兼岭南经略大使仪王澹为河南牧颖王澧为安东都护平卢军节度大使永王泽为荊州大都督壽王清为益州大都督兼剑南节度大使延王湊为安西大都护兼四镇节度大使盛王沐为扬州大都督【开元十五年三月】

庆王琮司徒制

门下汝作司徒以亲百姓予有御侮爰整六师中外之寄藩维是属太子太师兼凉州大都督河西诸军州节度大使度支营田九姓长行转运使上柱国庆王琮克勤於躬允协厥训每有志於敦学常不忘於乐善事上之道忠顺在焉举能之义亲踈一也固可委以邦教受之广谋勉图乃功勿替朕命可守司徒余如故【开元二十四年】

荣王琬安北大都护制

街画奥壤戎夏所交兵镇专城藩卫攸重开府仪同三司兼凉州牧单于大都护充持节朔方节度使副大使荣王琬温仁植圣孝友因心言必备於忠肃动必循於德义爰就师傅学行可观载锡珪符名器斯允移郭筑垒功存御侮距河临塞拒切雄边金论所归式遏斯寄宜加外总之命俾授中权之略可兼安北大都护余并如故【天宝八年二月】

命三王制 贾至

门下我唐受命百有四十载德泽浸於荒裔声教被於殊邻绍三代之统绪综百王之礼乐我高祖神尧皇帝奄有大宝应天顺人我太宗文武圣皇帝戡难造邦光宅天下高宗天皇大帝修文偃武惠绥四方我中宗孝惠皇帝聿遵孝德惟新景命我睿宗大圣真皇帝清明在躬玄化溥畅朕承累圣之洪训荷祖宗之丕绪兢兢业业不敢自宁往岁韦氏作逆宗社将隳是用翼戴先后扫荡凶徒宸极既贞寰区载晏尔来在位垂五十年中原幸无师旅戎狄岁月朝贡夙兴旰食勤念苍生庶弘至礼以跻仁壽愧无帝尧之圣德而有奇魮之不明致令贼臣内外为患蔽朕耳目远朕忠良或窃弄威权或厚歛重赋蚁壤一漏成此?天构逆召戎驰突中夏倾覆我河洛挠乱我崤函使衣冠奔窜於草莽黎庶狼狽於锋镝伊朕薄德不能宁谧厥祸海内负兹苍生是用罪己责躬寤寐焚灼上愧於天下愧於兆人外愧乎四夷内愧乎九族乾惕若厉思雪大耻夫定祸乱者必仗於羣才理国家者先固其根本太子亨忠肃懿闻礼敦诗好勇多谋加之果断永王璘盛王琦丰王珙皆孝友谨恪乐善好贤虽顷在禁中未习政事察其图虑可试艰难夫宫相之才师传之望必资贤哲永厉忠贞况四海多虞二京未复今所慎择实惟其人太子亨宜允天下兵马元帅仍都统朔方河河北平卢等节度采访等都使与诸路及诸副大使等计会南收长安洛阳以御史中丞裴冕兼左庶子陇西都司马刘秩试守右庶子永王璘充山南东道江南西路岭南黔中等处节度支度采访等都使江陵大都督如故以少府监窦韶为之副以长沙郡太守李岷为都副大使仍授江陵郡大都督府长史兼御史中丞盛王琦宜充江陵郡大都督尉长史彙为之副以广陵郡长史李成式为都副大使兼御史中丞丰王珙宜充武威郡都督仍领河西陇右安西北庭等路节度支度采访等都使以陇西太守邓景山为之副兼武威郡都督长史御史中丞充副大使应须兵马甲仗器械粮赐等并於本路自供其诸路本节度采访防御等使璘王等并依前充使其署官属并本路郡县官并各任自拣五品已上置署讫闻奏六品已下任便授已後一时闻奏其授京官九品已上并先夹名卷听进止其武官折冲已下并赏借绯紫任量功使处讫具闻奏具有文武奇才隐处山薮宜加辟命量事擢擢於戏咨尔元子等其敬听朕命谦恭祇敬以见师傅矜庄简肃以见衆官慈恤惠爱以养百姓忠恕哀敬以折庶狱色不可犯以临军政犯而必恕以纳忠规往钦哉无替朕命各须所管咸令知悉【天宝十五载七月十五日】

停颍王等节度诰

诰凿门命将授钺专征仗以方面之威执夫赏罚之柄邦家重任固实在兹颍王永王丰王等朕之诸子早承训诲琢磨诗书之教佩服仁义之方乐善无厌好学不倦顷之委任咸缉方隅今者皇帝即位亲统师旅兵权大略宜有统承庶若网在纲惟精惟一颍王以下节度使并停其诸道先有节度等副使便令知事仍并取皇帝处分李岷未到江陆永王且莫离使待交付兵马了永王丰王并赴皇帝行在【至德元年八月二十一日】

越王系天下兵马元帅制

握兵之要古先为重命帅之道心膂攸凭是知靖难夷寇必资於兵革总戎受律寔仗於亲贤

盖将父宁邦家保息黎献者矣朕以薄德缵承鸿绪往属元凶图乱中夏不宁上凭宗社之灵下藉熊罴之力由是志清咸洛拯此生人顷以河朔残妖尚稽天讨蛇豕窃留於城堡涂炭久被於齐?朕以为人父母寧忘悯念虽好生息战必冀於归降而余蘖昧心靡闻於悔过所以轩后亲征於獯鬻周文致役於昆夷古之用兵盖非获已越王系幼稟异操夙怀韬略负东平之文学蘊任城之知勇性惟忠孝持爱敬以立身志尚权谋有经通之远志知子者父方有属於维城择能而授俾克申於戎律且凶徒啸聚颇历岁月恶既贯盈理当扑灭君亲有命可不敬乎俾展龙豹之韬永清梟獍之类可充天下兵马元帅应缘军署处置所司准式【乾元年】

奉节郡王适天下兵马元帅制

门下国之大事戎寄为先朝有旧章亲贤是属故求诸必当用制於中权存以至公岂慚於内举特进奉节郡王适天资淳懿夙表岐嶷深谋秘略可谓生知乐善近仁非由外獎检身以礼率性惟忠将有事於四方且申尔志俾启行於十乘式伫其能故可敬慎厥猷勤宣乃力克奉君亲之命载清寇孽之余允副金谐宜从兹授可天下兵马元帅余如故【宝应元年四月十一日】

普王谊荆襄江西等道兵马都元帅制

勅君人立极所务於胜残秉律成师实先於谋帅申明号令总制纪纲弘九合之功决百胜之略非慎简不可以济事非金属不可以临人集大勲者必振其宏纲体至公者无避於内举爰择藩翰俾掌元戎开府仪同三司舒王谔性本忠厚训知礼乐居常乐善动不违仁察其内恕外温必能安人和衆体方识敏谅可成功庶乎知子之明授以贞师之律可扬州大都督持节荆襄江西沔鄂等道节度使诸军行营兵马都元帅余如故赐名谊改封普王呜呼小子谊其敬听朕命国家之有天下百七十载於兹矣祖宗垂化绍统功德维茂威加殊俗惠洽普天海隅苍生代受亭育跻之於福壽照之以和平源广流长庆深祚远历数有嗣缵乎朕躬兢兢业业惧不负荷?恭寅畏岁五周星循列圣之耿光稽上古之明训一物失所是用疚心万方有罪每怀咎已悬法皆考於天则举事必酌於人谋期合大中罔徇私欲而涉道犹浅烛理未明文阙於化成武乏於定乱刑赏失中授任乖方厚泽未均大信未着致使凶慝炽祸干纪乱常悖逆君亲蔑弃天地盗据我郡邑毒痛我士庶驱胁丁壮暴骸於原野攘夺羸老转死於沟壑忠良殒命义烈衔冤迫以凶威莫能自奋愤深骨髓怨结苍旻朕所以中宵屡兴中食三叹哀苍生之无告悯赤子之非辜为人父母寧忘愧悼赖三事大夫竭诚於内羣帅爪牙宣力於外交修不逮日冀康寧江汉上游建瓴制寇亘千里之地连十万之师保定大功宜有统一允副兹选往哉汝谐无以贵骄人无以善自伐无纵已之欲无拂衆之谋纳谏如流改过不吝卑躬降志以奉宾傳絶甘分少以抚军旅布诚信以归人心明赏罚以尽士力诘乱诛暴茂昭乃勲敬事恤人无替朕命膺兹重任岂不勉欤【建中四年九月二十六日】

?王谅申光节度制

门下自昔哲王疆理天下必选时明德树之宗亲参制藩维夹辅王室贤戚并建时惟钦哉长

淮之西厥壤千里人靡寧息於茲历年朕夙夜永怀慘若焚灼思得良帅代予安人释其危疑彰以信惠以亲而授其在於茲开府仪同三司?王谅性本温?生知忠孝祇服训导忠信不渝言皆副诚动必求当端慎可以化俗寬厚可以长人庇綏一方庶无忧厉可申光随蔡等州节度大使兼充管内观察使开府封如故

彭王仅等河西节度大使制

古之哲王宅中御宇莫不内封子弟外建藩维故周称百代仰闻麟趾之美汉命六王亦树犬牙之制历考前载率惟旧章朕以薄德纘承鸿绪属豺狼未殄金革犹虞赖文武羣臣协心同德庶克清於玄祲期永保於皇图且授钺分符义已先於用武维城作翰道方弘於建亲咨尔分阃之崇成余磐石之固彭王仅等银潢育庆璿萼分辉忠孝稟於天成文武称其备用今三秦之地万国来庭诚宜列皇子以建封崇懿藩而制胜资其固本委以临戎彭王仅可充河西节度大使兗王儁可充河北庭节度大使洺王旻可充陇右节度大使邵王偲可改封蜀王充邠寧鄜节度大使杞王俹可充陕西节度大使兴王佖可充陇右凤翔节度大使必能辑和戎律慎守封疆外协樽俎之谋中为社稷之卫是以分麾命社革故取新用叶天地之符俾膺家国之任共蕃王室可不慎欤【乾元二年闰四月】

嘉王运横海军节度制 陆贄

门下度土分疆设官莅事因时立制期在理安必顺物宜且从人欲版图既溢则疏邑以制州统摄或乖则分部而建长沿革之道亦何常哉沧海之隅地饶俗阜隐然此土寔曰雄藩镇抚之宜是资贤戚开府仪同三司嘉王运气本淳清重承先训忠肃孝友宣慈惠和勤於服儒乐在为善施於任事必有可观举不失亲至公斯在钦率厥职永孚於休可横海军节度大使沧景观察处置开府如故

抚王紘河东节度制

门下肇自周汉至於国朝莫不建立亲贤以为藩卫择兹春哲抚镇北门举是彝章式协公议抚王紘志量端平体识沉远毓德早闻於诗礼成器可比於珪璋居然岐嶷之姿雅有信厚之誉是宜獎其令美授以旌旄况全晋雄藩兴王故地屏护狄塞统制甲兵抚循繫将领之才居守藉公侯之重一昨师徒扰叛帅令不遵用尔遥临以綏其衆尔宜持严而务恕约法而推诚戒之慎之载扬丕绩可开府仪同三司充河东节度观察处置等使兼太原尹北都留守封如故主者施行

嘉王运等检校司空制

书载尧典首称睦族诗歌周德实美维城朕嗣统百王宪章三代义虽本於叙族道无愧於尊贤式遵旧章爰举成命嘉王运循王遹恭王通等皆孝敬恭懿敏裕斋庄播兰茝之清芬炳珪璋之符瑞易凌沛献诗掩楚元古人素风造次於是昔贤典训周旋以之固可以超金紫之贵

阶升台铉之崇秩策勲诏爵以宠分茅并可金紫光禄大夫检校司空赐上柱国仍依百官例给料钱

遂王宥彰信军节度制

国家承周汉之制疏子弟之封虽典册载先而名实或异故有从中统外授钺临戎推公则然所寄尤重遂王宥学礼承训乐善知方能遵六经之文克慕三雍之对有坚明可以莅衆有惠和可以抚人淮右列藩地绵千里比丧戎帅慎择能臣裨佐之中勤効可録师徒知义勇之节封部致肃清之安朕嘉其诚恳委以留府尚乃休懿宣於殿邦威重远资於抚临绢綬不劳於事任副明德茂亲之选膺建侯树屏之崇尔惟钦哉往践厥职可开府仪同三司彰信军节度管内支度营田申光蔡等州观察处置等使【元和五年二月】

濮王泽成德军节度制

门下锡珪立社疎戚有伦画野分疆亲贤并建所以左右王室保乂邦家乃眷冀方寔为雄镇上垂昴宿下接岳灵控陞井之要冲当邯鄲之故地用是稽诸古训考以国章俾崇尚德之规式叶至公之选濮王泽延庆金枝衍流天????资忠孝以植性本仁义以立躬文掇菁英敏有逾於七步学探旨要对必详於三雍刻舟志迈於苍舒占雨识精於沛猷而冲谦自处矜伐不萌所宜作我翰垣副兹毗寄为臣之道尔既克修知子之言予复何愧筑斋坛以命邦杖武节以遥临尔其弘樽俎之嘉谋令折冲之远略宠膺十乘位列三台勉服新恩慎守厥职可开府仪同三司守颍州大都督充成德军节度镇冀深赵等州观察处置等使封如故【大中九年正月二十四日】

昭王訥成德军节度制

门下近制诸侯薨歿朝廷或命其子弟嗣守爵土且虑职卑望轻未能弹压军行乃诏亲王为帅以统临焉盖尚体行权之旨也昭王訥贞祥所聚姿质幼茂孝敬天授温文日宣寧劳保傅之规自识君亲之道学礼不倦发言有章式光维城宜假分阃朕以赵地名服常山奥区人多忠朴俗尚义勇少长有礼里闾自康属帅臣云亡戎府无长中权剧务已委诸甥上将崇名允归爱子顾梁固以雄处末汉节以遥临祸柱旧封某土新命欢不阻於膝下诏荣宣於庭中邦家有光藩屏斯盛九命俾尊於开府一方远奉於建才实惟至公勉服丕训可开府仪同三司守镇州大都督充成德军节度镇冀深赵等州观察处置等使封如故主者施行【大中十一年八月二十日】

抚王紘开府仪同三司守司空制

独孤霖

门下尚德尊贤与亲亲而并建崇阶显位表授受以为庸斯所以宪章尧心损益周家自家刑

国甸公絕私率是而行可谢前古抚王紘生知孝悌夙稟惠和茂曹植之春华词刊枝叶体河间之秋实学洞根元况律度自持韦弦相顾不斯须以忘善不造次以违仁固可以命於典誉光其简策驭贵式登於极品承荣允践於上公敬而戒之无忝我高祖太宗之丕训可开府仪同三司司空依前百官例给俸料兼令所司择日备礼册命主者施行【咸通四年正月】

蜀王佶西川节度制

自古圣帝明王莫不封建子弟锡以茅土宠以珪符俾藩屏王家翰维天邑朕每读麟趾识诗人之意念犬牙知汉祖之心眷乃坤维实维奥壤甲车雄盛货殖形繁铃越隼则南诏惮严键松维则西戎畏惧是用授亲贤而统制命良将以经邦缅彼远方称兹公共蜀王佶宇量弘广风神粹和承顏於日域之中稟训於大庭之内弱不好弄居无愠容语言皆质於诗书造次不离於孝敬蚁封占雨嗣沛猷之明规象觐知斤继苍舒之敏智属者南蛮入寇西蜀纏兵疮痍生县道之间荆?系师徒之役虽英儒镇御火既扑於燎原而权道改张瑟难遵於胶柱由是假尔英略光予翰垣分玉叶之清陰覆铜梁之重地遥资筭画密受韬铃必使万井欢声三军怀德致藩夷之稽顙革蛮獫之非心将陟永图在举长策对扬休命尔其敬之可开府仪同三司兼成都尹剑南西道节度副大使知节度使管内观察处置统押近界诸番及西山八国云南安抚等使【咸通十一年七月】

建王震魏博节度制

门下玉斗七星降作帝王之子金枝百代生为列圣之孙冬夏教以诗书春秋训以礼乐然後封其茅土示以宠光建王震天赋明哲气稟粹和含日月之华英緼山河之瑞秀心悬壽镜腹贮学川智烛不炳而自明惠车非驾而引重信逾剪叶名掩刻舟九苞之凤翔赤霄五色之麟行丹地瑶池仙????非百水之同流银汉灵原自三天而别注况幼稟师训生知义方洊雷之象克明元良之名益着四德咸备三善永全喻葛藟之延长表瓜瓞之昌炽仁义道振忠孝声闻似睹卿云如观景宿堪膺宠权可赐爵封列国之荣暂领雄藩宜遵故事可授开府仪同三司守太保充魏博节度管内观察处置军使兼魏州大都督府长史仍令所司择礼册命主者施行【中和二年二月】

唐大诏令集卷三十六

卷三十七

钦定四库全书

唐大诏令集卷三十七

宋 宋敏求 编

诸王

册亲王官

册秦王天策上将文

册许王孝秦州都督文

册赵王福青州刺史文

册邓王元裕襄州刺史文

册虢王凤宋州刺史文

册纪王慎泽州刺史文

册杞王金鄆州刺史文

册曹王明梁州都督文

册郇王素节申州刺史文

册纪王慎荊州都督文

册周王显并州都督文

册虢王凤青州刺史文

册曹王明虢州刺史文

册江王元祥鄜州刺史文

册殷王旭轮单于大都护文

册纪王慎邢州刺史文

册曹王明豫州刺史文

册赵王福梁州都督文

册周王显左卫大将军文

大历五年册亲王出将文

大历六年册亲王出将文

册亲王官

册秦王天策上将文

维武德四年岁次辛巳十一月甲申朔二日乙酉皇帝若曰於戏咨尔太尉尚书令左右武侯大将军陕东道行台尚书令凉州总管秦王某夙标器望早树风猷业创经纶功高运始重以廓清秦陇剪伐鲸鲵扫荡河汾芟夷凶逆周韩大盗赵魏逋诛二寇弗宾用阻朝化严兵巩洛总率戎麾内运奇谋外申威略凶渠慑窜假命危城河朔蚁徒来相赴援一鼓誓衆以擒建德回戈旋指遂获王充二方克定师不再举节武既宣朝风遐畅宏规懿绩独冠卿尹宜锡宠章式加殊号光备礼物特超恒典是用命尔为天策上将位王公上领司徒陕东道大行台尚书令增邑二万户通前三万户余如故加赐金辂一乘衮冕之服玉璧一双黄金六千斤前後二部鼓吹及九部之乐班剑四十人钦哉?承宠命可不慎欤

册许王孝秦州都督文

维显庆元年岁次景辰十二月辛卯朔二十八日巳未皇帝若曰於戏先王创业垂统分玉展亲所以作固鸿业克隆景祚惟尔并州都督兼同州刺史上柱国许王孝性履明裕神志清远资孝敬以立身体温?以成性旧许是宅藩屏之寄以深全晋剖符维城之任愈切秦陇形要跨蹶羌戎抚寧夷夏亲贤攸属是用命尔为使持节都督秦成武渭四州诸军事秦州都督勲官封如故尔其祗承典训审慎刑狱怀远以德招攜以礼无迹宵人无怠庶政对扬休命可不慎欤

册赵王福青州刺史文

维显庆二年岁次丁巳正月庚申朔二十一日庚辰皇帝若曰於戏夫姬周创制任隆方伯炎汉垂范寄重维城所以任固邦基以藩王室惟尔右卫大将军使持节鄜州诸军事鄜州刺史赵王福识度夷雅器业沉秀建鸟旟以作牧锡虹珪以命祚兰錡上将既属宗英海岱剖符允鍾懿戚是用命尔为使持节青州刺史其大将军及封并如故尔其爱人理物慎狱恤刑率由王道以康庶绩祗服宠命可不慎欤

册邓王元裕襄州刺史文

维显庆三年岁次戊午正月甲申朔二十八日辛亥皇帝若曰於戏自九州命职百部分官爰布懿德以宣风固亲支而总务历观前载罔踰斯道壽州刺史上柱国邓王元裕志业纯深基宇崇隩标情文雅之地植操忠贤之轨壽春作牧风教有成襄阳按部仁明允属是用命尔为使持节襄州诸军事襄州刺史王及勳官如故往钦哉其勉思政本式康萌俗沔汉旧邦控带为重变其轻剽之党旌其冠冕之望孤惇者咸恤正直者必亲威惠并宣刑礼兼阐光膺典册可不慎欤

册虢王凤宋州刺史文

维显庆三年岁次戊午正月甲申朔二十九日壬子皇帝若曰於戏永固鸿基义属於藩卫载孚王化职隆於制举历选前修兹道无替豫州刺史上柱国虢王凤襟神秀发理识淹远夙标懿范早茂清徽寬恕以表其情恭逊以成其美荆河之地已洽於仁声梁宋之郊伫闻於善政是用命王为使持节宋州诸军事宋州刺史王及勳官并如故往钦哉其克膺禋命式遵彝典崇孝义以训下践忠贞而奉上布廉平之化垂惠爱之风居敬而行简恤隐而求瘼惟良之丕寄可不慎欤

册纪王慎泽州刺史文

维显庆三年岁次戊午正月甲申朔三十日癸丑皇帝若曰於戏析壤分珪寄隆於宗子罢侯置守任切於惟良自古明王率由兹典左卫大将军徐州刺史上柱国纪王慎稟庆璇源分华紫极崇诗书而轨物敦教义而明道入典钩陈肃表於清禁出膺刺举寬简洽於名藩高平形胜太行重阻地迺王畿亲贤是属是用命王为使持节泽州诸军事泽州刺史王及大将军勳官如故朕闻之诸侯之孝在上不骄善人为邦期月而可往钦哉其祗膺显命率循典礼慎刑罚而设学校尊五美而屏四恶造次於仁夙夜无怠勉追风於往哲以垂裕於後昆可不慎哉

册杞王金鄜州刺史文

维显庆四年岁次己未七月庚子朔四日癸卯皇帝若曰於戏昔尧分五典汉总六条所以光阐帝猷式调萌俗者也爰自近古尤为重任襟带之地非亲不居形胜之藩惟贤是处咨尔益州都督上柱国杞王金岐幼彰英徽早茂仁慈表性爱敬因心磐石之固攸归分符之寄斯在是用命尔为使持节鄜州诸军事鄜州刺史余如故夫道德齐礼为政之良规践义基忠立身

之要道必恭谦而下士无骄矜以傲法勉务农之教勤恤隐之方往钦哉其祇朕命缉谐令绩可不慎哉

册曹王明梁州都督文

维显庆四年岁次己未九月乙亥朔二十九日癸卯皇帝若曰於戏汉川纪奠梁山表镇南通庸蜀北達褒斜地实要冲人资刚銳式遏之寄亲贤攸属惟尔上柱国曹王明志业冲远襟神爽济仁惠之风弥着慈和之美日闻析壤分珪既隆於藩屏褰帷按部允期於政绩是用命尔为使持节都督梁洋壁集等四州诸军事梁州刺史王及勲官并如故往钦哉恤隐之任昔人尤重班除之职往哲称难宜尽公平之心用崇寬恕之道聿遵前典勉修厥德惟良是属可不慎欤

册郇王素节申州刺史文

维显庆四年岁次己未九月乙亥朔二十九日癸卯皇帝若曰於戏经邦之术寄宗子而维城御下之方资懿亲而调俗??遐载率修斯道咨尔上柱国郇王素节端凝幼彰清徽早茂夙闻诗礼之训式光车服之宠邑连钟武壤接平春合九塞之遥途控三门之险路形胜之地马牧在斯是用命尔为使持节申州诸军事申州刺史王及勲官并如故往钦哉夫政化之要礼义为先臣子之规忠孝为本尔其慎修刺举祇服罔戒仰鸣谦以自牧无侈纵而违道荷兹隆委可不慎欤

册纪王慎荆州都督文

维显庆五年岁次庚申九月癸亥朔二十五日丁卯皇帝若曰於戏南纪之津上躔翼轸西浮之路旁带巴巫信形胜之大泽实英灵之奥府恤隐之寄懿亲攸属班条之美良翰爰归左卫大将军泽州刺史上柱国纪王慎渐天汉而含润资日观以摘华艺重三雍道优二陕梁地挺彦燕馆趋贤位表衔珠入光兰錡职华分竹出美棠陰简惠以孚声绩斯邵是用命尔为使持节都督荆岐岳朗等四州诸军事荆州刺史大将军上柱国王并如故往钦哉夫道德齐礼布政之化践孝依仁立身之本必宜周旋勿坠雅誉弥高勉修廼职对扬休命可不慎欤

册周王显并州都督文

维龙朔元年岁次辛酉十月癸亥朔十七日己卯皇帝若曰夫腾华星苑荣名区於藩维凭晖日御峻宠章於侯服故本枝增蔚鸿绪滋繁而汾阳奥区镇龙山而控远冀方沃壤接雁塞而疏疆连率之寄亲贤攸属咨尔洛州牧上柱国周王显风则开秀器彩虚明识表魏舟之象词掩汉台之驾西园孤月委心镜而齐明小山丛桂偃情田而并烈温恭夙劭业尚日新棣萼交芬珪璋具美是用命尔为使持节都督并汾箕岚等四州诸军事并州刺史牧又勲封并如故尔其克修天爵聿苞地义方资化敷大夏惠渐京陵必宜缺衽鸣摠蹇帷广聰懋宣声绩长绥福履光膺显命可不慎欤

册虢王凤青州刺史文

维麟德元年岁次甲子正月己酉朔二十一日己巳皇帝若曰於戏剪商胙邑宠秩盛於隆周
惩秦后社徽名崇於有汉况乎爵穷五等荣总六条乃茂德之攸升因非贤而靡择泌州刺史
上柱国虢王凤履局端严襟神秀整道光懿威望重宗维恭慎之心符小言而缉誉虚凝之度
包大雅而扬声体被刚柔艺殫文武腾芳桂嶺动贞韵而锵金写照荷池向清文而振玉若乃
淄源迴跨岱趾斜临人被莱风俗兼齐旧布中和之化申简惠之方观政所先建亲斯在是用
命王为使持节青州诸军事青州刺史勲封如故往钦哉王其克迈十伦稽往贤之峻躅动宣
九德蹈前哲之英规絕浮竞之津广贞淳之路光昭淑问可不慎欤

册曹王明虢州刺史文

维麟德元年岁次甲子正月己酉朔二十二日庚午皇帝若曰於戏金桢璿萼分器先於茂亲
丹帷皂盖按部盛於良牧藩条之寄载宣河润之资斯远固以声芳偃桂德秀坐棠惟尔凉州
都督上柱国曹王明幼范趋庭风识韶悟姿仪挺立豪眷灵而驰赏弦秋竹而舒襟词彩星稠
对梁珠而混色情源水彻带赵璧而交辉韬两献而选骧笼二武而孤峙是用命尔为使持节
虢州诸军事虢州刺史勲封并如故往钦哉尔其履谦居巽念损辞丰置醴以挹儒津赐田以
登文囿敬光桥梓贞返修筠当率由旧章永保疆宇可不慎欤

册江王元祥鄜州刺史文

维麟德元年岁次甲子正月己酉朔二十二日庚午皇帝若曰於戏列爵开基资连属而敷化
班条馭富藉藩卫而裁风是知光阐帝猷发挥人极固宗属而兼列必亲贤而并建邓州刺史
上柱国江王元祥识尚闲伟体局贞凝履顺而自居冲撝而待物梁台既启背淮之裾爰萃燕
宫载辟发洧之驾相趋甄综掩於河书精通符於沛易神遗纠察政叶寬平包吐茹之奇通弦
韦之用乃地邻京翊俗裕於五方壤密寰封润沾於九里是用命王为使持节鄜州诸军事鄜
州刺史勲封并如故往钦哉懋德惟忠持盈在约思勤躬而景问无弛度以亏名崇简正之规
迈安恒之节祗膺宠命可不慎欤

册殷王旭轮单于大都护文

维麟德九年岁次甲子二月己卯朔九日丁亥皇帝若曰於戲帝子之星凭紫浥而后耀天孙
之岳峙青甸而摘光故庆表裁梧德成观梓皇跗馥屏声孚地轴之西储秀英藩颺偃宸街之
北冀州大都督上柱国殷王旭轮金桢挺秀玉穎曾敷姿表淹凝器彩闲润淮南之镜混冲照
於髻辰睢阳之藻齐洪辉於绮日綠车就驾朱邱洞开榜道招英赐田期彦蕙列清风宣芳於
大雅盖承流月澄华於高义固以聯崇躅於河楚茂叠軌於鄴郇是用命尔为单于大都护大
都督兼勲封并如故往钦哉其緘训趋庭兢业履薄方资威橫雁塞惠渐龙沙光膺朝獎可不
祗慎

册纪王慎邢州刺史文

维总章二年岁次巳巳【阙】月庚寅朔十二日辛丑皇帝若曰於戏昔封唐御极分岳以镇寰区宅镐乘时建侯以隆藩卫用能发辉鼎祚翊赞昌图制犬牙以廓地基茂麟趾而光天绪懿亲启翰其理则然惟尔使持节泽州诸军事泽州刺史上柱国纪王慎稟庆星躔分华帝圃器表冲邈轨鉴端凝业蕴珪璋艺包文武振英词於五际陵桂嶺而含芳抗送议於三雍警苹风而鼓誉仁孝为立身之本贞恕存应物之方及疏社上东建旗南服化流江汉道被歌謡中垒训兵自穆銜珠之序长淮平俗式崇露冕之规冠雅政於羣邦标粹范於贤牧夷仪胜壤地乃邢迁跨令赵之郊畿总常山之襟要维城之寄金曰尔谐是用命尔为使持节邢州诸军事邢州刺史上柱国王如故往钦哉尔其光阐六条敷崇四诫考间平之令则酌鲁卫之嘉猷无以傲从康无以纵败礼廸於正典聿遵王度祇历茂宠可不勗欤

册曹王明豫州刺史文

维总章二年岁次乙巳三月己卯朔十三日辛卯皇帝若曰於戏夫鄴京统历疏青社以建侯炎汉握图锡丹书而分国固以剪桐作屏实寄於周亲剖竹开藩允属於良牧睠言遐载谅乃通规惟尔使持节虢州诸军事虢州刺史上柱国曹王明濯秀银潢摘华璇极端洁成性自叶於游兰孝敬为心有踰於训梓驰精秘象验封蚁之登辞披翰小山见腾尘之入颂业隆燕馆道谒梁闈累播循风荐敷简政飞蝗感化不犯汉中之田猛兽怀仁述避弘农之境若乃荆河奥壤井赋万家周楚旧郊属城千里形胜之地非亲勿居是用命尔为使持节豫州诸军事豫州刺史上柱国王如故往钦哉尔其班条述职务尽於勤诚求瘼庇人事归於平恕祇服炯戒勉修厥德维城之重可不慎欤

册赵王福梁州都督文

维总章三年岁次庚申二月甲辰朔九日壬子皇帝若曰於戏夫姬祚斯永分瑞玉以建侯汉历载融剖铜符而作镇然则道光宗懿方膺锡社之荣迹着循良实允班条之寄惟尔隰州刺史上柱国赵王福摘祥丹极毓庆玄枢迈德为资体仁成性趋庭演训先承喻梓之恩树屏凝规夙奉裁梧之命乐善无倦率礼无???从盖临藩振英风於桂屿褰帷按部流惠化於棠陰固以埒美鄴郇均声河楚若乃华阳旧壤山抗西倾导漾名区地分南郑睠言形胜谅在亲贤是用命尔为使持节都督梁壁洋集四州诸军事梁州刺史上柱国王如故往钦哉尔其靖共乃位聿遵前典勗贞恪之心务廉平之政茂对休宠可不慎欤

册周王显左卫大将军文

维仪凤二年岁次丁丑二月甲午朔十二日乙巳天皇若曰於戏上图圆极星躔分帝子之象下奠方典列野宅天孙之镇?徽千古尚想百王法灵台以启封俾亲贤而作辅是以轩丘御历爰锡苍林之祚幽室建侯载疏曲阜之邑用能崇宝统赞昌期盛业茂於本枝鸿基峻於磐石惟尔洛州牧益州大都督兼太子左卫率使持节洮河道行军元帅蔡州镇抚上柱国周王显

高祿荐祉甫应瑶筐仙域启祜载分金榜迪中和之粹质蘊上德之良规风识俊迈机神爽彻
纯襟洽地义之方弟性睦天伦之重发挥沛易隐括河书多材之美载光乐善之风逾振泊乎
遥临西蜀控玉宇之全邦近牧东周辟铜衢之奥壤少城故地不变歌廉之俗太室余萌载陶
分陕之化总戎未举威已讐於三羌作镇方崇声远驰於万里若乃左军望重前驰任隆司鷁
弁於宸阶统熊渠於禁卫寔惟心膂之要斯谓爪牙之职迺矚鷹扬寄於麟趾追踪汉屏外列
骠骑之班继美晋藩初极领军之选是用命尔为左卫大将军余官勲封如故惟天尊物厥命
弗常惟人立躬在心则应性之所赋邪正由乎积习事之所通感召同於影响祇畏之道贤哲
同归钦哉往敷乃训率由前则竭爱敬之情砥温恭之行在泰思损据宠思危无耽乐是从非
礼义勿践永保朕命以蕃王室诞绥福祉可不慎欤

册亲王出将文

维大历五年岁次庚戌三月丁巳朔十六日壬申皇帝使某官乙持节册命曰於戏昔武德贞
观之际亲贤兼叙中外大寧多以藩王委之方面玄宗震耀威武外攘夷狄亦选建明德时惟
鷹扬予之茅土并赐旄钺祇奉前训敢忘夙夜爰命小子统兹元戎某英茂有才寬简彰信岂
孝恭之外至亦礼让而中发能辨雅乐尤精善书言表於微独有所得事迫於悔未尝复行时
因讲艺之余兼達理戎之要固可总以文武屏於家邦属河外名都方缺上将难於大任历选
中朝虽慚知子之明不忝安边之寄锡以戎辂分以兵符抚其四封式是羣帅仍求素望俾副
新军尔其保靖疆土惠安氓俗服我明训永孚於休

册亲王出将文

维大历六年岁次辛亥五月壬辰朔十六日丁未皇帝使某官某乙持节册命曰於戏周之藩
翰选用宗盟则怀德惟寧大邦惟屏也汉之郡国分建子弟则燕代边辽齐赵慚悔已莫不赋
兼千乘土过数圻赐鈇钺以专征参卿士而夹辅拜之於庙命之於庭俾其外合羣后同獎王
室是用师古率由至公某王幼奉君亲之训兼承保傅之戒罔敢失坠勤而行之忠肃孝恭资
其令德温良聪達輔以多才辨正五经之儒采述三雍之乐不自矜尚过於谦冲周旋体仁恒
久其道懿此休问流於四方朕往统藩麾尝亲戎略诸子侍从或有所闻时与之言颇详其旨
必能当我朝寄叶於师贞仍选辅车委任留府锡以彤弓之宠称其緑车之尊尔其祇承大训
以率诸夏敬兹厥服无废朕命

唐大诏令集卷三十七

卷三十八

钦定四库全书

唐大诏令集卷三十八

宋 宋敏求 编

诸王

加实封

潞王周王上柱国别食实封制

加相王封制

加邠王守礼实封制

庆王等食实封制

逊佐

温王逊位制

封郡王

降亲王为郡王制

封某王男某郡王制

封怀寧郡王制

嗣江王禕封郡王制

加乐安郡王实封制

封广平郡王等制

封皇太子男寧平原郡王等制

封诸王男为郡王制

册郡王

册赵王孝恭改封河间郡王文

册陇西郡王博又特进司宗卿文

册汉中王瑀文

除郡王官

淮安王神通等开府仪同三司制

壽春郡王成器左赞善大夫制

信安郡王禕滑州刺史制

褒信郡王璆宗正卿制

濮阳郡王澈宗正卿制

广武郡王承宏光禄卿制

信安王禕太子太师制

封嗣王

加嗣陈王实封制

封嗣濮王制

封嗣蒋王制

封嗣荆王制

嗣江王食实封制

封嗣密王制

封嗣曹王制

封嗣信王制

册嗣王

册嗣泽王文

除嗣王官

嗣泽王珣国子司业制

嗣虢王邕同知内外闲廐勅

嗣郑王希言右卫大将军制

嗣吴王祗右卫将军制

嗣许王瓘太子詹事制

嗣道王链云安等五郡节度等使制

嗣虢王巨西京留守制

嗣吴王祗太子宾客制

嗣虢王溥太仆少卿制

嗣郑王逊大理卿制

诸王男

诸王男等加封邑制

加实封

潞王周王上柱国别食实封制

門下維城道峻理恢於邑壤分社寄隆義先於榮秩雍州牧潞王賢潞州牧周王顯瑤極披禎璇源發彩令聞彰於詩禮英徽表於岐嶷戎章之寵宜允於具瞻膏腴之恩式遵於故事并可上柱國各加別食實封一千戶余如故

加相王封制

鸞台尊王子弟分裂山河式優征賦永固藩屏并州牧左衛大將軍太子左千牛衛率兼安北大都護相王地惟茂親躬此明德性安卑薄誠切沖讓頃以所食相州愿入天府章表懇到至於再三朕難違固請曲成美志然以王國所費觸類宏多漢晉已來寵錫彌盛或食邑五萬戶或連城數十里豈可遂其覽分之情忘其推恩之典宜於相州加實封一萬戶主者施行

加邠王守禮實封制

門下酬庸懋賞允屬親賢利建疏封式固藩屏光祿勳兼左金吾衛大將軍邠王守禮器資文武節蘊忠貞容范霞軒孝友天至豈如服儒歸美諒以樂善稱仁載叶推恩增其井賦伴夫作輸誓以山河可加【闕】

庆王等食实封制

門下先王之制建封有等諸侯所食征賦以歸河西軍經略節度等大使涼州都督庆王潭河東道諸軍州節度大使太原牧棣王洽河北道諸軍州經略節度大使幽州大都督鄂王潤等性皆中和行無外飾教以詩書能漸義方虽已裂於封圻竟未疇於井賦頃以孝友之性且在深宮服用之間亦從御府既申開國之典宜崇書社之數可各食邑實封二千戶主者施行

遜

溫王遜佐制

自古帝王必有符命兄弟相及存諸典禮朕以孤藐遭家多難顧茲蒙識未曉政術茫茫四海將何所屬累聖不業若墜於地王室多故宜擇長君思與羣公推崇明聖叔父相王高宗之子昔以天下讓於先帝孝友寬裕彰信兆人神龍之初已有明旨將立太弟以為副君為王懇辭未行冊命所以東宮曠位於今历年綴衣在辰禍變倉卒後掖稱制計主沖人欽奉前懷式遵理命上申先帝之意下遂黔黎之心俯稽圖緯之文仰跂祖宗之烈起今日請叔父相王即皇帝位朕退守舊藩歸於外邸凡百卿士敬承朕言克贊我天人之休期以光我有唐之鴻業布告遐邇咸使聞知【唐隆元年】

封郡王

降亲王为郡王制

鸾台树之藩屏所以固本枝也裁其亲疎所以明秩叙也緬惟上古钦若至公君不徒授臣不
虚受乘列星而挹爵禄候风景而行庆赏则固以义形廉让道叶变通者焉某周公之胤地侔
曲阜楚王之孙业盛平陆负戴忠孝践履温恭每以车服数隆并赋秩广清问之际陈乞情实
顾存优礼且期後命今者频诣阙庭累申华表志不可夺诚难固违宜旌谦损以镇浮竞可封
某郡王食邑五千户实封六百户

封某王男某郡王制

鸾台睦亲之规既隆於敦叙建侯之典或绵於恩泽某王弟若干男某璿萼疏翹珠泉演???金
相玉质形於载诞之初芝秀兰芳表於克岐之日淳深发其天性韶令观其月将可以内茂本
枝外光维翰緑车承赐载延宗戚之辉朱紱斯皇宜启山河之赋可封某郡王

封怀寧郡王制

建侯树藩命贤列土以敦戚属乃率典常司徒兼絳州刺史上柱国申王撫玉林分彩银河疏
液靡保庆灵未繁胤绪宋王宪男嗣英鲁庭学礼楚馆闻诗德辉日盛忠槩时立宜其择犹子
之序居承嫡之位卢江大都形胜攸属用图尔居莫如兹地是锡分珪之宝俾成磐石之宗可
封怀寧郡王食邑三千户【开元七年正月】

嗣江王禕封郡王制

国之宗盟树以藩屏用亲九族以制万邦朕恭默思道懋勤庶政将欲克复古训贍范方来顷
以王国絶纪旁宗入继事非允正奚妨命停而立爱自亲推恩由近虽礼云异情所未忘况其
嗣侯已积年岁永言主祭因心忧惕宜降殊常之泽俾申敦睦之道再从兄将作大匠嗣江王
禕为信安郡王蜀王?为广汉郡王再从叔太子员外率更令嗣密王彻为濮阳郡王再从兄太
子员外家令嗣越王【阙】 为中山郡王【开元十二年四月】

加乐安郡王实封制

门下兄弟之子於近属而特深恩礼之情在诸孤而更切故惠宣太子男守鸿胪卿乐安郡王
琮等咸自砥砺克修名检纘承先绪休有令闻能荣曲阜之封不忝高阳之族念往之恨已无
追於百身抚存之恩宜受赐於千室可共食实封一千户主者施行【开元二十五年七月】

封广平郡王等制

分命本枝列於庶佐博考方册斯为大猷皇太子之子倣等观其器识日以通敏仁智之性自
然忠孝之诚克备率由礼度能禀义方业既着於崇儒材可使於从政爰兹拜职宜从紫绶之
荣勉尔修身式副緑车之宠可封倣为广平郡王僖为南阳郡王倓为建寧郡王倔为西平郡
王仅为新城郡王倕为颍川郡王封庆王之子俨为新平郡王仲为平原郡王棣王之子僖为

汝南郡王侨为宜都郡王荣王之子辅为济阳郡王偕为北平郡王仪王之子侁为豫章郡王健为【阙】陵郡王颢王之子仲为荥阳郡王永王之子偁为襄城郡王壽王之子伉为河间郡王延王之子倬为彭城郡王济王之子倖为永嘉郡王【开元二十八年九月】

封皇太子男寧平原郡王等制

王者嗣统必上尊祖庙中立人纪下及孙谋所以光赞鸿猷发挥大典者也皇太子大男寧等温敏茂淑依仁游艺龢韶之岁自降其心诗礼之训夙闻於耳朕初建储两永固宗祧既当知子之明弥称抱孙之慰是用依方辨色藉土疏疆俾奉邦家式崇藩屏本支百代会协於周诗子弟毕封更隆於汉室於戏承紫极之庆稟青宫之训惟师友是敬惟忠孝是凭以善为心好贤为德古有成范尔其钦哉【正元二十一年四月】

封诸王男为郡王制

王者子弟毕封藩戚并建所以式固磐石克茂本枝故澧王大男汉可封东阳郡王第二男源可封安陆郡王第三男潢可封临川郡王故深王大男可封河内郡王第二男淑可封吴兴郡王故绛王大男沫可封新安郡王第二男湑可封高平郡王故洋王大男沛可封颍川郡王淄王男澣可封许昌郡王沔王大男瀛可封晋陵郡王祁王大男溥可封平阳郡王仍并赐光禄大夫宜令所司择日册命【太和八年八月】

册郡王

册赵王孝恭改封河间郡王文 岑文本

维贞观某年月日甲子皇帝若曰於戏肇有君长司牧黎元虽步骤殊时损益异术至於建亲勲而作屏陈龟鼎於无穷其揆一也惟尔光禄大夫行晋州刺史赵郡王孝恭器识弘通风略宏瞻亲犹凡蒋佐比燕荆皇运权舆寰区未义拥节西骛靖巴汉之妖氛受钺南伐戮荆吴之虺豕诚着经纶功宣方面及入参礼阁出总藩麾令望先於縉绅惠化洽於謡俗析珪之重允属勲庸按部之荣义存带砺是用命尔为使持节观州诸军事观州刺史改封河间郡王传之子孙永为唐辅往钦哉尔其勉兹忠孝鉴於典礼勤恤民隐无弃朕命可不慎欤

册陇西郡王博义特进司宗卿文

维龙朔三年岁次癸亥十二月庚辰朔二十四日癸卯皇帝若曰於戏睦亲之训理镜於遥图章戚之规道光於絶简若乃年耆德懋属重望隆释厘综之劳遂优闲之礼惟尔光禄大夫司礼太常伯陇西郡王博义发庆秩宗疏翹灵????资忠峻业褒义扬风怀匪磷之贞心凌後凋之劲节荣兼中外效宣文武至乃影组文昌外赞清览频致由衷之请累申降阶之谒虽镇兹雅俗载伫於芳猷而爰静浇驰重违於摛尚是用命尔为特进行司宗正卿封如故往钦哉秩亚青槐朝请之恩斯切礼华丹?序録之任攸归恩迈前徽齐踪往哲光膺宠命可不慎欤

册汉中王瑀文 贾至

维天宝十五载岁次景申七月戊子朔日皇帝若曰咨尔汉中王瑀曩御史中丞魏仲犀王室多难凶逆未诛是用建尔子姓以为藩屏命尔忠良以摄傅相安危系是举可不慎欤夫王侯之体则以任能从谏为本亲贤仗信为则以好问乐善为心安仁容衆为节然後能建其功业夹辅王室是以汉之宗王多委政守相故能享祚长久令闻不已朕闻汝瑀能寛大俭约乐善好贤敦说诗书动必由正而久於高简未习政途又闻仲犀才干振举忧勤庶绩必能固尔磐石匡补阙漏军旅之事必委其专狱讼之烦必与其决简贤任能必使其举惩恶劝善必任其断惟协惟睦其政乃成同德合义何往不济於戏瑀其镇抚黎人庄肃守位仲犀其悉心戮力赞我维城则瑀有任贤之名犀有忠勤之绩匡复社稷戡定寇讎在此行也勛哉其无替朕命

除郡王官

淮安王神通等开府仪同三司制

褒崇贤戚有国彝典厚秩清阶式隆朝望左武卫大将军上柱国淮安王神通宗室之长德器优宏缔构之功早树勲绩右武卫大将军上柱国燕郡王艺夙着嘉庸志怀浸强久司戎禁见称贞确宜加荣宠式允具瞻并可开府仪同三司

壽春郡王成器左赞善大夫制

鸾台相王旦男壽春郡王成器毓彩桂山承规椒掖韶容霞举美志月将望苑翘英瑶山伫俊宜参多士之选俾从政父之列可依前件

信安郡王禕?州刺史制

门下训俗安人是资良牧弃瑕録用兹为令典使持节卫州刺史信安郡王禕器能之美宗室所推才堪应务久当於任委防缺周身因从於降黜惟推念旧义在睦亲宜回传於方外俾分符於近服可滑州刺史

褒信郡王璆宗正卿制 孙逖

门下公族之任得之则难举亲而官选旧惟允银青光禄大夫殿中监上柱国褒信郡王璆雅性恭友虚怀敏達近属藩翰中朝羽仪无竞维人不矜於富贵克勤於位每效於忠公敦叙是司畴咨所属宜回六尚之职以副九宗之委可宗正卿

濮阳郡王澈宗正卿制 孙逖

门下宗卿设位邦族是司必择亲贤以光名器金紫光禄大夫行太仆卿员外置同正员上柱

国濮阳郡王澈清贞履道淑慎持身行无越思动不踰矩以才从政於历官而则深以地推恩在同姓而为近敦叙之任畴咨所难宜受寄於本枝更迁荣於列?可行宗正卿散官勲如故

广武郡王承宏光禄卿制 孙逖

门下银青光禄大夫行房州别驾员外置同正员广武郡王承宏地在维城庆延分土顷乖周慎因从降黜舍其小犯用申犹子之恩复其旧资俾践列卿之秩可光禄大夫光禄卿员外置同正员

信安王禕太子太师制

门下傳导元子师长庶寮必在正人无非旧德太子太师上柱国信安王禕宗室良翰朝廷硕老践忠公而立节体明肃而成用顷膺大任频摠中权掌夏司春允为六官之长戢兵禁暴何止万人之敌睦亲尚齿念旧録功宜优天秩之荣俾极官臣之位可光禄大夫守太子太师勲封如故

封嗣王

加嗣陈王实封制

鸾台睦亲之道推恩之义家国所同古今无异云麾将军行太子左鹤禁率嗣陈王延晖地承枝叶戚在葭莩幼闻诗礼躬践名教赏劝未酬并邑犹虚宜申优典用光近族延晖兄弟可别令实封一百五十户

封嗣濮王制

门下姬运睦亲曲阜祚周公之嗣汉廷继绪荆舒绍元王之封所以宗子维城本支百世也故嗣濮王余庆构北极天分源带地通五演之余润承九秀之曾晖稟训梁园冠池筠而振彩承规淮岫掩岩桂而扬芬往属艰虞苴茅中絶今逢开泰枝庶毕侯宜承并赋之荣以永山河之誓可封嗣濮王仍食实封四百户

封嗣蒋王制

门下鲁胤曹裔并为建国文昭武穆克绍明礼所以诸侯夹辅宗子维城带砺山河藩屏社稷自大运中圯天步多艰磐石之基剪焉落构今皇图再纘鼎祚维新兴废继絶尚遗凡蒋格於艺祖震悼良深故蒋王恽宗室羽仪国朝贤懿享祭无主观守丘荒非所以敦叙九族盛隆百代之义也嗣王炜第三子铕男左千牛卫长史绍宗虽以沉沦之间未光天秩而瓌姿杰气惟曰象贤可封嗣蒋王以食旧德赐食实封四百户

封嗣荆王制

门下敦族睦亲畴咨前代修废继絶率由旧典故荆王元景嫡孙沈黎县开国侯长沙男逖再从叔祖故梁郡开国公孝逸第五男皦等庆协家邦绪联戚属预闻礼训夙践义方夙藉桐珪之业合循茅土之制顷以维城中圯宗室多艰赐命弛废宅居播越今皇基重建国步永康思树本枝载昌绵祚是用分封子弟大誓山河俾夫作扞京师为我藩屏宜以逖嗣封荆王仍赐实封四百户皦可袭封梁郡开国公食邑二千户

嗣江王食实封制

门下列爵王侯是归於藩屏推恩子弟用隆於井赋尚乘奉御有阙先授嗣邓康王伯潜太子仆兼徐州别驾嗣江王禕等文昭武穆夙延殊奖沛易河诗尝闻雅训忠说懿明敏博通逸思泉奔冲情霞举中山谢其文藻北海惭其经术永言兴继载择亲贤析珪受玺惟允分封之命保国义人宜光实食之典可食实封

册嗣密王制

兴灭国继絶代天下归心焉况乃仁不遗亲德必在祀光复土宇率由教义者哉徐州刺史密王元晓望重天人地居藩屏家邦依赖休戚是均乃者王室多难睿图中缺凡我宗子咸从殛窜神龙初岁宝运绍兴爰命近属以为後嗣而胤绪凋翳是非纷杂曷子乘隙妄尸茅土神其不散非类人亦奚祀非族奠享无主永怀惻然其封元晓侄孙银青光禄大夫行太仆少卿员外置同正员东筦郡开国公彻为嗣密王以奉其祀【开元五年五月】

封嗣曹王制

朕因暇日尝幸戚藩引见诸王爰加锡宴而故信王孙林行列之间皤然白首问其年齿则七十而有七询其昭穆则玄宗之云孙朕仰思开元之时盛明之理继体承训迨於朕躬惕然动怀当食兴叹况尊祖之义立爰自亲尚齿之文由家刑国观其威仪甚整视听不衰载怀愍矜所宜敬异永惟烈祖之德用锡孝孙之庆旌其祚胤特举徽章遽外开府之秩宠以分茅之贵俾从异等式示殊恩可嗣信王仍赐开府仪同三司【开成元年八月】

册嗣王

册嗣泽王文 苏頲

维景龙四年岁次庚戌五月辛亥朔二十八日戊寅应天神皇帝若曰夫亲先之义始自家国嫡後之封终传土宇咨尔故泽王男义瑾授桐貽绪训梓垂芳性与宜於礼乐行尽成其忠孝是知周之曲阜元子建侯汉之平台共王袭父推其继美俾尔宜乎是用命尔为嗣泽王於戏率由轨训祇服彝典故可以不骄不矜迺惠迺顺北暨於上党南临於太行伟其井邑光我藩

屏往钦哉

除嗣王官

嗣泽王珣国子司业制

门下嗣泽王珣承派咸池分辉扶景锡珪前宠纂周典之亲贤磐石今隆高汉朝之子弟机彩明悟神情峻拔雅景夙成宏才早着儒庠教胄资适於下帷蕃郡理人允求於别乘衣冠就秩宜班列位之荣并赋开疆仍茂承家之业可国子司业

嗣虢王邕同知内外闲廐勅 苏頌

勅骐骏伏皂军国为容苟非懿亲莫允斯寄秘书监检校殿中监嗣虢王邕地隆藩屏才蕴忠贤以河间之硕儒膺舞阳之茂宠学穷四彻已综图书任司六尚式光轩冕必能驱马举两驂执轡用闻玉台之歌入侍瑶池之赏宜与张涉同知内外闲廐余如故【景龙三年十二月十二日】嗣郑王希言右卫大将军制 苏頌

门下银青光禄大夫太仆卿员外置同正员上柱国嗣郑王希言才推近属行稟中和用沉晦以为谋体直方而成器频外列之位尝践执金之秩历官斯久更事逾深必在亲贤用膺心膺宜领右军之寄仍直大将之任可云麾将军守右卫大将军勳如故

嗣吴王祗右卫将军等制 孙逖

门下左卫将军吴王祗等国之近属朝之多士或班聯警卫有避於天伦或列位周已行淹於岁序各移官命用广朝恩可依前件

嗣许王瓘太子詹事制 孙逖

门下宫僚之首必择正人邦圻之内实资良牧银青光禄大夫秘书监上柱国许王瓘文儒致位所谓宗英银青光禄大夫守太子詹事上柱国太原郡开国公暉言行立诚是称亲懿常以善而为乐每执谦而忘倦从政已多议能惟允弼违是属宜肃事於东宫理剧允难俾安人於左辅瓘可太子詹事暉可使持节同州诸军事守同州刺史散官勳如故

嗣道王链云安等五郡节度等使制

贾至

勅卫尉少卿嗣道王链简约忠谅既直而温镇守南服黎人用乂且三峡艰阻四方多虞按抚缉熙宜分权总俾尔揽轡固兹磐石可充云安夷陵南浦南平巴东等五郡节度采访处置防

御等使【至德二载正月五日】

嗣虢王巨西京留守制 贾至

勅京师初复宫室始清可择宗臣俾之居守银青光禄大夫守太子少保嗣虢王巨惠和忠谅贞干含弘尝处节制之权更居师傅之任嘉猷允塞茂绩居多可以固我维城殿兹邦国可权充西京留守余如故【至德二年九月二十九日】

嗣吴王祗太子宾客制 常袞

勅古者选孝弟閎博有道术者辅翼太子今以宗室之老处师宾之位亦亲亲而教敬也光禄大夫检校工部尚书兼宗正卿上柱国嗣吴王祗文昭之庆蔚於公族楚元之後继有忠贤達道虚怀寛厚廉谨藩翰旧德人伦宪行更於内外职事颇修年在华皓未尝衰堕参会府而百工时叙掌宗卿而九族益亲每托肺腑深加优礼宜以冬官之重仍在春储之列可兼太子宾客其检校工部尚书及散官勲封如故

嗣虢王溥太仆少卿制 元稹

勅正议大夫行宗正丞嗣虢王溥守随州司马员外置同正员李逢等昔我宪宗章武皇帝法尧睦族深惟本枝乃诏执事曰伯父叔季幼子童孙在官各率乃诚无替厥职溥可权知太仆少卿逢可守袁王府长史余如故

宗正卿嗣郑王逊大理等制 钱珣

勅九卿问重而显者大宗正与廷尉实次奉常焉易官而处惟典之章具官逊等皆吾属之桢干也而又荷出相容戟之门逊继分郡符必闻其政久历庶位咸称有材克助承忠孝之家践修罔坠多所该练扬於缙绅今载葺京师敬先宗庙资乎集事速以成功而方备法官是宜改秩往趋狱务更在励精伏念旬时狱可知也我有其律逊其尽心可依前件

诸王男

诸王男等加封邑制

鸾台昔子弟咸建姬祚以隆支体毕侯汉国斯永某王男某等普谷分彩天池演派金相比暎玉树聯芳垂髻钦爱敬之风总角闻诗礼之训三雍肇建万品维新褒德叙劳式遵行庆之典疏藩树屏允叶推恩之令可封襄阳县开国男

唐大诏令集卷三十八

卷三十九

钦定四库全书

唐大诏令集卷三十九

宋 宋敏求 编

诸王

降黜

降魏王泰东莱郡王诏

黜梁王忠庶人诏

降永王璘庶人诏

嗣岐王珍免为庶人诏

漳王湊降封巢县公制

追复

成王千里还旧官制

收葬

谯王重福三品礼葬诏

收葬绛王诏

听越王归葬诏

追赠

皇第三子玄霸追封卫王等制

海陵郡王元吉追封巢王制

諡汴哀王璿制

贈恒山愍王承乾荊州大都督制

贈河東郡王瑾太子少師制

榮王故男贈文安郡王制

太子第二男追封縉雲郡王賜名諱制

冊贈

冊贈渤海王文

降黜

降魏王泰東萊郡王制

詔曰朕聞生育品物莫大於天地愛敬罔極莫重於君親是故為臣貴乎盡忠虧之者有罰為子在於行孝違之者必誅大則肆之市朝小則終貽戮辱雍州牧相州都督左武侯大將軍魏王泰朕之愛子寔所鍾心幼而聰令頗好文學恩遇極於隆重爵位逾於寵章不思聖哲之戒自構驕僭之咎惑諛諛之言信離間之說以承乾雖居長嫡久躋疴恙潛有代宗之望靡遵義方之則承乾懼其陵奪泰亦日增猜阻爭結朝士竟引凶人遂使文武之官各有托附親戚之內分立朋黨朕志存公道義在无偏彰厥巨衅兩從廢黜非惟作則四海亦乃貽範百代可解雍州牧相州都督左武侯大將軍并削爵土降為東萊郡王改封順陽王於均州為封邑制宅以處之

黜梁王忠庶人詔 上官儀

東台朕儲祉上玄嗣膺景祚獵先聖之經踐至公之道底罰行賞御物同歸房州刺史梁王忠居庶孽之地在髫髻之辰柳奭遂良交結無忌頻繁進說勸立東朝朕以副宮之位宜遵周道苟非其人不可虛立正以宗臣之寄仰在諸公旦夕勤懇難違其意及正嫡升儲退居列屏樂善之事案於賓僚窺怨之詞日盈牀第婦女阿劉遠有陳告迹其罪狀蓋非一途乃偽作過所入關云欲出家逃隱又令急使數詣京師覘候兩宮潛問消息自說妖夢戴通天冠喜形於色以邀非望每召經師祀龍祈福畫千菩薩愿升本位每於晨夕着婦人衣妄有猜疑云防細作又嗟嘆柳奭稱其為我悼傷韓瑗情發於詞朕初見此言疑生怨謗故遣御史大夫理及中書官屬相監推鞠証見非虛然其地則人臣親則人子懷奸匿怨一至於斯擢髮論罪良非所喻

考之大义应从极罚皇后情在哀矜兴言垂涕再三陈请特希全宥朕戚属之中频亏国典緼维前载匪徒兹子属怀於此犹深愧叹特宜屈法降为庶人主者施行

降永王璘庶人诏

诏曰臣子之节君亲是奉或志怀干纪当义在灭私盖前王所以持法割恩垂涕行戮言念及此叹息弥深顷以凶孽乱常关畿暂阻朕乘輿南幸遵古公避狄之仁皇帝受命北征兴少康复夏之绩犹以藩翰所寄非亲莫可永王璘谓能堪事令镇江陵庶其克保维城有俾王室而乃弃分符之任专用钺之威擅越淮海公行暴乱违君父之命既自貽殃走蛮貊之邦欲何逃罪据其凶悖理合诛夷尚以骨肉之间有所未忍皇帝诚深孝友表请哀矜虽綰绶全体礼可行於曩制而削土勿王事亦着於前史昔广州有罪因废为人常山免诛爰将徙地是用矜其万死屈於九刑宜寬伏鑕之命俾黜析珪之典可悉除爵土降为庶人仍於房陵郡安置所由郡县勿许东西朕存训诱勸之忠孝不虞孱懦遂至昏迷申此典章弥增媿叹

嗣岐王珍免为庶人制

经国之制贰则有辟为臣之道将则必诛况亲则宗秩义兼家国敢怀逆节自桎严刑银青光禄大夫宗正卿员外置同正员嗣岐王珍志在倾邪行惟险薄顷以寇迹未殄军国多虞因集不逞之徒潜为乱常之计乃欲远通叛虏构此凶谋以有上封备闻其状犹以亲属初亦致疑遂令推按具自承伏且王者立法百代所遵稽彼常科罪当殊死以其可讳不忍加刑俾从放黜以申寬典宜免为庶人仍於溱州安置至彼捉搦勿许东西其同谋左武卫将军窦如玢试都水使者崔昌右羽林军使刘从諫蔚州长塞镇将朱融右卫将军胡列直司天台通玄院高抱素右卫率魏兆内侍省内谒者监王道成等九人特宜斩决试太子洗马兼知司天台冬官正赵非熊陈王府长史陈闲楚州司马张昂左武卫兵曹参军焦自荣前凤翔府郡县主簿李崑国子监馆进士张奂等六人特宜决杀驸马都尉薛履谦同逆谋宜赐自尽【上元二年四月】

漳王湊降封巢县公制

王者教先立爱义不遗亲岂於同气之中可致异词之间如或慎修不至诖误有闻构为厉阶犯我邦纪未加殛窜尚屈彝章漳王湊手足之亲磐石是崇位居宠秩列在戚藩顷多克顺之心亦有尚贤之志而满盈生患败覆是图奸凶会同谋议滋及污我皇化彰於中外初骇予衷载惊羣听尚以未具狱词犹资审克建侯之命姑务从寬於戏朕嗣守宗祧敷弘至教自家之训未立掩义之私敢忘是用降封有丑朝典凡百多士宜谅朕怀

追复

成王千里还旧官制

地有二南载怀敦睦罪非七国奄隔休明故左金吾卫大将军兼益州都督上柱国成王千里懿亲贤德高才重器强力干事独冠等伦保国义人克成忠义愿除凶丑翻?诛夷永言沦没良深痛悼俾复旧班用加新宠可还旧官

收葬

谯王重福三品礼葬诏

集州刺史谯王重福幼则凶顽长而险詖幸托体於先圣尝通交於巨逆子而不子自絶於天有国有家莫容於代往者颇不含忍长令幽繫自大行晏驾韦氏临朝将肆屠灭尤切防卫洎天有成命集於朕躬永怀犹子之情庶叶先亲之义所宜开置寮属任隆刺举冀其悛改以怙恩荣而诖误有徒狂狡未息便即私出均州诈乘驿骑至於都下遂逞其谋先犯屯兵次烧左掖计穷力屈投河而毙虽人所共弃而邦有常刑我非不慈尔自招咎且闻其故有恻於怀昔刘长既没楚英遂殒以礼收葬抑惟旧章屈法申恩宜仍旧宠可以三品礼葬

收葬绛王诏

叔父绛王为逆贼等援立切窥天位无讨贼之意遂使忠义衔冤及王师擒贼义旅问罪前驱勇气以致殲殂朕伏以太皇太后慈仁思以慰解宜令有司量事收葬申恩讨贼刑礼之中示乎四方以明朕意【宝历二年十二月】

听越王归葬诏

越王事迹国史着明枉?非辜寻已洗雪其子珍他事配流数代漂零不还京国玄真弱女孝节卓然启护四丧绵历万里况是近族必可加恩行路犹或嗟称朝廷固须恤助屡委宗正等京兆府与访越王坟墓报知如不是陪陵任附莹卜葬其葬事仍令京兆府接借必使备礼葬毕玄真如愿住京城便配咸宜观安置【开成四年六月】

追赠

皇第三子玄霸等追封卫王制

饰终定諡往代通规追远赠荣前王令典第三子玄霸幼挺岐嶷早茂珪璋楚哀王智云结髮仁明胜衣敏惠冀其成立训以义方未被趋庭遽同过隙兴言夭枉震悼於怀今王业初隆庆赏伊始既式遵於利建宜稽古於哀荣玄霸可追封卫王諡曰怀智云可追封楚王諡曰哀【武德七年七月】

故海陵郡王元吉追封巢王制

诏曰有虞受终弘肆赦之典隆周革命笃亲亲之恩海陵郡王元吉地惟藩翰夙承朝宠?於不軌得罪君亲朕嗣膺灵命无忘敦睦同生之重既切於本支在原之悼实纏於岁月兴言泉壤思备宠章可追封巢王諡仍依旧【贞观十六年六月】

諡汴哀王璿制

門下緣情制禮聖賢所不忘以諡易名古今之同貫故右千牛衛大將軍上柱國汴王璿雖在韶趾頗標疑岐率以訓典期於老成裂地而封是崇藩屏享年不永俄從夭折秀而不實有以傷嗟宜遵考行之義以備飾終之典可諡曰哀

贈恒山愍王承乾荊州大都督等制

門下聖人立言因親以立愛王者垂范追遠以崇德故伯祖恒山愍王承乾堂伯贈越州都督象再从兄玘等慶藉大宗連華近屬既稱叔父之國亦云兄弟之政短長日命久從於淪沒哀榮有典未洽於褒崇宜贈徽章以弘寵敷承乾可贈荊州大都督象可贈鄒國公玘可懷州刺史

贈河東郡王瑾太子少師制

門下親親以相及先王之道也追遠以歸厚聖人之教也故金紫光祿大夫太仆卿員外置同正員河東郡王瑾克嗣克訓是為懿方茂枝葉式崇垣翰推恩有寄稟命不融興言游從良深軫悼宜贈師保之位以備哀榮之典可贈太子少師賻物三百段米麥三百石

榮王故男贈文安郡王制

禮以飾情恩以悼往詢於前訓則有旧章榮王故男像粵在幼冲是稱岐嶷習詩書而日就資友悌於自然方冀成立克開土宇而龜蒙未錫麟族先凋奄爾淪逝良增傷惻宜加贈於苴茅且兼榮於符竹可贈文安郡王使持節督武威郡諸軍事應緣喪葬一事已上宜官供令京兆少尹程若水充使檢校

太子第二男追封縉雲郡王賜名諱制

親親之義於禮斯重傷悼之戚緣情則深太子故第二男性与聰達體資韶令早服龍樓之訓有光麟趾之風年始勝衣已彰孝愛方洽弄孫之慶遽悲殤子之魂追以九命封之二等仍加美稱賁爾徽命可贈揚州大都督封縉雲郡王食邑三千戶賜名諱【大曆三年七月】

冊贈

冊贈渤海王文上官儀

维龙朔二年岁次壬戌五月十五日皇帝使大司成彭阳郡开国侯令狐德棻副使正议大夫行司宰少卿薛敏恭持节册命曰咨夫存着嘉猷殁膺褒显所以甄明景行昭纪勲烈况地居懿戚业茂惟贞用式畅情之礼实光追宠之义惟尔故金紫光禄大夫原州都督渤海郡王奉慈器范闲裕风裁淹远德优时彦望重宗英析瑞名区早荷推恩之泽分符奥壤累藉宣条之任清白闻於朝野威惠暴於毗迩固以功着旗常誉光图史者矣而壽仁时爽贞徽淹谢永言亲懿震悼良深是用赠王为都督荆陕岳朗四州诸军事荆州刺史右卫大将军余如故魂而不昧嘉兹荣宠呜呼哀哉

唐大诏令集卷三十九

卷四十

<史部,诏令奏议类,诏令之属,唐大诏令集

钦定四库全书

唐大诏令集卷四十

宋 宋敏求 编

诸王

册妃

册虢王刘妃文

册齐王韦妃文

册桂阳郡王杨妃文

册壽王杨妃文

册荣王郑妃文

册潁王独孤妃文

册永王侯莫陈妃文

册荣王薛妃文

册济王崔妃文

册信王卢妃文

册陈王韦妃文

册壽王韦妃文

册盛王武妃文【缺】

册广平王崔妃文

册凉王张妃文

册蜀王田妃文

册杞王窈妃文

王妃入道

度壽王妃为女道士勅

收葬王妃

收葬遇害王妃诏

睦亲族

宗姓官在同列之上诏

魏王泰上括地志赐帛诏

令宗属姑叔不得拜子侄制

勉励宗亲诏

选宗子授台省官及法官京县官诏

天下三等以上亲赴上都制

甄叙皇属勅

诫励

责齐王佑诏

诫诸王任刺史别驾文

册妃

册虢王刘妃文

维贞观年月日皇帝遣使持节册命曰於戏惟尔刑部尚书彭城县开国公刘威德第二女地胄清华志怀婉顺训彰图史誉闻邦国式遵典礼作伉大藩是用命尔为虢王妃往钦哉其光膺徽命可不慎欤

册齐王韦妃文

维贞观年月日於戏惟尔兼大常卿扶风郡开国男韦挺长女地胄高华质性柔顺训彰礼教誉表幽闲作伉藩闱实惟朝典是用命尔为齐王妃往钦哉

册桂阳郡王杨妃文

景云二年岁次辛亥十月庚寅皇帝若曰於戏咨尔故桂阳王妻杨氏诞承华绪光袭懿风性识柔明言容婉嫕观诗着范蹈礼成规往应高祿作嫔英邸谨环佩之节珊有其章励繁藻之诚恭而式叙遣使某持节册命尔为桂阳郡王妃尔其克保彝训率由茂则以正於家无替厥命往钦哉

册壽王杨妃文

维开元二十三年岁次乙亥十二月壬子朔二十四日己亥皇帝若曰於戏树屏崇化必正闾闱纪德协规允兹懿哲尔河南府士曹参军杨玄璲长女公辅之门清白流庆诞鍾粹美含章秀出固能徽范夙成柔明自远修明内湛淑问外昭是以选极名家伉兹藩国式光典册俾叶龟谋今遣使户部尚书同中书门下李林甫副使黄门侍郎陈希烈持节册尔为壽王妃尔其敬宣妇道无忘姆训率由孝敬永固家邦可不慎欤

册荣王郑妃文

维开元二十三年岁次乙亥十二月壬子朔二十七日戊寅皇帝若曰於戏作配藩维以正风训莫不明慎聘纳聿求仪范咨尔前相州邺县令郑博古第二女素闻淑哲自稟幽闲习玩不华图史成则宜其发祥茂族高选当代俾因邦媛之求式叙闾闱之化今遣使侍中裴耀卿副使吏部侍郎席豫持节册尔为荣王妃尔其勉兹孝敬诚彼满盈祗率大猷永膺宠数可不慎欤

册潁王独孤妃文 孙逖

维开元二十五年岁次丁丑七月辛巳朔十日辛卯皇帝若曰於戏树之外屏义在於展亲修

其内则礼先於择配咨尔故右骁卫郎将独孤礼第十二女轩冕之族通姻自久贤明之行淑问攸归早习组紃之功备详图史之学实资女士以俪藩维今遣使工部尚书同中书门下三品牛仙客副使行黄门侍郎陈希烈持节册尔为颍王妃尔其克慎威仪无忘孝敬钦承国命永茂嫔风可不慎欤

册永王侯莫陈妃文

维开元二十六年岁次戊寅正月庚午朔十八日丁亥皇帝若曰於戏燕翼之树实属於维城婚姻之礼必求於宜室咨尔右羽林军长侯莫陈超第五女天资清懿性与贤明衣冠之绪克稟於闾德环佩之容详备於闺训是赖尚柔之质以弘乐善之心宜配藩维用膺典册今遣使金紫光禄大夫兵部尚书兼中书令集贤院学士修国史上柱国晋国公李林甫副使中大夫中书侍郎集贤院学士上柱国徐安贞持节册尔为永王妃尔其恭所职淑慎其仪惟德是修以承休命可不慎欤

册荣王薛妃文

维开元二十九年岁次辛巳三月壬午朔十八日巳亥皇帝若曰於戏古人大猷谅在婚礼必资令淑以俪藩维咨尔京兆府新丰县令薛巘长女地承华族门传雅范本幽闲之性为礼教所成循图览史蹈和履顺固可归於邦第穆彼嫔风是用命尔为荣王妃今遣兵部尚书兼侍中牛仙客副使黄门侍郎陈希烈持节礼册尔其敬佩前规克勤内则式瞻清懿垂美无穷可不慎欤

册济王崔妃文

维开元二十九年岁次辛巳五月庚戌朔十四日癸亥皇帝若曰於戏乃媵藩王既开邸第必求士女以昭闾则咨尔故绛州司士参军崔承宠长女家承茂族代袭清和自幼及长素有柔和之性监循国史复懋幽闲之德徽猷益着淑问可嘉是以膺兹宠章主彼中馈是用命尔为济王妃今遣使兵部尚书兼侍中牛仙客副使黄门侍郎陈希烈持节礼册尔其敬佩箴训克慎威仪辅我维城永崇磐石可不慎欤

册信王卢妃文

维天宝三年岁次癸未七月戊戌朔二十一日戊午皇帝若曰於戏建邦为屏必先於闾教嘉耦曰妃是赖於嫔则咨尔前殿中省尚书辇局直长卢季融第三女淑德贤明令仪柔顺含和自整备详环佩之容稟训有方更出衣冠之族实资女范作配藩维是用命尔为信王妃今遣使尚书右仆射兼右相晋国公李林甫副使银青光禄大夫行中书侍郎徐安贞持节礼册尔其肃穆闺闱??礼度克终妇道以正国风可不慎欤

册陈王韦妃文

维天宝四载岁次乙酉三月己未朔十九日丁丑皇帝若曰於戏咨尔京兆府新丰县尉韦金第八女庆承华族礼冠女师钦若保训践修德范遵图鉴史操尚幽闲内则嫔仪道彰柔顺陰教之美国风攸属允资邦媛作配藩闈是用命尔为陈王妃今遣使尚书左仆射兼右相吏部尚书集英院学士修国史晋国公李林甫副使中书舍人兼判刑部侍郎孙逖持节礼册尔其率循懿行懋昭令德祇膺典册可不慎欤

册壽王韦妃文

维天宝四载岁次乙酉七月丁巳朔二十六日壬辰皇帝若曰於戏古之建封式崇垣翰永言配德必择幽闲咨尔左卫勳二府右郎将韦昭训第三女毓庆高门稟柔中阃动修法度居玩琴瑟夙闻师氏之学素习公宫之礼聿求贞懿作俪藩维爰兹辅佐之德以成乐善之美是用命尔为壽王妃今遣使光禄大夫行左相兼兵部尚书弘文馆学士李适之副使金紫光禄大夫行门下侍郎集贤院学士兼崇玄馆大学士陈希烈持节礼册尔其钦承宠数率由令则恭敬妇道可不慎欤

册广平王崔妃文

维天宝五载岁次庚戌四月癸未朔十八日戊戌皇帝若曰於戏朱邸传封爰求嘉耦琮筭作合必择华宗咨尔太子宫门郎崔珣长女胄自轩冕训承图记柔闲内正淑问外宣既连荣於姻戚且袭吉於龟筮是用命尔为广平郡王妃今遣使光禄大夫行门下侍郎陈希烈持节礼册尔其?奉仪则只膺典礼克昌祚胤永固宗祧可不慎欤

册凉王张妃文

维天宝九载岁次庚寅四月己未朔十七日乙亥皇帝若曰於戏内则之礼用穆人伦中饋之义以正家道咨尔左卫率府亲府左郎将罗国公张安仁第二女门承轩冕族着清华蕙性柔明兰仪婉茂早习组紃之艺克闻图史之规仪范聿修四德斯备??苹藻之训式昭珩璜之容作俪英藩允资令淑今遣开府仪同三司行尚书左仆射兼右相吏部尚书崇文馆大学士监修国史上柱国晋国公林甫副使中大夫行中书舍人权知礼部侍郎事上柱国成纪县开国男李暉持节册尔为凉王妃尔其祇膺典礼永绥宠命可不慎欤

册蜀王田妃文

维建中二年十一月某日皇帝若曰於戏夫茂建亲戚以惇族固本明慎聘纳以厚别蕃嗣实人伦之始王教之端也朕奉若谟训详求淑哲贤必有象鍾庆於今门姻不失亲载光於戚里故某官驸马都尉田择交第若干女生稟柔惠习知礼则容德纯备孝睦洽闻可以叶美好述辅成乐善之用遣使某持节册命为蜀王妃於戏敬之哉备礼以崇其好合起家而居其爵佐非义信不固非温柔不亲克?匪懈则罔攸悔朕言必复可不慎欤

册杞王窈妃文 陆贽

维建中二年十一月某日甲子皇帝使某官某持节册命故某官窈某第若干女为杞王妃曰於戏礼大婚姻崇继嗣本人伦之教诗嘉淑女配君子系王化之纲盖率人成风由内及外得不采嘉耦以固磐石本宗室而御家邦详求唯难历选滋久时乃择之得兹旧姻柔懿本乎天和礼乐成於家法明章妇顺?奉母仪克成鹊巢之功叶宣麟趾之美祇膺嘉礼钦率内教淑慎厥止无替有终於戏可不慎欤

王妃入道

度壽王妃为女道士勅

勅圣人用心方悟真宰淑女勤道自昔罕闻壽王瑁妃杨氏素以端懿作嫔藩国虽居荣贵每在精修属太后忌辰永怀追福以兹求度雅志难违用敦宏道之风特遂由衷之请宜度为女道士

收葬王妃

收葬遇害王妃诏

祸福之源天不可问报应之道理或难凭遂使积善深仁并罹荼毒元恶大憝得恣凶残自古以来未免斯咎日者禄山作逆窃据两都涂炭我生灵伤夷我骨肉於礼院门遇害王妃及男子等或闺闈令德妇道柔闲或藩邸象贤幼年聪慧苍黄之际?没贼中嗟其无辜并遭非命兴言及此痛悼良深宜令所司即择日收葬一事已上并令官供其失骸骨者亦令招魂神而有感庶从改卜之安魂兮来归将就新莹之吉【元年建丑月】

睦亲族

宗姓官在同列之上诏

朕受终揖让君临四海普天之下同加惠泽宗绪之情义越常品宜有旌扬以明等级诸宗姓官宜在同列之上未有职任者不在徭役之限每州置宗师一人以相管摄别为团伍所司明立条式【武德二年正月】

魏王泰上括地志赐物诏

地记之设由来尚矣区外具於山海经内陈於夏载职方王制才举华夷汉志晋图各有所纪自兹以後着述实繁或学非博通尚多遗阙或地分南北域有长短求其折中无闻尽善左武侯大将军雍州牧相州都督魏王泰体业贞固风鉴凝邈学综策府文冠词林乐善表於夙夜

好士彰於吐握讨论輿地详延儒雅博采方志得之於旧闻旁求故老考之於传言内殫九服外极八荒宪章是程规条有序兼包戎夏今古无遗简而能周博而尤要是以度越前载垂之不朽宜加褒锡以申奨劝可赐物一万匹其书付秘阁【贞观十六年正月】

令宗属姑叔不得拜子侄制

君臣朝序贵贱之礼斯殊兄弟天伦先後之仪亦异圣哲之制率由斯道朕临兹宝极位在崇高负扆向阳虽受宗枝之敬退朝私谒仍用家人之礼近代以来罕遵轨度王及公主曲致私情姑叔之尊拜於子侄违法背礼情用惻然自今已後宜从革弊安国相王及太平公主更不得辄拜卫王重俊兄弟等及长宁公主姊妹等先告宗属知朕意焉【神龙元年三月】

勉励宗亲诰

诰朕奉天明命?受睿图而皇室子弟未能称职堂侄余庆永煦绍宗行淹祚洽 从弟燧至谦等不能谨身奉法而乃轻侮国章摈斥边隅未为塞责朕悯其愚昧屈法伸恩并追赴京令於国子监安置读书如悔过自新克复先训所司条奏当议其官皇宗亲更有左贬岭南及边远州非恶逆缘坐等色亦宜准此其有见任别驾年齿尚幼未堪理百姓者宜委中书门下及新兴郡王晋李思训等简择追赴京其禄俸一事已上并要本州勾当每季附送入京交付其余庆等本州禄俸亦准此宗亲中有才行灼然为衆推挹者按察使其以名闻朕当擢以不次自今已後有犯赃私违悖礼经者准法科处刑兹无舍庶敦睦之情必闻於九族自家刑国允洽於羣心宜各勉励以识朕意【先天二年二月】

选宗子授台省官及法官京县官诏

至公之用本无偏党唯善所在岂隔亲疎四从叔知政等咸有才名见推公族秉惟清之操兼致远之资朕每虑同盟不勤於德尝悬右职以劝其余先委宗卿精於内举量能考行历载踰时名数则多列闻盖寡光膺是选谅在得人固可擢以清要迁於台阁将观志於七子异齐名於八人宜各悉行得闻成绩书不云乎九族既睦平章百姓冀由内而理外必自近而及远凡今懿戚可不慎欵违道慢常无私於王法修身效节岂薄於他人期於率先励我风俗深宜自勉以副明言【开元三年五月】天下三等已上亲赴上都制 常袞

勅尧之敦叙以协万邦周之宗盟必先同姓莫远具迓怀德惟宁俾强?於京师思同奨於王室所以洽雍和之道明补察之义也惟我近属聯华本枝以文昭武穆之宗有锡土建侯之嗣往以艰难之际流寓颇多或僻在江山载经时序或杂居州里亦既淹留等威不分无以自给俭将逼下卑或踰尊将恐合族展礼之文缺燕毛叙齿之仪废言念及此良深耿仄其三等已上亲除州县官及带职掌应在外者委本道节度观察量事给逋发遣赴上都仍先録名闻奏

甄叙皇属勅

勅五代则迁以尊祖祢三族之别以辨亲疎故礼曰祖迁於上宗易於下六代而亲属竭矣先王所以叙昭穆明等夷不可得而变革也应追赴山陵及先在城於西宫陪位同五等亲宗子等系自本枝分於天???系之以姓而无别约之以礼而有差朕天祸所鍾哀纏罔极嗟我公族俨然来斯远倍七月之期俯就三年之制降杀以等存乎典彝名位不同礼亦异数有司定仪将从藉属之条天下为家用广孝慈之道惇睦九族其在兹乎应追到及在城同五等亲宗子等五品以上各加一阶六品已下前资常选并散官至简日稍优与处分未出身者量才授文武散官其中有才行学艺为衆所推者及嗣羣王尝经任使灼然着声绩者宜委宗正卿琬汉中郡王瑀光禄卿涵録其名实具状闻荐自天宝以来阙造宗籍宜令宗正等重申旧制昭辨等序即宜勘造图籍宣示中外知朕意焉

诚励

责齐王佑诏

吾尝诫汝勿近小人正为此也内乖成德外感非言自延伊祸以取覆灭痛哉何愚之甚也为梟为獍忘孝忘忠扰乱齐郊诛夷无罪去维城之固就积薪之危坏磐石之基为寻戈之衅背礼违义天地所不容弃父无君神人所共怒往是吾子今为国讐万纪存为忠烈死不妨义汝则生为贼臣死为逆鬼彼则嘉声不陨而尔恶迹无穷吾闻郑叔汉戾并为猖獗岂期生子乃自为之吾所以上慙皇天下愧后土惋叹之甚知复何云【贞观十七年二月】

诫诸王任刺史别驾勅

朕闻司牧兆人有国彝训敦叙九族前王令典念此宗枝久遭沉翳近从班命庶展才能或授外藩或属内职留念访察属想风兹罕立嘉声或闻蠹政当官不存於职务处事多?於偏私禽荒酒德者盖多乐善敬贤者全少将性之昏昧违此义方岂朕之不明成尔薄德当从戒慎勉遂悛改如迷而不复自速???尤已实为之悔之无及宜即逌相告示以副朕怀【景云元年十二月】

唐大诏令集卷四十

卷四十一

钦定四库全书

唐大诏令集卷四十一

宋 宋敏求 编

公主

封号

封长宁公主等制

封常芬公主等制

封唐昌公主等制

封高都公主等制

封永宁公主制

封临晋公主制

封平昌公主制

封高阳公主制

封太华公主制

封壽光公主制

封广宁公主制

封大长公主制

封永阳长公主制

封真宁公主等制

封永昌公主制

封七女公主制

封十二妹等四人长公主制

封太和长公主制

封定安大长公主制

封延庆公主等制

封万壽公主等制

封盛唐公主制

册文

册信成公主文

册昌乐公主文

册高都公主文

册建平公主文

册永宁公主文

册临晋公主文

册真阳公主文

册华阳公主文

册益昌公主文

封号

封长宁公主等制

门下紫宿扬辉爰称婺女绛河分彩是曰天孙柔德所资乃生淑媛长宁公主等孕灵圆魄稟粹方仪载极幽闲用光婉顺皇基再造景命惟新凡在懿亲咸申礼命肃雍之地未展徽章宜正此银宫署兹金榜并开汤沐广宣朝庆可依前件

封长芬公主等制

黄门诸女皆封先王之制第二女等庆联霄汉体自穠华常閱礼於后庭必闻诗於师氏朕抚临亿兆宪章古昔俾裂山河之赋用酬汤沐之恩可依前件主者施行【开元三年十二月】

封唐昌公主等制

邦女下嫁义着周经帝子建封制存汉传朕训导诸子旧有女师因其婉婉之性进成肃雍之德能鉴图史颇知法度今选婚华族待礼笄年宜加玺绶之典俾开汤沐之赋第四女可封唐昌公主第六女可封常山公主第八女可封宁亲公主各食实封五百户唐昌公主出降张垪俱用八月十九日所司详备礼物式遵故事【开元十六年】

封高都公主等制

门下肃雍之范以成女德汤沐之赐爰着国章第十一女等生於公宫训以师氏温惠之性颇有天姿图史之学仍闻日就初笄甫及外馆将归宜因待礼之期式备疏封之典可依前件仍各食实封一千户主者施行

封永宁公主制

门下自昔帝女必建封邑典章不易等数攸存第十七女幼而闲和长实徽懿引图史以自鉴用肃雝而成德将择近日言遵下嫁宜承汤沐之赐以备车服之庸可封永寧公主食实封一千户主者施行【开元二十一年】

封临晋公主制

门下汤沐建封古今通典岂独贵於宠数亦兼崇於美名第二女性与柔和生知法度率以师氏之训成其天然之质有行之礼将及於笄年备物之恩俾开於井赋可封临晋公主食实封一千户【开元二十五年十二月】

封平昌公主制

门下诗美肃雍远着於风雅礼有封建久存於简策第十九女尚柔成德克顺由衷稟於天然

自有闲和之性训以师氏备详图史之学宜开汤沐俾叶典章可封平昌公主食邑一千户主者施行

封高阳公主制

用嘉成德将及推恩疏封锡号礼典攸在第二十女资身淑慎禀训柔明克备肃雍之仪允彰图史之德而方营鲁馆宜启沁园俾承宠於中闱复增荣於列赋仍食实封一千户【开元二十九年】

封太华公主制

肃雝禀德邦化所崇汤沐疏封古训斯在第二十一女践修闾则素承阿保之严砥砺嫔仪率由图史之范璫珩既佩柔愿无违蕙问充昭常华自着肇施彩级将具礼於輜駟载锡粉田俾申荣於井赋可封太华公主食实封一千户【天宝四载】

封壽光公主制

肃雍之德教始闺闱汤沐之封荣分爵土第二十二女二十三女诞膺【阙】发令姿颇【阙】沐宫公之训遵师氏之则顾史瞻图日将月就华宗叶庆方从下嫁之仪盛典申荣式备开封之制二十二女可封壽光公主二十三女可封乐成公主仍各食实封一千户【天宝五载】

封广寧公主制

睦亲之序必备恩荣加命之贵是存优宠顺成公主诞姿中掖习训公宫惠心有孚淑问斯着夙蕴柔闲之操克彰婉婉之规式闲汤沐虽已申於筑馆爰择井田俾有光於改邑可封广寧公主依前实封一千户【天宝八年】

封大长公主制

门下周室展亲系车服之等汉氏右戚崇汤沐之封永惟加恩必遵旧典第九妹碧渚开祥绛河疏彩成斋庄之惠问有明婉之芳徽训自九重备兹四戒虽肃雍之咏彤管既彰而穠李之赐粉田犹阙空承金屋之庆式昭银榜之宠可封大长公主

封永阳长公主制

皇第十妹可永阳长公主

第十一妹可晋宁长公主

第十三妹可文安长公主

皇女怀阳郡主可汉阳公主

咸宁郡主可晋安公主

信安郡主可东阳公主

清源郡主可阳安公主

武陵郡主可西河公主

晋康郡主可襄阳公主

第十八女可浔阳公主

第二十一女可临汝公主

第二十二女可思平公主

第二十三女可邵阳公主

门下庆阳之泽允洽於家邦肃雍之德宜正其封邑第十六女等皆夙稟柔明幼闻懿范传图史之训行表中闱奉苹蘩之则义昭外馆朕嗣膺丕业爰贲宠章宜申汤沐之封以彰车服之等丕承懿号允副恩荣可依前件【贞元二年】

封真宁公主等制

门下第二女等皆以柔懿备闻夙训知中闱内则之义稟傅姆女史之规礼有待年恩从广爱徵於旧典俾洽疏封式分汤沐之荣庶成肃雍之德弘我庆泽被於家邦可依前件【元和元年八月五日】

封永昌公主制

门下普宁公主天泉滋德崇兰发彩纂组之华每工於经目保阿之训深得於稚年容礼必叶言行无间从容珩璜之韵婉婉柔嘉之仪而封疏旧邦礼宜改避是择美邑再用申恩可封永昌公主主者施行

封七女公主制

门下长女等抱子弄孙之荣贵贱之大情也朕以四海奉皇太后于南宫问安之时诸女侍侧螽斯之庆上慰慈颜鸣鳩之仁内怀均养虽穠华可尚出阁末期而汤沐先施分封有据宜加美号以表令仪

封十二妹等四人长公主制 白居易

勅古者帝子下嫁必使王公主焉近代或有未笄年而赐汤沐者亦加公主之号以宠重之第十二妹等先帝之子也比朕之子宜加等焉故当幼年各封善地咸命为长公主未及厘降先开邑封所以慰太后慈念之心表先帝肃雍之训亦欲使吾孝理之道敦睦之风自骨肉间以及天下可依前件

封太和长公主制

勅公主之封号也或以善地或以嘉名立爱展亲兹惟旧典第四妹端明成性和顺禀教静无违礼故组紉有常训动必中节故环佩有常声岁茂穠华日新淑问乃眷肃雍之德俾开汤沐之封可依前件【长庆元年三月】

封定安大长公主制

门下我国家制取戎夷推崇恩义示之以大信重之以和亲所以殫声教於殊邻割骨肉之深爱累圣弘略载於国章太和公主擢秀天潢聯华宸极智惟周物识可洞微乃者回鹘输诚愿求相好穆宗皇帝义难违拒且务怀柔以凤楼和淑之姿降龙庭桀骜之俗一朝辞阙二纪於兹常兴去国之悲已絶还乡之望今可汗自窃名号来依塞垣朕以渥泽久濡飘零可悯齎以粟帛喻之旋归曾无感激之心益肆贪婪之性遂得忠义同力将帅协谋未扬金鼓之音已溃犬羊之衆遽收贵主出彼穹庐上以慰太后之深慈下以攄兆人之积愤将修庆覲坐雪幽冤名节自全叹尚何极笳箫凄悲休传朔漠之声环佩铿锵再齿平阳之列是用易其旧邑锡以嘉名增沁园汤沐之封释边地风沙之思举兹典礼用表忠勤祇服宠荣永光简册可封定安大长公主【会昌三年二月二十五日】

封延庆公主等制

门下车服之制载美周诗汤沐【阙】

等并禀庆绛河流芳彤管穠华懿淑

雅志静专柔顺之心叶於礼度肃雍之道庆於言容宜锡粉田之荣用昭银榜之贵可依前件【会昌二年十月十日】

封万壽公主制

长女可封万壽公主

第二女可封永福公主

第三女可封西华公主

第四女可封广德公主

第五女可封和义公主

第六女可封饶安公主

门下诸女之封始资汉制疏邑之典今为国章长女等坤道禀柔条风育德庄敬柔顺受粹气於灵源言容法度昭穆徽於内则祥降北渚教袞南薰克成天和更承姆训虽年方韶胤而体备肃雍用洽私宠俾开井赋可依前件【会昌六年五月二十三日】

封盛唐公主制

门下展亲外馆则必待年广爱中闱宜光启邑第六女祥开银汉秀发金枝孝敬生知柔闲夙禀克奉姆师之训每遵诗礼之文法度自持穠华益茂爰申彝典载锡嘉名俾承汤沐之封式示邦家之庆可封盛唐公主备礼册命

册文

册信成公主文

维开元二十五年岁次丁丑八月癸卯朔十五日丁巳皇帝若曰於戏易着于归诗称下嫁所以正风化厚人伦也咨尔信成公主淑慎由衷柔明形外训以师氏颇详环佩之仪修其妇功更习紃紃之艺日徵先近年及有行宜锡徽章俾膺茂典今遣使金紫光禄大夫兵部尚书兼中书令集贤院学士修国史上柱国晋国公李林甫副使中大夫守中书侍郎集贤院学士徐安贞持节礼册尔其光昭闕德弘长国风无怠厥心永绥介福可不慎欤

册昌乐公主文

维开元二十五年岁次丁丑八月癸卯朔二十九日辛未皇帝若曰於戏好合之礼以正人伦肃雍之德用成妇道咨尔昌乐公主生知法度性与和柔亟闻彤管之言颇识采苹之事素以为绚既闲於内则梅有其实式遵於下嫁宜膺册书之命以备车服之荣今遣银青光禄大夫工部尚书牛仙客副使黄门侍郎陈希烈持节礼册尔其钦崇四教承顺六姻式是大邦受兹明命可不慎欤

册高都公主文

维开元二十五年岁次丁丑九月十一日皇帝若曰於戏古之圣人垂训作则必正内外之位以明婚姻之礼咨尔高都公主生於公宫自稟幽闲之性教以师氏更有徽柔之则能循法度克慎言容鲁馆于归沁园将启宜膺册命俾叶典章今遣使工部尚书牛仙客副使黄门侍郎陈希烈持节礼册尔其自下於心增修厥德式瞻清懿永固恩荣可不慎欤

册建平公主文

维开元二十五年岁次丁丑九月十一日皇帝若曰於戏修五礼者必本於天秩合二姓者将厚於人伦咨尔建平公主秉质尚柔因心克顺默识闾帷之教明徵图史之言黼藻四德笙簧六行河洲在咏将叶於好逮汤沐疏封式昭於备礼今遣使兵部尚书李林甫副使中书侍郎徐安贞持节礼册尔其受兹光宠慎乃威仪永保无疆之休且为将来之范可不慎欤

册永宁公主文

维开元二十六年岁次戊寅八月丁酉朔二十二日戊午皇帝若曰於戏人伦式教以正国风女子有行将成妇道咨尔永宁公主自幼及长终温且惠引图书为镜鉴用柔和为粉泽许嫁而笄既遵於典礼备物之册宜承於宠命今遣使金紫光禄大夫兵部尚书兼中书令集贤院学士修国史上柱国晋国公李林甫副使中大夫守中书侍郎集贤院学士上柱国徐安贞持节礼册尔其谦恭自下淑慎为先无忝公宫之教永贻邦媛之则可不慎欤

册临晋公主文

维开元二十六年岁次戊寅闰八月丁卯朔十六日壬午皇帝若曰於戏古之帝子下嫁诸侯所以正婚姻之懿纲昭肃雍之令德咨尔临晋公主蹈和成性体顺为心颇协生知之敏更承师氏之训柔明并着淑慎攸彰兼四教而不违勤六行而无斁近日云吉嘉礼有期宜穆彝章载光策命今遣侍中幽国公牛仙客副使黄门侍郎陈希烈持节礼册尔其克遵法度用广徽猷发明闾德垂范於後可不慎欤

册真阳公主文

维开元二十八年岁次庚辰二月戊子朔八日乙未皇帝若曰於戏肃雍之德崇妇道也河洲之训厚人伦也咨尔真阳公主柔顺因心幽闲表质雅着闺闈之则能瞻图史之诚徽章载茂淑范无违礼将及於有行宠宜循於赋邑今遣使兵部尚书兼侍中牛仙客副使黄门侍郎陈希烈持节礼册尔其敬慎威仪无致失坠用膺宠命克保宜家可不慎欤

册华阳公主文

维大历四年岁次乙酉三月壬申朔五日丙子皇帝若曰汉家旧制诸女皆封仪服比於藩王膏腴封其井赋咨尔第某女承徽自远诞秀增华仁孝才明夙有天资之庆言容法度成於壺教之慈敏達知微周旋中节肃雍是宪婉静流芳虽仅在韶年礼未王於同姓而载扬淑问德已冠於成人宜锡典章用疏国邑是用册曰某公主钦承天命可不慎欤

册益昌公主文 薛廷珪

维乾宁元年岁次甲寅十月庚寅朔十四日癸卯皇帝若曰昔汉颁鲁国魏赐常山由锤爰以分封亦旌贤而别壤前王茂典历代成规朕今嗣守不敢失坠咨尔第七女兰茁芳猷肃雍懿范坤顺之性体於自然天倪之资稟於陰教不明尔德孰慰我心爰稽旧章俾率彝训乃疏汤邑仍锡粉田所以示鸣鳩均养之仁乐螽斯宜尔之庆夙兴夜寐无忘女史之箴下气怡声勉习家人之礼女仪妇道可不慎欤

唐大诏令集卷四十一

卷四十二

钦定四库全书

唐大诏令集卷四十二

宋 宋敏求 编

公主

出降

公主王妃不许舅姑父母答拜诏

详定公主郡县主出降仪勅

出降册文

册兴信公主出降文

册乐成公主出降文

册寿光公主出降文

册平昌公主出降文

册广寧公主出降文

册晋宁公主出降文

册嘉成公主出降文

加实封

太平公主加实封制

长宁安乐公主加实封制

宣城公主加实封制

镇国太平公主加实封制

常芬公主食实封制

和蕃

止和蕃公主入朝制【缺】

金城公主降吐蕃制

封永乐公主制【缺】

封燕郡公主制

封东光公主制

封和义公主制

封宁国公主制

和蕃册文

册金城公主文

册交河公主文

册和回纥公主文

册崇徽公主文

遣黜

郾国大长公主别馆安置勅

追封

追封华阳公主制

追封玉虚公主制

追封齐国大长公主制

赠故同昌公主卫国公制

諡议

安兴公主諡议文

出降

公主王妃不许舅姑父母答拜诏

天地之尊人伦已极舅姑之敬礼经攸重苟违斯义有戮彝则如闻公主出降王妃作嫔舅姑父母降礼答拜此乃子道攸替妇德不修何以式序家邦仪型列阍自今以後可明加禁断使一依礼法若更有以贵加於所生者令所司随事纠闻【显庆二年二月】

详定公主郡县主出降仪勅

冠婚之义人伦大经昔唐尧降嫔帝乙归妹逮於汉氏同姓主之爰自近古礼教陵替公主郡主法度僭差姻族阙齿胄之仪舅姑有拜下之礼自家刑国有愧古人今县主有行将俟嘉命俾亲执枣栗以见舅姑敬遵宗妇之仪降就家人之礼事资变革以抑浮华宜令礼仪使与礼官约古今仪礼详定公主郡县主出降觐面之仪以闻

出降册文

册兴信公主出降文

维开元二十九年岁次辛巳闰四月辛巳朔十八日戊戌皇帝若曰於戏先王作则女子有行必开汤沐之封以成雍肃之美咨尔兴信公主自幼及长含和尚柔鉴图史而思齐勤组紃而无戮能遵法度克茂幽闲教於公宫既昭雅训归於外馆宜穆彝章今遣使吏部尚书兼中书持节徐安贞持节礼册尔其益自修饰不忘诚慎俾昭淑问贻永无穷可不慎欤

册乐成公主出降文

维天宝五载岁次庚戌七月辛亥朔二十三日壬申皇帝若曰於戏三纲以正王化是先二姓之合人伦式叙下嫁之礼厥惟旧章咨尔乐成公主毓质柔明稟性闲婉幼彰惠问长有令仪教於公宫颇閱於图史导以内则克勤於纂组琮笄既袭绀纁斯荣方谐卜凤之期式叶从人

之典今遣特进行尚书右仆射兼左相吏部尚书晋国公林甫持节册命往钦哉尔其祇率外礼??中馈顺而不违谦而不满日新其德以正家人可不慎欤

册壽光公主出降文

维天宝五载岁次庚戌八月辛巳朔十三日癸巳皇帝若曰於戏家人以正易着乎词女子有行诗载其义王化之本妇道攸先咨尔壽光公主敏质柔闲资性纯懿芳衿内穆淑问外宣能遵阿保之训颇闻诗书之旨习兹彤史既禀教於中闈袭以琼笄斯待年於外馆龟谋允叶鸾节方舒率是旧章式兹典礼今遣使光禄大夫行门下侍郎同中书门下平章事陈希烈副使中大夫给事中王壽持节礼册往钦哉尔其祇勤敬德斧藻令仪履顺居中以永终誉可不慎欤

册平昌公主出降文

维天宝五载岁次庚戌十二月戊申朔九日丙辰皇帝若曰於戏婚姻之序人伦为大家道以正王化乃贞咨尔平昌公主性质闲婉襟灵敏悟柔顺外徽和惠内融公宫道训备闻勤俭之则女史箴规克慎言容之范颇闻图象既习紘紃方修中馈之仪式从下嫁之礼闕车遵路僇度在庭归尔好仇申旌宠典今遣使特进行尚书左仆射右相吏部尚书晋国公李林甫副使朝散大夫守中书舍人李暉持节礼册往钦哉尔其?修令德祇服厥训循於法度宜尔室家可不慎欤

册广宁公主出降文

维天宝九载岁次庚寅四月己未朔二十六日甲申皇帝若曰於戏本於王化正乃人伦始於国风成於妇道咨尔广宁公主柔仪明婉淑性和惠端闲外肃敏悟内昭禀训公宫法度彰於懿范受教女师言容顺於闕德颇闻图史能习组紃方遵下嫁之仪式备亲迎之礼三星迨吉百两于归申以徽章弘兹宠命今遣使特进行左相兼兵部尚书崇玄館大学士集贤院弘文馆大学士上柱国颍川郡开国公陈希烈副使正议大夫给事中权知刑部侍郎上柱国渭源县开国男李麟持节礼册往钦哉尔其祇膺典礼勤修内则宜尔家室叶於雍肃可不慎欤

册晋宁公主出降文 常袞

维大历七年岁次壬子七月庚辰朔十六日乙未皇帝若曰於戏春秋之义下嫁之礼主於同姓送以上卿克明大伦协用彝典咨尔晋宁公主孝敬闲婉朗然夙成法度言容资於内训词礼是则令淑增华封鲁之荣已开汤沐适齐之美史洽肃雍宠尔有行举兹成命今遣使金紫光禄大夫门下侍郎同中书门下平章兼弘文馆大学士知馆事充太清宫使上柱国齐国公王【晋】持节礼册尔其奉公宫之教和邦族之姻载扬夙徽永作来范敬承明诫可不慎欤

册嘉成公主出降文

维贞元二年岁次乙丑六月甲子朔十二日乙亥皇帝若曰王者以义睦宗亲以礼敦风化义之深实先於友爱礼之重莫大於婚姻故春秋书筑馆之仪易象着归妹之吉予用是祇考明义率由旧章咨尔嘉成公主特稟生知秉承光训行必中则意不违仁柔谦孝友惠和纯懿嘉乃全德时惟成人疏邑启封命为公主徽章备物礼实宜之今遣使金紫光禄大夫检校司徒同中书门下平章事汧国公勉持节册命於戏戒哉下嫁诸侯谅为古制肃雍之德见美诗人和可以克家敬可以行已奉若兹道永孚於休懋昭令问无替朕命光膺盛礼可不慎欤

加实封

太平公主加实封制

鸾台睦亲之序诚有节而难踰褒善之方谅无私而可洽太平公主延祥紫极稟庆彤闈月至渐宫下金娥而毓照星分汉渚回宝婺以凝姿践素依仁更缉柔闲之范闻诗践礼还装婉顺之容毓悟发於天机聪敏协於神授所以特鍾先爱偏荷圣慈动辄承恩言必中旨故秦台下凤礼越於常仪鲁馆乘龙荣该於美选自蜃轩既路蛩岩閤寝途遥千里时亢九炎攀从莫由荒号孰寄公主亲承委属代申悲苦涉履山川念徒行而弥切奠奉明夕哀独荐而逾勤宫务毕修闈容胥备中外咸允情理兼极朕以某虽有殊效盖是恒途而凡典枢机固申奏请岂可以私亲之嫌累夫公道之平分宜增汤沐之荣以表肃雍之誉可加实封

长宁安乐公主加实封制

门下长宁公主安乐公主等金波毓彩宝婺凝辉蕴诗礼於心台畅柔明於性府肃雍成德婉婉居怀非弄玉之能方岂修瑶之是美特荷掌中之爱尤鍾膝下之慈宜锡宠荣再崇汤沐可更加食实封一千户通前满二千户

宣城公主加实封制

门下敦族睦亲事光彝典分形共气理冠恒伦宣城公主庆联霄极荣开邸馆柔和应图婉顺为范义归从子荣匪求即国难初平朝獎思及宜加并赋式崇优宠可加实封五百户

镇国太平公主加实封制

门下功定宗社者可以高迈等夷事超缣简者故能永昭徽烈镇国太平公主若华分景穠李疏芳以同气之亲鍾先朝之爱忠孝行已仁明絶伦才无不周识无不综顷夷国难爰戴朕躬忠义动天恳诚贯日氛祲已廓每听鸣谦之词井田未优复闻辞贵之请朕方至公被物岂以小节从人宜增土宇更传带砺可加实封一千户

常芬公主食实封制

常芬公主公宫成训归妹有仪锡号疏封虽以洽於前典推恩食邑犹未崇於後命宜书沐赋之荣式昭筑馆之义可食实封五百户用今年九月丁巳出降张去盈所司详备礼物式遵故事【开元十九年】

和蕃

金城公主降吐蕃制

圣人布化用百姓为心王者秉仁以八荒无外故能光宅遐迩财成品物由是隆周理历恢柔远之图强汉乘时建和亲之义斯盖御?长策理邦茂范朕受命上灵克纂洪业总三才而统极混六合以为家声教所覃建木棘林之外提封爰亘弱水流沙之表悠然至道高咏薰风载戢干戈大张礼乐庶几前烈克致和平睠彼吐蕃僻在西服皇运之始早申朝贡太宗文武圣皇帝德侔覆载情深亿兆思偃兵甲遂通姻好数十年间一方清静自文成公主化往其国因多变革我之边隅亟兴师旅彼之蕃落颇闻雕弊顷者赞普及祖母可敦酋长等屡披诚款积有岁时思托旧亲请崇新好金城公主朕之少女长自宫闈言适远方岂不锺念但朕为人父母志恤黎元始允诚祈更敦和好则边土宁晏兵役休息遂割深恩为国大计宜筑外馆聿膺嘉礼降彼吐蕃赞普即以今月二十七日朕亲自送於郊外【景龙四年正月】

封燕郡公主制

汉图既采蕃国是亲公主嫁乌孙之王良家聘毡裘之长钦若前志抑有旧章余姚县主长女慕容氏柔懿为德幽闲在性兰仪载美蕙问增芳公宫之教夙成师氏之谋可则今林胡请属析律无外虽柔远之仁已私於上略而由内之德亦质於元女宜光兹宠命睦此蕃服俾遵下嫁之礼以叶大邦之好可封为燕郡公主出降与松漠郡王李鬱于【开元十年】

封东光公主制

炎汉盛礼蕃国是和乌孙降公主之亲单于聘良家之子永惟前史率由旧章故成安公主女韦氏六行克昭四德聿备渐公宫之训承内则之诚属林胡请命扞塞无虞柔远之恩已归於上略采楚之庆载睦於和亲宜正汤沐之封式崇下嫁之礼可封为东光公主出降饶乐郡王鲁苏

封和义公主制

呼韩来享位列侯王乌孙入和义通姻好怀柔之道古今攸同宁远国奉化王骠骑大将军阿悉烂达于志慕朝化誓为边扞渐声教而有孚勤职责而无阙诚深内附礼异殊邻爰锡嘉偶特申殊渥四从弟前河南府考城县令参第四女质稟幽闲性惟纯懿承姆师之训导实宗党之光仪固可以保合戎庭克谐邦选宜膺远好以宠名蕃可封和义公主出降宁远国奉化王

封宁国公主制

朕闻古之圣王临御天下功懋受赏道无隔於华夷义存有孚信必全於终始故能德被寰宇化延殊俗是以周称柔远克着康济之图汉结和亲式弘长久之策由来尚矣朕祇若元命永惟稽古内申九命勉膺嗣夏之期外接百蛮庶广怀荒之泽顷自凶渠作乱宗社阽危回纥特表忠诚载怀奉国所以兵踰絶漠力徇中原亟除青犢之妖实赖乌孙之助而先有情款固求姻好今两京底定百度惟贞奉皇舆而载宁纘鸿业而攸重斯言可复厥德难忘爰申降主之礼用答勤王之志且骨肉之爱人情所鍾离远之怀天属尤切况将适异域宁忘軫念但上缘社稷下为黎元遂抑深慈为国大计是用筑兹外馆割自中闱将成万里之婚冀定四方之业以其诚信所立家国攸宁义以制名式崇宠号宜以幼女封为宁国公主应缘礼会所司准式其降蕃日仍令堂弟银青光禄大夫殿中监郡王瑀充册命英武威远毗加可汗使以堂侄正议大夫行右司郎中上柱国上邽县公赐紫金鱼袋选为副特差重臣开府仪同三司行尚书左仆射冀国公裴冕送至界首凡百臣庶宜知朕怀【乾元元年六月】

和蕃册文

册金城公主文 沈佺期

景云二年岁次辛亥【阙】月甲辰朔二十日癸亥皇帝若曰咨尔金城公主幼而敏惠性实柔明徽艺日新令容天假先帝承皇祖之宝训继文成之旧姻割天性之慈徇安人之业何苍生不幸紫宸【阙】代朕勉及丕业兢守大烈永怀同气注存遗体靖言河湟无忘鉴寐汤沐之数信命之勤追平昔而载深於骨肉而加等於戏礼之降杀大系於情情之厚薄抑亦在我今犹子属爱何异所生然叔父继恩更思敦睦是用命朝散大夫试司宾少卿护军曹国公甘昭充使试詹事丞摄太子赞善大夫沈皓仙为副持节往册尔为朕长女依旧封金城公主率由嫔则无替尔仪载光本朝俾义蕃服可不慎欤

册交河公主文

维开元二十一年岁次庚辰四月丁巳朔十五日辛未皇帝若曰於戏大邦为好蕃服维宁岂独元夫亦资良偶咨尔十姓可汗开府仪同三司蒙池都护阿史那□妻凉国夫人李氏柔懿成性幽闲表仪能修关雎之德克奉苹蘩之礼自祇率辅佐肃言容载茂彤箴允谐内则是以崇宠蕃扞怀柔远人将适遐荒更荣封邑是用册尔为交河公主尔其叶化蕃邦竭诚妇道膺兹宠命可不慎欤

册和回纥公主文

维大历二年岁次丁未五月巳酉朔十三日辛酉皇帝若曰帝乙归妹表於易象鲁侯筑馆列在春秋咨尔第某女云汉之姿联华宸极河洲之德着美公宫整玉笄於锦车题银榜於毳幙善修嫔则载叶蕃情实资辅佐之功广我怀柔之道乌孙下嫁巳申饰配之仪红绶增荣爰宠

疏封之命是用册曰某公主敬承徽礼可不慎欤

册崇徽公主文 常袞

维大历四年岁次已酉五月戊辰朔二十四日辛卯皇帝若曰於戏鲁邦外馆有小君之仪汉室和亲从阙支之号命公主而疏邑以封煥於徽章抑有前范咨尔第十女稟秀云汉增华女宗卓尔洵淑迥然昭异肃雍之道能中其和縟丽之功自臻於妙不资姆训动会礼经甫及初笄之年眷求和凤之对用开汤沐方戒油輶我有亲邻夙称雄贵分救灾患助平寇虞固可申以婚姻厚其宠渥况有诚请爰从归配是用封曰崇徽公主出降回纥可汗册曰可敦割爱公宫嫔於絕域尔其式是阃则以成妇顺服兹嘉命可不慎欤

譴黜

郾国大长公主别馆安置勅

妖妄莫甚於巫蛊罪恶莫逾於奸乱迹涉於此刑其舍诸郾国大长公主藻质天潢不慎其德行违礼法悉匿回邪信妖孽之虚言求厌胜之非福悯其将老之年从我议亲之典置於别馆勿谓无恩其子萧位不思谏正手疏祝词其弟儒僊及异父兄驸马都尉裴液相与知情陷於不义蜀州别驾萧鼎商州丰阳令韦恠前彭州司马李万等谬居清贯轻紊常伦在其门庭多行秽德

忝列衣冠之绪岂宜履舄之交【阙】宜令京兆府决重杖四十配流贺州裴掖绵州安置萧佩儒僊等并配房州安置其萧位等并驰驿发遣【贞元三年】

追封

追封华阳公主制

周汉之仪汤沐之制车服次於王后容卫荣於戚藩其淑德竟谢於茂年成礼未主於同姓则加其宠荣举於前典是以东汉追平原之封西晋崇宸献之命故第五公主天纵柔和性成聪敏爰自辨识秀於人伦仁义切於哀诚怡顺适於师训先意承旨不待名言省體适饌每加丰洁送迎匪憚於寒暑温扇无待於傍人甘去繁奢乐闻礼教将有词情必候温顏或遇劳神辄形焦色周旋六行讽咏七篇霁威怒以拯危承欢愉而进善常求惠下聚请求贤而髻鬋之辰清羸多疾沉绵衽席弥历纪年针艾婴身药餌在口异在殊常之命实有兼爱之慈与之名都假以荣号筑馆之盛乃从受邑之期方遇优典未彰幼龄已谢追怀既往痛悼滋深方展礼於旧章稍申哀於备物叶予素志厚尔饰终可追封华阳公主【大历九月四月】

追封玉虚公主制

勅因亲之爱存则均慈缘情之礼歿而逾厚故某【阙】公主敏识冲和韶姿婉秀纯孝之性自合於天经柔顺之心夙成於阃则动唯中礼言必知徽承夙烈之元风悟道家之真籙方开鲁馆甫往有行未启汉封遽幽长往念其早夭倍軫哀情用追汤沐之荣载锡灵仙之号可追封玉虚公主

追封齐国大长公主制

勅荆南节度使观察处置等银青光禄大夫检校兵部尚书兼江陵尹御史大夫上柱国沂水县开国子食邑五百户王潜母赠晋国大长公主於朕祖宗之姊妹也始以肃雍之德下教於公侯淑问怡声礼无违者抚其爱子有过严君不因恩泽以求郎每教忠贞以事主使勤富贵戒励廉能鬱为勲臣实资圣善徽猷尽在典礼宜加尚狭平阳之封式广营丘之地克宣朕命用慰朕心可赠齐国大长公主

赠同昌公主卫国公主制 沈畋

门下死生有命虽着於格言天横难明岂由於定数每念肃雍之德载纏悲愴之怀疏土易名用申彝典故同昌公主生知孝敬天锡聪明桃李凝华芝兰蕴秀克奉公宫之训寧烦女史之箴洎结庆秦楼传芳鲁馆苹繁洁淨环佩铿锵不矜帝子之尊尽执家人之礼谓乎积善享彼修龄惊电逝以霜摧致珠沉而玉折粉田芜没金榜凄凉荒沁水之林园寢平阳之箫鼓哀情靡极縟礼宜加启卫国之山河择周公之諡号式崇徽教用慰营魂可赠卫国公主兼赐諡曰文懿仍令所司择日册命主者施行

諡议

安兴公主諡议文 沈佺期

议曰臣闻表终受名素存考行王姬内范貽教潜流徽问积中知之在下公主降灵宸极畀庆高祿贞惠日严柔明天纵英姿灼乎髻鬋夙智形於襁褓孝为德本资色以养亲礼即敬輿履谦而轨物生成天族长自华宫珠玉满堂不忘於澣濯歌鍾成列载玩於图史?闻懿风庶覩嫔则未延百两奄邁重泉皇帝正位瑶图追荣金榜穠华大秀軫余悼於生前彤管凝芬追令名於没後谨按周礼諡法容仪?美曰昭慈仁短折曰怀请諡曰昭怀公主谨议

唐大诏令集卷四十二

卷四十三

钦定四库全书

唐大诏令集卷四十三

宋 宋敏求 编

郡县主

县主出嫁称适诏

新都郡主适杨泚制

安乐郡主适杨守文制

新都郡主适卢咸制

义安郡主适裴巽制

封安定郡主制

封新平郡主制

东光县主事迹入国史诏

封寿昌县主制

寿昌县主适崔珍制

封仙源县主制

封永年县主制

封华亭县主制

封安吉县主制

加襄乐县主等实封制

封恩王等女为县主制

郡县主

县主出嫁称适诏

古称厘降惟属王姬比闻县主适人皆云出降娶王女者亦云尚主滥假名器甚乖礼经其县主出嫁宜称适取王女者称娶仍改令文【显庆二年九月】

新都郡主适杨泚诏

鸾台皇太子长女新都郡主资灵玉裕比价瑶台发艷天庭仰俪星辰之像徽诸禁内夙稟河洲之德惠心明婉柔范端庄始踰待年之期甫及有行之岁通事舍人杨泚门擅槐庭地连姻戚箕裘克隆才质兼茂可以膺合姓之典奉御轮之躅標梅兴咏方邀六礼之欢在楚言归宜迨三星之夕郡主可出适杨泚

安乐郡主适杨守文制

鸾台皇太子第八女安乐郡主承规银榜毓彩铜楼宝婺连晖琼娥比艷贞明发於闾训窈窕齐於国风固已仪范不僭柔闲有裕苹蘩入荐既成四教之德桃李方春宜用三周之礼可出适符节郎弘农杨承烈男守文

新都郡主适卢咸制

鸾台皇太子第二女新都郡主相王长女寿昌县主第二女安兴县主等并毓灵天汉稟训皇门惠性早成芳规克茂粉泽四教针缕七篇笄年在时令月有典宜穆三从之礼式光百两之迓新都郡主可出适左卫翊卢成寿昌县主可出适太子右奉御杨尚一安兴县主可出适梁王府参军薛琳所司准式

义安郡主适裴巽制

鸾台皇太子第二女义安郡主重月降辉发春扬彩四德淳茂六行?修岁在结纓时方纳币均州司仓裴巽门胄清显风范昭明既谐委雁之祥宜縟盘螭之礼郡主可出适巽仍以今月十四日成礼所司准式

封安定郡主制 孙逖

门下故惠宣太子第三十女肃雍成性柔婉为容禀训女师克嫔嫔则爰占近日用叶初筭申锡美名受封良邑可封安定郡主主者施行

封新平郡主制 孙逖

门下惠宣太子第三十一女柔姿婉训淑德闲和早习组紃备详图史移天有礼撰日于归宜增列郡之封允叶睦亲之计可封新平郡主主者施行

东光县主事迹编入国史诏

故纪王女东光县主忠性纯孝雅操贞烈感兴运之方启痛亡灵之不迫休戚是同悲喜交集发言哽塞因致殂谢闻之伤惋震於予怀忠孝之情深可嘉尚宜命史官编入国史【神龙元年三月】

封寿昌县主制

鸾台相王旦长女第三女第四女等毓灵河汉禀训天人蕙问清淑兰仪婉顺徽章所披抑有□之封式开汤沐之邑长女可封寿昌县主第二女可封淮扬县主第四女可封寿光县主

寿昌县主适崔珍制

鸾台相王长女寿昌县主第五女仙源县主并禀灵天汉渐训王门质耀桃李性分兰蕙帝孙将降甫及笄年国人所承允归时望清庙斋郎崔珍太子左奉御薛伯阳并地袞衣冠躬履名教风猷美茂才艺纷纶飞凤之占既合其吉乘龙之背宜膺双举寿昌县主可出适珍仙源县主可出适伯阳仍令所司准式例

封仙源县主制

鸾台相王第五女资灵桂魄禀训兰宫六行昭宣四德淳备夭桃穠李既挺淑令之姿红绶青綰宜开汤沐之邑可封仙源县主

封永年县主制

鸾台某王某第几女毓芳桂苑发艷淑庭绣衽初笄已观於婉淑瑶筐载弄更表於柔闲韶容将宝婺分晖惠质与琼蛾比秀承规蹈礼既渐训於河洲延宾推恩宜加荣於汤沐可封永年县主

封华亭县主制

黄门司空兼虢州刺史邠王守礼第二女王门诞秀师氏尚柔婉嫕凝芳闲和顺则伫仪膏族俾锡脂田可封华亭县主【开元二年九月七日】

封安吉县主制 苏颋

黄门宋王长女流芳桂邸禀训梧宫体自闲和成其婉婉玉笋始茂金燧方严爰宠锡於脂粉俾开荣於汤沐可封安吉县主主者施行【开元二年十二月二十八日】

加襄乐县主等实封勅 孙逖

勅故惠宣太子女襄乐县主等德禀贤王名高淑女资其婉顺遭此偏孤念远之德惟恩是属宜受赐於汤沐俾承荣於敦叙可各赐实封一百户

封恩王等女为县主制

王者教化本於婚姻由亲以及疎自内而形外故诗称好合所以成子姓也礼有待年明其必及时也?惟累圣之後子孙衆多教於公宫已知妇顺而从人之义重择配之才难以兹兢慎久旷嘉礼言念及此惕然兴怀思弘厚恩用叶敦叙恩王等女六人并封县主仍委中书门下与宗正卿及吏部尚书侍郎计会於诸亲之内及常选之中精求人门副我诚意【元和六年十二月】

唐大诏令集卷四十三

卷四十四

钦定四库全书

唐大诏令集卷四十四

宋 宋敏求 编

大臣

宰相

命相一

裴寂萧瑀左右仆射制

裴寂司空制

长孙无忌右仆射制

房玄龄杜如晦左右仆射制

李靖右仆射制

长孙无忌司空制

温彦博右仆射制

高士廉右仆射制

长孙无忌司徒制

房玄龄司空制

狄仁杰内史制

韦嗣立平章事制

崔日用参知机务制

姚元之同三品制

张说检校中书制

刘幽求知军国大事制

刘幽求同三品制

张说中书令制

姚崇兼紫微令制

卢怀慎平章事制

卢怀慎检校黄门监制

源乾耀平章事制

宋璟兼黄门监苏颋平章事制

张说同三品制

张说兼中书令制

命相一

裴寂萧瑀左右仆射制

端揆之职综理百司任望斯重勲贤攸寄尚书左仆射魏国公寂风格淹粹局量弘雅早预经纶元功特着燮谐治本茂绩以宣中书令宋国公萧瑀志怀贞确业履冲素历居显要砺精治术献纳惟允周顺有闻宜穆彝章允厘庶政寂可尚书左仆射瑀可尚书右仆射【武德六年四月】

裴寂司空制

槐路清肃台阶重峻经邦论道燮谐是属然而表德优贤昔王令典庸勲纪绩列代通规尚书左仆射魏国公寂地胄清华风神闲悟立志温裕局量弘雅爰自义旗早参締构宜契所感实

资同德譬兹梁栋有若盐梅翊赞绸缪庶政惟允历居端揆彝章缉穆元功懋德宠秩未臻宜处鼎司膺兹重望可司空【武德九年九月】

长孙无忌右仆射制

望隆朝右任重国钧尚想风徽义惟贤戚吏部尚书齐国公长孙无忌识量宏远神情警发道昭搢绅才资文武罍俎之策电断风驰干戈所指云销露澈机深之理弥着忠义之节以彰斯固立德佐时降灵辅阙宜期以翼赞授之端揆可尚书右仆射【贞观元年七月】

房玄龄杜如晦左右仆射制

尚书政本端揆任隆自非经国大材莫或斯举中书令兼太子詹事邢国公房玄龄器宇沉邃风度宏远誉彰遐迩道冠簪缨兵部尚书检校侍中蔡国公杜如晦识量清举神彩凝映德宣内外声溢庙堂朕自克平宇县缔构资始叶赞经纶厥功甚茂深谋秘略动合规矩忠义谠言事多启沃及典司枢要绸缪宸扆开物成务知无不为可谓神降英灵天资人杰并宜总司衡轴光阐大猷玄龄可尚书左仆射余如故如晦可尚书右仆射【贞观三年二月】

李靖右仆射制

端右望隆寄任尤重实资勲德朝难其选左光禄大夫行兵部尚书代国公李靖识度宏远才略优赡博综机务兼资文武诚着夷险效彰吐纳便蕃省闕详谨有闻宜缉彝伦允兹名器可尚书左仆射【贞观四年八月】

长孙无忌司空制

论道台阶寔赖明哲丹青神化寄深燮理自非盐梅是属栋干有归则旷职俟能罔或必备开府仪同三司齐国公无忌器宇凝正风度峻远才包文武地兼贤戚诚着草昧之辰业预艰难之始功侔十乱声高三杰亮采铨衡庶僚有序仪型端右彝章以穆自任参鼎司位班槐路摛挹之美形於搢绅翼赞之规章於帷扆宜崇名器允副具瞻可司空所司具礼以时册命【贞观七年十一月】

温彦博右仆射制

文昌治本端副望隆朝纲所属选衆斯在中书令虞国公温彦博体业贞固学艺该明器惟瑚琏材称栋干任总丝纶职居近密廼心着於帷幄嘉谋表於樽俎寄深启沃义切盐梅宜升礼闈允兹彝序可尚书右仆射勲封如故【贞观十年三月】

高士廉左仆射制

司会政本执法任隆历选攸难惟贤是属特进尚书申州刺史上柱国申国公高士廉器宇冲邈机神峻远材称栋干望重缙绅地惟姻娅廼诚着於畴昔业预经纶嘉庸彰於夷险出总方岳入赞机衡献替之情誉光八舍銓总之美声洽九荒启沃是寄盐梅斯在宜貳端右允副式瞻可尚书左仆射特进刺史勲官封并如故【贞观十二年七月】

长孙无忌司徒制

古先哲后咸正庶官德优者爵高功多者禄厚是以经邦纬国必俟萧曹之勲燮理陰阳允归鍾华之望司徒赵国公无忌识量弘博风度峻远地惟亲贤材称梁栋缔构霸业茂勲着於艰难弼成王道廼心竭於寅亮盐梅是寄丹青攸属德综机衡声猷具举自升槐铉岁月亟移固以勒美太常书忠甲令者矣宜陟中台式典邦教可司徒【贞观十六年七月】

房玄龄司空制

惟天为大资四序以成功惟王建国候三台以弘化故隆汉受命吴邓飞声有晋勃兴荀何底绩开府仪同三司尚书左仆射太子少师上柱国梁国公房玄龄器范忠肃识具明允才称王佐望乃时英霸图爰始预经纶之业鼎命惟新赞隆平之化诚固金石勲勒钟鼎自任总庶尹职重朝端心力尽於翼亮忧劳积於岁序而志在冲退有怀止足固陈衰痾屡上表疏然则燮揆礼阁职务实繁论道槐庭望实攸属宜加宠命平兹水土可司空【贞观十六年七月】

狄仁杰内史制

鸾台赞谋帷幄秉钧之任为重典综丝纶挥翰之才是属银青光禄大夫守纳言上柱国汝阳县开国男狄仁杰地华簪组材标栋干城府凝深宫墙峻邈有八龙之艺术兼三冬之文史雅達政方早膺朝寄出移节传播良守之风入践台阁得名臣之体岂惟怀道佐明见期於管乐故以竭诚匡主思致於尧舜九重肃侍则深陈可否百辟在庭则显言得失虽从容顾问礼被於皇闈而斟酌轻重事隆於紫诰宜迁掌闕之秩式懋专车之宠可守内史散官勲封如故主者施行【圣历三年十二月十八日】

韦嗣立平章事制

鸾台凤池清切鸾渚便繁讽纳两闈允资一德中散大夫守天官侍郎韦嗣立当朝人望奕代相门道周性全才高识远诚以待物寬而容衆往自纶翰五字见推洎处提衡九流式序怀宗庙之掌有社稷之能宜竭忠贤翊宣化政可守凤阁侍郎同凤阁鸾台平章事散官如故主者施行

崔日用参知机务制 苏頌

门下才为於时以宣可大之业精贯於日以定非常之勋古称王佐今乃人杰大中大夫守兵

部侍郎兼知雍州长史修文馆学士骑都尉安平县开国子崔日用果行育德修辞立诚孝则扬亲忠於事主堂堂乎貌畅君子之风谔谔其言蘊大臣之节故能书读万卷文穷四始高步登朝平心待物日者丑孽未殄嘉谋潜断临危不顾见义而作是用底绩实所繫赖师兵戢矣京兆晏如宜緝台阶之政式拜掖垣之宠可银青光禄大夫行黄门侍郎参知机务学士勲封如故主者施行【唐隆元年七月四日】

姚元之同三品制

门下王佐之重师兵之任旁求栋干膺此具瞻同州刺史姚元之宏略冠时伟才生代识精鉴远正词强学有忠臣之操得贤相之风累践台衡匡益斯在顷居藩郡循良是属载怀一德分命六官訏谟允归文武兼济式凭帷幄之筭宜副輶钤之委可兵部尚书同中书门下三品【先天二年六月】

张说检校中书令制

门下殷命百工傳膺审象汉推三杰良属运筹不有斯人孰賚予弼尚书左丞张说居正合道体直理精朕昔在承华首延博望谈经之际钦若说言摛翰之间润色鸿业屡陈匡益见嫉奸回顷虽抗迹踈远而载怀饥渴今羣凶已服大猷伊始永言亮采朕侧席之期俾兹启沃成朕济川之望宜登鼎铉式综丝纶可检校中书令【先天二年七月】

刘幽求知军国大事制 苏頲

门下尚书佐理四方取则端揆成务百工是师非允具瞻孰康庶绩封州流人刘幽求风云玄感川岳粹灵学综九流文穷三变义以临事精能贯日忠以成谋用若投水茂勲立艰难之际嘉话盈启沃之初存说直以不顾为奸邪之所忌萌衅颇露僭端窃发元宰见逐谗人孔多既斥羣凶方宣大化期间政於经始载登贤於梦卜可依旧金紫光禄大夫尚书左仆射知军国大事监修国史上柱国徐国公仍依旧还实封主者施行【先天二年八月一日】

刘幽求同三品制 苏頲

门下弼谐庶政亮采有邦不遇人杰孰膺王佐金紫光禄大夫守尚书左仆射知军国大事监修国史上柱国徐国公刘幽求纬量天假宏才代出子产之道四既取诸身臯陶之德九以成其用伊昔构屯感愤谋始泊於开泰防萌衅初景化俟其丹青谗词淆於白黑顷居炎瘴受厘之封莫闻重践台衡从政之言益启睠兹密勿方总訏谟宜兼委於掖垣仍具瞻於礼闈可同中书门下三品余如故主者施行【先天二年九月八日】

张说中书令制

门下咸有其德委廊庙之元宰知无不为归掖垣之成务银青光禄大夫检校中书令上柱国

燕国公张说含弘育粹特表人师悬解精通见期王佐立言布文武之用定策励忠公之典才冠代而不有功至大而若虚自顷弘益时政发挥王道万事必理一心从义以观其独伯起慎於四知尝得其真叔敖谨於三省故能深而不竭久而弥芳宣大号於紫宸润昌图於清禁我凭柱石尔作盐梅正名之谓羣识斯集可守中书令散官勲封如故【先天二年九月十一日】

姚崇兼紫微令制 苏頌

黄门天之紫微地在清禁宰臣为重庶政攸先不有殊才曷云兼寄金紫光禄大夫兵部尚书同紫微黄门三品监修国史上柱国梁国公姚崇河山粹气礼乐清英德量在寛公心益谨词必体要行之自远学以穷微志於可大允兹忠说光我谋謦闻善若警欲仁斯至衣冠以为蓍蔡廊庙资其柱石朕之钦者管乐人之杰者萧张遂能以身许国开物成务邦是用义朝惟得贤北辰环拱四垣近密俾因题剑之荣式演如丝之命可兼紫微令余如故主者施行【开元元年十二月九日】

卢怀慎平章事制

门下宰辅之任谟猷是属不有大才孰康景化黄门侍郎卢怀慎贞良敦朴孝悌仁厚度量深於江海坚清迈於冰雪事皆体大詎观非圣之书心必在公雅契惟贤之典故能危言正色直道匪躬比之微管而求得说宜宠琐闥参乎鼎坐可同紫微黄门平章事【开元元年十二月】

卢怀慎检校黄门监制

黄门古称纳言亦号常伯厥命惟允朕之股肱俾义成绩聿归良辅银青光禄大夫行黄门侍郎同紫微黄门平章事上柱国渔阳伯开国伯卢怀慎气资温厚生於蓊北年始英妙出自山东王佐所期人师见属考彼扬历多所献替学以充其忠说才以运其清明所谓许国忘身立朝正色有仲山甫之节成管夷吾之能故其道弥高其心益下可以敷我王度弼於朕躬用增华於侍帷宜拜宠於参乘可检校黄门监散官黄门如故主者施行【开元三年正月十九日】

源乾曜平章事制

门下轩梦三相舜举八元必伫人杰以宣邦政尚书左丞上柱国安阳县开国男源乾曜博文强学達识周才贞白可以励时道义可以弘物虚怀同於抱月悬镜不疲利器比於成风剌钟无滞固可光左曹之駁议翊中禁之谋猷用参金铉之司兼践玉壶之副可黄门侍郎紫微黄门平章事勲封如故【开元四年十一月】

宋璟兼黄门监苏頌平章事制

黄门虞廷称盛任以夔龙周邦以宁属於閤散是知出纳惟允必俟英奇启沃以光实资茂彦银青光禄大夫守刑部尚书上柱国广平郡开国公宋璟字量凝峻执心劲直银青光禄大夫行紫微侍郎兼知制诰上柱国许公苏颋风检详密藻思清华或掌献南宫持平邦典或挥翰西掖匡辅政途咸竭奉上之心俱尽匪躬之节九流俟其澄序衆务资其弼谐宜委铨官兼侍帷幄璟可守吏部尚书兼黄门监颋可同紫微黄门平章事散官勲封并各如故【开元四年闰十二月】

张说同三品制

门下乾坤以陰阳化成后王以辅弼兴理所以寅亮天极缉熙帝图匪赖大贤孰寄斯任天平军节度大使右羽林将军兼并州长史摄御史大夫燕国公兼修国史张说挺其公才生我王国体文武之道则出将入相尽忠贞之节则前凝後丞谅可以弘此大猷总其邦政允厘庶绩保乂皇家可守兵部尚书同中书门下三品勲封修国史如故即驰驿赴京【开元九年九月】

张说兼中书令制

中书政本实管王言咨尔夏部金曰惟允兵部尚书同中书门下三品燕国公张说道合忠孝文武典礼当朝师表一代词宗有公辅之材怀大臣之节储宫侍讲早申翼赞台座訏谟备陈匡益入则式是百辟出则敷政四方嘉绩简於朕心茂功着於王室賚予良弼光辅中兴乃眷专车是称枢密宜兼出纳之任式副具瞻之举可兼中书令【开元十一年二月】

唐大诏令集卷四十四

卷四十五

<史部,诏令奏议类,诏令之属,唐大诏令集

钦定四库全书

唐大诏令集卷四十五

宋 宋敏求 编

大臣

宰相

命相二

张说中书令王峻同三品制

韩休平章事制

裴耀卿张九龄平章事制

裴耀卿侍中张九龄中书令李林甫同三品制

陈希烈平章事制

陈希烈左相制

杨国忠右相制

韦见素平章制

房琯平章事制

吕諲平章事制

李岷李揆第五琦平章事制

苗晋卿侍中制

萧华平章事制

裴遵庆平章事制

元载平章事制

刘晏平章事制

杨绾常袞平章事制

萧复刘从一姜公辅平章事制

刘滋崔造齐映平章事制

李泌平章事制

命相二

张说中书令王唆同三品制

门下周称内史以司号令汉曰尚书是主喉舌用平邦国以佐王教兵部尚书兼中书令张说履道体正经德立言吏部尚书王唆忠肃刚简博闻宏识并才包王佐望重时英内训五品外清九服嘉谟必尽庶绩允康宜参五臣之命以正三台之象说可中书令唆可兵部尚书同中书门下三品【开元十一年四月】

韩休平章事制 张九龄

勅思致雍熙聿求元辅久勤梦寐延彼周行大中大夫守尚书右丞上柱国韩休蕴道弘深秉德经远清裁可以轨物素行可以律人一自登朝备闻体国志存公亮诚着始终而羽翼朕躬金玉王度人望是在朝选无踰宜拜命於琐闼俾兼和於鼎实可守黄门侍郎同中书门下平章事【开元二十二年三月】

裴耀卿张九龄平章事制 徐安贞

门下风云之感必生王佐廊庙之任爰在柱臣中大夫守京兆尹护军赐紫金鱼袋裴耀卿含元精之休体度弘远正议大夫前检校中书侍郎集贤院学士仍副知院事上柱国赐紫金鱼袋曲江县开国男张九龄挺天生之秀器识通明并风望素高人伦是仰可以叶彼寅亮当兹

启沃干时侍士既资鼎实之和为国急贤宁惟金革之事耀卿可黄门侍郎同中书门下平章事弘文馆学士散官勳如故九龄可起复中书侍郎同中书门下平章事兼修国史余如故主者施行【开元二十一年十二月】裴耀卿侍中张九龄中书李林甫同三品制

门下春秋之义尚量卿材王国克桢莫先相位用增其命必正其名中大夫守黄门侍郎同中书门下平章事弘文阁学士赐紫金鱼袋上护军裴耀卿正议大夫中书侍郎同中书门下平章事集贤院学士副知院事兼修国史紫金鱼袋上柱国曲江县开国男张九龄经济之才式是百辟正议大夫检校黄门侍郎赐紫金鱼袋上柱国李林甫泉源之智迪惟前人既枢密载光而亲贤称首审能羣会所莅有浮宁惟是日畴咨故以多年历选国钧繫赖邦礼克清宜命曰鼎臣置之廊庙耀卿可银青光禄大夫守侍中学士勳如故九龄可银青光禄大夫守中书令集贤院修国史勳如故林甫可银青光禄大夫守礼部尚书门下三品勳如故主者施行【开元二十二年五月】

陈希烈平章事制

翊亮天工缉熙帝载赉予良弼其在是乎光禄大夫行门下侍郎集贤院学士副知院事兼侍讲崇玄馆大学士太清太微宫使上柱国临颖县开国侯陈希烈中黄赋象灵岳诞才识洞精微道含淳粹依仁游艺总儒门之四科宝俭行慈守玄宗之三德自居近侍忠懿逾彰匪躬怀不二之心正色有大臣之节信可以允厘庶绩燮赞台阶可行门下侍郎同中书门下平章事集贤院弘文馆学士散官勳封如故【天宝五载四月】

陈希烈左相制

门下仲虺相汤言宣雅诰子鱼佐魏任总中兵将代天工允凭时杰光禄大夫门下侍郎同中书门下平章事集贤院弘文馆学士崇贤馆大学士太清太微宫使上柱国临颖县开国侯陈希烈逸量宏达英才卓迈既履直而成范亦资忠而炳德学该流略义惟守於经门文丽风骚言必全於理要自黄枢贰职侍讲金华紫府弘真参谋玉铉岁月逾久而其道弥光人师有属於在二王度式歌於画一畴咨既久亮采惟熙宜正貂蝉之荣用兼喉舌之寄可行左相兼兵部尚书余如故【天宝六载三月】

杨国忠右相制

先王立政必惟择贤所以时亮天工叶修人纪总兹三事是属中枢审於百工金曰亚相银青光禄大夫御史大夫判度支事权知太府卿兼蜀郡长史持节剑南节度支度营田等副大使本道兼山南西道采访处置使两京太府司农出纳监仓祠祭木炭宫市长春九成宫使关内道及京畿采访处置使上柱国弘农县开国伯杨国忠纯粹精明悬解虚受比之管乐文多体要之词拟於丙魏武有韬铃之学直方其道简易能成往自星即爰秉天宪邦国大政弘益滋多则造膝沃心已期王佐弥纶经济同致雍熙况南台豕宰尤思藻监西垣鼎座深仁燮和适会予宿心命尔为相宜兼启密式总如纶可守右相兼吏部尚书集贤殿学士修国史崇玄馆

大学士太清太微宫使仍判度支及蜀郡大都督府长史剑南节度支度营田副大使本道兼山南西道采访处置使两京出纳勾当租庸铸钱等使并如故【天宝十一载十一月】

韦见素平章事制

门下缉熙帝载必俟大贤砥砺公才允膺殊赏银青光禄大夫行尚书吏部侍郎上柱国彭城县开国公韦见素风度宏远操履贞固怀至公之节守难夺之诚学富典坟每思经济之义文雄缙绅岂独雕虫之美荐居东掖顾问有光累拜南宫铨衡式序清素之业惠迪弥彰尔惟不矜朕志先定信可发挥邦政翊赞台阶将弘梦卜之感俾协黎元之望可守武部尚书同中书门下平章事集贤院学士知门下省事散官勲如故【天宝十三载八月】

房琯平章事制

勅宪部侍郎房琯清识雅量工文茂学秉忠义之规靡悼艰险挺松筠之操宁移岁寒宜承题剑之荣式允济川之望可文部尚书同中书门下平章事【天宝十五载七月十四日】

吕諲平章事制

出纳丝纶是称喉舌调和鼎鼐必藉盐梅况艰难之际择贤必资於选衆密勿之地论道固期於得人兵部侍郎吕諲间气挺生宏才迴发纳言敏行强识博闻谋猷出三杰之先德业处五人之上久在朝列尤推审慎允得钧黄之庆宜膺补衮之求可同中书门下平章事【乾元二年三月】

李岷李揆第五琦平章事制

出纳帝命经纶王言兆若见於非熊位必登於仲虺行御史大夫行京兆尹李岷朝廷硕德宗室荇臣中书舍人兼礼部侍郎李揆文房学府命代挺生行户部侍郎兼御史大夫第五琦武库智囊膺期间出中和秀气维岳降灵可以宣畅谋猷恢弘体要庶得道光风力名重伊臯俱当入梦之辰共学从绳之直既用登王辅宜以道弼予岷可行吏部尚书同中书门下平章事揆可中书侍郎同中书门下平章事琦可户部侍郎同中书门下平章事【乾元二年二月】

苗晋卿侍中制

宰辅之重陶钧所寄用谐时望必藉素名是以殷登左相伊尹成乎一德汉命旧臣孔光由其再起盖所以上扶皇极下庇苍氓永怀寅亮之美实属股肱之任特进太子太傅上柱国韩国公苗晋卿衣冠宿望廊庙公才体文雅之宏量负经通之远识累践台阁久彰名器自艰难之际叶赞有劳早契风云之期备陈匡济之术顷以疲痾固辞枢务重违诚恳之志爰假优崇之秩虽訃谥暂间而梦寐无忘今戎事犹虞蒸人未乂汉将且闻於辞第留侯岂遂於停飧成余社稷之本懿尔勲庸之望固可勉紆新绂载珥旧貂宜罢輜车之礼俾膺黄阁之政【上元元

年五月】

萧华平章事制

弼予之选审像是求天步未平庙谋尤切必资明表伫以佐时画一之才取则不远正议大夫守河中尹兼御史中丞充本州晋绛等州节度观察处置使上柱国嗣徐国公赐紫金鱼袋萧华公辅成名承家继业词标丽则德蕴谟明道开云物之先节贯严凝之序早登台阁多识旧章再履宫坊尤敦至行致君望美閱相求能且推伊陟之贤更咨汉臣之阁环依日月佐理陰阳俾参政於紫宸用建中於皇极可中书侍郎同中书门下平章事集贤殿崇文馆大学士兼修国史散官勲封赐如故【上元二年二月】

裴遵度平章事制

致君惟相辅德在和必俟三台之明用增九鼎之重彝伦所属元气是调乃眷公才作予良弼银青光禄大夫行尚书吏部侍郎上柱国河东县侯裴遵度体凝清粹理畅黄中学奥全经词深大雅行归於简节固於贞公辅之望攸先古人之风非邈累阶朝序久践天台凡所弥纶多为故事咸有斯在王猷是经庶弘翼善之功克济投艰之运登荣琐闥参政两闱宜辍山公之扈以光说命之求可行黄门侍郎同中书门下平章事散官勲封如故【上元二年四月】

元载平章事制

天位惟艰庙谋是切委在公辅正於四方伫鼎实之能调补袞章之有阙眷求励翼式允金谐朝议大夫守尚书户部侍郎兼御史中丞上柱国许昌县予赐紫金鱼袋充度支等使元载清明在躬贞固干事言必有绩文而不华准绳朝端金玉王度不有其善通观厥成固是生灵之杰咸推宰辅之器执兹大政叙以彝伦建中於人莫匪尔相丹青神化参议两闱宜书一德之篇俾叶賡歌之美可同中书门下平章事兼集贤院崇文馆大学士修国史余如故【元年建辰月】

刘晏平章事制

构广厦者审象於宏材经万邦者注意於良弼自非道符梦卜名冠簪裾何以允副虚求式谐时望光禄大夫国子祭酒兼御史大夫京兆尹判度支勾当度支等使上柱国彭城县开国伯刘晏应期生德维岳降贤文为君子之儒器蕴通人之量学苞前典志在於直方词蔚古风义存於比兴自兼京剧职总均输变而能通弘适时之务居难若易多济物之心顷者戎事方殷军赋惟错率皆倚办每竭推诚寇难初夷皇猷咨弼周王佐国必自於天宫汉代登台咸由於亚相宜膺选衆之举用成亮采之功可金紫光禄大夫吏部尚书同中书门下平章事进封城郡开国公食邑二千户勲及度支等使并如故【广德元年五月】

杨绾常袞平章事制

体国经务亮采惠畴以遂万物之宜以形四方之理弥缝百职金玉王猷平景纬於台阶济盐梅於鼎鼐必先时俊允膺旁求朝议大夫守太常卿兼修国史赐紫金鱼袋杨绾贍学懿文崇德广业表微藏用适务知章朝议郎守尚书礼部侍郎集贤院学士上柱国赐紫金鱼袋常袞志业贞谅理识宏深守正居中确乎难夺顷以戎车未戢方事仍殷永言庶政有乖彝叙今将本俗刑教澄源振纲宣九德以阜成张四维而翼赞洽於金论资尔具瞻往副审详之诚懋缉时雍之化绾可中书侍郎同中书门下平章事集贤殿崇文馆大学士修国史散官勲赐如故袞可门下侍郎同中书门下平章事太微宫使崇贤馆大学士散官勲赐如故【大历十二年四月】萧复刘从一姜公辅平章事制 陆贄

勅宰辅之任猷替为务内凝庶绩外抚四夷调陰阳以成岁功赞化育而熙帝载若金用砺其弼予违如旱为霖允从人望矧时属多难弥切任贤朕未尝不朝夕论思梦寐怀想道之所在仁远乎哉朝议大夫守户部尚书兼御史大夫【原阙】充荆襄江西等道都元帅统军长史丰县开国男赐紫金鱼袋萧复性质端亮理识精敏约已弘物体方用圆为邦益表其异能及事亟闻其鯁议动可为范立不易方守尚书吏部郎中兼御史中丞充荆襄江西等道都元帅判官赐绯鱼袋刘从一贞白其行温恭其文居简而适用必通体和而临事有立持重能断色庄有恒累更委任多所裨益守京兆府户曹参军翰林学士赐绯鱼袋姜公辅志怀济物鉴必通理主文而谏忠靡退言经始以谋事皆前定道无屈挠智叶变通并可以参赞大猷允膺金瞩兵戎未靖期尔经纶都邑未康期尔还定予一人有过尔是用匡伊万姓不寧尔是用义钦哉慎乃有位咸懋厥官复可守吏部尚书同平章事散官封如故从一可守尚书刑部侍郎同平章事赐紫金鱼袋公辅可守谏议大夫平章事赐紫金鱼袋【建中四年十月】

刘滋崔造齐映平章事制

门下朕嗣位君临精求理道小大之务靡不经心日慎一日於今八载教化未洽蒸黎未康因之以甲兵继之以灾沴斯固鉴有所不至虑有所不周予衷浩然若涉渊冰思所以匡我致理助我官人宣其泽而四方以宁执其要而百工式序允是大任其惟辅臣梦想劳怀敷求俊乂得兹良弼爰在周行权知吏部侍郎刘滋操履贞清介然自守居能慎独动不违仁析理?其精微励学探其旨趣给事中赐绯鱼袋崔造性合道要识通化源适时有成务之才事上怀匡弼之节蕴蓄气业居为名臣中书舍人赐紫金鱼袋齐映修己以立自明而诚体贤人可大之规用君子时中之道虚受能择清通不流惟滋之直方可以激风俗惟造之体度可以振纲条惟映之精深可以该物理我有大典尔其参之懋昭厥猷勿替休问滋可守散骑常侍同平章事造映可各守本官同平章事散官勲封赐并如故【贞元二年正月】

李泌平章事制

自昔元后表正万邦必兼听以求闻乃选贤而自辅理乱之本系乎其任授之以道将在得人朕嗣守不图运逢多难每?心至理思致和平夕惕兴怀纳隍是虑今干戈甫戢而戎狄为虞岂诚信所未孚何声教之不泊是以梦想良佐追迪前闻云谁之思朕志先定前检校礼部尚书陕虢观察使李泌山河粹气道德清英殿为桢祥生我王国夷简不杂高明有融深厚以致诚

直方而可大识穷化本动会时中讒正居心谋猷允哲自膺分陕累洽嘉闻宜其入掌中枢内
司阙袞赞两仪之化育贞百度之经纶协和神人参总廊庙咨尔才实惠於邦家往钦哉式伫
成绩可守中书侍郎同中书门下平章事【贞元三年六月】

唐大诏令集卷四十五

卷四十六

钦定四库全书

唐大诏令集卷四十六

宋 宋敏求 编

大臣

宰相

命相三

齐抗平章事制

韦执谊平章事制

杜黄裳袁滋平章事制

郑余庆平章事制

郑絪平章事制

武元衡平章事制

李吉甫平章事制

裴垍平章事制

李藩平章事制

权德舆平章事制

李吉甫平章事制

李绹平章事制

武元衡平章事制

张弘靖平章事制

韦贯之平章事制

裴度平章事制

命相三

齐抗平章事制 权德舆

勅寅亮天工缉熙王度调陰阳以遂羣品敷教化以统百官必得其人乃济於理是咨茂德允式具瞻中散大夫守太常卿上柱国赐紫金鱼袋齐抗植操清贞秉心谅实精达政理详明典彝才器可以济时忠正可以激俗莅事惟肃休声茂闻宜入赞於中枢俾发挥於景化式是百辟毗予一人可守中书侍郎门下平章事散官勲赐如故於戏政之得失在於弼谐尔其竭诚启沃以广视听进规献纳以赞谋猷俾人叶中时乃之绩无替朕命厥惟懋哉【贞元十六年九月】

韦执谊平章事制

门下宰相之职寅亮缉熙导陰阳之和赞天地之化裁成百揆总领庶官非道契时中识通理本则何以敷畅皇极阜安羣黎朕以眇身嗣守丕业思立人纪以承天休其代予言允属良弼朝议大夫守吏部侍郎骑都尉赐绯鱼袋章执谊孝友忠肃自诚而明茂实本於宗师英华发於事业久参内署动直静专累践中台职修事举克有公望冠於羣伦以予冲人恭默思道用是命尔纳海弼违必能刑四方之风成天下之务祇服乃职厥惟钦哉可守尚书左丞同中书门下平章事赐紫金鱼袋【永贞元年二月】

杜黄裳袁滋平章事制

辅弼股肱之臣所与共成天工左右邦理者也朕承至尊之重居羣后之上夙兴寅畏不敢康宁思所以统天人之和彰祖宗之烈以行四方之政以遂万物之宜敷求哲人以辅台德银青光禄大夫守太常卿充礼仪使上柱国郑县开国公杜黄裳弘深易简资博厚之德朝议郎检校左散骑常侍兼左金吾卫大将军充在街使云骑尉赐紫金鱼袋袁滋冲茂精微体诚明之性咸以器业闳茂服在大僚祇事先朝克荷休命识达道奥文为国经可以仪刑具僚参总庶务寅亮天工毗予一人罔不同心以匡乃辟黄裳可门下侍郎平章事滋可中书侍郎平章事【永贞元年七月】

郑余庆平章事制

有天下者曷常不选贤与能纳於辅弼用义厥辟以和羣生所以叙彝伦平宪度建用皇极底於雍熙者也朕祇若大训图任旧人畴咨庶工用佐予理朝议大夫左丞轻车都尉赐紫金鱼袋郑余庆全器茂学蹈中秉直易则可久和而不流尝践禁闈亦参衮职每尽王臣之节实彰君子之风服於大僚克有休问洎综理会府纪纲羣司率由旧章载叶成宪固可以仪型庶尹寅亮天工可中书门下侍郎平章事余并如故【永贞元年八月】

郑絪平章事制

朝廷者天下之桢干宰辅者王化之根源朕夙寝晨兴讲求为理之本思所以仰承宗庙之重俯叶亿兆之心谐和陰阳茂育区夏以贞百度以叙九畴佐予成功实赖良弼具瞻之地公望攸归朝议大夫守中书舍人翰林学士上柱国赐紫金鱼袋郑絪秉仁廸哲守约居易懿以文德择乎中庸体元和之淑姿服大雅之明训累登班序休有令闻羽仪周行黼藻王度洎发挥纶翰典职禁闈以温文雅丽之才居献纳论思之地从容中节密勿尽规先朝任能委遇斯重恪恭夙夜绵历岁年诚节贯於屯夷茂勲参於顾托名书彝鼎心着丹青朕祇膺睿国诞受明命弘宣大典泽润鸿猷保义於一人仪刑於四国简於朕志用选厥劳图任旧人以匡乃辟畴咨万国罔不佺同宜膺弼采之求式懋弥纶之绩於戏为君之难存乎举而不任为臣之患在乎知而不言事举其中政修其本永绥厥位乃时之休可中书侍郎同中书门下平章事集贤殿大学士散官勲赐如故【永贞元年十二月】

武元衡平章事制

惟人代工与物施化成功者元首辅翼者股肱况国之号令本於内史政所关决审於黄枢爰发四方用凝庶绩心求同德资以弼予朝议郎守尚书户部侍郎文水县开国子赐绯鱼袋武元衡挺生伟才克振前绪蹈礼合乐谦厚端和居暗室而不欺处岩廊而益重文能合雅道可立程再司石室之图遂践春华之署故事可举嘉猷日新爰委地征实惟邦本勤於小物弘以大纲一心不移於吐茹衆务必归於领会郁此时里称为名臣朕祇奉鸿休惧於负荷居则神明之奥位当亿兆之尊常恐明不烛幽虑不及远一物未获万方在予书不云乎臣作股肱耳目是命尔处兹弼谐尔其慎将明勉於规诲必思衮阙无或面从直哉惟清副我明命可朝议大夫守门下侍郎平章事赐紫金鱼袋封如故【元和二年正月】

李吉甫平章事制

门下昔周宣王思弘文武之道则以申甫代天工汉宣帝思继祖宗之风则以丙魏执邦柄是以克绍前烈俱称中兴朕以眇身托於人上亦思所以继列圣之绪致泰阶之平怀柔四夷亲附百姓将成莫大之业遂获非常之才授之钧衡俾作舟楫银青光禄大夫行中书舍人翰林学士上柱国李吉甫符彩外发清明内融体仁而温抱义而峻识洞精颐知帝王致理之源学该古今穷天人相与之际自擢於纶阁列在禁闈鼓三变之文润色王度总五才之用参赞庙谟化俗思迈於成康致君愿及於尧舜当注意之所向每罄心而必陈深中不回独立无惧经纶常见於道达激切多至於涕零王纲以张蜀寇斯殄左右密勿实由嘉言降神而生辅朕为

理调三光以序六气遂物情而熙帝载是为中枢司我大本命尔俞往其惟勗哉於戏宰辅之任安危所寄百辟为宪万邦是瞻与其明察以为公不若严重而有制与其将顺於甚美不若匡救於纖违审泾渭以序人伦理绳墨以正天下交泰之运其若斯乎敬听朕言以践乃职可守中书侍郎同中书门下平章事散官勲如故主者施行【元和二年正月】

裴垍平章事制

门下朕闻后德惟圣臣德惟良在太宗时实有房杜赞贞观之业在玄宗时则有姚宋辅开元之化咸克佐我烈祖格於皇天朕祇奉丕图懋继前烈思欲贞百度和万邦建中於人垂拱而理永惟房杜之化寤寐求思至诚感通上帝眷佑果贲良弼辅予一人正议大夫行尚书户部侍郎上柱国赐紫金鱼袋裴垍器得天爵文为国华行有根源言无枝叶忠敬顺贯之以诚心方洁贞廉辅之以通识玉立不倚金和有声泊润色纶言密参枢务严重得大臣之体温雅秉君子之文每献纳之时动有直气当顾访之际言无隐情远图是经大事能断匡予不逮时乃之功及领地官且司邦赋会计务剧出纳事殷捉利刃而皆虚委棼丝而必理历试兹久全才益彰宜登中枢以允金望夫宰辅者下执邦柄上代天工为国蓍龟注人耳目尔尚降乃德以亲百姓广乃志以序九流匡朕心以清化源从人欲以致和气予欲宣力汝为股肱予欲询谋汝为心膂予违望於汝弼勿谓不从汝言逆於朕心必求诸道独立勿惧直躬而行明听斯言敬践厥位呜呼罔俾房宋专美於前可中书侍郎同中书门下平章事散官勲赐如故主者施行【元和二年九月】

李藩平章事制

皇王理本系於辅弼内以熙庶绩厘百工外以抚四夷式羣后三五已降崇替由之朕祇荷丕图思底於道夙夜惟厉延登俊贤若涉大川俾作舟楫朝散大夫守给事中上柱国李藩天鍾粹美气禀清英信在言前行为人表蘊经邦之识度发自明诚通理道之本根郁为公器学探旨奥文以忠贞大玉斯实於东序朱弦可荐於清庙广则难挹刚而有容处衆无溷其风标存险常推其名节累登华署克赞弥纶擢授左曹专闻驳议永惟股肱之任翼亮是资必求其人岂限常次黄枢选重金曰宜之爰举朝章式副公望於戏尔惟率正邪罔不匿惟匪躬直诚可以事上惟秉钧平施可以致和毗予一人允理王事懋乃嘉绩永孚於休可朝议大夫守门下侍郎同中书门下平章事赐紫金鱼袋【元和四年二月】

权德輿平章事制

门下夫宰相之任上以代天工辅佐之宜下以立人极爰得忠正方膺股肱正议大夫守太常卿上柱国襄武开国侯赐紫金鱼袋权德輿器度端实知识通敏学成师法文为国华素履常践於贞方黄中允合於易简自出入清列茂着嘉声名利无屑於中怀风雨不易其常性骥騄之质常识於远途鸾凤之姿宜巢於阿阁期於至理推之至公宠以春卿掌我枢务辅天地之德俾化及平民导陰阳之和使物靡疵厉予违汝弼言无面从君可臣否事已心许用伫弘美式副虚怀可守礼部尚书门下平章事散官勲封如故【元和五年九月】

李吉甫平章事制

辅弼之重邦家所属寄深藩翰则外抚诸侯望切股肱则内熙庶绩迭居其任厥惟旧章前淮南节度副大使知节度事管内支度营田观察处置等使金紫光禄大夫检校兵部尚书侍郎兼中书侍郎同中书门下平章事扬州大都督府长史上柱国赵国公食邑三千户李吉甫弘经远之才研极深之虑脱略细故洞开中怀文稽典谟学升堂室洎司我密命言屡表於独明参於袞职道每彰於孤直贡其诚节竭以公忠坠典载张彝伦攸序匡予不逮怀之岂忘曩以淮海大都吴楚雄镇岁属艰食人多愁声是假全才用康疲俗下流於永利不憚乎劳心故蠹以长【原阙】瀦其天泽变舄鹵为稻粱之壤致蒸黎有粒食之源吏守成规人无迁志庶富之教既宣於封内辅相之宜俾及於天下顾兹重务属於良臣去其外职之繁专以中枢之任至於别馆良史之褒贬内殿集贤之清秘爰举旧典式洽新恩无旷厥官往践乃位可中书侍郎同中书门下平章事兼集贤殿大学士监修国史散官勲封如故【元和六年正月】

李绛平章事制

门下司重柄者允属於长才熙大猷者固资於端士朕缵承鸿绪抚有万方夙夜祇勤惧远於道故注意宰辅劳怀梦想诚以得失之效邦家所系畴若佥论简予深衷必惟其人是举成命朝议郎守尚书户部侍郎骠骑尉赐紫金鱼袋李绛质秀珪玉文含采章抱器挺生居贞特立有史鱼秉直之操励山甫匪懈之诚忠孝两全学识兼茂清标可以范雅俗正气可以肃羣伦顷自周行俾参密命动必以义知无不为謇謇怀匡济之心孜孜陈远大之略言无隐避居则静专贯於终初其道一致地卿之贰爰委典司理财先示於简廉利物每惩其聚斂通经立政器用弥光台阁之间聿有公望是宜权衡百度宰理庶工允副具瞻宰我枢务於戏予欲驱人俗以跻富壽感人心而致和平尔尚修明宪章宣布德泽必广大其志无皦察为公恒其道以秉彝裕其体以临下各任以职无忘陈平之言苟便於人勿憚萧何之请敬兹宠擢其懋戒哉可朝议大夫守中书侍郎同中书门下平章事勲赐如故主者施行【元和六年十一月】

武元衡平章事制

门下邦国兴替将相是资选衆而举思贤俾乂故有台臣外抚宣力以靖於四方袞职迭居懋功复凝於庶绩允兹崇践爰属上才前剑南西川节度副大使知节度事管内支度营田观察处置统押近界诸蕃及西山八国云南安抚等使银青光禄大夫检校吏部尚书兼门下侍郎同中书门下平章事成都尹上柱国临淮郡开国公食邑二千户武元衡粹厚端庄简易常一有诚明之道以致用有宏茂之略以佐时贞方素得於性术操尚不愆於风雨加以懿文合雅聚学成师通礼乐刑政之源达古今通变之要历登华贯休问穆然洎处钧衡中立不倚致君思尧舜之盛修职以丙魏为宗益部大藩比仗兼济而能布宣威惠抚莅蛮髦县道缉宁疲黎安息推心而下皆率附正已而人自向方临之累年理有异等朕以出纳王命缉熙帝图总庶官之职业为百度之扃键惟此重任属於黄扉分忧遂辍於殿邦具瞻再归於硕望尔尚行之以忠正煦之以和平毗予一人膏泽天下祇膺礼命无替徽猷可守门下侍郎同中书门下平章事兼崇贤馆大学士充太清宫使【元和八年三月】

张弘靖平章事制

门下虞以为盛犹咨五臣殷之用兴亦赖三后朕励精已十载於兹常以国钧委之公辅务熙庶绩敢怠旁求思欲左右有人在广股肱之任历选列辟泊於藩维冀复贤能俾匡正道今兹所命允属至怀河中晋绦兹隰等州节度支营田观察处置等使正议大夫检校礼部尚书兼河中尹御史大夫上柱国高平县开国子食邑五百户赐紫金鱼袋张弘靖德稟精微器含冲用温谅实明允克诚素推君子之风雅有大臣之体蕴绩稽古之学发挥经纬之文常司朕言动叶谟训历践清贯具扬淑声爰统方州再膺节制奉法遵道勤公忘私人无不怀绩用丕茂予欲正百工之理成泰阶之平若临巨川以重舟楫是用命尔列於中台每念臣隣之规以贞栋崇之吉少翁积庆嗣德汉廷文子勤身继匡晋室尔惟朝夕纳诲以翊朕躬是资褒职之勤式重缙衣之美仍帅司寇之属俾靖臯陶之刑宜懋厥职往践於位可守刑部尚书平章事散官勲封如故【元和九年六月】

韦贯之平章事制

门下弼成大化参叙彝伦克广元首之明斯服股肱之任朕所以不自暇逸务求贤能式重舟楫之才以弘经济之道畴若予志金谐乃公中大夫守尚书左丞上轻车都护赐紫金鱼袋韦贯之清明在躬礼乐之器蕴珪璋特達之德茂廉正博雅之规静而知微动必有守凡践列位备闻嘉猷当官而行临事能断道可镇於风俗望弥积於朝伦是宜和静陰阳纪纲邦国命作心膂列於台阶夫能虑四方揆百事爱利万物辩论羣才示公忘私时乃之职而况图靖藩服系在庙谋不惟顺下以训人奉上以宣力因衆功而致用熙衆志以为心朝夕献否可之诚经纶底文武之绩祇膺厥命勿懈於时可守尚书右丞平章事散官勲赐如故【元和五年十一月】

裴度平章事制

门下辅相之任重作于股肱经济之才难注人耳目苟非虑研物表识洞事先则何以出纳中枢平章大政询於时论金曰汝谐朝议郎守御史丞兼尚书刑部侍郎飞骑尉赐紫金鱼袋裴度劲直徇道清明秉彝文融菁华行茂枝叶居然廊庙之器出於领袖之门西掖司言南台执宪常陈明略屡告嘉猷实宣力以徇公能外身而忧国霜雪无改雷风有恒朕欲全观其能用试於事俾历戎阃载驰使轩玉泽涣汗以遐宣军情密勿而上达将议抽擢因罹震惊崇道德之藩篱士有致命资忠信之甲冑兵无容刃人具瞻尔天方賚予昆命於龟爰立作相尔其展四体坚一心广其道以用贤厚其风以易俗五兵未戢尔惟保定武功百姓未康尔惟勤恤人隐临事必断当官而行齐台阶於底平补褒职之有阙光膺慎选其戒之哉可朝议大夫守中书侍郎同中书门下平章事勲赐如故【元和十年六月】

唐大诏令集卷四十六

卷四十七

钦定四库全书

唐大诏令集卷四十七

宋 宋敏求 编

大臣

宰相

命相四

李逢吉平章事制

王涯平章事制

崔羣平章事制

李鄘平章事制

李夷简平章事制

皇甫鎛平章事制

程异平章事制

令狐楚平章事制

韩弘中书令制

萧俛中书令制

段文昌平章事制

崔植平章事制

杜元穎平章事制

王播平章事制

元稹平章事制

裴度平章事制

李逢吉平章事制

命相四

李逢吉平章事制

門下朕觀古先哲王興化致理未嘗不選建良弼熙寧庶工俾之敷陳大猷左右乃辟者也朝議郎守中書舍人權知禮部貢舉輕車都尉賜緋魚袋李逢吉疏通而守於經制質厚而輔以文章貞恒自居和易待物體賢人之志業茂端士之風規履歷班行發揮事任厥心匪懈所至有聲自彌綸粉闥駁正瑣闕且司言於西掖嘗納訓於東儲誠明一貫聞望旁洽俾司貢士彌着嘉聞方今外興不得已之師內有不獲安之俗恒忘食於將旰每求衣於未明冀清原野之誅用止干戈之役登爾匡輔代予憂勤爾宜宣至化於吾人告嘉猷於厥后銷弭氛祲導迎和平事有不舉于中政或未孚於下爾惟啓沃无乃面從可朝議大夫守門下侍郎平章事賜紫魚袋【元和十一年二月】

王涯平章事制

門下上宰參職所以登三台之耀中樞議政在乎遂萬邦之宜朕獲承鴻休思建皇極冀沃心而納海恒注意於求賢通議大夫尚書工部侍郎知制誥翰林學士上柱國清源縣開國男食邑三百戶賜紫魚袋王涯動直靜專踐方居易挺歲寒之勁質抱夙夜之端誠言惟守中慮每經遠屬者禁垣揮翰五字日宣選部持衡九流風動荐居肘腋之地歷試股肱之才進嘗伏於青蒲出不泄其溫樹牢融得大臣之節毛玠有古人之風詢廟筭於生知論兵鈴而暗合方今戎車尚駕郊圉猶多必俟清明以清氛祲是用付以機密陟於崇高爾其發号令以端其四方陳便宜以寬於百姓行台閣之故事弘朝廷之大體秉德以立徇公不回俾予一人垂拱而理敬聽朕命懋哉可守中書侍郎平章事【元和十一年十二月】

崔羣平章事制

門下成萬方之化通天下之志緝熙帝載昭暢玄猷在於股肱之臣共凝理本旁求時彥以叙彝倫朝散大夫尚書戶部侍郎上柱國賜紫魚袋崔羣精密由道端莊保和本清明之上才體博厚之重德學貫通儒之業詞含大雅之風居敬有恒循性能斷自承我密命職參內廷高

文焕发於纶言敏识详达於国典伏奏无挠直躬不回勤劳八年始终一致春闱取士必後其浮华地官理财能於轻重俭以约已忠惟事君才适而用深望积而实着风猷已洽於人听倚属方注於朕心乃膺审像之试以副具瞻之望况奸凶叛逆尚驾戎车未明求衣思戢干戈尔宜酌古今之要举刑政之中艰厥位以代天工陈其謏以明皇极敬兹重命往践台阶可守中书侍郎同中书门下平章事散官勲赐如故【元和十二年七月】

李鄘平章事制

弼成庶政必属於长才经制四方是资於硕望况参酌理本變和化源苟非杰贤孰允斯任爰立尔德将谐具瞻淮南节度副大使知节度事管内度支营田观察处置等使银青光禄大夫检校尚书左仆射兼扬州大都督长史御史大夫上柱国江夏县开国侯食邑一千户李鄘性惟直方器本弘固冲敏可以成务通明可以质疑怀匡主之忠规蘊经邦之远略历居雄镇累服大僚台阁藩方动留成式资为重望绰有余才必能翼宣鸿猷导迎和祉是用徵拜陟於黄枢竭尔訏谟司我号令法期画一俗俾康宁寅亮庶工属在良辅尔其勤思至道以洽太和戒之敬之往践厥职可守门下侍郎同中书门下平章事散官勲封如故【元和十二年十月】

李夷简平章事制

门下致理之道王者由其尽心弼教之功辅臣所以宣力皇极是建苍生乃安敷求实难倚任斯重将付大政必惟金谐正义大夫守御史大夫上柱国成纪县开国侯食邑一千户赐紫金鱼袋李夷简才称通明性本严重守以正直傳之文华羽仪朝端冠耀宗籍早司邦宪爰总地征紂逃无闻於避强经费克均其定制中立不挠孤标出伦耸善激贪法行令肃自镇汉上洎临蜀川俭德载彰清规一贯山岳比厚风雷有常励贞峻以理心竭忠劳而奉上人望汲黯印归赵尧俾之持纲万目斯举固可以总参庶务允厘百工變和陰阳宣发号令是用申命陟於台阶於戏说积尔躬梦协朕志虚已将求其弘济鯁言罔惧於拂违道必兼举位无苟旷膺此宠权敬哉戒哉可守门下侍郎同中书门下平章事【元和十三年三月】

皇甫鎛平章事制

六符成像所以平泰阶九赋克均所以阜羣物爰资宰臣弘赞谋猷達其富庶之源以致雍熙之化用辅台德其允具瞻朝请大夫守尚书户部侍郎兼御史大夫判度支上护军赐紫金鱼袋皇甫鎛行惟孤贞性本坚直秉仁履义守正之方才适变通辞去枝叶蘊冲用於灵府表公器於上林夙怀经济之谋早在贤良之选累践华贯服於大僚端肃有常发挥事任自总邦计贰领地官属以徵戎车讨平淮寇发輶调食制外自中法无过差动有成绩山甫彰勤恪之効志在奉公夷吾职轻重之权诚宜佐国是用命尔俾昇台司望以沃心劳乎注意尚兴师旅方殄妖氛翼亮是参经费仍属尔其悉乃心力副於简求物有未遂其宜望有未洽於道罔或安位必思匪躬酌下土之盛虚中枢之政令光昭厥辟时乃之休可守尚书户部侍郎同中书门下平章事依前判度支【元和十年九月】

程异平章事制

门下昔汉宣帝弘祖宗之业正刑德之本简求辅相以致中兴朕祇荷丕图思扬圣绪每怀舟楫以涉巨川俾人不迷用底於道今获良弼式允金谐朝散大夫守卫尉卿御史大夫充诸道盐铁转运等使赐紫金鱼袋程异厚德外严沉机内朗抱精微以致远本诚明以格物尽瘁事国诚明在公常探化源雅尚学术扬历斯久公望蔼然自位列大僚总兹剧务达榷酤之利适财赋之方瞻出纳於邦家中绩效於官业顷以淮夷未殄师旅在郊有漕挽之劳兼供亿之费言念多事恐伤吾人而异法能变通道益明着言无伐善动必由衷蕴夷难致君之心见怀道佐时之略况属馈军之事尚倚良能载閱前功宜当大用乃服休命俾参中枢爰表秩於冬官仍兼综於旧职膺兹重用表全才尔宜左右朕躬朝夕启沃干戈未戢尤伫庙谋敬听斯言副我明獎可尚书工部侍郎同中书门下平章事依前充诸道盐铁转运使【元和十三年九月】

令狐楚平章事制

门下赞天工而成光济叶帝力以致昇平非中和稟气不能符變调之道非诚明在躬何以膺弼亮之位况今积妖已殄而边鄙犹虞大化方行而里閭未泰将欲举百度甄羣材外经四夷内辑诸夏纳之壽域被以仁风代予之勤其孰克任眷求斯得是用命之河阳三城怀州节度使朝议郎使持节怀州诸军事守怀州刺史兼御史大夫赐紫金鱼袋令狐楚根於粹厚着以端明表山立之庄容洞泉淳之精识文高雄富学茂该通自顷挥翰掖垣持囊禁署常延造膝屡竭沃心发言必诚临事无惑藹是公望居然国桢及剖符近郊兼畅救人之术仗节分阃尤深驭衆之方可谓器适中外効宣文武宜展舟楫之用式登鼎铉之司管於中枢持我大柄於戏辅翼之任人臣极崇未至而衆议有归既处而其名罕副万务攸托朕何赖焉尔其敬听此言深思其道行致君之忠终始勿渝以报国为期夙夜益励无俾厥后有慚知臣可朝议大夫守中书侍郎同中书门下平章事【元和十四年七月】

韩弘中书令制

门下纳大忠树嘉绩为臣所以明极节锡殊宠进高秩有国所以待元臣况乎邦教诞敷王言总会百辟攸宪四方式瞻永念於怀久虚其位载扬成命金曰休哉宣武军节度使知节度事汴亳颍等州观察处置等使开府仪同三司守司徒兼侍中使持节汴州诸军事汴州刺史上柱国许国公食邑三千户韩弘降神挺材积厚成器中蕴深閎之量外标严重之姿有匡国济时之心推诚不耀有夷凶禁暴之略仗义益彰自作镇浚郊二十余载师徒稟训而咸肃吏士奉法而愈明俗臻和平人用庶富威声之重隐若山崇属者淮濱濯征命统羣帅克殄残孽惟乃有指踪之功及齐境兴妖分师进讨遂梟元恶惟乃有略地之効既闻旋旅俄请执圭深陈魏阙之诚远继韩侯之志朝天有庆湛露方浓又抗表章固辞戎旅三加敦谕所守弥坚于藩于宣谅切於注意我弼我辅难违其哀恳式遂良愿载兼上司论道之崇因之以齐七政中枢之长昇之以赞万务玄袞赤舄备乎龙光不有其人孰膺斯任於戏出总兵柄入参庙谟家国之庆盈门君臣之道交泰为我柱石古今曷俦服而温?以佐乃辟可依前守司徒兼中书令散

官勲封如故主者施行【元和十四年八月三日】

萧俛平章事制

廊庙之任万邦所瞻调一气之和序五材之用出纳王命发挥帝猷简求贤能弘我邦本朝议郎守御史中丞飞骑尉袭徐国公赐绯鱼袋萧俛识通化源道契休运有戴君峻节之志秉见义匪躬之诚代袭公卿族高轩冕学贯古今之要词探雅诰之宗尝事先朝职居宥密奏议无挠忠劳益彰洎执宪南台肃清朝序休望弥洽直声日闻朕方临万邦思致於理若涉大水浩无津涯将务简以安人欲息兵而论道审象而授其代予勤尔其端志絶私去末学本叙礼乐於邦国施政教於人伦举其钧衡明示天下无俾一德专美於殷尔其敬之奉我成命可朝散大夫守中书侍郎同中书门下平章事仍赐紫金鱼袋【元和十五年闰正月】

段文昌平章事制

眷於良弼期在济时必惟才臣乃克成务况端洁刚毅可以肃具寮敏裕周通可以熙庶绩外无饰虚之礼中有効实之诚简於朕心乃命以位朝散大夫中书舍人翰林学士武骑尉赐紫金鱼袋段文昌门袭忠勲器包才杰广而不杂峻而能温修词每掇其菁华所尚者风格发言必探於指要所贵者变通识古今理乱之原知遐迩利病之本自掌文翰苑列籍金门出入五年?勤一致属朕初承宝命屡进嘉猷谅我忧惕之怀竭其公忠之志昨因召见更有咨询造膝之言注意斯得必能奉将明之大任申献替於虚襟爰昇鼎铉之司冀展舟楫之用於戏万务之始九有所瞻将致治平可不兢励尔其夙夜惟虑以匡朕躬使四夷咸宾百度惟理阜俗必苏其疲瘵审官无郁其贤能理当详於机深道当固於久大自推诚可以化物惟先已可以律人勉哉戒哉无忝我首命之重可守中书门下平章事【元和十五年闰正月】

崔植平章事制

夫宰相者上调元化以亮天工下熙庶绩以辅君德未有心不直而能叶於道迹不正而能致其君必求斯人乃命以位朝议郎守御史中丞武骑尉赐紫金鱼袋崔植气志凝远风标粹精率性而行洁已以进周历台阁蔼然声猷顷者奸臣未除利权方擅情推刻下其事将行而植独能横抗申以駁议朕每嘉望不忘於怀自膺宝图俾掌邦宪又能悉心秉执造膝敷陈归於无私多所弘益爰擢作相冀能弼予於戏尔先太傅当德宗始初清明首居相位克固直道於今称之尔其嗣守家法无废朕命可朝散大夫守中书侍郎同中书门下平章事【元和十五年八月】

杜元颖平章事制

门下王者昭宣令德临视百官必在台臣总其方略况先朝正奸佞之罪型海内之心既成大勲付朕鸿业思欲述事继志偃武兴文扬其耿光属在髦哲朝散大夫尚书户部侍郎知制诰翰林学士上柱国建平县开国男食邑三百户赐紫金鱼袋杜元颖识稟人秀才为国华器缙

密以含章言清明而体要廉方不杂峻直无徒洞朗鉴而心运阳秋鼓雄词而气干山岳爰以精粹列於内庭通贾生理乱之言达管氏政刑之本未至高位蔚为名臣间者妖孽相延纷乱南北朝夕机命迅如风霆而翰动若飞神无滞用思职必尽其心力避荣克保其谦光?奉缀衣导扬训命雅就忠贞之志实有安定之功本於忘身受我以德感激无隐切劘尽规既纳诲於三篇亦陈戒於六事朕常委以大政询其远猷研机必精应变当理布旧章於河朔推大信於昆夷动无不谐实由密赞全器輝耀淑声流闻昇於台阶允是瞻望於戏昔尔先祖为唐宰衡惟尔传臧孙有後之庆秉召公是似之德纂承旧服协於至公思贻厥之谋率攸行之道握制羣动衡平衆邪俾人不迷时乃之绩可守户部侍郎平章事【长庆元年二月】

王播平章事制 元稹

门下昔萧何用新造之汉而能调发子弟完补败亡使关东粮馈不絶者以其尽得秦之图籍而周知其衆寡也我国家乘十一圣之区宇提亿兆姓之生齿而日不能足食足兵朕甚憯焉得非调陰阳抚夷夏者不欲侵泉货之任而主会计校盈虚者不得参邦国之重乎予将兼之允在能者诸道盐铁转运等使大中大夫守刑部侍郎骑都尉太原县开国男赐紫金鱼袋王播在德宗时以对诏入仕践历台阁由御史大夫大京兆尹掌县官盐铁为春曹尚书乃长邑髻以控蛮蜒尽称厥职达於予闻洎诏徵还便殿与语得所未得闻所未闻昭然发蒙几至前席重委操剗鋌刃益精国有羨财而人不加赋东师在野物力萧然不有主张孰能戡济是用命尔作相仍以旧务婴之尔其西备戎羌东定燕冀内实九府外丰万人百度羣伦罔不在尔於戏典谟训诰行之具存邪正是非知之孔易予惟以不敏不明兹故用尔为股肱耳目又安能一二戒海垂之空言尔其励於尔心无令人观听者论尔於乡校可守中书侍郎同中书门下平章事依前充盐铁转运等使散官勲封如故【长庆元年十月】

元稹平章事制

门下御大器者登俊贤以为辅弼宣大化者擢公忠以施政教故能成天下之务达天下之情俾三光宣明百度维贞正我之倚注方得其人天实賚予允副金望中散大夫守尚书工部侍郎上柱国赐紫金鱼袋元稹珪璋茂器鸾凤贞姿文涵六义之微学探百氏之奥刚而有断忠不近名劲气常励於风霜敏识颇知於今古自恪居朝序休问再扬不自饰以取容不苟安以回虑直躬以处在危若夷卓然见陶铸之心豁尔见江湖之量间者司文禁署主朕枢机每因事以立言累披诚而献计心惟体国义乃忘身深陈济物之方雅见经邦之志朕思弘理本用治生灵式资康济之材以畅和平之化於戏尔率於正则不正者知惧尔进於善则不善者必悛惟直道可以事君惟至公可以格物秉是数德毗予一人永孚於休以底於道可守尚书工部侍郎同中书门下平章事散官勲封如故

裴度平章事制

涉大川者操巨舰不畏於洪波构广厦者揭宏材乃安於栋宇朕祇奉神器尊临万邦思弼谐辅相之臣致易简雍熙之业爰得耆旧委之衡枢冀弘嘉猷以阐玄化淮南节度大使知节度

事管内营田观察处置等使光禄大夫守司空同中书门下平章事兼扬州大都督府长史上柱国晋国公食邑三千户裴度气稟宏朗材优康济达识高议兼明不渝型仪可以光岩廊度量有以方海岳操握政柄弛张化权彝伦典谟合若符契昔我先圣以武略深计中枢密勿委之庙堂四海咸理朕侧席虚心劳怀宵旰礼命元老闻斯格言衷怀洞然云雾皆豁是用辍抚淮海举之台袞换其戎律列自黄扉秩崇上公望积师长寄尔以周召待尔以萧曹任尔以埏埴授尔以钧衡於戏衽席樽俎之内堂室牖户之间无俟窥临可以观察不违宴息其尔折冲庶乎陰阳叶和品物昭泰惟言是纳尔举必从使益稷臯陶尔无惭德垂衣南面我获任贤无易由言式遵明命可守司空兼门下侍郎同平章事散官勲封如故【长庆三年三月】

李逢吉平章事制

朕闻天地洪鑪鼓之者橐籥帝王大业成之者股肱尧舜垂衣禹汤恭己弘道任德为予辅臣则八表清宁万邦咸理故伊尹之举臯陶之升庶绩其凝不仁自远正议大夫兵部尚书轻车都尉李逢吉大方比量中正持心真玉无瑕坚金在砺峻节而高山是仰惟诚而止水可观刚柔所持吐茹无易往以青宫齿学导我典坟仪刑式孚兰?馨茂泊昇台席翊奉先朝訏谟审闻献替潜达外顺招德中深至言温恭聿修终始一贯朕嗣守丕业思得贤良将俟和羹期於旧老易之襄汉居以南宫每询嘉言启沃惟允今授之相印委以枢衡代天之工尔在专任於戏发号施令选贤与能申於百辟之上行於四海之内朝无党比人絶浇浮黑白粲然淄澠不溷使岩廊重位扬我清风弘宣大猷以畅王度可守门下侍郎同中书门下平章事散官勲如故

唐大诏令集卷四十七

卷四十八

钦定四库全书

唐大诏令集卷四十八

宋 宋敏求 编

大臣

宰相

命相五

韩弘中书令制

牛僧孺平章事制

李程平章事制

窦易直平章事制

裴度平章事制

韦处厚平章事制

王播平章事制

路随平章事制

李宗闵平章事制

牛僧孺平章事制

宋申锡平章事制

李德裕平章事制

王涯平章事制

李宗闵平章事制

贾餗平章事制

李固言平章事制

命相五

韩弘中书令制

帝王之理天下也外有方岳所以宣教化内立宰辅所以秉枢衡授任之重莫踰人臣之位斯极至於出分垣翰入作股肱非闻望尊高功庸显赫则何以允膺金属光赞谋猷前忠晋绦隰等州节度观察处置使开府仪同三司守司徒兼中书令河中尹上柱国许国公食邑三千户韩弘德器宽弘识度迈远才资英特学茂韬铃持萧何画一之心有【阙】立断之利顷以开河右地藩屏近郊爰辍台臣仗兹戎节以清静廉平之理牧我黎元通明简正之方抚我师旅奸盗自息欺诈不生晨勿饮羊夜无惊犬五都富庶已饱仁惠之风三军训齐既习严明之令宁资借寇是用徵黄今选日来朝乘轩即路宜先极拜光我元臣上宰重权三公崇秩俾复乃位惟其敬之可守司徒兼中书令散官勲封如故【长庆二年十月】

牛僧孺平章事制

舟楫所以济大川栋梁所以成大厦舟具而湍波不竦材具而廊庙用崇朕若涉之心浩然增畏垂衣端拱期在股肱是用擢彼英髦付以衡右朝议郎守尚书户部侍郎上柱国赐紫金鱼袋牛僧孺方直秉心诚敬由已玉坚持操松贞表姿文着经邦业推匡代中立不倚孤标介然日者选自南宫演纶西掖昇诸宪府授以人曹典谟训诰之词纪纲准绳之度施之必当金曰汝能朕将寄以台阶委之鼎铉贞我庶绩登诸化源尔宜克念前修聿怀明哲体乾坤易简之法广日月无私之照使风化日厚浇浮自泯好恶不竞彝伦永清於戏予视以能乃昇於位我心慎择惟贤自求昔公孙弘以射策驰声名光相府尔以揆天高称亦践台司勉同素丝之风克副臯陶之举乃加命秩用表新恩可朝散大夫尚书户部侍郎同平章事勲封如故【长庆二年三月】

李程平章事制

门下理多务者必资经远之能总衆材者实在选旧而任爰畴咨輿议参询庙廷果获诚臣乃予高位正议大夫尚书吏部侍郎上柱国渭源县开国男食邑三百户赐紫金鱼袋程文含钟律器挺珪璋行已蹈常与物无吝早以词翰密侍帷幄开弘硕问发挥训谟周旋台阁閱历中外秀造称其得俊衡镜表於无私卑牧难踰深藏不耀朕负荷重任祇守大业自顾寡昧动遵

先规委成台司不操匠斷自居无悔之地以驰至正之途而元辅披陈勇於进类尝思任人与自任不若因贤以求贤命之金求以明名列上而程为举首是必至公尔宜谨绳墨以视诸侯平好恶以待多士秉彝伦以一流竞核名实以镇浮虚叶睦乃僚无替朕命爰因铨品之鉴载伫烹飪之功可尚书吏部侍郎同中书门下平章事散官勲赐如故【长庆四年五月】

窦易平章事制

门下昔周宣王汉宣帝思弘祖业克绍先构用申甫邴魏为相然後周道重熙汉德累洽朕以冲眇托於亿兆之上?惟文祖玄宗之理若涉大水浩无津涯询於岩廊俾举髦硕而果得才杰副予虚求必惟其人乃命以位朝议郎守尚书户部侍郎兼御史大夫判度支上柱国赐紫金鱼袋窦易端厚静慤直方简廉气深而和识敏而达每黜华而务实不为善而近名早以器能扬历中外司宪着纪纲之绩廉俗垂惻隐之仁辍於天官掌我邦计底慎财货均节委输赙给不穷贍济皆足国有大柄属於全才况朕新临宝图万务资始审仪而授其代予言尔尚弼予一人用底於道且朕以丞相调兵食以冢宰执岁成我国家参用古制以重其事也尔往钦哉无忝成命可朝散大夫守尚书户部侍郎同中书门下平章事判度支【长庆四年五月】

裴度平章事制

朕周观帝王之道春秋富则倚附旧老享历久则简擢俊髦故我玄宗开元之始任宋璟姚元之之輩以调陰阳东封以後乃用李元紘张九龄之俦以承法度洎予恭守大位於今年岩庙藩封建於左右前後皆皇祖圣父之人罔有易置况勲望冠代器业絶伦副予揣抡赞此休运凡百有位敬而听之山南西道节度观察处置等使光禄大夫守司空同中书门下平章事兴元尹上柱国晋国公裴度以忘家抵患协於宪宗以匪躬不挠佐於先帝十拜相诏四登帅坛接士犹布衣之心忠时急恋阙之思价重於内外名殷於华夷藉是风猷俾参大柄且辅吾志亦用金闻於戏君臣合符不可多得千载一遇犹为比肩尔宜援古以自强垂後以居重文终之画一平阳之并容诸葛持衡之公相如引车之意率彼四子是为成人服兹昌言往践乃位可守司空同中书门下平章事仍令有司择日备礼册命【宝历二年二月】

韦处厚平章事制

构大厦者实先梁栋之材济巨川者必资舟楫之用朕越自藩邸膺明大统夙夜震兢若蹈泉谷况齐?思义艰步甫寧上奉山陵七月之期内伋訢谟庶政之始匡我眇末寘之枢极将恢兴运之功俾协具瞻之望博求名实获兹忠贤实帝賚予其谁与让正议大夫尚书兵部侍郎知制诰充翰林学士上柱国赐紫金鱼袋韦处厚体道为徒见义能往居易以行古至和而不流水霜挺松栢之姿贞白秉珪璋之德文挥风雅学该儒玄器洽而保之以谦识明而用之以晦选自经艺侍於穆宗擢司密命实赞先帝一彼直操彰其远猷临危励难夺之诚推忠备弘益之道属者变生宫掖谋俟经纶首参底定之功载竭忠贞之効雪愤横涕披肝贡词约我以禹汤罪己之勤博我以古今致治之要听必感动悉其条陈洪纖靡差梦卜斯协必能式是中外启兹雍熙俾予冲人克垂端拱是用擢昇鼎铉式亮帝图庶无愧於知人且用光於斯道於戏

前哲有言良臣惟圣处殷忧举衆之任荷济理沃心之期任四方倾听之勤在百度维新之际无怠於诲无废於身无旷於登庸无忽於询度慎尔初守固其持平协朝廷卿士之和心复贞观开元之令政用义乃辟罔非其中崇易简久大之规茂庶富阜康之绩勿替明戒时惟永图汝往钦哉无忝我命可中书侍郎同中书门下平章事勲赐如故【宝历二年二月】

王播平章事制

宰相之制所以抚镇国家出纳王命弼亮刑政變理陰阳为一人之股肱注四方之耳目仆射之职在於参赞万务统率六官师长百寮总临台寺冠中朝之硕望为多士之具瞻其有久司利权累分阃寄位重邦教任隆台阶爰因入覲之荣 赐登庸之命俾升鼎铉用辍旌旄淮南节度副大使知节度事管内营田观察处置临海县牧等使兼诸道盐铁转运等使银青光禄大夫检校司徒同中书门下平章事扬州大都督府长史上柱国太原县开国男食邑七百户王播知识精深机神敏達长才适於通变雅量得於寬明亟登将坛仍佩相印休声早振於全蜀成绩近着於维扬山泽之货无遗输转之资相继用佐经费克彰忠劳朕获守宗祧君临亿兆尚赖匡救底於辑宁於戏尔有嘉谟我求懿德将期纳海以及交修冀霖雨之濡能普施於四海舟楫之利无专美於一方宠以端揆之荣仍兹樞筦之重往践乃位汝其钦哉可尚书左仆射同中书门下平章事依前充诸道盐铁转运等使散官勲封如故【天中元年六月】

路随平章事制

绥辑万邦寔资乎元首弼成庶绩允属於股肱将以道宣化源崇固理本立我皇极赞於时邕故任贤着於禹谟纳诲载於说命眷求懿德斯惟金谐中散大夫守尚书兵部侍郎知制诰充翰林学士上轻车都尉赐紫金鱼袋路随性稟中庸气含大雅身无择行学不为人敏识周通宏才恢博挺然仁者之勇蔚为君子之儒祇事穆宗侍经内殿敷尧舜之大典畅周孔之遗风雅言玉音奥义冰释润色王度发挥圣聪出入禁闥践历华胄位弥高而唯谨任愈重而滋恭逮及先朝复参密命雍容侍从早已赋於甘泉左右便蕃未尝言於温树周旋九载终始一心直道匪躬谗言盈耳每访谟猷之指用陈匡益之诚出不忘於诡词退必严于削藁器可经国忠能致君迹其公正之方用升毗倚之任於戏干戈未息尔其弘智用以静寇攘役戍尚勤尔其宣柔服以怀戎狄均国赋以阜安百姓振朝纲以综核羣才退无後言动必虑善贞尔百度弼予一人宠以峻阶委以极务往践厥位时乃之休可正议大夫守中书侍郎同中书门下平章事勲赐如故【太和二年十一月】

李宗闵平章事制

王者祇顺天道统理人极茂育品类變调陰阳必在旁求股肱宣翼机务朕嗣守宝位於今四年属沧景构奸河朔未靖兵甲屡兴蒸黎匪宁纳隍在予辍食兴叹今苗顽既革华夏思安爰登台座弼我元化正议大夫尚书吏部侍郎上柱国襄武县开国侯食邑一千户赐紫金鱼袋李宗闵立德秉懿履道居业文行可以经邦国忠正可以动神祇周知变通识达古今自望高多士名重四朝奉丝纶於掖垣平铨衡於省闕公直有裕清贞自持固可以相导雍熙光膺梦

卜匡弼台德用济巨川宜昇枢机之尊俾叶钧衡之政於戏知臣匪易求贤惟艰膺三台之崇赞万机之重啓沃之义注於予怀尔其举正去邪以清百辟提纲举法以肃羣司简政勤心以安兆姓惟诚忠恕以靖四方严制度以弘典常信赏罚以旌淑慝有犯无隐进思弼违服兹宠光尚致予理敬戒休命无替嘉猷可守本官同中书门下侍郎平章事散官勲封如故【太和三年八月】

牛僧孺平章事制

昔汉宣帝用丙魏以盛中兴之业我玄宗任姚宋以致开元之理其术无他得贤而已朕猥居大宝首涉五年宵旰靡遑忧勤至切将倚任於国柄宜登进於人杰俾其复运枢极载清化源断自朕怀允膺金属武昌军节度使鄂岳蕲安黄申等州观察处置等使金紫光禄大夫检校吏部尚书同中书门下平章事持节鄂州诸军事鄂州刺史上柱国奇章郡国公牛僧孺气含元精体包大雅识用夷密襟灵沉粹穷圣贤旨奥之学铺邦国经纬之文蔚为名臣秀出羣萃长庆御历登贤济人廊庙有光臣工得职代天协理时乃之休先朝与能出兼征镇毗俗丕变师旅大和宣力事君时乃之绩朕饱闻器业虚佇风仪会曹参之促装喜韩侯之来覲便殿延对前席与言通古今理乱之全源知教化损益之务其应如响不知所然是宜卿长夏官平章大政康济四海毗予一人於戏君不能自为尧舜必待其臣以致之臣不能自为伊臯必待其君而任之致则期於尽忠任固在於从善然後上下交泰君臣相须尔其使百官得其人万事得其叙邪正之路必判清浊之流必分金坚一心柅制羣类无重否德予皆仰成可兵部尚书同中书门下平章事散官勲封如故【太和四年正月】

宋申锡平章事制

出纳大命宰司化元调四气以统和天人贞百度以镇安夷夏必资髦杰用委钧衡朕嗣守丕图思弘至理万务之重属於台臣仄席勤求冀匡不逮况素効久彰於密勿精材已得於询谟擢自内廷授以袞职爰立左右斯为得人朝议即守尚书右丞上柱国赐紫金鱼袋宋申锡岳降全德天资正性处约居厚蹈中秉彝文每掇其菁华学必采其玄蹟风播休闻超乎羣伦自选於同行参我内署奉职肃率心坦夷蕴冲用以国经铺训词以润王度密赞弥久弘益滋多朕累因暇日召於别殿访以大政观其立诚而胷襟洞开肝鬲无隐识精词直实契虚求固可以提持化权参决理本是用昇於鼎铉付以枢机由仙闈总辖之司当宰辅具瞻之地熙此庶绩弼予一人於戏元首以司牧万方股肱以协赞皇极上推公以馭下臣竭忠以戴君际会交感而臻大化历视前古何莫由斯予方悉是道以临兆人尔宜悉乃心以成一德敬戒厥位永孚於休可正议大夫行尚书右丞同中书门下平章事勲赐如故【太和四年七月】

李德裕平章事制

弼亮钧衡宣翼统纪明景化以凝庶绩启嘉谟以建大中爰求国桢以辅台德银青光禄大夫守兵部尚书上柱国赞皇县开国伯食邑七百户李德裕元精孕灵和气毓德坚直成性清明保躬贞规澹夷敏识冲远学总九流之奥文师六义之宗令闻丕昭金谐允属自提纲栢署掌

诘禁闾厘纪律详平之司竭訏谟密勿之节泊廉视浙右总镇?台再委旌旄缉安邛蜀克有殊政咸怀去思谅惟全才茂此声绩朕以畴庸之典彝训所先入迁司马之崇弥积济川之望是宜纳海朝夕擢居股肱弘伊吕之勲以嗣章平之美业传相印门袭戎旃绍丝纶内职之荣继鼎鼐中枢之重珪绂之盛恩辉罕俦尔罄乃忠贞副我毗倚无忝朕命服兹宠光可守本官同中书门下平章事散官勲封如故【太和七年七月】

王涯平章事制

居端揆之任再践国钧稽筦樞之功兼司邦计爰崇旧德以辑亲规简自朕心用光金属金紫光禄大夫守尚书右仆射充诸道盐铁转运等使上柱国开国公食邑二千户王涯元精降灵粹体秉哲恬智成性清贞保躬文行可以经邦风操可以镇俗以明用晦处贵滋?宪宗以禁署竭忠擢登辅弼先帝以台阶宿望宠授旄旌陰阳燮调藩宗宁谧机务允理政经交修泊铨综九流式序百礼提厘纪律统明货泉法必便人事先体国声绩茂畅洽於羣謠朕以边鄙防御犹存兵戎资储之备供亿尚繁顷者支费转输任分两使量入制用诚患多门俾足食以丰财在省员而简务是用合此两柄委於元僚正资通变之初藉我股肱之重勉思率职无或憚烦敬戒乃心钦承休命可守本官同中书门下平章事充度支及诸道盐铁转运使【太和七年七月】

李宗闵平章事制

职代天工望归人杰必资求旧允副金谐山南西道节度管内观察处置等使银青光禄大夫检校礼部尚书同中书门下平章事兼兴元尹上柱国襄武县开国侯食邑一千户李宗闵岩廊正人宗室全德才惟不器道实生知粹茂体陰阳之和周旋成礼乐之用外弘疎朗中实诚明白璧凝温朱丝秉直文穷三变学洞九源早以忠规契予审象雅有全略能宣大猷底宁戎蛮协赞郊祀见可而进知难靡回启心常罄其嘉谋造膝必闻其法语行父事君志存於嫉恶臯陶承弼道远於不仁康济而金镜有伦燮调而玉烛无爽謬励大臣之节端庄清至化之源修明典章慎选方岳敷我利泽臻於治平自出镇汉中既周星律巴俗虽歌於来暮国人颇笃於去思遂用徵还盖从公望及延召宣室益加前筹是宜再陟中枢直修衮职咨尔良辅其听朕言夫天地交泰则时和君臣欣合则国治眷求一德出纳万机勉弘如水之心式副济川之用命官罔及於私昵诏爵必俟於贤能俾庶绩惟凝彝伦攸叙无忝注意敬之戒之可守中书侍郎同中书门下平章事散官勲封如故【太和八年十月】

贾餗平章事制

寅亮皇猷丹青景化爰从选衆之举乃得非常之才前浙江西道都团练观察处置等使朝议大夫检校礼部尚书使持节润州诸军事兼润州刺史大夫上柱国姑臧县开国男食邑三百户赐紫金鱼袋贾餗识达韵孤学正行直贞和自立介特不羣能操至公每契中道声逸羣听善谐朕心自尹京师尤彰望寔亟召便殿屡陈嘉谟罄肝膈以纳忠规推诚明而无外饰察言考事深用得之近命列藩闻兹金论固可以参我大政陟於中枢天起予怀赉此良弼尔其守

法制平钧衡匡王度以振国经厘百工以凝庶绩举直错枉当官而行於戏为君之戒在知贤而不任为臣之患在保位而不言罔或依违亏吾则哲可守中书侍郎同中书门下平章事散官勲封如故【太和九年四月】

李固言平章事制

惟昔太宗聪明睿圣克致治平惟魏徵佐佑文祖叶建皇极矧朕寡薄思绍丕业旁求魏徵之比真诸岩廊庶匡不逮用底於道御史大夫李固言生於山东瑞此王国爰在下位早扬直声介然无朋中立不惧文经邦俗行表人伦和峤负栋梁之材辛毗有骨鯁之操便蕃华贯光启令图日者徵自近郊延於便殿言多方格道不容回嘉谟有伦正色无挠朱弦畅疏越之韵美玉呈特达之姿泊长宪台弥彰休问固可以斟酌理本變调化源畴咨金同梦卜斯叶命尔予弼倚为月肱登於黄枢参我大政尔当一乃心志罄其忠贞澄清流品旌别淑慝俾边域殊方咸率吾教侯伯卿士各称厥官罔曰难理惟其至公罔曰弗能惟其悉力钦哉是式无忝前良可门下侍郎平章事【太和九年七月】

唐大诏令集卷四十八

卷四十九

唐大诏令集卷四十九

宋 宋敏求 编

大臣

宰相

命相六

舒元舆李训平章事制

郑覃平章事制

李石平章事制

李固言平章事制

陈夷行平章事制

杨嗣复平章事制

裴度中书令制

崔郸平章事制

崔珙平章事制

杜悰平章事制

李回平章事制

崔铉魏扶平章事制

崔龟从平章事制

魏謩平章事制

裴休平章事制

命相六

舒元舆李训平章事制

出纳王命流品衆职覃理化於区夏谨法度於岩廊是有文可经邦才惟济代列於百辟之上俾辉三台之光今我梦劳果获惟肖爰举并命以宠非常朝议郎守御史中丞兼刑部侍郎上柱国赐紫金鱼袋舒元舆杞梓长材金玉正性道怀丙魏词贍菁英居然不器之能雅蹈中庸之美自擢领纲纪肃清朝廷硕望允归於同朝说言莫匪乎体国守兵部郎中知制诰充翰林学士赐绯鱼袋李训轩纓鼎族河岳间贤德茂臯夔文含雅诰穷易超象系之表吐论成邦国之经洎参职内庭发挥王度盛业见乎造膝明识藹於伏蒲并冲敏执中端粹不倚咸蕴莫磷之志克弘作砺之规珪璋有声鸾凤有采朕常法言高视所宝惟贤方清化源遂得时杰於戏君执象以端扆臣推公以秉钧夙夜一心小大同体则和天地序陰阳臻乎治平吾所寢寤尔宜率匡国之道明理人之方俾其致君无愧往哲咸陟枢柄伉弘大猷秋官礼闈莫非宠任祇厥成命往惟钦哉往者朕?大易皆训之义也尚未终卷政事之暇宜三两日一度入翰林元舆可守尚书刑部侍郎同中书门下平章事训可守尚书礼部侍郎同中书门下平章事仍赐紫金鱼袋【太和九年九月】

郑覃平章事制 归融

朕嗣守丕图务弘至理忧勤是切宵旰靡遑所以庶政万几委诸丞相乃者失於任使妖沴遽生方思正人参我大柄银青光禄大夫守尚书右仆射上柱国荥阳郡开国男食邑二千户郑覃天资直气岳降上才性惟端庄道本孤峻文含风雅学洞儒玄通古今理乱之源達教化损益之要历践华贯周旋大僚休闻彰於搢绅政事满於台阁载居讲席密勿内庭胷襟洞开肝鬲无隐尝奏说论发言有先见之明每励贞规勇退守独立之节洎擢膺揆务总领庶官坚操不回坠典皆举尽瘁忧国竭忠戴君必能毗予一人康济四海邪正之路既判清浊之流自分於戏秉兹钧衡委乃髦硕尔其使万事得其序百官得其人用贤罔不精立法罔不慎弼亮刑政變和陰阳其听朕言往践厥位克绍先德岩廊有光可守本官同中书门下平章事散官勲封如故【太和九年十一月】

李石平章事制

朕嗣立君位精求至道日慎一日於今十年所期辅佐之臣为我致理中立匪懈知无不为今得其人果副金属朝议郎尚书户部侍郎判度支上柱国赐紫金鱼袋李石操履坚贞志业弘茂性合道要识通化源累佐藩方备闻勲绩用司夕拜之任旋加尹正之荣爰委财征备宣成效是宜擢膺辅弼俾励政经尔当勤成务之规率致君之道内贞百度外靖四方参毗宏规课

程庶绩尽匪躬之节竭宣力之能大振朝纲兼司国计致亿兆之庶富成方夏之乂安副予知臣勉茂休烈可朝议大夫守本官同中书门下平章事仍依前判度支勳赐如故【太和九年十一月】

李固言平章事制

自昔皇王之有天下也君非臣罔以济其理臣遇君然後显其才以调陰阳以承法度虽尧舜不能自圣虽皋夔不能自贤君臣相须今古同体余之梦卜实有慕焉检校兵部尚书兼兴元尹御史大夫山南西道节度管内观察处置等使李固言禀河洛之上灵孕乾坤之间气孤退独立公忠自持擅菁英之雄文洞旨要之奥学仁归信厚动合典谟岩廊正人中外全德官寮夙望殷乎华夷历居大僚咸称厥职乃者擢自辅相委之枢衡不依违以徇人每精恪以忧国植躬而謇谔弥励纯和而节操不渝泊仗钺汉中颁我条诏端严以训齐师律寬惠以绥抚蒸黎遂用徵还俾副公议召至宣室前席与言听其诚词皆臻理化是宜再参大柄正位黄枢为朝廷之股肱耸搢绅之耳目康济四海毗予一人是非罔及於爱憎任用必分其清浊有犯无隐进思弼违勿忝我知更光尔道可守门下侍郎同中书门下平章事【开成元年四月】

陈夷行平章事制

王者任贤能所以缉熙庶绩举正直期乎献可弼违苟非懋兹大任何以光乎四海翰林学士将仕郎守尚书工部侍郎知制诰兼太子侍读上骑都尉赐紫金鱼袋陈夷行元精降灵厚载储祉聚蓄英粹作时休祥怀道清贞执德谦茂行高嵩华弘包容之雅量明洞水镜韬妍虽於默识贞已滋洁遇物能寬虽墙岸孤峻襟抱夷旷孝友为修已之具文学诚润色之余衆推全才时号端士顷在郎署雅有名称是用擢居禁密俾辅导元良论辨见贤人之业教谕得名臣之体星琯屡改才术弥彰古称旁求於梦卜曷若选之於言行是用付以政柄登於台阶任兹钧衡之重处以皋夔之秩人所注意予将仰成勉陈启沃之术以副具瞻之望可守本官同中书门下平章事散官勳赐如故【开元二年四月】

杨嗣复李珣平章事制

运行帝载翊赞天工必俟辅臣以宣至化将益秉钧之重是资并命之求诸道盐铁转运等使正议大夫守户部尚书上柱国弘农郡开国伯食邑七百户赐紫金鱼袋杨嗣复动必居正言惟在公峻若孤山清犹止水从政禀诗书之教承家达礼乐之源朝议郎守户部侍郎判户部事上柱国赐紫金鱼袋李珣质本温明才惟俊茂智能周物弘本容非守和有君子之儒可大见贤人之业咸挺为国杰秀禀元精生必为时宝称希代便蕃清秩操履有常调黄钟而协谐和朱弦而踈越或总戎重镇敷惠宁人卒乘有辑睦之功懋嫠着昭苏之咏泊入司邦赋爰掌版图事未展长公望犹鬱是可以宰领枢务用弼予违叙彝伦而建大中罄訏谟而调元气乂宁华夏保合神人宜申补袞之规致我垂衣之理於戏孔明匡鼎峙之国尚闻鱼水之词夷吾辅霸业之君犹致鸿翼之论矧予祇荷丕构虽未克前修造次之间而不忘遵道宵衣旰食一纪於兹灾殄尚生於旱蝗黎元屡困於衣食中夜静虑若涉大川将求津涯俟尔而济尔谓是

靡以拂吾心而不行尔谓非靡以徇吾志而苟用开物成务俾人於得时求贤审官宁我以多士则鱼水鸿翼夫何足言勉副简求无忝我休命嗣复可守本官同中书门下平章事依前充诸道盐铁使珽可守本官同中书门下平章事依前判户部事嗣复勲赐如故珽散官勲赐如故【开成三年正月】

裴度中书令制

缉熙政柄亮采皇猷弘道德以辅昌图调陰阳而平经纬我惟求旧人亦与能正位台阶实资元老河东节度观察处置等使开府仪同三司守司徒兼中书令太原尹北都留守上柱国晋国公食邑三千户实封三百户裴度星辰稟秀山岳炳灵文蔚采章量苞江海负经邦之远略怀许国之明诚研几而识洞蓍龟运筹而道光竹帛风雨一致仪型四朝万邦所瞻百辟为宪泊扬兵雁塞建旆龙山谨管龠而戎索烟清壮襟带而军牙气肃寇絕南牧声雄北门懿兹殊庸朕所嘉叹是用专授衡轴俾清化源统和神人茂育区夏夫宰相之任作予股肱外可以怀柔四夷内可以亲附百姓大可以赞亨毒阜生成小可以激贪廉正雅俗尔有休躅予不重言至於玉立岩廊风行号令端若植表为时司南开予胸襟端我视听实赖人杰代兹天工爰罢麾幢再操舟楫展乞言之礼岂惟论道之尊伫竭訏谟无虚毗倚可

守司徒兼中书令散官勲封如故【开成三年十二月】

崔郸平章事制

朕丕承宝图思臻古理小大之政皆倚辅臣选衆攸难得人而授中大夫守太常卿上柱国赐紫金鱼袋崔郸天资正性岳降瓌材慎杨震之四知高臯陶之九德抱负直质秀发英华动必蹈中和言皆体要聚学每探於精蹟驰骋九流摛文若奏乎笙簧抑扬三代鸿量难挹懿声自高乃者入典训词出司俊髦能用周密靡混妍媸铨总以明允为先廉察以澄清为重践其任显有休功秩宗之选方登公台之论弥鬱由是酌其望实付以钧衡恢予之规摹广予之耳目於戏宰相之任弼谐是资予欲使六气均调惟尔赞予欲使万方平乂惟尔成予欲使臣工得职惟尔谐予欲使斜正不乱惟尔翼言罔虑於拂耳进无忘於沃心贞观开元之法度具存房魏姚宋之规猷尽在咨尔丞相举而行之可守本官同中书门下平章事散官勲封如故【开成四年七月】

崔珙平章事制

一日万几熙帝载者辅相予违尔弼成台德者股肱天将瑞时必有人杰况当出震之日实藉济川之才诸道盐铁转运等使银青光禄大夫守刑部尚书上柱国崔珙应期而生希代之宝量涵海岳明并日月怀倜傥之奇姿抱英迈之正气挺质而珪璋比德彰纓而冠盖盈门立言每见於经邦行已谅先於及物早持旄节再践郊坛柔犷悍为忠义之心变封疆为礼乐之俗信入人腹令行军牙及尹正神州仪刑郡国刚能嫉恶明可照奸三辅弘取则之风四方稟承流之化泉司筦榷益茂器能精若监金利逾淬刃岁以饶美国用富强懿乃成功允谐选衆是

宜亮采皇极陟降台阶调陰阳於至和济生灵於将泰四维咸举百度以贞俾时式庸佐朕为理夫周以冢宰制国用汉以丞相调兵食犹怙牢盆之务往居钧轴之尊后德惟臣良臣惟圣汝其纳诲予亦践言勉符鱼水之资永赞文明之化服兹休命敬之敬之可守本官同中书门下平章事依前充诸道盐铁转运等使【开成五年五月】

杜悰平章事制

朕顾惟眇身纘承大构思有以允厘百事表率万邦进髦杰於台阶庶缉熙於帝载布诚听问侧席眷求爰於岳牧之中载協蓍龟之兆乃举成命以副具瞻淮南节度副大使知节度事充诸道盐铁转运等使光禄大夫检校尚书右仆射杜悰器宇恢弘襟度夷旷学通九经之要道符百代之源寒松不凋贞玉无玷忠信励事君之节勤慎得成务之才任历殷繁志惟匡益泊临淮海兼掌货泉开张多济物之功饶美指助军之献既而积粟应挽储币待供师徒无歉食之虞馈给有赢财之备克就戎事在我元臣是以付以国钧俾司邦计仍征筦榷之重务藉输经济之良能师长百寮亦从旧贯往践大位尔其钦哉於戏惟理乱在庶官矧乎辅翼之臣寅亮代天之化必在参修政本振起皇纲兴礼乐以厚人伦竭谋猷以清氛祲期於启沃以弼予违无金玉尔音将孤於虚伫也可检校尚书右仆射同中书门下平章事充度支兼诸道盐铁转运等使【会昌四年闰七月甲辰】

李回平章事制

我唐之盛实曰贞观开元则有若房杜姚宋弥纶大业虽二祖之克圣亦良弼之是赖朕自膺宝祚於兹六年未尝一日不念贞观开元之至理其命相也敢容易哉是用荐臣冀臻於道户部侍郎判户部事李回风云玄感山岳降神蔚为人宝好道天爵心无适莫惟直是从事不留滞应机辄发灵府可以调元气宏材可以济巨川有君子欲纳之言有贤人可大之业掌纶西掖克润王猷简任南台是称邦直每扬清以激浊尝持正以照邪凡有敷扬皆称朕意况副予爱子功机和戎掌彼版图时维举职历试皆可实获我心是宜参务中枢启扬庶绩式光帝载且宠正人敬往钦哉无替休命可中书侍郎同中书门下平章事充集贤殿大学士依前判户部事【会昌五年五月乙丑】

崔铉魏扶平章事制

润色王业允俟於良臣丹青帝图必资於宰辅朕嗣膺大宝思阐鸿猷永惟化源实属髦杰所期调六气以遂物总万机而富人梦帝赉予爰立作相正议大夫守御史大夫崔铉山河秀气经纬长才金声含正始之和玉立在风尘之表正议大夫行尚书兵部侍郎判户部事魏扶天与全德性惟中庸有致远之宏谋负佐王之盛业并操身特立抱气挺生高标旁映於羣伦明议动符於大雅早登华显备闋休嘉穆然清明郁有素望居易求己秉仁立诚每怀忧国之心益竭徇公之志或早以精虑升於鼎司深陈造膝之言密励匪躬之节或尝以敏用服於大寮智可洞於机权才复推於练达爰委纲宪仗名节而立朝亦总地官尝会计而经国纪纲式叙征赋益饶陟其休庸付以大柄朕欲宣明号令弘济生灵致寰海之乂安复河隍之土宇尔宜

从容奏议朝夕揣摩副华夏之具瞻展舟航之大用敬服明训式扬茂勲铉可中书侍郎同中书门下平章事扶可守本官同中书门下平章事【太和三年四月】

崔龟从平章事制

丹青神化寅亮天工将寄陶钧必归才望故汉中大业魏邴克赞其谟谋开元盛时姚宋同匡其治理尝览前载?怀斯人寤寐以求梦卜终协适当举衆不让知贤户部尚书判度支崔龟从道峻嵩华志凌霄汉气包元精识迈前哲岩廊符瑞礼乐英华弘通多监物之明坚正抱佐时之术而学穷源委词涌涛波吐论素励於公忠理躬不踰於信厚烈焰方炽珪璋更寒飞霜已严竹栢犹翠自出入剧职回翔清途经历五年恭勤一贯粉署洁赐衣之操掖垣高白凤之文澄清宣威节制持重暨位延旧德再掌地图任切良材柄端国用闾阎不困帑藏有余邦赋程均节之能军食表供须之効我有好爵本邀茂勲况乎国桢宜在人杰是用命汝同心弼予升於鼎司执此政柄吉甫德全於文武彦回望着於台衡既谐具瞻实允元辅当酌古训以恢今猷帖人部喉舌之雄免计曹经费之务期尔镇抚式彰显荣於戏惟木从?载怀药石之戒惟风偃草冀流霖雨之功与其顺美以昭忠不若尽规而辅德与其严刑而就理不若齐礼以安人伫闻嘉言共底交泰无令伊傅独美典坟可户部尚书同中书门下平章事【大中四年六月】

魏謩平章事制

天不能独运任寒暑而成岁功君所以称尊仗股肱而熙帝载高拱岩廊之上卒成天地之宜故风后登庸轩图以穆文终佐理汉业遂昌何莫由斯夫岂相远爰感风云之会果符梦卜之求属在休期俾升良弼户部侍郎判户部事魏謩膺贤运之间气蓄王佐之洪材山岳孤高珪璋特达道德忠信资以修身文章政事乃其余力自腾芳词苑振迹谏垣文宗知臣深加宠遇检校甚峻守道不回未至达官蔚为国器星霜屡变流落几途秀木摧风燎原见玉汲黯心存乎廊庙望之志在於本朝朕获奉宝图励精治本尽伸人隐思变时雍伫闻宣室之言是有夕扉之拜伟其风望委以宪纲正色立朝不仁自远貳於卿秩掌我地征吏不敢欺身无伐善弥见精强之用颇闻流衍之能朕尝咨以谟猷观其识略动中理会虑必输忠切劘每赖於沃心慷慨不忘於造膝是宜树为明表载之休声俾增辉於三台允金谐於四岳於戏调盐梅之元鼎济舟楫之巨川上维四方之安危下系羣生之舒惨居是任者不其重欤夫激浊扬清衆自耸善存诚去伪人斯归厚尔其开张教化之具导迎陰阳之和使万物各遂其宜百官得任其体昔尔先祖为唐辅臣人镜之名阿衡比德尔尚纂承义训克嗣清风勉思贻厥之谋以阐将明之业勿畏嫌而避事无执谦以自疑永孚於休用观乃绩可守本官同中书门下平章事【大中五年十月】

裴休平章事制

我国家之称至理其惟贞观开元乎虽盛德成於祖宗而致君存乎辅弼委是不构付於冲人实资献臣共荷洪业俾登玉铉用振金声正义大夫守礼部尚书充诸道盐铁转运等使裴休

明堂梁栋清庙瑚璉道崇五美学综九流持去邪与善之心蘊尊主济时之术早升甲乙首冠
贤良諫垣驰说正之名史氏动直言之笔羽仪着定律吕縉绅仙闥道播於弥纶右掖词推於
润色三临藩郡皆垂良吏之能四貳卿曹益见大臣之体泊乎司货泉之重筦山泽之财用适
变通法均寬猛大计如富强之业常规多饶羨之功人无告劳刃有余地是可以载光袞职爰
陟台阶式赞雍熙宜膺梦卜尔其允厘庶绩盛起訐谟涉大川而示吾津涯馭六马而遗吾衔
策俾臻皇极克嗣前修於戏人代天工予违汝弼悉乃心力作吾股肱无使阿衡专美於殷家
山甫独称於周室勉弘懿德勿忝虚怀可守本官同中书门下平章事依前充诸道盐铁转运
等使【大中六年八月】

唐大诏令集卷四十九

卷五十

<史部,诏令奏议类,诏令之属,唐大诏令集

钦定四库全书

钦定四库全书

唐大诏令集卷五十

宋 宋敏求 编

大臣

宰相

命相七

郑朗平章事制

崔慎由平章事制

萧邺平章事制

刘琢平章事制

夏侯孜平章事制

杜审权平章事制

夏侯孜平章事制

杨收平章事制

于琮平章事制

王铎萧邁平章事制

郑畋平章事制

韦昭度平章事制

陆扈平章事制

朱朴平章事制

崔胤崔远平章事制

王?平章事制

张文蔚平章事制

杨涉平章事制

命相七

郑朗平章事制

云因龙兴龙非云无以施膏泽臣由君用君非臣无以播皇猷信乎际会相须以康天下永言良弼常切寤思详求国桢乃获时杰通议大夫上柱国赐紫金鱼袋郑朗间代应期稟灵作瑞王室髦彦士林菁英温华凝珪玉之姿磊落负栋梁之任谏垣兰省常推谏诤正之风廉俗登坛克懋抚循之绩泊领剧务益见荅忠杜邪径而启公途惩奸吏而絶私托馈军无阙贍国有经委以宪纲尤彰直道是宜毗赞大业翊宣景化朕以区区齐晋取霸诸侯率由三贤协心五臣同德况今四海为宅百辟盈廷未能寇靖塞陲人归壽域岂无长策俾及昇平惕然疚怀莫知攸措肆予命汝往践台堦勉弘济代之功罔致旷官之诮善调兵食以备我边虞慎举典章以贞我庶品敬戒於位惟其有终可工部尚书同中书门下平章事【大中十年正月丁巳】

崔慎由平章事制

朕恭守睿图励精理道祇勤万务靡不经心?思垂拱以化成莫若得贤而共济载劳梦卜果获贞良大中大夫守尚书户部侍郎判户部事上柱国赐紫金鱼袋崔慎由山岳降灵和粹毓德仪标鸾凤识洞蓍龟文为华国行冠人表朱弦含清越之奏白玉凝缜密之姿播英声於士林彰美望於公器泊擢参内署润色王猷忠谏尽规诚明纳诲既而廉问南服宣畅皇风荡寇消灾人安政集康一方之疲俗复二职於中台议论必本於古今趣尚自归其雅正瀾河之右仍岁艰荒一自镇临载闻惠化俾司征赋益覩公忠固可以升於台阶秉我大柄爰授相印用参枢务於戏天地之道成岁功者陰阳帝王之基保鸿业者辅相念兹匡赞之大宜竭启沃之道必使贞百度以振国经凝庶绩以弘理本茂育区夏统和神人允资鱼水之谐克致休明之运

永绥厥位无忝诸臣可守工部侍郎同中书门下平章事【大中十年十二月】

萧邺平章事制

辅相之任也调陰阳而抚夷夏贞百度而康兆人代天工为持国之柄殷梦周卜竭诚待贤伊何人哉予独不可寘於精恳果得髦杰朝散大夫守尚书兵部侍郎判度支上柱国彭城县开国男食邑三百户赐紫金鱼袋萧邺天实佑朕生此令人星辰降祥珪玉含瑞蕴通明经远之识抱宰制利用之才载居禁垣重参宥密资委既至忠说愈闻爰付地征仍司邦计善为均节益茂事功道惟刚明人无侵挠风望弥峻遐迩具瞻思致昌期必资俊德是以简自朕心叶於金谐擢登中枢持平庶政尔其体太和而顺元气推至心以序彝伦短长之才固有所废细大之务一以居心扶皇极而作国桢庇苍生而遂物性虽尧舜比圣朕岂敢言而夔龙致君尔无多让周以豕宰致国用汉任丞相调兵食斯旧典也尔其懋建嘉庸对此崇宠可守本官同中书门下平章事仍判度支【大中十一年七月】

刘琢平章事制

阐大化以建皇极敷至德以义黔首百度惟允八荒用宁倚於辅臣付以邦柄求之梦猎协於蓍龟克谐明谟允属金议稽能必思於庙略畴德仁焕其国经朝议大夫守尚书户部侍郎判度支上柱国赐紫金鱼袋刘琢岳彩舒辉鸾姿降灵馭烟霄而六轡齐昇布云和而九成合奏行居人表文着国华润色词林早参宥密彩笔既符於梦卜温树不漏於私言再秉丝纶贰於刑谏振藻益茂听词无冤泊尹正洛师拥旄梁苑咸能变风俗而求人瘼和号令以肃军威重委北门辑兹王业既闻报政果叶予怀是用付以烦难慎司邦计弥月探执系时功成已洽咎夔之风宜膺台阶之命尔其平章百姓扬敷五教使羣职必举四夷率宾杜回邪之迹开说正之门大道必寘其沃心忠信无惧於逆耳於戏小大之政既已咨之成务且辍於司存均节尚烦於庙筭佩我明训服兹休嘉可中书门下平章事依前判度支【大中十二年正月】

夏侯孜平章事制

自古有天下得列圣帝哲王之科者必由良臣以就景化故君非辅弼无以启昌期时未清平不得称贤相契合交感相须而成苟非其人岂副斯举朝请大夫尚书兵部侍郎充诸道盐铁转运使上柱国赐紫金鱼袋夏侯孜礼乐重德簪裾上流才兼神器智可周物蕴范时之行义富经国之文章诚探奥微器抱冲粹早彰清烈克着令名用当七月匡谏无隐 历三独礼?不回廉风俗而政清提纪纲而望振旋领版籍亦司牢盆推公秉持息力完缉法得其伦要吏憚其威棱国财可丰官事具举是用陟此邦杰付之庙谟既谐朕心且洽金论於戏宰辅之臣羣伦共瞻政乖其宜则四海罹弊事叶其序则万人以苏副吾拔擢之恩励尔燮谐之道朝廷聿望尔其戒之可中书门下平章事转运使【大中十二年四月】

杜审权平章事制

天设四序运寒暑而成岁功国有三台仰弼谐以助君道安危是系选任攸难况朕涉道未明纂图方始详求英彦思付洪钧至诚感通果获良辅翰林学士承旨通议大夫守尚书兵部侍郎知制诰上柱国赐紫金鱼袋杜审权乔岳望崇澄波量度禀五行之秀气挺百仞之贞材虹玉潜辉龙泉蕴利文穷骚雅学洞玄儒毛价有古人之风邠吉得大臣之体自便蕃华贯扬历清途南宫擅视草之工西掖茂掌纶之业洎司文柄俾以抡才全任至公号为得士甘棠廉问衆着讴謡秋卿恤刑事无枉挠先皇帝因藉其令誉擢处禁林振藻属词发挥神化道一贯於终始器兼适於圆方逮余建统屡承密旨每多弘益弥见慎修既彰已试之能宜懋殊常之宠是用委兹大政列在中枢为朝廷之表仪实人臣之极地尔尚竭乃心力作吾股肱借箸必罄其嘉谟推局罔遗於善策用无党之道行惟一之心使爵位功名并光竹帛垂於不朽副兹宠荣往钦哉可守本官同中书门下平章事【大中十二年十二月】

夏侯孜平章事制

篙楫克修航舰以之济海羽翮可厉鷗鸿於是摩天朕恭己寰瀛劳诚梦猎将以篙楫贤辅羽翮宝臣踵三代至理之英济羣生普洽之欲载仗旧德期获我心剑南西川节度副大使知节度事管内观察处置统押近界诸蛮及西川八国云南安抚等使光禄大夫检校尚书右仆射同中书门下平章事兼成都尹上柱国谯郡开国公食邑二千户夏侯孜大昂分精维嵩挺秀擅四海之贤俊作中朝之表仪礼乐诗书资其懿范温恭孝爱辅以多才服道而致身含章而底力经国之用贯百川而不改其清应物之明体万象而莫穷其照周践华列多识旧章郎署諫垣休声夙振东阳故綵惠爱洽闻泊甘棠政成天府徵命兼领台辖之任再居邦宪之尊正色无私当官必举总征赋以贍国干山泽而富人美利无遗嘉猷益覩积是朝德昇於台司内竭谟明外弘体理驰咎夔之极摯陋周汉之遐踪克彰为辅之声允协有开之契属者以西南重镇边徼多虞爰赖专征以隆外阃福星时雨既惠巴庸景化元和须归鼎铉是用召於駟骑待以天工重开集凤之池再仰问牛之化弼谐万务师长庶寮亟付机衡俾康区夏於戏刀非砺不割鱼非水不行为君诚难得时甚易决疑定计吾以尔为神龟肥国救人吾以尔为上药尽布四体懋坚一心勉哉勿疑对扬休命可尚书左仆射同中书门下平章事【咸通三年七月】

杨收平章事制

古先圣哲之御天下也莫不劳於择贤逸於恭己是以岩求匪易殷代称宗畋获甚难周王膺命肆朕在位天授正人於言语侍从之间得亮采惠畴之美固亦高迈前烈垂休当朝敬遵用汝之言爰举弼予之典雅符不让断自无私翰林承旨朝议大夫尚书兵部侍郎知制诰上柱国赐紫金鱼袋杨收器茂浑金宝钦大玉莹清水於溽暑挺緑桂於严霜行过曾顔道兼夷惠文冠一时而若非游艺学穷千古而似不能言自鸿飞名塲鹭振班列宪署每闻其守法曲台咸着於推公所莅有声历试皆可用彰简要已洽誉於含香业擅精微遂腾辉於视草戒慎攸至初终不渝常怀造膝之忠备见沃心之旨谢安体识王俭才能动为金论所谐居溢具瞻之望由是擢於禁苑升以台阶俾申匡辅之勤用畀燮和之重尔其慕伊周之治弘臯益之谟九流既分百辟斯正嘉猷可舒於前席妙略尚在於止戈式序三才允归一德懋乃致主副予知

臣无使载笔之休独称於姚宋也可守本官同中书门下平章事【咸通三年三月】

于琮平章事制

在天垂象常星既列於三台惟国建官庶政攸赖於四辅朕每思至理益慕无为苟非正人莫付大柄爰得非熊之兆乃遵审像之求契予知臣命尔作相银青光禄大夫尚书兵部侍郎充诸道盐铁转运使驸马都尉上柱国于琮识洞著蔡文穷典谟居然国华蔚为人瑞自策名筮仕淑问益高伏蒲彰正直之名起草着经纶之绩由是道光独立业擅自强勇退无俦谦光有裕朕早闻博雅堪备论思擢於南宫置之内署果能恪慎副相端贞益实多繁赖洎出贰司寇亟居版图见君子之尽心表才之果醴府任重爰专之积弊潜闻其日除嘉庸显彰於岁计咨尔全美为予诚臣历试如斯金谐所至是宜升於辅相付以燮和惟贤式契於周官懋德雅叶於殷诰且有成计尔其听焉夫举直则百度可贞推公则彝伦攸叙进善孤寒不弃用才滞屈自伸克勉斯言是为良弼敬承休命往其钦哉可守尚书兵部侍郎中书门下平章事驸马都尉【咸通八年七月】

王铎萧遘平章事制

门下五帝垂衣本资乎辅弼三王御宇必藉其谋猷诚圣哲之规章实邦家之轨范然则得其人则天下致理轻其任则海内多虞兴废之端古今斯在开府仪同三司行太子少师上柱国晋国公食邑三千户王铎台阶降瑞昇位呈祥峻极承天清晖助日保道德而立性因文章而饰身良玉重贞精金百炼道惟经济自西号以安人术本匡时辞东山而为国泊历扬中外出入班行栖息鸾台优游凤沼荣膺三事冠絶羣寮致君之业弥深及物之功益着朝散大夫守尚书兵部侍郎判度支上柱国赐紫金鱼袋萧遘紫庭鍾律玄圃琳琅韵协金茎光昭袞蔽自精通艺行履历清崇逸翰摩云高踪絶地近者台称綢职岁计成功霜威已戢其奸邪日用无亏於馈挽昨以东隅寇盗啸聚为羣俶扰关防奔冲畿甸朕巡游梁冀将复京都欲救生灵必资贤相乃朝廷硕德社稷诚臣载君之力无穷许国之心益励是使重敷五教爰总万机勿弃前修无忘厚獎乃孤标特立洁白不渝利可剽犀清能鉴鬣辅成乾道兼领冬?各副忧勤可安宵旰铎可门下侍郎兼司徒同中书门下平章事散官勲赐如故仍令所司择日备礼册命遘可银青光禄大夫守工部侍郎门下平章事仍落下判度支事主者施行【中和元年正月】

郑畋平章事制

门下任贤勿贰有国之令图惟帝念功昔人之善训朕遐观往代每慎厥终其有道济邦家任已崇於屏翰忠存宗社义可贯於神明宜徵帷幄之谋重委庙堂之筭冀清大难以启中兴开府仪同三司守太子少傅分司东都上柱国荥阳县开国侯食邑二千户郑畋八柱比崇三阶垂辉繁露演先儒之学高风追大雅之文外标威凤之仪内贮函牛之量焕如纶之旨共许才高被贝锦之词弥彰道直体兹全德历试崇资燮赞中枢极致君之事业镇临辅甸标坐树之威名泊虜犯封畿尘飞象魏避狄之谋既决微管之赖诚深而能竭预虑之机用安君父举从权之计以悞奸?当代之勲格天比盛此际咸思义举尽蘊忠谋且闻盟主臧洪登坛有誓将军

祖述击楫忘身致蕃汉之齐驱由怀柔之有术今则不从人望内断予衷罢列岳而登三公自金坛而昇玉铉鱼水之懽尽在君臣之契可知於戏寰宇未清予则仗绥怀之毗园陵失守予则伫收尅之功次则扬惠化以拯穷人弘无私而叙羣品山河有誓金石岂渝更候殊庸以膺极宠可守司空兼门下侍郎同中书门下平章事充太清宫使弘文馆大学士余如故仍命所司择日备礼册命主者施行【中和二年二月】

韦昭度平章事制

门下朕闻先王之命相者调燮陰阳则四时顺其序均和品类则万物适其宜然後扶危持颠易乱成理俾生植咸遂邦家充宁故周卜帝师得诸渭水殷梦贤佐求之傅岩我择股肱爰获侍从翰林学士承旨银青光禄大夫行尚书兵部侍郎知制诰上柱国韦昭度诚贯金石行通神明气含元精识同蓍蔡穷文武施张之道作栋梁舟楫之资为时间生作我良辅泊昇名俊造历官清华鸿翥九霄骥逸千里旋参宥密备着声猷使我语言进三代之风使我典则符百王之法当风雨之如晦励节敬恭念艰难之在途夙勤晨夜临难得近臣之体効忠彰明哲之心是用总以万机纳於百揆作邦之桢秉国之钧若鱼水之相欢谅云龙之合应君臣之道今古攸同於戏窃逆?天兵戈散地宫朝未复宗社靡宁尔宜动察安危居图匡济设六奇之秘策发三略之沉机定元?於一戎振颓纲於四裔绍贞观太平之业启开元中兴之期光赞一人永阜羣庶勉集盛烈克勤公家往钦哉敬服休命可守本官同中书门下平章事勲赐如故主者施行【中和元年七月】

陆扈平章事制

门下昔在太宗时则有房杜持国钧在玄宗时则有姚宋司政柄降於列圣代济君臣是知股肱元首之间未有不相资以成者也况我荐逢难运方计叛臣宜搜间代之英冀适济时之用其有怀材已试亮节孔彰俾膺霖雨之求斯正彝伦之叙式举茂典吾无所试翰林学士承旨银青光禄大夫守尚书左丞知制诰上柱国嘉兴县开国男食邑三百户陆扈简节正音温光瑞玉咸濩抱降神之韵珪璋挺华国之容包倚相之典坟绍平原之词藻爰自高材赴召丹地代言丝纶必本於典谟献纳已观其事业仍岁扈和銮之狩六年专诏诰之勤说正自持门望弥峻况尔伯祖贻昔以才行尝居禁林当德宗避敌之秋实廼祖纳言之日积其伟节昇於鼎司书命諫章流在人口是用选自密勿陟之台衡昭於前光期以後効执我大柄貳兹地官既表殊恩且有丕训於戏奸?尚炽干戈未平生灵流离宗社榛莽尔其举坠典正颓纲进贤良远奸慝勿依违而避事无拱默以树恩庶乎艰难有望康济往践乃位敬而戒之可尚书兵部侍郎同中书门下平章事【乾寧三年七月】

朱朴平章事制 韩仪

门下梦傅岩而得真相则殷道中兴猎渭滨而载献臣则周朝致理是知显诸仁而藏诸用君子但守其沉机怀其宝而迷其邦大器曷虚其显位朕自逢多难渴伫英贤暗祷鬼神明祈日月果得其哲辅契予勤求朝散大夫守国子毛诗博士上柱国赐紫金鱼袋朱朴学业优深识

用精敏久回翔而不振弥贞吉以自多朕知其才遂召与语理乱立分於言下闻所未闻兵农皆在於穀中得所未得不觉前席为之改容须委化权用襄昌运是乃振於庠序陟彼钧衡自我拔奇宁拘品秩於戏时风甚薄国步方难兵戈未息於近郊经制日隳於故事宫阙焚荡邑里凋虚外则未殄元?内则未凝庶绩整我纲纪成我雍熙百度羣伦俟尔康济勉思敬戒以服宠章可朝散大夫中书门下平章事上柱国赐紫金鱼袋【乾寧二年八月】

崔胤崔远平章事制

门下择股肱良臣为社稷大计斯实安危之本必资经济之才应星象以调三台平陰阳而调六气成彼非熊之兆叶兹审象之求既偶通贤爰申并命扶危匡国致理功臣新授武定军节度湖南管内观察处置等使金紫光禄大夫检校礼部尚书同中书门下平章事持节都督潭州诸军事兼潭州刺史上柱国清河郡开国侯食邑一千户崔胤公台贵胄礼乐名门秉直道以匡时挺贞观以华国玉山孤峭迴出千峯冰镜澄明能涵万象翰林学士承旨银青光禄大夫行尚书兵部侍郎知制造上柱国博陵县开国男食邑三百户崔远珪璋蕴德鸾鹤呈姿持伟望以标奇蕴神锋而匿耀朱弦逸韵既可礼天宝剑雄鋌宜乎折滞或继应倚注屡执钧衡或亟处深严尝司诏诰燮理茂绩敏嘿嘉名昭布朝伦洋溢休称而体国励志问牛之美早传戴君尽诚吐凤之名夙着宜陟重任详观厥能升诸喉舌之司宠以鑪锤之用专秘殿之图籍度会府之财征俾操化钧仍綰邦职当此艰难之运爰繫辅弼之功噫未复神州尚兹多垒仍岁有征巡之役兆人怀苏息之期予心浩然罔知克济咨尔良弼共成懿图勉膺三事之荣恪奉一时之宠胤可守中书侍郎兼户部尚书同中书门下平章事集贤殿大学士判度支远可守本官同中书门下平章事判户部散官勲封并如故【乾寧三年九月】

王?平章事制 韩仪

门下朕闻轩辕得力牧而为五帝首夏禹任臯陶而为三王祖虽不言而化自契於玄功而端拱仰成实咨於哲辅况有尝持大柄久竭訏谟振寅亮於岩廊立惠迪之轨躅俾仍旧贯再委平衡断自朕怀用符金属扶危匡国致理功臣新授武胜军节度浙江东道管内观察处置宣抚等使金紫光禄大夫检校尚书右仆射同中书门下平章事使持节越州诸军事越州刺史上柱国开国公食邑三千户王?道洁秋霜文含春彩动不渝矩立必正方行中孚絶类之贞保大有匪躬之节讷於言而敏於行深耻名浮竭其力而致其身惟将道胜顷岁朕察其才智可委钧衡拔自貳卿升之四辅果能推诚匡国罄虑忧时敷沃心之嘉猷进苦口之良药洎汧岐叛涣京师戒严罔惧触鳞屡陈逆耳且抃以明君待我故每敢极言我以忠臣任?亦当加獎纳深知尽瘁永用寘怀自銓铨省方艰危扈蹕澄心无挠临事应机为时而生信非虚语昨以初清镜水新荡稽山慎择周材以康疲俗是用掇於台鼎俾践师坛念卿前後奏陈有犯无隐吾虽不敏深谅至忠静复斯言皆合朕意说正之言久而弥芳虽浙右之疮痍诚思惠养顾岐阳之妖逆尤藉机筹宜归班瑞之符却秉代天之笔尔宜内凝庶绩外殄元?勉精医国之谋报我知臣之德天官重位光禄崇阶兼以命之用旌宠数服兹休命可不慎欤可光禄大夫吏部尚书同中书门下平章事功臣勲封并如故【乾寧三年十月】

张文蔚平章事制

门下古者明王居亿兆之上虑弗用义兢兢业业卜选梦徵思得全才俾谋共理付之台铉仰以和平既谐作砺之求允继非熊之兆银青光禄大夫行尚书礼部侍郎上柱国张文蔚字量冲穆襟灵坦平而又凌轹清华骞翔显重久居内署备着芳猷论事而高议昇平扈从而志坚尊獎视草着博通之业寡言彰慎密之规朕乃掇自翰垣委之大柄克尽搜扬之道颇开公正之门是用列在鼎司咨之袞职尔其研求理道精链事机尽当朝贍国之谋究前代销兵之术书载伊尹实惟阿衡今倚任之亦惟若是敬乃於位思其有终可同中书门下平章事余并如故【天佑二年三月】

杨涉平章事制

门下持钧轴以變陰阳是资至德掌地征而富邦国必仗通才难虚作砺之求式叶为霖之望金紫光禄大夫守尚书吏部侍郎上柱国弘农县开国伯食邑七百户杨涉代袭轩裳业通坟典践履华胄周旋大僚陈太丘雅尚清贫葛稚川不贪荣禄绰有休问喧在羣言往典贡闈则文行兼采近司铨管则清浊咸分至必可称动皆垂范朕嗣丕祚?思小康是用授以钧衡委之征赋尔其克申蘊蓄用副旁求使干戈速偃於四郊玉帛断归於内帑仍司仙殿更重化源勉辅冲人臻於理道可尚书吏部侍郎同中书门下平章事充集贤殿大学士判户部事散官勲封并如故【天佑二年二月】

唐大诏令集卷五十

卷五十一

钦定四库全书

唐大诏令集卷五十一

宋 宋敏求 编

大臣

宰相

馆职

张说等监修国史勅

宋璟苏頲修国史勅

萧嵩集贤院学士修国史勅

裴光庭弘文馆大学士制

陈希烈监秘书省图书制

齐抗修国史制

李藩弘文馆大学士制

牛僧孺集贤院大学士监修国史制

李固言崇文馆大学士等制

魏謩监修国史等制

令狐綯弘文馆大学士制

郑朗监修国史等制

崔慎由监修国史等制

萧业监修国史等制

夏侯孜集贤殿大学士制

白敏中弘文馆大学士制

王铎弘文馆大学士等制

萧遘监修国史等制

馆职

张说等监修国史勅 苏頲

勅古之王者代有史臣以日系月属词比事举而则书用存有法事而不法是谓空言盖褒贬之重慎也自非经术文雅进德修业出忠入孝匡俗佐时为朕宝臣有邦良辅者孰可综核班纪发挥苍籀银青光禄大夫守中书令上柱国燕国公张说银青光禄大夫守兵部尚书同中书门下平章事三品上柱国梁郡开国公姚元之等并可监修国史余各如故【先天二年十一月二十二日】

宋璟苏頲修国史勅

古之良臣实难其人掌邦国之事明劝惩之道是以淑骏弘简茂先博物爰自重臣式膺兼领银青光禄大夫吏部尚书兼黄门监上柱国广平郡开国公宋璟明允笃诚有犯无隐银青光禄大夫行紫微侍郎黄门平章上柱国许国公苏頲忠肃恭懿察微知彰并光我国桢熙我帝载在公闻山甫之颂抗直有史鱼之节王言斯典曾是献替君举必书亦惟褒贬宜崇鼎铉之任更述盘盂之篇并可修国史余如故

萧嵩集贤院学士修国史勅

明乎国史所以弘阐大猷观乎人文所以化成天下自非鉤深学海囊括词林盛周公之典谟悬仲尼之日月何以纂叙鸿业允谐金能兵部尚书兼中书令萧嵩自天生德惟国之桢孝友温仁稟於性与明密忠谨自然道合礼乐资其黼藻风雅由其发挥足以掌书殿之秘文紬史策之徽烈论道而讲学司论而记言俾垂作范之规用成不刊之典可兼集贤殿学士知院事兼修国史

裴光庭弘文馆大学士制

政理鸿业弘之者大贤文儒盛美典之者茂德自非夔龙间出周孔挺生则无以翊赞经纶发挥图史者矣侍中兼吏部尚书裴光庭忠公性与礼乐天资为社稷之臣总喉舌之任仪刑百辟则庶绩其凝藻镜九流则具瞻惟允进规献替明谟每竭絶编囊简成诵不忘固可以论道之余阐尊儒之义纬经庙堂之略论思秘馆之文金日尔谐期於予理往膺宠命克昭丕绩可充弘文馆大学士余如故

陈希烈监秘书省图书制

国之载籍政之本源故藏於蓬山絨以芸阁者以为义府之成谟三五以还皆率兹道也故每加求购冀补遗逸四部名目悉索而采七略条流兼该颇尽岂若羽陵之蠹简汲冢之残编如闻顷者以来不存勾当或詮次失序或鈎深涉疎或擅取借人或潜将入已因循斯甚散失遂多思革前弊允资盛德宜令左相兼武部尚书陈希烈充监秘书省图书爰假丹青之余以着铅黄之美则金革侍读足继宠於班伯石渠司籍方嗣徽於刘向至公之选可不务乎

齐抗修国史制

勅天工人代缉熙庶绩所以达四方之志遂万物之情王猷以穆在乎宰执君举必书弘厥史职典领着作允资荅臣中散大夫守中书侍郎同中书门下平章事上柱国赐紫金鱼袋齐抗文合大雅行归中庸弘道而致远含章而树业稽三王之法志酌千古之献言积纯粹而外发德辉自明诚而居为国器擢登密勿每竭訏谟察其忠谅多所弘益以序王道之端辨人事之纪劝惩教化在於春秋错综裁成必归良直以中枢之余力得东观之全才山甫补阙已彰於匪懈臧文立言伫闻於不朽修明简策惟尔之休可兼修国史余并如故

李藩弘文馆大学士制

勅朕思欲恢弘大化登乎治平翔声教於鬼区焕日月於黄道士网开而万?垂泽泰阶峻而百神受职叶於梦卜天其賚予朝议大夫守门下侍郎同中书门下平章事上柱国赐金紫鱼袋李藩德宇凝粹神襟超旷量寛而不入尘滓理当而不留枝叶治古人之道为君子之儒温然玉容流竞斯远絜矩以居正开诚以纳忠起草野之废滞通天下之和惠内则褒美良能塞邪枉之路外则销铄灾患宁黔首之艰广予聪明弘益良厚言念报礼发乎深衷爰加书圃之职用饰贤人之荣宠灵斯重汝其敬之可兼弘文馆大学士余如故【元和四年三月二十八日】

牛僧孺集贤馆大学士监修国史制

门下寅亮天工弼谐庶务弘我一德抚绥万邦佐予冲人以底于理时推恩于天下必首自於辅臣是用极其褒崇增其命数训正图书之府裁成义例之条银青之阶光於七命兹所以赏劳而驭贵也正议大夫守中书侍郎同中书门下平章事上柱国奇章县开国子食邑三百户赐紫金鱼袋牛僧孺大玉不琢乔松挺姿文探典谟学贯流略自纶阁掌诰会府贰卿声闻实

彰仁德归厚先朝因嘉其器业爰命奋庸秉事君之小心蘊难夺之大节往以圣体违豫潜心保和乃能画一时平守而不失朕自膺宝历深仗股肱每申勇退之荣用广进贤之路损而招益谦乃弥光实简朕心克谐金瞩刊鱼鲁於往籍垂褒贬於国书勉承新恩无替旧服可除银青光禄大夫守中书侍郎同中书门下平章事兼集贤殿大学士监修国史

李固言崇文馆大学士等制

阐至业敷大化实赖於忠贤逐奸慝去党比必资於正直非学推间代道茂经邦则安能秉是钧衡赞予鸿业朝散大夫守门下侍郎同中书门下平章事上柱国赐紫金鱼袋李固言刚毅自任端严不回常怀疾恶之心每负佐时之业顷者奸雄蔽过党比相连非尔固言执谏孰开予意面陈至恳章疏继来辨虞卿宗闵之倾邪明萧瀚李汉之朋附爰付大任益彰器能励乃公忠副予委遇朝议大夫守中书侍郎同中书门下平章事上柱国姑臧县开国男食邑三百户赐紫金鱼袋贾餗抱忠与义秉直端诚文包经济之方学达古今之奥自付以枢柄咨其谋猷沥恳尽规夙夜匡补竭传说之启沃致山甫之将明而又举善推贤孜孜匪懈苟利於国知无不为惟岳降神邦家永赖於戏贞观之初共推房杜之德开元之际又称姚宋之贤思得其人常劳寤寐但使固言说直除四凶以肃清餗推至公披八元以辅弼进之邦家庶叶斯美是宜荣加书府之职宠兼文馆之任其监综史氏以润色大猷仍进崇阶用獎忠孝勉服新命无替前劳固言可银青光禄大夫崇文馆大学士兼修国史餗可银青光禄大夫充集贤殿大学士监修国史余如故

魏謩监修国史等制

门下大官之崇严史阁之要重书殿之清秘近代以来率命相臣总统其务宠擢迁转允谐旧规金紫光禄大夫门下侍郎兼兵部尚书门下平章事监修国史上柱国彭阳县开国男食邑三百户令狐綯上才经邦正德宰物瑚琏重器宜升清庙之中银青光禄大夫守中书侍郎兼礼部尚书同中书门下平章事集贤殿大学士上柱国魏謩直道事主宏国佐时珪璋瑞姿早登太坛之上金紫光禄大夫中书侍郎兼户部尚书同中书门下平章事上柱国河东县开国子食邑五百户裴休忠力许国清规立朝鸾凤异仪高举重霄之外并富有天爵深於人文早怀匡济之姿素蘊生灵之望泊处台位毕陈庙謨能肩一心以畅万务识我忧勤之旨罄其弼亮之诚边疆寢宁风雨咸若念此丕绩怀于深衷今则各新宠章迭领重职所宜阐清静玄默之化正褒贬予夺之业因此嘉命启吾规词夫献忠言则君受益秉公心则人无怨除吏当则衆职举下令一则百度美是乃吾三后前所施为也余尚忧属重事切磨终始不亏乃曰良相綯可守本官充太清宫使謩可守本官监修国史休可守本官充集贤殿大学士散官勲封各如故主者施行【大中九年七月七日】

令狐綯弘文馆大学士制

门下夫茂育羣生动资良弼缉熙庶绩表正万邦非竭力戴君推诚忧国则何以光膺鼎铉高步瀛洲十载於兹四方无事昭文备德属自台臣金紫光禄大夫门下侍郎兼兵部尚书

門下平章事充太清宮使上柱國彭陽縣開國男食邑三百戶令?綢保合太和從容中道左右王化清夷國風輔相盡天地之宜啓沃見忠貞之節直氣能斷嘉猷自新納海之心義形於色於戲發號出令表率寰區妙運樞機式弘敷錫山甫補袞夷吾佐時勉極殊勲書於太室朕以虛懷委遇於道始終佩服斯言敬承嘉命可充弘文館大學士余并如故主者施行【大中九年九月三十日】

鄭朗監修國史等制

門下二相股肱與我同體致夷率化致俗清刑致戢干戈致調風雨垂衣無事良有愧焉安得不資刊削之能伫討論之妙振揚史職開儒風予非敢私并膺此命通議大夫守中書侍郎兼吏部尚書同中書門下平章事充集賢殿大學士上柱國賜紫金魚袋鄭朗道苞時杰性蘊天和得中庸之隱微合大雅之明哲大中大夫守工部侍郎同中書門下平章事上柱國賜紫金魚袋崔慎由器稟人秀材為國楨達智者之變通有良臣之規矩皆學窮闕奧文擅精華辨理必造於事機吐詞同歸於根本松筠挺色莫畏嚴霜鵬鸞凌空自有俊氣況協贊大政允厘萬方沃心克聞舉直無隱圖是謫効彰其茂功斯用迭升俾洽嘉命主張懲勸摠領典墳必使書法彌精動契春秋之旨化成為重豈惟魚魯之文勉弘大猷罔替朕命朗可監修國史慎由可充集賢殿大學士余各如故主者施行【大中十一年三月九日】

崔慎由監修國史等制

門下惟政之艱非賢勿乂用熙庶績實仗羣材頃所以旰食宵衣勤求機衡之寄咸得時哲副予虛懷大中大夫守工部尚書同中書門下平章事集賢殿大學士上柱國賜紫金魚袋崔慎由器識淹通風監明秀黃香之祇勤爾功壺遂之深衷足稱朝散大夫守尚書兵部侍郎同中書門下平章事判度支上柱國彭城縣開國男食邑三百戶賜紫金魚袋蕭邺操履清方詞調凝遠孔光之慎密早著山甫之將明可嘉而并弘典墳博通理奧亟更顯重雅有風教允副金諧當茲鈞軸延謀時務稽參政途盡心力以經邦弘禮樂而緯俗羣善必舉庶官乃和可以勒美太常書忠甲令者矣今則三秋式稔四境無虞乃眷股肱厥有成績至於總史官之微婉備帷幄之讲求繼美臯夔比良迂董顧茲茂典式示褒優敬爾在公服我休命慎由可監修國史邺可充集賢殿學士余如故主者施行【大中十一年十月十七日】

蕭邺監修國史等制

門下康濟生靈必在陶甄之化稽參政事允歸王佐之才況乎元首股肱義均一體叶心同德予懷所嘉式兼刊綜之榮用舉褒隆之典朝散大夫守工部尚書同中書門下平章事充集賢殿大學士上柱國彭城縣開國男食邑三百戶賜紫金魚袋蕭邺?神清肅器鑒精通敷贊大猷孫弘有慎厚之行朝議大夫尚書戶部侍郎同中書門下平章事判度支上柱國賜紫金魚袋劉琢業履清方風標峻整彌綸庶務安國乃任職之臣而皆詞煥丹青道潤金璧匡衡貢禹經術該明孔光師丹議論寬博或頃司邦計茂底慎之規或嘗捆節旄着繕完之績泊膺樞近益暢謨猷每見沃心實諧注意俾厥後為堯舜納百姓於休和即竭乃誠期於予理子長子駿之

职石渠天禄之书稽合异同成我褒贬儒雅之任迭处攸宜式表茂勲用荣兼领永绥宠渥往孚于休邺可监修国史琢可兼充集贤殿大学士余各如故主者施行【大中十二年二月十八日】

夏侯孜集贤殿大学士制

门下朕居兆人之上当万几之广戎夷式叙陰阳克调实赖宗社降灵辅弼宣力臻彼富庶至于治平既彰大明益仁化成之妙载颂台席用盛儒林之选朝请大夫守尚书兵部侍郎同中书门下平章事充诸道盐铁转运使上柱国赐紫金鱼袋夏侯孜材协国桢道称王佐以孝友为家行以礼乐为身文黄陂纳寬涧松挺节雄词擅雅奥学洞微利刃发硎而肯綮无滞代天宰物而埏埴有余薰然至和霈若潜润况精列图籍焕开禁垣高列俊髦翔集近署雅归清重方在总枢广畅事功显扬懿美是宜更一乃志愈专乃衷吐辞虽酌於当今学正必思於稽古俾密勿之际啓沃之间无忘我以三坟五典更光丕绩永孚于休可充集贤殿大学士余并如故主者施行【大中十三年八月】

白敏中弘文馆大学士等制

门下朕初承天序方崇政源属在辅臣兼领重职况仙宫至严专总尤切儒林之盛分列掖垣良史之能必归惩劝将欲比肩上古耀美一时克副旁求允膺茂典特进守司徒兼门下侍郎同中书门下平章事上柱国太原郡开国公食邑三千户白敏中气禀岳灵道洽王佐致君之志发於深诚银青光禄大夫守中书侍郎兼刑部尚书同中书门下平章事充集贤殿大学士上柱国谯县开国男食邑三百户夏侯孜材为国桢望贯人表济物之用彰於显仕金紫光禄大夫守中书侍郎兼工部尚书同中书门下平章事上护军乐安县开国男食邑三百户蒋伸识蘊生知衆推邦杰狗公之操本乎进忠并词峰峭拔高踰列岫学海深奥远含百川处彼岩廊付以衡轴动有弘益居然矩矱叶心而和平造膝而啓沃式谐金议能弼予违乃知其功信无与让是用思阐玄化冀扬清静之规弥在立言更仁刊削之妙资其讨论必以化成为先副我虚襟感佩嘉命敏中可兼充太清宫使弘文馆大学士余各如故主者施行【大中十四年正月十六日】

王铎弘文馆大学士等制

门下韦弦互佩则情性和文武兼修则事功济况岩廊重德柱石贤臣方当弭寇之时正委运筹之略各覃恩渥用獎勲劳开府仪同三司守门下侍郎兼司徒同中书门下平章事上柱国晋国公食邑三千户王铎太极储精华池稟润文能师古业擅经邦光显数朝偃仰三事挺许国忘家之节蘊经天纬地之才金紫光禄大夫守中书侍郎兼礼部尚书同中书门下平章事上柱国裴彻玉海澄澜金茎擢秀泉停襟抱岳立标仪道则有常材惟不器松竹见後雕之操轮輓彰致远之功银青光禄大夫守尚书工部侍郎同中书门下平章事上柱国萧遘维岳降神昴星应瑞琳琅莹茂云日孤高业着代天泽惟周物伟望而汪洋自远清规而峻拔难偕并智比蓍龟祥同麟凤备彰器业遍践清华云霄次第以登临台阁从容而履历或鬱为国老或

宛是台臣人无间言朕所注意自妖凶构逆巡幸西来皆能问道以潜奔竟致临轩而再会益坚臣节仍罄庙谟杜南征注传彰闲谢安石围碁决胜每闻尽瘁尤切图功更宜讲贯安危错磨理本用萧曹之秘略继房杜之高踪伫见中兴实资良术再践大貂之位三居文馆之权首镇元台备兼衆务或官当喉舌职重阳秋或位正中枢荣兼秘殿大仪峻秩驭贵崇阶式示优恩更申奨励早清巨孽俾振皇纲使云龙鱼水之欢永光於竹帛铎可司徒兼侍中充太清宫使弘文馆大学士兼延资库使散官勲封如故彻可特进行门下侍郎兼兵部侍郎同中书门下平章事监修国史勲封如故邁可光禄大夫行中书侍郎兼礼部尚书同中书门下平章事充集贤殿大学士勲封如故主者施行

萧邁监修国史等制

门下宰相之任调元气以作辅持大柄以匡君况狂寇未平戎车尚驾顾我勤劳之意在兹筹画之功虽循旧规式加新宠光禄大夫行中书侍郎兼礼部尚书同中书门下平章事充集贤殿大学士上柱国萧邁琮璜重器韶濩正音洒落襟灵品流多士有山甫补袞之功抱子房借箸之谋银青光禄大夫行兵部侍郎同中书门下平章事上柱国韦昭度山岳蘊灵星辰耀彩澄澹不挠端庄自持恳恳常务於燮谐孜孜不忘於賛理而皆便蕃显贯履历清华为宗庙之栋梁作邦家之柱石言成损益知合蓍龟弥彰及溜之诚尽着匪躬之节每听尔嘉话寛我殷忧所宜纵堂上之奇兵弥兹寇孽啓胸中之利器剪彼妖狂伫见中兴之期须兹辅臣之力安危是注倚仗弥深地官既示其加恩大仪式彰其峻秩掌东观阳秋之重总石渠刊校之权茂勲增荣崇阶示贵久处黄阁宜正紫垣庶其广运筹谋速见平荡伫丹青垂美鼎鼐勲高永兹鱼水之欢用契云龙之会承我茂宠尔其勉之邁特进行中书侍郎兼户部尚书同中书门下平章事监修国史勲如故昭度可光禄大夫行中书侍郎兼礼部尚书同中书门下平章事充集贤殿大学士上柱国主者施行

唐大诏令集卷五十一

卷五十二

钦定四库全书

唐大诏令集卷五十二

宋 宋敏求 编

大臣

宰相

判使【罢判】

杜佑诸道盐铁使等制

皇甫鑄罢判度支制

王涯诸道榷茶使制

蒋伸罢判户部制

王铎户部制

萧遘判度支制

萧遘罢判度支制

孙渥判户部制

孙渥判度支兼诸道盐铁使制

王?诸道盐铁转运等使制

领镇

姚崇都检校诸军大使制

张说兼知朔方节度使制

李林甫兼河西节度使制

李林甫兼朔方节度使制

王缙侍郎中兼都统制

杜鸿渐东都留守制

王缙兼幽州节度使制

裴度门下侍郎彰义军节度宣慰等使制王铎中书令诸道行营都统权知义成军节度使制

郑畋门下侍郎平章事依前都统制

判使【罢判】

杜佑诸道盐铁等使制

周制国用委于冢卿汉调军食资於相府必由中以制外则政一而事行所以阜安兆人平均九赋弼成富庶之教驯致雍熙之化实仗元老佐予经邦银青光禄大夫检校司空同中书门下侍郎平章事充太清宫使上柱国扶风郡开国公食邑三千户杜佑体资易直德合弘大事君以道修己以诚寅亮先朝毗赞盛业秉忠直之大节备文武之全才保乂朕躬载申啓沃发挥政本开道化源谟明缉熙三事允理必能综领经制变而通之权货币之宜成军国之务外均庶土内贍中邦俾予一人恭已而理弘敷五典式协于中可检校司徒充度支及诸道盐铁转运等使依前同中书门下平章事太清宫使散官如故

皇甫鑄罢判度支制

门下古者丞相府不按吏盖以任重体大地亲礼崇非征讨之时岂仗货财之事爰俾出纳归诸有司用严台庭以辅吾道中大夫守门下侍郎同中书门下平章事判度支皇甫鑄精明絶伦乾健不息蘊是器业发为英华顷以守位聚人必资大计因其能事委以重权运用之机所以经天下之务重轻之法所以筦天下之财自淮右不?东平犯顺兵车在野馈食连年而乃庖无折刃御有濡轡既授明命升之股肱轩裳所瞻崖岸益峻请谒自絶其风凜然况贍给之余谋虑毕至平二方之险阻息再战之干戈庸非坐筹佐朕而致今则百揆攸叙万邦保和宜全相府之重勿领诸司之剧抚夷夏调陰阳用安元元时乃之职可守门下侍郎依前同中书门下平章事

王涯诸道榷茶使制

门下王者峻其礼秩所以报殊庸崇其职业所以归硕望其竭股肱以宣力抱诚明而戴君调四气以统和天人贞百度以镇安夷夏勤彰於山泽德冠於岩廊不举宠章曷示褒劝金紫光禄大夫守司空兼门下侍郎同中书门下平章事充弘文馆大学士太清宫使及诸道盐铁转运等使上柱国代郡开国公食邑二千户王涯诚贯金石行通神明气含元精识洞蓍蔡穷圣贤旨奥之学擅邦国经纬之文为时而生作予良弼长才推於精敏雅量得其寛和乃者重升师坛所至必理载践台席櫛昭休勲当险夷之途贞白无染在风雨之晦操尚不衰莅事秉明哲之心临难有大臣之节执万机之政柄统四海之利权处剧而神虑益闲在贵而家法愈俭忧国尽瘁罄其訏谟爰自累年江淮水旱煮海之利日用而不亏佐赋之功岁抄而後显均输之利相继牢笼之资无遗经费有余时乃之力况邦计之务摠领尤难付之均节克有饶羨朕今以茶法稍弊理须变更凡斯重难悉以资委礼当优异式表至公俾进给於三司仍策勲於八命予皆仰成汝其钦哉往践厥位可开府仪同三司充诸道盐铁转运榷茶等使余并如故【太和九年十月三日】

蒋伸罢判户部制

门下辅弼之任陶钧为重所以道陰阳而施化相天地以成功寅亮皇猷藻饰王度苟或婴以他务兼拘利权则异乎代天佐理之道矣通议大夫尚书兵部侍郎同中书门下平章事判户部事护军赐紫金鱼袋蒋伸紫微上才清庙雅器洁如寒玉峻若?峯既高絶俗之姿能履中和之道秉吉士之操时然後言学君子之儒仁而且勇洎宠承内旨擢处禁垣嘉言屡沃於朕心密赞深知其忠恳委版籍益彰器能进台阶颇洽公望澄源以正本循名而责实岂以司存尚烦丞相爰去剧务俾专缉熙所宜竭尔一心开予四目惟至公而平庶政也依前兵部侍郎同中书门下平章事散官勲如故【大中十二年三月】

王铎判户部制

勅夫足食足兵古之善政也故赵充国以屯田为上策诸葛亮用祁连作奇谋皆前代伐叛之良规兵家聚衆之急务也况乎命我元老平彼羣凶必兼财赋之司方济军师之用重兹一举以保万全诸道行营都统指挥收复京城兼租庸等使权知义成军节度使郑滑等州管内观察等使开府仪同三司守司徒兼中书令判延资库使上柱国晋国公食邑三千户王铎伟望宏材弘襟远虑三登台辅久领枢机蔚为社稷之臣实重岩廊之器近以京都未克寇孽尚存妙算屡陈忠诚奋发思登坛以纠合誓建节以扫除朕由是暂辍陶熔俾专统制五侯九伯尽列戎行猛将谋臣皆瞻马首得不分其国计委以地征收租赋於四方从便宜於万里军须无阙天讨必行副予倚注之怀全仗廊庙之力敬承休命伫策大勲可兼判户部事余如故

萧遘判度支制 乐朋龟

门下经费之权虽系乎理本變调之任尤重於国钧诚不欲参而委之盖所以仗其能者吾之

注意用表推恩况方軫阽危尚屯兵甲托邦籍於魏相伫竭宏规付军食於鄼侯必施良术爰从成命俾洽輿词特进行中书侍郎兼户部尚书同中书门下平章事监修国史上柱国萧遘业司代天材承构厦懿绩继传於王府嘉猷允绍於庙堂衆谓国华雅得韦平之称时推人瑞谅齐管乐之名泊辞中殊科辟随重地班行履历刀尺精英由右史以践南宫自中戎而昇内直久传密命粲组绣於笔端旋摠宪司定准绳於朝右尔後方调国赋俄属时难尽心於造次之时首奔行在秉节於苍黄之际足验岁寒洁身之道既彰许国之诚可监俾其援力乃尔畴庸遂契风云寻当鼎铉可谓佐时之道知无不为奉上之功久而弥着於今者将平逆寇须恤王师方悬飞挽之劳日俟诛夷之计非尔洞达不足以絶奸欺非尔精明不足以希饶美所宜其利病计彼盈虚使兵实赋均家给人足自然凋伤渐复馈饷不亏既无艰食之虞并表和?之用惟期竭力伫见沃心勉副具瞻式彰殊渥可兼判度支余并如故

萧遘罢判度支制

门下夫宰相之任本於佐理陰阳节宣风雨允厘百工康济万邦岂可以经费之烦劳弼谐之重比以戎车方驾国用未充将欲定其準绳遂兼委於衡轴今则立事有制成规可遵既陈坚确之诚益尚执持之节宜加懋宠用尔渥恩特进行中书侍郎兼户部尚书同中书门下平章事监修国史上柱国萧遘功高作砺业茂秉钧韵同夏玉之清应作洪钟之响九流百氏供笔下之波澜五色六彰集人间之光彩真为王佐衆号国桢射策词高曳裾望重优游华贯黼黻明庭和符律吕之音籥合鸾皇之影誉洽多士声振天朝负严乐之才华既司天语将徐庾之事业尤润帝谟爰执宪纲缙绅自肃及专邦计馈饷无亏倚注之期朝昏是属旋以尘侵羽卫寇犯郊畿保於患难之中不改始终之节首奔行在备竭忠谋明知管葛之才足副臯夔之选朕念兹士庶深軫伤痍授以盐梅拯其涂炭及摠机务大庇生灵荐贤之道益光奉上之心尤着籍其繁重称职綦难果其能穷利病之源去奸欺之弊事皆条贯法以彰明特进退让之诚益重燮调之任尔宜潜施秘略益进昌言激猛将以弭羣凶布和风而销戾气焚巢荡穴促其献捷之音定赏策勲乃是铭钟之日则更加峻秩别示宠章宜升黄阁之尊式表纳言之贵可门下侍郎兼吏部尚书同中书门下平章事监修国史散官勲如故仍落判度支

孙偓判户部制 裴庭裕

门下在天成象拱帝座者三台在地称崇镇方輿者五岳我有贤辅立乎大朝叶三台照耀之功契五岳匡扶之力既凝庶绩宜峻徽章正议大夫守中书侍郎同中书门下平章事上柱国赐金紫鱼袋孙偓壁立孤峯渭清一派早以闺门之行闻於乡里之间张融高文聚为玉海孙绰丽赋掷作金声颇喧惊座之词华遂整冲天之羽翰罗张上国顔渊首冠于诸科弓招小山穆生道优於置醴厥後簪御史笔讲博士书从容累践於南宫諫诤俄升於左闕兰香见忌玉冷多猜比骚人湘浦之行继贾谊长沙之役朕自知直道召归掖垣每于敷陈必尽肺腑因朱云折檻之对识张华王佐之才断自宸衷爰立作相弥缝不倦匡益居先操心愿革於浇浮进善必先於行赏搜决沉滞拔用隐沦致我时风自尔而厚张说当玄宗之代初启集贤寮参居德宗之朝别分户部一则宠九流之坟籍一则萃四海之赋輿式仗英规遂兼兹领高见楚子之爵贵升郑衆之阶勉殄寇讎以复庙社可银青光禄大夫依前中书侍郎同中书门下平章

事充集贤殿大学士兼判户部事仍封安乐县开国子食邑五百户

孙偓判度支兼诸道盐铁使制

门下朕闻天所以运行不息维之者星辰地所以厚载无疆纪之者海岳故尹说相殷而帝道盛旦奭佐周而王业昌时之替兴良由弼辅朕励精理道梦卜披贤继叶旁求并膺爰立皆号人杰实为国华银青光禄大夫守中书侍郎同中书门下平章事充集贤殿大学士判户部事上柱国安乐县开国子食邑五百户孙偓大?分辉维嵩孕秀直如金矢洁若冰壶处谏诤之司言无畏忌守驳正之任道不依违当官而行遇事必立自擢居台席兼领地征蕴持危扶倾之心负忧国忘家之志卓尔孤迈超然不羣稽於衆多金曰名相银青光禄大夫行尚书户部侍郎同中书门下平章事上柱国嘉兴县开国男食邑三百户陆扆清庙升歌朱干象舞内健外顺动直静专早践清华旁流休问既登禁密润畅皇猷言有準绳心无吝悔爰从近侍委以化钧目无全牛刃有余地不斯须而离道不造次以违仁考於羣词咸称良辅而皆道符夔益业冠萧曹楷式一时仪刑四海和松磊落允为大厦之材赐珽晶莹宛是接神之器今朕以运丁难否时未洽平贼臣尚恐其跳梁国计靡臻於丰美煮海之利多失於旧规量地之征未登於贡式须分重务属我名臣冀大振於颓纲俾渐昌於衰历是用迁皇极紫微之位总简书刊集之司兼以利权尽付全德尔宜振提百度荡定九围勉服宠光以绥夷夏偓可门下侍郎同中书门下平章事监修国史判度支兼诸道盐铁转运使扆可中书门下平章事中书侍郎充集贤殿大学士判户部事散官勲封如故

王?诸道盐铁转运等使制 郑璘

门下天之四序运造化以成功王者万几仗辅弼而兴理岂独安危斯在实以职任是资所以发于三光凝其庶绩则可以迭升崇秩兼陟总临况夫国用殷繁财力未赡允伫开张之术尽繫通变之方属我名臣遂行宠渥扶危济国致理功臣光禄大夫守吏部尚书同中书门下平章事上柱国琅琊开国公食邑二千户王?地华簪绂荣盛台阶分秀气於嵩高袞殊祥於淮水秉四科之全德抱百行之贞规夷玉在悬能发希声之妙良金若砺自标大用之能夙振嘉名具扬清贯右掖演如纶之职左户贰版籍之司望实既光梦卜斯得见陈平之知任堪调鼎识元礼之范称委持衡朕以运属多难羣经欲举便殿每召前席与言山甫之秉小心见称风雅阳山之有大体雅重丝纶藹吉上才冠彼前古今以将图兴复克集事功宜付繁难以表优异是用践黄枢之峻级总青简之刊修特以货泉资其良画於戏萧何掌挽运之柄在汉为功臣夷吾通轻重之权致齐垂霸业繫展匡时之道伫成富国之谋勉膺宠灵服我不训可门下侍郎依前兼吏部尚书同中书门下平章事监修国史充诸道盐铁转运等使功勲如故

领镇

姚崇都检校诸军大使制 苏頌

黄门庙堂之仪不可去兵帷幄之谋在於料敌自非行有余力坐而决胜则何以威百蛮而破

万里者也兵部尚书兼紫微令监修国史上柱国梁国公姚崇朝廷宿望军国大才蘊平仲之一心举夷吾於六翮惟此人杰是称天賚银青光禄大夫行黄门侍郎昭文馆学士上柱国中山郡开国公李义甫用穷精微体自公直贞规踰于铁石词律比于笙簧左曹之美中朝所咏咸能上答宠眷备陈策略閱武观兵暗合孙吴顷虽衆和以德军全非战或徵其侍子允詣阙廷或劳我偏裨尚留关塞行役之苦寢兴弗忘师臧谓何豫备斯在伫恢遥护之略更属远安之算崇可检校诸军大使义甫为副主者施行【开元二年正月二十四日】

张说兼知朔方军节度使制

朔方之地雍州之城密迩关辅是称河塞顷者边塞为寇扰其居人王师有征戎事斯大戍役之弊边氓既勤虽妖丑既清而政理未洽不有经制曷云昭苏且和衆为武者所以诘奸慝摠军命将者所以训甲兵匪夫大贤孰允斯任兵部尚书同中书门下平章事三品燕国公张说天与明秀自然才杰光备九德弘宣七政爰掌邦理实为国桢谋而必臧言则无隐寅亮之美用熙帝载谈笑之余更陈戎略所谓善行樽俎事立封疆宜以上台之尊遥统中军之任可持节兼知朔方军节度大使余如故

李林甫兼河西节度使制 孙逖

门下天讨有罪未可以去兵帝赞良弼是资於决胜金紫光禄大夫兵部尚书兼中书令持节经略支度营田大使知节度事集贤院学士修国史上柱国晋国公李林甫高操命代特秀生人公忠为百度之贞文武成万邦之宪自登上相兼委中权克致时和且闻戎捷踰陇之外已恢帷幄之谋涉河而西更是辅车之势欲惩猾夏必在夹攻宜以三事之谟遥制两军之律可兼充河西节度经略支度营田长行转运九姓等使节度事赤水军仍判凉州事余并如故【开元二十六年五月】

李林甫兼朔方节度使制

经邦道国允属於才贤保大定功聿求於长策不有兼领孰彰宠贤开府仪同三司行尚书左仆射右相崇玄馆大学士集贤院学士太清太微宫使修国史上柱国晋国公李林甫器惟国桢材乃人范文标楷式学?精微啓沃之诚罄嘉猷於造膝清贞之节尽公心於匪躬自澄於三事式是百辟具瞻惟允茂绩居多任总庙堂既赞雍熙之化智高帷幄更资决胜之谋宜因公辅之重兼受元戎之寄可兼安北副大都护持节朔方节度关内支度营田盐池押诸蕃部落副大使知节度事六城水运节度管内军郡采访处置等使并如故【开元二十四年十一月】

王缙侍中兼都统制

门下天地之德资陰阳以成功帝王之道任将相而兴化聿求左辅命掌元戎必资文武之才用经军国之务金紫光禄大夫行黄门侍郎同中书门下平章事兼弘文馆大学士知馆事仍

充太微太清宫使太原县开国伯王缙有高妙之行有弘通之识学该古训文成国风梦帝赉予济川用汝百揆时叙四维克张累陈造膝之言弥着沃心之道滨海之右自河而南王旅攸同戎车殷会监于方伯之制利用建侯之师天将息人予有御侮镇汉沔淮肥之地统齐梁鲁郑之军总制高牙纲纪羣力弘七伐四征之策成一匡九合之勲式遏外虞底绥多难将授铜符之律爰咨璚阙之谋往哉汝谐无替朕命可侍中持节都统河南淮西山南道诸军节度行营事仍特进封郡公食邑二千户余并如故主者施行【广德二年八月】

杜鸿渐兼东都留守制 杨炎

门下东周以召公相宅西汉以萧何居守则保厘之寄多属辅臣今以庙堂硕老坐而敷政和恒居师用义厥服特进行门下侍郎同中书门下平章事山剑副元帅太清宫使崇玄馆大学士上柱国卫国公杜鸿渐诞受天和陶合一气德音敬直动於神明定义中兴光赞大业陈三代之礼乐成一朝之制度雄词奥学洞究天人以道弼予以兹五载每有大事乃心忠勤至於危难尤思赴蹈叶和堂上之謦匡济天下之务出镇梁益西南晏然人之具瞻朕所毗倚实仗弘化兼抚东郊宜以二南之风用增九鼎之重可兼东都留守余如故主者施行

王缙兼幽州节度使制 杨炎

门下王制以二老分理诸侯则周召之任及乎汉魏以还多亦军国兼总缘侯所以参掌武事安石所以外绥戎政况华夷甫宁金革方偃实在於文武戮力上下同心则辅弼之臣岂憚劳也金紫光禄大夫门下侍郎同中书门下平章事持节河南副元帅都统河南淮西山南东道诸节度行营使兼东都留守王缙体合元和器蕴金璞以才茂邦杰以识通时化叶我期运任当衡石竭股肱之力开耳目之明陟于艰难致君以道统是经术丽兹人羣属江淮海岱之虞总节钺旌旄之寄镇御方夏抚宁师人含保太和摠宣庶绩忠而佐命功比安刘勤以施下惠同思杜叶藩雄之志建竹帛之勲朝誉载申啓沃益切二三髦硕同力叶诚俾予端拱以弘至道乃眷北土古之幽都限夷既雄负海称固思致于理言恤其人爰藉台臣弘敷庙算持薊门之麾旆兼辽阳之钲鼓俾膺戎重式允时望可兼幽州长史持节充幽州节度副大使知节度事余并如故

裴度门下侍郎彰义军节度宣慰等使制

辅弼之臣军国是赖兴化致治则秉钧以居取威定功则专阃而出所以同君臣之体一中外之任焉属者问罪汝南致诛淮右盖欲刷其污俗吊彼顽人虽挈地求生者实繁有徒而婴城执迷者未剪其类何兽困而犹鬪岂鸟穷之无归欤由是遥听鼓鼙更张琴瑟烦我台席重兹戎?朝议大夫守中书侍郎同中书门下平章事飞骑尉赐紫金鱼袋裴度为时降生协朕梦卜精辨宣力坚明纳忠当轴而才谋老成运筹而智略前定司其枢务备知四方之事付以兵要必得万人之心由是禱于上玄拣此吉日带丞相之印绶所以尊其名赐诸侯之斧钺所以重其命尔宣布清问恢壮猷感厉连营荡平多垒招怀孤疾抚育夷伤况淮西一军素効忠节过海赴难史册书勲建中初攻破襄阳擒灭崇义比者胁於凶逆归命无由每念前劳常思安抚

所以内辍佐辅为之师帅实欲保全慰谕使各得其宜往钦哉无越我不训可门下侍郎同中书门下平章事使持节蔡州诸军事蔡州刺史彰义军节度管内度支营田申光蔡州观察处置使仍充淮西宣慰处置使散官勲赐如故王铎中书令诸道行营都统权知义成军节度

使制 乐朋龟

门下庙堂之上教化之源康济万方弥纶百揆可谓朕司时之蓍龟不宜斯须暂违顾盼其或屡陈章表备沥精诚以大憝未平每痛心而疾首以中都未复尝沥胆以披肝志在摠戎期於弭寇永言许国真是荅臣遂命更陟韩坛重辞恩眷统六师而雷动屯万旅以风驰并集宠命以坚茂绩开府仪同三司守司徒兼太子太保同中书门下平章事充太清宫使弘文馆大学士兼延资库使上柱国晋国公食邑三千户王铎名高嵩华量等沧溟情田同开心地无滞造次靡忘于忠孝几微不舍其规绳静彼波澜莫分喜愠泊乎昇甲乙缀鹄鸾履历清华从容道德盛推器业必为王佐之才尽伏机权乃是公台之望尔来盘错果副重难筮短龟长开物成务同叔敖之为楚相比孔光之辅汉朝出於一时膺是三命其为宠重复无等伦朕克荷丕图内惭凉德致其郊庙陷於狼狽若坠沟隍如怀水火未尝一饭之饱一夕之安宥过责躬临深履薄遂致玄穹下鉴元老请行面陈肺肠忠贯天地振朝廷之武力挫妖孽之残?惟其疾风方知劲草况津临白马地压洪河拥东夏之銳师视中原之沴气必期破竹自可覆巢昔元凯之着殊勲谢安之膺上赏功铭鼎彝指誓山河遐想芳尘必符壮志尔宜夺其租赋贍彼甲兵使退无玩寇之虞进有老成之诫训齐勇士尅彼都城屠梟獍之躯以为京观戮鲸鲵之首用献宗祧呜呼寰海流离生人涂炭眷言繫赖实洞神明是用荣分和峤之车光佩萧何之印勉思注意勿怠厥功可司徒兼中书令充诸道行营都统兼指挥兵马收复京城及租庸等使判延资库事权知义成军节度管内观察处置等使余如故仍令所司择日备礼册命军罢後却赴中书主者施行【中和二年正月】

郑畋门下侍郎平章事依前都统制

门下朕闻天下安注意於相天下危注意於将尔今应吾内外之委任也朕以尘昏?县血染生灵乘輿播越於道途巡幸奔驰於巴蜀夙夜思咎寢食不遑期早殄於羣妖冀速清於国步今则重烦台德再秉钧衡碧幢不离於岐山黄阁暂移於陇邸安危倚望中外具瞻诸军四面行营都统凤翔陇等州节度观察处置等使开府仪同三司检校司空同中书门下平章事兼凤翔尹上柱国荣阳郡开国侯食邑三十户郑畋岳渎炳灵星辰焕发雅裁既扬於冰玉冲襟咸契于神明达古今理乱之源识文武经纶之道作时柱石为国栋梁泊周旋宠荣出入将相功业每留於史册懿范允播於缙绅昨镇于近藩者【阙】今虽狼心渐革蛰尾将收干戈尚遍于咸秦蛇豕犹侵于宫阙运虽至此天实资予况誓扫寇讐志收社稷蘊沉几而愈劲奋独断而不回激喻军行董率义旅行鞬必中传檄无凝指呼而方面悦随慷慨而懦夫请命风生貔武川涌熊羆期系颈於逡巡伫春喉於旦夕朕且念用兵汧陇驻驂坤维指挥而远在一隅请急而动闻踰月于以举畴庸之典于以图必胜之谋在乎盛以军戎任其陶铸使统制并遵於麾下訐谟皆在於毂中将候凯还伫其册命於戏簪裾礼乐俨然丞相之风旗帜鼓鼙蔚尔将军之贵裴度以出征淮蔡敏中以招讨羌戎皆仗以节旄付之枢务期树功业固不同年勉图

大勲同酌殊渥位正台阶之重官崇水土之荣敬之哉无忝我重命可守司空兼门下侍郎同中书门下平章事依前充四面行营都统凤翔陇等州节度观察处置等使兼凤翔尹散官勲赐如故仍令所司候收复京後备册命主者施行

唐大诏令集卷五十二

卷五十三

<史部,诏令奏议类,诏令之属,唐大诏令集

钦定四库全书

唐大诏令集卷五十三

宋 宋敏求 编

大臣

宰相

出镇上

陆象先益州大都督府长史制

杜黄裳河中节度平章事制

武元衡西川节度平章事制

李夷简淮南节度平章事制

裴度河东节度平章事制

韩弘河中节度兼中书令制

李逢吉东川节度使制

牛僧孺武昌节度平章事制

李石荆南节度平章事制

李德裕荆南节度平章事制

白敏中邠宁节度平章事制

崔铉淮南节度平章事制

出镇上

陆象先益州大都督府长史制

入而弼政虽仁忠贤出则分忧更资循理中书侍郎同中书门下平章事三品充国公陆象先体含清雅识备贞慤早修学行实允睿明三蜀称殷一都之会邦寄为重朝难其选朕光宅四海惠康兆人乃眷所先必自于远故端揆载举荇臣攸属可益州大都督长史剑南按察使【开元元年十月】

杜黄裳河中节度同平章事制

昔周之周召出为二伯是以宗公而领方任也郑之桓武入作三事是以诸侯而宰邦政也然则荷中外之宠享崇高之名不有盛德孰膺宠命金紫光禄大夫门下侍郎中书门下平章事兼弘文馆大学士充太微宫使上柱国南阳郡开国公杜黄裳道惟无方材则不器陋齷齪之廉谨本诚敬而坦夷澄陂纳宽瑞玉凝素凤简众望处于达官论议必通於大经损益咸酌於中制代所準的朝之羽仪爰授枢衡俾居左右所缉者坠典所陈者格言色无面从志不推挠弘兹冒远之化展彼夷凶之征将明则然忠利斯在惟股肱之郡有节制之师兵威外振於太原地形内错於左辅是用谋帅金归硕人藉台庭之素风执戎钺以莅众示以严重广其封疆罢平阳之十连复元侯之四履超列鼎足仍参庙谋增二象之光辉霈一方之膏雨大邦雄屏群侯所瞻尔其敬哉无替旧绩可检校司空依前同中书门下平章事兼河中尹充河中晋绛慈隰等州节度支度营田观察处置等使散官勲封如故【元和二年正月】

武元衡西川节度同平章事制

地有西蜀国之奥区百濮羣蛮外币於封域双流重阻内固於襟带形胜所属统綏惟艰近者剪其凶魁镇以勲力实有威惠至于和宁而匪遑宁居累布丹悬激恋阙之深志将执圭而展仪谁其尸之允在能者乃听金议辍兹台臣大中大夫守门下侍郎同中书门下平章事弘文馆大学士太微宫使兼户部事上柱国萧县开国伯赐紫金鱼袋武元衡器惟弘深行必端敬珪玉不琢雷风有威夙彰嘉闻亟历清贯乃司邦宪有遂物之诚乃践地官有阜财之绩益振公望克谐朕心擢于鼎司授以大柄谋由外而不伐慎由衷而自彰展代工之勤弘冒物之化以道则直以心则和丙吉雅通於国体山甫诚补於衮职朝夕有恪毗予一人眷兹西南忧寄方切非宽大无以莅众非慈惠无以厚生非诚信无以抚蛮夷非忠贤无以殿邦国故我心膺兹重任外分兵符以副於重往中佩相印不离於具瞻峻秩爰首於六官崇阶遽登於七命且示加等仍疏大封勉承宠光无替朕命可银青光禄大夫检校吏部尚书兼门下侍郎同中书门下平章事成都尹充剑南西川节度使营田观察处置统近界诸蛮及西山八国云南等使进封临淮郡开国公食邑二千户【元和二年十月】

李夷简淮南节度同平章事制

柱石之臣台庭之老积硕望具瞻之德有弼谐寅亮之功授以土田流邦家之恺悌增其冕服表国器之形容此朕与将佐大僚示中外之一体也况兵戎重事东南实繁辍於庙堂以示其大正议大夫守门下侍郎同中书门下平章事上柱国成纪县开国侯食邑一千户赐紫金鱼袋李夷简出身莅政志守道素风彰於操履严气峻於风雷自朕续承丕图搜拔下位得文华於宗室升器干於朝廷而所重者准绳所忧者财赋资倜傥以振起委强通而演成江汉之仁风载扬岷峨之美化斯盛既执大宪俄登台辅予一人凝是庶绩忠说有遭逢之勇奸邪无侵败之机谓之股肱实无所忝言念淮海斯为奥壤走商贾之化财引舟车之艘挽凡所经理事非一隅控制之难於今尤切是用锡命俾为藩宣式加师长之名不改平章之务万邦表率丞相正之可银青光禄大夫检校尚书右仆射同中书门下平章事兼扬州大都督府长史充淮南节度副大使知节度使事管内营田观察处置押新罗渤海两蕃等使【元和十二年七月】

裴度河东节度同平章事制

忠利於国者效积而事彰器周於物者志远而任重况入调鼎鼐出镇藩垣荷中外之宠荣膺文武之重寄将允金望命兹辅臣金紫光禄大夫门下侍郎同中书门下平章事兼弘文馆大学士上柱国晋国公食邑三千户裴度量惟弘深道在匡济大玉蕴连城之价长材负构厦之姿言必公忠义本正直荐居钧轴叶赞机谋匪躬以务其将明忧国不忘於造次当夷凶淮蔡仗节於师旅之间及殄寇青齐运筹於帷幄之内勤劳靡替弘益居多绩用是嘉擢冲愈恳东夏雄屏实惟晋阳控大鹵之山川司北门之管龠横制獯虜远清疆陲是以辍献纳於沃心抚方隅於注意倚属攸切勲庸可宣舟楫常赖其弼予鈇钺载观其莅衆励山甫之恪德成方叔之壮猷式副具瞻勉扬休闻务既兼於左揆秩仍踐於中台尔其戒哉以服嘉命可检校尚书左仆射兼门下侍郎同中书门下平章事太原尹北都留守充河东节度观察处置等使

韩弘河中节度兼中书令制

门下王者统驭万?缉熙庶绩必有文武全器柱石之臣出壮藩岳入和台鼎使其效彰中外声播华夷所居而人心自宁所莅而军令自肃允是任者其惟至公开府仪同三司守司徒兼中书令上柱国许国公食邑三千户韩弘受天地凝粹之气得山川崇深之灵厚其体而壮其容灵其心而宏其量早洞戎韬之学允膺节制之权隐然大梁克有成绩及功宣荡寇志展匡王恳申恋阙之诚竟遂来朝之礼位高百辟荣冠一时恩极而愈恭名光而益励朕方欲树以垣翰仗乎忠贤乃眷关河之守实惟股肱之郡自昔重寄无非元勲是用命以上公复兹雄镇於戏顷居东夏父子借分阃之荣今处近郊伯仲并登坛之贵道苟积於忠实顾何爱於宠章往惟钦哉副我明命可司徒兼中书令河中尹充河中晋绛慈隰判节度观察处置等使散官勲封如故主者施行

李逢吉东川节度使制

蜀門南次梁部東分地東江山境綿寶濮非志懷端重不可委以察廉非識度弘深不可畀以
節制聿求公望爰自輔臣朝議大夫守門下侍郎同中書門下平章事輕車都尉賜紫金魚袋
李逢吉文以發華行惟居厚忠懇每形於造膝直方斯見於匪躬自處台席再移星炤溫然德
器休有素風觀其動本於仁足以敷王澤考其守歸於正足以奉師貞乃眷梓潼茲惟奧壤用
去將相之任俾專藩宣之功予欲頒政典於一隅故兼以夏卿之位予欲布憲章於列郡故假
以副使之權爾其節儉以訓俗澄清以檢吏因土風之剛悍使勇且知方就物產之殷充則既
富而教苟能積實期有遐聞於戲朕與大臣進退示全其恩禮爾之報國始終宜竭其肺肝身
雖遠於山川心豈忘於夙夜服茲休命汝往戒哉可檢校兵部尚書使持節梓州諸軍事兼梓
州刺史御史大夫充劍南東道節度副大使知節度事管內度支營田觀察處置靜武軍等使
散官勲如故【元和十二年九月】

牛僧孺武昌軍節度同平章事制

門下朕恭承大統屬官平寧方委心輔臣厘齊法度垂茂績於當代建休風於一时有深畏滿
盈雅懷止足體陰陽迭叙之旨全進退居正之心詞抗不圓秉忠難奪得不處之安郡益以榮
名是用建新軍以統武昌佩相印而專節鉞文武二柄付于全才金紫光祿大夫中書舍人同
中書門下平章事兼集賢殿大學士監修國史牛僧孺貞方而和俗慎密而坦夷秀乎文華篤
於行實以直策悟憲宗以忠啟奉先朝積有信臣擢于廊廟法無越制官無及私門無托賓道
無偏倚逮茲旬歲亟聞昌言朕常惕然虛己以听既終園寢之重克修郊廟之儀前志彌堅陳
懇益固吾方涉學弘濟斯人耒耜戈矛仁壽鄙天簡予懷者非爾而誰是用輟中樞圖史之間
開夏口油幢之府典型八座廉問七州往惟欽哉無替厥服可檢校禮部尚書同中書門下平
章事鄂州刺史武昌軍節度使【寶曆七年七月】

李石荊南節度同平章事制

翼亮之臣寄畀攸重九功未叙則宜立於廟堂百度既貞則兼制於方岳中外祖送式寵賢才
銀青光祿大夫守中書侍郎同中書門下平章事充集賢殿大學士上柱國李石元精降祥河
岳鍾秀文含大雅學茂全經瞻智通理亂之源達識究古今之變望鬱人杰居為國楨頃者嘉
其多能俾調鼎實動必循道知無不為每竭慮於謀猷思致予於堯舜嘗司轉漕仍摠征財盤
錯之難鉅刃不滯增台耀之光彩揚鳳池之波瀾墜典咸修遠方畢服夙夜匪懈光我知臣近
者情在進賢願辭袞職誠不易奪朕所難違乃眷荊門東南巨鎮江山重險舟車要冲此罷節
符是遵權便台臣往莅宜復前規俾登大將之壇仍持上相之印尹正望府廉規雄藩增榮峻
階無忝我命可金紫光祿大夫中書侍郎同中書門下平章事兼江陵尹充荊南節度管內觀
察處置等使勲如故【開成三年正月】

李德裕荊南節度平章事制

將相之任中外攸屬入則揚緝熙以正百度出則布威令以靖一方良以才難委寄咸重爰設
齊壇之禮仍合台席之榮式示酬勞允諧企望特進守太尉兼門下侍郎同中書門下平章事

充弘文馆大学士太清宫使上柱国卫国公食邑三百户李德裕岳渎间气钟磬正音葆粹孕和本仁叶义道蕴贤人之业正谓王者之师词锋莫当学海难测自入膺大社克构崇墉王猷国经契合彝矩丙吉罄安边之术戎寇弥夷张华兴伐叛之谋壶关洞契克荷先朝之旨弼成耆定之功布在册书辉映前古而能处剧不懈久次弥勤朕以嗣位之初懋勤在念宜先硕望以表优恩荆部雄藩地惟四楚揔五都之要会包七泽之奥区兵赋殷烦居俗甚衆必藉旧德作镇尹临载崇五教之名俾赋十连之贡勉弘化理以续前劳可检校司徒同中书门下平章事兼江陵尹充荆南节度观察处置等使【会昌六年四月】

白敏中邠宁节度使平章事制

昔孙弘以儒学修身宠兼裂土邓禹以勲庸着効仪比三司是内外共规古今所重再扬新命允属元臣特进守司徒兼门下侍郎同中书门下平章事充招讨山南平夏党项兵马都统制置使并南北两路供军使兼邠宁节度使白敏中才智足以赞玄功诚明可以匡大务事君惟恐不尽守道惟恐不孤而能以无心为待物之心以无用为当官之用朕君临之岁首付台衡六更星霜劲节如一自羌戎犯塞师旅屯边招怀莫来征伐无状爰用命尔往其镇之果能潜移梟獍之心坐络豺狼之首始自夏半及于秦正大建功劳克宁烽駟终此诚意非卿而谁今封部既清是用休尔之讨伐马牛皆散是用罢尔之统临不移论道之荣更怙持衡之贵纂乃旧事对予勤怀可守司空同中书门下平章事邠宁等州节度观察使【大中五年十月】

崔铉淮南节度平章事制

周用周召为桢干之臣以正天下故入调鼎鼐则弼亮之道尊出抚方国则蕃宣之功着我有上相天实间生文武之用高并於昔贤中外之寄允资於硕德爰举旌钺仗于股肱光禄大夫守尚书左仆射兼门下侍郎同中书门下平章事兼弘文馆大学士充太清宫使上柱国魏郡开国公食邑二千户崔铉瑞玉凝姿春林发秀贞谅植德谦虚葆光冲用既臻于化源达实每弘於理本擅松柏後凋之色劲节自高含金石希代之音正声特异泊发扬令闻辉霭公朝道无缙磷言符体要继相如之丽藻夙侍禁林嗣传说之旁求早膺台席日者历居廉镇常总朝纲令肃方隅风行宪署及膺我宠擢复司化权每正惟公持平不挠畅緝熙之茂典弘经济之明谋功勒旗常道光夷貉励山甫匡周之操竭子房佐汉之忠终始一心周旋七年富人斯久伟绩弥勤是宜载图尔庸优尔恩宠乃睠淮海号为通都控扼实据其咽喉封部适罹其灾患予所注意尔其往哉於戏居则秉鸿钧绍阿衡之业动则驾长轂图方叔之勲苟非全才孰付重任若抚封之长术阜俗之嘉谋一部之惨舒三军之政令我属良弼则又何规勉登将坛敬佩相印副是宠寄其惟戒哉可检校尚书左仆射同中书门下平章事兼扬州刺史大都督长史充淮南节度副大使知节度事管内营田观察处置等使【大中九年八月】

唐大诏令集卷五十三

卷五十四

钦定四库全书

唐大诏令集卷五十四

宋 宋敏求 编

大臣

宰相

出镇下

裴休宣武军节度平章事制

魏謩西川节度平章事制

崔慎由东川节度制

萧邺荆南节度平章事制

杜审权镇海军节度平章事制

刘瞻荆南节度平章事制

郑从谠河南节度平章事制

王铎义成军节度兼中书令制

崔胤武安军节度平章事制

王?威胜军节度平章事制

独孤损静海军节度平章事制

出镇下

裴休宣武军节度平章事制

将相大臣中外迭任入奉股肱之寄出为藩翰之雄无爽具瞻式章注意金紫光禄大夫中书侍郎兼户部尚书同中书门下平章事集贤殿大学士上柱国河东县开国子食邑五百户裴休气稟岳灵梦叶岩瑞威凤孤翔於玉圃仙?独步於芝田学精典坟文纬邦国自彤庭发策鹄列升班粉署擅贰卿之荣纶扉阐五字之妙迨司馈运整葺牢笼策画每得於亲闻功庸必见其显効章程轨物历试无差是用付以权衡宜承任委咨之远略炳然大猷四后协心万邦系尔今百度有截庶绩其凝前时屡以疾辞犹烦卧理岂无优贤之道因遂由衷之意乃眷梁苑实为重藩荒大东於周疆接小沛於贡壤富庶将及悍勇无譁仁化已洽於一方清风渐扇於全境开关自固悬馘不鸣可仗台臣真之静理尔其践厥位畅厥庸侯服既增相印不解辅弼莫系於远迹声容暂闲於朝昏敬哉戒哉毋替重命可检校户部尚书同中书门下平章事使持节汴州诸军事充汴州刺史充宣武军节度使知节度事汴宋亳等州观察处置兼亳州太清宫使【大中十年六月】

魏謩西川节度平章事制

股肱之臣与君上而合体心腹之寄虽中外而同途入则付之钧衡出则委其藩翰苟非望隆硕德道备全才则何以克副具瞻久膺重寄银青光禄大夫门下侍郎兼户部尚书同中书门下平章事监修国史上柱国魏謩天生贤杰岳降英灵深沉莫究其澄陂和裕可羣於爱景自践扬华贯备着徽猷故事播於三台说论留於两掖而式资重用任以地征简於朕心爰立作相惟尔列祖佐佑太宗辅弼之光号为人镜代济其美厥生令孙蕴致君匡国之谟见奉上竭忠之志勤劳匪懈夙夜在公动关典彝言成啓沃阐化由其赤诚星霜七年风雨一贯朕以九折巨屏山川奥区控临百城统驭羣虜眷兹慎择不其才难尔宜往践将坛仍持相印举武侯之筹策底定远戎继叔度之讴歌载康遐俗勉服休命恭惟有初可检校户部尚书同中书门下平章事兼成都尹充剑南西川节度副大使知节度事管内观察处置统押近界诸蛮及西山八国云南安抚等使【大中十一年二月】

崔慎由东川节度制

夫尊任辅相之道也入则秉钧衡以临羣辟出则赐弓矢以长诸侯宠光不渝寄属咸重将求良辅乃命台臣大中大夫守中书侍郎兼礼部尚书同中书门下平章事监修国史上柱国赐紫金鱼袋崔慎由继美德门承家贵位缙绅伟望礼乐上流挺松筠之贞姿服兰荪之懿行自居名器累历清华禁林才擅於多能纶阁词推於巨丽物情愈茂廷誉甚高再列二卿之崇亟阐六条之化爰加獎任益付重难屡启嘉谟俄参大柄而周涉寒暑备见器能道已着于始终恩岂殊于中外眷兹东蜀实曰奥区俾授旌旄以彰优重昔叔子望高於岷首次公声振於颖川孰有後先率是为理勉弘风教期懋厥庸可检校礼部尚书使持节梓州诸军事兼梓州刺史御史大夫充剑南东川节度副大使知节度事管内观察处置等使【大中十二年二月】

萧邺荆南节度平章事制

入调鼎鼐作我股肱出镇藩垣为予心膂分命虽殊于中外倚才皆属於安危将相迭居文武兼用允兹遇者厥维艰哉况地控南荆土连全蜀振五岭之通道当七泽之要津统驭所难抚理为重顾兹渥命爰辍重臣银青光禄大夫守门下侍郎兼工部尚书同中书门下平章事监修国史上柱国彭城县开国男食邑三百户萧邕昂宿垂芒山庭表异膺诞明德佐理生贤开济洞达其泉源进退率由於律度端亮秉志寛和待人而累践华资克流芳问俨卿云之词藻焕发皇猷迈管乐之智谋掌司邦赋台阁备详其政事朝野咸推其上才由是道观明诚梦叶先帝爰立作相陟於台阶果能经纬岩廊镇安夷夏罄乃一心凝其庶绩逮予纂承亟获匡辅畴庸任旧宜乎加恩是用择其匡藩委之硕德尚执中枢之柄仍加右揆之崇相阁良规岂忘萧曹之业戎垣宠寄更隆羊杜之功勉服殊荣伋弘懿烈可检校右仆射同中书门下平章事兼江陵尹充荆南节度管内观察处置等使【大中十三年十一月】

杜审权镇海军节度平章事制

朕垂衣向明负扆成化内则委辅弼之重论道於岩廊外则寄垣翰之崇分忧於抚驭是以入掌钧轴出拥麾幢必仗兼才乃膺迭任况军称镇海地亘长江建置既殊宠剧斯在驾戎车而佩相印持庙算以统全军非我诚臣岂行茂典特进行门下侍郎兼吏部尚书同中书门下平章事兼修国史上柱国建平县开国男食邑三百户杜审权独依松孤鸾上汉耸三峰之峭壁澄万顷之清澜早以重名洽於时辈擅说言於谏署留正范於南宫史笔弛而更张宪纲案而复正由是如纶不纪刈楚无遗绍蔽芾於讴謡尽削成於法理先皇帝知其可用召入内庭果能新耳目之见闻备肺腑之待遇朕初登宝位素抱嘉猷遽行制书首列台席故能彝伦攸叙庶政惟和举去无差於激扬流品并分於泾渭出入五载初终一途每念鸿勲布在青简近者固辞机务动启恳诚虽怀好德之言难抑撝谦之雅是用辍盐梅於调鼎赐斧钺於专征金陵大藩正张新幄式兼启事载践中枢不移注意之荣无替沃心之道勉服休命厥惟懋哉可检校吏部尚书同中书门下平章事使持节润州诸军事兼润州刺史充镇海军节度使浙江西道观察处置等使【咸通四年五月】

刘瞻荆南节度平章事制

门下将相二柄倚注攸难委钧衡则望庶绩昭明授斧钺则冀一方宁谧中外迭处列朝旧规是用辍於岩廊付以藩翰正议大夫中书侍郎兼刑部尚书同中书门下平章事判集贤院彭城县开国公食邑一千户赐紫金鱼袋刘瞻早以文学疊中殊科俄婴艰阻久滞云路朕擢授华级遄跻禁林羽翼未安风霜旋迫泊并汾解印輶轂还鑣熟闻赤心再陟丹地而应对多敏诏书立成风棱甚高恭慎无玷承受密旨敷陈大猷洽於具瞻乃降明命果能竭忠心力申行典章启宗社之密图惜朝廷之故事振拔沉滞柬録忠良思继美於咎夔显致君於尧舜将明啓沃无惭良史之书正直公忠备得贤人之业而又癖於廉慎不尚荣华安敏之居仍非己有四方之赂惟畏人知虽自乐於清贫当勉成於富贵乃眷荆渚实惟奥区纪江汉之洪流振黔吴之要路舟车所会财赋咸殷况台鼎旧臣拜章辞务爰思重屏当委全才授任无疑宠章斯备兵符在手相印悬腰吞云於胷襟运筹於掌握当年得志报国图功大夫之荣何以加此勉膺殊渥勿替令猷可检校刑部尚书荆南节度使勲封如故【咸通十一年九月】

郑从说河南节度平章事制

古者公卿在朝则辅主致理有事则统衆出征是以却穀行师爰求说礼祭遵推穀不废雅歌今者羌寇未寧烽烟尚警慎择镇安之略尤资柱石之功若非文武兼才将相全业夙蕴峻望为吾鼎臣岂倾丹赤之怀以授股肱之任开府仪同三司门下侍郎兼兵部尚书同中书门下平章事充太清宫使弘文馆大学士延资库使上柱国荣阳郡开国公食邑二千户郑从说秀稟岳灵操含冰洁赵衰冬日乐广青天端操而峭壁寧偕旷度而澄波未测周密得大臣之体诚明弘君子之儒许月品题人伦自警膺门步武明彦知归奋飞早践於修途育德逾高於輿论仗节三光於侯府题剑累陟於崇班泊擢处钧衡若来麟凤才惟应物动必研几屹若嵩岱炳符台曜嵒松磊落长标构厦之姿和璧温良克表如虹之气朕以北门重镇兴王故都披全晋之山河有陶唐之风俗以尔曾施惠化尚有去思方当用武之时暂辍调元之气尔其厚抚战士谨备粮储必使黠寇革心征师贾勇善守训齐之令以图台鼎之勲位以上公式先元辅副我忧厉往惟钦哉可检校司徒同中书门下平章事行太原尹充北都留守河东节度管内观察处置兼行营讨等使【广明元年二月】

王铎义成军节度兼中书令制

门下朕以烟尘犯阙士庶貽灾思九庙以怀惭顾万邦而是愧危同馭朽诚甚履冰遂乃?祝上玄冀平积愤劳乎宵旰实贯神明其有舍元辅之崇副大朝之切拜章?恳面奏请行者得不超兹爵秩盛以统临今则厘旆经时驻军未进宜更戎号以焕宠光诸道行营都统指挥诸军兵马收复京城租庸等使兼判延资库户部事权知义成军节度郑滑潁州观察处置等使兼开府仪同三司守司徒兼中书令上柱国晋国公食邑三千户王铎硕德名门清风直道为一时之圭表作百行之源流骥骥絶尘方知逸势松篁犯雪更耀寒光泊中第从军昇朝擅价掌纶业茂选士功高进必流芳劳惟可则专铜盐之任副舟楫之权雅有令名不诬信史尔後再持钧轴重领藩维智识愈精始终无替旋属省方之际犯难而来首冒锋鏑忠贯天地由是将我大柄答尔明诚当其艰危之时实有整持之计沉机累献秘画频闻渐理纲条俨予班序致使簪裾复盛礼乐重兴克念尔劳谅洽人听而又忿兹国难期以身先恳望统师力求专伐既伫平於狡穴贵独耀於将星宸命登坛俾之仗钺及乘白马叠降紫泥虽嘉将就之勲尚滞进军之策而诸军观望相顾迁延将谋荡定之期因有改更之制在吾优贤之道求旧之心俾循和峤之荣敷其五教更假却穀之用惠此一方尔宜振彼宏图耸於东夏式资论道共赞中兴体我深怀敬承休命可检校司徒守中书令使持节滑州诸军事守滑州刺史充义成军节度使滑潁等州观察处置等使散官勲封如故主者施行崔胤武安军节度平章事制 陆扈

门下入居岩朝施明略以匡时出陟斋坛运沉几而镇俗苟非材推命代望重当朝则何以宣我武威易其风俗朕志先定金谋允成持危匡圣致理功臣金紫光禄大夫守礼部尚书兼中书侍郎同中书门下平章事兼集贤殿大学士判户部事上柱国清河郡开国侯食邑一千户崔胤文星垂耀神岳标奇袭礼乐之清风冠簪纓之贵胄佩觿之际潛韬经济之才筮仕以来寻积公辅之望泊更华胄益振令图居论思而献替尽忠提纲纪而回邪敛迹旋自繁剧俾司燮调苟利於君无所不至泊宠蒲坂再秉洪钧明谋时合於蓍龟雅操不渝於风雨作砺之业

为时而生乃眷重湖实维奥壤荐臻多难屡易元戎哀彼征人昌我皇度间尔尝随重币往曳长裾迄今授卿台阶尚播诗咏是用拯彼涂炭宣予惠和假其问喘之仁慰彼来苏之望仍持相印式宠名臣暂追羊杜之政能未浼臯夔之事业往践厥位尔惟钦哉可检校礼部尚书同中书门下平章事功臣散官勲如故充义安军节度湖南管内观察处置观察等使使持节澶州诸军事守澶州刺史【乾宁三年七月】

王抟威胜军节度平章事制 杨钜

门下朕闻有国家者内则立四辅以贞百度外则建羣臣以宁八区持吾重权惟此二事其有弼谐之道已溢于简编是期训抚之规更满於方岳中外迭处古今所荣扶危匡国致理功臣金紫光禄大夫门下侍郎兼户部尚书同中书门下平章事监修国史判度支诸道转运盐铁等使上柱国琅琊郡开国公食邑二千户王抟长淮衍庆维岳降神抱文行忠信以饰身范珪璧琮璜而为器动多伟节言必匪躬自践历清华汪洋令望左垣蹇谔之称凜然古风右掖丝纶之功垂作雅诰嗣後恤刑着効作赋推能陟于梅霖掌我金谷果罄致君之道无惭出相之门忠谋必成茂绩仍举朕念於越久罹凶灾狂童既平疲俗未泰是思被我寛政进之皇风厚其浇漓涤彼污染再造其任求才惟艰辍于三台先以十乘不改岩廊之任用资垣翰之光於戏阻於重江负于沧海号称殷厚属为剽轻虽兵革乍销而闾井犹弊抚循之理可不慎诸副吾任贤俟尔报政可检校户部尚书同中书门下平章事散官勲如故充威胜军节度浙江东道管内观察处置宣抚等使使持节越州诸军事守处州刺史【乾宁三年八月】

独孤损静海军节度平章事制

门下凝庶绩而厘百工峻列藩而屏中夏中外迭处朝廷旧规乃眷交州是为奥壤我辍良辅时谓当仁银青光禄大夫户部尚书兼门下侍郎同中书门下平章事监修国史判度支上柱国河南郡开国侯食邑一千户独孤损德参瑞玉贞配兼金鬱为君子之儒雅得大臣之体先皇帝爰徵有旧委以钧枢燮调而四序无差献纳而万邦取则昨者大礼虽期於七月丰财未贡於九州但抱焦劳莫克负荷而尔适当重任颇竭宏才因山之制俄然执紼之仪必备事君罄节来工收功所宜行酬赏之恩罢繁难之任登於揆路陟以师坛用示奨酬勉弘化理服我休命往惟钦哉可检校尚书右仆射同中书门下平章事兼安南都护充静海军节度使安南管内观察处置等使散官勲封并如故【天佑二年三月】

唐大诏令集卷五十四

卷五十五

钦定四库全书

唐大诏令集卷五十五

宋 宋敏求 编

大臣

宰相

罢免上

长孙无忌开府仪同三司制

李靖特进制

魏徵特进制

王方庆麟台监修国史制

姚元之相王府长史制

张说停中书令制

源乾曜停侍中制

裴耀卿张九龄尚书左右丞相制

陈希烈太子太师制

吕諲太子宾客制【阙】

姜公辅太子左庶子制【阙】

李勉太子太师制

卢翰太子宾客制

崔造太子右庶子制

卢迈太子宾客制

赵宗儒太子右庶子制

郑珣瑜吏部尚书高郢刑部尚书制

郑余庆太子宾客制

郑絪太子宾客制

李藩太子詹事制

权德舆礼部尚书制

韦贯之吏部侍郎制

李绹礼部尚书制

罢免上

长孙无忌开府仪同三司制

昔东汉功臣莫任机揆西京戚里或存退让故能长守富贵不惧危殆尚书右仆射齐国公无忌神识清举风采凝映贤戚之望朝野所推比轩禁不虞衅生虑表仓卒之间厥功以茂自居枢要声实弥远然以椒掖之亲处权衡之地深知止足有戒满盈收衽之请言辞恳切宜遂其心以励贪竞可解尚书右仆射仍进散位开府仪同三司【贞观二年正月】

李靖特进制

高秩厚礼允属茂勲贵德崇让用光彝典尚书右仆射代国公靖器识恢弘风度宏邈早申期遇夙投忠款宣力运始効绩边隅南定荆扬北清沙塞皇威远畅功业有成及参闻政本职重端副绸缪翌赞勤劳宴绩知无不为岁寒弥厉既怀冲挹以疾固辞表疏恳至情理难夺烦以吏职有乖养贤宜加优宠申其雅志可特进勲封如故并赐物一千段尚乘马两匹禄赐国官府住及亲事帐内防阁等并依旧给患若少瘳每三两日至门下中书平章事患若未除任在第摄养【贞观八年十二月】

魏徵特进制

留侯名相济北之志已高疏傳人师东都之迹弥远後进仰其遗烈前策以为美谈谅可以砥节励行化俗弘风者也左光禄大夫侍中郑国公魏徵器识沉敏轨仪详整文史优赡学业该通自参赞机衡绸繆帷幄知无不为心力备尽格言弗隐正议日闻一德载宣四聪斯达实赖嘉猷用襄治道而深执谦逊志怀冲远词诚恳切良用怵然杼柚于怀屡移气序而固陈丹欸义在难违今便申其雅志以成厥美可特进封如故仍知门下事朝章国典参议得失自徒流以上罪详事奏闻其禄赐及国官防阁等并同执事【贞观十六年册】

王方庆麟台监修国史制

鸾台芸阁秘文蓬山奥府是为国重尤切帝艰银青光禄大夫行凤阁侍郎同鸾台平章事上柱国石泉县开国子王方庆钟鼎高门簪纓旧德学富今古才优舒向自参机密亟改寒暄蹇谔之风不忘於献替谦挹之美屡陈於衰疾西垣掌事虽藉谟猷东观属词更资通博宜掇凤凰之省俾缉麒麟之署可麟台监仍监修国史勲赐如故主者施行【圣历元年八月】

姚元之相王府长史制

忠为令德孝乃天经义着君亲道存敬爱其或兼者可不美欤银青光禄大夫行凤阁侍郎兼检校相王府长史同凤阁鸾台三品姚元之自掖垣趋走廊庙谋猷竭忠尽诚说言正议始终无替弘益以多近以母氏衰老情兼喜惧在休沐之期阙晨昏之礼乞解所职以就闲养外奏内请志割词勤宜遂恳请用敦孝道睠彼藩邸高选经佐俾从梁苑之游以致潘园之乐可行相王府长史一事已上并同三品【长安四年六月】

张说停中书令制

门下特进行尚书右丞兼中书令燕国公张说往属艰难输诚於履险及兹辅相润色於告成而不肃细微之人颇乖周慎之旨朕略小任大念旧録功且法不欲屈宜罢中枢之务义亦有在更全端右之荣宜停中书令仍修国史於宅修撰主者施行

源乾曜停侍中制

尚书右丞相兼侍中源乾曜十载持衡一心自牧台鼎斯重管综维繁虽勤力在公而暮年微疾俾司端揆罢剧中枢宜停侍中其尚书右丞相如故【开元十七年六月】

裴耀卿张九龄尚书左右丞相制

门下燮和陰阳仪刑端揆自非人杰孰副金谐金紫光禄大夫侍中弘文馆学士上柱国稷山县开国男裴耀卿才实国桢望为人范怀匪躬之节竭奉上之心金紫光禄大夫中书令集贤

院学士修国史上柱国始兴县开国子张九龄器识宏远文词博达负经济之量有谋猷之能自翼赞台阶彝伦有叙直道之心弥固蹇谥之操逾坚并可以仪型百寮缉熙庶绩宜回掖垣之任俾列宫师之表耀卿可守尚书右丞相九龄可尚书左丞相散官勲封如故主者施行【开元十四年十一月】

陈希烈太子太师制

门下辅道元良发明纯德朝寄之重莫此为先特进行左相兼武部尚书集贤殿弘文馆学士崇玄馆大学士太清谏曹【以下原阙】

李勉太子太师制 陆贽

勅立国之本所系於元良弘教之方必由於端士非识精前典德重当时恭敬温文其将安仿吾是以辍台阶之老选宗望之贤辅翼春闱是资教谕光禄大夫检校司徒平章事?国公李勉忠信孝友直方简俭达君臣父子之际知礼乐教化之端虚襟保和清明简欲求旧则德茂序亲则属尊师范国储无易其选可依前检校司徒兼太子太师【贞元二年正月十一日】

卢翰太子宾客制 陆贽

勅求贤审官以康庶绩就闲优秩以处旧臣盖欲敦始终之道全进退之礼金紫光禄大夫门下侍郎同中书门下平章事范阳郡公卢翰顷因多难从我于征以其年乃老成任推先进方将求旧擢处公衡荏苒迄今再淹星岁勤劳既着衰疾有加宜徙职於春闱用优贤於暮齿可太子宾客散官勲封如故【贞元二年正月】

崔造太子右庶子制 陆贽

勅宰相之职允厘百工时惟仰成不可废阙中散大夫行给事中同平章事上柱国平安县开国男赐紫金鱼袋崔造顷在掖垣参掌枢务摠领烦重精勤弥深亦既优贤赐之长告岁聿云暮有加无瘳披诚自陈辞疏三上知止之道守之甚坚处於休闲遂其颐养可太子右庶子散官封如故【贞元二年十二月】

卢迈太子宾客制

任重谏猷道存忠谅辞疾之情既恳优贤之义斯崇中书侍郎平章事卢迈朝序公才操履端敏弼谐庶政夙夜惟寅恭恪之心每思献纳而支体未适固请优闲累表陈情恳诚弥切将遂其志予衷耿然爰举朝章式加命秩可太子宾客【贞元十三年九月】

赵宗儒太子右庶子制

任人之道必先无私求贤之宜所期适用给事中平章事赵宗儒早以文学累更职任自居枢近颇历岁时虽夙夜勤劳而政理犹鬱式移秩序以叶朝经可太子右庶子【贞元十四年七月】

郑珣瑜吏部尚书高郢刑部尚书制

朕承天眷命获主兆人思致雍熙用康区夏布和缉化属在辅臣所任适宜实谓通典银青光禄大夫守吏部尚书平章事上柱国郑珣瑜银青光禄大夫守刑部尚书平章事上柱国高郢等咸以忠清累更朝列秉彝廉慎操履贞恒自参辅中枢皆能励节祇勤庶务夙夜惟寅岁月滋深纓纏疾恙袞职有阙无以弥缝况错综为选士之本刑法乃生人之命俾从专掌以尽至公宜辍台司副予所委珣瑜可吏部尚书郢可刑部尚书【永贞元年二月】

郑余庆太子宾客制

御大器者本於至公服大寮者归於衆望故上无虚授下允具瞻苟异於斯则旷邦理朝请大夫守尚书左丞同中书门下平章事轻车都尉赐紫金鱼袋郑余庆常以懿文累更近侍亦以谏议出佐遐藩恭承宣室之召再处庙堂之任丞相所请朕无不从劳予虚襟亦既周月寂寥厥位不闻直声昔魏相持纲枢机周密左雄匡政朝廷肃然摠録之司轻重攸系苟云不称亦在量能俾从调护之班犹示优崇之宠可守太子宾客散官勲如故【元和元年十二月】

郑絪太子宾客制

门下王者重辅弼之任明进退之宜见可即升知否则舍兹朕所以推诚不惑与物无私者也银青光禄大夫守门下侍郎同中书门下平章事兼弘文馆大学士上柱国赐阳武县开国侯郑絪早以令闻入参禁署永推勤绩出授台司期尔有终匡予不逮岁月滋久谋猷寢微罔清淨以慎身每因循而保位既乖素履且鬱皇猷宜副羣情罢枢务朕以其久居内职累事先朝恩厚君臣贵令终始俾就优闲之秩用申寛大之恩可太子宾客散官勲封如故主者施行【元和四年二月】

李藩太子詹事制

爰立辅臣以熙庶绩聿膺其任亦属难能至於明用舍之宜全始终之道兹惟大体宁忘予怀中散大夫守门下侍郎同中书门下平章事兼弘文馆大学士上柱国赐紫金鱼袋李藩早以学行闻於缙绅泊升朝端克慎素履顷者拔於非次列在钧衡是宜有道以佐时匪躬而纳海用副明獎越於常伦而授任以来再踰年序夙夜之勤虽着弼谐之效未孚将何以允至公之求成天下之务宜辍黄枢之重尚居卿尹之荣尔其勉之式钦优礼可守太子詹事散官勲赐如故【元和六年二月】

权德輿礼部尚书制

文昌六官宗伯掌礼选授之重自昔攸难非夫台衮之臣分全於终始缙绅之议素洽於羣伦则无以允是优崇膺兹名秩正议大夫守礼部尚书同中书门下平章事上柱国扶风郡开国公权德舆奥学雄词冲襟旷度稟中和之气弘信厚之规夙彰厥猷历践清贯乃者迴翔省阁祗服大僚咸推镇俗之风遂致济川之望朕永惟理本宵旰在怀常期献纳之功深属辅弼之任爰徵金论俾列鼎司勤劳亟涉於岁时谦挹每形于造次是用委春卿之职辍枢务之殷任事程能庶光会府帅属而理汝往钦哉可礼部尚书【元和八年正月】

韦贯之吏部侍郎制

朕恭己临人励精思理二三执政犹吾股肱念终始之罔亏於进退而尤重苟或将命失中辅导不专依违於怀尚慎斯举君臣之义岂不弘乎中大夫守中书侍郎同中书门下平章事上骑都尉赐紫金鱼袋韦贯之早着淑声夙经显贯润以文藻懿其风猷爰膺选衆之举式竚弼予之美而自当钧轴屡变星霜虚襟以听未闻至论非启沃之道有所不行何燮谐之功蔑尔无效欲抑浮华之路在捐朋党之私人亦具瞻事将爰副用解枢机之务俾居衡镜之职克允斯任宜和厥心可守尚书吏部侍郎散官勲赐如故

李绹礼部尚书制

门下辅相之任所贵於纳忠进退之宜实重於由礼其有以劳奉国以疾固辞予怀谦让之风是举优崇之典朝议大夫守中书侍郎同中书门下平章事上柱国高昌县开国男食邑三百户赐紫金鱼袋李绹端庄秉彝亮直循道抱凌寒之劲节标肃物之贞规尝以懿文参於内署亦以公望贰於地卿竭其智能茂着官业洎擢居衮职左右朕躬远虑必陈谏言无隐怀致君之志弘济俗之方确然贞操鬱有休问而步履婴疾趋侍为难披诚上闻稽首求免乃眷毗倚久之未从星霜屡迁忠恳弥激宗伯秩礼时惟大寮宜从喉舌之班用辍盐梅之寄庶因清简俾遂颐真膺兹宠章敬服尔命可守礼部尚书散官勲赐如故【元和九年二月】

唐大诏令集卷五十五

卷五十六

钦定四库全书

唐大诏令集卷五十六

宋 宋敏求 编

大臣

宰相

罢免下

李鄘户部尚书制

王涯兵部尚书制

崔羣湖南观察使制

令?楚宣歙池观察使制

萧俛右仆射制

崔植刑部尚书制

元稹同州刺史制

裴度右仆射制

宋申锡太子右庶子制

陈夷行左仆射制

杜悰右仆射崔铉户部尚书制

郑朗太子少师制

郑畋太子少傅分司东都制

裴胤鄂岳观察使制

崔胤吏部尚书制

裴枢崔远左右仆射制

罢免下

李鄴户部尚书制

夫为君者求旧以申其用施恕以遂其情为臣者陈力以効其能奉身以明其志故在上则终始之道备居下则进退之义全兹惟休哉用厚恩礼银青光禄大夫守门下侍郎同中书门下平章事上柱国江夏县开国侯食邑一千户李鄴居洁履方端明审固有沉毅庄重之质有坚刚迅敏之心劲节夙表於屯夷利器久彰於中外朕所以迹其衆善询及庶工登之台阶授以政柄将欲藉其硕德弘厥壮猷而固辞之诚再疏颇切然犹未允其请所冀式副予怀迨此旬时劳於夙夜益愿颐养坚称衰迟宜罢枢轴之殷俾居喉舌之重就闲高秩式示优崇可守户部尚书【元和十三年三月】

王涯兵部尚书制

股肱之任与国同体苟或取容於位啓沃无闻将何以寅亮天工弘宣德化朕嗣膺丕业爰任钧衡知善必昇见否而退兹所以推至公於天下也银青光禄大夫守中书侍郎同中书门下平章事上柱国清源县开国男王涯素以艺文早登华贯参我宥密再处内庭位践公台拔於非次诚宜匪躬峻节纳海尽忠而乃因循自持谦默无补期於进道屡复星霜空劳虚怀未副明獎虽夙夜之勤久着而具瞻之望何从君臣之大义存终始宜解职於枢务俾副曹於夏官尚谓优崇勉敬斯任可行尚书兵部侍郎【元和十三年八月】

崔羣湖南观察使制

致君之道爰在辅臣发辉政经端理教化其或彝伦未叙公议不明免其所职我常典也正议大夫守中书侍郎同中书门下平章事上柱国赐紫金鱼袋崔羣根於温敬发以词采践历台阁润色丝纶尝以敏才列於宥密考能观行益表谦勤擢处钧衡用参大政缉熙之绩每竭其谋猷翊赞之心亦彰於夙夜旰食思理注於话言善而可行无不虚受而顾问之际谓近於至公详听之间或违於事实将何以同底于道化洽万方宜罢印於中枢俾报政於外服优以显秩尔其勉之可持节都督潭州诸军事潭州刺史兼御史大夫湖南都团练观察处置等使勳赐如故【元和十四年十一月】

令?楚宣歙池观察使制

朕闻为政以德必推诚而任人为君以道必存体以立国况乎位崇元辅职总庶寮衆方具瞻时以轻重得不明进退之礼全始终之恩大中大夫守门下侍郎同中书门下平章事上轻车都尉赐紫金鱼袋令?楚夙擅懿文累阶清贯先朝特加宠命獎擢内庭出拥旌旄入居鼎铉朕祗膺宝位注意旧臣方属奉陵之时委以复土之务是宜竭心尽虑使下不欺而颇闻工徒之诉累彰官吏之罪遽有章表固求退闲宜归相印之权往授使符之命仍兼荣於司宪俾奉法以惠人勉率乃心表予洪覆可使持节宣州诸军事宣州刺史兼御史大夫宣歙池等州都团练观察处置使勲赐如故【元和十五年七月】

萧俛右仆射制

师长庶工总详六职重任久旷益难其人自非体参股肱位列钧鼎能引义以知退爰致礼而加恩则授受之间何以允兹任也朝议大夫守门下侍郎同中书门下平章事徐国公赐紫金鱼袋萧俛门承华袞位列清贯用能周物志在匡时勤内署之论思肃南台之纲纪朕自承大序擢处台阶推一心献纳之诚赞四方经营之绩及此踰岁累诚恳辞微恙所侵坚请难夺朕忧勤庶政亲委大臣务厚始终以全进退既谢弼谐之任宜加端揆之崇尔其戒之服我优秩可守尚书右仆射勲赐如故【长庆元年正月】

崔植刑部尚书制

门下宰相者朕之腹心和合天下在乎镇静藩服附亲远方将弘遂物之宜必有更张之道正议大夫守中书侍郎同中书门下平章事武骑尉赐紫金鱼袋崔植往在先朝颇推广直驯行惟谨保万石之风清德不渝继四公之业遂昇左掖实着能名驳正之美称於朝列朕以孝公太傅代载忠贞擢於相门授以台席顾惟寡昧奉以丕图每念为君之难敢忘从谏之义推诚听纳虚已谘询庶洽羣心以迎和气叔敖是期於秉羽汲黯谓致於寝谋宵分以兴日旰忘食昔藩国多事平津让侯陰阳未和石庆辞位尔惟谦逊岂常求安称疾拜章勤亦至矣虽惕日之年未及而寝冰之意尚坚遂辍枢机用成美志崇以天秩长於秋官君臣之间朕无所愧可守刑部尚书散官勲赐如故【长庆三年二月】

元稹同州刺史制

宰相者位列岩廊权参造化内操政柄上代天工朕嗣守丕图思与至治每於擢用冀获隽良为善有闻必资獎宠擢於愆谤用罢台阶通议大夫守尚书工部侍郎同中书门下平章事上柱国赐紫金鱼袋元稹游艺资身明经筮仕累膺科选益振荣华茂识宏才登名晁董之列佳辞丽句驰声谢鲍之间顷在宪台尝推举职比及迁黜亦以直闻是以擢在周行典斯诰命洎参处密近旋委台衡宜竭谋猷尽以匡赞而乃不思弘益之道遂纓詿误之愆察以衷情虽非为已行兹左道岂曰効忠体涉异端理宜偕罢朕以君臣之分贵获始终任使之时亦献诚恳每思加膝宁忍坠泉犹弘在宥之心俾列专城之寄左郡之大三辅推雄控压关河连属宫苑

勉於政績副我優恩可使持節同州諸軍事守同州刺史充本州防禦使長春宮等使散官勳賜如故【長慶二年六月】

裴度右仆射制

朕端已推誠資於輔相求人與衆諒在訏謨所以詢公卿之言從士庶之望輟任淮海俾居台階舉先朝勳旧之臣當四海具瞻之位推心委柄期在賢能成效靡孚余將何望守司空兼門下侍郎同中書門下平章事上柱國晉國公食邑三千戶裴度器本端誠道惟謇諤挺筠松之操蘊珪玉之姿望着岩廊功書竹帛策勳報爵寵極人臣朕恭守睿圖推心弼輔聿求俊彥思致雍熙擢升論道之司再授樞衡之任虛心日矢仁乃嘉猷而鼎飪未調弛張異制誠宜有犯無隱忠諫必陳使余誠懷不惑聞听何容違於造次致有間於笙簧?木既窮匪辭焉驗昔漢以陰陽不和册免丞相今爾訏謨或爽宜罷台司疇勳績以尚功錄忠勞而念旧俾居右揆非謂左迂用崇師長之榮勿以優閑自薄可守本官尚書右仆射散官勳封如故【長慶三年六月】

宋申錫太子右庶子制

君臣之道義切始終股肱之良任存正直苟涉邪枉自紊憲章既亏恪慎之心難委弼諧之任正議大夫行尚書右丞同中書門下平章事上柱國賜紫金魚袋宋申錫學習儒門職參翰苑備我顧問洽茲寵光謂其啓沃竭忠擢登台鉉而乃踐修不慎日底愆尤知臣之規俾予增愧欲遏奸回之路宜先勸懲之源豈可猶秉樞機仍司考轄罷居台席列位龍樓誠謂寬恩周全至體朕以事狀之間慮其冤濫鞠驗之際洎務詳明當竚得情以復申明可行太子右庶子散官勳封如故【太和五年三月】

陳夷行左仆射制

王者推至公以御天下成庶務以佚羣才況乎寅亮所資安危攸屬顧是進退實惟矜慎其有績懋致君誠深知止則豈可不優其恩禮遂以便安上德尊賢於是乎在銀青光祿大夫守尚書左仆射兼門下侍郎同中書門下平章事監修國史陳夷行受天正性味道至和雅量川渟厚德山峙慮必經遠詞皆摭微舒遲見君子之容端肅得大臣之體文推訓誥學奧泉源膏腴五常枝葉百行早以精懿列侍禁闈溫樹既彰於不言王度每資於密贊洎踐登袞職左右文宗遇事必陳犯鱗靡懼標揭令范振揚直聲逮余纂承再諧夢卜輔我以大中之道弘我以可久之規匡益居多厥庸甚茂近者寒暑乖候步履或難雖嘉猷屢竭於沃心微恙有妨於造膝朕雖倚賴方樂優崇而獻疏披誠固懷退讓眷言美志難議強煩用是輟燮贊於三台專儀刑於百揆庶可資乎頤養且無替其崇高仍加貴勳式表光寵可守尚書左仆射仍賜上柱國【會昌二年六月】

杜悰右仆射崔鉉戶部尚書制

君之任臣也进则用其才劳则逸其事况丹青大化佐佑朕躬谟明之效已彰岁月之勤亦至俾其宴息用保始终尚书右仆射兼门下侍郎同中书门下平章事杜惊贞庄有容沉厚多敏早历内外之任备陈经济之谋刚厉驰声肃恭推美通议大夫守中书侍郎兼户部尚书同中书门下平章事充集贤殿大学士上柱国博陵县开国子食邑五百户赐紫金鱼袋崔铉诚明挺操温粹含章擢自禁垣之中列於台司之上献替不倦沉研益光而皆披袞在廷事君弘道方当注意资尔令猷或趋尚之间时间朋比黜陟之际迹涉依违朕尊礼大臣虚襟庶政将务羲唐之化所期伊吕之贤苟曰未谐岂副金縢临轩永念能不怵然宜解职三台列官八座长揆天台之右地居户版之雄勉思令图服我成命惊可行尚书右仆射铉可守户部尚书【会昌五年四月】

郑朗太子少师制

相辅之臣贤杰是膺苟或道茂台阶功宣时柄洪化方深於倚汪微疴遽告其退休宜降宠私俾安颐摄庶得君臣之义实全终始之恩通议大夫守中书侍郎兼礼部尚书同中书门下平章事监修国史上柱国赐紫金鱼袋郑朗灵凤耀仪非熊表德贞厚可以镇风俗谦恭可以和神人量合澄波气凝金璞论议必根於王化文章雅叶於国经起於卑寮积乃重望自周旋台阁总领藩方故事书着於典章仁声蔼流於谣咏顷司邦计国用以殷逮领宪闱朝纲载肃泊乎克符梦卜遂委钧衡理庶政而百度惟贞调元气而三光增耀而又勤献纳稍失节宣屡陈谢病之辞待举优贤之命是用释兹机务允乃至诚尔其专一精神辅助药石将图有间务在无营往参六傅之荣仍加贰令之职用为羽翼爰辍股肱嘉猷永播於事公深睠岂忘於兴寝慎尔多福祇膺恩宠可检校尚书右仆射兼太子少师【大中十一年十月】

郑畋太子少傅分司东都制

门下将相之权安危所系注专戎律秉持国钧谓成靖乱之谋以着匡时之绩方期功就俄以疾辞仍乖抚字之方且异毗予之道尚居崇秩犹念初心诸军四面行营都统凤翔陇等州节度观察处置等使开府仪同三司守司空兼门下侍郎同中书门下平章事凤翔尹上柱国荥阳县开国子食邑二千户郑畋艺高册府誉动词林礼乐在躬衣簪奕代虹玉动连城之价朱弦含清庙之音才无不周识无不综践历既久闻望时称禁林传丽藻之工凤沼着经纶之业泊凶徒犯顺上国罹灾驾当出於全蜀镇方临於右辅因时建策遂首兴师上寛焦灼之怀下慰蒸黎之望念其竭节频降殊恩任三事之优崇专□之节制许於除授皆俾遵行则朕於施功之臣可谓无有爱惜而不能倾心养士尽力惜人致兴半菽之嗟竟起多寒之怨既乖抚驭几误机权赖仗义之徒叶心王事举善暗符於朕意推奸必违於勲庸尚保傅於承华仍优游於东洛未妨颐养犹示渥恩凡百庶寮宜体朕意可太子少师分司东都散官勲封如故仍且於兴元管内便将养候疾损日赴任主者施行

裴胤鄂岳观察使制

【原阙】

特进行门下侍郎兼兵部尚书同中书门下平章事监修国史上柱国裴胤秀挺华宗光膺积庆高悬天爵焕发人文早着令名亟昇清贯自超翔宥密演畅纶言因成鱼水之欢遂委栋梁之任张子房之借筭遽展谟猷谢安石之围碁将明气度繫乃之力毗予化源旋属寇犯京师驾惟巡省益表忠贞之节备彰患难之时冒白刃以脱身激丹诚而报国安危所注中外具瞻道方被於匡周功已参於微管每宽宵旰用慰忧勤既在輿言当存国体爰从燮赞待假优崇朕以夏口奥区武昌重地况今萑蒲尚扰细柳犹勤全资济物之仁式叶观风之政念兹钧轴付以察廉连数郡之丰盈问兆人之疾苦即冀烽烟弭息寰宇清宁俾俟侯藩重归相印往践乃位可检校兵部尚书兼御史大夫充鄂岳州观察使散官勲封如故主者施行

崔胤吏部尚书制

门下天地广运寒暑所以推迁帝王任人理乱系於周稔故叔敖三相往道堪思胡广七为前功斯在因详文册爰示徽章扶危匡国致理功臣光禄大夫守中书侍郎兼吏部尚书同中书门下平章事判度支上柱国清河郡开国公食邑二千户崔胤金茎擢用玉烛资和朱弦含理代之音苍璧是礼天之器自付政柄累遇时艰或已去而复还每勤官而莅事虽矜直道终失中庸朕昨者初复上京方安庶品且期静理贵保和光而於敷奏之间独有去留之说徒妨事体俾长纷争是用辍乃钧衡专兹铨镜亦将示朝廷之典制保君臣之始终更茂前功永孚於道可守吏部尚书【光化二年正月】

裴枢崔远左右仆射制

门下入则秉钧衡而凝庶政出则正冠冕以长百寮式资夙旧之臣咸谓艰难之地银青光禄大夫守尚书右仆射兼门下侍郎同中书门下平章事充太清宫使弘文馆大学士延资库使诸道盐铁转运等使上柱国河东郡开国侯食邑一千户裴枢周事历年慎守三纪再持国柄屡竭訏谟光禄大夫门下侍郎兼兵部尚书同中书门下平章事监修国史上柱国博陵郡开国公食邑二千户崔远语默有程得丧无挠中枢荐履尽瘁克彰俱宣夙夜之勤备罄匡扶之业是用均其劳逸显尔便蕃燮调暂辍於剧权师表并资於硕望无亏懿效式使当仁或增疏爵之荣更表优贤之礼枢可光禄大夫守尚书左仆射仍进封开国公加食邑一千户勲如故远可守尚书右仆射散官勲封并如故【天佑二年三月二十五日】

唐大诏令集卷五十六

卷五十七

钦定四库全书

唐大诏令集卷五十七

宋 宋敏求 编

大臣

宰相

休致

卢怀慎去官养疾勅

杜佑太保致仕制

贬降上

张嘉贞幽州刺史制

杜暹荆州长史李元紘曹州刺史制

宇文融汝州刺史制

第五琦忠州长史制

第五琦长流夷州制

李揆袁州长史制

王缙括州刺史制

杨炎崖州司马制

郑余庆柳州司马制

韦执谊崖州司马制

于頔恩王傳絕朝謁制

皇甫鏐崖州司户参军制

令狐楚衡州刺史制

宋申锡开州司马制

李德裕袁州长史制

李宗闵处州刺史制

再贬李宗闵处州长史制

三贬李宗闵潮州司户制

休致

卢怀慎去官养疾勅

勅留侯多病汉皇许其颐养吕蒙未瘳吴王因而憯戚此则古之义也银青光禄大夫检校黄门监上柱国渔阳郡开国伯卢怀慎大才宏识资忠履信学穷坟典文纬邦国朕之倚赖人实具瞻顷者忘身徇公积劳为疴竭诚抗表固辞在职方欲省其谋虑专於导引且凭针艾之术副朕盐梅之期宜听去官许其养病

杜佑太保致仕制

宣力济时为臣之懿躅辞荣告老行已之高风况乎任重公台义深翼赞秉冲让之志坚金石之诚敦谕既勤坚执弥固则当遂其忠恳进以崇名尚齿优贤斯王化之本也金紫光禄大夫守司徒同中书门下平章事兼崇文馆大学士充太清宫使上柱国岐国公食邑三千户杜佑岩廊上材邦国茂器蘊经通之识体温厚之姿寬裕本乎性情谟猷彰乎事业博闻强学知历代沿革之宜为政惠人审羣黎利病之要由是再司邦用累历藩方出总戎麾入和鼎实事膺重寄历事先朝左右朕躬夙夜不懈命以诏册登之上台肃恭在廷华髮承弁兹可谓国之元老人之具瞻者也朕纘承丕业思弘景化选劳求旧期致时雍方申引翼之仪遽抗悬车之请而又固辞年病乞就休闲已而复来星霜屡变有不可抑良用耿然永惟古先哲王君臣之际臣有耆艾以求其退君有优赐以徇其情乃辍邓禹敷教之功仍增王祥辅导之秩俾养浩然之气安於敬止之乡庶颐神保和永绥福履仍加阶级以厚宠章其惟敬哉兹谓全致光禄大

夫守太保致仕宜朝朔望

贬降上

张嘉贞幽州刺史制

中书令张嘉贞备位宰官夙承恩命不能励其公节以训私门其弟嘉佑顷缘獎爱迁在清秩凭宠自肆黷货有彰岂可仍践台阶仪刑百辟贬居藩守俾肃朝伦可幽州刺史

杜暹荆州长史李元紘曹州刺史制

出纳王言发挥纶翰宰臣之任选衆推贤检校黄门侍郎同中书门下平章杜暹同中书门下平章事李元紘?咸励忠勤用登枢揆虽清以自牧而道则未宏不能同心戮力以只帝载而乃肆怀相短以玷朝纶朕缘事丑股肱情惟隐蔽掩其累而不率遂其过而弥彰将何以缉叙三光仪刑官辟宜囿中禁俾列专城暹可荆州长史元紘可曹州刺史

宇文融汝州刺史制

事君之节在於匪躬为臣则忠期於无隐黄门侍郎同中书门下平章事宇文融幸借艺能俾承推荐往以封辑田户漕运边储用其筹谋颇有弘益三迁宪府再入礼闈仍仗以訐谟委其密勿虽十旬入拜一日九迁方此超腾彼未为速庶违尔弼久则伫於昌言谋而不臧近颇彰於公论交游非谨举荐或亏将何以论道三台具瞻百辟宜辍中枢之位居外藩之寄可汝州刺史

第五琦忠州长史制

台庭之位陶甄是属在和羹而或爽当折足而貽忧由是舜举二臣叶心者俾父汉闋三相无能者同免苟亏公议抑有彝章正议大夫行尚书户部侍郎同中书门下平章事权知门下省事上柱国扶风县男赐紫金鱼袋第五琦夙表材干累迁要途久专司於国赋常有利於公家往自艰难备经任使以獎其効拔在钧衡比事每涉私政非近体率情变法且违行古之方封已怙权稍阙在公之义簿国靡费聚歛尤繁既罔上而取容亦害下而恣怨凡所进拔悉收瑕衅又与贺兰进明并居权要潜结往来尝夜会於私第归必淹於永漏殊乖宪典足表异端颇招党比之嫌甚失弼谐之望稽诸故事合议刑章但以任在股肱理无按问遂抑情於含匿斯以礼而始终岂可更践台阶尚尘枢禁宜申远谪之命俾肃惩治之典可忠州长史员外置同正员外官勲封如故【乾元二年十一月】

第五琦长流夷州制

君之使臣期叶心以辅政臣之事主当尽忠以明职苟或冒官罔上黷利崇奸靡惩折鼎之凶

载履覆车之辙自貽厚责难舍刑章正议大夫行忠州长史员外置同正员外上柱国扶风县男第五琦素以干能早膺任使自艰难之际帑藏是司久彰岁月之劳颇申强济之用所以收其课绩擢在台阶而行閱由衷任性过量务容身之计亏许国之诚变法多案於常经率情每违於直道交惟党比用非忠良颇乖秉钧之体谅乏致君之志顷者遂从贬削爰示典章是以輿议日闻僭违益露引承福於肘腋殖货於中处朱敏於膏腴窃货於外怀金暗室曾不慚於四知纳贿私家动有踰於万计比令按问咸伏其辜且国赋邦徭军储岁备朕以戎车屡驾毗俗未康常有戒勅令其节省岂谓陰图聚斂擅出科条上延谤於公家下益疲於人业徇私封已归怨称君忝曰人臣胡宁忍此况又深尤隐慝累干刑书朕亦含垢匿瑕为之掩恶议以明刑合从秋令顾君臣之义大庶始终而礼全夫除恶务本国家之彝训申恩念旧王者之深仁属阳和在辰品物咸遂由是抑从寬典特屈严诛宜寬殊死之命俾就投荒之谪可除名长流夷州驰驿发遣朕差纲领送至彼所勿许东西於戏朕临御以来每更辅弼皆有以过失存其禄位今者琦之所犯负国诚深义不可以苟容法不可以频贷申兹宪令用警庶寮凡百卿士宜知朕意【乾元三年二月】

李揆袁州长史制

持衡当轴体备股肱若鼎餗之不知虑鼓妖之有衅台司稍紊王度则乖宜峻彝章以惩不道银青光禄大夫行中书侍郎同中书门下平章事集贤殿崇文馆大学士兼修国史上柱国姑臧县开国伯本以艺文累阶资序周旋近密参掌丝纶庶其翼亮之勤列在訏谟之地任惟过力诚匪奉公无闻忧国之心不惧旷官之责具瞻何取进退求容陰怀罔上之谋更漏省中之语端居相府潜构祸胎动河南之八州昧庙堂之宝将图不轨振扰方隅考验甚明发奸斯在私乘駟传自越章程式按秋官合从徽纆但以任叨宰辅久侍堦墀特寬丹笔之书犹左朱旛之职俾从远黜以肃朝伦可袁州长史员外置同正员仍即驰驿赴任

王缙括州刺史制

门下侍郎中书门下平章事王缙附会奸邪阿炎谗谄据兹犯状罪至难舍矜以毫及未忍加诛俾申屈法之恩贷以岳牧之秩可使持节括州诸军事括州刺史宜即赴任於戏朕恭已南面推诚股肱敷求哲人将弼予理昧於任使过在朕躬无旷厥官各慎尔职

杨炎崖州司马制

尚书左仆射杨炎托以文艺累登清贯虽谪居荒服而虚称犹在朕初临万邦思弘大化务擢非次招纳时髦拔自郡佐登於台鼎独委心膺信任无疑而乃不思竭诚敢为奸蠹进邪丑正既伪且妄党援因依动涉情故隳法败度罔上行私苟利其身不顾於国加以内无训诫外有交通纵恣诈欺以成赃贿询其事迹本末乖谬蔑恩弃德负我何深考秋议刑罪在难宥但以朕於将相义切始终顾全大体特有宏贷俾从远谪以肃具寮可崖州司马员外置同正员仍即驰驿发遣

郑余庆郴州司马制

辅弼之臣百辟是宪苟二其行则黜大猷守中书门下平章事郑余庆顷谓忠贞擢居台辅仍乖正直有涉比周弃法弄情公行党比苟徇邪志颇紊彝伦谪佐遐藩以惩不恪朕擢於不次诚冀効忠乃自速辜亦所难追凡百君子宜悉朕怀可郴州司马置同正员

韦执谊崖州司马制

为臣之道必在尽忠其有朋党比周挟邪败度事资惩戒必正典刑正议大夫中书侍郎同中书门下平章事崇文馆大学士修国史赐紫金鱼袋韦执谊幸以艺文久从任使早居禁署谬列鼎台直谅无闻奸回有素负恩弃德毁信废忠言必矫诬动皆蒙蔽官由党进政以贿成朕初临万邦务於弘大每存容恕冀有悛心而乃不顾宪章敢行欺罔宜投荒服以儆无良以曾事先朝尝参近职尚宽极法俾佐遐藩可崖州司马员外置同正员仍即驰驿发遣

于頔恩王傅絶朝谒制

君之使臣也有以极崇宠之恩臣之事君也是宜怀感励之志然後上下交应始终可观道德齐礼之风行迁善远罪之功着?县之内欢然太和其或诱劝无施僻违自纵干我邦纪黜於彝伦羣情所非物听增骇虽欲覆护厥路何由尚复裁於朕心特示宏贷俯从屈法用表曲全非予敢私诚谓远体金紫光禄大夫守司空同中书门下平章事充太微宫使上柱国燕国公于頔轩裳之族颇习艺文累践台郎亟分符守特称器干遂领藩方爰自先朝持节襄汉率情肆暴败法作威蔑易典章公违诏旨事皆显白金论不容朕以临御之初务修德化政岂尚於至察道姑务於包荒由是大推衷诚排絶衆议赐以联恩之宠增其相位之荣礼命所加焜耀当代洎秉圭来覲和调台鼎任兼论道之司位冠群臣之列闺门子弟纓章绂於周行命秩车輿极纷华於里巷虽勲藏盟府行满缙绅德泽优深曾未阶比而罔戒盈覆犹务希求广出货财潜信卜射且又纵其勇敏专杀私庭害及平人惨深支解京穀之下凶毒若兹闻之震惊增用悼痛虑其暧昧按验皆明家道则然菟慝斯在自罹禁网宜峻刑书犹以尝厚恩亲未忍置之严宪遂申寛宥俾傅王门服於静专庶能循省可行恩王傅散官勲封如故仍絶朝谒於戏朕惟汉宣之理在於信赏必罚而伯宗有言亦责匿瑕含垢岂化之未至将善或难跻孤我初心良增愧歉凡百多士宜悉朕怀

皇甫鏐崖州司户参军制

朕顾眇身初膺大宝思有以上谐天意下悦人心将澄理化之源必分邪正之路言念辅弼方俟忠贤其或挟奸容身歛怨归国罪已暴於天下法宜行於事初不速去之曷明予志中大夫守门下侍郎同中书门下平章事上柱国赐紫金鱼袋皇甫鏐器本凡近性惟险狭行靡所顾文无可观虽早践朝伦而素乖公望自掌邦计属当军兴以剥下为徇公既鼓衆怒以矫迹为孤立用塞人言泊尘台司益蠹时政不知经国之大体不虑安边之远图三军多冻馁之忧百姓深凋瘵之弊事皆罔蔽言悉虚诬远近咸知朝野同怨而又广称方事上惑先朝潜通奸人

罪在难舍合加窜殛以正刑章俾黜遐荒尚存寬典凡百在位宜悉朕怀

令?楚衡州刺史制 元稹

忠臣之节莫大於送往事居君子之方宁忘於养廉远耻况位隆辅相职奉园陵蒙蔽之过屡闻诚敬之心尽废朕虽含垢人亦有言深念君臣之恩难厌公卿之论宣歙等州都团练观察处置等使大中大夫使持节宣州诸军事守宣州刺史兼御史大夫上柱国轻车都尉赐紫金鱼袋令孤楚早以文艺得践班资宪宗念才擢居荣近异端斯害独见不明密隳讨伐之谋潜附奇邪之党因缘得地进取多门遂参台阶实妨贤路朕以道遵无改事贵有终再命黄扉之荣专奉玄宫之礼而不能率下罔念匡君致于隳政牧之职掩韦术李鄴之举成朕不敏职汝之由前命秉轺尚期改节人心大惑物议沸然虽欲特容难排衆怒俾从谪守犹奉诏条予岂无恩尔且自省可使持节衡州诸军事守衡州刺史散官勲赐如故仍驰驿发遣

宋申锡开州司马制

勅正议大夫新授太子右庶子上柱国赐紫金鱼袋宋申锡顷由艺文擢居近密谓能洁已可以佐时遂越常资超升大任自参枢务骤易寒暄嘉谋蔑闻丑迹斯露致兹狱诉实骇朝听俾穷根本亦对嗣称以左验之间有所漏网正刑之际始示寬恩於戏朕自君临推诚宰辅常务仁恕以保和平岂意鱼水之期翻贻吴越之虑抚事兴叹中宵耿然是用重难亲临鞫问及诸耆德徧於名卿庶其尽忠颇为审克屈兹彝宪俾佐遐藩凡百具寮宜知朕意

李德裕袁州长史制

有国之典本於明罚为君之道必在去邪皇王大政谅无易此奸宄与偕诚敬尽亏无君之心因事辄见岂可尚居崇秩犹列东朝银青光禄大夫守太子宾客分司东都上柱国赞皇县开国伯食邑七百户李德裕性本陰狡才则脆弱因缘薄艺颀颀清途既忝藩镇旋处钧轴靡怀愧畏肆意欺诬废挠旧章汨乱彝序贤良尽逐当白昼而重关诡诈是谋逮中宵而万变朕尝以寒暑得疾初甚惊人凡百臣子奔走道路而德裕私室宴然全无忧戚王涯驻车道左络绎追呼满朝倾骇竟以不至又在西蜀之日徵逋县钱仅三十万贯使疲羸老弱徙转沟壑交结异类任用憊人贿赂流行朱紫无辨是宜处之重典以正刑书犹以夙经委使载深寬宥俾佐遐服用示寬恩可守袁州长史驰驿发遣

李宗闵明州刺史制

夫辅宰之任缉熙庶工苟或政紊彝伦迹涉党比则何以执是邦柄毗予一人银青光禄大夫守中书侍郎同中书门下平章事上柱国襄武县开国侯食邑一千户李宗闵顷以词艺列於班行乃藉宗枝骤升显贯朕嗣膺大宝梦想勤劳谓其忠厚小心再委枢务每必造膝而问虚已以求将欲俾人不迷致我垂衣而理付之钧轴断然不疑而乃事每怀私言非纳海近者别登俊彦与之同列忌贤不悦物论誼譁翼贊之効蔑闻怨嫌之声屡作前後叨位中外同辞惟

进奔竞之徒莫修恭慎之道蔽我卑听擅我化权不思急召之恩都忘再擢之宠况且志无报主举非正人顾其操心乃是速戾则何以式是百辟以维四方尚从屈法之典俾守遐藩之牧所谓全体良愧知臣可明州刺史仍驰驿赴任

再贬李宗闵处州长史制

明州刺史李宗闵股肱之臣付以大政所宜竭节以答殊荣事或负予法所难贷虽欲终始其可得乎且细大之罪既暴前诏而交通匪类踪迹又彰岂可尚领方州牧我黎庶宜谪遐佐以肃朝伦可处州长史驰驿发遣

三贬李宗闵潮州司户制

交结凶邪叨取荣显奸险陰慝因事尽彰顷为吏部侍郎令沈 於内人宋若宪处密求宰相及事踪败露文字犹在閱视之际良深叹骇既专枢柄益附私党附下罔上废义灭公言多矫诬动挟欺诈伤风败政负我何深按之刑章法在无赦尚以曾经任使赐以全生投之裔夷实我恩贷呜呼知人则哲朕方自咎为臣苟进当鉴於斯百尔君子宜体予意

唐大诏令集卷五十七

卷五十八

钦定四库全书

唐大诏令集卷五十八

宋 宋敏求 编

大臣

宰相

贬降下

李德裕潮州司马制

李德裕崖州司户制

李回太子宾客分司东都制

李回贺州刺史制

杨收端州司马制

杨收长流驩州制

孔纬荊州节度使制

张濬鄂岳观察使制

杜让能梧州刺史制

孙偓南州司马制

朱朴彬州司户制

王抟工部侍郎制

王抟溪州刺史制

王抟崖州司户制

崔胤工部尚书制

裴枢登州刺史崔远莱州刺史制

陆扆濮州司户王抟淄州司户制

裴贇青州司户制

柳璨密州司户制

贬降下

李德裕潮州司马制

勅录其自劾则付以国权惩彼保奸则举兹朝宪此王者所以本人情而张法理也特进行太子少保分司东都上柱国卫国公食邑三千户李德裕凭藉鎡基累承台衮不能尽心奉国竭节匡君事必徇情政多任已爱憎颇乖於公道昇黜或在於私门遂使冤塞之徒日闻腾口积嫌之下得以恣心岂可尚居保傅之荣犹列清崇之地宜加窜斥以戒僻违呜呼朕临御万方推诚庶物顾彼纖琐皆欲保安岂於将相旧臣独遗恩顾而羣议不息谤书盈篋爰举典章事非获已凡百寮庶宜体朕怀可潮州司马员外置同正员仍所在驰驿

李德裕崖州司户制

勅朕祇荷丕业思平泰阶将分邪正之流冀使华夷胥悦其有尝登元辅久奉武宗深包祸心盗弄国柄虽行谴斥之典未塞亿兆之言是用再举朝章式遵彝宪守潮州司马员外置同正员李德裕早藉门地叨践清华累膺将相之荣惟以奸倾为业当会昌之际极公台之荣骋谀佞而得君情遂专恣而持国政怙权生事妬贤害忠动多诡异之谋潜怀僭越之志秉直者必弃向善者尽排诬贞良造朋党之名肆谗构生加诛之衅奸有踰於指鹿罪实见於欺天顷者方处钧衡曾无嫌避委国史於爱媚之手宠秘文於弱子之身洎参命书亦引亲昵恭惟元和实录乃不刊之书擅敢改张罔有畏忌夺他人之懿绩为私门之令猷又附会李绅之曲情断成吴湘之冤狱凡彼簪缨之士遏其进取之途骄倨自夸狡猾无对擢尔之髮数罪未穷再窥罔上之由益验无君之意使天下之士重足而迹皆慑惧奉尔而慢易在公为臣至此於法何追於戏朕务全物体久为含宏虽黜降其官荣尚盖藏其丑状而睥睨未已兢惕无闻积恶既彰公议难抑是宜移投荒服以谢万方中外臣寮当鉴予旨可崖州司户参军员外置同正员仍仰所在驰驿发遣纵逢恩赦不在量移之限【大中二年九月】

李回太子宾客分司东都制

勅王者悬赏罚以示万方况乎臣子若奋其良术则宜擢处重任或挟彼邪谋固合稍加惩治惟此二柄我何敢私湖南都团练观察处置等使光禄大夫行潭州刺史兼御史大夫上柱国陇西郡开国公食邑二千户李回早以艺学科名累登华贯谓尔奉公约已旋升大寮因缘擢迁遂陟台辅而不能竭诚以尽忠益枉道而求庇交通财贿导达奸邪昨因推鞠凶徒皆得发明事迹朕务弘体裁特免研究论既喧腾理须移夺况又闻顷司政柄每欲除授咸取决於德裕不自行其至公物议所兴以斯为重岂可犹委澄清之任复领湘潭是宜辍从调护之班俾分洛邑尔其勉莅宠秩幸予宽恩可行太子宾客分司东都【大中二年九月】

李回贺州刺史制

勅为臣竭公忠之诚朝尊爵赏事君乖毗倚之望国有典章惟此二道理所不废湖南都团练观察处置等使光禄大夫行潭州刺史兼御史大夫上柱国陇西郡开国公食邑二千户李回始以才术升於台阶作予股肱亦援星律寄长兼於授钺道甚异於匪躬亦既左迁俾居廉问而迹乖检慎事露端倪秉钧之势已移枉道之踪乃见负我非浅叨荣故深况又闻顷司政柄应欲授除咸取决於德裕不自行其至公人亦有言孽亦何追朕匿瑕含垢思全进退之宜尔则同力协心且易枢机之任合归严谴犹示宽恩故前制命尔为太子宾客给事中封还我勅且曰责坐之词至重降移之秩太轻物论喧然以为未当尔实自构予何敢私是用移谪临贺冀厌羣议勉於三省勿谓无恩可持节贺州诸军事贺州刺史仍所在驰驿赴任【大中二年九月】

杨收端州司马制

勅人臣之节莫重於忠良氏族所修无外於清顺二者不立何以正身况乎居常伯之崇应藩侯之寄虽顾初终之体当明惩劝之端宣歙观察使检校工部尚书宣州刺史兼御史大夫杨收始以文章选在宥密才历二岁擢升台衡谓其发自寒门必有操寄行孤贞之道报国用恭俭之礼化时夙夜励精以酬恩遇而乃贪黷为业沟壑难盈逞其私怀盗我名器以官常为货利之径持僭侈为暴横之资田产遍於四海台榭拟於中禁而又结连奸党听任憊人险诈千端回邪万状欺罔弥甚顾虑蔑闻谓日月之照临或所隐漏意天地之奸慝可以包容殊不知心既不悛孽无以追去岁验其事迹未忍揭扬委以察廉僭咎时闻缙绅之内物议喧然班列之中怨念未息朕以宽恕驭下仁闵为心中外臣寮悉明此志负我既甚其法何如甯於遐陬式示严宪尔惟自弃毋或尤人可守端州司马员外置同正员仍驰驿发遣【咸通八年八月】

杨收长流驩州制

勅端州司马杨收起自孤寒猥承委任罔思报効惟恣奸欺心每挟邪言常近利江西置节制之额务在虚兵浙右创造船之名便其盗用两地推覆按验分明岂可尚佐专城犹居仕籍俾

投荒裔用塞愆尤中外臣寮各体朕意宜除名配驩州充长流百姓纵逢恩赦不在量移之限仍锢身所在防押递送至彼具到日申闻仍路次县给递驴一头并熟食【咸通十年二月】

孔纬荆南节度使制

朕垂衣向明负扆成化内则委辅翼之任外则寄藩屏之臣比用股肱是为心膂况荆衡巨屏禹贡右封南制百蛮西控三蜀或膺统临之命爰崇迭处之荣持危启运保义功臣开府仪同三司守太保兼门下侍郎同中书门下平章事国子祭酒充太清宫使弘文馆大学士延资库使诸道盐铁转运等使上柱国鲁国公食邑四千户食实封五百户孔纬阙里传宗儒林植操出入累更於华贯超升遂陟於鼎司宜成我无为歌我有截岂可但崇朋助罕究否臧昨者张濬首请兴师亲求伐叛且陈计画累赞征行决言旬朔之间兄着殊常之效延英互奏几疑朕言文字继来固违朕志以至干戈一举星纪将周并汾之寇孽未除蒲晋之生灵已尽构兹纷扰职尔披陈罔思惑乱之由坚执比周之计询於舆论曷副旁求今则正罢中枢俾安外阃尚顾始终之念用成进退之宜勉服明恩往祗休命可检校太保兼御史大夫充江陵尹荆南节度观察等使【大顺二年正月】

张濬鄂岳观察使制

昔汉武因恭俭富庶之後建置朔方孙弘沮之十不得一良史以弘有宰相之体诚以爱人治国为先拓境开边为末及孝宣帝值雄才削平之余将议北伐魏相争之五将罢果致中兴号为贤辅况朕承天厌干戈之际人思休息之时敢望臯夔共成尧日庶几孙魏粗及汉年苟异於斯如何倚注光禄大夫守尚书右仆射兼中书侍郎同中书门下平章事集贤殿大学士判度支兼京畿诸道营田修国太庙使充河东诸道行营兵马招讨指挥制置等使河东节度观察处置等使上柱国河间郡开国公食邑三千户食实封二百户张濬早以盛名称为奇士由是再加召用委以钧衡谓其必致小康克胜大任而乃罔思守道但欲邀功是不询之计谋起无名之兵甲自云一举止在旬时坚请抗论势莫能夺轻葛亮渭滨之役小裴度淮右之行而经历寒暄糜费百万虚诞张於朝野诈诡布於华夷横草蔑闻燎原愈急俾拥旄乘駟之使囚於虏庭致勤王奉国之师怀归本土忘廊庙之威重结藩屏之寇讐是使海内生灵竭於贡赋岂独河中郡邑荡为丘墟生此厉阶欲谁归咎呜呼徵晁错之故事仍王恢之旧章国有明文尔当何追尚以爱人以礼治体宜然廉镇剧权武昌善地宜罢轴枢之任仍停度支之司勉自深惟以逃後命可检校尚书右仆射充鄂岳等州都团练观察等使【大顺二年正月】

杜让能梧州刺史制

辅弼之事安危所属大则调陰阳以期昭泰次则抚夷夏以务洽平俾比屋之可封致乃后於无事兆人允赖百辟具瞻苟异於斯则将安用扶危启运保义功臣开府仪同三司守太尉兼门下侍郎同中书门下平章事太清宫使弘文馆大学士延资库使兼诸道盐铁转运等使上柱国晋国公杜让能轩裳贵胄礼乐清门蹈姬孔之康庄迈韦平之閎闕夙推重望早历华资洎陟台司亟更年龠方谓伟儒克承大任而乃首居帷幄轻议干戈弃卿士之臧谋构藩垣之

深衅启询之际证执弥坚果致兵集旬畿人散都邑尚赖祖宗垂佑贤智叶谋启悟朕心别施制命询彼舆人之论咸推上相之尤须示典章用息腾沸尚居列郡式重大臣可贬梧州刺史【景福二年九月】

孙偓南州司马制

勅金紫光禄大夫守礼部尚书安乐郡开国侯食邑一千户孙偓夙通朝籍累践华资窃顾多岐遽隳直道秉弼谐之大政附伎术之小人罔畏公言自为良策处嫌疑而不愧谓宠利之可安而属我艰危匪能匡救顷因丕变亦贷彝章虽罢万机尚分六职是惟循省俾息沸腾观諫臣所上之言陈取戾不已之状则正卿之位非尔宜居将儆後來遂投荒服行当咎已无或尤人可贬南州司马员外置同正员仍令所在驰驿发遣【乾宁四年八月】

朱朴郴州司马制

勅夔州司马员外置同正员朱朴本在寒微偶升科第复尘簪组且列胶庠不为自审之谋但务夤缘之计实因奸幸潜致显荣亦谓术可弭兵学能治国叨半岁容身之贵无一朝辅政之功惟辱中台颇兴舆论斥於散外未絕他肠越法制以有图信愆尤之自作封章所指窜逐尚轻掾彼方州亦云寬典非我好黜惟尔深思可贬郴州司户参军【乾宁四年八月】

王抟工部侍郎制

天地之数寒暑有推迁辅弼之臣任用有进退盖以其宣力斯久克修是亏俾夫退列貳卿式示朝典以礼之道其在兹乎扶危匡国致理功臣开府仪同三司守司空兼门下侍郎同中书门下平章事监修国史判度支上柱国鲁国公食邑三千户食实封一百户王抟始以菲才擢升重位亟移主律蔑効公忠惟务回邪罔思致正紊朝廷之纲纪致经费之空虚而又朋附近臣隳张大体岂可尚持政柄所宜降处周行犹念含弘勉为循省可特进尚书工部侍郎【光化二年六月】

王抟溪州刺史制

勅工部侍郎王抟久司邦计复掌国钧致帑藏之不丰则材谋而安在曾无说正但务回邪尽非變理之心惟是贪婪之志今则罢其大柄复列二卿虽优弘之制已行在问俗之司俾任可谪授溪州刺史所在驰驿发遣【光化三年六月】

王抟崖州司户制

勅溪州刺史王抟久居重位罔着嘉猷掌邦计而罕致丰盈顾私室而惟多贪积虽示朝黜未塞羣情俾从竹使之权许履掾曹之职可贬崖州司户参军员外置同正员【光化三年六月】

崔胤工部尚书制

食君之禄合务於尽忠秉国之钧宜思於致理其有叠膺异渥经执重权遂萌狂悖之心忽构倾危之计人知不可天固难容扶危定乱致理功臣开府仪同三司守司空兼门下侍郎平章事充太清宫使弘文馆大学士延资库使诸道盐铁转运等使判度支上柱国魏国公食邑五千户崔胤奕叶公台蝉联珪组冠岁多升於甲乙壮年位列於公卿趋向有闻行藏可尚朕采於羣议询彼輿情冀有小康遂登大任殊不知漏卮难满器小易盈曾无报国之心但作危邦之计四居极位一无可称岂有都城合聚兵甲暗养死士将乱国经聚貔虎以保其一方致刁斗远连於右辅始则将京兆府官钱委元规召卒後则用度支权利令陈班聚兵士去公朝权归私室百辟休戚在其顾盼之间四方是非系彼指呼之际令狐涣奸纖有素操守无堪用作腹心共张声势遂令滥居深密日在禁闈罔惑朕躬伪行书诏致兹播越职尔之由岂有权重位崇恩深獎厚曾无惕厉转恣睢眦显构外兵将图不轨朕以士庶流散兵革繁多遂命宰臣与之商议五降内使一贡表章坚卧不来拒诏如此况又拘留庶吏废阙晨趋人既奔惊朕须巡幸果见兵纒輦轂火照宫闈烟尘涨天干戈匝野致朕奔迫及於岐阳翠輦未安铁骑旋至围逼行在焚烧屋庐观此阽危咎将谁执近省全忠表章兼遣幕吏敷陈言宰臣继飞密緘促其兵士西上静详构扇孰测包藏无功及人为国生事於戏君人之道委之宰衡庶务殷繁岂能亲理尽将机务付尔主张负我何多构乱致此仍存大体不谓无恩可谪授朝散大夫守工部尚书【天复二年十一月】

裴枢登州刺史崔远莱州刺史制

勅朕谬将眇质叨荷丕图常怀馭朽之心每軫泣辜之念諒於黜陟岂易施行左仆射裴枢右仆射崔远虽罢机衡尚居揆路既处优崇之任未伤进退之规不能屏志安家但恣流言谤国颇兴物论难抑朝章须离八座之荣尚付六条之政勉思咎已无志尤人枢可责授朝散大夫登州刺史远可责授朝散大夫莱州刺史并委御史台催促出京所在驰驿发遣【天佑二年五月】

陆扈濮州司户王溥淄州司户制

勅朕以凉德获嗣丕图将弘至公以凝庶绩宪章不濫赏罚惟宜俾恢理政之风用振纪纲之典其有尝居宰辅但协奸邪苟玉石之未分则稂莠而将茂须行黜责用致澄清吏部尚书陆扈早以文儒亟扬华显自先皇帝议征峻陇而扈确有救论果犯雷霆旋经迁贬其後托茂贞之势援凭阹监之梯媒寻复旧官再升高位惟知周比宁务變和迺来多难罔不由此工部尚书王溥亦茂贞奥主崔胤门人骤历禁闈俄尘袞职但恣诡随之志曾无匪懈之称崔胤既寘严诛而溥独居清列况朕恭承大宝思拯彝伦非为洗垢求瑕但冀惩恶劝善兼宜斥於外掾不容在夫中台尚谓寬恩勉当省过扈可濮州司户参军溥可淄州司户参军【天佑二年五月】

裴贄青州司户制

勅朕闻君臣之间进退以礼矧於耆旧欲保初终苟自掇於悔尤亦须行於黜责特进守司空致政裴贇早以公望尝践台司靡闻竭力以匡时每务养恬而避事洎从请老不谓无恩合慎枢机动循规矩虽云男退乃有後言自为徒薄之魁颇失大臣之体谪居郡掾用立朝纲尚谓过轻所宜自咎可贬青州司户参军【天佑二年六月】

柳璨密州司户制

勅明罚飭法固有彝章惩恶除邪用摅衆怒责授官登州刺史柳璨素矜儉巧每务回邪幸以庸才骤持重柄曾无微效显负明恩诡譎多端包藏莫测但结连於凶险独倾陷於贤良罪既贯盈理须窜殛尚处一麾之独任亏三尺之常刑将塞羣言须行重典自貽颠覆无乃怨尤可贬密州司户参军【天佑二年十二月】

唐大诏令集卷五十八

卷五十九

<史部,诏令奏议类,诏令之属,唐大诏令集

钦定四库全书

唐大诏令集卷五十九

宋 宋敏求 编

大臣

将帅

命将

解琬朔方道後军大总管制

王峻朔方道行军总管制

薛讷白衣摄左羽林将军击吐蕃制

薛讷朔方道大总管制

郭子仪兵马副元帅制

郭子仪东京畿山东河南诸道元帅制李光弼副知行营事制

王思礼北京留守制【阙】

郭子仪兼邠宁鄜坊两道节度使制【阙】 郭子仪都统诸道兵马收范阳制【残】

李鼎陇右节度使制

李若幽朔方节度使赐名国贞制

郭子仪汾阳郡王知朔方行营制

仆固怀恩朔方节度使制

李抱玉河西道副元帅制

马燧浑瑊副元帅同招讨河中制

李晟凤翔陇右节度使兼泾原副元帅制刘洽宋亳兵马都统制

范希朝京西行营节度使制

裴度镇幽两道招抚使制

裴度镇州四面招讨使制

命将

解琬朔方道後军大总管制 苏頲

门下鼓旗中军是推元帅熊罴後劲亦属武臣金紫光禄大夫行左散骑常侍上柱国济南郡开国公解琬学穷经史才蕴韬略握兵之要克壮其猷右领军卫大将军兼检校单于大都护镇守大使上柱国长平郡开国公张知运久镇边庭备详敌势夺劒之勇隐如敌国并师旅是习獯戎所憚陰阳胜负成诵在心山川向背若指之掌寒胶已折秋草具腓宜屯细柳之营俾作兰皋之气琬可充朔方道後军大总管知运可充朔方道後军副大总管并准例发遣主者施行【先天二年九月二十日】

王峻朔方道行军总管制

黄门古者狷狁孔炽匈奴寢骄则设以三策虽属备戎之典方於五材未闻去兵之义不有行者谁能扞之正义大夫行鸿胪少卿上柱国朔方军副大总管王峻倜傥多智坚刚竭节每读前史思齐古人辞家而志灭獯戎报国而躬先将校顷虞南牧城彼朔方萧关洞开沙漠无事既获全军之利则惟保塞之劳嘉其善谋必有成绩昔北逐狄者任专而决亦西护羌者功遂而调用明分阃之重式副齐坛之期朝实金谐尔其懋往可持节充朔方道行军大总管仍兼安北大都护丰安定远三城等军及侧近州军宜依旧列并受峻节制其安北都护府依於中受降城安置兵须足食理籍加屯今正农时务及耕种并缘边兵募亦委量事通融苟非切便即停减总处置乞奏闻即驰驿准例发遣主者施行【开元二年二月初五日】

薛讷白衣摄左羽林将军击吐蕃制

勅弃瑕録用有国通典舍罪责功先王旧式薛讷蕴韬铃之略尝文武之任委以分阃冀静边

尘遽闻丧律实负朝寄准其所犯合置严刑言念老臣寬其小衅既赦孟明之罪伫收冯异之功可陇右道防御大使【开元二年八月】

薛讷朔方道大总管制 苏頌

黄门古之合将帅训甲兵所以宣威武而制边疆也自非栾却之裔孙吴之才何以总中军而絕大漠矣右羽林军大将军上柱国河东郡开国公凉州镇军大总管薛讷家代名将国朝元老知涌泉原气横风厉庙堂之上则寬而有谋旗鼓之间则勇而无挠顷者单于地隔骄子天亡衆已离心魁未悬首吊伐大义既凭推轂逋逃残孽将待覆巢镇於朔陲属我南仲宜持节朔方行军大总管太仆少卿上柱国吕延祚谋虑经远才明决断右威卫将军兼灵州刺史丰安军使上柱国杜宾客三军之雄万人之敌以之入幕孰不师臧曾谓出军肃兹王命宜并充副大总管节度主者施行【开元三年十月十四日】

郭子仪兵马副元帅制

制昔伊尹与汤合傳說与高宗合尚父与周合故哲后良臣莫不至合非贤不义有开必先久大之业也公上略雄才博信明谊受我旄钺辑宁区夏典器铭彝高视前古实邦家之杰岂独为予社稷之卫可独弼予节制咨谋安危斯属惧朕之不称也往惟钦哉司空子仪可兵马副元帅主者施行【至德二年四月十日】

郭子仪东京畿山东河南诸道元帅制

时属艰难用勤师旅元帅之任必藉庙谋苟非人杰孰久朝寄兼司徒中书令朔方节度副大使郭子仪风云有感星象降生秉文武之姿怀经济之器自凶狂构祸区宇未宁蘊忠贞以立身资义勇而成务加其识度弘远谋虑冲深张飞乃万人之敌却穀是三军之帅故能扫清强寇收复二京建兹大勲成我王业虽少康嗣位夏靡赞其功光武中兴邓禹集其事以今观古未足多之但以氛祲未清军戎是急爰求硕德仗以贞师宜承重委克济多难可充东京畿及山东道并河南诸道元帅仍权知东京留守【乾元二年三日】

李光弼副知行营事制

元帅之任实属於师贞左军之选諒资於邦杰自非道申启沃学贯韬铃则何以翊分阃而专征膺凿门而受律求诸将相允得其人司空兼侍中蓟国公光弼器识弘远志怀沉毅蘊孙吴之略有文武之才往属艰难备彰智勇协云雷而经始保宗社之阽危由是出备长城入扶大厦茂功悬於日月嘉绩被於岩廊属残寇犹虞摠戎有命用择惟贤之佐式弘建亲之典必能辑宁邦家协赞天人誓余丹浦之师剿彼緑林之盗载申朝獎爰藉旧勲宜副出车之命仍踐分麾之宠仍与天下兵马元帅赵王系副知节度行营事【乾元二年七月】

【原阙】

郭子仪都统诸道兵马收范阳制

勅朕闻昆夷作患周王授钺於方叔大宛不庭汉主委兵於广利则知昏迷之党舞干不足以怀柔圣哲之谋伐叛必资于用武事将禁暴盖非获已司徒兼中书令朔方鄜坊邠宁等节度使代国公子仪庆锺五百运符鱼水挺文武之宏才蕴韬铃之远略积苍生之重望有命代之元勲负鼎和?已申於啓沃登坛制胜实伫於谋猷万里长城倚赖攸属今残妖未殄戎事犹殷爰资一举之功以靖四方之难宜令子仪都统诸道兵马使管崇嗣充副使取邠州庆朔方路通往收大同横野清夷便收范阳及河北仍遣射生衙卫前六军英武长兴宁国左右威远骁骑等左厢一万人马军三千步军七千人以开府李光进充都知兵马使特进郭崇福充都虞候右厢一万人马军三千人步军七千人以开府仪同三司李鼎充都知兵马使特进王旻充都虞候渭北官健一万人马军三千人步军八千人以开府辛京杲充使朔方留後蕃汉官健八千人马军八百步军七千二百人以兼御史中丞任敷浑释之同充使蕃汉部落一万人马军五千步军五千人以御史中丞慕容兆与新投降首领奴赖同统押充使鄜坊等州官健一万人马军一千步军九千人以摄御史中丞杜冕充使宁州官健一万人马军一千步军九千人以摄御史中丞桑如珪充使泾原防御官健二千人马军五百人步军一千五百人以大将军阎英奇充使蒐乘练卒籍马赋军合四方以齐心率九夷而同力金鼓作气铁骑争雄欲野喷山殷天动地以仗顺之师旅讨从逆之凶徒人事天时指期可定今将略高阙以出云中驱蚊蚋於幽燕扫揜抢於巩洛削平天下混一车书然後献凯清庙策勲盟府尅宁区夏岂不盛与兵马既衆恐路次难为供应仍备六十日程粮十驮遣发马畜草料所在量事支供不得妄有烦扰百姓仍委子仪即遣人先於诸道计会分数次进发仍与固圉兵马椅角相应逐便讨除所开军务应须处置并委子仪续具状奏闻【上元元年九月】

李鼎陇西节度使制

勅勇而多谋是资兼领明则益辨实仗宏才开府仪同三司行凤翔尹兼御史大夫充本府及秦陇兴凤成等州节度观察使保定郡开国公李鼎成用通明智略深远攻守之志不憚勤劳报効之诚无忘夙夜顷以岐阳近甸王业大都爰藉政能委之镇辑下车未几克树奇功寇盗底寧声謠载洽眷兹陇外戎马要冲时属艰虞尤资式遏制胜千里谅在伊人必当振我师徒展兹筹画兼弱攻昧在此行焉可持节都督鄯州诸军事鄯州刺史陇右节度营田等使余并如故【上元二年六月】

李若幽朔方节度使赐名国贞制

保大定功事资於弘量坐筹决胜政总於中军令在必行寇不可玩欲清小丑须委大臣中大夫守殿中监赐紫金鱼袋李若幽宗室英髦士林楨干出忠入孝抱质怀文包果断之深谋蕴韬铃之秘略累登清贯克振休声名正西京奸豪屏息纪纲三蜀邛樊义安庶黎赖其强明缙绅推其利用今河洛之境未殄余氛晋魏之郊比仍多垒山河襟带关辅要冲东尽太行南隣魏汭拥旄亘野精骑成羣必俟元戎以清妖孽静言其选允谓当仁地官高步於六卿亚相作程於百辟综斯剧务朝选攸归宜兼领护之权以副师贞之吉可户部尚书兼御史大夫持节

充朔方镇西北庭兴平陈郑等州节度行营兵马及河东节度都统处置使镇于绛仍赐名国贞【上元元年八月】

郭子仪汾阳郡王知朔方行营制

命将之选当仁实难非夫文可经邦未能安人和衆武可禁暴罔以克敌成功允藉宏才爰申锡命司徒兼中书令灵州大都督府长史单于镇北副大都护持节充朔方节度关内营田度支营田盐池押诸蕃部落副大使知节度六城水运使兼邠寧鄜坊等道节度副大使上柱国代国公子仪河岳间气岩廊重宝器量深识寛而有谋术应通方用而无滞自经险阻实拥旌旄遂能克复二京折冲千里厥戎将殄时乃之功久勤啓沃载竭忠谏人所望也天实赉予今残寇未寧兴师颇广虽镇守经制已有区分而筹画指麾必资专制将军辞第无以家为丞相忧边思平国难固以訏谟之命申总统之威其将戡定外虞澄清列郡光膺藩屏之寄式崇社稷之勲对扬休命以永终誉可封汾阳郡王知朔方河中北庭潞仪沁等州节度行营兼兴平定国等兵马副元帅仍充本管内观察处置使余如故

仆固怀恩朔方节度使制

工部尚书兼御史大夫陇右观察处置等使大寧郡王仆固怀恩经武大才济时良具今以寇穷河洛思用讨除宜辍务於西陲俾廓清於东夏可充朔方行营节度使余如故

李抱玉河西等道副元帅制 常衮

勅周以元老监方伯汉以丞相抚四夷则军国之务中外一体自华阳而西至於陇坂涉河之右兼控五原总三将之师专万里之寄诘禁经武宜有统制忧边谋帅深仗辅臣开府仪同三司行兵部尚书同中书门下平章事潞州大都督府长史知凤翔府事充怀郑泽潞观察处置等使仍充南道通和蕃秦陇临洮已来观察处置等使上柱国凉国公李抱玉文以经邦德以镇俗孝友忠信人伦模表礼乐政刑朝之训式以道匡朕允升大猷参听断之可否载清静以寧一兼委戎旅屏於方夏智谋变化潜合神明将校悦从亲如父子事出韬铃之外功成战伐之前勤劳王家以卫社稷有致君庇人之绩冠旗常彝鼎之铭故以国之凭倚久任忧患兵车之半悉以与之当不惮烦以时镇定也可兼充山南西道观察处置度支营田等使判凉州事陇右怀郑泽潞等州使如故充西南西道河西陇右等道副元帅

马燧浑瑊副元帅同招讨河中制 陆贄

勅天地殊位君臣异制苟不率道兹为乱常退而增修於是有舞干之义谕以迁善於是有文告之辞若犹不悛乃用致讨兴戎动衆岂得已哉李怀光擢自军旅委之节制亟有劳绩累加宠荣总衆骏奔自远赴难解围逐寇朕甚德之位极上台寄崇统帅亲之若同体信之无间言朕於斯人亦已厚矣而器小任重固貽颠覆有功自弃无过自疑崇信谗邪却逐将帅养寇资乱蓄奸幸灾朕素所推诚尚谓非实优容任过坦然如初凶德既盈丑迹弥露谋危社稷通结

渠魁公相往来无复避忌穷极凶悖何所不忍朕播迁巴梁远违陵寝大惧失坠为列圣羞赖先泽在人兆庶知感朔方将校忠节不渝怀光既阻奸谋诡称効顺累陈款疏请诣阙庭朕深惟旧勲务欲全贷授以师傅之任畴其井赋之食玺书劳问誓以终始怀光遂杀辱使臣完聚守备将以悖慢之罪加於忠义之军因兹胁从有异同恶谓衆可罔谓天可欺覆载所不容人神所共弃讨除大憝招辑非辜爰资辅臣以董戎寄银青光禄大夫检校司空平章事兼太原尹北京留守充河中保寧军节度观察处置度支营田等使北平郡王马燧操业端亮气宇弘远秉难夺之节负不羁之才恒持至公深识大体感激而三军有勇弥纶而庶绩克谐威声所临郡邑皆服殿於北土隐若长城元从奉天定难功臣开府仪同三司守侍中兼灵州大都督府长史充灵盐丰夏等州节度管内度支营田观察处置押蕃部落等使仍充朔方军邠寧振武奉天永平等军行营节度兵马副元帅上柱国楼烦郡王浑瑊纯粹积中仁厚成性蘊寬大以容衆存诚信以抚人事必沉详临危益办节惟贞固在险逾彰弘济艰难懋昭勤伐出纳朕命光膺具瞻并文武全才安危注意副我忧矧时惟二臣比德协谋往清多难燧可兼充奉诚军及晋絳慈隰等州节度并管内诸军行营兵马副元帅余并如故瑊可兼河州尹充河中絳州节度观察处置等使仍充河中同絳陕虢等州节度支管内诸军行营副元帅功臣开府本官勲封并如故呜呼朕之不明不敏失於君道连祸未息劳师靡居中心自咎鬱若焚灼又以朔土之衆大着忠劳横遭污胁深所悯惜尔其敬敷朕命明谕朕怀务於招绥非黜威武惟输诚归顺罔有不赦惟执迷拒顺罚止元凶寧失不经无滥非罪列爵悬赏用俟勲贤布告远迩咸令知悉

李晟凤翔陇右节度使兼泾原副元帅制

勅周之元老以分陕为重汉之丞相以忧边见称故方岳克寧疆場不耸安人保泰致理之端今所以重烦上台作镇西土奉天定难功臣司徒兼中书令充神策军节度京畿渭南渭北商华等州兵马副元帅京畿渭南鄜坊丹延等州节度观察处置等使上柱国合川郡王李晟厉精刚之操秉博厚之德识时变通而大节不夺虚受广纳而独断自明奉法持身论功先下衆无犯命人用乐从怀德畏威令行禁止誓羣帅於危疑之际驻孤军於板荡之中气凌风云诚动天地一鼓而凶徒慑北再驾而京邑廓清师皆如归人不知战载安社稷功格皇天而明识秉彝清风激俗雅尚恬旷摛谦有光朕以?陇近郊扶风右地川阜连亘抵於囿中限界诸戎屏藩王室所属诚重允付元臣兼二将之甲兵崇十连之统帅宣威耀德罢警息人俾予仰成时乃之勲可兼凤翔尹充凤翔陇右泾原节度兼管内及四镇北庭行营兵马副元帅改封西平郡王功臣本官兼官勲如故【兴元元年八月四日】

刘洽宋亳兵马都统制

勅论道经邦允归硕望建牙统衆必藉雄才中外具瞻安危注意今以二柄付之元臣开府仪同三司检校尚书左仆射同中书门下平章事使持节宋州诸军事兼宋州刺史充宣武军节度支度营田宋亳颍等州观察处置等使仍权知汴滑宋亳等道都统兵马事上柱国怀德郡王刘洽秉志端亮饬躬简俭博厚足以容衆和易足以长人纯孝荣亲尽忠事国分我阃寄殿於大邦扼制淮夷保鄣楚甸戎捷继至军声载扬殄羣凶於宛丘殛大憝於梁野控引漕挽委

输京师予嘉乃异勲懋乃贞节用锡丕命俾扬洪休燮赞三台纪纲羣帅式是大任尔惟钦哉可检校司空同中书门下平章事依前充宣武军节度度支营田宋毫颍管内兵马都统散官勲封如故

范希朝京西行营节度使制

古之命将帅修封疆在於整军非以耀武故缮理亭障训齐车徒以申国威以固王略非诚节茂着无以分统六师非勲绩彰明无以并护诸将副兹重任实在忠贤特进检校右仆射兼右金吾卫大将军充右街使成纪男范希朝有贞臣之节有良将之风识达武经学综兵要临事能断好谋而成尝领元戎镇於朔野控河上之塞驱漠南之庭修其政刑谕以威德士吏向慕裔夷绥怀入覲京师策勲王府泊司倣卫禁旅增严直道弥彰嘉庸茂着固可以总统北路节制西陲成魏绛和戎之勲振晁错备边之策俾异俗率化穉人成功师乘以和烽堠无警懋昭丕绩时乃之休可开府仪同三司检校左仆射兼右神策京西诸城镇行营兵马节度使封如故【贞元】

裴度幽镇两道招抚使制

门下夫以区区秦伯而犹念晋国曰其君是恶其人何罪况朕均养亿兆为之君亲燕人冀人皆吾乳哺而育之者安忍以豺狼驱胁之故絶其飞走尽纳网罗止行犯命之诛是用开其一面河东节度观察处置等使金紫光禄大夫守司空兼门下平章事太原尹北京留守上柱国晋国公裴度昔者区域之中蜂蚁巢聚蔡有逆孽齐有狡童厥初图征疑议满野不惧不惑挺然披攘苟无司南允罔能济佑我宪考为唐神宗实赖股肱运用心力肆予小子蒙受景灵冀服於前燕平於後而抚驭失理盘牙复生求思弭寧中夕有得国老尚在夫何患焉是用亟宣恳恻之诚就加抚招之命於戏顷者师道元济乘累代袭授之资藉山东结连之势以丞相布画於千里之外使诸将持重於四封之中而犹刘悟裂虵豕之躯李佑溃鲸鯢之腹盖逆顺之情异而忠孝之道明也况彼幽镇无名狂暴以丞相近观其宜以诸将齐奋其力斧鑕之刑坐迫椒兰之气外薰谁不自爱其生焉能与乱同死度宜开怀缓带以待其归可依前守司空兼门下侍郎平章事河东节度使充幽镇两道招抚使余如故

裴度镇州四面招讨使制 元稹

门下传云死者不可复生刑者不可复属是以先王斩一犬彘莫不伏念隐悼至於由时决而行之盖不得已也予於镇人亦既伏念俟其悛革诘止旬时乃命相臣招怀抚谕矜其诬误示以生门期於尽脱网罗岂可驱之陷穽而豺狼当道荆棘牵衣虽欲归於有仁厥路无由而至况王师压境义勇争先朕每抑其锋鋌未忍覆其巢穴是犹爱稂莠而伤稼穡养痍以溃肌肤独怀儿女之仁虑失祖宗之典今上台居镇筭画无遗操晋阳之利兵驱渥产之良马举河东义武之衆合沧景泽路之师当元冀受命之初乘田布雪冤之愤举毛拾芥其易可知兼用威恩尚存招致宜令河东节度使裴度充镇州四面招讨使於戏以一城之卒敌天下之师猖獗之徒抗君父之命我哀尔辈死实无名苟能自新亦冀容汝主者施行

唐大诏令集卷五十九

卷六十

钦定四库全书

唐大诏令集卷六十

宋 宋敏求 编

大臣

将帅

赏功

陇右河西节度使哥舒翰西平郡王制郭子仪中书令李光弼侍中制

李光弼太尉中书令制

滑州节度使令狐彰加御史大夫制

褒劳勲臣制

李晟司徒兼中书令制

浑瑊侍中制

高崇文剑南西川节度使制

李愬移镇加官阶爵邑制

田弘正兼侍中制

李光颜特进赐一子官制

王智兴等加官爵制

王元逵同中书门下平章事制

贬责

薛讷除名为庶人制

赏功

陇右河西节度使哥舒翰西平郡王制

授钺登坛所以理兵用武益封命职所以褒德酬庸才杰者建希代之功绩茂者有非常之赏哲王令典无或踰之开府仪同三司兼鸿胪卿员外置同正员西平郡王判武部事摄御史大夫持节充陇右河西节度度支营田长行转运九姓等副大使知节度事赤水军使上柱国凉国公哥舒翰挺生朔陲干城陇外青蛇入笥神发其祥白武衔珠天资我宝美政以公惠益着深略以果断能成顷者戎大包藏祸盈恶稔南援蛮落东窥塞垣特稟庙谋励八神於金匱长驱戎境麾三军於玉堂决水奔雷固无前敌屠城拔垒靡有孑遗收九曲之旧疆开千里之沃壤亭障卧鼓既成禁暴之勲屯田馈军益以封财之用则议功行赏厚礼酬劳俾吴芮之忠不独光於汉魏绛之乐无擅美於晋仍兼望苑之荣系以公田之锡可开府仪同三司太子少保封西平郡王加赐实封二百户通前满五百户赐音声小儿十人庄园各一所与一子五品官更与两子官用旌元帅之劳以益三军之气也余并如故【天宝十二年七月】

郭子仪中书令李光弼侍中制

朕闻古之哲王成功立极莫不旁求贤佐用康帝道由是轩登风力所以戡乱保邦汉用萧曹所以勤王足国固能上扶王室下济苍生为社稷之宝臣资帝王之大业丕膺鼎位实属斯人司徒兼尚书右仆射同中书门下平章事兼灵州大都府长史朔方节度使上柱国代国公子仪道备文武志怀忠亮表弘才而应运申茂绩而经邦司空兼兵部尚书同中书门下平章事太原尹河东节度使上柱国蓟国公李光弼业盛勲贤材优将相蕴权谋而制敌励诚节以匡时往属凶丑乱常云雷经始咸能外持戎律内翊皇图披荆棘而有功历险艰而无易或分麾东讨扫昏秽於两都或仗节北临备长城於万里并以扫清寇孽任切股肱永维缔构之勲久着山河之誓今残妖伫剪介士犹虞将终九伐之功实藉二南之力是用增其秩序宠以枢衡宜正位於台司俾克宣於嘉绩子仪为中书令光弼为侍中【乾元元年九月】

李光弼太尉中书令制

上公之位宠极人臣中书之本政先纶綍是知应乾成象用分台鼎之司为国作桢必藉勲贤之业所以汉庭多难绛侯居太尉之尊晋室未安温峤掌中书之务至若任兼公相道济生灵必俟非常之才用膺莫大之寄司空兼侍中幽州大都督府长史河北节度度支营田经略等使副元帅知诸道节度行营上柱国蓟国公光弼器格沉正襟灵邃远感风云之密契蕴纵横之大才成经纶之功足以靖乱怀忠孝之道故能匡国自逆寇构祸寰宇未清义勇竭於忠心勲庸着於王室顷者豺狼余孽尚藉天讨蚊蚋相依仍侵河外是用仗其深略为我长城有穰

苴之法令亚夫之威略远能挫羣凶之銳全百胜之师为庙堂之宝臣成军国之重任虽吉甫作宪道可经邦而孙吴行兵谋能制敌克壮大业无愧前贤且官惟其人固难虚授爵以存善抑闻旧章况经纶之时义參於締构艰难之际功茂於始终不有殊獎寧彰厥德是以载酬嘉绩俾允具瞻宜进上台之秩仍兼右弼之宠可太尉兼中书令【乾元二年十二月】

滑州节度使令狐彰加御史大夫制

使持节滑州诸军事守滑州刺史摄御史大夫充滑卫相魏德博六州节度使令狐彰义勇无伦忠贞有素艰危効用终始不渝顷陷贼庭忠诚屡达来持汉节壮志弥高拔城变六月之师破敌振三军之气酬庸议赏须越等夷今淇澳未寧河朔犹梗廓清丑类实属元戎宜列职於中司俾承荣於茂秩登坛受律藉尔良谋献凯论功伫闻嘉绩可银青光禄大夫守鸿臚卿使持节滑州诸军事兼滑州刺史御史大夫充滑卫相魏德博等六州节度使【上元二年九月】

褒劳勲臣制 常衮

勅方伯连帅能修其职则劳之以玺书载之於正典式是羣岳归於至公以勤其职颂声兴矣周礼以孟春之月悬法布令采诗观俗亦褒异理行之时也其有惠训一方吏之表率朗然明举固可首之某官某受任藩阃三年有成清节独立以身率下化在於言前风行於疆外远清西南之氛齐一华夷之俗而忧国如家上下同体属关辅连雨去秋非穰以丰财节用之余资备边出师之费虽给马官渡足食成臯勤王助边何以加此诚堪垣翰之寄奉上无私亦将廉吏清风夙夜相勉也寐期休绩至于再三诏书谕怀宣示方镇

李晟司徒兼中书令制 陆贄

勅云雷构屯?县兴难非山岳降神不生良弼非股肱协契不集大勲故高宗得傳說中兴殷邦宣王任吉甫重光周道天宝之季寇阶二京时则先臣子仪翼戴肃宗戡定患难再造区宇於今赖之肆予小子获纘丕构不克负荷失守宗祧天祚我唐降生忠烈有社稷之臣曰开府仪同三司检校尚书左仆射同中书门下平章事充神策军节度使鄜坊等州节度观察处置等使京畿渭南渭北商华等州兵马副元帅上柱国合川郡王李晟沉肃有勇坚明能断闻难发愤誓师徂征诚激於衷义形於色自河之南万里济师殷然雷奔大盜慑骇属王家不造戎师诱奸重兹播迁郊甸震荡而晟蓄銳养士深垒固军以谋吞元凶以义纠羣帅躬擐甲胄率先启行布忠信为军声恃礼乐为战器廓清氛沴寧复皇都宗社载安宇宙斯泰佐予兴运时乃茂功德厚者位崇业盛者报重登以元辅建於上公熙庶绩而翼宣九歌阜兆人而敬敷五教畴其并赋貽厥子孙与国咸休永播丕烈可守司徒兼中书令仍赐实封一千户余并如故朕还京後所司择日备礼册命宣示中外以彰大勲

浑瑊侍中制

勅王者敦德教以经邦国兴武事以定祸乱执是二柄毗予一人得诸全才康济大难以忠扶

王室以义奉天讨功崇祚土德盛懋官振扬洪休备举彝典开府仪同三司检校尚书左仆射同中书门下平章事兼灵州大都督府长史充灵盐银夏等州节度管内度支营田观察处置押蕃等使朔方邠寧振武奉天永平等军行营节度副元帅上柱国楼烦郡王浑瑊神降才杰天资忠厚协力兴运为国辅臣往以盗起上京驾急出狩羣凶怙乱载犯郊畿时乃奋扬威武董制师律深居筹画奸慝寝谋当敌指挥士旅增气危城克固我武用张重以贼臣蔑恩养寇资乱再罹艰阻越播巴梁时乃并轡载驰释羈从迈有见危致命之节有忧国灭私之诚凜然贞规介若金石纵横蘊夷难之略感激陈复国之谋分摠偏师径出重险秉大节以示羣帅布寬令以宥胁从师次远郊摧凶靡抗军临近甸下邑如归推成功而不居期尽敌以自効率其全衆扬旆追奔雄威疾驰元恶授首柔德怀服余党归心扫辟氛昏安复陵寝懋乃嘉绩其惟格天士燮之让能耿弇之殄寇摠是二美城其有焉是以铭勲旗常垂美竹帛宜守台阶之列仍酬井邑之赋祇膺时命无替厥庸可侍中仍赐实封八百户兼官本使副元帅开府勲封如故

高崇文剑南西川节度使制

庆赏刑威所以为国既用钺以诛有罪则建侯以报有功惩纲纪於未然劝事君於已着历考前载斯为大章剑南东川节度副大使知节度事管内度支营田观察处置静戎军等使开府仪同三司检校兵部尚书使持节梓州诸军事兼梓州刺史御史大夫上柱国渤海郡王高崇文为时生材经武成器抱厥沉断确乎坚刚鸞隼挺凌厉之姿高秋凝肃杀之气自筑坛受命宜社徂征形义色以即戎沥忠诚而誓衆康衢以视其重阻怒心如报於私讐令踰风行势辍电走殄凶邪於未障完危壁於将倾然後摠无前之师搏犹鬪之兽仰断飞鸟高横战锋掩鬼神以用奇越丘陵以制胜生致逆?洞开金城引汉将之旗鼓见蜀川之父老贞以纪律吊其伤残兵无乱行市不改肆上清井络下静岷江铭而篆之岂有惭德乃眷庸部其惟奥区毕功以除其祸灾图劳宜享其土地涤荡污俗纯綏异行观风励韩黄之化按节修方召之任爰自六职俾登三司仍疏大封且赐实食不踰次以彰殊伐不踰时以示休利敬服嘉命弘宣壮猷殿兹坤维屏我王室可检校司空兼成都尹御史大夫充剑南西川节度副大使知节度事管内度支营田观察处置统押近界诸蛮及西山八国兼云南安抚等使仍改封南平郡王食邑三千户并实封三百户

李愬移镇加官阶爵邑制

伐叛除凶必俟乎奇略进封超位允答於殊庸况四纪逋诛三州窃据积妖遗育纵逆延灾累年徂征一举坐致论功既归於异等议赏岂待於踰时唐随等州节度观察处置等使通议大夫检校左散骑常侍使持节邓州诸军事兼邓州刺史御史大夫赐紫金鱼袋李愬宗臣之胤王国克生毅勇蓄深温良煦外礼乐战之器默识其源诗书义之府洞窥其室虽早昇朝序而未展将才顷以悬弧滔天宿兵既久方城压境易帅颇频永怀韬略之家必有弓矢之嗣乃执金鼓载持干旄果副眷求克扬威令缉夷伤之後振法为雄制密迹之间保危成固推忠孝以感物本信惠而和人一其鬪心制彼死力乘虚径袭负雪兼行风驱如合於百人雷震若出於九地坚城立溃狡?生擒遗氓安堵以知归余党释甲而请命古之良将其孰过焉己申献捷之

仪当举策勲之典爰授名郡俾牧重藩自洛而遥惟襄为大绵亘楚服横临渔津摠八郡以澄清秉三军之节制式因加地往继沉碑特进左揆之尊以崇天秩仍假南台之长用峻霜威表以勲阶锡之茅土户封真实门贵延恩给此宠荣藁於茂烈於戏天鉴非昧不庭者必诛王爵无私有功者是享扬名继美惟孝着於家声钟鼎山河惟忠光於国籍凡曰臣子得无企欵可银青光禄大夫检校尚书左仆射使持节襄州诸军事守襄州刺史御史大夫充山东南道节度管内度支营田襄邓唐随复郢均房等州观察处置等使仍赐上柱国封凉国公食邑三千户赐实封三百户与一子正员五品官【元和】

田弘正兼侍中制

古之所谓有功诸侯出征不庭入覲王室既展述职之义必加锡命之恩彤弓所以表其威玄衮所以荣其服然後勲烈昭灼宠章荣崇临於一方示彼四国风雅所载不其美欵戎思忠臣是有兹命魏博等州节度观察处置等使光禄大夫检校司徒同中书门下平章事兼魏州大都督府长史上柱国沂国公食邑三十户田弘正受天地之正性明君臣之大节才贯文武识探古今熙百志以立身坚一心而奉主积诚自久遇事乃彰晓於羣情率以大顺遂提六郡之地首革两河之风及负海阻兵徵师问罪又能长驱义旅直抵虜城一鼓而凶徒褫魄再战而元恶传首永清夙沴功实倬然自秉圭来朝鸣玉入侍察其器度询以谋猷每闻匡国之术弥见致君之道而恳诚恋阙不愿守藩朕以将相之权中外一体苟意有攸往则诚难遽从况彼邦之人皆愿其至师徒久服其训令黎庶咸思其惠和镇安之方倚赖攸切是用命尔式遄其归且兼八舍之营俾仍五教之重又实其井赋益以土田褒赏之典劝忠斯在往莅乃服厥惟懋哉可检校司徒兼侍中依前魏州大都督府长史充魏博等州节度观察处置等使仍赐食实封三百户【元和】

李光顏特进赐一子官制

朕闻有天下者道德仁义以为理城郭濠池以为固故曰不教民战是谓弃之有备无患何以应卒此先王毆攘夷狄保障黎元之大略也五原居宥夏灵庆之中当虵豕豺狼之突将搯咽喉之要爰命腹心之臣厥有成功宜加茂典邠寧庆等州节度观察处置等使金紫光禄大夫检校司空使持节邠州诸军事邠州刺史兼御史大夫上柱国武威郡开国侯食邑二千户食实封一百户李光顏气敌三军心师百行有卞庄之勇守之以仁有日磾之诚济之以武叱咤则风云回合筵宴而樽俎周旋盖文武之全才直古今之良将是以淮蔡之役百胜功高青齐之师一面居最朕以萧关尚警马岭犹虞五饵之诈可羞百雉之防爰度先是属役每难其人惟尔良能果谐予愿程功而不愆於素讫事而不劳於人比命有司褒乃实力金曰古诸侯勲德优盛则就加特进以宠之我国家封植崇重则朝请一子以异之予嘉乃勲兼用两者兹谓上赏尔惟欵哉可特进余如故仍与一子正员四品常参官【元和】

王智兴等加官爵制

王者诛暴乱赏勲劳既正纪纲式颁爵位朕以菲德理乖胜残使衅生海盗刑用戎钺属者庭

奏倚沧州为辅车以谋专土同捷恃棣州为屏扞遂成阻命实赖英帅共恢壮猷爰议酬庸式
獎宣力武寧军节度徐泗濠等州观察处置等使充沧州行营招抚使光禄大夫守司徒同中
书门下平章事上柱国太原郡开国公食邑二千户王智兴可特进仍封代国公食邑三千户
余如故平卢军节度使淄青登莱棣等州观察处置兼押新罗渤海两蕃等使银青光禄大夫
检校尚书右仆射御史大夫上柱国会稽郡开国公食邑一千五百户康志睦可检校尚书左
仆射余如故太平军节度郢曹诸军事兼郢州刺史御史大夫赐紫金鱼袋崔弘礼可检校尚
书右仆射余如故其棣州城下武寧军及诸道立功将士除已甄録外委智兴条疏闻奏棣州
应见在百姓宜复二年其将士有决战攻垒奋不顾身中刃被创遂成废疾者并赐衣粮终身
勿絶其武寧军及平卢军浙西宣歙天平等五处兵马在棣州城下者并宜放归本道於戏并
命申威分疆剪寇界大河之南北委藩守以廓清立绩者既以劳旋图功者方期尽敌勉弘朕
策无至老师共臻辑寧副我勤厉【元和二年十一月】

王元逵同中书门下平章事制 李德裕

门下古之命帅必重其名假三事之崇允万夫之望故韩信以丞相击魏樊哙以相国伐燕克
成茂勲抑有前典成德军节度镇冀深赵等州观察处置兼充北面招讨泽潞等使金紫光禄
大夫检校司徒兼镇州大都督府长史御史大夫驸马都尉云骑尉王元逵生稟忠厚天资诚
信奇正得於心机严庄表於师律去病之略无假孙吴翁归之才实备文武属狡童逆命自固
奴巢果能扬义声以载驰繇直道而先奋锋逾骇电势盛疾雷上据层峦削成烟垒下临平壤
尽见秋毫始殄伏莽之戎遽收建瓴之险陈兵原野渐扼尧山摧困兽之鬬心碎螳螂之怒臂
弃身者万计折首者七人先献戎俘益彰臣节则令望王师之阵草木为兵闻吾帅之风椒兰
比德顾其残孽岂复稽诛夫赏不踰时速之为贵虽契敷五教已列三公而禹分兵麾宜佩相
印是用命尔升於鼎司於戏昔吴起有大功者三不为魏相窦婴破藩国者七未践汉台岂非
名器之重曷尝虚授尔其奋扬威武殲厥渠魁当感激以成功勿迁延而玩寇服兹休命可不
敬哉可检校司徒同中书门下平章事兼镇州大都督府长史依前充成德军节度镇冀深赵
等州观察处置兼充北面招讨泽潞等使散官驸马勲如故主者施行【会昌】

贬责

薛讷除名为庶人制

出师不臧本於丧律责帅归罪闻於记言薛讷顷者总戎御边建议为首暗於料敌轻於接战
张我王师衄之寇境偏裨失节乃斯令之不明中军靡旗则厥谋之不振况雁门斩级魏尚岂
得论功马邑亡韜王恢必闻议罪进退之咎典刑攸属且观其畴昔颇尝输罄每欲资忠报主
见义忘身傥曹沫不死於辱终能自奋秦赦孟明之败汉从李广之赎古尝有矣朕每怀之特
缓严科俾期後效宜放其罪所有官爵并除削【开元二年七月】

唐大诏令集卷六十

卷六十一

钦定四库全书

唐大诏令集卷六十一

宋 宋敏求 编

大臣

尊礼大臣

魏公寂已下奏事侍立并升殿诏

郭子仪号尚父制

杜佑每月三两度入朝商议军国大事制裴度平章军国重事三五日一入中书制

异姓王

封五王制

册张柬之汉阳郡王文

册崔玄玮博陵郡王文

封魏伯玉阳成郡王制

封辛果京晋昌郡王制

封王景崇常山郡王制

异姓妃

册崔玄玮妻为博陵郡王妃

册三公

册无忌司空文

册郭子仪尚父文

册李晟司徒文

册李晟太尉文

册马燧司徒文

册裴度司空文

册李德裕太尉文【残】

册杜让能太尉文【阙】

尊礼大臣

魏公寂已下奏事侍立并升殿诏

贵爵尚齿历代通规进秩优贤有国彝训尚书左仆射魏国公寂太子少保新昌县公网左武侯大将军陈公抗太常卿沛国公元璿纳言汉东郡公叔达内史令宋国公瑀兵部尚书蒋国公通民部尚书荥阳郡公善果右武侯大将军罗候御史大夫滑国公无逸等或历任前代职位隆显或耆年夙望德迈老成翊戴经纶功绩茂重或夷险契濶情兼惟旧并职司近侍任兼心膂恩礼所加义从隆渥特宜褒异俾越常伦寂已下奏事及侍立并令升殿【武德二年二月】

郭子仪号尚父制

轩皇致治必资力牧虞舜为政实赖臯陶苟无师臣岂登仁壽故吕望辅已成之业指挥致维师之名伊尹出空桑之中翼赞负阿衡之号司徒兼中书令河中尹灵州大都督单于镇北大都护充关内河东副元帅朔方节度关内度支盐池陆地水运大使押诸番部落兼管勾河阳道观察等使上柱国汾阳郡王山陵使食实封一千九百户子仪气膺台辅道佐经纶当乾坤交泰之时正君臣定位之礼我肃宗皇帝龙飞灵武剪灭鲸鲵公则扬旆宣威佐清六合我大行皇帝抚军巩洛收复都邑公则摧殄寇涤秽两河而又猗猗戎共侵经略公则挺身锋刃独立战塲叱退穷丑威雄七萃塞垣无警社稷永康朕遭凶戾在谅闇公又外厘百揆内举四维委监山陵克修制度万枢倚办庶绩其凝凡所询谋必竭寅亮敬加典礼则率土欢心寄以缉熙则彝伦式序弘宣五教训洽生灵光照七德威肃祸乱岂周武有尊师之道朕无崇德之名宵衣永叹夕惕增怀虽年耆益明辕门待镇然复上寄重留藉毗倚可加号尚父兼太尉

中书令山陵使勲封如故仍加实封通前满二千户每月给一千五百人粮料并给二百疋马草料有司备礼以时而册命

杜佑每月两三度入朝商议军国大事制

卿量包久大器茂冲和事君推一德之诚与物全四时之信登于台阁则万事问於胡公守在方隅则四方宗於申伯举其实行是可专徽顷者殷忧在辰总叙攸重金瓯作镇羣情穆然玉铉是司庶官咸事朕涉理犹浅惟贤是图遽陈请老之章将辍弼谐之道一一省览良用恍然用舍之间慎重斯在谓雅节之难夺岂予衷之可移是用徵上德之前经酌优贤之故实去繁就简勉以职业之勤置几乘车优其筋力之礼卿宜起今已後每月之内常三两度入朝使至中书商量国事亦异延於内殿沃朕虚心如此则居多暇辰退可以吐纳颐志入参大政进可以偃息藩君灵壽将置於上庠桑梓岂违於下社卿仍以朕此意宣示百寮庶乎君臣作合之期乾坤交泰之仪无愧前烈永贻後昆致政之词即宜断表

裴度平章军国重事三五日一入中书制

昔汉以孔光降置傅之诏晋以郑冲申奉册之命虽优隆耆德显重元臣而异政不及於咨询用礼独在於安逸朕勤求至理所宝惟贤顾諟旧劳敢不加敬由是委宰执於大政释参决於烦务时因听断诚望弼谐迁秩上公式是殊宠特进守司徒兼门下侍郎同中书门下平章事充集英殿大学士上柱国晋国公食邑三千户食实封三百户裴度禀河岳之英灵受乾坤之间气珪璋特达城府洞开外茂九功内色一德器为社稷之镇才为邦国之桢故能祇事累朝宣融景化在宪宗时扫滌区宇尔则有出车殄寇之勲在穆宗时混同文轨尔则有参戎入辅之绩在敬宗时阜康兆庶尔则有治国庇人之勲洎弼朕躬总齐方夏尔则有吊伐底寧之功皆不遗庙筭布在简编功利及人固不可悉数而朝论益重我心实知方用咎繇之谟适值留侯之疾沥恳牢请备列奏章塞诏上言动形顔色果闻勿药之喜更候调鼎之功而体力未和音容尚阻不有优崇之命孰彰宠待之恩宜其首赞枢机弘敷教典论道而仪型卿士宣德而镇抚华夷嗇养精神保綏福履为国元老毗予一人可司徒平章军国重事待疾损日每三日五日一度入朝中书散官勲封如故仍令所司择日备礼册命

异姓王

封五王制

门下建侯之典岂独於懿亲茅土之荣必覃於茂绩侍中上柱国开国公敬晖侍中上柱国淮南郡开国公桓彦范银青光禄大夫守中书令兼修国史上柱国汉阳郡开国公张柬之银青光禄大夫中书令博陵郡开国公崔玄暉中书令兼检校安国相王府长史上柱国南阳郡开国公袁恕已等早竭忠谏夙罄腹心在身喻於股肱在物均於舟楫除凶而殄逆更安社稷之基荣命而褒崇爰申建侯之宠敬晖可封为平阳郡王彦范可封为扶阳郡王仍赐姓韦柬之可封为汉阳郡王兼特进勲及食实封各如故玄暉可封为博陵郡王恕已可封为南阳郡王仍

令准例朔望朝参便即不须推让主者施行【神龙元年五月十日】

册张柬之汉阳郡王文

维神龙元年岁次乙巳五月【阙】朔十五日【阙】皇帝若曰咨古者之命官也有德尊以爵有功尊以禄用能百揆时叙庶绩其凝详其建利之迹也异姓则鬻熊封之於楚宗子则召奭宅之於燕惟皇作极率由前典咨尔银青光禄大夫中书令监修国史汉阳郡公张柬之効祉星辰资灵川岳负佐时之略有经邦之材以忠孝为已任以仁义为事业顷者巨猾未殄常思克清一朝奋臂二凶行翦竟燃脐於东市终挂胆於西州遂得圣祚中兴皇运光启乾坤再辟日月重明刑白马而书功未足云答指青山之比砺曾何足酌是用命尔为特进汉阳郡王尔其靖乃职咸允具瞻使厚秩尊官永全於长代春兰秋菊无絶於终香往钦哉可不勉欤可不慎欤

册崔玄暉博陵郡王文

维神龙元年岁次乙巳六月乙酉朔六日甲寅皇帝若曰咨德茂之官功茂之赏万古常行之则千载不刊之典故三十一之啓汉二十一之中兴或举河朔如拾遗或取秦陇犹偃草结丹青之誓莅白马之盟祚土包茅与洪河而永固分珪锡社共天壤以长隆缅考旧章率由此道尔中书令上柱国博陵郡公崔玄暉夙负雄图早怀英毅蘊公辅之量有王佐之才顷者元凶构奸图危社稷遂能怀忠抱义奋不顾身重道轻名意全王室艰难既济家国永清勤亦至矣功亦大矣昔赏及於鬻熊聿封於楚功尊於臧紇乃建於燕异姓分王抑惟前典宪章故事畴庶载功是用命尔为博陵郡王用旌诚効宣其忠节松竹无渝往钦哉汝谐可不慎欤

封魏伯玉阳成郡王制

门下建尔茅社所以亲诸侯加以金紫所以封异姓盖章叙之旧制必选功而茂赏开府仪同三司检校工部尚书兼江陵尹御史大夫充荆南节度观察处置等使上柱国芮国公魏伯玉性与弘毅识资冲远公直不挠智谋尤深忠厚可移文武是宪幼读坟典素已知名於国庠晚藉韬铃因効策於戎幕累膺将帅之重积有艰钜之勲殫力事边乃诚王室伏波料敌每合我心司马理军差强人意自荆门作镇式是南邦九江孔殷三楚之会澄清节制实得专征而讲求政理开示恩信既爱人而省刑将息马以论道寬而有制令协於师贞简则易从风行於刺举疆事宁宴厥功茂焉二等之荣允兹馭贵宜锡褒封之命俾光优异之礼可封阳城郡王食邑三千户余并如故

封辛果京晋昌郡王制

门下关内河东副元帅左厢兵马使同朔方节度副使开府仪同三司试太常卿兼御史中丞上柱国萧国公果京文武成器公忠立节副旌麾於戎府戒士马於辕门纵横有谋沉毅多勇守能重固战必先登弘变通以制用崇取胜之嘉绩勤王忧国历险不渝奉职在公始终无

替封建之制率由旧章以功诏爵议赏从重宜分茅於二等俾有国於千乘可封晋昌郡王食邑三千户

册王景崇常山郡王文

维乾符五年岁次戊戌十二月壬戌朔三日甲子皇帝若曰朕闻尚德尊贤九命有专征之典论功锡爵四封标列国之荣睠惟硕臣统兹巨屏茂勲克树殊宠未升爰增疏土之恩式表类能之重成德军节度使镇冀深赵等州观察处置等使开府仪同三司检校太尉兼中书令镇州大都督府长史上柱国赵国公食邑三千户食实封二百户袭实封一百户王景崇德星垂耀嵩岳降神抱匡君济俗之宏才蕴武库文房之重器智逾炙輶利比决云运协祥符怀茂先之博识道高时杰同季野之阳春临戎克布其恩威命代荣彰乎经济惟乃祖称名光简书正气冲霄忠诚贯日永言勲绩着美华夷承家得馭衆之方共理契无为之化成吾心膺藉乃栋梁加以政治兵农惠分黎庶俾貔貅之衆敬若神明襁褓之徒爱如父母况位升台鼎绩着翰垣华贤复异於陈蕃显秩尤光於朱宠更举封齐之典冀同继越之尊於戏启金縢於周公剪桐圭於康叔皆昭彰前史蔚着殊庸况今荣耀八紘富居千乘式兹优异尚此渥恩往惟钦哉敬服厥命今遣使给事中柳韬副使吏部郎中赵秘持节册尔为常山郡王

异姓王妃

册崔玄暉妻为博陵郡王妃文

维神龙元年岁次己巳六月乙酉朔六日庚寅皇帝若曰咨夫母以子贵妻以夫荣闻诸通古列在方策惟尔博陵郡王崔玄暉妻卢氏筮惟福胤归乃庆余备嫔诗礼夙擅言辞断织捐金通母师之雅训采苹铭菊遵女史之明规向时王室艰难逆臣构祸敬暉等忘家殉国剪暴诛凶二曜重朗万姓相欢爰命酬庸聿予茂赏大名隆器已锡於所天徽号宠章宜覃於齐体今遣银青光禄大夫行尚书右丞上柱国苏瓌副使通议大夫守太常少卿韦叔夏持节賫册於是命尔为博陵郡王妃尔其无违藩守务於和理而使家可长久圣人重之可不美欤敬之哉

册三公

册齐国公无忌为司空文

维贞观某年月日甲子皇帝若曰於戏开府仪同三司齐国公无忌设官分职允代天工致治兴邦实资台辅永览前哲咸在得人故能成寅亮之功弘燮理之业惟尔识宇冲邈风范光昭才称栋干器惟瑚璉协赞皇基克隆鼎业譬彼舟楫同兹鱼水任重礼闈则机衡以穆位班职袞则风雨不愆固以同轨前烈齐声往彦褒德美功有国常典经邦论道金曰尔谐是用命尔为司空往钦哉其光膺宠命可不慎欤

册郭子仪尚父文

维大历十有四年五月甲午皇帝使金紫光禄大夫尚书左仆射彭城郡开国公摄太尉刘某持节册命曰惟尔太尉兼中书令汾阳郡王某其听命於戏上天孚佑下民若保赤子弗俾罹於毒螫伊昔殷辛秦季万姓愁苦时则有太公望留侯良毗武翼高为之请命若颠覆而跻执热斯濯其在天宝至德之际二叛称兵犬戎孔亟则公投袂电赴扞我於艰方其忧乱化为安靖然後變和徐进清广安和繫公之勲盖於张吕矣悯予小子哀?在疚公又熙帝之采纳於轨度小大谋猷罔不率服朕实赖公羽翼为师为保岂齷齪常典拟於春秋之褒今故特册公尚父之号钦哉公左右三朝年与德耆尚迪古训匡予不及节顺风雨参知鼎实天人之任将以仰成公其念哉惟公克享黄髮优游广堂颐神导和克绥予任勗哉尚父敬听话言用成其明德钦哉光膺宠命可不慎欤

册李晟司徒文

维年月日甲子皇帝若曰粤惟上天眷佑我唐赉予元辅戡夷逆乱宣振忠贞光昭永图奋扬丕烈今敬从典礼彰信於朝咨尔开府仪同三司检校尚书左仆射同中书门下平章事合川郡王李晟希代特生乘时间出高明稟忠厚之桢故得拥旌幢徇於封略旋师中冀讨孽上京一鼓而凶魁电窜皇居乃正清广重安大效展於邦家大惠孚於黎庶武昭七德文洽九歌俾予一人潜复丕业抑闻功茂茂赏义在酬庸德茂茂官理在翊善尔既忧勤戮力端明一心申之以武功重之以文德是用稽之旧制册命尔为司徒宜亮采台庭光融相府叙彝伦於九牧凝庶绩於百工祇率典章阜成邦教膺兹景命可不慎与

册李晟太尉文

维贞元元年岁次丁卯四月乙卯朔二十四日戊寅皇帝若曰在天成象三辰耀其景在地成形五岳峻其位古先哲后罔不宪章故则天之明因地之利建官自辅论道经邦配六符於太阶运七政於皇极无其才则礼阙有其德则荣升爰自唐虞率由斯道故久虚上台之坐以俟其人载怀勲贤聿归元老咨尔奉天定难功臣司徒兼中书令上柱国西平郡王食实封一千五百户李晟天授明德为时栋梁应期挺生佐理戡难作我英宰保大定功浑忠义以居心等夷险以为体魏郊伐叛申肃杀之威汉苑摧凶树廓清之效宫城遂复庙社攸安三辅释涂炭之忧万国允朝宗之愿及夫藩镇政下黎献昭苏绰棱威於接境阜农耕於裔壤钦若朝政橐戢干戈弼予一人永清四裔聿怀丕茂之绩式崇光大之勲是用命尔为太尉惟其敬之哉且德盛故礼殊功高故赏茂爵极九命华贯三台持华歆养德之规保荀觐清纯之道具瞻斯在可不慎之

册马燧司徒文

维年月日甲子皇帝若曰昔有虞之帝天下也契作司徒诞敷邦教五常以迓百姓斯亲其在郑友翊亮於周邓禹宣猷於汉亦皆以德当国以勲持令天赞我唐允生忠辅出则拥旌定乱重其望以成功入则调鼎登庸资其实而论道再新兹典荣命攸宜咨尔检校司徒兼侍中北平郡王马燧岐山粹灵桢我王国明谋炳於蓍蔡雄略极乎韬铃文武在躬刚柔备体钦崇一

德期协阿衡故能受命专征作我心膂扬旌仗钺外镇雄都正师律以寧边宣国风而抚俗华夷式叙朔塞无虞崇其大勲谦德弥着懿兹茂范实简予衷昔贞观初戡定羣雄拯寧庶类有若赵国公无忌外运夷凶之功内申翼善之谋陟居中台鬱为时栋今予亦命尔光赞大猷是用册尔为正司徒宜祇厥位九功不叙咨尔缉熙五品不昭咨尔寅亮予违汝弼无或面从式宣励翼之诚允副宠光之命具瞻斯在可不慎欤

册裴度司空文

维年月日甲子皇帝若曰三台罗列以承斗极皇王取象以建三公时以调陰阳义万国论道兴化与天地参故职官物采不足以昭章物数於是有明庭册拜清庙谒见之礼以尊异之咨尔金紫光禄大夫守中书侍郎同中书门下平章事兼淮南节度副大使知节度事晋国公裴度有文理有武功有直声有忠节弘深如大浸峭拔如乔岳爱人如慈母宰物如权衡师儒术於素王授兵符於黄石百行九德叠於其躬先皇以上圣之资啓中兴之运咸有一德时惟汝谐召云唱吕受翥施弘翊助神筭底绥四方大旆东摇淮夷荡定长策独运全齐以平解纷消慝无小无大去权树善或显或晦非可以造次详非可以一二计肆予小子昔当守器休功令问充溢听闻逮此纘承委重藩镇达经国之大体有事君之小心知无不为功多不伐可谓社稷之元老经济之宏材者也予嘉乃勲懿乃德庸建尔於上公尔惟省厥初念厥终任天下之安危为夷夏之表式俾先帝之鸿业休德不坠於地俾予一人实受其福於戏敬哉

册李德裕太尉文

皇帝若曰惟天育生物必极其毒而後臻於和惟君保天禄必登厥德而後底於道我国家达皇图焯鸿业二百三十祀祖宗储休俾予嗣厥位祇若天地绍古之训惟贤时念乃有冢臣光禄大夫守司徒兼门下侍郎同中书门下平章事充弘文馆大学士太清宫使卫国公李德裕佐予一人抚四夷亲万国文以和政武以寧乱呜呼尔有?义却金之操不渝於险易尔有移忠匪石之志可荐於宗社故剪吾欲以康务沃朕心而成德日者狐星耀芒朔汉之人若坠沸鼎惟尔总合智力扑其氛焰盗萌蠹本牙角灭息孽?扇祸构衅闭险聯锋赵魏淮潞五州之人是莫不有其生於旦夕惟尔协予一人经是七德决自樽俎发如雷电风后之握机成阵密比轩皇羊祜之沉谋制胜玄同晋帝修德刑为战器闋礼乐为身文虽其功不【以下原阙】

唐大诏令集卷六十一

卷六十二

钦定四库全书

唐大诏令集卷六十二

宋 宋敏求 编

大臣

册国公

册高士廉改封申国公文

册李积改封英国公文

册程知节改封卢国公文

册侯君集改封陈国公文

册段志玄改封褒国公文

册羣臣

册张允恭鄯州都督文

册唐临吏部尚书文

册段宝玄越州都督文

册乔师望凉州刺史文

册阎立本工部尚书文

册李寬太子詹事文

册李义府司列太常伯文

册刘伯英左监门卫大将军文

册窦元德司元太常伯文

册许圜师左相文

册薛孤吴仁右金吾卫大将军文

册许敬宗太子太师文

册张延师左卫大将军文

册国公

册高士廉改封申国公文

维贞观某年月日甲子皇帝若曰於戏昔周建五等汉班六条经邦之制既弘载祀之祚惟永是以樊侯申伯功成藩翰乔卿叔节绩宣制举惟尔特进吏部尚书许国公高士廉识宇弘正风监秀澈地惟姻戚才称栋干云雷在三运霸图於艰难龟鼎有归奉王猷於献替廊庙推重縉绅仁德总方牧之寄胜残播美综铨衡之职得人流咏固以声高多士功书太常桐柏作镇长淮设险形胜之地允属勲贤是用命尔为使持节申州诸军事申州刺史改封申国公传之子孙世为唐辅往钦哉率循典礼勉固诚节垂裕来叶以保黎庶可不慎欤

册李积改封英国公文

维贞观某年月日甲子皇帝使某官持节册命曰於戏列爵者必俟茂勲设官者咸资懿德所以翼赞王室弘宣帝载惟尔光禄大夫行并州大都督府长史太子左卫率曹国公李积识量恢弘风略弘远忠以奉上信以立身献歟西归?鄘风美分麾东略虢郑景从预艰难於藩邸展经纶而方面南定维扬北清大漠威振殊俗勲书丹府及入司禁旅出帅藩镇劳勤表於夙夜绩用成於期月蕲黄之地滨带江淮镇扞之重允属功烈是用命尔为使持节蕲州诸军事蕲州刺史改封英国公任重六条地优五等为朕藩屏传尔子孙往钦哉其祗膺朝命克固臣节勤恤黎元垂裕後世可不慎欤

册程知节改封卢国公文

维贞观某年月日甲子皇帝使某官某副使某官某持节册命曰於戏盖宣条作牧祚土建侯共治长寄藩翰斯在惟尔左领军大将军检校都督宿国公程知节志怀銳颖气干强果业预艰难効宣行阵入帅禁卫勤诚着於轩陛出镇方隅惠化洽於黎俗酬庸有典式隆宠命是用命尔为使持节朗州诸军事朗州刺史改封卢国公传之子孙长是藩屏往钦哉尔其戎典谟

之训固臣子之节勤修政道以貽尔後可不慎欤

册侯君集改封陈国公文

维贞观某年月日甲子皇帝若曰於戏夫经邦之道必资长策利建之义式固无穷是以周之列国祚世藩屏汉之功臣永垂带砺惟尔兵部尚书潞国公侯君集体业贞固识量恢凯任切腹心寄深文武草昧惟始奉一匡於藩朝光华在运典九伐於礼乐入陪禁中出临阊外赞嘉谋於樽俎扫逋寇於遐荒诚量岁寒勲勒庸器宛丘之地实惟旧镇胙土作牧允属朝望是用命尔为使持节陈州诸军事陈州刺史改封陈国公传之子孙世为唐辅往钦哉尔其克固臣节思勗王度夙夜匪懈无替典则可不慎欤

册段志玄改封褒国公文

维贞观某年月日甲子皇帝若曰於戲夫计功裂土量能分职所以光赞王室康乂黎元惟尔左骁卫大将军樊国公段志玄理怀沉毅气干强雄蜀汉委质早効忠欵颍州从戎备尽心力预艰难於藩朝陪戎征於阊外勤宣阶陞功表旌旗方城之地襟带巴蜀藩翰之重实俟勲庸是用命尔为使持节荆州诸军事荆州刺史改封褒国公传之子孙世为藩辅往钦哉尔其勉固一心勗兹六行克勤政术无替彝典可不慎之乎

册羣臣

册张允恭鄯州都督文

维显庆元年岁次丙辰十二月辛卯朔八日戊戌皇帝若曰夫安边训俗有国之先务简贤任能为政之常典惟尔兰州都督安陆县开国公张允恭器宇详整识用通远夙着勤诚早延恩遇朔方违虘羌戎荐居降节监抚绥怀攸属是用命尔为使持节都督鄯兰河儒廓深濠七州诸军事鄯州刺史封如故尔其镇静幽荒式清奸宄懔威棱以肃远明赏罚以垂信无怠庶政率由旧章光膺宠命可不慎欤

册唐临吏部尚书文

维显庆二年岁次丁巳十月丁亥朔十九日乙巳皇帝若曰昔虞舜分司元凯膺机揆之任当涂受命卢毓处铨综之重故能翊宣景化协赞时雍惟尔度支尚书唐临器识沉敏履贞洁誉满同行效彰官次损益机务爰着循声藻监流品是资清识是用命尔为吏部尚书尔其悬衡处物虚心待士求贤审官循名责实祇承朝宠可不慎欤

册段宝玄越州都督文

维显庆三年岁次戊午七月辛巳朔十九日己亥皇帝若曰於戏夫成俗康邦寄深於岳牧宣

风阐化任重於循良惟尔银青光禄大夫行洛州长史段宝玄体量凝整理怀贞贍总务仙台能官着於纪纲分司棘署令德表於平戾三川之野允敷声绩九江之地爰资镇抚是用命尔为使持节都督越台括婺泉建六州诸军事越州刺史尔其勤加恤隐勉思为政审之以刑狱驭之以公平革剽悍之风归淳质之轨钦兹宠命可不慎与

册乔师望凉州刺史文

维显庆三年岁次戊午十月庚辰朔十一日庚寅皇帝若曰於戏夫恤隐求瘼义重於循良抚衆怀边允资於才干惟尔正议大夫凉州都督驸马都尉乔师望风情敏济志略明远夙承宠荣早预驱驰仗节秋方功勤克展分符朔野政利伊肃玉门远控金城遐阻人兼北狄地杂西戎刺举为难式遏斯重是用命尔为使持节八州诸军事凉州刺史驸马都尉如故往钦哉祇膺典册勉修尔令德思効尔忠规垂清白之风布平广之化絶奸宄於亭障徵讼狱於闾里嗣其和气之美革彼贪婪之化光我王度可不慎与

册阎立本工部尚书文

维显庆四年岁次己未三月戊寅朔十七日甲午皇帝若曰职管纳官任专机事上非德而不受下非才而不处咨尔将作大匠上护军阎立本识局周敏理怀通悟体忠勤而表性资仁恕以立身而思协多能艺兼衆美委质运始策名朝列知効光於果职声猷布於历纪爰缉水土之官实谐缙绅之论是用命尔为兼工部尚书勲官如故往钦哉其敬承休命献善之规攸属持平之务斯在克恭惟允可不慎与

册李寬太子詹事文

维显庆四年岁次己未三月戊寅朔二十五日壬寅皇帝若曰於戏弼谐储副必俟才英总务宫端允资忠量故汉朝选德受礼峻於窦卿晋代遴贤升荣归於谢琰咨尔金紫光禄大夫怀州刺史上原县开国侯李寬识局沉谨理怀详正勤诚表於内外智効张於文武声猷载阐齿秩兼优博望断裁之规与能金属承华弹肃之寄任贤在斯是用命尔为太子詹事封如故往钦哉其祇膺茂典勉修乃职景前哲之高踪垂後昆之令誉对扬休宠可不慎与

册李义府司列太常伯文 上官仪

皇帝若曰於戏山祇诞况协申甫於昌期河灵属符埒萧张於景运故乃訏谟帝载葳蕤鼎业宣猷华於樽俎燮政藻於丹青望重九霄道光五政咨尔兼吏部李义府远资门德独秀人灵照赤野而合辉映青田而写韵孝睦为本锡类之范弥彰清白为基畏知之迹愈劭金羸仞彩辨终豹於书林珠握分光骋邹龙於笔海柏台摛公晏之藻蓬阁开良直之谟胜望挺於何车奇谋表於韩剑彝伦寄其元穆品镜任其清通矫翮培风拂云霓而高迈聳鳞游雾排闥阖而上驰行孚朋亲声流簪组是用命尔为司徒太常伯勲封如故同东西台三品往钦哉尔其卑以待物持盈之理斯存慎以节躬数服之情为重道申规献义先启沃祇膺茂躅可不慎与【

龙朔二年二月五日】

册刘伯英左监门卫大将军文

皇帝若曰闾阖任隆周卢禁切既忠贤之允着实韬略之兼优惟尔冠军大将军行左骁卫将军山阳郡开国公刘伯英志力沉济襟情爽烈早标奇正之术弥光巡

警之功偃沙巨海【阙】功宣六豹气压三韩折冲之效有闻爪牙之任攸属式畴徽烈擢卫宸闱是用命尔为左监门卫大将军封如故往钦哉尔其职司无荒朕命不虞之寄可不慎与【龙朔二年】

册窦元德司元太常伯文上官仪

皇帝若曰於戏总务文昌司会之名尤重升荣建礼内史之职弥隆自非才气兼洽声誉充盛何自式管荣辱对扬纶綍惟尔大司宪护军窦玄德门列克章地华合绪践中和而立性资义德以含章礼固腾芳儒弥擅宝宠谋动於簪绂令范光於廊庙摄官宪府励俗而挺嘉猷受委王京匪躬而输懿绩効宣朝任诚着周行申其寛直之规三掇损益之任是用命尔为兼司元太常伯勲官如故往钦哉尔其供奉彝伦式昭王度勉尔忠正之诚无忝恪恭之表纳吉之寄可不慎与【龙朔二年十月十一日】

册许圜师左相文

皇帝若曰於戏王宫用人弼化伋於丹青宅揆代工成

物资於薪爇轶纪龙而遐翥【阙】奉王剑於副车俨金璫於重席使繁斯在闻望攸归咨尔左常侍检校左厢兼行太子右中护柱国平息县开国公许圜师箕峰构极横渚????源干业峻其家风象贤益其门庆神机独照灵府洞开识宗云篋敏该违佩列干云敷升汉台而协彩禅亮波偃悬魏帐而均辉习武经文绸繆於丹扆履忠蹈义周旋於玄墀石室兰坊影笔纓而振迹迹迤闾纶阁飞若綬而盱衡扬历郡能执钧伊寄是用命尔为左相勲封如故往钦哉尔其燮谐帝载克固之躅恢融王道式茂如仁之规削茶止獎可椒茹茅其於上赏纂先烈而腾懿裕後昆而垂则祗膺朝獎可不慎与【龙朔二年十月七日】

册薛孤吴仁右金吾大将军文上官仪

皇帝若曰於戏望重韬铃藉董戎之戒志齐金石膺御武之求用深闻輶之虑式着衔珠之象惟尔右金吾将军朔方郡开国公薛孤吴仁志局开爽贞规久济日契绛官之术宜符玉帐之机贾勇三军着折关之实效诚输八阵标斩将之奇功树绩方隅书勲王府出茂於分闥入隆於文战腾此师训既穆朝经锡以徽章聿酌金议是用命尔为右金吾卫大将军封如故往钦哉其励乃忠贞恭兹獎饰祗承宠命可不慎与

册许敬宗太子太师文

皇帝若曰於戏凤纪龙名茂绩光於铭槩砺金鈎玉嘉庸绚於缙油盖以协赞帝图弼成鼎命矧乃望高咸一超庶尹而驰风道鬱半千冠羣后而宣誉咨尔光禄大夫行右相许敬宗藉敬生德基贤诞秀谋猷经制识度英远培风逸干业峻於巨臣?景宏才器隆於王佐词源清泌濯色於雕巩艺苑冲深抽华於绣牒挥汗泪於丹液矫丰饵於鸡栖翊弘词於青闱影长纓於鹤鹵访温树之緘对誉宵烛而题明盛列辉於西豪茂表功於东第宠翠泉轩圣掩丹云固知其可以作训元储耸摇山之固构喻水善二激伊水之长澜是用命尔为太子太师监修国史等并如故同东西台三品仍知西台事往钦哉尔其肫而乘谦思克已而蹈礼恒晨谒金墀事切於忠謇夜随银啓义先於调护靖恭朝列可不慎乎

册张延师左卫大将军文

皇帝若曰於戏姬历初冲是资方郡之列汉图攸永往隆南北之军故镂鼎垂勲铭常纪効坐树之名为重闻輦之虑实深惟尔左卫大将军检校羽林军上柱国张延师志局淹凝识度闲雅当风云之会遇经纶之日执羈霸府尽忠肃之勤诚耸剑元戎罄旌旄之茂绩有六奇之秘术蘊三略之宏规迈遐烈於孙吴掩芳声於羊杜酬报之迹纪运频周光华之典贤才攸属是用命尔为镇军大将军行左卫大将军余如故往钦哉其敬扬尔绩勉膺朝奨勉尔干慎之规宣明奇正之法连徽往彦可不慎与

唐大诏令集卷六十二

卷六十三

<史部,诏令奏议类,诏令之属,唐大诏令集

钦定四库全书

唐大诏令集卷六十三

宋 宋敏求 编

大臣

册赠

册赠豆卢钦望司空并州大都督文

册赠杨再思并州大都督文

册赠高崇文司徒文

册赠吴少诚司徒文

册赠刘总太尉文

册赠李班司空文

册赠李茂庄太师文

册赠韩遵太尉文

册赠刘崇望司空文

陪陵

赐功臣陪陵地诏

功臣陪陵诏

赠郭子仪太师陪葬建陵制

配享

桓彦范等配享中宗庙庭诏

苏瓌刘幽求配享睿宗庙庭诏

裴冕李晟段秀实配享肃宗德宗庙庭诏浑瑊配享德宗庙庭诏

实封

加王琚食实封制

加张瑄食实封制

加刘幽求食实封制

加郭?瓘食实封制

赐李光弼实封一子官制

不许李光弼辞讨诏

加田承嗣实封制

赐张自勉实封制

加田神功实封制

加马磷实封制

分郭子仪实封赐诸子诏

马燧李臯赐实封制

册赠

册赠豆卢钦望司空并州大都督文

维景龙四年岁次庚戌二月【阙】朔二十二日应天神龙皇帝若曰咨尔故开府仪同三司知军国重事上柱国芮国公致仕豆卢钦望朕闻古之哲王必有贤佐其存也俾乂谓之奋庸其歿也不朽谓之立德可不然与尔十纪羽仪三朝冠冕专直为?非法不言温谦在容非礼勿履故能揆路斯穆台阶以平而韦贤罢归疏广辞退致虚守静方密道枢居常待终竟归冥録是用辍朝增歔抚事怆怀荣以建旗正其服袞今赠司空并州大都督持节备礼册命则二仪式奉九原可作冀尔魂魄嘉夫宠数呜呼哀哉

册赠杨再思并州大都督文

维景龙三年岁次己酉九月甲寅朔二十三日丙子应天神龙皇帝若曰昔孔子云歿鲁哀由其作谏晏婴既往齐景为之行哭且谓陪臣义犹存此甫怀良相情则过之咨尔故尚书右仆射同中书门下三品监修国史上柱国郑国公杨再思河岳粹灵庙堂神器率由百行能具九德自弼谐庶绩师长羣寮清白所以树风丹青所以成化有若巫咸之保乂传说之钦承故能宣慈惠和迈迹垂宪而运同过隙悲深抚几兴言轸悼载想谟猷发金滕之旧铭询葬亳之前训俾加印绶秩齐於子真式奉园陵志毕於元凯是用增 宠命於端揆茂徽章於连帅今赠尔并州大都督遣太府少卿韦璿持节备礼册命方使五公门阙二臣丘壠魂而有灵懿兹荣赠呜呼哀哉

赠高崇文司徒文

维元和四年岁次己丑十月癸丑朔十三日乙丑皇帝若曰自我有国大诸侯之勲劳者必勒功图形播於钟鼎藏於故府歿则极异等之礼以嘉魂魄使奋乎百代之上百代之下为臣者莫不兴起也咨尔故邠寧庆等州节度度支营田观察处置等使充京畿诸军都统开府仪同三司检校司空同中书门下平章事持节邠州诸军事兼邠州刺史上柱国南平郡王食邑三千户高崇文英姿絶羣雄略神授上通星辰之气克扶期运之数少事塞门保寧朔漠千秋之勇常冠军锋吴芮之忠早书竹素顷以并给之下盗臣流毒兽心狼顾诱胁我人遂拜於齐坛授以萧斧束马蓐食先命戒途曾无再籍之役不用一卒之死生致首恶戮屍天街西南晏清安堵如故礼加九命秩尊三事贵列东第壤踰彻侯动荡夷夏輝灼编简进律还师兼制旧疆扉卧鼓翳解甲休卒期以无征迨乎三纪暗忽生灾壽量中辍维屏之叹怛然疚怀故命国子祭酒刘宗经副使司勲郎中李直方持节册赠尔为司徒赠命数率礼加等式表无尽之功申不检之赏将我痛悼告於幽神

册赠吴少诚司徒文

维元和四年岁次己丑十二月壬申朔二十七日戊戌皇帝若曰歿加荣号所以劝人示其爵列之差用彰礼命之数咨尔故彰义军节度度支营田申光蔡等州观察处置等使光禄大夫检校司空同中书门下平章事使持节蔡州诸军事兼蔡州刺史上柱国濮阳郡王吴少诚尝贾拳勇习知战阵服上将之号令为中书之首出及凿门建牙授以封域棱威以行法制峻文以辑赋輿当先圣之委遇极宠禄之休显序位列公台之盛茅土有侯王之尊谓终享遐纪策

勲功令壽量斯尽軫於予衷今遣使权知宗正卿李词副使起居舍人裴度持节册赠尔为司徒於戏守屏之臣注意斯重昭我宠渥藏於後昆

册赠刘总太尉文

维长庆元年四月某日皇帝若曰朕闻古有履忠仗顺生而大有为者又有功成身退歿而永不朽者非正气令德间生挺出则高名大节孰兼之哉天平军节度使检校司徒兼侍中楚国公刘总降自天和立为人杰得君於先帝协运於昌时纂戎弓裘守土燕蓟迨此一纪北方晏然有开必先纳欵於我沉断大事奋扬奇谋奉幽都四封之图挈卢龙三军之籍尽献阙下高谢人间感动君臣惊激忠义顾妻子若脱屣等富贵如浮云惟道是从奉身以退仲连事成而沧海子房名遂而追赤松贤明所归古今一致朕方改授兵柄移镇郢郊命作司徒倚为左相期奋乃志将沃朕心而天不憖遗邦失柱石夫臣戴君如元首则君视臣如股肱股肱或亏何痛如是兹朕所以辍朝軫念备礼殊恩庸建尔於上公盖褒赠之崇重者也呜呼尔总尚知之乎今遣使某官某持节册赠尔为太尉

册赠李珣司空文 杜牧

维大中六年岁次壬申五月丁卯朔十六日壬午皇帝若曰国有元老道可咨稟天命不助倏然去我宜加褒命以慰重泉咨尔故淮南节度副大使知节度事管内营田观察处置等使金紫光禄大夫检校尚书右仆射兼扬州大都督府长史御史大夫上柱国赞皇县开国公食邑一千五百户李珣立德行道继长增高贵而弥笃在文宗朝徧历清近内备顾问尝摧奸凶外领事权善提典故爰付魁柄实肖象求镇抚四夷莫不诚信训导百吏皆有程品左官荒服衆疑非罪事君以道知我其天李固之确论无私周公之金縢终啓自朕统御尊敬旧老分委戎辂作镇孟津训兵令行活人化洽饱闻声价渴见风采以大冢宰徵归朝廷谠直忠贞骨鯁魁壘凡所陈启无非理法遂乃裂授东夏表率诸侯能救饥艰克为康泰初陈微恙请捐重寄駟骑奔问侍医临理旋闻大病却食流涕命也奈何痛悼不及今遣使某官某副使某官某持节册赠尔为司空魂而有知监兹诚意呜呼哀哉

册赠李茂庄太师文 钱珣

维年月日某甲子皇帝若曰忠信之於人也若酒醴之有麴蘖也智者厚而愚者薄能者寡而知者衆麴蘖厚而遗味深忠信厚而遗美大存诚所至享福必全生死既分是非乃定咨尔故山南节度使开府仪同三司检校太傅典侍中兴元尹李茂庄怀忠信之实以图其身行之不迷用则不匱得之善始守之克终故金蝉左貂为尔之冕昭其官也彤弓兹矢为尔之器昭其锡也而又带绶系印曰公曰相位列元帅政在中权冯翊分三辅之豪成纪接右界之险俾尔出号令尔惟有威俾尔施教条尔惟有惠威则鲜犯惠则鲜违吾复以汉中控诸蜀塞耀尔昆弟聯彼封疆易武节以授之择善地以固之劝夫忠信是亦庶几尔尚其当职必修许盟必会更资共獎且励率循无使我择臣心得以示信万国之川流靡息一朝之山立遽颓嗟复魂以安归悼降年之非永戎昭所赖天夺良多言念旧臣亦不半在兹以凄惻何必鼓鼙昔人能立

武者则太公为师慰尔之行用示追显是为有卒无为不瞑今遣某官某等持节册赠尔为太师呜呼尔其闻吾兹命

册赠韩遵太尉文

维年月日某甲子皇帝若曰爵以充其量禄以报其功君命之始也赠以昭其数诰以申其悲君命之终也视朝乃废厥悼可知咨尔故灵武节度使韩遵绪承三杰勇抗万夫用材既适於轮辕赴节有同於金鼓寡言而信匪怒而刚握善阵之沉机裕挾伐之秘策使之奉祀亦克象贤提封以寧在政无改絕编户之子役抚诸戎之允怀牧马虽多罔侵吾土射鵰自远空堕塞垣挽留黎而安敢渝盟候甌脱而何尝得气惟兹宣力是谓良哉而中权未襄内寇难遏朔风方劲朝露已曦孰为不永之年贻我或亏之痛呜呼富则侯矣贵高相矣揣时立则节遂终身有涯之生息焉奚恨举秦官之显秩表汉将之殊庸以极朕心庶弘君道今遣某官某等持节册尔为太尉虽冠剑之礼且饰丘封俾篆刻之文永光冥漠游魂在地期尔尚知

册赠刘崇望司空文

维年月日某甲子皇帝若曰生不能用死而谏之为上者且愧於心古君子亦云非礼其或尝居夹辅兼授中权生也无不用之悲歿也有可追之命展兹异数示彼诸孤我念大臣庶几得礼咨尔故特进兵部尚书刘崇望气聚之稟直枉自分先哲王於是而观贤不肖於焉乃定所以树为吉德彰在令终论若所为信如斯语始於家事励以躬行处昆弟之欢耻闻优劣视仆隶之役常务寬容避名无取乎白眉掩过每言及烂手周爱疏属惠徧故人位高而惟恐骄矜权至而未尝击断刚亦不茹怨乃用希是以诚存则安族大能保天非有私於若惟若有顺於天昔者太史秉书冲人嗣训时乃之任首冠侍臣罔漏代言以光诞告机平旬岁免应旁求佐理甚勤念功如在比从蜀道入补夏卿方持嘉谟共熙庶绩一旦夺我心膺病尔膏肓梦两楹而遽罹明徵偃巨室而犹疑假寐永言辨色遂絕履声且临将葬之期弥积或亏之痛自朝受策以泊登车往慰逝川俾光坏土今遣使左谏议大夫宪王博副使仓部郎中温绪持节册尔为司空呜呼吾所申命何若於鲁侯之谏属辞於若尚知之哉

陪陵

赐功臣陪陵地诏

乾坤合德爰着易简之功君臣同体克成中和之治远取之物若舟楫之济巨川近取诸身若股肱之戴元首同心协契存歿以之故诸侯列葬周文创陈其礼大臣陪陵魏武重申其制去病佐汉还奉茂陵之莹夷吾相齐终托牛山之墓斯盖往圣垂范前贤遗则録曩昔之宿心笃始终之大义者也皇运之初时逢交泰扫除多难光启鸿业谋臣武将竞进辕门之前明德异材争趋魏阙之下或雷云伊始功参締构或光华在旦绩着弼谐及密戚懿亲旧勲宿德委质先朝特蒙顾遇者自今以後身歿之日所司宜赐以基地并给东园秘器事从优厚庶敦追远之典以申罔极之怀【贞观十一年十月】

功臣陪陵诏

周室姬公陪於毕陌汉庭萧相附彼高陵宠锡坟莹闻诸上代从窆陵邑信有旧章盖以懿戚宗臣类同本之枝干元功上宰犹在身之股肱哀荣之契实隆终始之义斯允今宜聿遵故实取譬拱辰庶在鸟耘之地无亏鱼水之道宜令所司於昭陵南左右相封境取地仍即标志疆域拟为葬所以赐功臣其父祖陪陵子孙欲来从葬者亦宜听许【贞观二十年八月】

赠郭子仪太师陪葬建陵制

天地以四时成物元首以股肱作辅公台之任鼎足相承上以调三光下以象五岳允厘庶绩镇抚四夷体元和之气根贞一之德功至大而不伐身处高而更安尚父比吕望之名维师赠周公之位盛业可久没而弥光故太尉兼中书令上柱国汾阳郡王尚父子仪天降人杰生知王佐训师如子料敌如神昔天宝多难逆羯作祸咸秦失险河洛为戎公能翼扶肃宗再造区夏国有患劳其勘定边有寇藉其驱除安社稷必在於綵侯定羌戎无踰於充国綵台绥四散之衆泾阳降十万之虏勲高古今名馨夷狄而劳乎征镇二纪於兹顷以春秋既高疆場无事罢彼旌钺宠在台衡以公柱石四朝藩翰万里忠贞悬於日月宠遇冠於人臣尊其元老加以崇号期壽考之永养勲贤之德膏肓生疾药石靡攻人之云亡梁木斯坏虽賻礼加等辍朝增日悼心流涕曷可弭忘更议追崇名位斯极尊为尚父官协太师虽爵秩则同而体望尤重歛以衮冕旌我元臣圣祖园陵所宜陪葬式墓重文侯之礼象山追去病之勲千载如存九原可作册命之礼有司备焉可赠太师陪葬建陵仍令所司备礼册命賻绢三千疋布千端米麦三千石

配享

桓彦范等配享中宗庙庭诏

皇輿肇建必有辅佐之人天步艰难爰仗经纶之业故侍中谯国公桓彦范故中书令兼吏部尚书汉阳郡公张柬之特进博陵文贞公崔玄暉故中书令南阳郡公袁恕已等并德惟神降材与运生道协台岳名书?纬寅亮帝载勤劳王家参复禹之嘉谟奉昇唐之景命虽徂谢既久而勲烈益彰抚彝鼎以念功想旗常而增感缅遵故实用表徽懿俾列在清庙登於明堂克申从祀之仪式茂酬庸之典并可配享中宗孝和皇帝庙庭

苏瓌刘幽求配享睿宗庙庭诏

凡有功者铭书於王之太常祭於大蒸司勲诏之允所谓酬庸纪劳颁赏旌善藏於天府飡於庙庭臣哉邻哉其道光也故尚书左仆射太子少傅赠司空荊州大都督府长史许文贞公瓌闲邪存诚久迪厥德故尚书右丞相太子少保彬州刺史徐国公幽求闻义尽节克茂乃勲并仪型羣工左右厥辟直道罔缺危言愈彰景云末年邦国多难恺悌君子服劳王家或亲受顾托以安刘氏或潜图翼赞愿奉唐侯纘乃旧服协於先契交济弼亮厥功茂焉俾台小子嗣守

文武之业获奉宗庙之灵实资元辅是?末命兹予大享于先王尔其从祀以配我有唐之休烈并可配享睿宗大圣真皇帝庙庭

裴冕李晟段秀实配享肃宗德宗庙庭诏

朕闻昔之佐制物者咸有大功是惟五官以配五帝自时厥後有国家者莫不以辅弼之寄社稷之勲登名大烝陪享清庙苟非茂德孰允盛仪赠太师冕望重岩廊时为桢干灵武艰阻首赞经纶宣力股肱平心鼎饪佐戡定之成业推翼戴之嘉猷赠太师晟识精韬铃神假雄武建中寇孽躬践忧虞垂饵虎狼致威樽俎刷宫庙之尘秽回日月之光辉赠太尉段秀实气全刚方节固金石凶渠悖逆替蹶根萌矫命还师衷刃死决纾阤危於忧迫挫狂狡之奸谋并材为时生用当运否感云龙而应变炳辰象以降灵光复寰区振扬风槩勲庸藏于盟府宠饰备於前朝光陰不迫盛烈如在朕顷因郊祀爰举典常俾着茂勲以配殷祭惟咸有一德允属乎三臣庶昭示於将来式崇恩於既往冕宜配享肃宗庙庭晟秀实宜配享德宗庙庭

浑瑊配享德宗庙庭诏

旌劝相先久协念功之义荐羞爰举聿追配享之仪赠太师瑊鍾秀诞灵逢时翼圣铭镂金石带砺山河绩既着於先朝业宜光於後代俾之从祀用表遗勲宜配享德宗庙庭

实封

加王琚等食实封制 苏頌

门下古之书甲令铭太常若不抚翼青云驰光白日未有君则议赏速为善而知劝臣亦避荣保流谦而益受莫非君臣之际感通之理然也新除银青光禄大夫守户部尚书崇文馆学士赵国公王琚体融纯粹鉴激精微谟猷济时词学辨政新除银青光禄大夫守工部尚书楚国公姜皎宏才倜傥胜气清明含章揆发临事条解新除银青光禄大夫殿中监宋国公李令问居惟密静胄实勲华率礼而和立言以信或受厘则问或舍讲相得非直萧曹不远自我之旧故能管乐咸起致我在斯顷扫羣凶翳赖其力爰升茂宠同辞厥位诚非易夺义所难违俾增秩於掖垣更回班於殿省仍加并邑以答元勲琚可行中书侍郎俸禄防阁品子课等一事以上同三品给加食实封二百户通前满五百户皎可殿中监仍充内外闲廐使加实封二百户通前满七百户令问可行殿中少监兼知尚食加实封二百户通前满五百户散官封学士各如故主者施行【天宝二年七月十八日】

加张暉食实封制

门下疏爵列土是称王制大功盛德必建侯封银青光禄大夫大理卿张暉守道恭懿饬躬哲诚寅亮邦国实繁於华爰同君亲忠出於孝比者潜申翊戴屡挫凶慝故以议存谋始防在虑先披荆之效不渝采葛之谗遂起粤自荒裔升於王朝追朱佑之前言深启於天命指萧何之

旧事独高於人杰思弘赏典用载盟书惟邓乐郡陪京奥壤宜赐於茅社永旌采地可封邓国公赐实封三百户余如故主者施行【先天二年七月十九日】

加刘幽求食实封制

门下忠而获戾时所叹息赏以念勤邦之彝典金紫光禄大夫守尚书左仆射知军国重事监修国史上柱国徐国公刘幽求长才伟度博闻强学周百虑以匡社稷竭一心而在廊庙故能见大义临大节智可以不俟终日诚可以格於皇天曩者恭参诛吕疑深从代弘宣王化保义朕躬政方议於调铉谤遂兴於肱篋良相非罪空吊长沙故人有言宁忘曲突自剪元恶旋居左揆利更称於狐偃勲莫逮於萧何兼而有之义固应尔宜加土宇永传带砺可加赐食实封二百户余如故主者施行【先天二年八月十五日】

加郭?瓘食实封制 苏頌

黄门闻鼓鼙之声者则思於将帅裂茅土之赐者则念彼勲庸右羽林军大将军兼安西大都护四镇经略大使上柱国太原郡开国公郭?瓘忠壮超伦智谋絶等决胜千里怀孺子之兵符道通四夷有老臣之戎律往者镇于荒裔独守孤城煮弩而其人益坚引弓而彼衆不敌故得爱子染鏑名王息戈穹庐扫地而沙漠因以归附功则茂矣朕实休之宜誓河山开其井邑可进封潞国公食邑三千户仍赐实封二百户余并如故主者施行【开元三年十一月十八日】

赐李光弼实封一子官制

功崇望重加以服章德厚流光延其茂赏爰益苴茅之典并明干蛊之才副元帅太尉兼侍中都督河南淮南淮西山南东诸道节度行营事上柱国临淮郡王光弼元勲济代公辅推贤宣大化之神明总专征之师律自征移镇负海距河连帅百城旌旗千里东郊誓衆雅继鲁侯之功北伐拥旄首称汉将之略高牙罢设重鼎新调尤知武库之深实在云台之右畴其真食美以保家金议允谐旧章斯举敬哉有土更载丹书之盟鲤也趋庭宜升紫绶之宠可加实封二百户仍与一子官阶三品余并如故

不许李光弼辞封诏

爵土之封以彰勲德故授之者适当其分使赏在必行而得之者不让其余使人有可继国之彝宪在乎至公往者寇逆乱常京师失守太尉兼侍中河南副都元帅知河南淮西山南东道诸节度行营事上柱国临淮郡王光弼首奉师律光佐先朝克弭氛祲底寧宗社自朕纘承丕绩又置大功扶颠履危勤恤于外可谓忠存王室道济生人则食邑所加繁惟常典尔因疾故遽有恳辞不伐茂勲请归实封览其章奏用增咽然且福壽之理期於勿药并赋之锡传于无穷岂尔暂以微瘵便思谦退将使其下者何顔受封用阻深诚盖存大体然撝谦有素忠义可嘉足以激砺名节光远退让宜示中外咸使知闻

加田承嗣实封制 常袞

勅懋荣勲之赏则启封邑赐真食之命方入田租故采地以处其子孙书社以尊其侯伯开府仪同三司检校尚书左仆射兼魏州大都督府长史御史大夫兼魏博等州节度观察处置及管内度支营田等使上柱国鴈门郡王食实封二百户田承嗣出自河朔挺兹才器公忠有素文武是经行惟高简言必诚信委之腹心实所亲重内列端揆外当藩干拒河作镇濒海抚封贞一以奉上明恕以临下谋出韬铃之外功成战伐之前专精牧人尽瘁事国政刑必中都鄙有章训以农耕之业课其蚕织之事家给而礼让攸兴气和而札瘥不作旧章咸举厥贡惟殷来东人之职劳首循吏之行理嘉命休绩允兹褒劝食其井赋用协典常可加实封二百户余并如故

赐张自勉实封诏

顷者逆?灵耀阻兵大梁淮西都虞候赐太常卿赠扬州大都督张自勉往观垒焉奉议正词无所屈挠贼臣肆忿毙於鉄鎖朕用悯焉虽锡命之恩已旌窀穸而赏延之典宜及子孙可追赐实封五十户【大历十二年七月】

加田神功实封制 常袞

勅土宇昉章以叙其德田租帖食以答元勲故寇邓兼四县之封张陈加万户之数开府仪同三司检校尚书左仆射使持节汴州诸军事兼汴州刺史御史大夫充汴宋等州节度观察处置等使上柱国信都郡王食实封五百户田神功间生河朔性与忠厚尝秉大节服劳王家凡所委遇必当要重竭其公私益用亲信入居百揆之右出作四方之屏自河而南戎镇斯大总兵车之所会赐斧钺以专征考礼正刑丰财禁暴敬事节用老安少怀懋乃丕绩肆于时夏服我休命敬兹分土可加实封一百户余并如故

加马璘实封制

勅大将在外勤劳有功或未进秩必当加赋更书侯社益茂朝章四镇北庭行军兼泾原等州节度使开府仪同三司检校工部尚书兼御史大夫上柱国扶风郡王马璘以牧人御衆之才膺方叔召父之任理事诰禁以屏西郊抚和其人爰得衆力智谋濬发忠义侃然武能用典师在制命纪逖伐畔服柔示怀惩密人之不共执戎子以数罪务於德礼以济威刑关右寧谧赖其镇定社稷之卫予嘉乃勲厚其田租式宠戎阃可加实封二百户余如故

分郭子仪实封赐诸子诏

故尚父太尉兼中书令汾阳郡王食实封二千户赠太师子仪功格上玄道光下土积其善庆垂裕无穷虽嫡长云殂而支宗斯盛汾阳旧邑盖有丕承其男前左散骑常侍驸马都尉食实封五十户暖夙稟义方居忠履孝俚崇银榜摠美金章继抚先封允宜听复暖兄检校工部尚

书兼太子宾客赵国公曦并弟右金吾将军祁国公食实封一百五十户曙太子左谕德映并有令名保其先业宜允推恩之典以明延嗣之诚其实封二千户宜准式减半余以分袭暖可袭代国公仍通前袭三百户曦可袭二百五十户曙可袭二百五十户通前三百七十五户映可袭二百五十户【贞元】

马燧李皋赐实封制

勅列位以旌德胙土以报功国有彝章是存褒劝朕以不德间逢多虞蒲坂有叛乱之臣淮沂有僭逆之帅万姓罹害四方靡宁河东保义奉诚军节度兵马副元帅检校司徒兼侍中马燧大历初忠诚奋激躬率士卒讨兹不庭略地如归功成必克晋绛慈隰靡然向风元凶势穷竟就殲灭清我甸服时惟茂勲荆南节度观察处置使检校户部尚书嗣曹王皋亲率全军抗於强虏昼夜不息迨於三年谋成必臧师出皆捷复蕲黄之地拔安陆之城隐其威名保义江汉并节着於国功存于人効迹炳然佥议攸属虽懋官已至而食赋未加畴庸之科无乃有间宜有宠锡以答殊勲燧可赐实封五百户皋可赐实封三百户

唐大诏令集卷六十三

卷六十四

钦定四库全书

唐大诏令集卷六十四

宋 宋敏求 编

大臣

铁券

裴寂等恕死诏

赐护密国王子铁券文

赐突骑施黑姓可汗铁券文

赐怀化王那俱车鼻施铁券文

赐李纳王武俊田悦铁券文

赐安西管内黄纛官铁券文

赐陈敬瑄铁券文

赐韩建铁券文

附属籍

安康郡公袭誉听合谱宗正诏

燕公艺赐姓上籍宗正诏

楚王威赐姓附属籍诏

高开道赐姓上籍宗正诏

胡大恩赐姓属宗正诏

许凉武昭王孙绦郡姑臧等四公子隶入宗正属籍勅

令李晟家属籍诏

铁券

裴寂等恕死诏

朕自起义晋阳遂登皇极经营天下寔仗羣才尚书令秦王某尚书右仆射寂或契合元谋或同心运始并蹈义轻生捐家殉节艰辛备履金石不移论此忠勤理宜优异官爵之荣抑惟旧典勲贤之议宜有别恩其罪非叛逆可听恕一死其太原元谋勲効者宜以名闻【武德元年八月】

赐护密国王子铁券文

维天宝元年岁次壬午九月癸卯朔十六日戊午皇帝若曰咨尔护密国王子颉里匐夫藩扞所寄惟信是从节义可称虽远无隔卿之先代常附国朝通使有恒书译相次自卿父继立近阻强邻被制凶威有违夙志今遂能献诚款潜托归怀自非心悟远图何克存先意念此诚恳嘉尚尤深今赐卿丹书铁券以旌忠効长表信义永传子孙日月同明山河齐久可不美与可不慎与

赐突骑施黑姓可汗铁券文

维天宝十二年岁次癸巳九月己亥朔六日甲辰皇帝若曰咨尔骨咄禄毗伽突骑施黑姓可汗登里伊罗密施惟皇建极声教及於遐荒惟帝念功礼命加於恭顺卿虽拥在沙漠常扞烟尘识进退存亡之端知古今成败之数久率蕃部归化朝廷兼拒凶残挫其侵轶精贯白日义光青史绩因累着嘉尚良深今授卿持进册为突骑可汗重爵贵号以崇其宠丹书铁券以表其忠宜保始终永固诚节山河带砺福禄长存可不慎与

赐怀化王那俱车鼻施铁券文

维天宝十二年岁次癸巳十月戊辰朔十四日辛巳皇帝若曰咨尔故石国顺义王勇那俱车鼻施夫柔远之道必先文德録诚之美是加命礼卿之先代累宾朝化列在藩王卿又能効节输忠克复居宇扞边率下循职修贡信彰夷落义贯幽明言念恳诚良多嘉尚今授卿特进仍封怀化王并赐丹书铁券以表忠赤宜执於恭顺保於终始每资犄角之用永固山河之宠可不美与

赐李纳王武俊田悦等铁券文 陆贄

维兴元元年岁次甲子正月癸酉朔二日甲戌皇帝若曰咨尔某某呜呼君者所以抚人失於所抚则叛下者所以奉上失於所奉为尤各当其理德用不扰若乖其分乱於是生朕德薄化浅昧於君道罔自省咎姑务责人是以徵师徂征连岁靡息惟尔亦以诚志不达反側於厥衷阻衆兴戎结垒拒守岂非上失所抚而下乖所奉与书曰万方有罪罪在朕躬我实不德兆人何咎俾废其业离其室家?於困穷死於鋒刃老疾废养孤穷靡依怨结苍昊感伤和气朕为人父母得不愧心晨兴以思夕惕以怀自予嗣位迄今六载天将悔祸朕方觉悟尔亦知衆心厌乱思所以保安叶於朕怀有若符契非天地合德人神合谋将止杀好生则何以臻此朕是以上顺天意俯从人心涤尔瑕疵复尔爵位坦然靡阻君臣如初功书鼎彝名藏王府子孙代代为国勲臣山河带砺传祚无絶朕方布大信承天子人若食其言何以享国於戏其敬听朕命用保无疆之休吏部尚书同中书门下平章事萧复宣

赐安西管内黄纛官铁券文

维贞元二年岁次丙寅八月丁巳朔三日己未皇帝若曰咨尔西镇节度管内黄姓纛官骠骑大将军行左金吾卫大将军试太常卿顿啜护波支惟乃祖乃父代服声教勤劳王家勲书鼎彝名列藩籍尔克绍尔祖先之烈而重之以忠贞嗣守职官祗若教化率其种落保我疆陲丹诚向风万里如近是用稽之令典锡以券书若金之坚永承无变子孙继袭作我藩臣尔其钦承勿替休命

赐陈敬瑄铁券文

烹巨鳌者鼎大於沧海斩长鲸者劒倚於青天既立异勲克膺殊宠李晟免其十死子仪成其九功镂以金鏤赐其铁券後来继者岂在他人岁寒知松柏之心国难见忠贞之节卿五山镇地一柱擎天气压乾坤量?宇宙自居环卫出拥旌幢论清政而冰镜无光吐赤诚而朝霞失色手持玉节身镇锦城扶乾纲而万国齐心纽坤维而百蛮遶指三川钦化一境归仁朕以税驾褒斜省方叩蜀匐匍而来寧风輶駟驰而速建龙宫百辟来朝万方入贡夏禹涂山之会未盛於斯汉高沛国之欢无以过此戮阡能如剪草除秀异若焚巢不让武侯之勲无愧文翁之化海东献欵云南披诚九谷丰登三农茂盛济贍军国拯接朝寮内竭家财外罄公帑千官感惠一国推功今则巨猾奔逃神州克复将归上国即别成都致朕身安由卿忠力前封公爵後赐郡王询於衆情未愜羣望今赐卿铁券舍其十死援泰山而立誓指黄河以为盟山无坏时河无竭日君君臣臣父父子子永远贵昌并皆无故【中和三年十月】

赐韩建铁券文

朕以前代功臣实重信赏至有刻於鼎彝纪在旗常垂带砺之言保金石之誓勲贤所付宜懋明恩况卿秉谦蹈和持重守正属朕前岁巡狩而乃躬亲奉迎季孙之道在事君周勃之心唯安国毕力扈驾卫我出居充奉行朝更无余事可谓忠於社稷光映简书旋以归复京都葺修

宫阙载宏旧制皆叶规程胜是殊庸实用嘉矚虽迭增崇数而未足酬功宜申誓券之文以示旌勲之典矧夫黄河不竭青山匪穷比此赏延锡于苗裔使卿永荷禄位长受宠荣对铭镂以同坚焕声徽而转美卿恕九死子孙恕二死或犯常刑所司不可加责礼命甚重往惟钦承宜付史馆颁示天下【光化元年九月】

附属籍

安康郡公袭誉听合谱宗正诏

太仆少卿安康郡公袭誉我之同姓派别枝分惟厥祖考世敦睦袭誉部率宗人協同义举立功巴蜀诚节着闻宜有褒崇用超恒序特听合谱宗正恩礼之差同诸服属【武德元年十月】

燕公艺赐姓上籍宗正诏

昭德以爵前王令范功茂茂赏有道遗训使持节幽州总管上柱国燕公艺早悟机权夙展诚节革运之始立功燕代镇守边要馭控遐荒忠绩既宣宜加宠昵可赐姓李氏上籍宗正封燕郡王食五千户【武德二年九月】

楚王威赐姓附属籍诏

五等列爵茂绩超於恒典四岳分官连帅总其常赋山河之赏义在酬庸万陌之任实资贤哲使持节和州总管和州刺史东南行台尚书令上柱国楚王威往因丧乱糾合徒旅绥静淮瀆缉宁江介闾阎安堵吏民率职远稟朝化具申忠款仍请立功扫除多难诚节既表志识可嘉委以招怀特宜受礼爵命之序式加常秩可使持节总管江淮以南诸州军事扬州刺史东南道行台尚书令淮南安抚大使上柱国进封王食邑五千户赐姓李氏附属籍【武德三年六月】

高开道赐姓上籍宗正诏

褒德叙功有国彝训任贤赏善列代通规伪燕王高开道家本海隅志怀慷慨有隋之末州域雕残招集徒旅自保边塞繕修斥堠扞御寇戎民吏肃清仓库完实既而审达机变远慕朝风闔境献诚归款内属请申经略辑寧代北厥功以茂宜崇褒宠礼命之差用超恒级可使持节蔚州诸军事蔚州总管加授上柱国赐姓李氏上籍宗正封北平郡王食邑五千户【武德三年九月】

胡大恩赐姓属籍宗正诏

畴庸旌善哲王彝训任贤使能有国通典胡大恩往因隋李夷狄交侵繕甲聚徒辑寧边境既

而阻隔戎境自保方隅远慕朝风因机立效摧破凶党亭徼无虞抗疏阙廷以申诚节忠义克举宜隆宠命因其所统即加荣秩可使持节代州诸军事代州总管加授上柱国封定襄郡王食邑五千户赐姓李氏上属籍宗正【武德四年正月】许凉武昭王孙绦郡姑臧等四公子隶入宗正属籍勅

勅古之宗盟异姓为後王者设教莫遗其亲殿中侍御史李彦允等奏称与朕同承凉武昭王後请甄叙者源流实同系谱犹着虽子孙千亿各散於一方而本枝百代何殊於近属况有陈请所宜敦叙自今已後凉武昭王孙宝以下绦都姑臧敦煌武阳等四公子并宜隶入宗正编诸属籍以明尊本之道用广亲亲之化

令李晟家附属籍诏

夫能定社稷宏济生人存不朽之名垂可久之业者必报以殊常之宠待以亲比之恩与国无疆时惟茂典故奉天定难功臣太尉兼中书令上柱国西平郡王食邑一千五百户赠太师李晟闲代哲贤自天忠勇怀济时之宏筹抱经武之长才贯以至诚協于一德尝遭迍难之际实着戡定之功鲸鲵既殲宫庙斯复眷兹勲伐则既褒崇永言天步之夷载怀邦杰之力思加崇於往烈爰協比於後昆睦以宗亲将予厚意其家宜令编附属籍

唐大诏令集卷六十四

卷六十五

钦定四库全书

唐大诏令集卷六十五

宋 宋敏求 编

大臣

錄勲

长孙无忌等九人各封一子郡县公诏封建功臣诏

长孙无忌等十四人并为刺史封国公令子孙承袭诏

图功臣像於凌烟阁诏

赠淮西军大将周曾等诏

赐将士名及奉天定难功臣诏

褒赠淮西立功将士诏

錄蕃官子孙诏

为李怀光立後诏

令画中宗以後功臣於凌烟阁诏

錄李洧等子孙诏

錄功臣子康志寧等各除官职勅

叙用勲旧武臣德音

命京兆府修郭子仪墓诏

錄旧

宥周隋名臣子孙配流诏

赐卢怀慎家粟帛勅

錄苏环孙系等各除官诏

錄褚遂良等孙各除官诏

錄魏徵等三人裔孙诏

錄勲

长孙无忌等九人各封一子郡县公诏

惟王建国厚礼备於元勲惟帝念功茂赏隆於延世是以亲贤作屏着在周经支庶毕侯义存
汉典开府仪同三司齐国公无忌尚书右仆射?国公玄龄故尚书左仆射蔡国公如晦灵州都
督吴国公尉迟敬德左光禄大夫吏部尚书许国公士廉兵部尚书潞国公侯君集右武卫大
将军郢国公宇文士及左武卫大将军翼国公秦叔宝泸州都督宿国公程知节等或宇量凝
深地兼贤戚或风鉴宏远功参帐幕或志怀强正便繁左右或干略宏举契阔戎旃或委质藩
朝陈力王室诚着出纳节表屯夷经文纬武忠勤恳至固已契叶风云寄深舟楫虽褒贤之道
已纪於旗常而推恩之令未洽於胤緒宜畀宠章式遵故实无忌玄龄如晦敬德各封一子郡
公士廉君集士及叔宝知节各封一子县公俾夫比踪曩烈如带如砺垂裕後昆【贞观五年
九月】

封建功臣诏

钦明慎徽之朝稽古为本体国经野之治利建为先莫不因可大之功弘可久之德与万方同
其乐百姓共其安享祚遐长卜世年永疏爵以五锡壤以三周监二代焕乎前史晋魏迄今旧
章废寝维城之义阙如建侯之道斯絶王纲暨弛内无匡救之臣国步方迍外无藩屏之卫致
令大盗猖獗动有窥觎蒸庶播荡屡遭涂炭进无永为之策退失象贤之典寧邦固本其可得
乎朕祗膺大宝钦承景命励精治术安缉夏夷九服同轨六合一家日月所临无思不服岂伊
人力天寔赐之既荷殊休宜弘大賚封疆郡国褒赐亲贤与夫懿戚元勲共享其利自我作古
未必专依前典允今约古隆基垂统令世祿传家足以载德图身厚已足以端成自然国有常
典民获其福皇家宗室及勲贤之臣德行可称忠孝永着者宜令镇藩作部宣条牧民貽厥子
孙嗣守其政非有大故无或黜免酬勤报効仍宜有差宜令所司明为条例定等级具以奏闻
【贞观五年十一月】

长孙无忌等十四人并为刺史封国公子孙承袭诏

周武定业祚茅土於子孙汉高受命誓带砺於功臣岂止重亲贤之地崇其礼物抑亦固磐石之基寄以藩垣魏晋以降事不师古建侯之制有乖名寔非所谓藩屏王室永固无穷者也隋氏之季四海沸腾朕连属殷忧戡剪多难上凭明灵之佑下赖英贤之辅廓清寰宇嗣守宝历岂予一人独能致此时迺既共资其力世安而专享其利乃至於斯甚所不取但今之刺史乃古之诸侯虽立名不同而其监统一也故申命有司斟酌前代宣条委共治之寄象贤在世及之典司空齐国公无忌等或材称人杰望表国章论道庙堂寄深舟楫用资文武诚着艰难折冲阃外隐如敌国或志力忠烈寔为心膂或体气强果是曰爪牙荣名始运功参締构义实休戚效彰夷险嘉庸懿绩简於朕心宜赐以藩镇改锡土宇余官食邑并如故即令子孙世世承袭【贞观十一年六月】

图功臣像於凌烟阁诏

自古皇王褒崇功德既勒名於钟鼎又图形於丹青是以甘露良佐麟阁着其美建武功臣云台纪其迹司徒赵国公无忌司空扬州都督河间王孝恭司空蔡文成公如晦故司空相州都督太子太师郑文贞公徵司空梁国公玄龄开府仪同三司尚书左仆射申国公士廉开府仪同三司鄂国公敬德特进卫国公靖特进宋国公瑒故辅国大将军扬州都督忠壮公志玄辅国大将军夔国公弘基故尚书左仆射蒋国公通故陕东道大行台尚书左仆射郧节公开山故荆州都督譙襄公绍故泾州都督郢襄公顺德洛州都督郕国公张亮光禄大夫吏部尚书陈国公侯君集故左骁卫大将军鄴襄公张公谨右领军大将军卢国公程知节故礼部尚书永兴文懿公虞世南故户部尚书渝襄公刘正会光禄大夫户部尚书莒国公唐俭光禄大夫兵部尚书英国公李积故徐州都督敬庄公秦叔宝等才惟栋梁谋猷经远绸繆帷幄经营霸图或学综儒宗德光朝右隐犯同致忠说日闻或竭力义旗委质藩邸一心表节百战標奇或受服庙堂辟土方面重氛载朗王略遐宣并契濶迺夷劬劳师旅赞景业於草昧翼淳化於隆平茂绩嘉融冠冕列辟昌言道直宠冠縉绅固以瞻伊吕而连横迈方召而长鹜者矣宜约故寔弘兹令典可并令画於凌烟阁庶念功之怀无谢於前载旌贤之义永贻於後昆【贞观十七年二月】

赠淮寧军大将军周曾等勅

勅王者体至公而立极明赏罚以垂法旌德表善发挥忠贞其有推丹诚以奉君临大节而不夺守志明节杀身定难则褒劝之典所宜优异李希烈逆天逆物通结羣盜奸谋藏於汴宋罪迹彰於汝郑倾覆城邑虐毒蒸黎忠义之徒因怀感?故淮寧军节度都虞候正议大夫试大理卿兼许州别驾占阙兼御史大夫上柱国政和郡王食实封一百户周曾忍奸邪之乱纪处危逼而思正陰建明义叶诛元凶遂与故许州都督镇遏兵马使同御寧军节度副使开府仪同三司赐太常卿兼御史中丞上柱国定州郡王食实封五十户王玢故淮寧军节度左厢兵马使兼十将开府仪同三司赐太常卿兼潞州长史占阙兼御史中丞上柱国常林郡王食实封五十户吕从贲故十将辅国大将军行右金吾大将军员外置同正员兼赐太常卿上柱国合

浦郡王食实封五十户康秀故节度监押衙宣德郎监察御史里行赐绯鱼袋姚憺故十将银青光禄大夫赐太子宾客上柱国梁兴朝故十将开府仪同三司太常卿河东县开国伯贾乐卿故辅国大将军员外置同正员兼赐太常卿侯山钦等誓心定志潜结忠谋将临汝海之郊师以襄城之野方议梟其同恶献首镐京率彼戎旗南屯蔡邑传一?以定计拟尅日而就功希冀有应殲弭可期事方垂成为魁渠之所纠察缅怀义烈悉攫屠戮无辜殒命万夫增愤形质委于原野忠魂越于草莽恍惚幽壤茫茫无依朕所以负扆长嗟坐朝兴悼念忠良之不造空名在而身歿休德壮志贯于神明而为元恶矫诬翻欲归过岂可使义烈之绩泯而不彰宜加褒赠以示中外曾可太尉赐实封二百户通前三百户玠可司徒赐实封二百户通前二百五十户从贲可尚书左仆射赐实封一百户通前一百五十户秀琳可赠尚书右仆射赐实封一百户通前一百五十户憺可赠兵部尚书赐实封二百户兴朝可赠户部尚书赐实封一百户乐卿可赠刑部尚书赐实封二百户仙钦可赠工部尚书赐实封一百户仍令右散骑常侍萧昕往汝州界首以礼致祭并委李勉哥舒曜与州计会访其家口父子兄弟俱以名闻即当类叙别有优獎有子者仍许其回父官爵其子孙三代以来有过犯者得以逋減一等罪论用彰峻节淮寧军节度押衙中散大夫试殿中监兼唐州别驾占阙上柱国韦清与周曾姚憺始末同志曾等遇害清以智免率其麾下间道归诚大节可嘉公赏宜茂可银青光禄大夫守太子宾客兼御史大夫定安郡王食邑三千户仍赐实封二百户勲如故朕抚临亿兆於今五年每旰食宵衣勤求政理推诚委下日冀休兵明未烛幽德慚柔远戎车尚戒大信犹鬱使忠烈之士殒身贼庭静言兴怀一食三叹罪己之责实谓在予其周曾等所赐实封可载於典策传其子孙永固山河之誓代代无絶自建中以来如有为国竭诚密图元恶事或未就翻被诛夷或名氏未彰或休声未振者既死节於王事宜书勲於竹帛并委诸道招讨节度所在博访明加晓示得其事迹具以奏闻特以褒獎朕方建明义於蛮貊宣大信於四海申必罚以惩其奸慝施厚赏以报其勲庸宜宣布天下令知朕意【建中四年】

赐将士名奉天定难功臣诏 陆贄

勅国家受天明命平一字内自武德迄今天宝百四十载海内无事崇德广化泽及生人时治和平俗登富教鰥寡孤独咸得其所鸟兽鱼鳖亦莫不寧凡今有生实赖亭育寇戎伺间盜起幽燕率土之人莫保性命肃宗以神武戡大难先朝以仁德绍兴运区域再造亿兆再康室家离拆而复安子孙煦妪而相守劳徠安集垂三十年则我列圣之於天下也惠泽深矣朕以寡昧祇膺宝历常恐不克负荷罔敢怠荒道有未明事多乖谬下情壅而不达大信鬱而不彰两河之间羣祲连祸朕务除大患靡憚暂劳是以兴有征之师问干纪之罪昨以泾原土庶将适汝郊失於抚綏致兹潰叛朱泚乘衅因构异图肆其狼心诱我蠹贼谓君可以叛谓天可以欺横忽凌悖无所愧畏朕至失守宫阙出次郊畿九庙震惊万姓奔骇内省思咎外顾怀惭罪实在予不敢自蔽意者宗社降佑大警于朕躬夙夜殷忧庶乎有补实赖股肱心膂励从戎之节方岳将校集勤王之师赴难如归见危思奋坚贞励操何日忘之平巨猾者必仗於羣雄赏茂绩者不限於彝典保勲庸於带砺传爵邑於子孙崇功美名与国终始其诸军诸使应到奉天悬将士等宜并赐名奉天定难功臣实封者子子孙孙代代无絶身有过犯逋減罪二等子孙有过犯逋減一等当户应有差科徭役一切蠲免其功臣已後虽衰老疾患不任军旅当分粮赐等并给金终身死亡之後回给家口十年勿絶如有能梟擒朱泚者即以朱泚在身官爵与

之仍加食实封二千户朱泚所在有田宅财物悉便充赐其梟擒朱泚贼大将以下并节级时加优宠仍各与实封应梟擒朱泚人所有田宅便赐之其余立功因应合授功立赏并准今月七日十一日十四日勅处分其今日已前身死王事者追赠官爵亦称奉天定难功臣子孙为功臣之家应合袭封减罪放免差役等一切同例宣告中外令知朕怀【建中四年十一月二十四日】

褒赏淮西立功将士诏

叛臣希烈窃据淮沂师旅一兴縣聯莫解服劳者役从不暇受污者无路自新通邑化为丘墟遗骸遍於原野每念及此心伤涕流自昔劳师靡有不悔以虞舜之圣屈於苗人汉武之强弊於戎虏矧乎德犹不逮力或未全我其永怀亦以自誓乃者下哀痛之诏布寬大之恩普天戴新殊化必宥然则尚劳师旅御扞封陲有累岁离弃室家有经时不解甲冑忠虽为国咎实在予君人若斯寧不知愧赖将相士旅一其诚心奋扬武威慎固疆宇远人思服元恶就诛黎庶方致於安寧役戍永期於休息茂官以旌美赐宴以劳還赏不移时式遵懿典都统检校司空平章刘玄佐宜与子孙一人五品正员官节度使检校右仆射李澄检校工部尚书曲环检校户部尚书李臯兼御史大夫樊泽等各与子孙一人七品正员官都防御使工部尚书贾耽都团练使御史大夫卢玄卿张建封等各与子孙一人八品正员官检校司空平章事李抱贞检校司空平章事李纳检校右仆射平章事韩□工部尚书田緒等各遣将士五千人赴河南行营以讨不庭厥有成绩抱贞纳□各与子孙一人六品正员官緒与子孙一人八品正员官应淮西界州县本军镇守及诸道赴行营将士等共赐物三千端足以充赏设仍委本道条例奏闻并与甄叙其行营将健各放归本道明加宣谕令悉朕怀【兴元二年四月】

録蕃官子孙诏

乃者吐蕃犯塞毒我生灵俶扰陇东深入河曲朕以兵戎初定伤疾未瘳务息战伐之谋将遂通和之请亦知戎丑志在贪婪重遗修睦之词允乃寻盟之会果为隐慝变发墮宫纵犬羊凶狡之羣乘文武信誠之衆苍黄沦?深用惻然此皆由朕之不明致其若此无德於万?实有愧於四海宵旰贻忧何嗟及矣今兵部尚书崔汉衡等皆国之良士朝之荅臣嬰紃穹庐眇然殊域念其家室或未离於屡空禄以息男庶有资於薄俸汉衡宜与子一人正七品官司勲员外郎郑叔矩检校户部尚书路泌殿中侍御史韩昇及大将孟日华辛云李至言范澄王良贵乐演明阳皆权文誠各与一子八品官试金吾兵曹参军袁同直前榆次尉裴頌及副兵马使已上各与一子九品官仍委本使即具名衔奏闻

为李怀光立後诏

怀念旧功仁之大也兴灭继絶义之宏也昔蔡叔圯族周公封其子於东土韩信干纪汉后爵其孥以弓高侯君集之不率景化我太宗存其胤以主祀详考先王之道泊乎列祖之训皆以刑佐德俾人向方则斧钺之诛甲兵之伐盖不得已而用也曩岁盜臣窃发国步多虞朕狩於近郊指期薄伐将振昆阳之旅以兴涿鹿之功徵师未达於诸侯卫士且疲於七萃而李怀光

三军夙驾千里勤王上假雷霆之威下逐虎狼之衆议功云始守节靡终潜构祸胎拒违朝命弃同即异舍顺效逆为臣至此在法必诛犹示绥怀庶其牵复而梟音益厉猳突莫迁大戮所加曾无噍类虽自貽伊戚与衆弃之而言念尔劳何嗟及矣以其前効犹在孤魂无归怀之愧然是用凄軫予欲布陈大信冀以化成保合太和期於刑措宜以怀光外孙燕八八赐姓李氏名承緒授右卫率府胄曹参军承怀光之後仍赐钱一千贯文任於怀光墓側置立庄园供养怀光妻王氏拜备四时享奠之礼呜呼朕实不德临於兆人泣辜宥罪素诚所志尔其保姓受氏宣力承家勉绍乃考之建国庸无若尔父之违王命【贞元元年】

令画中宗以後功臣於凌烟阁诏

昔我列祖乘乾坤之荡滌扫隋季之荒屯则有熊罴之士不二心之臣左右经纶参翼締构用端命於上帝付畀四方宇宙既清王业既成乃图厥容列於新阁懋昭绩効式表仪形朝夕不忘永垂来裔君臣之义厚莫重焉贞元己巳岁秋九月我行西宫瞻宏阁崇构见诸臣遗像颯然肃然和敬在色想云龙之叶应感王业之艰难覩往思今取类非远且功与时并才为代生尊主庇人何代不有在中宗则有桓彦范?着匡载之绩在玄宗则有刘幽求等申翼奉之勲在肃宗代宗则有郭子仪等扫殄氛祲今则李晟等保又朕躬咸宣力肆勤光复宗祏订之前列夫岂多谢阙而未録孰谓旌贤况念功纪德文祖所为也在予曷其敢怠有司宜叙年代先後为图其像列於旧臣之次仍令皇太子书朕是命纪於壁焉庶播嘉庸昭明天下俾後之来者知元勲之不朽【贞元元年】

録李洧等子孙诏

建中以来州军及军国归人李洧李再春田昂李士真康日知李澄杨政义符璘李惠登薛翼苏清沔等王者报功义惟过厚存则加其殊秩歿则恤其遗孤然後忠不徒施人知所劝故徐州观察使李洧等顷逢艰阻各着欵诚或以地来归或率徒効顺名迹昭显史册具存先朝念功皆极封赏岁月稍久湮没日多再有甄明用申激劝宜委中书门下即访其子孙量材叙用【元和】

録功臣子康志寧等各除官职勅

君臣运合故殉国以毁家劝赏义明故褒功而显节存则畴其爵禄歿则禄其子孙然後忠义不遗典章斯在故磁晋隰等州观察使检校兵部尚书康日知故徐州刺史兼御史大夫李洧等一十家皆有茂功藏於盟府故命搜访後嗣光贲前人今志寧等或服戎着绩或从官有成或投迹军府之中或滯才州县之职咸加甄録各茂官荣庶乎受禄者无忘於事修怀忠者使其必报勉膺宠渥无替前劳【元和八年八月】

叙用勲旧武臣德音

勅朕闻昭德示威先王所以用武禁暴夷难後代安能去兵故文德诞敷武备宣耀外以环御

四海内以底清中原则军旅之制有经师律之能必表朕纂承鸿业?奉丕图宵分永怀何以康济岂独鼓鼙有感方思将帅之臣征伐为心乃宠干戈之士况文武并用古之格言勲旧不酬劳者何劝惟我高祖太宗以晋阳之旅平一海内肃宗以灵武之衆收复二京代宗有陕郊元从之臣德宗有奉天戡难之士每念勲伐无忘寤怀如闻近日武班之中淹滞颇多虽负才略无由自明又有诸道荐送大将或随节度归朝自今已後宜令神策大将军军使及南衙常参武臣各具由历受官年月前後功勲牒送中书门下若勲伐素高人才特异者候有相当用处即具名奏闻量加獎擢其常参官资考深久未得迁转者准具年月与改转不得令有淹滞其先受文武官者亦宜准此使幕宾寮皆有年代改转军府大将岂可独不叙迁自今已後诸道节度都团练经略等使下各随本处其大将名自巳曾受监察以上官者并限三周年量与改转如有功效合非时与改者不在此限其职名是兵马使都虞候押衙以上前後并未曾奏官者亦仰量绩効奏官辕门委营垒分师有役干戈无由稼穡况天宝以後屯兵七十余年皆成父子之军不习农桑之业一朝罢归陇亩顿絶衣粮言念饥寒深用嗟悯应天下节度使都团练防御经略等军所置兵数各委本道据守旧额以为定数不得辄有减省其有逃亡病死及犯解退当时择拣有武力艺能者添补奋行於阵决命捐躯不顾危亡每嘉忠烈官健有死王事者三周年不得停本分衣粮如有父兄子弟试其武艺堪在军中承名请粮赐者先须收补孝本安亲惟深养老用敷恩惠以慰耆年应军将及官健有父母年及七十已上委本州本道每至节岁量与酒麵优养守塞备边固不可废烟尘既静亭障无虞诸道旧有防秋兵马在边上者自依年代替近师旅屯集馈运颇多不免於诸道留守留使钱内每贯量抽二百文以充国用幽镇既以浣雪供费亦渐有常其河北诸道及河东兖郛淄青汴宋陈滁泽潞河阳郑滑等道并诸镇并不量抽刁斗晨严烽烟夜警勤劳沙塞寒苦边陲其沿边镇戍烽子等并委所管节度及城镇使量与校量上下使其劳逸得均使命往来本於传达军期警急遂至繁多非惟邮传不供抑亦号令难一自今已後应沿山东行营兵马未归本道已来进退事机并宜转委节度使仍仰条疏旧弊一一奏闻除事关急切须遣专使外其余书诏文牒一切分付度支入通发遣制使中使到行营不得辄受人情物钱及行非理鞭朴当加访察义不优容榷管之说诚为救弊随方适变所贵使人其河南河北盐法宜委盐铁使与本道节度使审计会商量务以便人为法閱习土宜则通吏理既因试效可验政能应河北诸道宜委观察使访察管内见摄官中如或清强有才行课绩者具前後所摄年月并事迹奏闻当与改授从政之方必援风俗视人相土乃合所宜弛张在达於无私法令所期於不挠应河北诸道并郛兖青等道应有新旧等科条有不便於人不宜於俗者委宣慰使与所在长吏商量废置务从人便於戏朕代天子人操执重器不以四海之富而恃其力每以百姓为念而兢於心虑文教之未敷虞武备之多阙所以辍食当宁未夜求明揣摩万几寧止三省顷以馭宇之岁藩方久安委寄广谋以缉军政而有司不达苟以惜费为心致兹停减之名无裨毫厘之用使军中老幼愁叹无归朕博听羣言用革羣弊举其指要计叶人情庶乎侯伯列城典我师旅励精抚士用副忧勤中外宣示明知朕意【长庆二年三月十日】

命京兆府修郭子仪墓诏

汉祖护信陵之冢厥有前闻晋朝修子房之墓垂有故事况本朝元老功冠鼎彝属胤嗣凋零墟域摧毁虽古无修墓孔子有言而义存掩骼周王是命断从朕意适表念功宜减赐御膳钱

三千贯文雇丁匠即日修筑仍令所司明年春仲以太牢祭子仪庙【广明元年十月】

録旧

宥周隋名臣子孙配流诏

朕听朝之暇每观前史历覽名贤佐时忠臣殉国何尝不想见其人废书欽叹至於近代以来年载非远然其胤緒或当见存纵未能显加旌擢无容弃之遐裔其周隋二代名臣及忠节子孙有贞观以来犯流配者宜令所司具録奏闻【贞观中五年七月】

赐卢怀慎家粟帛勅

故银青光禄大夫检校黄门监渔阳县开国伯赠荊州大都督府卢怀慎衣冠重望廊庙周才訏謨当三杰之一学行总四科之二等平津之辅汉同季文之相鲁节邻於古俭实可师虽清白燕翼羸金非宝然妻孥贫窶担石屡空言念平昔弥深叹悼宜惜凌统之孤用旌晏婴之德宜赐其家物一百段米粟二百石【开元四年十一月】

録苏环孙繫等各授官诏

朕惟承累世之业追先正之劳济於艰难代有勲烈既而本根已远枝叶稍零诏书屡勤於褒饰有司不忘於遴拣兹命宰辅载宏搜扬録其大功果获良嗣苏繫等咸有茂学懿行勗於前修皆人之领袖族之狐赵类能而举各命以官或任以纠?或参於闲列庶乎旌太傅之德拟将南城之封绍鄴侯之胤不俟东门之感忠义获宠古今同之【元和】

録褚遂良等孙各授官诏

褚遂良五代孙?等朕观列圣纪册祖宗盛业粲然在前其或道有污崇政有善否未始不系乎当时辅弼尝因寝殿言诸宰臣勉其匡益協心推戴且以元岁乙巳登应门敷大号俾畴贤相以访遗裔或才器擅价各列官业或血食不继宗祊已芜如遂良之委笏面争垂名史书仁杰之恢复庙社事形先觉宋璟之文吏骨鯁功参治平元紘之守规画一持成有裕其胄仅存不絶若髮各受邑吏使其自试【太和二年三年】

録魏徵等三人裔孙诏

武德以来辅相之臣以道致君以劳定国若赠司空徵故侍中知古故太尉冕语其功次皆在第一清风余祉宜及乎後昆尔等乃其曾孙式叶搜奨俾奉貽谋之庆用覃延赏之恩各命以官勉尔祖德【太和二年十一月】

唐大诏令集卷六十五

卷六十六

钦定四库全书

唐大诏令集卷六十六

宋 宋敏求 编

典礼

封禅

答请封禅诏

贞观十五年封泰山诏

停封泰山诏

贞观二十年允羣臣请封禅诏

封禅诏

停封禅诏

封禅器用从文诏

永淳二年停封中岳诏

开元二十三年封泰山诏

断屠及渔猎采捕诏

处分行事官

乾封玉牒文

开元玉牒文

开元十三年东封赦书

后土

幸汾陰祠后土勅

祠后土赏赐行事官等制

后土赦书

封禪

答请封禪诏

自有隋失道四海橫流百王之弊於斯为甚朕提劒鞠旅首启戎行翼建兴运克成鸿业遂荷慈眷躬承大宝每日旻思治不敢康寧竟怀夕惕用忘寢兴履薄御朽不足以喻赖三灵显命百辟同心海外无尘远方慕义但流遁永久凋残未复田畴多旷仓廩犹虚家给人足尚怀多愧岂可遽追前代取讥虚美所望恂恂济济叶力尽诚匡其不逮致之至道如得雅颂形於金石菽粟同於水火反朴还淳当如来议【贞观五年正月】

贞观十五年封泰山诏

肇有蒸庶树之司牧载籍所纪风烈犹存至於道洽品物功成宇县天睠彰於符瑞人事表於隆平莫不增封岱宗广禪梁甫荣镜六合对越三神前圣所以垂其尊名後王所以仰其休烈盖由此也自火德既衰三光分裂金行失御九鼎沉沦诸华竞逐彝伦大坏虽周室削平赵魏隋氏混一文軌而金革之事未戢於封疆雅颂之音弗闻於朝庙遂使至教阙如淳风莫反齐郊絕类帝之礼日观缺升中之仪其已久矣朕丕膺景命嗣修鸿基承大乱之余当率土之责负展兴惕纳隍在虑上凭宗社之灵下资士庶之力草昧伊始援干戈以靖乱区夏既平弘礼乐以纬俗尉侯无警菑畲有年比屋咸保其欢含气不违其性殊方异域尽地界而来廷应图合牒殫天符而表瑞缅怀载籍详求诸已岂伊寡德能致此乎固乃上玄之所叶赞也而羣公卿士百辟庶寮固陈人只之意请遵封禪之典推而不居至乎数四文武之情弥切内外之议日闻请诚繁频淹历年载朕继迹百王因心万物上奉苍昊义在荐功下抚黎元方祈厚福既迫兹理敢不祇从猥以眇身齐美上代永言夙志凜乎增惕可以来年二月有事泰山所司宜与公卿并诸儒士并朝臣有学业者详定其仪博考圣贤之旨以允古今之中务尽诚敬称朕意焉【贞观十五年四月】

停封泰山诏

自古圣王受天之命建显号於封禪扬洪名於竹帛者莫不功济夷夏道叶人只然後登泰山

之高刊梁甫之石未有七德靡纪九部寂寥而欲齐声於圣哲并美於篆籀者也朕承宗庙之重当区宇之责寅畏三灵忧勤百姓虽戡剪祸乱定克遐荒而至教犹鬱刑典未措胜残之化未洽於率土和平之风多慙於往烈是以覽经籍而自失想坛场而增惧亟寝缙绅之奏屡拒公卿之请逡巡大典荏苒数载近者百寮庶尹频繁抗表殷勤固陈咸以为两仪交泰四夷宾服礼让兴行年丰谷稔苍昊呈符於上灵符不可以久替黎献協心於下衆欲不可以固拒朕迫兹羣议敢不敬从欲荐功上玄大报后土升中之仪已具省方之期有日今太史奏有彗星出於西方抚躬自省深以战栗良由功业之被六合犹有未着德化之覃八表尚多所阙遂使神祇垂佑警戒昭然朕畏天之威寝兴靡措且旷代盛典礼数非一行途之间劳费不少东夏雕弊多未克复将送仪仗转运粮储虽存节省之仪终烦黎庶之力非惟上亏天意亦恐下失人心解而更张抑有故实前以来年二月有事泰山宜停庶夙夜自修遂其罪已之志勤恤匪懈申以纳隍之情俛蒙灵祇回睠宗社锡福朝廷同於大道风俗归於朴素告成之美更思其宜仍命所司泰山有前代帝王因封禅立碑及石函之检类遭离乱被贼毁废并修立瘞藏之【贞观十五年六月】

允羣臣请封禅诏

朕遐观哲王焕在方册功既成矣咸修礼以升中道既行焉必奉符而告禅所以发挥天命昭告上灵其有建显号以创鸿徽施尊名而腾茂烈者莫不扬辉於镂玉绚景於涂金昭昭然丽三辰而并运焉播四溟而不极朕诚寡德良深景慕曩昔氓俗雕弊国步甫安勉致隆平日不暇给槐卿守阙请继美於云亭岳牧叩阍祈踵武於梁岱自惟菲薄至道未凝抗礼昊穹实惟疑惧緬寻幼齿运终交丧忘其家以徇天下委其体以济寰区翊戴先皇削平诸夏出於万死首导五横之源不顾一身光锡兆人之命自越炉炭获反营魂拔於鬼籙并登仁寿切惟天地之大德存於施生朕以径寸之小心袭於造育降斯休泰谅或由兹不然者何能致於此也遂得池隍象浦苑囿龙沙置一候於鷁林同一文於鲸水并资天睠责以咸寧岂朕之微而能及此今兹列辟卿士洪生硕儒各述灵徵累陈丹款既迫羣议当事敬从【贞观二十年十二月】

封禅诏 许景宗

门下朕闻天大地大首播黎元娲皇地皇肇恭玄籙是知施生为德处崇高而不言亭毒攸资委欽明以司契泊乎三正迭建五运相迁休烈存乎坟典至道流乎雅颂历兹千代咸宅九州逖听风声抑可知矣其有仰齐七政俯会百神祭灵睠於祥符报玄功於昭告莫不罄情梁甫继踵云亭对越两仪尽先圣之能事扬历三统垂曩哲之尊名悬镜天衢罔不由於此也自中阳絶纽堙赤检於穷泉官孽绍兴阻黄星於天塹永嘉东徙化金马以为牛道武南徂飞苍鹅以登【阙】祚周含岳胤建三业以巢倾隋拜舜後及二世而舟覆莫不以凶易乱譬畏迹而横奔以暴代昏同抱薪而止燎咸资攸斲之道冀及淳化之深各怀巨壑之心规享上灵之佑却行求进其可得乎由是寂寥千祀无怀之风不嗣泯弃七经子长之言殆絶遂致成山日观久阙升中之仪汶上明堂畴闻类帝之义顾瞻礼乐深有可嗟朕初践危机愍斯穷运上同附翼下靡息肩化感天狼刘帝?鸿波荡岳溺横流而罔诉大浸稽天垫重昏而莫拯惴惴黔夏

各垂餌于鯨鯢籍籍僵屍并縻肌于楔竄上靈慈惻爰啟朕心景命潛通稟其仁育之性陰符煥發導以戡剪之功於是負荷休徵援旗鞠旅肅恭儲祉吟云躍鱗順朱鳥以行誅騫丹鳳而反舉射九鳥而懸日月區品物以昭陽和煉五石以造乾坤濟崩角以全眉壽於是上尊先帝凝旒於廟堂躬履兵鋒忱勤於燮輔既而仰逼威命俯順樂推越自唐侯言膺下武深推幽贊之重自勗若厲之懷遂至靈貺無涯剪旄頭而降錫游魂削狂盡窮發以開疆東苑蟠桃西池昧谷咸覃正朔并充和氣校凝旒於往代窮今古而罕聞考光宅於前皇罄紬緡而莫覩方今六合之表擊壤傳聲四海之隅菑畲歲稔含氣者靡乖其性稟命者相賀其生豈朕眇身勤勞所逮諒由高明垂鑒祚此隆平今茲三事大夫百寮庶尹各述天人之祝請躋封禪之踪顧惟寡薄推而不有杜絕羣言至于數四中外之情尤切企伫之望逾深朕又詳思荷財成於穹昊自古賢哲并歸功於大帝迫斯至理弗獲固辭展禮上玄寔增慙懼可以貞觀二十有二載仲春之月式遵故實有事於泰山諸內外臣僚岳牧卿士既相敦喻將事告成各罄乃心無亏政道恪居所職務協時邕所司宜與縉紳先生載筆圓冠之士詳求典禮裁其折中深加嚴敬稱朕意焉其今年朝集使宜集洛陽宮應朝集依十五年三月八日勅諸王并听來朝其北蕃日磧以南大首領赴會仍令天下諸州搜揚側陋其有學藝優洽文材蔚瞻政術甄明才膺國器者并宜申送限以來年二月一日摠集泰山庶令作賦擲金不韞天庭之揆被褐懷玉無溺屠釣之間務得英奇當加不次主者施行【貞觀二十一年正月】

停封禪詔

門下朕聞探玄蹟者先實而後賓體至公者本仁而末禮名歸於已往哲存而弗務德利於人前聖徇而為急是用範圍天地權輕重以會時宜取則陰陽適變通以從衆欲由是古之封禪無奪事機所謂奉天咸資務隙朕仰窺前志歷選哲王無懷有巢緡逾契之表龜文鳳紀越在俎豆之先叩寂寞以傳疑故可略而言也至如三元立統百物正名步驟之軌非遙損益之原可挹雖則堯心廣運局壘域於流沙禹迹遐宣限要荒於碣石猶且先弘即叙次展玉帛之儀首創賓門方備云亭之典告成之義罔弗由茲況朕奄有方輿愷誠該於千古仰承靈睭降福走於百王巨海所環莫非臣妾長河攸括并入封疆日者夷夏同文禎符狎至謂可鳴銓日觀勒牒仙闕許以來春親行告禪而今延陀一姓流竄西垂控弦千許初歸正朔亡其砂塞之地游魂戴斗之鄉一物之微猶警心於夕惕九夷乃陋敢忘怀於施生新就繁維理須安置又以朕蚤歲躬勤拯溺至於炎月沿北不安公卿庶僚各勤諄請遂有翠微之役非無板筑之勞既而山谷阻深朝宗有碍重披丹懇請建玉華朕以寸心經綸億兆冒茲隆熱貽朝野之深憂既鑒乃誠副率土之企望遂復頻有造興恐致煩勞兼聞河北數州頗傷淹溺既為民父母思濟黎元順動升中理無兼遂其介丘大禮宜且權停前追諸王及四方岳牧并蠻夷酋長令以明年二月會泰山者令并宜停其集便及選舉人等前令詣洛陽官可依常年集限并赴京師請為封禪事舉人營造轉營等事以上亦宜并詔停其玉華宮所立制度前已下詔務從菲薄今乃庶事減省更令卑陋示免風雨稱朕意焉可分道馳驛散頒天下主者施行【貞觀二十一年八月】

封禪器用從文詔

古典礼制文质不同至於制度皆随代革惟祭天地独不改章斯乃自处以厚奉天以薄今又封禪之礼即用玉牒金?器物之间复有瓦樽秸席一时行礼文质顿乖驳而不备深为未当其封祀降禪坛所设上帝后土位先设稟秸瓦瓶甕盃等并宜改用茵褥罍爵每事从文其郊祀亦宜準此也【麟德二年十月】

停封中岳诏

朕闻仁者德之本叶亨育之至途礼者道之末乃帝王之余事历选往初详观曩躅惻隐以孚其志变通以会其神朕以虚薄祇膺宝位旰食宵衣惧忝於宗社如伤如厉伫济於黎元每以皇基肇开范围覆载遗思所覃昭格区宇?荷灵命常虑下亏鸿业遍刊群岳不足上报玄功已升闻於日观思歎謁於天台志在告成谅非为已属今兹丰稔方有事於嵩丘崇累圣之丕绩祈兆人之嘉佑顷者分使出巡存问风俗河南河北尚有十余州旱涝加以朔方寇盗时复侵边关内流民未能复业一物失所犹甚纳隍数郡不寧岂宜备礼前欲以来年正月封中岳者且停之【永淳二年十一月】

封泰山诏

自古受命而王者曷尝不封泰山禪梁父答厚德告成功三代之前率由斯义越自魏晋以降迄至周隋帝典阙而大道隐王纲弛而旧章缺千载寂寥封崇莫嗣物极而复天祚我唐武文二后应籙受图泊于高宗重光累盛承至理登介丘怀百神震六合绍殷周之统接虞夏之风中宗弘懿铄之休睿宗穆清粹之道巍巍荡荡无得而称者也朕昔勘多难稟略先朝?奉慈旨嗣膺丕业是用创九庙以申孝敬礼二郊以展严禋宝菽粟於水火捐珠玉於山谷兢兢业业非敢追美前王日慎一日实以奉遵先训至於巡狩大礼封禪鸿名顾惟寡薄未遑时迈十四载于兹矣今五材无眚百谷有年刑罚不用礼义兴行和气氤氲淳风泊淡蛮夷戎狄殊方异类重译而至者日月於阙庭奇兽神禽甘露佳醴穷祥极瑞者朝夕於林籙王公卿士罄乃诚於中鸿生硕儒献其书於外莫不以神祇合契亿兆同心斯皆列祖圣考垂裕余庆故朕得荷皇天之景佑祖庙之介福敢以眇身而颺其让是以敬承羣议弘此大猷以光我高祖之丕图以绍我太宗之鸿业永言陟配祇感载深可以开元十三年十一月十日式遵故实有事泰山所司与公卿诸儒详择典礼预为备具勿广劳人务存节约以称朕意所沿封禪仪注兵马陪集并皆条奏布告遐迩【开元十二年十二月】

断屠及渔猎采捕勅

勅自古明王仁及万物今助天孳育方欲告成其缘祭祀及在路供顿牺牲犒牢礼不可阙除此外天下诸州令并断屠及渔猎采捕驾回至京任依常式

处分行事官

勅封祀告成为万姓祈福必资清洁以副朕心其行事官及斋郎应致祭者宜令御史行牒斋

坊勿容疎忽【十一月】

乾封玉牒文

嗣天子治敢告于昊天上帝有隋运极屯危数穷否塞生灵涂炭鼎祚沦亡高祖仗黄钺而救黎元锡元龟而拯沉溺太宗功宏链石定区宇於再麾业壮断鳌饮沧溟而一息臣忝承余緒繆延积庆遂得崑山寢燎炎海稻波虽业茂宗祧实降灵穹旻今谨告成东岳归功上玄俾大宝克隆鸿基永固凝薰万姓陶化八紘

开元玉牒文

有唐天子臣隆基敢昭告于昊天上帝天啓李氏运兴土德高祖太宗受命立极高宗升中六合殷盛中宗绍复继体不定上帝眷佑锡臣忠武底绥内难推戴圣父恭承大宝十有三年敬若天意四海晏然封祀大岳谢成于天子孙百禄苍生受福

东封赦书

门下朕闻天监惟后克奉天既合德以受命亦推功而复始厥初作者七十二君道德洽着时至符出皆用事於介丘升中於上帝人情之所望果有以塞之皇王之叙固可得而言也朕接统千载承光五叶惟祖宗之德在人惟天地之灵作主往有内难幽赞而集大勲间无外虞守成而纘旧服未尝不乾乾终日思与公卿大夫上下叶心事求至理以弘我列圣其庶几乎馨香今九有大寧羣黎乐业时必敬授而不夺物亦顺成而无妖慝建皇极幸致太和洎乃幽遐率皆感被戎狄不至惟文告而来庭麟凤已臻将觉悟而在薮以故凡百执事极言大封顾惟不德初欲勿议伏以先圣储祉与天同功荷传庆以在今敢侑神而无报大节斯在朕何让焉遂奉遵高祖太宗之业宪章乾封之典时迈东土柴告岱岳精意上达肸鬻来应宿信行事云物呈祥登降之礼斯毕严配之仪获展百神羣望莫不怀柔四方诸侯莫不来庆斯事天道之介福也邦家之耿光也无穷之休祉岂独在予非常之惠泽宜其逮下可大赦天下自开元十三年十一月十三日昧爽以前大辟罪以下罪无轻重已发觉未发觉已结正未结正囚系见徒咸赦除之惟十恶死罪不在此例流人未达前所放还其有挟藏军器亡命山泽百日不首复罪如初敢以赦前事言首者以其罪罪之内外文武官三品以上赐爵一级四品以下一阶邠王守礼宁王宪岐王范薛王业各与一子三品官公主嗣主县主郡主各与一子官其应文武行从官加阶之外并赐勲两转三卫引驾细引黄衣长上飞骑彊骑先有武散官加两阶未给武散官各赐勲两转卫士马主军戎主幕士掌闲供膳太常及仗内声音人行署及蕃官七色并别勅杂色定名行从人亦赐勲两转缘大礼登山供奉侍从行事輦脚等官三品以上特赐一阶仍与一子官四品以下特赐一阶仍赐勲两转量与进改其四军别抽登山宿卫及诸司上山执当官三品以上赐爵一等与一子出身四品以下加一阶赐勲两转亦量进改其白身人及行署蕃官放蕃选其山下昇坛行事官三品以上加爵一等赐勲一转四品以下加一阶赐勲一转选日稍扰诸献官及宿卫斋宫将军率中郎并郎将并两京留守诸军节度使并升坛例诸有职掌押当非昇坛例诸有职人加一阶选日优量其加阶应入三品五品人非

特赐者并依十一年三月二十八日勅节限斋郎礼生见任官前资官以上人并依资量材与处分未出身者放出身皇亲别勅承恩陪位官者亦准此诸州岳牧四府长史朝觐陪位者泛阶之外各赐勲一转诸方使人及诸州父老宗姓并从家子孙至岳不得陪位者并赐勲一转物五段诸州及兖州道僧至岳见大礼者并赐五段孔子後褒圣侯量才与处分天下致仕官各依本品赐一季禄并束帛其陪位者仍赐勲一转诸蕃侯王酋长来会礼者各赐加一官至都节级赐其入朝留在边军人亦准此其蕃中只候衙官刺史县令并与赐物及袍带突厥可汗小杀等诸国王守护塞垣岁月朝贡并赐物付使将往侍老年百岁以上者板授下州刺史妇人板授郡君年九十以上板授上州司马妇人板授县君年八十以上者板授县令并妇人并级量赐束帛其预见大礼侍老各别加侍丁一人孝子顺孙义夫节妇旌表门闾终身勿事行人之家及鰥寡惻独并疾病不能自存者委州县长官倍加存恤诸军行有文武散官者加一阶白身者赐爵一转负欠官物逋悬租调并宜放免其行过州县供顿劬劳并帖顿百姓有杂差科并车马夫役者并免一年租税兖州免二年租税当顿官人始末不絕者与中上考仍赐勲一转朕永为王业繫赖旧勲元首股肱其犹一体自武德以来功臣宰辅或名存王室遗嗣沈沦或身无大故衔屈泉壤直令所司放择申理唐元元年六月初十日立功官人往属艰难能尽忠义今成大礼何日忘之宜各与一子出身无子者任回与周亲之人有司试策三道等第收奨朕躬陟天门宿斋日观时属严冬雪後初变风寒露立祈恩誓欲代人当咎俯仰之际顿息霜飈奠献之辰变同韶景诚荷上天垂佑亦赖灵山吐祥诗云无德不报宜封泰山神为天齐王礼秩加三公一等宜令所管崇饰庙祠环山千里宜禁其樵采给近山二十户复以奉祠神率土之内赐酺七日任於村坊内宴乐不得率歛烦劳其节文有未沾及者有司比类奏闻其封祠有数处行事者从一处叙赦赦书日行五百里主者施行

后土

幸汾陰祠后土勅

勅王者承事天地以为主郊飨泰尊以通神盖燔柴太坛定天位也瘞埋太折就陰位也将以昭告灵祀克崇严配爰逮秦汉稽诸祀典甘泉於雍時后土於汾陰既遺庙之巍然亦灵光而可烛朕观风唐晋望秩山川肃恭神明思致禋敬为人祈福以辅昇平合此神祇应於嘉德宜以来年正月北巡狩行幸至汾陰以二月祀后土所司宜准式【开元十年二月】

祀后土赏赐行军官等制

自古受天之命作神之主崇德祀地尽孝配亲存乎礼经不可阙也朕承累圣之绪仗卿士之力方隅清谧宇宙义安北巡并都南辕汾土览汉武故事修后土旧祠时为仲春地气萌动将先政本为民祈谷斋戒惟寅粢盛惟洁仲尼曰吾不与祭如不祭岂非躬尽孝敬以致神祇乎而经始遺坛宝鼎出地奠兹币玉荣光塞河将何以幽答神心上应灵贶朕又惧焉今大礼克举休允祥洽自天之佑岂予一人思与百辟同兹嘉庆亚献邠王守礼终献宁王宪各赐七百疋申王撝岐王范薛王业各赐帛五百疋余上坛官三品以上赐爵一级四品以下各加一阶应入三品四品见任四品官以上先授正四品以上阶经三十考者六品以上官授正六品以

上阶经十六考者令所司勘责奏听进止诸沿大礼有职掌者官赐勲两转余陪位官赐勲一转中书门下三品六曹尚书御史大夫食实封三品以上功臣各与一子官其立功万骑身亡歿者虽预创业不见盛时念功思旧情有感恻

并令所司检勘亦各与一子官改汾陰为宝鼎县官同升坛官例赐一阶管坛一乡复给一年其驾行幸处百姓沿供顿应须供当者仰置顿使商量奏闻及制文不该者所司亦比条件闻奏【开元十一年二月】

后土赦书 张九龄

门下昔者巡狩所至柴瘞所在盖取诚享以遵告类朕躬承祖宗之烈获主神祇之祀夙夜祇畏不敢荒宁故勤兵朔陲先展义於粉社回旌睢上遂有事於郊坛王者父事天母事地则汉氏析谷未始正名周礼降神乃为徽福而已朕以天命为重子道为先惟兹精诚在乎教孝庶蒙福於四海期永康於兆人是以率由旧章恭敬明祀严配之诚既展奠献之礼又终且春秋之义大事在祀斋祭之福庶品维祺岂独在予而有斯庆可大赦天下自开元二十年十一月二十一日昧爽以前大辟罪以下罪无轻重已发觉未发觉已结正未结正咸赦除之官人犯赃及有事被推者本罪虽原不得更令却上仍别与处分自奉先以来有杂犯流移人并配隶人各量移近处左降官未经量移未复本资者奏听进止天下遭损免州应损户减一分以上者及供顿州无出今年地税如已徵纳听折来年地税逋租悬调贷粮种子欠负官物在百姓腹内者亦宜准此其不损免州自开元十七年以前所贷粮种子欠负官物在百姓腹内者亦宜准此诸州缘供顿差帖助夫亦放其家今年地税孝子顺孙义夫节妇旌表门闾终身勿事诸州侍老百岁以上赐粟七石九十以上赐粟五石八十以上赐粟三石所由速付勿淹旬日太原潞府侍老等先已加恩不在此例亚献皇太子鸿赐物二千疋终献庆王潭赐一千疋邠王守礼宁王宪薛王业各赐物一千疋忠王浚以下各赐物三百疋夹侍正衣进珪捧珪汝阳郡王淳等各赐物三百疋皇太子夹侍正衣各赐物一百五十疋裴光庭萧嵩弼亮朕躬弘益斯远不有优异何殊等伦加阶赐爵之外各与一子官无子者任与周亲仍各赐物三百疋二王後各赐物二百疋长公主各赐物三百疋嗣王郡主县主各赐二百疋行从文武官三品以上赐物八十疋四品五品赐物六十疋六品七品赐物四十疋八品九品赐物二十段升坛官三品以上特赐一阶四品以上各加一阶应入三品五品官阶相当不限考数听得入知顿使及判官修礼仪官撰玉册官知顿御史等加一级修坛扬州刺史及修坛官各赐物一百疋其已有升坛职长从一头处分缘大礼有职掌官赐勲三转行从官首末不絕及陪位官各赐勲两转内外文武官三品以上赐爵一等四品以下各加一阶致仕官三品以上赐物七十疋四品五品各五十疋从蕃客鸿臚安置陪官见大礼者宜赐物五十疋节级分付南北衙应宿卫斋宫官及左右厢知兵马虞侯总管以上及判司别奏兼孔目等官更加勲一转前资官选日稍优与处分白身人有资劳者简选之日优与处分无资者赐勲两转仍各赐物五段两营弓手六蕃并行宜各赐勲两转物五段仍量折蕃役诸位彍骑及兵角弓手官马主掌闲幕士驾供膳主膳习驭工人乐人杂尹官户白身有职掌人合行从人等各赐勲一转物三段其斋郎既是现任官准坛上坛下有执掌官吏处分执弹三卫及礼生赞者各减二年劳无劳可减者简选日稍优与处分流外行署从者各赐勲一转有职掌者各两转供顿州刺史同陪位官例

始末转支顿官各与上下中考蒲州刺史宝鼎县官同升坛官处分管坛一乡百姓给复二年蒲州侍老等准太原潞府例降一等武德初功臣每有大庆必存追远业参运始义合赏延其子孙沈翳无在朝者宜令勘责即与一子官唐元初立功臣等艰难之际诚效亦深言念其初岂忘终始其三品以上各赐紫金鱼袋有亡歿者优赠一官仍与一子官已得官者量加优与两京留守京兆河南尹四大都督府长史诸军节度副大使准行从官例处分诸方通表疏使人预见大礼准陪位官处分诸道阵亡人家仰州县存恤不周济者量事赈给诸道健儿别勅行人各赐勲一转仍令所司勘会团官奏写告身送付诸道行人或有身死逋逃犹徵课役累及亲邻即宜审勘为其除削皇亲中有文武才用堪任使者委宗正以其名上当与獎擢五岳四瀆名山大川自古圣帝明王忠臣辅相各令致祭务其诚洁赦书有所未该者所司比类奏闻亡命山泽挟藏军器百日不首罪复如初敢以赦前事相告者以其罪罪之率土之内赐酺三日赦书日行五百里布告遐迩咸使闻知主者施行

唐大诏令集卷六十六

卷六十七

钦定四库全书

唐大诏令集卷六十七

宋 宋敏求 编

典礼

南郊一

贞观十七年冬至有事南郊诏

祭圆丘明堂并以高祖太宗配诏

郊礼唯昊天

开元十一年郊天制

命宰臣等分祭郊庙社稷勅

外坛入庙行事官先去剑佩及履勅

天宝元年南郊制

每载四孟合祭天地诏

天宝五载南郊诏

元年建子月祭圆丘诏

百官议大礼期日勅

罢告谢郊庙勅

以旱停南郊勅

南郊一

贞观十七年冬至有事南郊诏

朕闻上灵之应疾於影响茂祉之兴积於年代朕嗣膺宝历君临区宇凭宗社之介福赖文武之同心时无风尘之惊野有京坻之积厚地降祉贞石表祥莹翠色而流光发賁质而成宇前纪厥初之德次演卜年之永复述储贰之美并名字昭然楷则相次旷代之所未闻故老之所未覩猥以寡德奉成命惟往载良增兢惕自天之佑岂惟一人无疆之福方覃九土自非大报泰坛稽首上帝则靡伸奉天之志宁副临下之心今年冬至有事南郊所司率由旧典【十月】

祭圆丘明堂并以高祖太宗配诏

夫受命承天崇至敬於明祀膺图纂籙昭大孝於严配是以荐鯨鯢於清庙集振鹭於西雍宣雅颂於太师明肃恭於考室用能纪配天之盛业嗣积德之鸿基永播英声长为称首自周京道丧秦室政乖礼乐沦亡典经残灭遂使汉朝博士空说六宗之文晋代鸿儒争陈七事之议或同昊天於五帝或分感帝於五行自兹以降邇相祖述异论纷纭是非莫定朕以寡薄嗣膺不绪肃承禋祀明发载怀奉宗祧寤寐兴感每惟宗庙之重尊配之宜思革旧章以申诚敬礼曰化人之道莫急於礼礼有五经莫重於祭祭者非自外至也自内生於心也是以惟贤者乃能尽祭之义况祖功宗德道冠百王尽圣穷神义高千古自今以後祭圆丘明堂感帝神州等祠高祖太武皇帝太宗皇帝崇配仍总祭昊天上帝及五天帝於明堂庶因心致敬获展诚宗祀配天永光鸿烈【乾封二年十二月】

郊礼唯昊天称天五帝只称帝制

天无二称帝是通名承前诸儒乐生同异乃以五方之当亦谓之为天假有经传乐文经是名实未尝称号不别尊卑相混自今郊之礼唯昊天上帝称天自余五帝皆称帝【永昌元年九月】

开元十一年郊天制

帝王承天必崇告类之典文武尊祖是导严训之义所以克荷成命昭升前烈盖王者之子道乃圣人之神教朕以寡昧猥承丕绪获主祭祀一纪於兹辅相之宜下不足以被物馨香之德上不足以动天故岁或不祭刑且未恤内省为愧大礼犹郁星晷聚迁夙夜祇惧今四夷内附诸侯率职羣生和洽万物阜蕃犹恐教化未孚求之皇极诚有不达观於国风故亲巡岱阿析谷睢上神歆有答岁物以丰此先圣无疆之休上玄启佑之贶冀因报谒式展诚敬宜以迎日之至允备郊天之礼所司详择旧典以闻【九月】

命宰臣等分祭郊庙社稷制 孙逖

勅时和年丰神所福也精意备物祭之义也朕每为苍生常祈稔岁微诚有感不应乃彰今宗社降灵神祇效祉三时不害百谷用成遂使京坻遍於天下和平之气既无远而不通禋祀之典亦有祈而必报宜令兵部尚书兼中书令晋国公李林甫工部尚书同中书门下三品幽国公牛仙客即分祭郊庙社稷尚书左丞相裴耀卿祭中岳礼部尚书杜暹祭东岳御史大夫李适之祭西岳太子宾客王丘祭北岳国子祭酒张说祭南岳其四渎四海四镇及诸名山灵迹等各委所由州长官祭仍令所司即择日奏闻务於蠲洁之礼以致精明之德冀申诚恳如朕预焉道释二门玄通衆妙济时育物皆有明徵是所依凭岂忘尊奉其天下寺观并令量修功德用齐三圣之教以叶百灵之心宜嗣虚怀各陈至敬者也【开元二十五年十月】

升坛入庙行事官先去剑佩及履勅

勅精意曰禋吉蠲为享苟乖此义何以降神如闻比来祭官及监祭使等虽受斋戒殊乏洁如在之诚岂其然欤又虚心好静神听无声倘致喧烦尤非致敬自今以後升坛入庙行事官并去剑佩及履咸宜勉励仍通相紮察如或因循当别有处分

天宝元年南郊制

神之降休礼无不答永言禋祀必在躬亲朕粤自君临载弘道教崇清静之化畅玄元之风庶乎泽及苍生时臻壽域积以岁月未尝懈怠岂谓休徵感通烈祖降见乃昭灵命是锡宝符因而求之应言而获亦既至止果获殊徵谅惟秘词不可详说然邦家大庆何以过焉是知神仙所赋造化同体爰初有待经韞椟而多时潜应改元若符契之相合景福攸介祇畏良深而羣官宗室抗疏於外元良诸子屡请於中逮夫缙黄兼彼耆耄恳诚不已前後相仍愿加天宝之名用益开元之号顾惟菲薄曷以当之然则玄謁在乎钦承人心难以称拒顺天从衆议叶至公敬依所请实用多愧斯盖上天厚载爰及百神孚佑効灵通於睿祖幽赞惟新之历克彰永代之祥宜遵祀典式陈昭报可以来月十五日祔玄元皇帝庙十八日享太庙二十日有事於南郊宜令中书门下典礼官等即详定礼仪具录奏闻应缘行事及检校官等各委有司不须别差人执当其北郊宜差公卿择日祭五岳四渎及名山大川各令所在长官备礼陈祭务申诚敬副朕意焉

每载四孟合祭天地诏

皇天之典聿循於百代郊祭之义允属於三灵圣人既因时以制宜王者必缘情以革礼朕丕承宝运肃遵明禋曷尝不克己斋心恭夙夜犹虑旧章或阙诚敬未孚有一於此良深祇畏且尊莫大於天地祀莫大於祖宗严配昭升岂宜异数令蒸尝之献不着於常式南北之郊未展於时享粢盛且略对越何申自今以後每载四时孟月先择吉日祭上帝其皇地祇合祭以次日祭九宫坛皆令宰臣行礼务崇蠲洁称朕意焉祭神如在传诸古训以多为贵着有礼经脞脩之仪盖昔贤之尚质甘旨之品亦孝思之尽诚既切因心方资爰礼其已後享太庙宜料每室加常食一牙盘仍令所司务尽丰洁发生振蛰雷为其始画卦陈象威物效灵气实本於陰阳功乃施於动植今雨师风伯久列常祀唯此震霆未登羣望其已後每祀雨师宜雷神同祭

朕承宗庙之福为人神之主事有未畅义在得中庶寅畏之诚上达於郊庙祈禳之典载收於阙遗凡在有司各扬所职倍宜恭肃以叶灵心

天宝五载南郊诏

孝享宗庙所以达思诚也格於神祇所以崇严敬也则祈谷上帝春祠先王永惟因心敢忘如在朕承累圣之丕业膺上穹之景佑聿循柴燎?奉蒸尝虑备物未丰馨香莫达顷以详诸旧典创以新仪清庙牺牲特加於常饗昊天冬祭重增以时享庶乎展敬之勤克叶殷荐之义况履兹霜露载感惟深瞻彼郊坛有怀昭事今礼崇昭报谅期乎达诚教在率先必贵乎亲奠宜以来载正月朕亲谒太庙便於南郊合祭仍令中书门下即与礼官详定仪注择日奏闻兴言拜献先深祇感凡百有司各供尔职

元年建子月祭圆丘诏

皇王俯仰应协於灵祇典礼废兴式存於禋告盖重成命以崇祇肃朕获嗣鸿猷敢忘?敬顷以三代正朔所尚不同百王徽号无闻异称顾兹薄德思创常规爰因行庆之日将务惟新之典而建元立则制命膺符受於天地祖宗申於百辟卿士今既循诸古法让彼虚名革故之宜以宣於臣下昭报之道未展於郊庙因时备礼择日陈诚克明恭己之心庶降庇人之福至诚斯感其在兹乎宜取今月二十八日朝献太清宫二十九日享太庙光献庙来月一日祭圆丘及太一坛

百官议大礼期日勅

勅朕自迁越旋於京师将欲请罪祖宗告谢天地所司选日行有期矣议者多以大盗之後人劳靡居惧愆岁功请俟农隙若俯顺羣议则私怀不安将祇率旧章又疲甿重扰夙夜忧惕罔知所裁宜令常参官集议中书门下详其折衷闻奏

罢告谢郊庙勅

朕一经迁越久旷礼仪不唯霜露之感实貽失坠之忧赖先泽在人上帝临我克平大难载复旧京方欲展礼郊丘请罪宗庙而乃祖宗股肱卿士询谋异同明孝敬之大端陈古今之正义三省章表深体乃诚以义制心允从衆请予之不德愧叹良深其来年告谢郊庙百寮请俟後期者可之其元日御含元殿准式

以旱停南郊勅

今年郊畿亢旱自夏迄冬以陰阳之久有错违惧粢盛之或未丰洁祖宗上帝鉴临左右德馨未达惕焉在怀改龟荐诚以俟祥岁酌诸典礼亦谓合宜其来年南郊宜停【太和年】

唐大诏令集卷六十七

卷六十八

钦定四库全书

唐大诏令集卷六十八

宋 宋敏求 编

典礼

南郊二

贞观十七年南郊德音

景龙三年南郊赦

开元十一年南郊赦

天宝六载南郊赦【阙】

天宝十载南郊赦

南郊二

贞观十七年南郊德音

朕嗣宗祧夙夜寅畏忧勤在於政道抚育遍於含生十七载於兹矣上玄储祉贞石表瑞朕式修禋燎躬谢苍昊逮於储两亦申奉朔风既切飞雪载零及登泰坛六合开朗神祇介福岂独在予和乐之庆宜备率土可赐三日酺自汉魏以来或赐牛酒牛之为用耕稼所资多以宰杀深乖惻隐其男子七十以上量给酒米梁州管内大辟罪以下见禁囚皇太子虑过诸州并遣使人分往唯十恶不在虑限余皆量情降宥焉

景龙三年南郊赦

朕闻禘神配祖昊穹着其成命就陰即阳坟典明其大节故豺獭有祭下不隔於微品牺牲必陈上以光於严配轩皇用事则雍旁五祠汉帝洁斋则城南七里固能使敬而不黷求而不匮我高祖神尧皇帝开阶立极配永循环太宗文武圣皇帝仗金策而清四方运璇玑而齐七政高祖天皇大帝与乾坤合其德与日月合其明则天大圣皇后建补天立极之功受河图洛书

之统五精归运四叶重光朕?顺乐推钦承睠命绍宏基於累圣日慎斯兢执大象於羣生夙兴如厉远人殊俗占风而集蜚邸美瑞休符系日而辉史笔故得三边静柝五兵销刃寰宇大宁人神式序而德慚被物诚谢格天水旱尚臻政刑犹舛永以忧惕无忘鉴昧然则事天事地莫盛乎禮祀弗躬弗亲孰申乎诚敬朕自临四海於今六年幸承祧社之灵未展郊丘之謁方今朔风候律南畝登辰乘上日而恭飧奉高禋而肃事备殷荐之文行昭报之礼岂唯光灵所烛俱验其徵方冀後先不违实受其福至若五刑之属十恶为重自顷恩赦罕闻该及朕以眇身膺乎大宝下人不足每切如子之伤上帝所临敢逃在予之责闲居三月未弭厥???静念终朝载增寅畏侑神伊始与物惟新思崇旷荡之恩以答高明之贐可大赦天下系囚见徒及十恶咸赦除之杂犯流人并放还京文武官及应禁考使别勅陪位官边州都督刺史诸军大使副使三品以上赐爵一等四品以上加一级入三品者三品减四考五品减三考听入外文武有官赐勲一转关内诸州无出今年地税令内五品以上各举堪任州刺史县令者天下大酺三日【景龙三年十一月二十二日】

开元十一年南郊赦

门下朕获主三灵於今一纪听政中昃每不敢康观书乙夜将求诸道频年已来每思至理或远人不率或嗣岁不登淳朴未还惕厉斯在为人上而慚德奉天明以畏威故祝史正辞必期於陈信郊丘备礼将俟於昇平今宗庙降灵克开厥後乾坤交泰保合太和麟凤龟龙玄符黄瑞之祉蜚夷戎狄梯山航海之琛莫不日月以闻道路相属顾惟不德承兹休运钦若昭报畴咨故实所以今年献春恭祀后土季秋吉日追崇九庙采先後於鲁经稽肆类於虞典爰因长至钦謁上玄告受命之元符昭严配之成绩大典云备至诚克展诸侯骏奔来於穆之相百神受职率咸秩之文六变已陈三献斯毕盖春秋大用莫先乎祀王者盛礼莫重於郊柴燎克终感庆罔极岂予一人之福亦尔万邦之赖宜因咸和之际俾承厚下之泽可大赦天下自开元十一年十一月十六日昧爽以前罪无轻重已发觉未发觉已结正未结正系囚见徒大辟罪以下咸赦除之其十恶死罪造伪头首刼贼杀财主不在赦例就中仍虑有冤滥者所司具状送中书门下尽理详覆奏闻朕将亲览其有亡命山泽挟藏军器百日不首复罪如初敢以赦前事相告言者以其罪罪之昇坛行事官及供奉官三品以上赐爵一级四品以下加一阶诸献官并准昇坛例内外文武官及致仕并前资陪位者赐勲一转缘大礼有职掌押当者更加一阶斋郎并与出身皇亲诸亲陪位未出身者并放选已出身者赐勲一转亲王公主各与一子官三卫监门黄衣长上飞骑万骑并仗内杂色人在斋宫?卫及诸色有资劳人缘大礼有职掌并流外行署预见大礼者亦赐勲一转其充香炉执扇及礼生祝史赞者赐勲外简选日优与处分兵士?卫斋宫并诸色无资劳缘大礼有职掌及京兆府百姓缘南郊祇应者各免其家一年杂科差南北卫将军率中郎将?卫斋宫者并同昇坛例其诸军节度大使及三都留守虽不陪位委寄既重特宜同昇坛官例百岁老人赐绵帛五段粟五石县令至其家存问给付孝子顺孙义夫节妇旌表门闾终身勿事诸州百姓或因逢水旱流寓未安者宜令所司与朝集使即作赈恤安辑法奏闻其单贫卫士番镇久次令州府长官简择灼然者放免番役征行人家州县检校勿使侵欺磧西镇人途路悬远者特宜赐勲一转鰥寡惻独亦令州县矜恤使得存济元置义仓救人不足承前贷百姓粮及种子未纳者并放免不得却徵自古圣帝明王忠臣烈士名山大川并令所管致祭其已得替官人并转累未得处分非老弱疾病犹堪处事者

量加收録使免失职其左贬官非逆人五服内亲及犯赃贿名教者所司勘实奏闻量移近处其官人有清白政术堪任刺史县令及抱器怀才不求闻達者州长具以名荐宗室中有孝悌才术为衆所知仍在俾任者委宗正具以名奏君臣一体休戚共焉朕今承天命恭传大宝盖凭累祖余业得一之符亦由羣公旧勲不二之力永言繫赖其敢忘之自武德以来实封功臣知政宰辅有身无大故而亡官失封子孙沦屈所由勘实具以状闻存者可筹其官荣逝者当録其胤嗣使幽明同庆知有令辰亚献邠王守礼终献官宁王宪各赐物一千段捧俎申王撝夹侍岐王范薛王业各赐物七百疋侍中源乾曜中书令张说兵部尚书同中书门下三品王峻各赐物五百疋正衣附马都尉王守一王繇温曦宗正少卿崔澄各赐物三百疋二王後赐物一百五十疋坛塲使京兆尹孟温礼赐物二百疋修造羽仪使赐物一百疋修撰仪注官五品以上赐物百疋六品以上赐七十段自余陪位预宴官一品赐物一百疋二品三品八十疋四品五品六十疋七品四十疋八品九品三十疋鸿臚诸蕃等使与见大礼及在本蕃王侯大酋长同宴会例给赐郡主县主各赐物八十疋缘大礼数处有职长者任於一头从高叙天下州府赐酺三日京城五日前任所在百姓村坊宴乐不得科率聚敛其有处分未该者令所司及本使比类奏闻敕书曰行五百里主者施行

天宝十载南郊赦

皇天眷命必顺於五行哲后驭时实遵於三统考古之道何莫由斯朕钦若上玄嗣守丕业察璿衡以齐政念稼穡以劝人日慎一日四十载於兹矣何尝不夙夜祇畏忧劳在怀思康黎元臻夫至理幸以刑理俗阜天成地平万方底宁羣物咸遂虽慙大化且谓小康皆至道储祉宗社敷佑岂予菲薄而克致焉然则上稽历象旁采輿议爰以土位承汉火行是凭大易之辞用绍前王之烈祲祥累应正闰攸分不改旧章惟新景运属岁初吉乘时布和是命展祀崇禋竭诚昭报庶叶发生之序载覃雨露之泽可大赦天下自天宝十载正月十日昧爽以前大辟罪以下罪无轻重已发觉未发觉已结正未结正系囚见徒常赦所不免者咸赦除之其左降官及流移配隶安置罚镇効力之类并稍量移近处其官已复资至叙用之日不须为累其流人配隶并一房家口者所犯人情非切害身已亡没家口放还流人及左降官考满载满丁忧服满者亦准例稍与量移其亡官失爵放还不齿及诸色放停解考免与替人等非犯赃

唐大诏令集卷六十八

卷六十九

钦定四库全书

唐大诏令集卷六十九

宋 宋敏求 编

典礼

南郊三

乾元元年南郊赦

元年建卯月南郊赦

广德二年南郊赦

贞元元年南郊大赦天下制

南郊三

乾元元年南郊赦

门下朕闻皇天有命皇王受之命之为君孝理为本莫不钦崇前烈聿修禘享之仪对越上玄式展禋郊之礼故美其盛德商颂有奏鼓之音告厥成功夏书有锡珪之庆国之大事实在於斯间者逆寇乱常暴殄天物致使图书礼乐或阻於干戈宗庙神祇有亏於享祀朕诞受明命恭行大罚羣凶克殄讨鲸鲵以示威王室既宁奉銮輿而载复太上圣皇大帝功格天地道迈胥庭思凝神於姑射将释责於宸扆予小子纘承大统夙夜祇惧俯尽臣子之心亲亲尊尊庶极於此是用追崇先后建立中宫永言孝感思徽音於文母使行妇道想厘降於虞嫔情理於是获申人伦以之攸叙然後执瓚清庙歌五圣之重光燔柴圆丘覲百神之受职复修祭礼再备乐章尊祖配天不失旧物今大礼斯举玄符允答行?施惠尚荐於阳和出系挺囚必当於时令思与天下更布惟新宜覃肆眚之恩以洽雍熙之化可大赦天下除反逆支党缘坐十恶谋杀刼盗临监主守自余一切原免其与逆贼元谋及胁从今但归投并原其罪仍与官资其成都府元从圣皇功臣及灵武元从功臣并收两京将士三京留守诸道节度采访使普恩外三品以上赐爵一级四品以下加一阶行人赐勲三转自寇贼以来官吏百姓有申劳未经酬赏者委所在长官具状闻奏当与甄录天下百姓除正租庸外一切不得别役如缘军务所要自今和市兵士羸弱羸老并拣释放其长安万年两县各借一万贯每月收利以充和雇其别勅

索物及供诸司并蕃客等左藏虽给价直奏请每引时月宜先给两县各五千贯贮於两市差官专知旋还价直其州县门夫勲官并於旧额数减一半其庸丁残疾人等不须更差其州县官新上物件并以公廨及官人料钱依时价和雇造买不得分配典正其年支口味宜减一半诸使应进鹰鹞狗豹獠等一切并停应缘南郊百司张设有损百姓苗稼者委京兆尹随损多少陪酬所损钱物即便闻奏百姓中有能行仁义分济贫穷免填沟壑赖救恤者具名闻奏当宠以官秩鰥寡惇独笃疾不能自存及阵亡人家并损免户州县随事优恤赈给百姓中有事亲不孝别籍异财点污风俗亏败名教先决六十配隶碛西有官品者禁身奏闻京官九品以上许封事极言时政得失朕将亲鉴用仁嘉谋才有可观时当叙录草泽及卑位之间有不求闻达未经推荐者有一艺以上恐遗俊乂令兵部吏部作徵召条目奏闻其録事参军职司糾举自今以後宜升判司一政以彰委任国子监学生明经明法帖策口试各艺并能通四以上进士通三典及第乡贡明经准常式州县学士放归营农待贼平之後任依常式二王三恪各与一子官内外文武三品以上赐一级四品以上加一阶【四月十四日】

元年建卯月南郊赦

门下惟天为大事之在明惟圣能享承之在德朕托於人上获守丕图思大道之行去鸿名之饰文武徽号存而不称开统履端建元叶纪美皆有让言必可陈?告玄元致斋清庙恭行旧典展礼南郊百神允怀上帝临我升闻之际其亦何言昭事而诚实应多福高而不远复见其心乃候发生之时用行向劝之道阳谷出日登大明於域中泰山起云徧膏泽於天下君人临照德泽周给布其寛大岂止於兹宜弘肆眚之恩益广万邦之庆可大赦天下自元年建卯月一日昧爽以前大辟罪以下罪无轻重已发觉未发觉已结正未结正见禁囚徒常赦所不免者咸赦除之其反逆造伪头首者谋杀故杀并十恶死罪官吏及典正犯赃为蠹既深在法难容并不在赦限其史朝义下胁从将士及受伪官等弃逆归顺因事立功封赏之外余无所问其诸色流人及左降官等前後频有处分并与量移所由稽迟动历年序宜令有司申明前後制勅节文速勘责类例闻奏其中有行业夙着情状可矜久践朝班曾经任用者委在朝五品以上清望官及郎官御史於流贬人中素相谙委为衆所推者各以名荐须当才实其内外文武官三品以上赐爵一级四品以上各加一阶成都灵武元从功臣三品以上更赐爵一级四品以下各加一阶朕敬授人时慎徽月令庶无否极以获休徵自今以後每至四孟月迎气之日与百辟卿士举而行之建辰月应番彊骑宜三分量留一分其余放归营农至建巳月任依常式诸州刺史县令及有司参军令设法劝课令其耕种不得失时贫不支济户仍方圆处置量事借贷务令成立岁终巡按量其功效便申赏罚诸道贡献除马畜供军之外其余鹰鹞狗豹奇禽异兽并不得辄进五都之号其来自久宜以京兆府为上都河南府为东都凤翔府为西都江陵府为南都太原府为北都孝本天经礼崇国典横於四海漏及三泉其京清资正员文官五品以上并两省供奉官御史诸州刺史诸道节度使三品以上父亡母歿未曾追赠者量与追赠文武不坠道弘於人务在搜扬俾其展效其诸道入中有词学高深兼通政理军谋制胜明习韬铃者委所在刺史拣择闻荐京官四品以上正员文武官任各举一人孝子顺孙义夫节妇旌表门闾终身勿事

广德二年南郊赦

惟我高祖太宗之有天下，罔不昭事於上帝，严恭寅畏，与神合符。七圣在天，眷命永固，朕嗣守鸿业，敢忘奉先尚质，贵诚聿修盛典。顷以四方多难，责在朕躬，建侯行师，日不暇给。东擒羯胡之首，西御犬戎之患，元元告病，社稷阽危。内定外攘，不遑展礼。虽高明未达，而精意惟勤。克通至诚，以锡纯嘏。蕃夷即叙，弓矢载囊。奉泰坛，饗昧接神祇之顾，永怀宗祏。岁时结霜露之思，近又百辟在庭，俨然而进。奉请元子以居少阳，册命乃行。匕鬯攸主，按风雨之清道，乘星火之仲春。朝於玄元，格於艺祖，躬执圭奠，祇见南郊。天何言哉？神所劳矣。敷兆人之戩谷，广四达之聪明。式重燔柴之经，益申解网之惠。可大赦天下。自广德二年二月二十一日昧爽以前，大辟罪以下，罪无轻重已。觉未觉已，结正未结正，系囚见徒，常赦所不免者，咸赦除之。左降官即与量移，近处亡官失爵放归不齿之类，并已复资。未得本阶者，各量与收叙。诸色流人及量移人并罚，镇効力配隶等一切放还。自孽乱常王室，多故干戈不息，今已十年，军国务繁，关辅尤剧。念兹疲耗，久困征科。其京城诸司使应配彊官散官，诸色丁匠幕士供膳音声人执祭斋郎合事掌闲鱼师并诸司门仆京兆府驿丁屯丁，诸色纳资人每月总八万四千五十八人，数内宜每月共支二千九百四十四人。仍令河东关内诸州府配不得偏出京兆府，余八万一千一百一十四人并停。所须卫役使宜撙节定数，官给资钱，不得干扰百姓。其宝应元年十二月三十日以前，诸色人逋欠在百姓腹内者，并宜放免。天下户口宜委刺史县令据见在实户量贫富作等第差科，不得依旧籍帐据其虚额摊及邻保。其天下诸州府长官及县令有清白着闻善政，称最能招缉逃亡，编附复业，户口增多者，具状闻奏。朕当差人按覆，与所举状同者，超资进改。天下所有诸色结聚及羌浑党项等能悔过自陈，各归正业，一切并舍其罪。其中有能率众先来者，仍特加官赏。征人不息，勤戍斯久，丁壮疲弊，老弱困穷。光武有言：头髮为白，故戢藏锋刃，牧养元元。凡方面重臣，宜悉朕意，应诸州团练将士等委本道节度使及都防御使等，审与州府商量，如地非要害，无所防虞，其团练人等放营农休息。寇戎以来，积有年岁，征求数广，凋弊转深。自今以後，除正租税及正【阙】并度支符外，余一切不在征科限内。文武官三品以上赐爵一级，四品以下各赐加一阶。仍赐勲两转。武德唐元功臣勲业特崇，子孙沉翳，所司勘责，各与一人。官成都灵武元从普恩之外，三品以上更赐一级，四品以下更加一阶。宝应功臣普恩之外，三品以上各与一子，六品官赐爵一级，四品以下各加两阶。更赐勲两转。五品以上官子爲父後者，赐勲两转。副元帥光弼子仪各与一子，五品官并阶。诸道节度使各与一子，五品官并阶。都防御使经略等使各与一子，六品官并阶。去岁行幸陕州，六军英武威远武宝应射生左右步军等并内外文武百官扈从到行在者，三品以上与一子，官四品以上各加两阶。自陕州至上都以来，置顿使及州府官普恩外，各与一子。出身置顿使判官已缘路县令及专知顿官各加一阶。其六军神策宝应射生衙前在生及左右步军英武威远威武等诸左右金吾将士缘大礼扈从及在城留後者，共赐钱五万贯。鸿臚蕃客共赐钱一千贯。文仪王及彭王以下诸王男未有官者，并准旧例与官。其已封为郡王、国公者，永穆长乐以下长公主及诸县郡王并嗣王郡王各与一子，官皇亲五等以上，诸亲三等以上各与一子。出身二王之後各与一子。官台省之官，事资履历，刺史县令任在亲人职务所，更是为理本。其左右丞侍郎御史中丞等取曾任刺史者，郎官亦取曾任县令者，并所选御史亦宜於録事参军县令中简拣，仍须资历稍深者。其有官非累历才行特堪任用者，自布衣以上任所闻荐委中书门下尚书省考试堪任者，不在此限。尚书省理政所系左右丞纲辖攸归，比来百司职事皆废，宜令明徵式令各举所职。百司有论时政得失并任指陈事实具状进封，必宜切直无讳。有司白身人亦宜准此任。匭使进表，朕将亲览，必加择用。朕每思素俭，敦以淳风，必约严章，以齐侈俗。其珠玉器珍宝细

杂綉等一切禁断诸道摄官频有处分一切尽停尚闻因循其弊未革即宜申明旧勅勒停三年之丧谓之達礼自非金革不可从权其文官自今以後并许终制一切不得辄有奏请缘大理应陞坛殿行事者普恩外更与一子官应在太清宫郊庙诸色职掌者及封皇太子行事官撰册并书册文及检校造册官普恩之外三品以上赐爵一级四品以上加一阶仍赐勲一转天下侍老九十以上板授刺史七十以上板授上佐县令孝子顺孙义夫节妇旌表门闾终身勿事五岳四渎名山大川自古圣帝明王忠臣义士宜令所管致祭

贞元元年南郊大赦天下制 陆贄

门下君天下者受命於天地继业於祖宗致其诚心惟敬与孝失敬莫大於废祀亏孝莫大於黷神朕以眇身属承大统纵欲败度浸生厉阶兵连祸深变起都邑六师播荡九服震惊郊庙园陵於凶逆神人之主将迨周星列圣之业几坠於地遗敬亏孝罪由朕躬抚临万邦甚用自愧侧身思咎庶补将来股肱元臣比义叶德爪牙衆士戮力同心诛大憝而京邑廓清剪逋寇而关河底定兹朕再与王公卿尹洎亿兆之人备其盛容条具物礼荐诚清庙展敬圆丘陈谢罪????告情雪耻感慕慚惕若无所容上帝顾怀再新景命岂伊匪德独被鸿休思与普天诞膺多福可大赦天下自本年十一月十一日昧爽以前【云云】李希烈背逆不道情所难容朕悯念苍生务思征讨频有诏命许其自新若能归降依前待之以不死淮西管内将士官吏百姓等一切原有与之如故官封亦皆复旧如能特建功効者当别抽擢若家口亲属在诸道者长吏抚绥各使安集其归顺百姓仍委节度观察刺史给空闲地任便安居优复终身矜全济大事平已听归本贯【云云】自顷凶渠倡乱逆将附奸保据国都凭陵甸服出次郊邑再迁巴梁险阻艰难靡不经历暴乱之後乃彰烈士之功忧危之中方见直臣之节进善録勲其可弭忘应奉天兴元元年元从立功并收京城将士食封者各随文武与一子官余并加两阶仍赐勲两转其文武百官应扈从到兴元府者五品以上赐爵一级六品以下加一阶自建中四年以来殁身王事义烈着明未经褒赠者本道即具名衔事蹟闻奏诸道有辞退官健州府长吏切务安存仍量以空闲田地给付免其差役任自营生社稷之勲以辅兴王业统帅之任以总制戎麾职弼谐者其德崇授旌节者其功大方镇乃国之垣翰禁卫实予之爪牙尹京实赖於肃清主计尤资於办集所颁庆泽宜越常伦司徒兼中书令晟宜与一子五品正员官并四品阶诸道副元帅各与一子五品正员官都统与一子六品正员官中书门下平章事充节度使各与一子七品正员官节度使及神策兵马使六军统军金吾六军大将军判度支侍郎各与一子八品正员官都团练都防御使京兆河北尹金吾大将军殿前兵马使各与一子九品正员官多难以来三十余载克平祸乱属在戎臣或节着艰难勲高战伐受任虽专於将帅成功亦赖於羣材懋赏推恩宜加胤嗣诸道大将功业崇高者各与一子官本使即详定録名奏副元帅都统兼节度使下每道共三十人节度使下每二十人都团练都防御使下各十人如大将军子孙之中有艺业优长性行纯确者本道使具状闻荐仍量事资给令赴上都朕获随材授官以充侍卫庶使功臣之後与国无穷故尚父子仪先朝元勲再复京邑赠大尉秀实以死为国节冠古今宜与子孙一人五品正员官自至德以後节度大将忠烈功绩着明其後沦翳者所司即条録闻奏与子孙一人正员官诸色人中应在贼中潜奉神主顷已甄赏宜赐优崇【云云】江淮运使检校左仆射同中书门下平章事韩滉励精勤节夙夜在公漕挽资储千里相继事无????素人不告劳拯於凶灾厥有成绩可进封晋国公关畿之内连岁兴戎荐属

天灾稼穡不稔谷粢翔贵蒸黎困穷仓廩空虚莫之赈赡每一兴念惻然痛心宜支度取江西湖南见运到襄州米十五万石设法般赴上都以救百姓荒馑如山路险阻运挽难通仍召贫人令其般运以米充脚价务令全活流庸庶事优饶副朕勤恤立国之道始於亲亲所以厚骨肉之恩明教化之本况荐经难故宗族漂沦敦睦之情有加常日大长公主长公主公主各与一子七品官嗣主郡主县主各与一子官出身如宗子中有德行才能宗正卿具以名闻当别獎任致理之本在乎审官审官之由资乎选士将务选士之道必精养士之方魏晋以还浇风未革国庠乡校唯尚浮华选部礼闈不精实行学非为已官必徇人法且非精弊将安救宜令百寮详思所宜各修议状送中书门下恭校得失择善而行有虞建官三载考绩在汉为吏或长子孙盖吏久於官则人情无苟官久於事则理化有成日者制度废隳考课乖舛淹速靡准升降无名欲令庶僚何所惩劝自今以後刺史县令未经三考不得改易自余非在职绩效殊尤亦不得越次迁转刺史停替须待鱼书内外五品以上及常参官在任年老考已深者即量其才効与改中外迭处以观其能夫明目达聪务广闻见或处怀才抱器输忠纳谏之伦处地幽遐无由自达永言於此梦想不忘应诸色人有长策济时忠规匡主任具陈所见诣所居之州委刺史略与讨论观其旨趣但有裨理道不涉私情便与附驿逋进朕当亲览自立两税经今六年初定之时已有偏并或户口减耗旧额犹存轻重由不均流亡转甚委度支即折衷条理以恤困穷古者虽有水旱人无菜色皆犹储畜不匮劝道有方前代所置义仓国初亦循其制备灾救乏甚便於人宜即准贞元故事天下所垦见田上自王公下及百姓每丰稔之岁秋夏两时州县长官以理劝课据顷亩多少随所种粟豆稻麦遂便贮纳以为义仓如年谷不成即量取赈给官司但为其法劝课不得收作用度管各委本道遂宜处置闻奏敦本厚生必资播殖当今所切莫甚於斯自今百姓有垦辟田畴於常岁者所加之地不得辄岁徵租其刺史令长考课亦以本界垦田多少为殿最令蝗虫损甚州府开春之後量给子种以便农功天下应荒闲田有肥沃堪置屯田处委当管审细检行以诸色人及百姓情愿者使之营田如部署精当收获数多本道刺史特加褒升逃户田地本主复业即却给还犂谷之下四方会同共应既多难為準定急赋烦役人何以堪宜令京兆尹与度支计会长安万年两县每县委与贮备钱五千贯文县库收纳定清干官专如应缘卒须别索及杂供拟并工匠等县令与专知官先给付价钱季冬之後申度支勘会所市和雇并须先给价钱两税一物以上不得科配百姓御史台朝廷纲纪尚书省理化根本百度得失系乎其人自顷制勅施行所司多不遵守王臣奉职岂所宜然御史台左右丞切纠稽违无壅朕命

唐大诏令集卷六十九

卷七十

<史部,诏令奏议类,诏令之属,唐大诏令集

钦定四库全书

唐大诏令集卷七十

宋 宋敏求 编

典礼

南郊四

贞元六年南郊赦

贞元九年南郊大赦天下制

元和二年南郊赦

长庆元年南郊改元赦

宝历元年南郊赦

南郊四

贞元六年南郊赦

礼称日至而郊诗美丰年之报然则迎日之始时莫大焉顺成之应庆莫重焉朕承天眷怀俾作神主朝夕砥砺日月永思惟人安化洽是勤惟岁稔时和是冀上灵降鉴丰祉聿臻展礼郊丘申大报之义祇禋宗庙极追孝之诚四海具瞻百神咸秩古者上有大泽必与天下乐之庆赐遂行无思不备内外文武及仕官诸军将士等三品以上赐爵一级四品以下加一阶宰相及东都留守六军统军诸道节度使神策威远金吾六军都团练防御观察使京兆河南尹正员尚书御史台长官太常卿各与一子官大礼行事官各加一阶立仗将士及守营者共赐十八万端正故尚父子仪与一子五品正员官如已五品以上量与改转赠太尉秀实与一子官张巡许远南霁云颜杲卿颜真卿各与一子正员官天下见禁囚徒其罪至流死者各逋减等徒罪以下一切放免左降官经三考流人配隶効力之类经三周年者并与量移近州县官吏专杀立威杖或踰制自今以後有责情决罚致死者宜令本道观察使具事由闻奏并申报刑

部御史台吐蕃比亏信约自絶通和边镇之间事资备御因其犯境累献俘囚既切怀土之心复加幽縶之苦永言覆育何间华戎应所获吐蕃生口见在者一切放归本国仍并差人送至界首量事资遣使得自全应诸道自艰难以来战阵丧没及荒凶死亡骸骨暴露者长史各令收瘞奠醑守宰之任弊在更自令刺史县令以四考为限呜呼朕获主珪璧十有二年於兹天明地察罔敢不祗一日万思罔敢不慎迁己之过庶无吝心致人之安实有明志夫祀之馨香在德天之视听在人惟命不常圣有谟训庆感既集於兹日倣励方戒於将来冀勉增修聿怀多福凡百有位所宜同之

贞元九年南郊赦 陆贄

门下朕以薄德忝属大统皇天眷佑俾主兆人惧不克承夙夜祇畏缅惟前烈致於升平予心浩然罔知攸济大小之务曷尝不勤刍蕘之人亦莫不敬虑每存於致理志恒在於恤人中宵屡兴终食累叹一事乖常怒焉疚怀一夫罹殃惻若伤体思与海内同臻太和息其战争保其生业降心从衆实靡有辞克已利人诚无所憾然以视听有极思虑难同况乎长自深宫安於近习损益之理宁免过差幽远之情固多未達由是兢兢砥砺悔往终来烛理所患於不明推心庶几於无负日慎一日於今十有五年矣上灵降鉴多士叶诚五稼屡丰四鄙不扰方镇辑睦干戈底宁边圉缮完殊方款附协天地会昌之运实宗社无疆之休庆既荷於元功礼有昭於大报矧惟霜露之感永切孝思禋燎之仪每勤精意将申诚敬其在躬亲是与公卿大夫?奉牺牲恭奠珪璧陈其文物荐其馨香类於泰坛享於清庙率职来助万邦攸同备物致严百礼具举诚慕获展神人允谐明发永怀庆感斯集纯嘏所锡岂唯朕躬思俾普天均承惠泽可大赦天下自贞元九年十一月十日昧爽以前【云云】其见於官司辨对者亦并免官人犯赃不可令其却上以後勿以为累左降官及流人并量移【云云】窜谪遐裔冀速沾恩比者准制量移所司皆待申牒屡加盘覆累涉岁年既甚淹迟且不均一宜令吏部刑部审检勘本流贬及量移勅旨比类元犯事状轻重月内处分内外文武从我巡狩涉於艰难录其忠劳宜有优异应从奉天扈从至兴元文武官将士等普恩之外三品以上赐爵【云云】兵兴以来垂四十载税既烦重人多困穷因之以流

离加之以冻馁为人父母实深哀伤诚由德化未敷耗斲犹广每欲蠲复与之小休迫於军储有意未就姑尔勤恤减其田租惠贷非多良深悯愧天下百姓贞元十年地租斛斗应合度支收管者宜并三分放一分如当管无属度支斛斗即减放合送上都十分之一其所放斛斗钱物并委巡院官与观察经略等使计会审勘定数分明榜示百姓仍具申奏去年以来所有贷粮种子并存百姓腹内者一切放免富俗安人在於薄敛必不得已简则易从自顷削去烦苛定为两税既无他扰颇便於时朕推诚御人所贵存信保此诚法期於不踰凡百有司所宜遵守倘求取无节则因缘起奸获利失人殊乖朕意诸司使及诸州府除两税外别有科配悉宜禁絶近年以来因和市和采久负百姓钱物并即填还以後官司应有市采者各须先付价直不得賒取抑配因兹敛怨扰人水旱为灾古今不免苟有丰蓄则凶年少间属此多虞里闾凋耗姑务求於日给不遑虑於岁储一谷不成人则艰食害至始救其伤已多俾无馁殍之忧将在备之而已宜委诸州府长官每年以当管回残余羡物谷贱时收采各随附近贮纳年终具有无多少报中书门下兼申考功以为考课升降如有替代各分明交领准前申报若遇灾害

不稔则量事给与百姓辄有将充诸色用者以枉准赃罪之其劝课百姓自置义仓仍准贞元元年十一月十一日制处分立人之道惟孝与忠孝莫大於荣亲忠必先於竭节唯尔师长卿校洎乎方岳列藩保义皇家交修庶绩竭节之効既昭乃诚荣亲之恩宜洽国典应内外文武清望职事官并节度观察都防御团练等使父在未有官量授五品官母在未有邑号者各授邑号【云云】佐运之臣纳忠之辅功既存於社稷庆宜及於子孙故周锡土田汉传带砺畴其爵号与国始终固以明报德之恩劝为臣之义其或年代未远利泽犹存祠宇已变於荒墟胤嗣不编於仕籍思其人犹爱其树况奠享乏主而不加省录者乎兴灭国继絶代所以礼先贤也修宗庙敬祀事所以教追孝也化俗归厚此其大端应九庙配享功臣及武德以来将相名节特高有封爵废絶祀庙无主者宜许子孙一人绍封以时享祀自今以後应有庙家子孙但传袭爵者并许享祔於庙其有毁卖私庙及买之者各以犯教义论自古圣帝明王忠臣烈士各令长吏以礼致祭书叙明四目达四聪垂拱而理诗称济济多士文王以寧舍已从人故能通天下之志弃瑕录用故能成天下之才昔在太宗勤求理道纳谏如响任贤勿疑致俗於太平垂范於永代朕获承鸿绪追纂往猷书之座隅恒自敬励朝夕翘想庶闻嘉言梦寐劳怀思得良士凡厥在位所宜共成诸司百官有陈便宜者各尽所见条疏封进事有冤滞政有阙遗悉当极言无或隐避诏勅不便於时所司执奏以闻天下有蕴德怀才隐居不仕委所在观察使表荐当以礼邀致诸色人中有贤良方正能直言极谏或博通坟典达於教化或详练故事长於著述或精集律令晓畅法理或该明吏术可委理人或洞识韬略堪任将相委所在州县长吏及台省常参官详录行能举奏仍牒报吏部其所举人并限来年七月内到京朕当亲试缘大礼职掌行事【云云】

元和二年南郊赦

朕闻王者大业孝莫盛於配天国之大事礼莫重於享帝故二仪合祭知天子育物之仁万国骏奔观圣人严父之道教之所设礼极於斯我国家祖武宗文经天抚运声名所被车马必同承祧而御极业光十圣体元而纪号年将二百朕以微眇缵奉昌图畏此鸿业若临深谷而大事所属仙寝继营凶德相挺两隅皆阻淮湖奥壤水旱愆期惄然疚怀惧不克济既而上天降佑烈祖垂休妖氛尽弭逆节咸伏精神有以相荡善恶有以相资五岳感诚而効灵四气应序而咸理物皆滋茂岁亦丰登百姓之心驩然相与是用斋精三日凝謁上玄明发不寐祇见烈祖周旋在位陟降是?克配之礼既展如在之诚增慕嘉此福佑与物惟新式敷顒若之化俾洽沛然之泽可大赦天下罪无轻重常赦所不免者咸赦除之左降官与量移及资复仍听累叙流移配隶并放还天下应有逋欠在百姓腹内者及京畿今年夏青苗钱税并免放官酤酒及杂榷率并同禁断淮南江南去年以来水旱疫疠其税租节级蠲放天下两税贞元四年制书已及三年一定委有司举旧勅商量处置诸道年终勾宜停刺史录事参军并不得擅离其事类已後之制勅速令有司删定江淮大县每岁据阙委御史三省台诸司长官节度观察使各举堪任县令不限选数并许赴集台省官及刺史亦令有阙先於县令中拣择如有能否与元举同赏罚置其员簿以序内外庶官禁邮驿假托乘势京兆府诸司色役人各令条疏简省天下官吏应行鞭捶责情致死者切念察访王府六品以下官及诸州县有司并省处分诸官诸使要停减者委有司商量废省天下百姓不得冒为僧尼道士以避徭役其创造寺观广兴土木者举前勅处分之内外文武见任及致仕官诸军将士等以品秩节级赐勲爵文宣王及二

王三恪公主诸王与一子官及赐物有差宗子中有才可用者委中书门下量才叙用故尚父子仪太师晟太尉秀实顏真卿张巡许远南霁云及配飧功臣与一子官及出身有差至德以来功臣未配享者速令详定文武常参官及诸节度使观察使并诸军使并与父母封及追赐并一子官出身有差诸军立仗及在本营节度赐物应缘大礼职事官并赐阶爵天下诸色人中有贤良方正能直言极谏博通坟典达於教化军谋宏远堪任将帅详明正术可以理人委内外官各举所知朕亲策试天下百姓高年者赐米帛羊酒及板授官封名山大川及古圣帝明王忠臣烈士各令以礼致祭

长庆元年正月南郊改元赦

朕闻自昔圣王之所以合天地谐神人莫过乎诚敬致其诚展其敬莫重於祭祭之大者莫大於郊庙故必躬行而心奉之然後百灵助庆万国蒙福此帝王之孝也我国家祖功宗德立号配天日月所照雨露咸被孝思善继圣教允升郊丘岁奉於严禋宗庙时修其明荐朕以冲昧自获纘承仰荷眷命惧不克享幸天多佑俾岁大穰河朔底宁边封靖谧及此元日至於上辛式遵典礼有事郊庙当祇见之夕感慕增怀泊大报之辰诚敬弥励因体元而配号用敷化以覃恩可大赦天下改元和十六年为长庆元年自正月三日昧爽以前大辟罪以下罪无轻重咸赦除之唯故杀人在十恶内者及官典犯赃不在免限左降官量移近处如复资便任选亡官失爵不齿者量加优叙左降官及流人先有官者如已亡歿各还本官天下百姓今年夏税每贯放一百五十文州县应徵科两税榷酒钱内旧额须纳见钱者并任百姓随所有正段及斛斗依当处时估送纳不得邀索见钱度支盐铁户部应纳税茶兼余盐价中须纳见钱者亦与时估正段及斛斗如情愿纳见钱亦任稳便永为常式其公私便换钱物先已禁断宜委京兆府切加觉察应度支盐铁户部三司官吏所由欠负元和十三年以前诸色钱物斛斗委本司尽底勘责如是入已隐欺即准条处分如缘欠折摊徵元保外无可纳者宜并与疏理诸军使亦准此处分两税外不得别有差科刺史如越违观察使举奏观察使事乖格敕刺史不得辄受中使及郎官御史奉使所在并不得与人事物诸道诸州县宜委中书门下及观察使刺史量闲剧形便可并省者具事宜闻奏河北诸道管内宜委本道团定两税务令均济河北州县凋残户口未复其官各据郡邑大小量公事留置余并权停应诸道管内百姓或因水旱兵荒流离死絕见在桑产如无近亲承佃委本道观察使於官健中取无庄园有人丁者据多少给付便与公验任充永业不得令有掌职人妄为请射其官健仍借种粮放三年租税榷酒钱已有分配百姓处又置酒店官酤并诸色榷率切宜禁断亡官失爵放还流人有庄田不经没官被人请射本主子孙到并委却还天下诸色人中有能精通一经堪为师法者委国子祭酒访择具以名闻其大理寺官宜令精择有志行词学详明法律者注拟其有课绩特殊堪在朝獎者台省官有阙宜先选择自今郡守恪奉诏条清廉可纪四考与转诸道或闭余禁钱自为条约切宜禁断其内外文武及致仕官三品以上赐爵一级四品以下各加一阶陪位白身人赐勲两转故尚父汾阳王贈太师晟贈太尉秀实各与一子八品官顏真卿杲卿张巡许远南霁云各与一子出身武德以来功臣子孙量加獎用中书门下及节度使带平章事各与一子八品正员官祖父母父母并与贈官官封父没母存者与邑号已贈已封者更与追贈礼仪使大礼使度支盐铁使京兆尹各与一子出身文武常参官并致仕官及诸道节度观察经略等使及神策等使诸军使父见存者量与致仕母存与邑号父母亡歿与贈官及邑号东都留守

及诸道节度观察经略等使神策金吾六军将军威远镇国军等使各与一子出身陝州奉天兴元功臣更賜勲爵有差身没未经追贈者并与追贈应緣大禮移仗宿衛御樓立仗將士普恩之外贈勲爵有差仍準旧例賜錢物二十萬四千九百六十端正貫大禮職掌行事官及留守等更賜贈勲爵及加升階壇殿行事官更特加一階应在城內蕃客等賜物有差常參官及刺史有停替及病假解官及終制未授官者委中書門下量才進擬其情願授致仕官者亦听天下諸色人中有賢良方正能直言極諫博通墳典達於教化軍謀宏遠堪任將帥政術詳明可以理人者委有司各舉所知限今年十月到上都天下百姓高年者賜米及綿帛有差

寶曆元年正月南郊赦

門下朕以眇薄纂承洪構祇見九廟肇祀二儀外飾備物中惟盡志昆虫草木之實致丰於蠲洁愷乐和愉之感庶交乎神明四海奔走衆祇授職冀下觀而化皆內誠乎心百王之禮樂在陳列聖之聲詩合奏敬極严配道備飡亲奉成式惕焉惴懼而今後不敢滿假庶无大悔以貽祖考之羞因體元以統歷遂洽恩而大宥可大赦天下改長慶五年為寶曆元年自寶曆元年正月七日昧爽以前大辟以下罪无輕重已發覺未發覺已結正未結正系囚見徒常赦所不免者咸赦除之其官典犯贓不在免限左降官自長慶四年三月三日制後未經量移近处已經量移者更与量移如復資者即任依常調選丁忧去任服闋日亦与量移如有親故在上都任於所司陳狀便与處分不必更待本州申請別勅因責降授資正員官未經改轉者亦与進改亡官失爵放歸不齒者量加收叙縱元勅云終身不齒者亦量与收叙流人未到所在及已到者量移近处如已收叙者量才录用并僧尼道士移隸者亦与移近处得罪人已亡歿家口未許歸者一切放歸如自情願住者亦任諸已得罪人中有先勅云縱逢恩赦不在放限者并別勅安置者亦并宜委中書門下量事狀輕重節級處分左降官及流人先有官者如已亡歿各還本官流貶人所在身亡任其親收以歸葬仍仰州縣量給棺槨優賞發遣諸色人中有痕累禁錮及畔逆緣坐等一切并与洗滌常參官及諸州刺史有先因停替及因病假解官并終制未授官委中書門下量才進擬勿令稽滯致仕官未經改轉者量改官依前致仕諸軍先擒獲吐蕃生口配在諸處者宜委本道資給放還本國勿許因循所在停住國家与吐蕃舅甥之好彼此无虞自今以後边上不得受納投降人并擒捉生口等天下諸州府縣官吏應行鞭撻本罪不致死者假以責情致令損斃每念於此良增惻然宜委御史台及出使郎官御史等切加察訪仍具事由聞奏澄清教化莫尚乎太學明治心術必本乎六經天下諸色人中有能精通一經堪為師法者委國子祭酒訪擇具以名聞奏天下州縣各委刺史縣令招延儒學明加訓誘名登科第即免征役刑罰不清不足以言理命官不重不足以招賢閑出入之文束上下之手必資慎選庶叶詳平大理寺官屬比來吏部所授多非其才宜令精選有志行詞學兼詳明法律者注擬其有課績特殊堪在朝獎者台省有闕宜先選擇一夫不获時予之辜苟有向隅之悲遂軫納隍之慮如聞去冬吏部三銓選人駁放者衆或文狀舛錯或書判差池主司守文不得不尔既施惠澤亦在沾恩其長名及雜駁選人有未离京城者委吏部今月檢勘毕除涉踰濫者余并却收以比遠殘闕量才注擬如不情願受地遠官亦不可強之仍速處分不得出選限內比者下令立科彰示大信法既无守人何适从赦命不行因循成俗誕告四方為虛設開施庶政為空文豈吾德之未明為有司之見負永言嘆息中夜疚懷朕即位之初已有赦令至如捐軻服御止絕他獻限喪葬以息淫費禁奇靡以專女工隱實版圖謹守儲備及他徭

擅赋闭籾禁钱吏行奸欺人冒依庇僧道踰滥流贬重轻钱弊利害军士侵占车马衣服之制度公坐入己之赃私悉令条疏贵欲该备颁宣未几废格已多或职司惰慢而不能将命或诏命才行而下已不守以此求理不亦难乎其元和以来诏书并长庆四年三月三日敕令委废不行事在朕躬谏臣极言得失无有所隐其在台阁者左右丞据诏令司额重加分配勿容推倚若因循寢废无所申明及虽曾宣下不能提举者具事由闻奏量加沙汰其在百司州郡者委御史台及分察使出使官郎官御史度支盐铁巡院准前後诏勅切加访察各具犯状移勘闻奏其本判官及刺史以下必加贬责用惩不恪如察举之司循默自守事状他露者亦据他疵量加殿黜仍并委中书门下重有举明去年三月三日敕令及今年赦文一事以上切加惩治据时限量官吏勤惰具科殿重轻闻奏京西京北边上诸军州镇自今年以後如有中使及郎官御史奉使到所管并不得人事与物应天下典人庄田园店便合祇承户税本主赎日不得更引令式云依私契徵理组织贫人虞氏建官必明黜陟汉朝置吏皆长子孙政成简用或登右职近代迁除过速资给转繁扇为时风莫有固志亲人之职为弊尤深毗俗土宜未及周悉迎新送故已闻代换更閱虽遽资望如初善否不分升降莫辨徒为烦扰无益公私自今以後刺史县令若无所犯非满三周不得除替如理行尤异但议就加其有才宜他职灼然要籍者中书门下先具事由及授上年月奏听进止满岁迁代无阙败者即与进改磐石维城义深麟趾穠华下嫁礼次椒涂縉绅文武之良材执事恪居之奉职克参裸献载叶肃雍亚献嘉王运终献循王適等各赐物一百疋夹侍正衣进珪各赐五十疋亚献终献正衣各赐四十疋大长公主嗣王郡主县主各赐物内外文武官三品以上赐爵一级四品以下加一阶合入三品五品欠考未合叙者待考足日听叙斯文未坠降圣克昌道逾三代之英化立百王之范象贤崇德垂裔作宾教义斯崇宪章无改文宣王二王三恪与一子官其祠庙委所司量加修饰克称惇叙因述本枝收族是先观型斯在皇五等以上亲三品以上赐爵一级五品以下陞一阶六品以下及前资常选散官简选日优与处分未有出身陪位者每家放一人出身应陪位皇五等以上亲及太皇太后三等以上亲三品以上赐爵一级四品以下加一阶诸亲四等五等及诸州贺正官并诸色陪位官等五品以上加一阶六品以下及白身人并赐勲两转其前资及有出身者各减一选締构兴王弼成昌运勲藏册府烈冠史编九原推可作之风百代凛如生之气载怀丕绩何日敢忘武德以来配飡功臣及将相名节尤着长庆四年三月三日制未沾甄叙者委中书门下条疏奏闻量与优獎故尚父汾阳王贈太师子仪贈太尉秀实子孙未曾甄獎者每家与一人正员官元和以来有因战伐死於王事其名节顯著未有优贈者各委本道节度使条录闻奏如勘覆詣实当有处分其有骸骨暴露者宜令所在埋瘞宏教爱之理爰命推恩念追远之怀用頒徽贈常参官及诸州府长官父母见在未有官封并量与五品致仕官及阶并邑号父母亡歿未曾追贈者量与封官及邑号已经追贈者更与改贈如贈官已至一品邑号已至国夫人者不在此限中书门下及节度使帶平章事者宜与一子正员七品官祖父母父母先歿各与追贈经追贈者更与改贈官已至一品邑号已至国夫人者不在此限节度使与一子正员八品官东都留守度支盐铁使观察处置都团练防御经略招讨等使及神策金吾六军将军大将上将军统军威远镇国军等使皇城留守各与一子正员九品官京兆尹特加一阶父母先亡歿未经追贈者各与追贈职修祀事礼奉严禋既合殊恩宜加异等应郊庙升殿行事官普恩外宜更加一阶如合入三品五品者任待考足听代尚书省三品四品以上中书门下五品以上特加一阶便蕃殿省给事郊丘顾以忠勤是宜甄獎内行事者三品以上更賜爵一级四品以下更加一阶内侍省及内坊官四品以上各賜勲五转五品

以下各赐勲三转应从驾至郊庙者普恩外三品以上赐爵一级四品以下各加一阶品官白身赐勲两转环列师营服劳扞卫申威攸属敷惠是应神策六军金吾威远皇城及诸道将士等三品以上赐爵一级四品以下加一阶无阶者赐勲三转在城神策六军威远营左右金吾及皇城将士应大礼移仗?卫御楼立仗等普恩之外三品以上赐爵一级四品以下加一阶仍準旧赐物有差神策将士加一阶仍準旧例赐物有差其神策将士应在京畿诸县者亦各有赐物应缘大礼职掌行事官并修撰仪注及留守副留守守仓库卿等普恩之外三品以上赐爵一级四品以下各加一阶?奉职贡载观郊禋内裨覃賚之恩外广怀柔之义鸿胪礼宾院应在城内蕃客等各有赐物翰林待诏供奉并诸色直见任及前资并员外试官三品以上赐爵一级四品以下各加一阶无官者赐勲两转导蕃服之诚承帝庭之命忠勤既着勲赏宜周诸道知上都进奏院官在城者各赐勲两转应缘大礼四方进表疏及贺正官各赐勲三转敬承禋祀赞执豆笾列庶卫以观光肆多仪而中矩诚在严恪理叶褒嘉郊庙行事斋郎减二年劳室长掌座礼生赞者减一年劳无劳可减者便放出身崇玄馆行事学生及斋郎礼生番考已滿所司缘大礼却追入行事各减一选国子监生陪位者赐勲一转中书门下仪注官各特赐一阶应缘祇供作官直司长上诸州行网考典两县耆寿诸色番役当上在城并量留十二月番者各赐勲两转飞龙闲廐宫苑典引掌扇内园少监栽接少府将作中尚武德军器内外弓箭库等诸司诸使下白身人及无品直司定额长上杂匠巧儿黄衣长上监直长杂使三卫七邑引驾细引执扇角手弩手彊骑武士天文观生历生漏生典鼓典钟工人乐人主膳主酪典食胡食手宰手掌闲幕士御士医士兽医门仆药童御书手楷书手典书流外行署等各赐勲两转尚年贵老所以教孝也耸义嘉节所以贞俗也天下百姓高年者上县以上每县十人中县五人下县三人并以县界年最高者充数并孝子顺孙义夫节妇先经旌表行义不亏者令人各赐米三石绢两疋仍板授上佐县君并委令长齋米帛就家赐讫具名本道一时闻奏其米及绢於上供数内申报神配峻极德称灵长秩既升於王公礼合加於牲币五岳四渎宜委本州府长吏备礼致祭当极丰洁以副如在之诚书称望秩礼着登封仰尧舜之聪明慕文武於方册遐想忠贞之迹?怀忠烈之风能御大灾咸申祀典名山大川及自古圣帝明王忠臣烈士各令所在致祭亡命山泽挟藏军器百日不首复罪如初赦书有所不该者所司具作条例闻奏敢以赦前事相言告者以其罪罪之赦书日行五百里布告天下咸使闻知

唐大诏令集卷七十

卷七十一

钦定四库全书

唐大诏令集卷七十一

宋 宋敏求 编

典礼

南郊五

太和三年南郊赦

会昌元年南郊赦

会昌五年南郊赦

南郊

太和三年南郊赦

王者祇见宗庙情极於孝思肃事郊丘义崇於严配诸侯骏奔於助祭百灵胥鬯而降祥感達神祇斯为茂范朕以冲昧获嗣丕业兢怀寅畏於今四年属兴伐叛之师未暇燔柴之礼今因南至有事圜丘荐诚敬於二仪申感慕於九庙羣祀来享至诚必通既陈信以告?宜覃恩而广泽可大赦天下自太和三年十一月十八日昧爽以前大辟罪以下罪无轻重常赦所不免者咸赦除之惟犯恶逆以上及故杀人官典正犯入己赃不在放限左降官量移近处已经量移者更与量移纵元勅云终身不齿者亦量与收叙诸色得罪人中如先有勅云纵逢恩赦不在免限并别勅安置者亦并委中书门下量事状重轻节级处分常参官及诸州刺史有先因停替及以病解免并终制未授官者委中书门下量才进拟其有伪出身人近已从流者与移近处未处分者减?处分未发觉卖官买官人并仰赦书到後一月内於所在纳官告陈首得免其罪如不陈首者已後事觉不在免罪限其京兆府来年夏青苗钱宜放一半应度支盐铁户部三司所管诸司官吏所由人户等节级疎理放免天下除两税外辄不得科配其擅加杂榷率一切宜停仍令御史台及出使郎官御史并所在巡院严加访察应缘乘輿服御宗庙供须一事以上当从俭约自今以後四方并不得辄以新様难得非常之物为献其机杼织丽尤甚若花丝布縠绫之类及幅尺广狭不中度者并宜禁断仍仰天下州府勅到後一月日内所有此色机杼一切焚弃犯者以故违勅论诸道先割属支郡将士如闻衣粮犹系使司详其事理颇非简便宜委本使差官检元割名额及粮赐等第交案与刺史勘会除续准诏勅抽停外据所

合给钱米并以当州合送钱米依实虚拆计割入留州钱米数勘会讷州使各具分数闻奏应缘解补支給并委本州其使司更不得收管方镇判史在京除官所须收补随从人数有即为节限他时替罢仍令随使停解其方镇交代之时及知留後官不得辄有补署刺史职在分忧得以专达事有违法观察使然後举奏顷年赦令非不丁寧如闻远地多未遵守州司常务巨细取裁至使官吏移业将士解补占留支用刑狱结断动须禀奉不得自专虽有政能无所施設选置长吏将何责成宜委御史台及出使郎官御史严加察访观察使奏听进止本判官不得匡正及刺史不守朝章并量加贬降若所管州郡控接蕃夷军戎之间事资节制须得使司共为条理即不在此限如闻近年以来京城坊中及畿甸百姓等多属州军诸使诸军召补之时都无旨勅差科之际顿异编氓或一丁有名则一户全免宜委本军本使及京兆府切加提举准元和二年八月京兆府所奏勅及长庆元年之节文处分诸色出身三卫最濫假冒官廕妄用优劳其三卫宜三二年且不得补人数尽无如更要补委有司条疏严为限制每所补注挟名替阙如便可停废亦诣实闻奏其六宅十宅诸王女县主宜令每年於选人中择情愿者配尚授官之时量加优赏罢秩之後仍减两选其初婚者更有赐与使备行李如非士类不在选限武德以来配享功臣及将相名迹尤着节义显闻而子孙陵替官阙废坠未经甄录者委中书门下搜访胤嗣特加优獎故尚父汾阳王赠太师晟赠太尉秀实子孙中未经甄獎者每家与一人正员官亚献循王邈终献恭王通等夹侍正衣进珪捧珪各赐物有差内外文武及致仕宗室官诸亲太后三等以上亲并应缘郊庙大礼行事进阶给赏赐各有差

会昌元年三月南郊赦

门下古之令王肇建皇极莫不严禋郊庙统和神人将以承上天之眷命告下土之率服恪有令典留为後法是太阳施光调无私之临照和风扇物乐有截之吹嘘明察为先诚敬攸属斯道不远弘之在予朕以寡昧入奉丕构应三灵之协庆祇一德以咸有夏鞞初悬惟赖元臣忠力虞琴方鼓永冀万国驩心顾以涉道多阙惕若馭朽凜如蹈冰纳隍勤诚励之怀置器审安危之地苟一物失所时予之深辜粤以献岁吉辰禋祀上帝烟燎既达牲币克修百神受职而恭敬六合承休而霈洽礼成而退庆孰大焉思与公卿大夫内外臣庶道迎喜气同我休嘉变生人之耳目振大化之纲纪立号垂统自中形外延八表之福敬昭万象之惟新事天之礼既因高以荐诚及物之思宜顺时以布泽可大赦天下改开成五年为会昌元年

会昌五年正月三日南郊赦

门下王者事帝必严禋祀之容臣下归功爰极推崇之义既膺显号式展隆仪因时布和顺岁更始前圣垂范逮予是遵矧以眇身幸逢昌运虽履水惟惧而涉道未周系我辅臣泊兹列岳内尽交修之志外分共理之猷乃者虜衆乖离部落分散收帝子於羶裘之所致名王为冠带之臣昆夷来朝不远万里蛮貊向化克同九州重以上党狂童窃袭叛迹问罪之师既集元凶之首遂梟廓清乱风洗涤污俗剪逆弁而故都底定窜摩尼而坏法永除由是退恶进贤化行令举刑奸赃之吏黜黥货之家此宗社降灵助成时政岂朕凉德独擅厥功而中外诸臣文武多士累陈恳疏再举鸿名辞不获从被此虚美是用?告清庙明禋上玄烟燎所升虚祝如答既享郊庙重申国经宜因行庆之辰诞布惟新之令同我景福永孚於休可大赦天下

唐大诏令集卷七十一

卷七十二

钦定四库全书

唐大诏令集卷七十二

宋 宋敏求 编

典礼

南郊

大中元年南郊赦

乾符二年南郊赦

南郊

大中元年南郊赦正月十七日

门下执大象者导阴阳之和帝率土者茂生植之化粤自轩昊暨於唐虞侧身皇阶虚已大宝握金镜之明耀致玉烛之融明惠中国以绥四方钦上玄而育兆庶所谓至德劳深企怀朕荷先帝之眷求奉祖宗之成宪获抚万国统和三灵兢严丕构惕励神器实赖昊穹嘉享神祇降休蛮夷戎狄之聿来鸟兽草木之咸若真宰潜运玄功启光麦禾丰登兵革偃息物不疵疠人无夭昏发扬氤氲数佑寡昧夙夜祇戴訏谟纪经尚惧德教之未宣黎元之未泰暴虐之害政朋邪之败风常轸念困穷思臻富庶每兴赤子之叹不知黄屋之尊爰因首政克举彝典告受命之纂绪展严配之盛仪柴燎升闻馨香殷荐羣礼昭答百神来享精诚既达感庆良深是用肆眚恤刑改元建号利时者不废便人者必行俾覃在宥之恩以顺发生之气与之更始咸使惟新可大赦天下改会昌七年为大中元年

乾符二年正月七日南郊赦

元化序时日月启贞明之照神功宰物乾坤垂覆帔之仁万物仰而遂生百王体以为用朕膺眷命恭守丕图惧忝所承虑违厥道每馭朽以思戒若涉川而靡宁自临御以来夙宵增励幸而文修政简岁稔人安赏罚惟公忠厚成俗道渐臻於清浄理将致於雍熙由是礼上帝用答天休御端闕以崇皇极是彰报本式叶元休尚念蠹於政事者未除害於时俗者未革尽施条制以絶根源更表申恩仍行肆眚昔殷汤解网实谓至仁汉文措刑永称圣理在宥乃为君之德好生实有国之规今复承以阳春之时布其涣汗之典上符天意旁契人心大礼备陈彝章

克举谋猷广备声教遐宣期昭泰於寰区亦涵濡於动植溥天率土既乐玄风四海九州宜覃庆泽可大赦天下自乾符二年正月七日昧爽以前大辟罪以下罪无轻重已发觉未发觉已结正未结正系囚见徒常赦所不原者咸赦除之惟犯十恶叛逆以上及故杀人官典犯入已赃兼情涉巨蠹及持杖行劫并故杀人者虽已伤未死更生意欲杀伤偶时死者并同已杀人法处分买卖毒药开劫坟墓及刑狱之内官吏用情推勘不平因成冤滥无问有赃并不在原免之限敦本睦亲古今典制永惟负荷常切忧兢应宗室有材行可昇沦落在外并委宗正卿专加察访旋申尚书门下量材处分惠安皇太后凡有缌麻以上亲各委所在搜访闻奏仰酬顾复何择亲疎爱念播迁重命牵复至於殂谢亦使惠绥用表深仁以彰玄化左降官量移近处已经移者更与量移如官至刺史准刺史月限例处分诸色官未复资者有司别条疏闻奏如合复资者五品以上中书门下便与处分六品以下任依常例选集丁忧去任及在忧制受贬者服阙日亦与量移缘责除降资正员官及缘累停免未经引用者并量与进改流人及降死从流者移近地如已收叙者量材录用并僧尼道士移隶者亦放还劝善惩违朝廷大典苟或隳紊何以耸人其流贬人其中或有情状巨蠹物议不容者不在该恩者流贬人如已亡歿家口欲还及须归葬者听随所便如缘葬事幼弱饥寒不能自济者委所在长吏量给棺槨优恤发遣左降官及流人等有官者如已歿各还本官亡官失爵累禁錮者并从洗涤诸色流贬人元勅内云虽逢恩赦不在量移之限有自前年十月十二日赦书後已量移者五千里更与量移一千里三千里外与量移五百里情状难容者不在此限天德五城流人负罪素重元勅未经十载不得放还今属洪恩须令沾及宜减三年如年限以来满便放还从九月四日降郊礼勅後流贬及引决妄称冤人等并重推覆囚徒并不在此限近日奸险之徒多造无名文状或张悬文榜或譟造童謡此为弊源合处极法应捉获此色者准持杖劫人合造毒乐例经赦不原其所得文状准律文於所在焚毁不得徵逋赃以利疲人是叶政经期为理本京兆府去年夏青苗钱每贯量放三百文所放钱如是有司占留色目委户部准旧例据数支填其咸通十一年以前百姓积欠两税斛斗及青苗榷酒钱并私草职田糠麦赵荆棘等徵收不得空繁簿书者前年十一月十二日赦令已令蠲放至今尚未了絶宜令所司速具放免钱物数目分析奏闻如在官典所由腹内者不在此限从咸通十三年夏以前京兆府所欠诸陵园及诸军诸使钱草斛斗并诸杂物一物以上宜并放免其诸县所欠府司钱草斛斗一物以上亦并放免从咸通十三年夏以前京兆府所欠诸陵掌闲彊骑丁资三卫昔资钱亦并放免甸内逃亡人户尚徵税物切要条疏以安疲瘵委京兆府差官逐县勘覆其逃亡人户产业田地未有人承佃者其随田地苗税除栢榷酒钱及斛斗等并权放三年勒常切招召人户三年後再差官勘覆据归复续却收税从咸通十三年以前甸内所欠延资库户部度支榷酒除栢天和余赈贷钱物斛斗一物以上并宜放免内庄宅使巡官及人户等应欠大中十四年以前至咸通八年前以前诸色钱六万二千三百八十贯三百文斛一十万三千七十四石九十丝二十二万七千五百八两麻二千四百七十斤草二十六万五千八百五十五束念其累岁不稔人户贫穷徒有鞭笞终难徵纳并宜放免三司所钱物已遣不徵必虑依近遣尚犹追扰度支部盐铁三司应收管在城及诸州府诸場监院所欠咸通十年以前诸色钱物斛斗等前年十月十二日赦文并令放免所司不得更生节目妄有进徵如闻所司官吏缘循至今尚有盘勘都非公但务生情岁月转深奸弊颇甚各委本司差定官一人专勾当但据见在文帐检勘除官典所由请领官钱和余和市及在场官供官招商所由帐内正身见在外其身已亡歿曾经检责及其身见在贫穷家业荡尽无可徵纳者并逃窜捕役未获囚系妻男摊徵保人等仰便据年额

请免除去簿书不得更行文牒妄有盘问赦书下後限一个月內具放免钱物单数分析闻奏如更稽迟本勾当郎官当议贬黜典吏等痛加惩断停解天下州县官铨司注拟便有选自朝廷多故三司监院官索州县承迎云是制院恐吓州县影占富豪从今後有监院处亦仰州县常加听察如监院官有不公不进各申本州行牒本司便如状事稍重仰专差使送申状本司事大则任闻奏兼申中书门下御史台以凭推勘所冀通相检察不敢侵凌诸司更换素有定规近日苟且缘循渐至虚折商徒则获利倍於往日所司则侵损转难任持若不条疏积成蠹弊其三司更换宜令准咸通十五年闰四月二十一日度支所奏处分如尚踵前必举朝典制置新岁酒钱其户贫破者州县不令破户或卖柴佣力以纳税令所由司条疏闻奏其河南府界蒿荒地委河南尹於税钱三分之量与免二分勿令使无路营生聚为草贼其天下州县除已准元勅徵收两税榷酒钱茶盐利旨支米价等分外余额外如徵别配及贩柴炭之人纳税等元无勅文缘本道奏请降勅并仰勅内便皆停罢仍限勅到後二十日内外分析闻奏并不罪今日已前之事如又不已必举明刑曾经水旱已放徵科或虑缘循须更提举诸道州府或有遭水旱甚处去年夏税合纳苗税等钱委本州府长吏酌量蠲放其咸通十年以前所欠负两税钱米等在百姓腹内徵收不上者前年十一月十二日赦书已放免仍委州府速检勘蠲放分析奏闻所在州县除前资寄住实是衣冠之外便各将摄官文牒及军职赂遗全免科差多是豪富之家致苦贫下准会昌中勅家有进士及第方免差役其余只庇一身就中江南富人多一武官使庇一户致使贫者转更流亡从今後并依百姓一例差遣仍委方镇各下诸州准此检点江淮运米本实关中只缘徐州用军发遣全无次第运脚价妄被占射本色米空存簿书遂使仓廩渐虚支备有阙缘循弛慢全自职司宜令转运使速具条疏分析闻奏才及春便须差清强官吏节级催驱严立科条须及旧额苟或踵前容易必举朝章邮传供顿通马数目素有定制合守前规河南馆驿钱物至多本来别库收贮近日被府司奏请袞同支用遂使通马欠缺料粮不充宪司又但务缘循都不提举宜令东台馆驿使速具条疏分析闻奏东都留守所管兵数不少无非市肆之人缓急抽差全不堪用防卫官阙尤非所宜顷有条疏以革前弊宜令速分析见在阙额并老弱人数闻奏应缘州府经费悉有旧规近者不务在公惟思润已或聯遇丰稔亦不贡羨余若小有水旱即竟有论请致令朝廷事力转困全在臣下诚敬无乖自今後如辄将上供一钱物支用并当加譴责不在原贷之限如本道实有灾荒积岁为衆所知者不在限例朝廷徵发兵士固非获已道途顿逋费劳至多又闻节级须得人事裨补每县不下五千文尽配疲人深可哀悯自今後但供备无缺辄不得踵前率配如或违犯县令本曹官重加贬降吏人决杖配流其都知兵马使以下并以枉法赃论立法之始当在必行诸处本置作坊只合制造戈兵甲及进献供须昨徐方用军诸道多无兵器内库般送填塞道途如闻作坊惟使杂伎弓甲之匠十无一人打筑即惟务精新器甲则多妄修整自节察至刺史皆为信臣不能委曲条疏各宜自知改革诸道兵士非惟缺额不堪兼又军将数多一员敌官健数分又占官健当直遣纳课钱其弊数重深要除荡仰诸道各自检点如或本自书题又无功効非军中子弟空请职名者并皆疎理其军将等各遣纳课钱者并准入已赃结罪科断东畿之内留守影占最多稍富者不拣城外村中尽有一虚明文牒亦犯罪者亦称此名府县若追但行牒却取自小则推勘了牒送事重者则与勒停委留切不得遮夺免致闭伤其在京诸司亦仰各依此例如被抑屈但具奏闻且徵两税自在有常期苟或先自准驱必致齐人凋弊盖缘机织未毕特践未终便须令卖缣繒贱榷斛斗致使豪首迫蹙富户吞侵须更申明俾其通济诸州府如有不依旨限先期徵税者长吏听奏进止县令录事参军并停现任书下

考不在务怨之限关要之外声教至遥每念疲人尤多横役访闻五岭诸郡修补?舍城池材石人工并配百姓至於粮用皆自資持既不折税钱又全无优恤永言凋瘵实可悯伤自此委节度观察使接借本钱并刺史百计收拾运转别立修造案名额遣干济官主持常令急遂修营勿遣大段摧毁永放百姓额外差科已债恤人斯为盛美遐荒贱吏尤可哀矜先於咸通五年梧州余十万石米停贮数载之後方令盘送邕交如闻卑湿损伤雀鼠耗折计其所言六万石余累载以来亦颇校料徵纳主持军将十余辈摊保累数百家或科决不轻或资财荡尽典男鬻女力竭计穷尽虚挂簿书徒为羈紲宜从寬宥用释殷忧其所欠米委度支一时放免邕南交趾屯驻兵士全无运粮俾其足食湖南江西管内诸郡出米至多丰熟之时价亦极贱网官若得钱收采每斗必有盈余道途既可经营输纳庶无败阙缘於官仓领米刮铁平量既润资陪便致吞侵耗折所以经年累月舳舻相交江路多有沉沦军食常忧久缺自今仰所在长吏切须饶润网官并令交付脚钱仍与善价采买严示刑赏不使稽迟邕州安南晏州见屯诸道行营兵士合食米钱等三处兵数近四方日食钱米费用极多全在诸道州使巡院馈运相继免失支持近日以南中为警急抽差皆务循将相同常事盖缘地远差网无利皆托以盐铁户部指择未得分明申报逗遛图延界分或有未有本色皆云额望收钱及网官进发之时欠脚钱途路侵盗钱米所至稽停每发一网便逾星岁致令供军使频申三处月限不相接续所司前後申奏行牒督责非不丁宁盖缘只有科贬之名曾无必行之令遂致全无凛惧但务缘循若不严立科条必恐转成败失其诸道州使巡場监院所合搬送南中供军钱米各委所在长吏并发网船以济军用仍委逐道节度观察防御经略刺史差最大判官一人专判校科其巡場监院官場官自专催促各令设法勾当克济军须如依前逗遛不早送申遂使边军粮储久阙供奉不得相续便据所欠钱米处勘遂重加贬责如州使官吏場监院官能罄诚节慎选行网支遣及至舟船继至即重议酬獎河东向管延资库斛斗五十万石每岁出陈入新之际劳扰州县百姓至多未有用时积为深弊宜令本道节度使点检除道路与边镇接近缓急堪般充军粮者即且准前其余深僻州县并速条疏分析闻奏义仓斛斗本防灾年所贮积岁多翻成侵害又差重丁大户充仓督子弟主管凡节察及监军使刺史县令到任仍须二毫量差役乡夫数重劳扰每一量复欠折转多主掌之人贴家竭产生灵涂炭州县困穷从今後宜五年一度变换便巢货收钱入冬却采仍委本道监使常加访察如有上下蒙蔽欺隐破除闻奏但不要初上之日须重覆量每扰度人朝廷大弊在於令不行只如经水旱州三降勅命不许将逃亡规摊见在户遭灾水旱处有於见在户内陪徵或至三陪又近年以来节度观察使或初到任或欲除移是正二月百姓饥饿之时分遣二日条先抽徵见钱每一千文令纳三四百此时无不两陪三陪生生举债至有卖男女以充纳官行彼贪心残我赤子从今後有如此者必举极法以谢生灵诸道事例差使结懽法信出於官中答弊归於私室驻留供备迎送优丰进献不副常程结好却为公事惟奏欠缺不思本源且邻境结懽何必事须厚币来者若为私物去者何必官钱道慕空门名为释子若非精进何以住持应城及诸州府僧尼元勅人数外不得转令私度如有死亡等阙即任据人数堪填补年终闻奏待五年限满持每收补皆须选择有戒行事业者勿令滥杂之輩於此容身天下刑狱申到法寺及刑部有经数年不得了絶省寺人吏竞邀赂出入律文大理寺及刑部官僚不亲公事致死一案之内半死狱中从今後委中书门下每日点检如停滯者大则贬降小则停勒其刑部郎中员外切须选择亦不得辄其奉使以望贿财有文案则并送对厅行货财则独收私第准咸通十一年条疏诸州刺史三千里外限三十个月二千里外限二十七个月近者勒刺史到郡交代则可以计到郡月满便

且除移如新除者则须待月限满除替其余内外诸官并依咸通十一年条疏如有限未滿錯替者任经中书门下过状便与追勅有过失须替则不在此限两省官本令先任四赤令贵欲知人疾苦近者才三五月则替何殊罔生空陪优人从今後宜以十五日为限两畿令府判司从前吏部注拟顷年或除三人两人近者乃至除望县令及部尉等中书自不存体百司何以仰瞻其进焉十年本限五年方滿近者旋替年深致使入仕多门三铨无缺从今後如或用年深缺补人兵部郎官必议贬降词科出身士林所重本贵践历渐至显荣近者惟扇浇风皆务躁进麻衣才脱结绶王畿是能十年宦途今来半岁迁授颇为讹弊须举重明自今以後进士及第并须满二周年後诸道藩镇及户部度支盐铁及在京诸司方得奏请如未及奏官限内有摄职处一任随牒摄其弘文馆集贤院奏请直馆校理并依此日限如出身後诸道奏已请初銜未得而考者輒便奏畿内尉充在职两考方得依资除官改转其授使下官先自有月限资序一一须守旧规不得超越比拟准咸通十四年十月九日勅文处分关节取受本身值财素来贫无亦多举债祇缘从来赦文未甚分明赏罚若行必当止絕自今以後如有人用钱买官纳银求职败露之後言告之初取与同罪卜射无舍其钱物等并令没官送御史台以赃罚收管如是波斯番人钱亦准此处分其柜坊人户明知事情不来陈告所有物业并不纳官严加惩断决流边远庶絕此类用其清平乐官乞托本自人情既越旧规过於债负虽累有明勅尚不遵行两巡不切追擒教塲又不铃辖从来上於方镇近日方镇与乐官人事转多别有迁除例皆乞覓喧呼门户拥塞阶庭以此得官人不愿除授自今以後除方镇外两巡使及诸司外巡切加擒捉如有此色具送本司枷禁勘责痛加惩断以絕此弊近年以来风俗奢侈本营根本各务夸张及第登科倾资竭产屋境踰於制度丧葬越於礼仪为册使吊赠之臣或争财货乞赐章服之类不畏惭羞致使儿童或轻朝列念兹靡费常行叹嗟委中书门下次第条疏稍加改革输其常赋尚虑不充更或加徵其何以济近年百姓流散税钱已多如闻自朝廷用军有於百姓正税外每贯纽四十五文已是数年至今不矜放黎甿冤抑腿脊疮疾所徵钱财将充诸色支分所添兵则逐月销减每思此事深可叹伤其天下缘用军奏加纽贯之钱更有敢徵一文其长吏及判官録事参军并准入已赃仍不在以官赎之限其郑州庚道尉在任日加徵税钱如或却徵亦依此例衡镜之司去留虽切念其羈寓须与商量支部选人如闻累年駁放至多或文状舛错或书判差迟有司守文不得不尔况选人例迫饥寒方自远来调集频年被駁情实可矜既遇鸿恩合与优假委吏部检勘去冬选人若有此色除身非名踰濫及欠选欠考外并以比远残缺取其情愿者特与却收注拟诸道奏官奏者缘要缺旧人不理从今後并须分明具不理罪???先加惩责有罪空替则是惠奸其奏前资及见任多有虚?头銜用钱计会从今以後有官更奏者便仰兼通告至进奏院以凭点检如告身不到不在奏行其虚銜所奏只与九品初任仍奏状内须是三代官讳及乡贯户头年几余各依资奏请河北三道不在此限守土长人切资士族品流混杂必害生灵刺史县令如是本州百姓及商人等准元勅不令任当处官不系高下盖以事体不可兼又十室九亲多有憎爱一切阻碍公事难行近年此色至多各仰本道通相檢察当日勒停百姓商人亦不合为本县镇将若有违越必举典刑裨补除任实在獎劳奏请繁多则为过濫咸通七年赦书条疏诸州府奏军将官不许除上佐如有功须獎即於本管内除授仍不得占优原处近日诸道不守条章或分两三度奏来所贵前後不相见但行计会贵得人多後从自後诸道军将官并限七月表到京令之初行宜武臣之叙进据所合奏人数一表令如有别劳効者即待明年七月不得两度贵行欺隐忠臣社稷誓着山河或盟府书勲或閤宫配食宜举赏延之典用彰义烈之名故尚父汾阳王贈太

师子仪赠太尉秀实赠太师晟赠司徒顔杲卿太师真卿许远张巡南霁云子孙中未甄獎者每家与一人正员官安金藏操行中节实异等伦合为酬庸以劝义士如有子孙与一人正员官武德以来配享功臣名迹尤着节义显闻子孙凌替官阙废坠未经甄录者委中书门下搜访嗣胤量加优獎庆连宗室义重维城洎文武羣僚恪恭事务用酬劳绩宜降恩私亚献抚王紘荣王情等各赐物一百疋夹侍正衣进珪捧珪各赐物五十疋亚献终献正衣各赐物四十疋大长公主嗣王郡主县主各赐物内外文武见任及致仕官三品以上赐爵一级四品以下加一阶合入三品五品欠者未合叙考者待考足日听封叙孔圣之後未加虞宾之恩或表崇儒以明继絶文宣王之後及二王三恪各与一子官其祠庙委所司量加修飭义在奉亲道惟睦族将申孝敬合示恩荣皇五等以上亲三品以上赐爵一级五品以上加一阶六品以下及前资常选散官简选日优与处分未有出身备位者准会昌五年正月三日敕书处分应陪位皇五等以上亲三品以上赐爵一级四品以下加一阶亲四等并诸色陪位者五品以上加一阶六品以下各白衣并赐勲两转其前资及後出身各减一选皆怀追养之愿尽有荣终之心授任封崇式光存歿常参官及诸州府长官父母见在未有官封者并量与五品致仕及阶并邑号如有官者量与进改如官已至五品以上者即与五品阶父母亡歿未经追赠者量与追赠及邑号任荣辅相寄重藩方洎於亲军咸秉忠节俾令追赠以显荣中书门下及节度使带平章事者各与一子八品正员官祖父母父母亡歿各与追赠已经追赠者更与追赠节度使与一子正员九品官东都留守度支盐铁使观察处置都团练防御经略招讨使皇城留守各与一子出身先亡歿未追赠者各与追赠?奉典章肃供祀事宜覃渥泽以獎劳能礼仪使大礼使京兆府尹各与一子正员九品官应郊庙升坛行事官溥恩外中书门下尚书省御史台三品以上特加一阶四品以下各加一阶如入三品者量减三考入四考者量减三考入五品者量减两考仍待考足日听叙其合选人与减一选内行事者官三品以上赐爵一级四品以下更加一阶内侍省及内坊官四品以上各赐勲五转五品以下各赐勲三转应从驾至郊庙者溥恩之外三品以上赐爵一级四品以下各加一阶白衣赐勲两转位列牙爪职掌警卫念其宣力宜加醺劳

唐大诏令集卷七十二

卷七十三

钦定四库全书

唐大诏令集卷七十三

宋 宋敏求 编

典礼

东郊

亲祀东郊德音

北郊

太极元年北郊赦

明堂

详议明堂制度诏

颁明堂制度诏

亲享明堂制

明堂灾告庙制

亲祀明堂赦

社稷

亲祀太社诏

昇社稷及日月五星为大祀勅

东郊

亲祀东郊德音

皇王之化载籍所陈将奉天而育物必顺时而行教虽礼文则着而亲祠盖阙朕自膺宝历且踰二纪承宗社之蕃祉因公卿之叶心万物阜成庶务简易思以黎献臻夫仁寿是用敦本复古将必稽於月令谋始作则先有事於春郊宜因展礼之辰式布维新之泽其天下见禁囚应死罪者特宜免死配流岭南以下罪并放免朕每念黎甿敝於征戍亲戚多别离之怨关山有往复之勤何尝不惻隐於怀寤寐增叹所以别遣召募以实边军锡其厚赏使令长往今诸军所召人数尚足在於中夏自能罢兵既亡金革之事足保农桑之业自今以後诸军兵健并宜停遣其现镇兵并一切放还京圻之内杂役殷繁言念劬劳岂忘优恤顷者櫟阳等县地多咸鹵人力不及便至荒废近者开决皆生稻苗亦既成功岂专其利京兆府界内应新备田并宜散给贫下及逃还百姓以为永业书不云乎不作无益害有益语不云乎奢则不逊俭则固缅惟前古常切在心将斲雕以为朴期上行而下效自今以後王公并不得以珍物进献所司应缘宫室修造务从节俭但蔽风雨勿尚华饰至如金玉器物诸色雕镂朕缘蕃客所要将充晏赏今流俗之间通相仿效既捐财於无穷仍作巧以相矜败俗伤农莫斯为甚并一切禁断以絶浮华古者乡有序党有塾将以弘长儒教诱进学徒化人成俗率由於是斯道久废朕用悯焉宜令天下州县每一乡之内皆别置各学仍择师资令其教授其诸州乡贡进士每年引见讫并令就国子监谒先师所司设食学官等为之开讲质问疑义且公侯之胤皆禀义方学礼闻诗不应失坠容其徼幸是长慢游如闻近来弘文馆学士缘是贵胄子孙多有不专经业便与及第深谓不然自今以後宜一依式令考试朕之爵位惟待贤能虽选士命官则有常条而安卑遁迹尚虑遗才其内外八品以上官及草泽官有学业精博蔚为儒首文词雅丽通於政术为衆所推者各委本州本司长官精加搜择具以闻奏发生之月实在於行仁利物之心莫先於作善先断捕猎令式有文所由州县宜严加禁止其每年千秋节日仍不得辄有屠宰道释二门皆为圣教义归弘济理在专崇其天下观寺有絶无女道士僧尼者宜量观寺大小度六七人间择灼然有经业戒行为乡间所推仍先取年高者凡百卿士朕之同德宜勉修所职以合时令礼有施惠义兼行赏实为其时固不可缺亚献忠王璵宜赐物一千疋终献颢王璠赐物五百疋邠王守礼宁王宪各五百疋庆王儆以下及长公主郡县主二王後京文武官赐帛各有差天下诸州侍老宜令所由长官量赐酒肉务在优养今朝廷无事天下太和美景良辰百官等任追胜为乐宜即布中外咸使闻知【开元二十六年正月】

北郊

太极元年北郊赦

门下朕闻大事在祀礼极乎郊丘大道日生道存乎赦宥故至诚斯感允接神明之休盛典事修必敷雷雨之施古先帝代躬祀后土所以崇兼载之功配博临之义有虞氏之合禘徧於山川成周氏之从祀逮於林泽西汉汾陰之睢东洛翠舫之禪虽制未备而道极可观曹马以还数百余载盖设仪而不复或诚信而未孚有废祀莫能得举我国家受命也承百王之季启三统之元高祖神尧皇帝膺籙受图继天立极太宗文皇帝吊人伐罪南征北怨是用拯生灵於涂炭登物类於休和高宗天皇大皇帝惟睿作圣垂衣而理大圣天后受托从权当宁而化中

宗孝和皇帝允?克让守文御武能致刑措於变时雍朕以渺身恭荷丕构常恐政理乖中风雨愆期惕厉周於万户疚怀切於一物幸乾坤交泰宗社降灵气无疵疠之灾物遂生成之性呼韩慕化侍子来庭月支请职名王入贡大荒同轨瀛海无波俯循凉德载怀寅畏故以岁首肃事禋宗爰撰令辰亲祀方泽采黄图之旧制定黑時之前基心谋取则於礼经宥密同规於诗颂三祖登配羣望毕从咸池之舞在列合鍾之管斯应祥风入候当乎八变之殷瑞日扬晖属乎三献之始臣工助而胥悦兆庶观以相趋诚敬克申感庆交集顷缘郊籍已肆眚灾贷宥之道未应累降但精享云缺既旷代而方循福厘所被思寰宇之同沐宜因大典式畅洪恩可大赦天下改太极元年为延和元年五月十三日昧爽以前大辟罪以下咸赦除之其十恶及刘诚之胡太宰徒侣官人受赃并不在赦限文武官预大礼各赐勲一转桓彦范敬晖崔玄袁恕张柬之等特还其子孙实封二百户大酺五日

明堂

详议明堂制度诏

朕闻合宫灵府创鸿规於上代太室总章标茂轨於中叶虽复质文殊制奢俭异时然其立大中作人极布政施教归之一揆朕嗣膺下武丕承上烈思所以答眷上灵事遵孝养而法宫旷祀明堂寝构永言大礼朕甚惧焉宜命所司与礼官学士等考核故事详议得失务依典礼造立明堂庶旷代阙文获申於兹日因心展敬永垂於後昆其明堂制度宜令诸曹尚书及左右丞详议

颁明堂制度诏

首出万物实显崇高之模德普八方乃睹昇平之盛合宫听朔闡黄轩之茂范灵符通神敷帝勋之景化殷人阳馆青珪备礼姬氏玄堂彤璋合献虽运殊丽翰时变质文至於立大中建皇极轨物施教其归一揆泊乎西京创历駁政逾繁东汉开基旧章犹阙考图汶上仅存公玉之仪度室圭躔才纪中元之制三方鼎据祚倾於金马五胡尘扰道丧於苍鹅自此相仍时经板荡遂使陟配之典久沦於县载端宸之化允属於隆平朕恭膺宝命肃奉瑶图昧旦求衣旻影忘食赖上玄垂佑宗社降灵幽明宅心中外禔福封金岱岭昭累圣之鸿勲勒石九都成文考之先志功标偃革时会委裘固可以作化明堂显荣太室修机之历既表於嘉明布政之宫式崇於美制是用求中景日取则陰阳考广袤於裁圭定高卑於置 傍罗八柱周建四墉架宇仪天疏基象地窗闕齐布应路并兴导壁水以环阶应璇衡而结极重阿复道用循测管之模上圆下方仍准分蓍之数木工不琢土事无文丰约折衷经始勿亟勾芒候序入春圃而司仪蓐收届时下秋园而奉职事符神道钩绳之用毕陈仪叶子来衅落之期非远将以肃清禋祀展殷荐於皇灵施号法宫扬休声於大帝百神受贄咸尊孝享之风万国来庭共覩太平之政阙文斯备大礼聿修制作之规可依别勅宜颁示天下永垂来叶

亲享明堂制

昔軒黃御歷朝萬國於合宮丹陵握符咨四岳於衢室有虞輯瑞總章之號既存大禹錫圭重室之名攸建殷人受命置陽館以辨方周室凝圖立明堂以經野用能範圍三極幽贊五神展尊祖之懷申宗祀之典爰從漢魏迨及周隋經始之制雖興修廣之規未備朕以庸昧?膺厚托受寄於綴衣之夕荷顧於仍几之前伏以高宗往年已屬意於陽館故宗輔之縣預紀明堂之名改元之期先著總章之號朕於乾封之際已奉表上陳簡在宸心未遑營構今以鼎郊勝壤圭邑名區處天地之中順陰陽之序舟車是輶貢賦攸均爰藉子來之功式遵奉先之旨夫明堂者天子宗祀之所朝諸侯之位也開乾坤之奧策法氣象之運行故能使災害不生禍亂不作眷言是烈豈不美欤比者鴻儒禮官所執各異咸以為明堂者置三里之外七里之內在國陽明之地今既俯迓宮掖恐黷靈祇誠乃布政之居未為宗祀之所朕以景已之地去宮遙遠每月所居因時享祭常備文物動有煩勞在於朕懷殊非所謂今故裁基紫掖辟宇彤闈經始肇興成之匪日但敬事天地神明之德乃彰尊祀祖宗嚴恭之志方展若使惟云布政負扆臨人則茅宇土階取適而已豈必勞百姓之力制九筵而御哉誠以獲執苹蘩?奉宗廟故也時既沿革莫或相遵自我作古用適於事今以上堂為嚴配之所下室為布政之居光敷禮訓式展誠敬來年正月一日可於明堂宗祀三聖以配上帝宜令禮官博士內外明禮者詳定儀注務從典要速以奏聞者【垂拱四年十二月】

明堂災告廟制

朕君臨紫極抚育蒼生普該有識之流為后無疆之福神宮之後式建尊容頃緣內作工徒?火誤燒麻主遂涉明堂然朕昧旦忧勤不遑寢食慮亏至道未副天心內省厥躬伏增寅畏槐棘署衆僚庶尹宜竭廼誠各揚其職內作工匠可即放還刺史縣令風化之首宜矜恤鰥寡敦勸農桑均平賦役省察奸盜里閭妖讹尤加嚴禁遠近冤訟令早決斷見禁囚徒速為處分老病之色征鎮之家亦令州縣加意抚存諸作非要切者量事宜停所司供進之物并宜節減其長才廣度沉迹下僚據德依仁輶聲幽閉懷王佐之器乏知己之容宜令京官職事五品以下及刺史上佐縣縣令等各准狀荐舉仍遣內外文武百官九品以上各上封事極言正議无有所隱

親祀明堂赦

朕聞惟天為大所以上序三宗惟帝為尊於是宏開七廟故知肇興衢室爰申宗祀之規乃建明堂式廣嚴禋之禮莫不八窗四閤分景氣於炎涼復廟重檐定尊卑於昭穆實為國之洪訓乃經邦之茂典我國家聖祖神宗重光累業道軼羲農之上功侔造化之初冠今昔而居尊掩寰區而作大朕承天抚運繼聖開元披鳳歷而乘時握龍圖而建極春秋變易每增霜露之心日月推移倍切蒸嘗之思然而城臨丹鳳清廟久安水控玄龜神基未立金輿往幸空展望於遙祠玉輦來巡實幸親於碣石三川帝里八水皇州豈皇邑之相夸乃都畿而有謝所以交風輿壤還開候歷之庭揆日名區更置馴龍之室崑崙紫座无亏荐鮪之途奕奕丹宮遂得獻羔之所加以總章霧辟重屋烟披懸曉日於海梁挂晴虹於柱棟是以用斯圭璧奠彼牲牢鳴孤竹之簫管奏空桑之琴瑟爰於附享之日乃至禋宗之晨景色殊長烟云冠古或凱風南至扇喜氣而分輝或驟兩東來引祥雲而合向固可以作樂崇德殷荐上帝而碧海遥澄覺三邊之

雾卷丹青上廓看九野之尘清祖宗之灵贶昭然宇宙之神心可见?奉既展盛礼斯弘宜覃作解之恩以广奉先之德但赦者小利而大害始泰而终否着小人之幸非君子之幸今岁以来频敷渥命徒长侥幸逾犯宪章非所以弘獎风猷发挥名教深虑无知者因兹获罪有识者缘此致讥遐思管仲之编?想吴汉之说恐负不构慨然长想昔孔明相蜀王猛佐秦咸以数赦为言俱称肆眚非便朕惟新闻政方事澄源期望古而裁规且修今而布泽伏以礼申崇祔情展恭禋式流旷荡之恩兼明惩劝之道可大赦洛州境内天下诸州见禁囚徒应至死者特宜免死配流者入徒余并原有在京文武三品以上赐爵一级四品以上各加一阶内外文武九品以上赐勳一转皇亲嗣王郡王仍特许佩金鱼袋内外职事官三品以上及四品清官并中书门下五品父已亡者并量加追赠如闻天下诸观皆画化人之变诸寺亦画老君之形一种尊容两俱不可限制到後十日并除却有故留者即科违勅罪其化胡经先有明勅禁断如闻在外仍颇流行自今诸部化胡经事及诸凡说化胡事处并宜除削在外百姓之家百两未行二亲俄殒歿停哀之际便即成婚遂辍苴絰之容敢申花盥之礼寧戚之容安寄罔极之志缺如败俗伤风莫过於此自今後宜令惩革自弘道以前继任相三年已上及秦府晋府僚佐四品以上并食实封功臣虽经罪责不致破家子孙无任京官者特宜优与一官英府周府旧僚五品以上官子孙亦宜准此天下百姓为父後者各赐古爵一级大酺三日又制内外文武四品以上官并县令京司清官九品以上各举孝弟廉让一人【神龙元年九月】

社稷

亲祀太社诏

厚地载物社主其祭嘉谷养民稷惟元祀列圣垂范昔王通规建邦正位莫此为先爰既旦都邑建於州里率土之滨咸极庄敬所以劝农务本修始报功敦叙教义整齐风俗末代浇浮祀典亏替时逢丧乱仁惠施薄坛壝缺昭备之礼乡里无纪合之训朕握图受历菲食卑宫奉圭璧於尊严洁粢盛而禋燎尚想躬稼励精治本永言复礼深存往纪是以吉日惟戊亲祀太社率从百寮以礼九谷今既南亩俶载东作方兴州县置礼宜尽只肃四方之民咸勤植艺随其生类命为宗社京邑庶士台邑羣臣里閭相从共遵社法以时供祀各申祈报兼存宴醕之义用洽乡党之欢具立节文明为典制进退俯仰登降折旋明加海励通相劝獎齐之以礼有耻且格布告天下即宜遵用【武德九年正月】

昇社稷及日月五星为大祀勅 孙逖

勅祭之为典以陈至敬名或不正是相夺伦况社稷孚佑百代蒙其福日月临照五星叶其纪兆人允殖下土式瞻既超言象之外须极尊严之礼列为中祀颇紊大猷永言允当必在刊革自今以後社稷日月五星并昇为大祀仍以四时致祭诸星升为中祀庶昭报之诚格於上下钦崇之称合於典则

唐大诏令集卷七十三

卷七十四

钦定四库全书

唐大诏令集卷七十四

宋 宋敏求 编

典礼

藉田

贞观三年藉田诏

藉田制

停藉田雕饰农器诏

元和五年罢藉田勅

开元二十三年藉田赦书

九宫贵神

亲祭九宫坛勅

亲祭九宫坛大赦天下勅

岳渎山川

封华岳神为金天王制

册东海神为广德王文

令卢从愿等祭岳渎勅

令嗣郑王希言分祭五岳勅

令嗣许王瓘祭东岳勅

禁骊山樵采勅

雨泽顿降昭报山川勅

令关内诸州长官祭名山大川勅

遣官祭霍山勅

萧昕等分祭名山大川勅

立终南山祠勅

杂祀

天地宗庙外祭用少牢诏

置壽星坛勅

昇风伯雨师为中祀勅

五人帝祝文勿称朕诏

亲拜风伯雨师祝板诏

条贯祀事勅

藉田

贞观三年藉田诏

周宣在位已坠兹礼近代以来弥多所缺朕祇承大宝宪章典故今将履千亩於近郊复三推於旧制宜令有司式遵典礼【贞观三年正月十八日】

藉田制 张九龄

门下粢盛所以奉神祇耕籍所以助人力既义率乎下而敬在其中是为先农存乎大典故周宣不复於古而虢公致谏汉文能修其制而班史称美朕自御极以来动咨故实惟是千亩未

展三推匱神困人降灾移岁靡不在此良以怵然今星纪既周土膏将动去农祥而卜日考帝藉之以时朕其亲耕以实御廩宜令礼官博士详择典故有司速即施行

停藉田雕饰农器诏

古之圣王临御天下莫不务敦本宝俭为先盖用勤身率下也属东耕启候爰事藉田将欲劝彼蒸人所以执兹耒耜如闻有司所造农器妄加雕饰殊匪典常绀轡缥轨固前王之有制务奢尚靡谅伪教之所托静言思之良用叹息岂朕法尧舜重茅茨之意耶其所造雕饰者宜停仍令有司依农用常式即别改造庶万方黎献知朕意焉【乾元二年正月】

罢藉田勅

勅朕以东郊藉田礼之重者爰择吉亥用祀先嗇上以供粢盛下以劝稼穡式展三推之义敢辞四体之勤亦既草仪方将肃事再思理本旁采衆词以江淮水旱之余河朔师旅之後宜宽物力以济蒸元况当三农休息之时有百司供具之费道途洒扫暴露勤劳惕然在怀是用中止虽前有成命皆已施行而重烦吾民则无固必其来年正月十八日藉田礼宜暂停於戏夫圣人无心以徇百姓朕亦虚已用图大中苟事未宜则改而求当凡百卿士期悉予怀【元和五年十一月十九日】

藉田赦书

门下昔者受命为君体元立极未有不谨於礼而能见教於人朕其庶乎有慙作者方册存而可举旧章絶而复寻自古所行无一而废将以上乞灵於社稷下蒙福於黎元朕兹精诚天实降鉴今嗣岁初吉农事将起礼有先於耕藉义缘奉於粢盛是所严共敢不敬事故躬载耒耜亲率公卿以先百姓遂终千亩谓敦本之为尔可布泽之更深宜有顺於发生俾无偏於行惠可大赦天下自开元二十三年正月十八日昧爽以前大辟罪以下罪无轻重已发觉未发觉已结正未结正囚系见徒咸赦除之其犯十恶死罪不在赦限其余死罪特宜配流岭南远恶处官典犯赃本犯至死贬与岭南远恶左降官至流者亦量贬与远官典配诸军効力计赃至徒仍不得重令却上天下诸州损免处税地先矜放其非损免处有贫乏未纳者并一切放免代粮种子开元二十一年以前并宜放免京兆河南府秦州百姓有诸色勾徵及通悬欠负亦宜放免其在官典及仓督等腹内者不在免限天下色役爰及支用务令节减并诸色贡赋先令中书门下均融减省宜准前勅速即条奏捐免州税户钱米纳并七等以上户租先未处分五色资钱课未纳灼然不办者并放至蚕麦秋收以来赎纳捐免州逃兵健儿承前访捉不获合取藉人充替自资装送军程期逼迫颇亦辛苦并放至蚕麦以後发遣仍令所司预与军州计会诸州征行人并令州县存恤其征行人有父母年七十以上者委本道采访使检责取实牒报本军即放还本贯军司据阙募取健儿充替行人及防丁有身亡者为造棺槨逋还本乡诸州应发防丁去本贯一千里以上比来除正课之外给一丁充资多不济办宜更量与资助两京城内今年所有诸杂夫役并宜放免应须使役以诸钱和雇取充农桑是时不得妨夺州县官长倍加劝课孝子顺孙义夫节妇旌表门闾鰥寡惸独不能自存量加优恤天下侍老百

岁以上版授上州刺史九十以上中州刺史八十以上上州司马其七十以上所由仍量给酒肉各令存问亚献皇太子鸿赐物二千疋终献庆王潭赐物一千疋邠王守礼等各赐物一千疋忠王浚以下各赐物三百疋夹侍正衣进珪汝阳郡王淳等各赐物二百疋皇太子夹侍正衣等各赐一百疋裴耀卿等自其翊赞诚有忠益颁赏以序等数须优宜各与一子官仍各赐物三百疋二王後各赐物一百疋长公主各与一子官仍各赐二百疋嗣王郡主县主各赐物一百五十疋在京文武官见任及致仕并诸色陪位官一品赐物八十疋二品七十疋三品六十疋四品五十疋五品四十疋六品三十疋八品九品二十段节度副大使三都留守京兆尹各一百疋四大都督府长史诸道采访使各八十疋诸赐物应两给者从一处给其耕官及侍耕官各赐勲两转丞相萧嵩与一子官仍赐物二百疋摄九卿诸侯等各与一子出身仍赐物一百五十疋侍耕执牛官各赐物一百二十疋昇坛行事官修礼仪官及判官等更赐一阶应入三品五品官阶相当减四考听入摄司徒信安郡王禕礼仪官章绛既不叙阶禕与一子官赐物二百疋绛与一子出身赐物一百五十疋其昇坛及兼礼仪两兼从一加阶应与一子官及出身者若无子听回与周亲供奉及押阶不昇坛并坛下及助耕执牛官别勲差中书门下差定人数等泛阶合入三品五品阶至考未足者待考足日听叙非待考者赐勲两转未承别赐者各赐一等知顿使赐物一百疋修坛场长官屯官撰玉册文官各赐物八十疋书玉册官赐物五十疋管藉田县令赐物六十疋在东京文武官朝集使官充十道采访使并判官诸道节度使及诸道通表使判官新除五品以上官未赴任都城畿县令见在陪位者三品以上转爵一级四品以下加一阶皇亲诸亲及九庙子孙不入等陪位者并外文武官九品以上各赐勲一转诸蕃入庙及贺正蕃客应陪位者共赐物五十疋节级分付南北衙门行从?卫斋宫及武官押当有职掌并诸色杂职掌并应耕公卿从官等各赐勲一转万骑及飞骑见当上者各赐勲一转其?卫斋宫者加赐物三段伏内防侍诸色从人各赐物三段彍骑番兵角弓手弩手官马主见当番及留帖人掌闲幕士驾士供膳习驭工人乐人见当有上职掌并庶人应耕者各赐物三段斋郎礼生赞者行事者并减两年劳无劳可减者斋郎放出身礼生赞者选日稍优与处分三卫七色见当番并流外行署及蕃官见上有职掌者各赐勲一转河南洛阳县陪位父老各赐物五段近坛百姓各免今年杂差科宗庙致享务存丰洁礼经沿革必本人情筵豆之荐或未能备物服制之纪或有未通宜令礼官学士详议具奏朕自临天下二纪於兹不敢荒宁日加兢业而灾眚未弭黎人未康若有由而然则在予之责有能直言极谏者具以状闻每渴贤良无忘鉴昧顷虽虚伋未副旁求其才有王霸之略学?天人之际知勇堪将帅之选政能当牧宰之举者五品以上清官及将军都督刺史各举孝悌力田乡闾推挹者本州长官勘责有才堪应务者各以名奏致仕官久历清资终始着称年渐衰迈情有可矜量与改职依前致仕宗子中有才行着闻此尚沉屈者委宗正勘责奏闻唐元两营立功官任折冲并改与郎将郎将改与中郎其亡官失爵量加收叙五岳四渎名山大川及自古圣帝明王忠臣良相并宜所在长官以礼致祭赦书有所未该者所司比类闻奏亡命山泽挟藏军器百日不首复罪如初敢以赦前事相告言者以其罪罪之都城内赐酺三日赦书日行五百里布告遐迩咸使闻知

九宫贵神

亲祭九宫坛勅

勅惟神之主必恭禋祀率先之训义在躬亲朕钦若昊穹子育黎庶思通明灵之德以洽和平之理是修缺典咸秩无文如在之诚久陈於郊庙怀柔之至亦偏於山川况九宫所主百神之贵上分天极下统坤维陰鹭生灵功深亭育故式昭新典肇建明禋将以为人载祈孚佑宜叶元吉之辰用申大祭之礼可以立春日朕亲祭九宫坛仍令中书门下与礼官等即详定仪注奏闻【天宝三年十二月】

亲祭九宫坛大赦天下制 孙逖

门下九宫之祀百代莫修岂日给之不暇将灵享之有待朕当宸君临握图纘业每听政中昃畴咨说言观书考礼以采故实励精为理三纪於兹上荷宗庙延祥克开厥後下赖股肱叶德以致雍熙而麟凤龟龙近游郊藪蛮夷戎狄远输琛賁乘时来之休运恢皇建之远图是以圆丘方泽之仪昇中告类之礼无典不举靡神不怀恭惟九宫明祀尚缺载深兢惕用建灵坛爰以元辰亲执奠献叶青春发生之庆祈黔黎启佑之福今至诚式展大礼云备瑞景和风神心如荅无疆之福岂独在予非常之泽宜覃率土可大赦天下自天宝三年十二月二十五日昧爽以前大辟罪已下罪无轻重咸赦除之其十恶死罪造伪头首谋杀攻劫及官典犯赃不在免限朕惟善政实在养人作法务从於宽简任事必量於齿力比者成童之岁即挂轻徭既冠之年便当正役悯其劳苦用轸於怀自今以後天下百姓宜以十八以上为中男二十三以上成丁又任土作贡先标程式或非所有不免贸迁事既非宜理难经久并应徵课税及支遣诸色物或期程之间迟违非便并委所司与朝集使商议取稳便处置奏闻【实录载赦文云每岁佣调八月徵收农功未毕恐难济办自今以後延至九月三十日为限而却无任土而下至此】诸军行人远为边扞修短之分虽有定期从役而终良深轸念其有临阵亡歿骸骨未还本贯令节度使给棺槨通归又防边御寇实谓难劳贫户单丁固兹存养便令差遣去住难堪自今以後应差行人家无兼丁不在取限自古圣人皆以孝理五帝之本百行莫先移於国而为忠事於长而为顺永言要道实在人弘自今以後令天下家藏孝经一本精勤诵习乡学之中倍增教授郡县官吏申明劝课百姓间有孝行过人乡闾钦伏者所由长官具见以名荐其有父母见在别籍异居亏败名教莫斯为甚特宜禁絶勿使更然并亲歿之後亦不得令有分析郡县切勒令在行自今以後如有不友不恭伤财破产者宜配磔西用清风教朕惟熙庶绩博访逸人岂惟振拔滞淹以期於大用亦欲褒崇高上将敦於薄俗虚伫之怀兼在於此其有高蹈不仕遁迹丘园远近知闻未经荐举者委所在长官以礼徵送又崇德追远式闾封墓用旌前烈以叶大猷自古圣帝明王名臣烈士陵墓有颓毁者宜令所管量事修葺仍明立标记禁止樵采天下侍老百岁以上赐帛五段粟三石八十以上帛三段粟二石仍令郡县长官存问给付亚献太子诃赐物二千疋终献庆王惊一千疋正衣夹侍各五百疋亲王各三百疋新封建郡王及国公各一百疋贤妃三百疋长公主各三百疋公主各二百疋嗣郡王各一百疋中书门下三品竭心翊戴弘益实多各与一子官如已授官量与一转内外文武官三品以上赐爵一级四品以下各加一阶一品赐物七十疋三品以下六十疋五品以下四十疋六品以下二十段诸节度使各赐物一百疋三京留守及二王後各八十疋采访使各六十疋诸蕃客共赐二千疋其唐元功臣締构之初竭其忠款录功念旧情所不忘普恩之外更加一阶其身歿者各赐一子官皇亲五等以上及九庙子孙诸亲三等以上未有出身者并放出身其前资者选日稍优与处分见任者更赐勳两转应天下赐酺三日赦书有所未该者所司类

例闻奏宣布中外咸使闻知主者施行

岳渎山川

封华岳神为金天王制 苏頲

门下惟岳有五太华其一表峻皇居合灵兴运朕恭膺大宝肇业神京至诚所祈神契潜感顷者乱常悖道有甲兵而窃发仗顺诛逆犹风雨之从助永言幽赞宁忘仰止厥功茂矣报德斯存宜封华岳神为金天王仍令龙景观道士鸿胪卿员外置越国公叶法善备礼告祭主者施行【先天二年八月二日】

册东海神为广德王文

维天宝十载岁次辛卯三月甲申朔十七日庚子皇帝若曰於戏四瀛宅日百谷称王望祀之礼虽申崇名之典犹缺惟东海浴日浮天纳来弘往善利万物以宗以都朕嗣守皇图式存精享神心允穆每叶休徵今五运惟新百灵咸秩思崇封建以展?诚是用封神为广德王其光膺典册保乂寰宇永清坤载敷佑邦家可不美欤惟南海荡涤炎州包括溟涨涵育庶类以成厥德惟西海泛滥疏名清晏表德成兹润泽奠彼金方惟北海限蛮阻夷实资坎德含奇蕴粹实曰天池其礼如东海

命卢从愿等祭岳渎勅

勅五岳视三公之位四渎当诸侯之秩载於祀典抑为国章方属农功颇增旱暵?诚徒积神道未孚用申靡爱之勤冀通能润之感宜令工部尚书卢从愿祭东岳河南尹张敬忠祭中岳御史中丞兼户部侍郎宇文融祭西岳及西海河渎太常少卿张九龄祭南岳及南海黄门侍郎李暉祭北岳右庶子何鸾祭东海宗正卿郑?祭淮渎少詹事张晤祭江渎河南少尹李暉祭北海及济渎且润万物者莫先乎雨动万物者莫疾乎风睠彼灵神爰称师伯虽有常祀今更陈祈宜令光禄卿孟温祭风伯右庶子吴兢祭雨师各就坛塲务加诚敬但羞苹藻不假牲牢应缘奠祭尤宜精洁【开元十四年正月】令嗣郑王希言分祭五岳勅 孙逖

勅岁之丰俭固系於常数天之感应实在於精诚顷者按以陰阳求之推步至於今岁不合有年朕乃斋心妙闻恳祈玄德灵徵不远丕应用彰果获西成颇为丰熟盖至道储祉惠於蒸人亦羣臣叶赞锡以昭假宜令光禄卿嗣郑王希言祭东岳太子詹事嗣许王瓘祭北岳太常卿韦绛祭西岳卫尉卿嗣吴王祗祭南岳宗正卿濮阳郡王彻祭北岳所司即择日录奏其四渎及名山大川或远近不同各委所由郡长官便择吉日致祭务崇严洁以称朕怀

令嗣许王瓘祭东岳勅

勅务农劝穡维用於天道人和岁稔实赖於神休顷者春夏之交稍???时雨收获之际复属秋

霖虐害农功每祈孚佑遂得百神降德庶徵不易先朝礼神以明德?事以严禋进其位号崇其典策用三代之乐金石必备尽九州之味笾豆有加俾国之大臣每岁颁祀则执事而有恪亦莫不宁也朕纂戎八载外寇未平多废旧章尚劳戎备巡狩之事有旷於虞书封禅之仪尚慙於汉史虽命方征收以时致祭而事之不亲诚有不达所以分遣八使禱於羣望各供於事以服官常宜令某官等分祭名山大川仍勅有司备具礼物敬陈明荐无失正辞羣望效灵既不为灾仍多丰熟幽赞之道普洽於生人昭报之仪式遵於典礼宜令太子詹事嗣许王瓘祭东岳所司郡长官备礼致祭务陈蠲洁以达精诚

禁骊山樵采诏

勅骊山特秀峯峦俯临郊甸上分艮位每泄云而作雨下出蒙泉亦荡邪而蠲瘵乃灵仙之攸宅惟邦国之所瞻可以列於羣望纪在咸秩自今以後宜禁樵采量为封域称朕意焉【开元四年正月十九日】

雨泽频降昭报山川勅

爰自首春有???时雨朕忧勤祀献精禱灵祇遂蒙九玄垂福百神効祉膏泽频降嘉生繁育睠彼山川能兴云雨报功享德祀典存焉诸州府所管名山大川宜令当处长官设祭务尽诚敬以昭典礼【开元十四年六月】

令关内诸州长官祭名山大川勅 孙逖

勅朕为人上未尝自逸每勤於政思致丰年而去冬以来雨雪微少窃恐春事有害农功是用斋心躬自申禱神歆允答甘泽遂流岂朕之微诚敢当丕应盖天之鉴佑惠及生人诗不云乎无德不报昭赛之义岂可阙如其关内名山大川及有灵祠宜令所由长官择日致赛务令丰厚各尽诚洁以副朕怀

遣官祭霍山勅

三代之初皆有神降鉴其德也天实启之恭惟王业之初师及霍邑坚城未下大将阻兵连雨经旬粮储不给白衣父老忽诣军门称霍山之神谒大唐皇帝云东南取路八日雨止助帝破敌尽如其言岩岩霍山九州之镇兴云致雨功已洽於生人亲道辅德力更宣於王室朕纘承大宝膺受洪休胙鬯之间诚明可接永言幽赞兹谓有孚惟天命神据我斯意爰宜令礼仪使判官司封员外郎薛颙即往霍山致祭正辞以荐称朕意焉

萧昕等分祭名山大川制 常袞

勅有天下者祭百神盖存乎统法也山川出云而致风雨列在明祀其来久矣春秋传曰水旱疠疫之不时於是乎祭之致其诚信与其忠敬精意以享可通神明保佑命之不疾而速古之

岳渎秩视公侯以其所生者繁所济也广镇厚地而不动朝沧海而不泄如是正直长发其祥百王相承五【阙】

立终南山祠勅

每闻京师旧说以为终南山兴云即必有雨若常晴霁虽密云他至竟不沾濡况兹山北面阙庭日当恩顾修其望祀宠数宜及今闻都无祠宇炭谷湫却在命祀终南山未备礼秩湫为山属舍大崇细深所谓阙於兴云致雨之祀宜令中书门下且差官设奠宣告恩礼便令择立庙所回日以闻仍命有司即时建立【开成二年】

杂祀

天地宗庙外祭用少牢诏

国家草创日不暇给凡厥礼仪鲜能尽备且生人未乂凋弊实多至於畜产思致蕃息祭祀之本皆以为身穷民事神有乖正直杀牛不如禴祭明德即是馨香望古推今祭神一揆其祭圆丘方泽宗庙以外并可止用少牢旧用者宜用特牲时和年丰然後克循常礼【武德元年十月】

置壽星坛勅

德莫大於生成福莫先於壽考苟有所主得无祝之今有上封者言仲秋日月会於壽星以为朕生於是月欲以配社而祭於义不伦且壽星角亢也既为列?之长复有福壽之名岂惟朕躬独享其应其天下万姓宁不是怀盖秦时已有壽星祠亦云旧矣宜令所司特置壽星坛即以千秋节日修其祀典【开元二十四年十月】

昇风伯雨师为中祀勅 孙逖

勅六气不????所以成岁百神咸秩必也正名况风伯雨师济时育物蕃兹动植溥畅生灵厥有茂功当崇於昭报谓之小祀颇紊於彝伦去载诸星以为中祀永言比义固合同昇自今以後其风伯雨师并宜昇入中祀仍令诸郡各置一坛因春秋祭祀之时同申享祀用刊前典之谬以致苍生之福

五人帝祝文勿称臣诏

郊祀之义本於至诚制礼定名宜从事实五方配帝上古哲王道济蒸人礼着明祀论善计功则朕德不类统天御极则朕位攸同而祝文称臣以祭既无益诚敬有黷等威此岂朕禋祀聪明昭格上下之意前京兆府司录事参军高佩上疏其理精详朕重变旧仪访於卿士申明大义是用释然宜从改正以敦至礼自今以後五方配帝祝文勿称臣余礼如旧

亲拜风伯雨师祝版勅

风伯雨师等升为中祀有列祖成命况在风雨实切苍生今虽无文朕当屈己再拜以申子育万姓之意

条贯祀事诏

王者受天地之明命纘祖宗之鸿业所以祇服大事致诚严禋尽其孝敬之心崇其郊祀之礼必在匪懈不忒粢盛丰洁古今丕训无易於此朕嗣位十载恭临万邦务三时以厚生睦九族以修教每励薄德汔兹小康中宵内惧愧不克称实天地之睠佑宗社之威灵思欲罄其精诚奉以昭报岂聿怀之敢望实如在而齐心如闻近岁有司因循将事不恪牲牷徒具滌濯无闻鼎俎虽陈禋荐多缺祠官或怠於斋肃胥史有至於喧呶戏礼瀆神莫斯为甚永言重事用惻深衷起今以後太庙郊社斋郎先事前一日常委监察御史仔细点检如有替代非正身者当时禁身推问闻奏当重科惩既责躬亲须议优獎其斋郎委中书门下商量与减选应缘祠祭官下至斋郎及乐人吏等致斋日有博奕饮酒喧呼争竞者委御史台纠察闻奏其牲牢准礼循行之际合视肥瘠之宜近日相承临时取办既乖诚敬颇失旧章委太仆寺准礼令处分如无本色牛羊速具闻奏至於酒醴醢醢簠簋膳羞各委本司准礼令切加提举凡有庙壝所宜肃敬纵云隙地岂废修崇如有耕垦艺植者亦仰御史台纠察闻奏摄祭公卿虽约官品将朕诚敬必在得人委尚书省差定之时稍加慎选其祭器礼物中如有欠缺及濫恶须填补改张者委太常宗正光禄太仆寺少府监诸司速具条疏闻奏仍委中书门下即与疏理处分於戏礼崇明祀神享至诚上下苟无其心所为必乖於典由是怵惕用致斋庄咨尔庶工各扬厥职式遵礼典称朕意焉【宝历九年二月】

唐大诏令集卷七十四

卷七十五

钦定四库全书

唐大诏令集卷七十五

宋 宋敏求 编

典礼

太清宫

太清宫行礼官改用朝服并停祝版勅太清宫改为朝献荐献制

庙制

令所司与礼官议宗庙制

令公卿议太原建寝庙诏

增置太庙九室诏

常荐

宗庙荐享别奠樽爵诏

太庙五享令宗子摄事诏

令两京各日享庙诏

享太庙料外别置牙盘食诏

禘祫不废常享诏

祧迁

迁献懿二祖诏

亲享

令皇帝亲谒太庙诰

明皇即位谒太庙赦

亲谒太庙锡赐宗支庶官制

亲享九庙制

太清宫

太清宫行礼改用朝服并停祝版勅

勅尊祖奉先必在於崇敬辨仪正礼所贵於缘情伏以大圣玄元皇帝御气昇天长生久视体重玄而不测与元化而无穷真容屡见宝符仍集恭惟玄佑实表常存比者太清宫行事官皆具冕服爰及奏乐未易旧名并告献之时仍陈?祝既非事生之礼皆是降神之仪但真俗殊伦幽明异数理有非便亦在从宜自今以後每於太清等宫行礼官宜改用朝服兼停祝版其告献办及所奏乐章朕当别自修撰仍令所司具仪注闻奏

太清宫改为朝献荐献制

春秋致享用存昭敬祝史陈信必在正辞苟名谓之或乖於上下而非便经称崇事易载顯若所以展祗肃明等威朕钦崇道本嗣守丕业每怀如在之诚敢忘奉先之旨礼或未达情实匪寧承前有事宗庙皆称告享兹乃临下之辞颇亏尊上之义静言斯称殊为未允自今以後每亲告献太清宫太微宫改为朝献有司行事为荐献亲告享宗庙为朝享有司行事为荐享亲巡陵为朝拜有司行事为陵拜应缘诸事告宗庙者改为奏其郊天后土及祝云敢昭告者并为敢昭荐於戏式崇转礼庶表因心宣示中外令知朕意【天宝九年十一月】

宗庙

庙制

令所司与礼官议宗庙制

朕以不造??在疚日月如流皇灵浸远霜露所感触目殒絕宗庙之制有国大典皇运之始且事因循今山陵有日迁祔非远宜允旧章永世作则可令所司与礼官等详议奏闻【贞观九年九月】

令公卿议太原建寝庙诏

昔周监二代崇文武之典礼汉绍三王尊高光之功烈斯固有国之彝训不刊之令范高祖太武皇帝聪明神武叡圣徇齐应天顺民拨乱反正德侔造化道济区夏靖率土之沸腾拯黔首之涂炭一戎大定四海宅心制治定之礼作功成之乐天地交泰品物咸亨声教遐播休徵杂? 蛮夷戎狄之长辐辏藁街麟凤龟龙之祥光映图史然犹日慎一日推而弗居迈遂古之鸿名踰前王之至治朕以寡昧丕承景业?惟永往攀慕终天思弘尊亲之道庶展罔极之志切惟太原之地肇基王迹事均丰沛义等宛谯理宜别建寝庙以彰圣德详观汉典抑有成规但先皇遗旨务在俭约?奉训诫无忘愓处宜令礼官与公卿等详议以闻【贞观九年十二月】

增置太庙九室诏

朕闻王者乘时以设教因事以制礼沿革以从宜为本取舍以适会为先损益之道有殊质文之用甚异且夫至德之谓孝所以通於神明大事之谓祀所以?於宗庙国家握纪命历重光累盛四方由其继明七代可以观德朕嗣守丕业祇奉睿图聿怀昭事罔不恤祀尝览古典爰询庙制远则殷周事异近则汉晋道殊虽礼文之不一固敬严之无二朕以为立爰自亲始教人睦立敬自长始教人顺是知政以道存礼从时变将因宜以创制岂沿古而限今况恩以降杀而踈庙以迁毁而废虽式瞻古训礼则不违而永言孝思情所未足享尝则止岂爰崇而礼备有禘而祭非德盛而流永其祧室宜列为正室将使亲而不尽远而不祧庙以貌在宗由尊立俾四时式荐不间於毁主百代靡迁匪惟於始庙所谓变以合礼动而得中严禋之典克崇肃雍之美兹在又兄弟继及古有明文今中宗神主犹居别处详求故实当宁不安移就正庙用彰大典仍创置九室宜令所司择日启告移造【开元十年六月】

常荐

宗庙荐享别奠樽爵诏

朕以寡德嗣守宗祧虽明发载怀肃恭禋祀践霜露而兴感奉洗腆以增哀每惟宗庙至敬?诚裸享而二尊一奠情有未安思革旧章用崇严配管子曰礼者因人之情缘理而为之节也故三王五帝礼制不同损益随时期於通变况罔极之思既展於兹辰终身之慕情深於是日岂可以因循礼经乖违诚敬自今以後宗庙享爵及簠簋登鉶各宜别奠其余列饌并依常典【乾封元年六月】

太庙五享令宗子摄事诏

宗庙致敬必先於如在神人所依无取於非类深惟至理用切因心其应缘太庙五享於宗子及嗣王中拣择有德望者令摄三公行事异姓官吏不须令摄【开元二十七年二月】

令两京各日享庙诏

朕肃承宗祀不敢怠遑诚有未安夙夜祇惕顷四时有事太庙两京同日告享虽卜吉辰但遵上日而义深如在祀或有乖自今以後宜各别择吉日告享【天宝三年四月】

享太庙料外置牙盘食诏

勅祭神如在传诸古训以多为贵着自礼经腍膋之仪盖昔贤之尚质甘旨之义亦孝子之尽诚既切因心方资变礼其自今以後享太庙宜料外每室加常式一牙盘仍令所司务尽丰洁【天宝五年四月十六日】

禘祫不废常享诏

禘祫之礼以存序位质文之变盖取随时国家系本仙宗业承圣祚重熙累盛既锡无疆之休合享登神恩弘不易之典自今以後每神并於太清宫圣祖前设位序正上以明陟降之礼钦若玄宫下以尽??之诚无违正道比来每缘禘祫时享则停事虽适於从宜而礼或亏於必备以後每缘禘祫其常享无废又奉先追远礼惟昭德崇福展敬义在因心自今以後献祖宣皇帝宣庄皇后懿祖光皇帝光懿皇后忌日宜令京城寺观一日设斋太祖景皇帝景烈皇后代祖元皇帝元贞皇后忌日京城三日行道

祧迁

迁献懿二祖诏

国之大事式在於明禋王者孝享莫重於殷祭所以尊祖而正昭穆也朕承列圣之休德荷上天之眷命奉牲帛二十有五年永惟宗庙之位禘尝之序夙夜祇栗不敢自专是用延访公卿稽参典礼博考羣议至於再三敬以令辰奉迁献祖皇帝神主懿祖皇帝神主祔於德明兴圣皇帝庙太祖景皇帝正东向之位宜令所司备礼务极严重祇肃祀典载深感惕咨尔中外宜悉朕怀【贞元十九年】

亲享

令皇帝谒太庙诰

诰昔重华嗣德格於文祖高密陟后至於神宗盖所以敬履端之元申孝享之道皇帝初嗣大宝允膺休命欢洽人灵庆溢宗社宜躬祇祀典用展肃雍可以今月四日谒享太庙所司准此【先天元年十月】

明皇即位谒太庙赦

门下继明嗣德王者所以承天尊祖奉先圣人所以崇孝故上日之礼着乎重华月朔之祠袭

乎受命猗欤作颂发流濬哲之祥清庙昇歌思表配天之业历选前载可得而言我国家首出
开元继文膺统七代观德至道洽於生人三后在天世裕光於後嗣太上皇帝道超系表功軼
帝先名言不测於乾行仁智不知於日用累让神器非以黄屋为尊俯膺太室盖以苍生屈志
黎人於变淳化期登载怀脱屣畴咨菲薄竭让德之至天睠弗回陈拜首之诚冲襟逾邈遂以
寡昧祗践宸居循顾绍庭载深寅畏爰撰初吉躬展肃雍?肆献之仪申大号之典神保之享斯
洽介福之道攸宜亿兆同欢人祇同庆恭承圣训申兹沛泽可大赦天下

亲谒太庙锡赐宗支庶官制

朕闻理莫大於孝所以通神明事莫大於祀所以谒宗庙顾此薄德获承丕绪恭?夙夜弗敢遑
寧去岁爰命有司增营太室寻以匠者功就飨礼斯举虽是效是则率由旧章而不躬不亲曷
尽诚敬粤自河洛旋於京师聿修斋祭致用蠲洁属羣方骏奔庶位咸旅裸奠式受感怀载殷
圣灵在天若享精意伊尔王公卿士下逮黎蒸道存念兹惠乃锡类七庙元皇帝以上三祖枝
孙恐有失官序者宜各与五品京官皇祖妣诸家有子孙今在选序者量加甄録择内外官三
品以上有庙者各赐绢三十疋以修祭服俎豆缘谒庙亚献邢王守礼终献宋王宪各赐三百
疋夹侍岐王范薛王业各赐绢二百五十疋自余行礼及供奉三品以上赐一百六十疋四品
一百四十疋五品一百二十疋六品一百疋七品八十疋八品六十疋九品四十疋卤簿六引
官各减一等押仗官又减一等摄官依本官给有兼充诸使者加一等两京文武官并朝集使
诸方道表一品七十疋三品六十疋四品五十疋六品七品四十段九品三十段从者加一等
皇亲诸亲准品等礼仪置顿营幕使各赐物一百段副使八十段判官及修定仪注官减三分
之二行所州县刺史上佐县令等各准行从官与赐其给赐人应两处以上者从一多给唯有
庙官之赐听兼给谒庙有所修造专当官及当顿官始末不絶者各赐一半上考知顿州各免
一年租及地税傍州缘顿供奉者亦准此行事斋郎及权补充者各赐物十段升阶者各赐物
十五段三卫飞骑万骑并仗内无品人等赐五段十月正蕃卫士等各赐三段缘道路及置营
幕损百姓麦苗者宜令州县检量优还价直余应得而制书缺载者所司类例以闻【开元六
年十二月】

亲享九庙制

崇建宗庙礼之大者聿追孝享德莫至焉今宗以立尊亲无迁序永惟严配致用蠲洁栋宇式
崇裸奠斯授顾兹薄德获承禋祀不躬不亲曷展诚敬宜用八月十九日祇见九室【开元十
一年五月】

唐大诏令集卷七十五

卷七十六

<史部,诏令奏议类,诏令之属,唐大诏令集

钦定四库全书

唐大诏令集卷七十六

宋 宋敏求 编

典礼

省侍

元和元年正月辍朝侍膳勅

元和十一年皇太后寢疾权不听政勅大中元年积庆皇后寢疾权不听政勅大中二年太皇太后寢疾权不听政勅咸通六年太皇太后寢疾权不听政勅

服纪

代宗再行期服诏

义安太后服制勅

陵寢上

营卜

九峻山卜陵诏

充奉

厚奉建陵诏

大行太后山陵修奉事勅

扈从灵驾

太祖允百官表请不亲至山陵诏

随灵驾赴陵所诏

亲至和陵勅

答百僚不赴陵勅

省侍

元和元年辍朝侍膳勅

勅朕闻为子之道莫大於宁亲顺色之方必先於养志此文王之孝曾氏之心每聆遗风常所景行伏以太上皇帝怡神闲馆追想大庭将以保静延休涤虑宁体初阳变候旧恙愆和寢食之间有不安节夙夜忧灼岂遑宁居而内奉庭闱冀承安否尝药视膳且不暇於衣冠一日万机固有亏於听览庶政关决遂阙躬亲恐中外具寮未悉予志起今月十八日以後权不听政故兹宣示当体朕怀【正月】

元和十一年皇太后寢疾权不听政勅

朕闻事亲之礼问安虽限於晨昏为子之心就养在勤於左右斯实虞帝明训周王遗风朕率而行之不敢有坠伏以皇太后母临万国子惠兆人存神保和养素全道属韶阳改候濡露感恩旧恙有加常膳顿减夙夜惶惕不知所宁今当专奉庭闱躬尝药餌脱冠解带且无暇於寢兴负展临轩安能亲於听断起今月三日以後权不听政故兹宣示宜体朕怀【三月】

大中元年积庆皇太后寢疾权不听政勅

门下朕闻恭孝之道人伦大经省奉之仪臣节攸重况发自诚恪稽诸典谟庶叶礼文式遵前宪伏以积庆殿皇太后坤元降秀皇极居尊道冠母临训彰壺职属时当濡露感切於孝思气爽保和恙生於寒暑自春历夏有加无瘳焦忧匪遑旦夕增灼岂尚安於听断且欲专於候问恐中外具寮未谅予意起今月十四日以後权不听政故兹宣示宜体朕怀【四月】

大中二年太皇太后寢疾权不听政勅

勅朕闻孝发乎因心服勤於遗体周典着问安之范戴经存就养之文垂为格言式示达礼惟朕小子敢废前修伏以太皇太后母临六宫子育羣品清静养性恬和保神属时暑小侵违裕不安寢膳未复忧灼靡宁日欲亲於药餌情岂安於听断凡有事务且委司存恐中外具寮未悉予意起今月二十日以後权不听政故兹宣示宜体朕怀【五月】

咸通六年太皇太后寢疾权不听政勅

门下朕闻孝养之道发於因心诚敬之文着在前典平居以问安自慰寢疾则省侍宜专太皇太后玉衣兆祥瑶齐启圣母仪天下德被寰中春秋既高饮酒微减朕亲自迎奉移居永安期恙就平勿药有喜而精诚未感良医无效情方切於焦忧政岂遑於听断日须躬问以冀平和恐中外具寮未谅予意起今月三十日以後权不听政故兹宣示宜体朕怀【十一月】

纪服

代宗行再朞服诏

三年之丧天下达礼苟或变革何以教人朕遭此悯凶攀号罔极公卿固请俾听朝暮斩焉縗絰痛费心灵岂可更议公除便移谅闇昨见所司仪注以今月十三日大祥十五日从吉仰凭遗旨又欲抑予切惟哀荒深谓未可其百寮并宜以此日释服朕将此武丁之道成素冠之诗恭守再周不忍权释凡厥在位宜悉哀怀【羣臣三表请公除从】

义安太后服制勅

皇帝为义安皇太后制服重轻事

权知礼部侍郎陈商等状伏观义安皇太后遗令皇帝三日而听政十三日小祥二十五日大祥二十七日释服者皇帝遵奉遗旨将欲施行臣等商量事贵得中礼从顺變伏以宣懿太后常奉太皇太后之令追尊徽名附配庙室今云议礼合有等差伏请皇帝降服朞周行以日易月之制十三日释服其内外臣寮便以其日除释至於所奉陵寢制度法物一事以上即请准旧例无更降授谨具如前公卿等议大行皇太后丧礼状

中书门下奏今月十一日大行皇太后遗令十三日小祥二十五日大祥二十七日除服者伏见陛下以因心之孝弘博爱之仁辍视万机形於四海非臣等愚浅敢窥圣德然酌於羣议恐未得中伏思殷周之礼年代古远史传所记简而未详自两汉以降文籍大备未有兄弟相友三叶重光如圣朝之礼所以母后之制罕闻故事考礼经之训时为大体次之顺次之称次之宜次之臣等奉太皇太后令已命宣懿太后升祔祔宫昭配之礼既存令典尊亲之义必在正名皇帝服宜有所降期年之制羣臣随君而服亦从降礼其山陵制度及礼仪法物并如太皇太后故事一无所降虽屈已申情陛下动循於礼法而酌宜定制羣臣难抑於义心伏希圣明必赐察纳谨具如前

勅朕恭承遗令既遵易月之文而公卿庶寮愿举酌中之典徵引古义发挥旧章闕兹敷陈良用酸惻朕嗣纘鸿业岂以自私勉副羣情倍深感切所请降服及山陵制度并依【会昌五年正月十五日】

陵寢上

营卜

九嶷山卜陵诏

夫生者天地之大德壽者修短之常数故生有七尺之形壽以百齡为限含灵禀气莫不同焉皆得之於自然不可以分企也虽复回天转日之力尽妙穷神之智生必有终皆不能免是以礼记云君即位而为棊庄周云劳我以形息我以死圣人之至鉴通贤之深识着之典诰贻之话言显说正词曾无隐讳末代以来明辟盖寡靡不矜黄屋之尊虑白驹之过并多拘忌希慕遐齡谓云车易乘曦轮可驻轨同趋并其弊甚矣有隋之季海内横流豺狼肆暴吞噬黔首邑里凋残鞠为丘墟朕投袂发愤情深拯溺扶翼义师用济涂炭赖苍昊降鉴股肱宣力提剑指麾天下大定氛祲清殄区宇平一反浇弊於淳朴致王道於中和此朕之志於斯已毕犹恐身後之日子子孙孙尚习流俗犹循常礼加四重之棊伐百祀之木劳扰百姓崇厚坟陵今预为此制务从俭约於九嶷之山足容一棺而已积以岁月渐以备之木马涂车土桴苇龠事合古典不为世用又佐命功臣义深舟楫或定谋帷幄或身摧行阵同济艰危克成鸿业追念在昔何日忘之使逝者无知咸归寂寞若莹魂有识还如畴曩居止相望不亦善乎汉代时使将相陪陵又给以东园秘器笃送终之义恩意深厚古人之志岂异我哉自今以後功臣密戚及德业尤着如有薨亡宜赐莹地一所赐以秘器使窆岁时丧事无阙所司依此营备称朕意焉【贞观十年二月】

充奉

厚奉建陵诏

人子之道存乎色养穹苍不德鉅创诚深朕触目哀荒攀号无计终天永诀先远有期欲报之心不任罔极务崇兆宅庶竭哀怀应缘山陵监护卤簿等事宜令有司备具厚礼不得节减尽库之所有成迁厝之大仪公卿百寮宜悉朕意

大行太后山陵修奉事勅

盖闻天地至德常存煦育之仁皇王大孝克念述遵之义朕纂承丕构每务躬行而衅祸相延再罹?疾大行太后慈顺永远仙驭莫追遗旨丁宁俾亲庶政祇奉号咽不知所措?怀风树之感俯追龟筮之期以复土方兴役车未已虑失农桑之候或貽冻馁之忧惻然悯伤思获均济缘山陵所要车牛夫役等除官中自有外并须和雇仍先折本户夏税钱乞度支以不折估正段充填如本户所折税钱已尽即所司给付无令损折仍委山陵使与所司切加勾当不得辄令侵欺【元和十一年三月】

扈从灵驾

太祖允百官表请不亲至山陵诏

朕永怀罔极实愿匍匐园陵今汝等既以宗社事重固相敦迫敬依所请倍增号絕

随灵驾赴陵所诏

伏以山灵卜兆追号罔极日月遄流先远将至且如追慕之痛感在因心终天之丧思遵达礼来月十一日灵驾发引朕侍从亲赴陵所宜令有司随事供拟

亲至和陵勅

勅朕祇荷丕图惟仰先训方追号弓之痛俯临同轨之期将展孝思宜亲营护皇太后义深鸣凤情极攀龙亦欲专奉灵輿躬及园陵寝庙务尽追摧之道用终哀敬之仪其大行皇帝发引日朕当从皇太后亲至陵所宜令中书门下准此指挥【天佑二年三月】

荅百僚不赴陵诏

朕以痛深创钜园陵有期冀当复土之辰以慰终天之报而公卿大臣敷陈典故援引今古以为一日万机不可斯须而旷既执礼而愈切难顺情而有违深抑荼蓼之哀怀俯徇股肱之谏议爰因晨省已启慈顺倍极摧伤勉从来请【天佑二年正月】

唐大诏令集卷七十六

卷七十七

钦定四库全书

唐大诏令集卷七十七

宋 宋敏求 编

典礼

陵寝下

优劳

高祖山陵毕赐元从功臣及营奉百姓恩泽诏

崇陵优劳德音

丰陵优劳德音

庄宪皇太后山陵优劳德音

景陵优劳德音

光陵优劳德音

庄陵优劳德音

孝明太皇太后山陵优劳德音

供荐

停诸陵供奉鹰狗诏

九月一日荐衣陵寝诏

亲谒

亲谒陵曲赦醴泉县德音

停亲谒乾陵勅

谒五陵赦

陵寝下

优劳

高祖山陵毕赐元从功臣及营奉百姓恩泽诏

高祖太武皇帝天纵神武膺籙受图可久之德格乎区宇敦睦九族协和万邦贤能必进德化潜洽革百王之弊兴三代之风地平天成迺安远肃至德被於四海休烈光於千载巍巍荡荡无得而称焉朕嗣膺宝祚夙夜兢惕思述先志被之率土其内外姻戚平生故旧太原从官人及历试之所文武僚佐爰洎胥吏往虽每降国恩恐未周悉或才用不申阶品屈滞或家道贫匮子孙沉沦须有矜量咸欲得所先朝优劳庶政惟以恤民为本诸州都督刺史政绩可称者具名奏闻其诸州百姓奉营山陵宜量有蠲免可令有司详为条例闻奏并务从优厚称朕意焉【贞观元年十一月】

崇陵优劳德音

朕以寡昧嗣膺大业永惟列祖之德肃奉山园之重夕惕若厉惧有缺遗赖一二元臣公卿庶士叶乃心力克申典礼今九虞既毕永慕惟深爱奉畴劳之义差其异数之命山陵使杜佑若子若孙与一人五品正员官礼仪使杜黄裳特加一阶与一子六品官副使李鄴按行山陵地副使李扞赐一级各与一子官卤簿使郑云达与一子出身仪仗使昇梓宫官各赐爵一阶邑号爵赏优赐有差三京元高陵高阳县人夫寒冻近道邻村坊市屋宇什物田苗被毁损并近陵百姓偏有便役委京兆府勘覆闻奏挽郎挽土量加优恤甸内百姓奉山陵秋冬滞雨供应疲弊所配折纳和采并停【永贞元年十一月】

丰陵优劳德音

朕闻王者大孝本於无违故由於礼则不僭慎於终则归厚国有大事付予冲人永言营奉哀惶靡措虽仰遵先旨已从俭於因山而俯徇究荒实载勤於复土况七月之会万方必臻有供亿之繁有车骑之杂赖上天垂佑庶务肃成文武尽哀敬之容道路无风雨之气粤自迁座至於返虞人之叶从礼无违者此皆一二辅弼洎左右之臣至於庶寮罔不尽力朕所加叹不忘於怀宜酬厥庸以序功次其山陵使宜与一子七品正员官山陵礼仪使及陵所摄太尉行事官与一子八品正员官山陵副使兵部侍郎判度支李选礼部侍郎崔颁按行山陵地使并赐一级挽郎及诸司职掌工巧杂役人夫车牛并询其劳绩扶以等级赐官及出身赐勲爵进阶

减劳选各有差【元和元年】

庄宪皇太后山陵优劳德音

孝本因心自天子而下达礼当从祔由圣人而设范朕以寡佑夙罹悯凶追攀弓剑闭桥山而未几永慕褱翟合源陵於此时昊天罔极追感无已俾竭诚敬用申哀怀而冢臣大僚庶尹羣吏靡不夙夜展布勤劳备物之容既陈严奉之敬斯在始终罔替差次宜劳式举彝章俾新渥泽山陵所摄太尉行事官与一子七品正员官山陵礼仪使与一子八品正员官山陵副使赐爵一级其下优赐各有差园林所在供役为劳悯兹充奉之勤宜颁施舍之令其富平县今年夏税除折诸色价及已徵纳青苗钱除已捐外并宜放免【元和十一年九月】

景陵优劳德音

勅朕闻孝莫大於慎终仁莫先於恤下慎终故勿之有悔恤下固可使忘劳自陵寢戒期郊甸充奉属春耕肇起宿麦继登百役所集羣司所备上惧一物之遗缺既怀罔极之诚下厯兆人之疫癘又思不扰之德方将号从灵驾亲至山园情为事夺竟不获遂赖一二元辅泊内外庶官严敬协心克修典礼永言嘉叹感咽增怀义有必酬式举劳以申命惠无不浹仍蠲赋以加恩山陵使兼陵所摄太尉行事官与一子六品正员官山陵礼仪使与一子八品正员官山陵副使柳公绰按行山陵副使李?并赐爵一级各兴一子出身桥道置顿使赐爵一级仍与一子官内山陵使赐绢一百疋特加一阶山陵修筑使赐绢七十疋特加一阶监修桥道使赐绢七十疋内按行山陵地使赐绢五十疋内山陵副使及修筑副使各加一阶卤簿仪仗并赐一级各与一子出身桥道置顿使各加两阶昇梓宫三品以上赐爵两级四品五品赐爵一级六品以上各加一阶其中有合选人前资见任各减两选神策六军修筑山陵官健各赐绢两疋其检校军使及押当所由四品以上赐爵一级仍加一级五品以下各加两阶陵所造作押当使等三品四品各加两阶仍赐爵一级五品以下各加两阶其中正员六品以下合选人前资见任各减三选白身各赐勲三转诸司诸使应缘山陵修造及专知修造作并诸色检校执当官典白身及直司掌上巧儿工匠等五品以上各加两阶六品以下各加一阶合选人前资见任各减两选白身各赐勲两转其给直和雇者不在此限吉凶仪仗诸色行从官等五品以下各加一阶至三品五品未合叙者赐爵一级六品以下各加一阶如其中有合选人前资见任各减一选诸司诸使押管当官置顿举幕往来检校军将中使等五品以上六品以下并加两阶白身各赐勲两转合选人前资见任各减两选太极宫宿卫官及中使大内皇城留守及押当官等五品以上各加两阶六品以下各加一阶白身各赐勲两转撰謚册哀册謚议书册文及读謚册哀册书宝读宝官等五品以上赐爵一级六品以下各加一阶合选人前资见任各减一选镌造宝册装册及检校官五品以上各加一阶六品以下各赐勲两转合选人前资见任各减一选题木主官加一阶昇宝册官五品以上各加两阶六品以下各加一阶其中合选人前资见任各减一选押卤簿仪仗挽郎等见任者各加两阶合选人前资见任各减两选山陵礼仪桥道置顿判官五品以上各赐爵一级仍加一阶六品以下各加两阶其山陵使司官与军将加一阶合选其知东渭桥官非时放选仍优与处分知道官前资见任各减三选知顿官前资见任各减两选按行陵地仪仗卤簿判官及诸副使判官并诸司诸使监当杂职掌官吏

等五品以上各加两阶六品以下各加一阶合选人前资见任各减两选白身各赐勲两转其挽郎放出身後七选许集挽士代哭挽歌等各减三年劳合选者各减两选无劳可减者各赐勲两转京兆府及诸州县断玄宫石匠及宫寝作头巧儿虽给庸直就中辛苦各赐勲一转诸色行事官及斋郎礼生并陰阳官三品以上各赐爵一级四品以下各加一阶合选人前资见任各减一选白身各减二年劳考满人放出身其数处职掌任取稳便从一项处分应缘二仗三卫彊骑及诸色人匠并缘山陵应役人夫车牛等各委本府长官本军本使本司量事优赏诸道应副山陵参佐军将等各加一阶诸色职役官吏应或减还可减者宜令所司非时与处分如有诸色流外充者各於本色中量减二年劳无劳可减者选日优与处分京兆府今年夏青苗钱应合徵共八万三千五百六十贯文并宜放免仍委令狐楚便以山陵用不尽绫绢依实支付京兆府充代百姓纳青苗钱其近迫乡村坊市屋宇什物田苗等有被损毁并近陵百姓偏有使役理宜节级优赏并委京兆府审细勘覆闻奏应随灵驾挽郎挽士诸色人夫等泥雨中不免损伤委京兆府审细访姓名闻奏量加优恤其山陵礼仪卤簿仪仗使并诸军诸使诸司将官吏如执当务重功效尤异委本军本司本使具名闻奏中书门下商量奏听进止宣示中外咸使闻知【元和十五年六月十九日】

光陵优劳德音

朕孤藐罹疾慈严早违靡日不怀终天无逮将欲躬护园寝哀达神明而公卿庶寮沥恳伏奏迫以重义夺予至情是赖一二鼎臣凡百执事咸竭严奉各表哀敬百灵供卫六合会同终始四时无爽违之憾往复千里免涂潦之虞感叹盈怀是中劳典既加恩以颁锡遂流泽以蠲租山陵使礼仪使兼陵所摄太尉行事官各与一子七品正员官仍特加一阶山陵副使按行使并赐爵一级各与一子出身桥道置顿使赐爵一级与一子官内出山陵使兼赐修桥道使赐绢一百五十疋银器二事特加一阶修筑使赐绢七十疋特加一阶按行使赐绢五十疋特加一阶修筑副使赐绢三十疋加一阶卤簿使仪仗使并赐爵一级各与一子出身桥道置顿副使各加两阶昇梓宫官三品五品赐爵一级六品以下各加一阶神策六军修筑官健及检校军使陵所造作押当官吏及中使等并诸司诸使应缘山陵修道造作及专知执当工匠等赐物加阶爵咸选有差吉凶仪使诸色行从官等五品以上各加一阶如已至三品五品未合叙者赐爵一级六品以下各加一阶撰哀册书宝读宝官等五品以上赐爵一级六品以下各加一阶昇宝册官及桥道置顿官仪仗卤簿使判官等各赐阶级勲改选减有差其挽郎放出身後七选许集南郊及太尉侍中告谕册諡宝灵座前进諡宝奏外辨奠玉帛酌献等各赐爵两级余减劳考有差其数处职掌任所便从一司处分奉先县营奉力役劳敝极深来年夏青苗钱宜令放免栢阳美原尚陵富平来年夏青苗钱每贯放二百文不满贯者每百放二十文仍委逢吉与府司计科便以山陵用不尽钱与填所放钱数其近道乡村坊市屋宇什物田苗等有被毁损并近陵百姓偏有役使理宜节级优赏并委京兆府审勘闻奏【长庆四年十月】

庄陵优劳德音

礼重饰终义崇敦孝克勤奉恤之志用申罔极之感斯固寅亮辅臣奔走多士效其忠力济是仪章俾弘加劳之泽庶表心诚之报应缘庄宫奉其山陵使与一子七品正员官仍特加一阶

山陵副使按行山陵地使并赐爵一级各与一子出身桥道置顿使赐爵一级仍特加一阶内山陵兼监修桥道使赐绢一百五十疋银器二事特加一阶内按行山陵副使赐绢五十疋特加一阶山陵修筑副使赐三十疋加一阶卤簿仪仗使并宜赐爵一级各与一子出身桥道置顿副使加两阶昇梓宫官三品以上赐爵二级四品赐一级陵所造作押当官及中使等三品四品各加两阶吉凶仪仗诸色行从官等各加一阶太极宫宿卫官及中使大内皇城留守并押当官等五品以上各加一阶撰哀册諡议諡册官各赐爵一级书册及读哀册书宝官等五品以上赐爵一级六品以下各加一阶镌造宝册装宝册装宝及检校官五品以上各赐勲两转中书门下仪制官题主官昇宝册官五品以上各加二阶六品以下各加一阶山陵使礼仪使判官各特加一阶五品以上仍赐爵一级其专知桥道官考满日放选其知东渭桥官非时放选仍优与处分知道路官各减两选知顿官各减三选按行山陵使仪仗卤簿使判官并诸色诸使监掌杂职掌官吏等各加二阶挽郎放出身後七选许集南郊及太极殿摄太尉侍中告諡册宝及灵座前进諡宝奏外辨奠玉帛酌献等官赐爵两转其山陵礼仪卤簿仪仗等使并诸使诸司军将官吏如执当务重功效尤异制勅中不该者委本司官吏本司具名闻奏中书门下奏听进止其三原县百姓今年秋青苗钱并放免其高陵县量放一半【太和元年八月】

孝明太皇太后山陵优劳德音

门下园陵之重典礼是崇故宪章既尽於旧仪严奉式遵於古训载深追感用切哀怀公卿大臣泊百执事竭忠体国宣力叶心诚敬有加恭恪不懈永告勤瘁宜洽优恩山陵使所摄太尉行事官与一子九品正员官山陵礼仪使与一子出身内山陵副使昨者责办事重与一子出身山陵使加一阶仍赐物四十疋副使二十疋判官十疋山陵监修桥道使赐物四十疋判官各十疋内山陵副使加一阶仍赐物四十疋判官各十疋山陵置顿桥道使与一子出身副使加两阶判官巡官巡检专知官各加两阶合选人前资见任各减两选卤簿使赐爵一级仪仗使加一级陵所造作押当官及中使等三品以上赐爵一级四品以下各加一阶其中正员六品以下合选人前资後任各加两选白身各赐勲两转诸司诸使应缘山陵修造及专知造作诸色检校执事当官白身及直司掌上巧儿工匠等五品以上加一阶六品以下各赐勲两转合选人前资见任各减一选白身各赐勲一转其给直和雇者不在此限吉凶仪仗诸色行从官等五品以上各加一阶如已至三品未合叙者赐勲两转四品以下各加一阶诸司诸使押当官置顿营幕往来检校军将中使等五品以上六品以下并各加两阶白身各赐勲一转合选人前资见任各减一选两仪卫官及中使大内皇城留守并押当官等五品以上六品以下各加一阶白身赐勲两转撰諡册哀册諡议书册及读諡册书宝读宝官等三品以上赐爵一级四品以下各加一阶镌造册宝装宝及检校官五品以上各加一阶六品以下各赐勲两转合选人前资见任各减一选题木主官加一阶昇宝册官及举宝官五品以上各加一阶六品以下各赐勲两转其中合选人前资见任各减一选押当卤簿仪仗挽郎各加一阶合选人前资见任各减一选山陵礼仪置顿使判官各加两阶合选人前资见任各减两选仪仗卤簿使判官及诸副使判官并诸司诸使监当杂职掌官吏等各加一阶白身各赐勲两转挽郎放出身後七选许集挽士挽歌等各减一半劳合选者前资见任各减一选无劳可减者各赐勲两转诸色行事官及斋郎礼生并陰阳生三品以上各赐爵一级四品以下各加一阶合选人前

资见任各减一选白身各减二年劳考满人放出身其数处职任取稳便从一头处分应缘仪仗三卫彍骑及诸色夫匠代选并缘山陵应役人夫车牛等各委本府长官本军大使本司量事复赏太常礼直官及中书门下仪制官主务皆重事无遗阙特加一阶如先已加阶者委中书优与进拟诸道应奉使赴山陵幕府军将等各加一阶诸色职掌官吏中应合减选人如无选可减者令所司非时与处分如有诸司流外充者各与本色中量减一半劳无可减者优与处分充寝陵劳役实繁新泽所沾异渥斯及其奉先县宜放今年夏税青苗钱如已有诸色折纳者即放於秋税斛斗据数矜免布告中外称朕意焉【咸通七年六月八日】

供荐

停诸陵供奉鹰狗诏

园陵之地衣冠所游凡厥有司罔不祗事礼存则先型是训礼失则後代何观惟怀永图敢忘旧典顷者别致鹰狗供奉山陵至於料度极多费损况昔诚禽荒既非寻常所用远惟龙驭每以仁爱为心彼耕象与耘鸟且增哀慕岂飞苍而走黄更备畋猎有乖仪式无益崇严载怀亏紊良深悚惕诸陵所有供奉鹰狗等并宜即停【开元二年四月】

九月一日荐衣陵寝制

禋祀者所以展诚敬之心荐新者所以申霜露之思是知先王制礼盖缘情而感时朕缵承丕业肃恭祀事至於诸节当修荐享自流火届期商风改律载深追远感物增怀且诗着授衣令存休澣在於臣子犹及思私恭事园陵未标典式自今以後每至九月一日荐衣於陵寝貽范千载庶展孝思且仲夏端午事无故实传之浅俗遂乃移风况乎以孝导人因亲设教感游衣於汉纪成献服於礼文宣示寮庶令知朕意【天宝二年八月】

亲谒

亲谒陵曲赦醴泉县德音

朕恭膺大宝嗣隆景业?奉成则光阐洪休昧旦兢怀宵分动虑苍旻垂佑宗社降灵顺黎元之心藉忠贤之力俗登仁壽道暨升平远肃迓安时康俗阜履端授节阳和肇气亲率庶僚奉谒陵寝遗弓茹慕切终身之忧抚镜纏悲兴寒泉之思敬深如在哀隆罔极荐享既毕情理获申式表因心宜弘凯泽可曲赦醴泉县并行从人大辟罪以下皆赦除之百姓免今年租调左监门员外将军常基在此宿卫进爵一等陵令陵丞各加一阶并节级赐物【永徽六年正月】

停亲谒乾陵勅 苏頲

勅昔有献高寝礼遵於仲月将上原陵薨達於中夜所以銜悲罔极申敬如在鑑於前史抑有旧章朕以寡昧早罹酷罚属远安迓肃庆承於七庙霜来露往感积於四时顷回旆洛师停輿

京邑盖非省风俗希先王傒后之言伏以瞻山园奉圣人因亲之教有司已具成命必行渭北衣冠预严於法驾陵东松柏傍?於清道先陈翼翼之诗後展蒸蒸之慕孟冬戒序计日数程义在因心不忘寢寐但以近郊井隧年时水旱赋於纳秸未瞻规田取贍彼盈箱曾徵实廩而公卿常伯献书立议咸以为明察敬事抚临爱育若万乘不备其礼故非敬也百姓不胜其劳故非爱也况骏奔执豆夙事於象居攀恋遗弓载勤於奉邑以眇身之兼愿殊先志之恤隐是则乖於济物咎必在予所不忍言谅非获已俯顺衆情逾增远思前以今年十一月二十日亲谒乾陵者且停【景龙三年十月十日】

谒五陵赦

祀之大者莫尊於严享德之至者莫加於孝敬故周庙颂思文之章汉陵躬展事之礼因心斯在敢不肃祇我国应天受期骏惠丕命继武宗文之德重熙累洽之盛故以道高系表首冠帝先朕以眇身获保鸿业往属多难时逢国屯推戴神宗纂复兴运允迪前烈载康兆人皆仗卿士之叶谋人祇之道赞岂伊薄德敢承天休露往霜来久积园陵之思秋尝夏禘幸思孝享之诚乃夏朔之辰祥芝产於太室及秋吉之日珍木瑞於神宫对月上灵拜兹嘉祝顷秋稼未实民力尚劳每事害农岂惟在予一人之责因亲设教恐违先旨隐恤之方今三时已和百礼斯洽崇牙宿设万舞在庭敬尔神工骏奔执豆蠲洁为精明德惟馨有来雍雍载怀忧惕之思至止肃肃如闻叹息之声降格有终纏感罔极闕宫郁鬯原庙衣冠或将亲扫松柏用仰崇饰增严瞻弓剑而莫及捧镜奩而呜咽始自桥岳终奉梁山紫气昇於旧原甘露徧於陵树白兔驯扰瑞草呈祥恭惟昭陵载感王业肆台小子夙奉睿图及斋诚?诚率祇祀典圣容昭见灵迹尤彰每四方多虞中国有事虽升龙已远而跃马如神及配奠寿宫亲闻忉跃幽明合庆今古未闻盖皇天眷於我唐神心昌於後嗣延祚之祉岂独在予一人锡类之恩宜广覃於四海可大赦天下自开元十七年十一月二十二日昧爽以前大辟罪以下罪无轻重已发觉未发觉已结正未结正系囚见徒常赦所不免者咸赦除之自天宝以来有杂犯经移近处流人并配隶磧石瓜州者朕舍其旧恶咸与惟新并宜放还其逆党缘坐长流及城役量移近处编附为百姓左降官量移近处官人有亡官失爵齿力未衰者量加收录百姓无出今年地税之半如已徵纳听折通租悬调在百姓腹内者一切放免孝子顺孙义夫节妇旌表门闾终身勿事诸州侍老百岁以上赐绵帛十段九十以上赐五段八十以上赐三段献陵定陵官使并管陵县官各加一阶陵户各并放从良终身洒扫陵寢仍每陵取侧近百姓六乡以供陵寢永勿徭役自古帝王贤臣将相陵墓宜令所在州县致祭内外文武官三品以上加爵一级四品以下各赐一阶亚献太子鸿赐物二千疋终献庆王潭赐物一千疋邠王守园各一所并量赐奴婢等其道士女道等既先令司封检校不须更隶宗正司所置崇玄置署宜停古之制礼祭用质明义兼取於尚齿情实缘於既没我圣祖湛然常在为道之宗既殊有尽之期须展事生之礼自今以後每於圣祖宫昭告宜改用卯时以前行礼朕深惟复朴将致无常在理难明玄风未畅不有时习焉能化成自今以後每至三元日宜令崇玄馆学士讲道德经羣公百辟咸就观礼庶使轩冕之士尽弘南郭之风寰海之内咸为大庭之俗其崇玄学士补置犹近於经术或未精通又属初崇圣号亲行典册宜弘劝獎以示恩惠至举口试及占并策各减一条三年业成始依常式其崇玄馆大学士宜赐物一百疋学士赐六十疋直学士四十疋宫内先配住道士各赐二十疋仍令所司具作条件处分宣布中外令识朕怀主者施行

唐大诏令集卷七十七

卷七十八

钦定四库全书

唐大诏令集卷七十八

宋 宋敏求 编

典礼

追尊祖先

追尊玄元皇帝制

追尊先天太皇德明兴圣皇帝等制

上圣祖大道玄元皇帝号并五圣加諡制

加諡祖宗

諡议

顺宗加諡至德弘道大圣太安孝皇帝议 宪宗加諡昭文章武大圣至神孝皇帝议

文

圣祖大道玄元皇帝加号册

高祖神尧大圣皇帝加諡册

太宗文武大圣皇帝加諡册

高宗天皇大圣皇帝加諡册

中宗孝和大圣皇帝加諡册

睿宗玄真大圣皇帝加諡册

赦

加祖宗諡号赦

国忌

国忌在近进蔬菜诏

增忌辰设斋人数勅

废国忌日行香勅

追尊祖先

追尊玄元皇帝制

东台大道混成先二仪以立称至仁虚已妙万物以为言粤若老君朕之本系爰自伏羲之始泊乎姬周之末灵应无像变化多方游元气以上昇感星精而下降或从容宇宙吐纳风云或师友帝王丹青神化譬陰阳之不测与日月而俱悬属交在辰晦迹柱下大弘雅训垂训将来虽心斋於太虚而理归於真宰若夫絕圣弃智安排寡欲寂寞窅冥之际希夷视听之表澹尔无为翛然自得酌之不竭用之不盈执大象而还淳涤玄览而遣累邈乾坤而长久跨陶钧以亭育至矣哉故无得而称也况大道所宣克昌宝祚上德所履允属休期朕嗣膺灵命抚临亿兆总三光之明而宿宵夤畏居四大之重而寢兴祇惕尽孝敬於宗祧罄怀柔於幽显行清静之化成太平之业登介丘而展采坐明廷而受记非烟结庆重轮降祥鹤应九歌山称万岁越振古而会休徵冠帝先而为称首大礼云毕回輿上京驾驻瀨乡躬奠椒醑仰瑞光而延伫挹神泉而永叹如在之思既深敬始之情弥切宜昭元本之号以章玄圣之功可追上尊号曰太上玄元皇帝祠堂庙宇并令修创庙制令丞以供荐飧仍改谷阳县为真源县宗姓特给复一年冀崇追远之怀用申尊祖之义主者施行【乾封元年二月二十日】

追尊先天太皇德明兴圣皇帝等制

门下庇人生者必崇於大道受成命者实赖於前烈恭惟大圣祖玄元皇帝道光太极首出浑元弘敷妙门广化真理虽乘时御气已昭昇於上清而储祉发祥每敷佑於来裔祚我宝运格於皇天爰自创业迨於兹岁频彰景贶屡覩真容使夫天清地宁物阜民庶六气时若四夷来王圣感之祖也至道之应也成功不宰岂假於强名降福无疆敢忘於昭报是用荐徽号增礼册蠲洁以尽敬躬亲以致诚亦既昭格良深感庆交至宜因展事更广扬名夫圣人之生乃先天地应变无体其犹龙马虽窅冥之物不知谁何而诞灵之後示必有先圣祖父母着在图籍母益壽氏已崇徽号曰先天太后父周上御史大夫敬追尊为先天太皇仍於譙郡置庙自余一事以上准先天太后例昔契敷五教殷以为祖稷播百谷周以配天况咎繇迈种黎人怀德

我之本系千载弥光敬追尊为德明皇帝凉武昭王朕十一代祖也积德石地炳灵中叶奄有万国兆先帝功敬追尊为兴圣皇帝其灵侧近仍并禁樵牧春秋二时备礼致祭且圣人所理本在诸天将欲降灵固欲取象况为帝号岂可名宫其玄元宫西京宜改为太清宫东京改为太极宫天下诸郡改为?极宫两京宫内道士宜先抽有道行者一十人自余於新度人中简择取添满三十人为定额仍各赐近城庄田册礼宜令所司即详定仪注闻奏上圣祖大道玄元皇帝号并五圣加諡制

握乾图者必禀於元命宗道本者允属於强名是知物通昭感之德报功尊祖贵叶崇之义朕祇荷丕业恭临大宝何尝不宵衣浹虑菲食斋心奉玄圣之范为苍生以祈福自顷昊穹眷命天道降休玉芝再产真容累见嘉应荐来罔知攸答岂谓玄记陰騭秘谋混成悬想造化之源密纪景灵之度庆崇真籙昭锡朕躬初验神传竟彰天授幽深累迹既殊於人代朴略奇象固絶於名言?覲皇图钦承道宝有寅畏增深思申严敬之诚以崇广大之业谨上玄元皇帝仍以来月五日朕亲奉册礼国家文祖神宗重熙累洽无为之训垂佑清静之德在人慎宁後昆累承大业是用钦玄符之景命归清广之延祥稟庆真源光昭圣烈谨上高祖神尧皇帝尊諡曰高祖神尧大圣皇帝太穆皇后窦氏尊諡曰太穆顺圣皇后太宗文武圣皇帝尊諡曰太宗文武大圣皇帝文德圣皇后长孙氏尊諡曰文德顺圣皇后高宗天皇大帝尊諡曰高宗天皇圣皇帝大圣则天皇后武氏尊諡曰则天顺圣皇后中宗孝和皇帝諡曰中宗孝和大圣皇帝和思皇后赵氏尊諡曰和思顺圣皇后睿宗大圣真皇帝尊諡曰睿宗玄真大圣皇帝昭成皇后窦氏尊諡曰昭成顺皇后肃明皇后刘氏尊諡曰肃明顺圣皇后庶彰祈精之感降貽厥之元符聿修诚敬達孝思於罔极更以来月五日於太清宫前恭礼宁王宪薛王业各赐物八百疋忠王浚棣王洽鄂王滉光王淝等各赐物七百疋中书门下赐物五百疋开府王毛重赐物三百疋皇亲五等以上诸亲三等以下及文武百寮各赐有差自古明王因心以待人由已以施物故休戚共而忧乐同也中书门下丞相尚书开府王少大将军父赐三品官九品三监十二卫监军羽林军五省官三府户大都督府长史父各赠四品官以上清官父各赐五品官凡所赠官宜兼赠母邑号俾夫羣臣受策上延父母先帝遗泽下及幽明兴言及此良多感叹羣臣一体荣辱是同龙蛇之歌古今作式其唐隆元年两营立功官三品以上与一子官其四品以下选日优与进改京兆府供顿免今年地税诸道战亡人家仰州县存恤不支济者量事赈给诸军健儿别勅行人各赐勲两转加諡祖宗

諡议

顺宗加諡至德弘道大圣大安孝皇帝议

臣融议曰王者则高明以茂育法博厚而含弘象日月以照临如雨露而膏泽諡以令德昭於至公即轩辕颡项文王武王是也其有褒旌未副则宜增美尊名伏惟顺宗至德大圣大安孝皇帝道合二仪明齐两曜恩沾万物信若四时始位践重光名高少海寢兴有度视听必端昔德宗驻蹕奉天礼行巡狩扫除凶寇实赖春闱每誓衆之初而吐言激切及抚军之际皆感动师人泊车马还都欢娱宫禁朝夕视膳晨昏问安是居承华毓德望苑日彰孝爱三十七龄三善益表於元良六气忽嬰於沉痾德宗以龙楼重嗣惟疾之忧医药躬劳至於大渐顺宗昭事

德宗之节也询古无对德宗鍾念顺宗之至也前史莫伦父子之亲君臣之义垂荣万国流庆千年及历数自天统承丕构不敢牢让方遵永图师唐虞之仁以覆帔天下纂禹汤之化以煦育黎元薄赋蠲逋宥刑恤隐深仁降感沛泽旁敷减去宫人斥絶奇贡临轩广爱焚鸩毒於通衢凭檻兴仁放猛鸷於维繫归功臣之甲第而中外讴歌黜残酷之剧吏而远近欣服?恭九庙睠佑万邦宵旰勤劬詎思颐卫於是托付冢嫡壮乎皇猷以明继明以圣传圣孝德垂名於不朽睿谟貽庆於无疆是生圣明收复河陇刷百载失地之耻涤八圣强邻之羞陛下不有其功美归祖考追加尊諡用重鸿名易曰天地之大德曰生圣人之大宝曰位经曰德者同於德道者同於道諡法曰寬裕和平日安克慎所安曰孝伏惟顺圣皇帝端拱造物秉运统天可谓至德也感神翊运光明正位可谓大圣也永图丕构传圣和保可谓大孝也臣融定加諡号谨上尊諡曰至德弘道大圣大安皇帝谨议

宪宗加諡昭文章武大圣至神孝皇帝议

臣融议曰皇莫尊乎义轩帝莫大於尧舜咸有上諡光昭厥猷光德崑崙徽美未称则必追加大号式重鸿名伏惟宪宗神章武孝皇帝神授英明天假文武德惟孝养仁着君临功格玄穹道孚皇极词悬日月学奥乾坤扬十圣之耿光冠百王之丕绩伏以天宝之末大历之中郡国有倔强之臣朝廷行姑息之令所以李錡拒命自於宗枝刘辟称兵起於儒吏伏惟宪宗皇帝上遵太宗之法次览轩后之书亲近正人委任辅相修明纲纪震动雷霆剪渠魁征讨叛乱无职不举无贤不庸将靖万方用清四海号令必一视听无私故得夏台伏鑕於沙陲上党受擒於城镇西蜀献俘而玉京正法东吴纳寇而金陵廓开郾城才下而申蔡削平郅师就诛而齐鲁尽复皇威远振神筭无遗时也沧景屏息以朝天易定束身而纳地海内无事天下一家万国来宾百蛮向化方兴谋於戎狄深注意於河湟伏以疆土开拓而有时腥膻冠带而有日逐覩赫奕休烈留付中外实主有明圣乘以英运睿谋心课越古超今陛下不有其功归於先志揭兹上善既让於天能光祖宗继述前圣昨者丞相卿士请加鸿名陛下固秉冲谦再三不允今追尊祖考荣冠禹汤伏惟宪宗神圣章武孝皇帝乃圣乃神乃武乃文盛德大业经天纬地记曰武王周公其達孝矣乎诗曰文王受命有此武功臣融定加諡号谨上尊諡曰昭文章武大圣至神孝皇帝谨议

闰十一月十七日宰臣於延英殿面奉圣旨收复河湟继述先志将欲尊顺宗皇帝宪宗皇帝

右兵部尚书归融奉闰十一月二十三日勅牒差臣定諡号者学慙浅薄文愧空虚先圣尊号谬膺论譔不敢不罄竭愚悃上副天心今諡号曰已成谨辄进顺宗皇帝諡号一卷宪宗皇帝諡号一卷并各封进无任【云云】谨具如前勅旨敬依典礼不任摧感宜付所司

册文

圣祖大道玄元皇帝加号册

维天宝八载岁次己丑闰六月癸亥朔四日景寅曾孙嗣皇帝臣隆基奉册大圣高祖玄元皇

帝臣闻有万物者本乎大道称谓所极乃强名焉通三才者存乎大宝敬教所底唯崇号焉伏惟象帝启元犹龙表圣应代降迹立言垂范冲用之功覆帔於天地普救之德亨毒於生灵委裕邦家克保丕业顾以眇躬缵承玄绪永惟敷佑以致太和顷者玉芝再产玄记陰騭是用恭膺景命肃事鸿名既刻元辰荐彰嘉贶则有卿云散彩瑞日重轮钦承降鉴载深兢惕谨上加尊号曰圣祖大道玄元皇帝伏惟昭膺盛典永贻休烈

高祖神尧大圣皇帝加諡册

维天宝八载岁次己丑闰六月癸亥朔四日景寅孝曾孙嗣皇帝臣隆基敢昭告於高祖神尧皇帝伏惟乾坤合德历数在躬俯顺人心肇兴王业济生灵於涂炭弘至理於馨香四海乐推百蛮稽服故得应图协纬开国造邦顾以眇德缵承丕绪永惟孚佑以致太和顷者玉芝再产玄记陰騭钦承景命肃事鸿名既刻元辰荐彰嘉应则有卿云散彩瑞日重轮恭惟降鉴载深兢惕谨上加尊諡曰高祖神尧大圣皇帝伏惟俯鉴?诚昭升盛烈祇奉典册伏增感慰

太宗文武大圣皇帝加諡册

维天宝八载岁次己丑闰六月癸亥朔四日景寅孝曾孙嗣皇帝臣隆基敢昭告於太宗文武大圣皇帝伏惟英喆自天应期拨乱翼戴元圣大拯横流九服载安百蛮俾乂功冠开辟德被生灵故干戈之动叶於汤武文章之盛县於日月克昌大业永建皇图顾以眇身祇膺宝命恭惟孚佑以至和平顷者玉芝再产玄记陰騭是用钦承丕祉肃事鸿名既刻元辰荐彰嘉应则有庆云散彩瑞日重轮永惟降鉴载深兢惕谨上加尊諡曰太宗文武大圣皇帝伏惟俯瞻?诚昭升盛烈祇奉典册伏增感慰

高宗天皇大圣皇帝加諡册

维天宝八载岁次己丑闰六月癸亥朔四日景寅孝孙嗣皇帝臣隆基敢昭告於高宗天皇大帝伏惟继文缵圣嗣武居尊保合太和缉熙庶绩万邦作乂百度惟贞兴吊伐之师展对崇之礼无有远迩罔不率从仁风汪洋德泽滂沛圣谟超於邃古休声贯於列辟顾以眇德缵承丕绪永惟敷佑以致太平顷者玉芝再产玄记陰騭钦承景命肃事鸿名既刻元辰荐彰嘉应则有庆云散彩瑞日重轮恭惟降鉴载深兢惕谨上加尊諡曰高宗天皇大圣皇帝伏惟鉴瞻?诚昭升盛烈祇奉典册伏增感慰

中宗孝和大圣皇帝加諡册

维天宝八载岁次己丑闰六月癸亥朔四日景寅孝侄嗣皇帝臣隆基敢昭告於中宗孝和皇帝伏惟睿圣日跻文思天纵重昌大业光启中兴允昭嗣夏之功克荷缵尧之绪武以靖乱文以经邦流恺悌之风布寬和之政故得三灵叶赞百姓与能庶绩咸康彝伦有穆顾以眇德缵承丕绪永惟敷佑以至太和顷者玉芝再产玄记陰騭钦承景命肃事鸿名既刻元辰荐彰嘉应则有庆云散彩瑞日重轮恭惟降鉴载深兢惕谨上加尊諡曰中宗孝和大圣皇帝伏惟俯

鉴?诚昭升盛烈祇奉典册伏深感慰

睿宗玄真大圣皇帝加諡册

维天宝八载岁次己丑闰六月癸亥朔四日景寅孝子嗣皇帝臣隆基敢昭告於睿宗大圣玄真皇帝伏惟濬?齐圣文思光泽炳兹龙德潜跃应期靖难安人克昌休运臻於至道惟怀永图顾以眇身嗣膺宝命恭惟敷佑以至太和顷者玉芝再产玄记陰隲是用钦承丕绪肃事鸿名既刻元辰荐彰嘉应则有庆云散彩瑞日重轮恭惟降鉴载深兢惕谨上加尊諡曰睿宗玄真大圣皇帝伏惟俯睭?诚昭应盛烈祇奉典册伏增感慰

赦

加祖宗諡号赦

王者之御天下也莫不懋建皇极惟怀永图先德礼以导人用政刑以佐理顺四时而并施其化育万物而各遂其宜然後辟土开边远柔迺悦衆享美利斯为大宁我国家以仁义有乾坤以道德抚夷夏其高祖太宗经纶之列圣继体守持之重光累洽延洪景铄及於宪考文明武英剡稂莠於甫田振威灵於殊俗肃清澄廓庶绩其凝实推中兴历十五载今予小子大构是承祇奉宗祧敬若天命遐慕唐尧恭让之德常励汉文菲薄之躬櫛乎忧勤惧忝负荷每念河湟之壤陷为戎寇之疆百有余年一失莫复元和中将雪前愤尝振睿思方除孽臣未就成业永怀遗训明发疚心近者祖祢降灵中外协志不烦攻伐不费财赋六郡连收七关尽复剡解辨树领乞降犬羊窜亡亿兆鼓舞厥庸有功继志克成仰袭丕休聊用无愧臣下欲归虚美强我鸿名斯实先圣神功因愿追尊加諡牢让乃遂孝思获申颁告寰区同兹徽庆且虑蒸黎之困犹疑狱犴之冤爰因献岁之辰乃行在宥之典可大赦天下自大中四年正月一日昧爽以前大辟罪以下已发觉未发觉已结正未结正繫囚见徒罪无轻重咸赦除之唯犯十恶官典犯入已贓不在赦限

国忌

国忌在近进蔬菜诏

朕闻大孝塞乎天地色养着乎人伦自古迄今乃生民之本也朕之不幸往逢?疚未明之间屡所哀感举目歔歔永怀罔极追慕之痛鍾此?宾不乐之辰继乎旬朔宜令外厨断牲鳞唯进蔬菜

增忌辰设斋人数勅

忌辰设斋虽出近制斟酌损益贵於得中况在不迁之宗允资异数之礼五月六日二十六日两忌设斋人数宜各加至二十人太穆文德皇后忌日亦各加倍数其寺观仍旧十二月八日

忌宜於五所寺观共设四十人宜令所司准式【太和年】

废国忌日行香勅

朕以郊庙之礼严奉祖宗备物尽诚庶几昭格恭惟忌日之感所谓终身之忧而近代以来归依释老徵二教以设食会百辟以行香将以仰助圣灵而冥资福佑有异皇王之术颇乖教义之宗时因崔蠡奏论遂遣讨寻本末礼文令式曾不该明习俗因循雅当厘革京城及天下州府国忌日於寺观设斋行香起今以後并宜停废【开成四年年十月】

唐大诏令集卷七十八

卷七十九

钦定四库全书

唐大诏令集卷七十九

宋 宋敏求 编

典礼

巡幸

幸故宅改为通议宫曲赦京城系囚制巡幸岐陇二州曲赦

巡幸并州曲赦

破契丹幸灵州诏

赦行幸诸县及岐州制

幸东都诏

睿宗令皇帝巡边诏

行幸东都诏

幸新丰及同州勅

幸东都制

至都大赦天下制

巡幸东都赐资扈从赦天下制

幸长安制

幸东都诏

将离东都减降囚徒勅

北巡狩制

幸太原府赦境内制

北路幸长安制

南路幸长安制

巡幸东都赐赉从官勅

南路幸西京勅

銮驾到蜀大赦制

史思明再陷洛阳巡幸东京诏

巡幸

幸故宅改为通议宫曲赦京城系囚制

朕?膺大宝克隆景祚永言孝思聿追罔极肇惟自昔胥宇旧居王道所基积庆攸在桑梓之敬每怀践历日不暇给以迄於兹今既氛祲廓清区夏宁谧时和岁稔民休俗泰爰择良辰言遵邑里体同过沛事等归樵故老咸臻族姻相会肃恭荐享感庆兼集思俾欢心逮於衆庶愍兹幽滞有怀宽释都輦之地宗祊所居作固万邦义越等常惟时孟夏方申长育宜顺天心宣兹惠泽可曲赦京城内系禁囚见徒及被推问应集之人死罪以下并放免其内有於政切害情理难原者宜降死从流【武德六年四月】

巡幸岐陇二州曲赦

朕恭膺宝命握图驭历属丧乱之後承凋弊之余宏宣德化励精治道遐迩肃清要荒来服聊因暇务省视民风遵彼岐梁言臻汧渭百年之老俱称鼓腹五尺之童咸欣击壤睠怀曩昔亟游此地岁月踰迈以迄於兹周览原隰怆然怀旧延问乡党僚吏犹存事异宛樵情均丰沛民和俗阜上下欢洽宜宣恺泽俾同庆幸可特赦岐陇二州管内自贞观四年十月一日昧爽以前大辟以下悉从原宥放免二州户民无出一年租赋八十以上鰥寡笃疾及旧任二州杂职佐吏以上赐物各有差百岁以上就加优恤行经咸阳始平武功二县见囚禁徒罪以上各降一等杖罪以下并宜释放年八十以上及鰥寡笃疾并武功县旧主军师亦加赐物凡此界内名山大川望秩之礼备加牲币孝子顺孙义夫节妇随事褒显旌表门闾其赐物之有差宜依

别勅务从周厚以称朕意

巡幸并州曲赦

太原之地兴运所阶全晋之人义深惟旧自朕膺宝历二纪於兹何尝不御展长怀想崤陵之风雨临轩远感念大麓之云雷当於此时乃忘身而拯溺实赖同德并赢粮而乐推役不踰年遂清区域谅由成都之衆讴讼阐虞帝之功战牧之徒歌舞兴周王之业仗兹叶力竟致升平怀彼勤劳何忘晷刻既因垂拱之暇再省创业之方周历郊原宛如畴昔访其父兄已多长谢不见所识魏后遂以兴嗟恤彼故里汉皇因而式宴前王是日哀乐交怀在朕深衷义符於此是用具陈广乐共申高宴取譬还谯之赏同彼幸代之情仍曲赦并州管内大辟罪以下繫囚见徒并赦除之常赦所不免者不在赦例【贞观二十年正月】

破契丹幸灵州诏

朕形劳育物尽敬承天蠢动不安栉风而罔倦荒隅未静救焚而靡息独运方寸贯彻上玄凝想冕旒布化中外是知惟天为大合其德者弗违谓地盖厚体其仁者光被故能弥纶八极权輿二仪大帝福谦斯其效矣彼匈奴者与开辟以俱生奄有龙庭共老上而并列僭称骄子分天街於宸仰应旄头抗大礼於皇极流殃构祸数岁称兵凭陵障塞连年压境射雕驰骑亟饮灞川如豕腾氛频惊渭汭贻先皇之动衆致黎庶之涂原社稷为虚軫情何已朕御天下二纪於兹曩者聊命偏师遂禽颉利今兹始弘庙略已延陀麾驾出征未踰郊甸前駟所轡才掩塞垣长策风行已震金微之表扬威电发远踰沙场之外遂使雁山之北无侵单于龙庭之南大开封域其契苾车心俟斤及鉄勒诸姓回纥朝禄俟利发等总统百余万户散处北溟远使人委身内属请同编列并为郡县引领翘足暴十日而伫油云延首求哀沉九泉而请营魄朕当暂幸灵州抚辑归附弘兹肆赦加以施行颁惠天隅耀威朔收其瀚海尽入提封解其纷争并垂冠带混元以降殊未前闻无疆之业永贻来世古人所不能致今既吞之前王所不能屈今咸灭之斯寔书契所未有古今之壮观岂朕一人独能宣力盖由上灵储祉锡以太康宗庙威灵成兹大定即宜宣礼告於清庙仍以大庆颁示普天俾与黎元同兹有赖【贞观二十年八月】

赦行幸诸县及岐州诏

朕恭膺宝命嗣奉瑶图居万乘之尊当四海之贵遐观往烈详求前古每希踪於后常劳心於庶物兢惧弗宁忧勤若厉属天下无事区宇有截仰高风於汾射暂清暑於林泉朕昔在震宫侍游兹壤山川依旧岁月不追今既俗阜年和华夷胥悦怀徽范情兼感慰宜遵省方之义且顺阳和之序曲申惠泽式彰寬宥行幸所经诸县及岐州囚徒人犯罪者流降从徒以下并免之【永徽五年二月】

幸东都诏

咸京天府地狭人繁百役所归五方胥萃虽获登秋之积犹亏洊岁之资矧言於此思蠲徭赋夫以交风奥壤测景神州职贡所均水陆辐凑今兹丰熟特倍寻常事贵从宜实惟权道即以来年正月幸东都关内百姓宜免一年庸调及租并地丁税草其当道诸县特免一年剑南陇右诸州每年供进物一二年且停【仪凤二年十月】

睿宗令皇帝巡边诏

先王省方所以观风设教圣人顺动所以刑清眚服故叶时同律虞典之常道乔岳翕河周家之盛德自王风不竞兹礼遂阙两汉之朝有时于迈三国以降日不暇给我皇家开元首出卜代重光寰宇大宁车书无外文祖神宗之德洽於兆人考祥展义之规昭於国典朕只若丕构寅奉庆灵夙怀箕岭之心久遂汾阳之志皇帝天锡英武神与聪明纯孝极於安亲大功深於济代自陟元后实总朕师时政益明彝伦攸叙而将靖边眚藩阻悠遐夷夏殊化或幽隐未申或劳苦未恤将副来苏之怀实允卜征之义加以顷年边将授任或乖师律以亏军威不振皇帝宜顺时巡狩亲幸边陲掌图修考事之仪典乐具陈诗之礼西泊河塞东踰燕朔望秩名山肆觐羣后休农问老誓师训卒其有牧州典郡功施於人仗节拥旄隐若敌国者当崇进律之赏加以分麾之命若邦政不举军令莫修哀歛细人侵削战士者明兹典宪肃以天诛然後七萃腾装六军按节合符釜山之曲览轩辕之遗风勒铭单于之台践汉皇之故事使陰山罢祲大漠无尘其供帐所资储拟之费皆令有司支备州县不得劳百姓【先天元年十月】

行幸东都诏

咸洛京师建都惟旧乃矧时迈卜征在斯朕承天纂历恭已临人鼎俎虽甘念疲眚之不足宫室信美伤浮户之未安事内攢於千虑心外周於万方则知帝业初启崑函乃金汤之地天下大定河洛为会同之府周公测景是曰土中为六气之所交均万方之来贡引鱼盐於淮海通杭紵於吴越瞻彼洛汭长无阻饥自中宗入关於今八载省方之地久而莫修遂使水漕陆挽方春不息劳人夺农卒岁何望关东嗟怨朕实闻焉思欲宁人而休转运餽谷而就敖庾加以暑雨作害灾拂秦川岁星有福祥归豫野朕情深救弊身岂怀安夷考衆心审听輿诵上奉天以为孝下利人以为忠顺时而动从衆之愿宜以今年十一月行幸东都凡厥有司式遵乃事至於行从兵马供顿贮积务在樽节勿使烦劳考使选人咸令都集东都宫殿应须修理量加整葺不得烦人朕本为人而行非拟劳人自奉所过州县无费黎元亦不得辄有差科傍求进献宣布遐迩知朕意焉【先天二年七月】

幸新丰及同州勅

勅虞之四朝且徧区?汉之三辅本同京师善於古者考於今发乎近者应乎远若顺豫之事缺则紊於王制巡游之典备则虑於人劳朕受命膺期励精设教幸乾坤幽赞风雨咸若百姓既阜三农已登同穎献於宗庙穰穗生於郡国我无大桀寔欣於岁取人有小康未果於时迈但左翊之地近入黄图新丰之邑甫邻青绮山川宫館咫尺相望方欲过灞亭而涉□经沙阜而临渭见彼耆耄问其疾苦察长吏之政恤黎眚之冤盖所以展义陈诗观风问俗始自畿甸化

於天下宜以今月二十五日幸长春宫停五日缘顿所须并令所司支备一事以上不得扰州县发日唯量将飞骑行更不须别遣兵马及妄有科唤朕此行之处不得进奉在路有称冤苦州县不能疏决者委御史金吾收状为进各勉所职副朕意焉【开元二年九月十一日】

幸东都制

黄门朕闻遂物之宜上则听其和乐违人之欲下则生於怨思一物安可不遂万人安可固违且先王卜征观乎风俗大易顺动应乎天地由是巡以五载尚徧於人寰设为两京况称於帝宅东幸西顾乃其常也然以行必清道不为无事至而供帐是则有劳故恤人之隐忧人不足於今四年矣遂使东土耆老倾心而僉予中朝公卿屡言以沃朕咸谓国之中洛王者上地均诸侯之赋当天下之枢陆行漕引方舟系舳费省万计利踰十倍更知夫便於物者非自奉以怀安嗟於人者岂不识而阻愿於是乎见品彙之阜因京坻之余则无夺农矣陈太师之言献史臣之颂则无缺政矣信可以备法驾乘阳春归於成周布我时令宜以来年正月五日行幸东都仍取北路所司准式主者施行【开元四年十二月三日】

至东都大赦天下制

黄门周宅中土秦里上田皆王者之都也时迈观风载巡展义皆王者之政也朕嗣守宸极顿移年所冕旒而视心每周於万邦车辙所届迹不出於三辅岂怀安以惮劳若省费而体力然以设京师者不偏于西据奉宗庙者亦俟於东征安可阻从人之心增僉予之怨是用闔阳发岁练日简辰顺和气以应物御惠风以行令永言告至载叶侔来顾兹菲躬畏此鸿业下輶而有宫室即旧不加登台而有山川览今犹昔森言在日用軫於怀思弘远图俾作寬典不忘师古之义特布惟新之渥可更大赦天下自开元五年二月三日昧爽以前大辟以下罪无轻重已发觉未发觉已结正未结正系囚见徒常赦所不原者咸赦除之谋反大逆不在赦限【云云】夫政欲清静词尚省要间者思致於义未臻其道文书盈几阁而吏益欺诏命下闾里而人莫谕得非失於抵牾弊在顿芜耶简而易从禁则难犯令式格勅有不便者先令尚书省集议刑律判定宜详閱厥衷合於大体亡命山泽挟藏军器百日不首复罪如初敢以赦前事相告者以其罪罪之赦书日行五百里布告天下称朕意焉主者施行

巡幸东都赐赉扈从赦天下制

朕自临天下未至於洛虽二京出游盖惟常典五载来巡肇於即事念兹扈从特有加恩南北衙应从官三品以上各赐物四十段四品三十段五品二十段六品七品十五段八品九品十段从飞骑万骑各赐物五段马家小儿赐物三段三卫检校监门直长引驾等发京宿卫执当不阙者简日优量其置顿营幕桥道等使并制官各赐物通加从官一等仍与中上考缘路刺史上佐县令奉承顷事并专知官各准从官例与赐亦与中上考卫士掌闲幕士等各赐物两段大赦天下惟谋反大逆不在赦限余并宥之河南府百姓给复一年河北遭涝及蝗?处无出今年租武德贞观以来勲臣子孙无名在位更详求其後奏闻有嘉遁幽栖养高不仕者州牧各以名荐【开元五年五月】

幸长安制

门下观俗省方所以爱人治国宗尊庙貌所以事神享亲钦若昔典此惟大义朕祇膺鸿业积念咸秦去岁欲幸洛京已发成命属重营天室因将中止诚以其绳则板功且未即展铃効驾信弗可违终肆覲於东方恒载驰於西土流暑不驻通丧永毕象居始成如在增慕朕之前志日夜匪遑故可以诗陈肃雝礼极禋祀神明之隩时惟雍州禾稼有年莫若关辅王假用吉后来其苏寔获我心俾从人欲可以今年十月取北路幸长安所司准式务在节省无得劳费主者施行【开元六年七月六日】

幸东都诏

王者观俗以赋政考祥以省方必将叶於人和而奉若天意朕祇守鸿绪用康黎庶思振德以惠物岂劳人以尊已顷年关辅之地转输寔繁重以河塞之役兵戎屡动千金有费九载未储怀此劳辛以增吁旻且夫苟利於物可随事而变通将适於人故因时以巡幸卜洛万方之隩维嵩五岳之中风雨之所交舟车之所会沟通江汉之漕控引河淇之运利俗阜财於是乎在今欲省其费务以寔关中即彼敖仓少济河邑乘岁阳之吉展游顺之仪岂惟龟筮不违固已询谋定是叶修五礼更问百年车舆动而不劳玉帛会而胥悦所谓先天以弘道因人以为利也宜以明年正月十五日幸东都【开元九年九月九日】

将离东都减降囚徒勅

献岁肇春阳和感气且是发生之日寔惟布德之辰朕将幸秦京言离洛邑既省方以观俗思弘恩以济人载念狴牢又惻襟抱宜敷寛大之恩用敦祝泣之意其都城内见禁囚徒除身犯十恶及伪造头首余杂犯死流等各减一等徒以下并放河南府遭水百姓前令量事赈济如闻未能存活春作方兴恐乏粮用宜令王怡检问不支济者更量赈给务使安存【开元十一年正月】

北巡狩制

朕爰自京洛有事省方乘兹发生之和因务豫动之庆将欲恤鰥独问耆老陈诗展礼陟幽黜明使滯伏必申微物咸遂其行幸所至处宜令刺史县令存问百年老病鰥寡惻独及行人家如有单贫不济不能存活者量加赈给其侍老仍各赐物三段见禁囚徒除十恶及身犯反逆并伪造头首以外自余杂犯流死等罪各减一等徒以下并放免百姓有贤良官人有清白并令中书门下采访名闻其贪浊之吏委御史觉察弹奏【开元十一年正月】

幸太原府赦境内制

朕恭承宝位十有余年荷累圣之昌图膺三灵之眷命日慎一日虽休勿休今问俗观风肆覲羣后陈诗纳贡亲问百年虽念劳人事资展礼太原旧国王业所兴乃睠成周西巡丰镐曰惟

嗣汉东至沛乡皆会彼旧都睠兹粉社况兴王始封之地鸿图创业之初含育生灵大造区宇永惟丕构顾慙貽厥且地称用武戎役是殷爰锡怀旧之恩以顺发生之泽其太原府境内见禁囚徒除十恶及伪造头首余并赦免预宴官共赐物二千疋父老及人吏等共赐一万疋百姓宜给复一年九等户给复三年元从家给复五年其家籍见丁终身免征役侍老八十以上赐物五段版授上县令仍赐绯妇人版授上县君九十以上赐物七段版授上州长吏仍赐绯妇人版授郡君百岁以上赐物十段版授上州刺史仍赐紫妇人授郡夫人孝子顺孙义夫节妇旌表门闾终身勿事其有流沦草泽抱德栖迟及武德功臣并旧戚子孙才堪文武未有官者并委府县搜扬具以名荐【开元十一年正月】

北路幸长安制

朕粤自酆镐省方瀍洛属九服宁谧四时顺成殊徼靡殷景福纷委遂荷灵睠登於介丘居厥成功允荅休佑盖敬天之命不敢以宁也我来於东岁亦数稔而西土耆老僊予多怨况关辅之地比则有年宜叶卜征之祥式展时巡之义可以今年闰九月十日取北路幸长安所司准式缘顿支供一事以上并用当处官物不须科歛百姓其逋运及行从官寮等务从减降所在公私不得辄有进献宣布遐迩知朕意焉【开元十五年六月】

南路幸长安制

朕君临区宇育黎猷每思勤恤不欲劳烦而镐京之地陵寢所在自展义河洛已历岁年所以式遵卜征有事时迈抑惟恒典宁敢惮劳将欲西巡元取北路今同州有暴雨浸於邑居载怀忧惕无忘监寐且从南路幸长安所司准式【开元十五年八月】

巡幸东都赐赉从官敕

出震奋豫本乎观风省方展义期於利物朕志惟忘已情期顺人爰采谣歌式事巡幸自转趾西镐即宫东周景暖风恬无凜冽之惨烟和气淑嘉晏温之色得夫军卫衆护靡有郊塞之虞岂非龟筮允臧堪献卜征之吉天人叶应僊予王城感是休和良以有慰思弘庆泽从行在所亲王赐物八十疋嗣郡王六十疋一品五十疋三品四十疋四品三十疋六品二十五疋七品二十疋八品九品十段三卫引驾细引飞骑各四段曠弩手幕士主膳供膳及诸色白身人等各三段知顿使知营幕使各六十疋知顿御史三十疋知驿御史及知顿判官知营幕官赐各加一等入仗突厥吐蕃使共赐物五百疋令鸿臚据蕃望高下节给分付供顿州百姓所据缘顿差科及充夫匠杂役供应等人宜放今年地税自余户等免今年地税之半应定名供顿县官各与一中上考【开元十九年十一月】

南路幸西京敕

敕朕所时迈皆顺物情顷属关辅无年遽尔东幸固非为已将以息人今百谷既成庶务皆省而五陵所奉诚在京师安可更留周南有阙时荐宜以来年正月七日取南路幸西京所司准

式应缘行幸所须务从减省所由明为条例勿使劳烦【开元二十三年十月】

銮驾到蜀大赦

朕以薄德嗣守神器何尝不乾乾惕厉勤念苍生至於水旱或乖则祷祠请罪边鄙微扰则斋戒思过聿来四纪人亦小康盖祖宗之灵卿大夫之助也是以推心将相不疑於物而奸臣凶党负信背恩割剥我黎元暴乱我函夏皆朕不明之过岂复尤人哉杨国忠厚斂害时已肆诸原野安禄山乱常构祸尚逋其斧钺朕用巡巴蜀训厉师徒命元子北略朔方诸王分守重镇合其兵势以定中原将荡涤烦苛大革前弊思与亿兆约法惟新上以安宗庙神祇下以宁华夷动植可大赦天下其天宝十五载八月一日昧爽以前大辟罪以下常赦所不免者咸赦除之自中兴以来有破家者一切与雪流人一切放还左降官各还旧资内外文武官节级赐阶爵安禄山胁从官有能改过自新背逆归顺并原其罪优与官赏

史思明再?洛阳巡幸东京诏

昔昆夷作患周宣兴薄伐之役陈豨称乱汉祖发亲征之师盖所以禁暴除凶取威靖难上以保宗社下以拯黎元古帝先王兹道无替顷者禄山构逆背义负恩恶既贯盈寻已殄灭而思明残寇尚敢延妖聚其蜂蛰之余邀我雷霆之伐朕以干戈屡动黎庶未安由是按兵延诛冀其来格而乃窃兵干纪自取灭亡副元帅光弼率锐徒恭行天罚爰启绛宫之略克推青犢之师曾未浹辰大破凶党此皆穹昊垂佑宗社降灵是以戎律用贞祸淫斯在如闻?艾之下蚊蚋犹虞固当乘破竹以追奔同燎原而扑灭朕为人父母深念涂炭是用大整戈矛方申吊伐抚绥河洛以致和平即以今月十七日幸东京率六军取路进发【乾元二年九月】

唐大诏令集卷七十九

卷八十

<史部,诏令奏议类,诏令之属,唐大诏令集

钦定四库全书

唐大诏令集卷八十

宋 宋敏求 编

典礼

朝贺

冬至取次日朝贺勅

五月一日御宣政殿勅

淮西用兵罢元会勅

贡献

停贡献诏

罢正至进奉诏

宴集

定州赐宗姓老人宴会

赐百官钱令逐胜宴集勅

宴朔方将士勅

宴幽州老人勅

平淮西後宴赏诸军将士放归本道诏以水灾罢九日宴会勅

养老

赐孝义高年粟帛诏

老人赐杖几鸠杖勅

记节

停诸节进献诏

以二月一日为中和节勅

令诞日外命妇贺皇太后勅

许庆成节宴会陈脯醢勅

弋猎

放團兵勅

酬赏凤泉汤知顿官及百姓勅

禁弋猎勅

丧制

听卫士终制三年勅

不许临丧嫁娶及上墓作乐诏

戒厚葬诏

禁丧葬踰礼制

诫厚葬勅

条流葬祭勅

朝贺

冬至取次日朝贺勅

王者父事天母事地所以昭孝敬之道彰神祇之德朕奉明命徧稽大猷实在缘情不惟相袭伏以昊天上帝义在尊严恭惟祀典每用冬至既於是日有事圜丘更受朝贺实深兢惕自今以後冬至宜可取以次日受朝仍永为恒式【天宝三年十一月】

五月一日御宣政殿勅

仲夏之时阳德方茂陰事始承圣贤因天地交会之时为父子咸覲之礼既行亲戚岂隔君臣自我为初申恩卿士起今年五月朔御宣政殿召见文武百官九品以上外官因朝奏在京咸听就列仍编入式以为恒典【贞元十年四月】

淮西用兵罢元会勅

勅淮蔡未宾师人暴露而三朝之会万国来庭举觴称庆有怀愧惕其来年正月朝贺宜权停诸军优赐并准例处分【元和十年十二月】

贡献

停贡献诏

逸游损德昔贤贻训玩物丧志前典格言西旅献獒召公於是作诫东齐馈乐尼父所以离心隋末道丧肆极奢靡内骋倡优之乐外崇耳目之娱冠盖相望徵求不息公私扰据徭费无穷朕受命君临志在俭约日旰忘食昧爽求衣纂组珠玑皆云屏退雕琢绮丽久从抑止其侏儒短节小马庠牛异兽奇禽皆非实用诸有此献悉宜停断宣布遐迩咸使闻知【武德元年十月】

罢正至进奉勅

勅伐叛兴师久劳於外馈军给费因以为烦献贺之仪谅非朕志务从简约式业永表忧勤其今年冬至及来年元日诸司诸道进奉宜停【元和十二年】

宴集

定州赐宗姓老人宴会勅

皇太子爱敬所覃格於四海仁孝所感周於百姓自春监国既处定州首创风规在乎兹境所以事亲敬养之道有隐无改之情爰自中山流乎率土地居宣化之本人稟纯孝之深有足可嘉特须优异其定州管内孝行着闻者宜与宗姓老人同赐宴会【贞观十九年十一月】

赐百官钱令逐胜宴集勅

百灵降福庶尹叶心陰阳调而生植以滋政理孚而黎献咸若由庚知万物之乐华黍洽三农之庆信可以率礼辅仁式歌且舞者矣况生成式序氤氲致和卉物发荣池籞含丽思顺时令以申宪泽咸宜邀欢芳月继赏前春夙夜在公既同咸一之理休沐式宴俾共昇平之乐中书门下及供奉官嗣王郡王左右丞相少传宾客诸司三品以上长官侍郎少卿少匠司业少尹两县令都水使朝集使上佐以上并新除未赴任者及东宫诸司长官中舍中允少詹事谕德中郎率府蕃官三品以上至春末以来每至假日宜准去年正月二十九日勅赐钱造食任逐胜赏【开元十九年二月】

宴朔方将士勅

勅朔方军节度大使兵部尚书信安郡王祿平戎朔陞经略万里赋车籍马精卒銳兵自其有虞莫不素练而丑虏背诞偏师致诛谋若有神取如俯拾虽庙略之云远亦将士之力焉威武载扬顽凶且慑狂寇覆巢以奔北羣帅掉鞅而来归因其凯旋聊加宴乐各宜坐食相与尽欢其军将以下官赏别有处分信安郡王祿与一子官

宴幽州老人勅

勅幽州老人师知礼等比者林胡翻覆荐岁不宁戎马之乡良甚艰苦而贼虏自叛天寔诱之主将致诛略无遗噍寔除边患且减征徭卿等忠义因心远来陈贺深所嘉尚并宜坐食各有赐物食讫领取

平淮西後宴赏诸军将士放归本道诏

?朕纂奉丕业托於人上仁不破物义不胜奸颂声蔑闻暴乱连起叛臣希烈窃据淮沂诚哉彼夫无良亦由朕之不德抚馭之道失之於初师旅一兴绵聯莫解服劳者从役不暇受污者无路自新旱蝗相乘谷朶翔贵兵氓餒死十室九空通邑化为丘墟遗骸遍於原野每念於此心伤涕流且自昔劳师靡有不悔以虞舜之圣屈於苗人以汉武之强弊於戎虏矧乎德犹不逮力或未全我其永怀亦已自警乃者下哀痛之诏布寬大之恩普天载新殊死毕宥然尚劳师旅作扞封陲有累岁弃离室家有经时不解甲冑忠虽为国咎实在予军人若斯宁不知愧赖节将士旅咸奋扬武力慎固疆宇远人思服元恶就诛蒸黎方致於安宁役戍永期於休息懋官以旌美锡宴以劳旋赏不踰时式遵彝典都统检校司空同平章事刘玄佐宜与子孙一人五品正员官节度使检校右仆射李澄检校兵部尚书曲环检校户部尚书李臯兼御史大夫樊泽等并与子孙一人七品正员官都防御使工部尚书贾耽都团练使检校左散骑常侍卢玄卿兼御史大夫张建封等并与子孙一人八品正员官检校司空平章事李抱真检校司空平章事李纳检校左仆射平章事韩滉检校工部尚书田绪咸遣士旅远赴行营同讨不庭厥有成绩抱真纳滉与子孙一人八品正员官应与淮西接界州县本军镇守及诸道赴行营将士等宜共赐三十万端足充赏设度支即约据界首及行营军额分配定数支送仍委本道

条録功第名銜闻奏并与甄叙其行营将士仍各放归本道明加宣谕令悉朕怀

以水灾罢九日宴会勅

属者春秋令节朝野多欢乃与公族庶僚同兹宴赏今两河吴楚连被水灾悼于厥心实未宁息尚軫忧念岂遑愉乐其九日宴会宜罢【正元八月八月】

养老

赐孝义高年粟帛诏

百行之本要道维先一言终身恕而已矣春生夏长寛裕之令行焉齐礼道德耻格之义斯在朕爰自幼年夙稟庭训岂徒学闻诗礼因令匡定家国是以提三尺之剑起一旅之师殲鲸鯢於原野救蒸人於涂炭云雷締构备尝夷险仁发於心义形於色大敌必勇匪为身谋大憝必诛志安天下太上皇留情姑射尚想轩轅驻蹕大安使朕正居紫极顾惟虚薄辞不获免祇奉制诰负扆当朝乃睠宫宇载怀冰谷未明求衣乙夜忘寢思齐七政言念九功何以答上玄之心称严君之志庶欲勤恤典刑举直措枉允厘臣工任贤用能拯济困穷抑损浇伪开直言之路广不讳之门闻所未闻日慎一日望人皆见德变於至道若一物失所一人有恶则朕躬之责训道不笃朕闻书曰至誠动神况於兆庶乎比闻远近黔黎耻为盗贼州县囹圄多并空虚岂由德教至此自是人知厌乱因其迁善可以化之朕往因征伐行天下多矣每见村落丘墟未尝不抚膺叹息自登九五不许横役一人惟冀遐迩休息得相存养长幼有序敬让兴行其孝义之家赐粟五石高年八十以上赐粟二石九十以上三石百岁加绢二疋妇人正月以来生男粟一石鰥寡惻独不能自存逃户初还郊无粮贮州县长官量加赈恤诸州官吏或正直廉平刑清讼息或贪婪货贿害政损人宜令都督刺史以名封进白屋之内閭閻之人但有文武材能灼然可取或言行忠谨堪理时务或在昏乱而肆情遇太平而克已亦録名状与官人同申泣辜慎罚前王所重枉系一日直等三秋州县法司特宜存恤布告天下知朕意焉【贞观三年四月】

老人赐几杖鸠杖勅

古之为政先於尚老居则致养礼传三代行则就见制问百年盖皇王之劝人教黎庶之为子朕寅奉休历祇膺圣训因秋归而岁成属星见而郊祀念其将智尤重乞言俾申恩於几杖其布惠於乡国九十以上宜赐几杖八十以上宜赐鸠杖所司准式天下诸州侍老宜令州县逐稳便设酒食一准京城赐几杖其妇人则送几杖於其家

纪节

停诸节进献诏

朕抚育黎庶思求政道欲俭以训俗礼以移风菲食卑宫几庶前轨比至五月五日及寒食等诸节日并有欢庆事诸王妃主及诸亲等营造衣物雕镂鸡子竞作奇巧以将进献巧丽过度靡费极多皆由不识朕心遂至於此又贞观年中已有约束自今以去并宜停断所司明加禁察随事糾正【显庆二年四月】

二月一日为中和节勅

四序嘉辰历代增置汉崇上巳晋纪重阳咸说禳除虽因旧俗与衆共乐诚洽当时朕以春方发生候及仲月勾萌毕達天地和同俾其昭苏宜助畅茂自今宜以二月一日为中和节以代正月晦日备三令节之数内外官司休假一日【贞元五年正月】

令诞日外命妇贺皇太后勅

昔者圣王之以孝理天下也广爱敬之心推於四海尽奉养之志示於兆人然後自诚之化有情斯感朕以眇身祇荷鸿业皇太后就安长乐朝夕承顏慈训所加庆感兼极伏以今月六日是载诞之辰奉迎皇太后宫中上壽朕获申欢慰亦欲公卿大夫同之宜以今月六日平明於光顺门集百寮及命妇进名贺皇太后御光顺门内殿与百寮相见永为常式【贞元十五年七月】

许庆成节宴会陈脯醢勅

庆成节朕之生辰天下锡宴庶同欢泰不欲屠宰用表好生非是信尚空门将希无妄之福恐中外臣庶不谕朕怀广置斋筵大集僧衆非独凋耗物力兼恐致惑生灵自今宴会蔬食任陈脯醢永为常例咸使闻知【开成二年八月】

弋猎

放围兵勅

昔周有岐阳之蒐汉有扶风之命讲师习武夸胜耀威故王者狩必以时招虞人以礼时则远矣朕自只膺图籙於兹四年每巡狩郊畿不出百里且爱力而节用非盘游而好乐今者四方无事百谷有成因孟冬之月临右辅之地戒兹五校爰备三駟谓获多庶存除害一昨长围已合大綏未举而夜闻朔风天降微雪狐裘且御未免祁寒鹑衣不充宁堪冻露朕更截狡兽要轻禽以此游娱孰云矜恤况为之父母育彼黎元中宵耿然明发增惕其围兵并宜放散各赐布一端绵一屯【开元三年十月】

酬赏凤泉汤知顿官及百姓?

?清人赋田以备蒐狩之仪王者顺时式崇豫游之礼顷者筑场初毕清道来巡经上林之苑圉

指扶风之藪泽虽猎将提鼓虞人植旗仍悯祁寒之节不行肃杀之令岂唯虞舜之典咸秩山川所冀周文之风及於鸟兽由是罢还士卒非重盘游眷彼吏民致有烦扰所谓行者幸也後來其苏宜申恩惠用符古昔其所经州县供顿官及百姓并造凤泉汤屋宇使及夫匠并置营幕桥道使宜令所司勘会奏闻其缘御路及顿场麦苗有损者亦令勘责量事酬补【开元三年十月二十六日】

禁弋猎勅

春夏之交稼穡方?永念东作其勤如伤况时属阳和令禁麋卵所以保兹怀生下遂物性如闻京畿之内及关辅近地或有豪家时务弋猎放纵鹰犬颇伤田苗宜令长吏常切禁察有敢违令者捕系以闻【太和四年三月】

丧制

听卫士终制三年勅

通丧下達圣?貽训纬俗经邦咸率至道至於嬰蓼莪之巨痛怀顾复之深慈得自天经含生罔极者也爰自周衰七雄交争逮乎汉末三方竞峙金革亟动钲鼓日闻先王典章扫地将尽遂令三边武猛墨經而扈戎麾七萃骁雄素冠而事巡警亦有内无继体傍阙同气几筵安寄奠酌不亲乃睠於斯再深惊叹膺兹景业君临九野中区富教化俗承规宜有解张兹励风俗卫士掌闲幕士等遭丧合期年上者宜听终制三年【永徽元年五月】

不许临丧嫁娶及上墓欢乐诏

如闻父母初亡临丧嫁娶积习日久遂以为恒亦有送葬之时共为燕饮通相酌劝酣醉始归或寒食上墓复为欢乐坐对松檟曾无戚容既点风猷并宜禁断仍令州县捉搦勿使更然【龙朔二年三月】

戒厚葬诏

朕闻死者终也欲物之反於真也葬者藏也欲人之不得见也上古垂风未闻於封树後圣貽范始备於棺槨讥僭侈者非爱其厚费美俭薄者实贵於无危是以唐尧圣帝也谷林有通树之说秦穆明君也橐泉无丘壠之处仲尼孝子也防墓不坟延陵慈父也嬴博可隐泊乎闾閭违礼珠玉为鳧雁始皇无度水银作江海因多藏以速祸由有利以招辱朕居四海之尊承百王之弊未明求衣中宵载惕虽送往之典详诸议制失礼之禁着在刑书而勲戚之家多流遁於习俗閭閻之内或侈靡而伤风以厚葬为奉终高坟为行孝遂使衣衾棺槨极雕刻之华刍灵明器穷金玉之费富者越法度以相高贫者破资产以不逮徒伤教义无益泉壤为害既深宜有惩革其公卿以下爰及黎庶送终之具有乖令式者明加檢察随状科罪在京五品以上及勲戚之家録状闻奏【贞观十七年三月】

禁喪踰禮制

喪葬禮義蓋惟恒式如致乖越深蠹公私乃有富族豪家競相踰濫窮奢極侈不遵典法至於送終之具着在條令明器之徒皆有色數遂敢妄施隊伍假設幡稍兼復創造園宅雕剪花樹或桐????木馬功用尤多或告舉凶彩飾殊貴諸如此類不可勝言貴賤既無等差資產為其損耗既失為靈之義殊乖朴素之儀此等犯違先已禁斷州牧縣宰不能存心御史金吾曾無糾察積習成俗頗紊彝章即宜各令所司重更申明處分自今以後勿使更然【證聖元年三月】

減厚葬勅

自古帝王皆以厚葬為戒以其無益於亡者有損於生業故也近代以來共行奢靡迭相倣仿浸成風俗罄竭家產多至凋弊然則魂魄歸天明精識之已遠卜宅於地蓋思慕之所存古者不封未為非達且墓為真宅自有便房今乃別造田園名為下帳又明器等物皆競驕侈失禮違令殊非所宜戮屍暴骸寔由於此承前雖有約束所司曾不申明喪葬之家無所依准宜令所司據品命高下明為節制明器等物仍定色數長短大小園宅衣帳并宜禁絕坟墓營域務遵簡儉凡諸送終之具并不得以金銀為飾如有違犯者先決杖一百州縣長官不能舉察并貶授遠官【開元二年八月】

條疏葬祭勅

葬祭之儀古有彝範頃來或踰法度侈費尤多自今以後宜儉約悉依令不得於街衢致祭及假造花果禽獸并金銀平脫寶鈿等物并宜禁斷【大曆七年三月】

唐大詔令集卷八十

卷八十一

钦定四库全书

唐大诏令集卷八十一

宋 宋敏求 编

政事

礼乐

太常乐人蠲除一同民例诏

颁行唐礼及郊庙新乐诏

用庆善曲破阵乐诏

诏习礼乐诏

禁断女乐？

内出云韶舞？

雅乐名大唐乐制

经史

命萧瑀等修六代史诏

修晋史诏

简择史官诏

令诸儒质定古文孝经尚书诏

行何郑所注书勅

改尚书洪范无颇为陂勅

錄开元以来名臣事迹付史馆勅

条贯起居注勅

礼乐

太常乐人蠲除一同民例诏

太常乐人今因罪謫入营署习艺伶官前代以来转相承袭或有衣冠彻诸公卿子孙一沾此色後世不改婚姻絕於士类名籍异於编氓大耻深疵良可哀愍朕君临区宇思从寬惠永言沦滞义存刷荡其大乐鼓吹诸旧人年月已久世代迁易宜得蠲除一同民例但音律之伎积学所成传授之人不可顿阙仍依旧本司上下若已仕官见入班流勿更追呼各从品秩自武德元年以来配充乐户者不在此例【武德二年八月】

颁行唐礼及郊庙新乐诏

先王之辨方正位体国经野象天地以制法通神明以施化乐由内作礼自外成可以安上治民可以移风易俗揖让而天下治者其惟礼乐乎固以同和无体非饰玉帛之容岂崇钟鼓之奏日来月往朴散淳漓淫慝迭兴流而忘本鲁昭所习唯在折旋魏文所重止於郑卫秦氏纵暴载籍咸亡汉朝修缉典章不备时更战国多所未遑雅道沦丧历兹永久朕恭承明命嗣膺玉历惧深馭朽情切纳隍凭宗庙之灵资股肱之力上下交泰遐迩义安率土陆危既拯之於涂炭羣生遂性复纳之於轨物兴言政本载惕於怀盖知礼乐之情者能作识礼乐之文者能述作者之谓圣述者之谓明朕虽德谢前王而情深好古伤大道之既隐惧斯文之将坠故广命贤才旁求遗逸探六经之奥旨采三代之英华古典之废於今者咸择善而修复郑声之乱於雅者并随违而矫正莫不本乎人心稽之物理正情性而节事宜穷高深而归简易用之邦国彝伦以之攸叙施之律吕金石於是克谐今修撰既毕可颁行天下俾富教之方洵符先圣人伦之化貽厥後昆【贞观十一年四月】

用庆善曲破阵乐诏

国家平定天下革命创制纪功旌德久被乐章今郊祀四悬犹用干戚之舞先朝作乐韞而未申其郊庙享宴等宫悬文舞宜用功成庆善之乐皆着履执拂依旧服袴褶童子冠其武舞宜用神功破阵之乐皆被甲持戟其执纛之人亦着金甲仍量加箫笛歌鼓等於悬南列坐与宫悬合奏【麟德二年十月】

诏习礼乐诏

礼乐之用其来尚矣朕诞膺明命克光丕历思隆颂声以康至道而曲台阐训犹乖揖让之容大乐登歌徒纪铿锵之韵良以教亏绵蕞学阙瞽宗兴言盛业寤叹曷已然则幽诚所着纵九皋而必闻忠信且存在十室而无弃但虑习俎之彦隐迹於闾阎办铎之英韬声於林藪夫良玉无趾求之斯来真龙难覩好之而至其四方士庶及丘园栖隐有能明习礼经详音律於行无违在艺可録者并宜州县搜扬博访具以名闻

禁断女乐勅

朕闻乐者起於心心者动於物物不正不可为乐乐不正则不能理人况天生黎蒸区别男女外则不能导之以礼中则不能由之以乐苟或不臧孰云致理自有隋颓靡庶政雕缺徵声遍於郑卫街色靡於燕赵广场角抵长袖风飘聚而观之浸而为俗所以戎王夺志夫子遂行也朕方大变浇讹用清淄蠹睠兹女乐事切骄淫伤风害政莫斯为甚既违令式尤宜禁断自今以後不得更然仍令御史金吾严加捉搦如有犯者先罪长官务令杜絶以称朕意【开元二年八月七日】

内出云韶舞勅

朕闻舞者所以节八音而行八风岂徒夸诩时代眩耀耳目而已也自立云韶内府百有余年都不出於九重今欲陈於百姓冀与公卿同乐岂独娱於一身且珠翠绮罗孰非珍玩常念百金之费每惜十家之产是以所服之服俱非罗绮所冠之冠亦非珠翠至若弋绋之制大帛之衣德虽谢於古人俭不慚於曩庶羣公等观此当体朕之不奢【开元十二年正月】

雅乐名大唐乐制

王者作乐古之大猷盖以殷荐上帝严配祖考况顺天地之体开山川之风发挥雅音道達和气揖让而理不其盛欤自战国以来此道隳坏但纪铿锵之节宁探述作之深历代因循莫之改革朕尝以听政之暇緬寻前典虽旧制之空存而正声之多缺将何以列彼祠祀感於灵神斯事体大谅资合度是用躬亲有以裁校定六律而为本避五行之相克哀慢淫过去其弊也清浊刚柔适其中也亦既协应颇为成文或得之於自然乃不知其本然岂上玄幽赞俾正缺遗者哉方於六代之作亦各一时之义也乃命奉常陈於祀事用昭诚敬且敦风俗而王公卿士爰及有司频诣阙上言请以唐乐名斯至公事朕安得而辞焉然则大成大韶大濩大夏皆以大字表其乐章今之所请宜曰大唐乐【开元二十九年六月】

经史

命萧瑀等修六代史诏

经典序言史官纪事考论得失究尽变通所以裁成义类惩恶劝善多识前古貽鉴将来伏羲以降周秦斯及两汉传绪三国并命迄于晋宋载籍备焉自有魏南徙上乘机运周隋禅代历

世相仍梁氏称邦跨据淮海齐迁龟鼎陈建宗祊莫不自命正朔绵历岁祀各殊徽号删定礼仪至於发迹开基受终告代嘉谋善政名臣奇士立言着绩无乏於时然而简牘未修纪傳咸缺炎凉已积謠俗还讹余烈遗风泯焉将坠朕握图驭宇长世字民方立典谟永垂宪则顾彼湮落用深叹悼有怀撰錄实资良直中书令萧瑀给事中王敬业着作郎殷闻礼可修魏史侍中陈叔達秘书丞令狐德棻太史令唐俭可修周史兼中书令封德彝中书舍人顏师古可修隋史大理卿崔善为中书舍人孔绍安太子洗马萧德言可修梁史太子詹事裴矩兼吏部郎中祖孝孙前秘书监魏徵可修齐史秘书丞窦璡给事中欧阳询秦王文学姚思廉可修陈史务加核详博采旧闻义在不刊书法无隐【武德五年十二月】

修晋书诏

朕拯溺师旅省方礼毕四海无事百揆多闲遂因暇日详观典府考龟文於羲载辨鸟册於轩年不出岩廊神交千祀之外穆然旒纁临睨九皇之表是知右史序言斯不爽昧左官詮事历兹绵远发挥文字之本通達书契之源大矣哉盖史籍之为用也自沮诵摄官之後伯阳载笔之前代列史臣皆有删着仲尼修而采擣机倚相诵而阐丘坟降自西京班马腾其茂寔逮於东汉范谢振其芳声曩尔当涂陈壽核其国志眇哉刘宋沈约裁其帝籍至梁陈高氏朕命勒成惟周及隋亦同甄錄莫不彰善瘅恶激一代之清芬褒吉惩凶备百王之令典唯晋氏膺运制有中原上帝启玄石之图下武代黄星之德及中朝鼎革江左嗣兴并宅寰区式重徽号足以飞英丽笔将美册书但十有八家虽存记注而才非良史事亏寔录绪烦而寡要思劳而少功叔宁课虚滋味同於画饼子云学海涓滴湮於涸流处叔不然於中兴法盛莫通於创业洎乎干陆曹邓略记帝王鸾盛广松才编载记其文既野其事罕传遂使典午清高韬遗芳於简册金行曩志缺继美於骊驪遐想寂寥深为叹息宜令修国史所更撰晋书銓次旧闻裁成义类俾夫湮洛之诰咸使发明其所须可依修五代史故事若少学士亦量事追取【贞观二十年闰二月】

简择史官诏

修撰国史义在典寔自非操履贞白业量该通说正有闻方堪此任所以承前纵居史官必就中简择灼然为衆所推者方令着述如闻近日以来但居此职即知修撰非唯编辑疎舛亦恐漏泄史事自今以後宜遣史司於史官内简择堪任修史人录名进内自余虽居史职不得辄令闻见所修史籍及未行用国史等事【总章三年十月】

令诸儒质定古文孝经尚书诏

孝经尚书有古文本孔郑注其中指趣颇多踳駁精义妙理若无所归作业用心复何所适宜令诸儒并访後进達解者质定奏闻【开元七年三月】

行何郑所注书勅

朕以全经道丧大义久乖淳感之性浸微流通之源未息是用旁求废简远追缺文欲使发挥异说同归要道永惟一致之用以开百行之端间者诸儒所传颇乖通议敦孔学者冀郑门之息灭尚今文者指古传为诬伪岂朝廷并列书府以广儒术之心乎况孔郑大宗固多殊趣诸生会议曾无所申而推求小疵其细已甚聚讼之训人无则焉其何郑二家可令仍旧行用王孔所注传习者希宜布继絶之典颇加獎饰子夏传逸篇既广前令帖易者停【开元七年五月】

改尚书洪范无颇为陂勅 孙逖

勅典谟既作虽曰不刊文字或讹岂必相袭朕聽政之暇乙夜观书匪徒閱於微言实暢於精理每读尚书洪范至无偏无颇遵王之义三复兹句常有所疑据其下文并皆协韵唯颇一字寔则不伦又周易泰卦中无平不陂释文云陂有颇音陂之与颇训诂无别为陂则文亦会意为颇则声不成文应由煨烬之余编简墮缺传授之际差别相沿原始要终须有刊革朕虽先觉兼访诸儒僉以为然终非独断其尚书洪范无偏无颇字宜改为陂庶使先儒之义去彼膏盲後学之徒正其鱼鲁仍令宣示国学

錄开元以来名臣事迹付史馆勅

勅朕君临万邦多历年所於今行事动必见书循以旧章传诸寔录岂朕之独理所赖良臣或谋猷以济其事或规讽以成其道开元以来勲庸德业咸宜备叙其身已没者宜令子孙具录事迹送史馆【开元二十五年五月】

条贯起居注勅

记事记言史官是职昭垂法诫着在旧章举而必书朕所深望自今以後每坐日宰臣及诸司对後如是可备劝诫合在纪述者委承旨宰相宣示左右起居綴錄仍准旧例每季送史馆【元和十二年九月】

唐大诏令集卷八十一

卷八十二

钦定四库全书

唐大诏令集卷八十二

宋 宋敏求 编

政事

刑法

颁新律令诏

紕劾违律行事诏

颁行新律诏

法司及别敕推事并依律文诏

恤刑诏

颁行新令制

申理冤屈制

颁行律令格式制

减大理丞废秋官狱敕

申冤制

诉事人先经州县敕

减抵罪人决杖法诏

令宰臣与法官详死刑敕

寬徒刑配諸軍効力勅

頒行新定律令格式勅

罪至死者勿決先杖勅

刪定制勅

禁罪人鞭背勅

頒歷

頒行麟德歷詔

更改閏月制

刑法

頒新律令詔

古不云乎萬邦之君有典有則辨方正位體國經野故九疇之叙興於夏世兩觀之法大備隆周所以禁暴懲奸宏風闡化安民立政莫此為先自戰國紛擾恃詐任力苛制煩刑因茲競起秦并天下隳滅禮教恣行酷烈害虐蒸民宇內騷然遂以顛覆漢氏撥亂思易前軌雖務從約法蠲削嚴科尚行菹醢之誅猶設錙銖之禁字民之道寔有未宏刑措之風以茲莫致爰及魏晉流弊相沿寬猛乖方綱維失序下?上替政散民凋皆由法令混訛條章錯謬自斯以後宇縣瓜分戎馬交馳未遑典制有隋之世雖云厘革然而損益不定疎舛尚多品式章程罕能甄備加以微文曲致覽者惑其深淺異例同科用者殊其輕重遂使奸吏巧詆任情與奪愚民妄觸動?羅網屢聞厘革卒以無成朕膺期受籙寧濟區宇永言至治興寐為勞補千年之墜典拯百王之余弊思所以正本澄源式清流末永垂憲則貽範後昆爰命羣才修定科律但今古異務文質不同喪亂之後事殊曩代因機適變救弊斯在是以斟酌繁省取合時宜矯正差遺務從體要迄茲歷稔撰次始畢宜下四方即令頒行庶使分曹簡肅無取懸石之多奏獻平允靡競錐刀之末勝殘去殺此為非遠其修撰之人宜加官賞【武德七年四月】

糾劾違律行事詔

朕恭膺寶命撫臨率土永鑒前王憲章典故雖文質遞變沿革不同而發號施令殊塗一揆皆所以成當世之典謨開生民之耳目納之軌度令行禁止自律令班下積有歲時內外羣官多不尋究所行之事動乖文旨此乃臣有所隱民不見德與不令而誅何以異也斯豈守道履正徇公奉法者乎自今以後官人行事與律乖違者仰所司糾劾具以名聞【貞觀元年八月】

颁行新律诏

象服画冠化隆上乘道德齐礼刑清中代暨乎大道既隐淳风已衰桁杨所以实烦手足为之无措自斯以降禁网愈密太宗文皇帝拨乱反正恤狱慎刑杜浇弊之大源削烦苛之峻法道臻刑措二十三年玉几遗训皇令刊改朕仰遵先旨旁求故实乃制太尉扬州都督无忌开府仪同三司积尚书左仆射行成光禄大夫侍中高季辅右丞段宝玄太常少卿令狐德棻吏部侍郎高敬言刑部郎中贾名行等爰逮朝贤详定法律酌前王之令典考列辟之旧章适其轻重之宜采其宽猛之要使夫画一之制简而易从约法之章疎而不漏再移期月方始勒成宜颁下普天垂之来叶设而不犯均被上皇凡在羣臣逮於列岳其务在审慎称朕意焉【永徽二年九月】

法司及别勅推事并依律文诏

朕闻大小之情义重前诰哀矜勿喜道光遐册朕恭膺宝业嗣临亿兆留心听断劬劳日积一物乖方纳隍軫虑今既科格咸备宪制久行讯鞫之法律条具载深文之吏犹乖遵奉肆行惨虐曾靡仁心在含气之伦稟柔脆之质乃有悬枷着树经日不脱身被五木连宵忍冻动转有碍食饮乖节残酷之事非复一途楚痛切心何求不得念及於此深以矜怀又投匿名书国有常禁凡厥寮庶咸应具悉近遂有人向朝堂之侧投书於地隐其姓名诬人之罪朕察其所陈皆极虚妄此风若扇为蠹方深自今以後内外法司及别勅推事并依律文勿更别为酷法其匿名书并宜准律处分庶使泣辜之事远覃於四海恤刑之旨长垂於万年【永徽六年十一月】

恤刑诏

哀矜折狱义光吕训明慎用刑事昭姬象朕以寡昧嗣登宸极思阐大猷式隆景运蹈冰弥惧属想於寰中馭朽弥竞驰襟於裕下虚已待物每从宽政如闻率土州县留狱尚繁困於囚系致於病死一岁之中数盈二百盖由上乏亨育之化下乖尧舜之心深责在躬兴言多愧抑又闻之共成我理天下者其惟良二千石今之所任或亏政道未详钦恤之旨苟徇苛刻之情幽繫困滞证逮遐广寒暑相袭风露交侵淹乎年岁成其疾苦加以杖笞失度桎梏违方巧诋深文生全安在狱市之寄何其爽与自兹以後宜革前弊罪无大小不得稽留其囚疾患及轻罪并笞杖等虽法有恒规恐典吏妄生威福官人不存检校或顔面嘱请触类以之若仍旧不悛当加重罪布告天下知朕意焉【龙朔二年八月】

颁行新令制

门下盖大帝临下覆帔之德彰焉圣人在上财成之迹着焉然则统天理运微政令不能通其道经国训人非涣汗无以宣其化故羲爻演繇后以施命诰四方虞典记言帝乃敷文被九域岂惟遁人振铎理存乎阐教象阙悬书义在於垂法虽时分步骤必循先甲之规代变骊駟无革违名之轨既而淳源已往浇风渐扇奸宄於是萌生譎诈以之颺起相彼羣俗颇乖於信义

顾兹庶尹罕嗣於忠勤尺一交驰徒有书亭之弊五条间出犹招挂壁之讥非所谓光阐帝图作为人极者也由此緑绋爰降尤慎於繁冗黄素所施弥崇於喻晓皇家创业抑扬前古粤在贞观大启宪章浹声教於幽潜烛文明於区宇鸿池衍诰统理详密螭钮腾文规模宏远固以贻厥将来悬诸日月朕祇肃鸿业恭临宝位握千载之祯符承百王之末绪凝神闲馆托轩梦以忧人采诵康衢用尧心而拯物然以万机事广恐听览之或遗四海务殷虑缉采之多厌南宫故事综覆已殫内史旧章搜罗殆尽自御宸扆每怀永谷身虽处於岩廊情寔系於亿兆比者在外州府敷陈表疏示下诸司亦多奏请朕以为帝命多绪范围之旨宏王言如丝弥纶之道洽前後处分因事立文岁序既淹条流遂积览之者滋惑行之者愈怠但政贵有恒词务体要道广则难备事简则易从故自永徽以来诏勅俱令沙汰详稽得失甄别异同原始要终捐华摭实其有在俗非便事纵省而悉除於时适宜文虽繁而必録援义删定以类区分上禀先规下齐庶政导生灵之耳目辟风化之声牖俾夫施之万祀周知训夏之方布之八埏共识司南之路仍令所司编次具为卷帙施行此外并停自今以後诸有表奏事非要切并准勅令各申所司可颁示普天使知朕意【仪凤元年十二月五日】

申理冤屈制

门下大帝降览无幽不烛下人上诉在屈必申将使处岩廊者户牖絶千里之遥御亿兆者闾庭无九重之隔故尧推心以抚俗业济天下汤克己以察冤惠孚海内朕祇膺历嗣寅奉璇图常居安以戒危每在得而思失虑一夫之弗获忧万方之罪已为承平既久区?至广州邑相望衆庶殷阜事繁则诈起法弊则奸生念兹冤滞载怀悱惻是以频发诏书庶几息讼比命申理未副朕怀百姓虽事披论官司不能正断及於三司陈诉不为究寻向省告言又却付州县至财物相侵婚田交争或为判官受嘱有理者不申或以按主取钱合得者被夺或积嫌累载横诬非罪或肆忿一朝枉加杀害或频经行阵竟无优赏或不当矢石便获勲庸改换文簿更相替夺或於所部凭情织作少付丝麻多收绢布或营造器物耕事田畴即役履功雇无半直又境内市买无所畏惮虚立贱价抑取贵物寔食贪利以侵人乃据详估以放罪或进退丁户等色多有请托或解补省佐之流专纳贿赂或徵科赋差点兵防无钱则贫弱先充行货则富强获免亦有乡邑豪族容其造请或酒食交往或妻子去还假托威恩公行侵暴凡如此事固非一绪经历台省往来州县动淹年岁曾无与夺欲使元元何所控告见在京师讼人宜令朝散大夫守御史中丞崔謐朝散大夫守给事中刘景先朝请郎守中书舍人裴敬彝等於南衙门下外省共理冤屈所有诉讼随状为勘其当理者速即奏闻无理者示语发遣其有虚相构架浪扰官司若经处分諠诉不絶者宜即科决使知惩劝仍限今年十二月内使了其在外州县所有诉说冤滞文案见未断絶者并令当处速为尽理勘断务使甘伏勿使淹滞若处断不平所司糾察得寔者所由官人随即纠付可布告遐迩使知朕意【仪凤二年十一月十三日】

颁律令格式制

门下朕闻唐虞膺籙画象而人知禁夏商御图设刑而罪不息周秦以降沿革罕同汉魏而还条流浸广虽或轻或重一弛一张义在於训人事期於肃物然则刑辟勿用见称於昔典法令滋章贻讥於前哲朕情在爱育志切哀矜踈网恢恢寔素怀之所尚苛政察察良夙心之所鄙

方冀化致无为业先刑措近见所司进律令格式一一自观至於经邦成务之规训俗惩违之范万目咸举一事无遗但能奉以周旋守而勿失自可悬诸日月播之黎庶何事不理何化不成先圣忧勤万务遗念庶绩或虑须有弛张所以泛令删定今既纲维备举法制宏通理在不刊义归无改岂可更有异同别加撰削必年月久远於时用不便当广延羣议与公卿等谋之今未有疑无容措笔其先定律令格式之本宜早宣布凡厥在职务须遵奉辄造异端妄踰轨躅者咸禁除之庶用刑符於画一守法在於无二内外寮案知朕意焉【文明元年四月二十六日】

减大理丞废秋官狱勅

鸾台崇德简刑列辟之彝范并官省事有国之良图圣人执契以乘时道苞乾大善政改弦而驭俗义叶鼎新朕处荷先基恭临下土运一心之浅虑忧四海之羣生驭朽载兢践水惟惕幸赖九玄垂佑七庙宣灵天地以清风雨咸若菽粟登稔疆徼无虞茂祉日繁休祲岁集答昊穹之睠命顺亿兆之识知苍璧灵坛展严禋於上帝黄金秘牒追显号於前王大典聿申鸿符允畅斯寔祖宗之遐庆函夏之多福岂朕虚薄能臻此乎但万岁初元肇开昌历九章恒宪甫释严科远近无縲紲之冤老幼有歌谣之乐人皆迁善政在惟新丹笔刑官已絶理梧之听黄沙狱户将为鞠草之场而法禁之曹寮寮斯衆司刑一局便有八丞既罕囚徒静无推案岂烦多士虚习夏书宜减二员俾从他职文昌国府建礼天闱庶政是归具寮攸仰谅青缣之美地非頽服之攸居虽复时有申谏颇须听断两造之文必具五词之理易穷诘狴牢方甄枉直仙台置狱甚为非宜今欲总撤踈罗宁可别施圜圉其秋官狱即宜除毁朕既深居秘宇不能遍览绵区唯仗时贤共康天下州牧县宰寄重亲人僚守勾曹任惟纲纪百姓或有所犯必须尽理推寻审知罪状分明方可禁身科断不得才闻小过遽繫圜扉高下其心同叔鱼之鬻狱轻重其手爽定国之平刑黠吏崇奸恣其乾没要囚多滞积以炎凉有一於兹当加贬譴幸悉心而慎罚同底绩以胜残仁宏勿辟之规用阐无为之化将使三千之罪永絶於当年岂惟数百之刑仅寛於昔代布告天下识朕意焉【登封元年十月十一日】

申冤制

门下九重深邃非访问之可闻万邦遐旷因表疏而方達朕尊居黄屋心念苍生微物不安每切纳隍之虑一人失业更萦宵旰之怀思欲下情上通无令拥隔所以明四聪者也其官人百姓等有冤滞未申或狱讼失职或贤才不举或进献谋猷如此之流任其投匭凡百士庶宜识朕怀【神龙元年二月二十七日】

诉事人先经州县勅

六卿分设诸郡咸理在於人下合免冤滞如闻越局侵劣背公向私其伤则多为政必案宜令天下州县百司寮案俱守乃曹各勤所职或有身名尚屈刑罚不平赋役未均徵差无次爰及侵夺亦兼违负凡人所诉大略如斯若县不为申州必须举州不能理省必为裁上下相持冤讼可息自今以後诉事人等先经县及府州并尚书省被理由延滞不为断决委御史采访奏

闻长官以下节级量贬【开元十年闰三月】

减抵罪人决杖法诏

勅大德曰生至重曰命?观前典惟刑是恤比来犯盗先决一百虽非死刑大半殒毙言念於此良用惻然自今以後抵罪人合决杖者并宜寛决杖六十一房家口移隶碛西其岭南人移隶安南江淮人移隶广府剑南人移隶姚塢州其碛西姚塢安南人客各依常式【开元十二年四月】

令宰臣与法官详死刑勅

朕猥集休运多谢?王然而哀矜之情大小必慎自临寰宇子育黎蒸未尝行极刑大狱上玄降鉴应以祥和思叶平邦之典致之仁壽之域自今有犯死刑十恶宜令中书门下与法官详所犯轻重具状奏闻

寛徒刑配诸军効力勅 孙逖

勅刑之所设将以闲邪法不在严贵於知禁朕自临万国向踰三纪思宏至道之化寔务好生之德比者应犯极法皆令免死配流所以市无刑人狱无冤系哀矜勿喜冀洽於生灵小大以情宁忘於鉴寐至於徒罪虽非重刑力役之外不免拘繫载罹寒暑诚可矜量自今以後其犯罪应合徒者并配诸军効力庶感激之士因以成功寛大之恩叶於在宥且本置杖罪是代肉刑将以矜人非惟重法今官吏决罚或有生情因兹致死深可哀悯其犯杖罪情非巨蠹者亦令効力宜令所司作载限立条例处分【天宝四年七月】

颁行新定律令格式勅 孙逖

勅简而易从疎而不漏二者之义良有旨哉朕思正国纲举为大化至於律令格式政之堤防岂非沿袭亦致增损条流既广繁冗遂多或轻重不伦或交互相背侮法之吏因以情坐得罪之人何妨悞入触类而长颇乖折中永言於此是用兴怀先令中书门下及明法人等商量刊定兼亦采诸羣议徧示具寮泊乎毕功已淹岁序近者亲览又历旬时如此再三事亦详慎不刊之典故亦庶乎适时之方斯其宜矣可颁告天下

罪至死者勿决先杖勅

比者所司断罪拘守科条或至死刑犹决先杖处之极法重此伤残非惻隐也自今罪至死者勿决先杖【贞元八年十一月】

删定制勅

元和长庆之中皆因用兵且欲济事所下制条或是权宜今四方少宁庶政须理每有司检举行下则诸道援引申论所执不同遂成舛駁若不刊定则无准凭宜令尚书省诸行郎官各取本司元和以来勅参详定讫送都省令左右丞重与尚书侍郎覆视更加裁度送中书门下议定奏闻【太和元年六月】

禁罪人鞭背勅

朕比属暇日周览国史伏觀太宗因閱明堂见五脏之系或附於背乃下制决罪人不得鞭背且人之有生系於脏腑针灸失所尚致夭伤鞭朴苟施能无枉横况五刑之内笞最为轻岂可以至轻之刑伤至重之命朕恭承丕业思奉贍谋言念於兹载怀惻隐其天下州府应犯轻重罪人除奸情巨蠹法所难原其他过误罪愆及寻常公事违犯并准贞观四年十一月十七日制处分不得鞭背今年以後每至夏至後立秋以前犯罪人就州府常条之中亦宜量与矜减速为疎理不得令久禁系委御史台切加纠察永为常式【太和四年四月】

颁历

颁行麟德历诏

夫气象初分乾坤之位斯定刚柔递运寒暑之节攸施而晦朔相循炎凉载革归乎推步方纪岁时顓頊应期重黎司天地之职放勳承统羲和掌日月之官履端之道无睽举正之典斯在洎乎末代渐致踈阔邓平之术既已多乖朱浮之言罕能遵用九章五纪莫究精微日次月躔宁循晷度朕御天抚历君临万方眷言兹道将恐沦缺钦若垂化曷所凭焉爰命所司研究详正仰稽七曜傍综五家去其繁衍裁以要密古所未通今则备载陰阳之数可测盈缩之理无愆改元履初占考此历岁唯甲子得於天正合朔之後应以嘉祥五纬步连珠二曜若合璧虽上玄至遐寔深祗愧而推测所详固已精悉气序恒顺分余弗舛以受农祥升平可致昔洛下閎造汉历云後八百岁当有圣人定之自火德洎我年将八百事合当仁朕亦何让宜即宣布永为昭范可名曰麟德历起来年行用之【麟德二年九月辛卯】

更改闰月制

项所司造历以膾月为闰稽考史籍便紊旧章遂令去岁之中晦仍见月但恐寒暑未节有爽天经用敷钦若之怀式陈敬授之典重更寻讨果差一日履端举正属在於兹宜改历惟新革非於既往可以十月为闰十月一日甲子朔旦冬至【神功元年七月】

唐大诏令集卷八十二

卷八十三

钦定四库全书

唐大诏令集卷八十三

宋 宋敏求 编

政事

恩宥

曲赦凉甘等九州制

武德二年十月赦

益州夔州管内疏理囚徒制

贞观四年二月大赦

开元三年正月德音

贞观九年三月大赦

原减囚徒勅

宥京城罪人勅

孟夏疏决天下囚徒勅

以春令减降天下囚徒勅

恩宥

曲赦凉甘等九州制

朕恭膺宝命绥静氓黎思俾宇内跻於仁壽而河湟之表比罹寇贼拘逼凶丑拥隔朝风元元之民匪遑宁晏夙兴厘虑旰食忘疲重劳师旅不令讨击馭以遐筭且事招怀而慕化之徒乘

机立効兵不血刃费无遗餼今凶狡即夷西陲克定远人悦附政道惟新宜播惠泽与之更始可曲赦凉甘瓜鄯肃会兰河廓九州自武德二年五月十六日以前罪无轻重已发觉繫囚见徒并从原免桀犬吠尧非无前喻弃瑕荡秽列圣有规恶言不顺及邪谋惑计者并从洗涤一无所问【武德二年二月】

武德二年十月赦

朕祗膺灵命君临区宇承凋弊之余拯横流之难虽复蠲除徭赋督课耕农安集黎元与之休息然而鲸鲵未剪四海多虞师旅荐兴事不获已及其士卒浮惰苟求逸乐憚於征役离其营伍因此逃窜潜匿崎岖窃为生资规免朝夕良由劝励不明部署失所疎慢之责在於朕躬琴瑟不调已云变革多坠刑网兼堪痛悼宜从寬宥许以自新其义士募力有背军逃亡者自武德二年十月二十日以前罪无轻重皆赦除之饥寒困敝不能自存所在官司随事赈给士非素属难以应敌设法垂宪期於不犯自今以後有背军镇征役者随即科处必无容贷宜明宣告咸使闻知

益州夔州管内疏理囚徒制

缓刑议狱?王彝训解网泣辜前贤茂轨朕君临海内抚育黎元一物乖所纳隍兴虑其益州道行台及夔州总管府衆务臻集统摄遐长囚徒禁系其数不少或控告未申多有冤屈或注引肆意濫及贞良致使文案稽延讼狱繁拥念彼枉滞情深愍惻其益州管内诸州委御史大夫无逸检校夔州管内委赵郡公孝恭检校所有囚徒悉令覆察务使寬简小大以情但有负罪逃亡离业乡邑无问轻重悉令归首明加劝导务修垦植庶使家给人足称朕意焉【武德四年四月】

贞观四年二月大赦

天生蒸民树之司牧莫不仰膺灵命克嗣宝图用能永享鸿名常为称首朕君临八表於今四载夙兴夜寐无忘晷刻履薄驭朽思济黔黎惟此至诚庶几王道上荷苍旻之睠下藉股肱之力宇内休平遐迩宁泰率此区域致之仁壽憬彼犬戎为患自昔轩昊以来常为寇暴是以隆周致泾水之师强汉受白登之辱武夫尽力於关塞谋士极虑於庙堂征伐和亲无闻上策有隋灾乱凭陵转甚疆场之前曾无宁岁朕韬戈戟务其存养自去岁迄今降款相继不劳卫霍之将无待贾晁之略单于稽首交臂薰街名王面缚归身夷邸襁负而至前後不絕被髮左衽之乡狼望龙堆之境萧条万里无复王庭唯颡利挺身逃窜林穴天网云布走伏何所大同之世谅在兹日斯皆上玄降佑清庙威灵岂朕虚薄所能致此方欲至仁化物宜存寬惠思与万邦同享斯福可大赦天下自贞观四年二月十八日以前罪无轻重自大辟以下见系囚徒皆赦除之逋负官物三分免一分谋反大逆妖言惑衆及杀期亲以上尊长奴婢部曲及主官人枉法受财不在赦例鰥寡孤独不能自存者州县量加賑恤赐天下大酺五日敢以赦前事告官者以其罪罪之

贞观九年三月大赦

天地播气垂生育之德皇王御历宏覆帙之仁故能财成万类光宅八表朕祇奉慈训嗣守鸿业承百王之季末属四海之凋残晨兴夕惕无忘兆庶尅已勤躬思隆政道欲使陰阳顺序干戈载戢庶几前烈致兹刑措而山东之地频年不稔水雨为灾饥饉相属蠢尔西戎屡扰边境事不获已遂劳兵车良由诚未动天德不被物兴言念此抚已多惭加以浇伪尚繁刑典仍用虽复留心听断明慎庶狱常恐縲紲之中负冤靡诉宪纲所及弗辜致罪一物有怨责深在余今岁惟暮春时属生长助天布泽与物更新可大赦天下自贞观九年三月十六日昧爽以前大辟罪以下皆赦除之其常赦不免者不在赦例鰥寡孤独不能自存者所在官司量加赈恤

开元三年正月德音

青春式序阳和布气万物熙熙莫不遂其性而嘉其生也申念愚人干我王度日陷坑穽之网罗朕代天理物为人父母矐言囚狱良增隐恻岂宪章之尚密将教导之不明欲顺时令抑惟恒典两京及天下见禁囚除犯恶逆并造伪以前宜决一百配流岭南及碛西诸州其余一切放免

原减囚徒勅 苏頌

勅惟刑恤哉古之道也朕抚临四海茂育万邦思致淳风登之壽域期画冠而不犯故开罗而在宥念兹下愚自抵常法时属盛夏天其养长在物最灵惟人为贵朕处台榭犹有鬱蒸之毒彼居圜圉能无炎热之忧故令紫微黄门备加按省览其所奏用悯於怀爰矜可恕之罪必务惟轻之义将布寬惠宜从原减依前件【开元三年五月十六日】

宥京城罪人勅

五刑之用以禁奸慝三宥之设以矜愚耄朕永康四海忧在兆人俾臻大化爰措庶狱而愚妄之毗抵犯或闻向隅可哀当宁兴軫今天地既肃戒严在命时分具令非罪无留载念幽犴思布生德宜崇减死之恩式明宥过之典其京城内犯罪等人昨令按覆其中造伪头首及谋杀人断死者杖一百配岭南恶处杂断罪死者决一顿免死配流远处杂犯流移者各减一年杖罪以下并免【开元八年九月】

孟夏疏决天下囚徒勅

法以闲邪刑以助化因时而制盖非获已朕自临御天下忧劳庶务以至诚感物道冀有孚以至理致和仁或由已岂欲以刑制政期於以化清刑故不用殊絕之诛每施寬大之令而迁善者衆犯法者寡断狱十数闻诸有司然犹一夫不获在予多媿寰宇殷广京都浩穽系於徽纆或未听理逮捕斯扰粮馈为劳生业或亏何以卒岁言念於此深用悯然况今长嬴在辰耘耨斯切顺时立政在乎恤人思宏在寬之典庶无留狱之弊其天下囚徒即令疏决其妖讹盗贼

造伪头首既深蠹时政须量加惩罚刊名至死者各决重杖一百长流岭南自余枝党被其诬误矜其至愚量事责罚使示惩创流以下罪并节级处分令中书门下就大理及府州县详理【开元十九年四月二十日】

以春令减降天下囚徒勅

行庆施惠所以奉天缓刑恤狱所以爱人今阳和布序草树自荣而或入於罪隶嬰於春藁同被亭育之恩未暢生成之施言念於此深用悯然思宏时令以哀庶狱天下囚徒罪至死者特寬宥配隶岭南远恶处其犯十恶及伪造头首量决一百长流远恶处流罪罚镇三年其徒以下罪并宜释放其有官吏犯赃推问未了者仍准取寔状定名讫然後准降处分计赃一匹及与百姓灼然有?者并不须令却上其上都委中书门下疏理京城委留守天下诸州委长官并当日处分其责保停务之类并宜准此【开元二十年二月】

唐大诏令集卷八十三

卷八十四

钦定四库全书

唐大诏令集卷八十四

宋 宋敏求 编

政事

恩宥二

遣使往诸道疏决囚徒勅

以春令减降囚徒勅

以春令减降囚徒德音

原免囚徒德音

大历四年大赦

大历五年大赦

大赦京师三辅制

恩宥二

遣使往诸道疏决囚徒勅

勅朕稽古训思致人和爰发由衷之诏旨行顺时之政令孟夏初吉三农在期礼先决於薄刑义必寛於轻系既听其令用軫於怀虽囹圄之间少闻於冒犯澄清之使素尽於忠公尤虑吏有烦苛人或冤滞是爽和平之气殊乖敬授之心其天下见系囚徒及事发应推身不禁者即宜差使分往诸道量事疏决及宣布时令除犯赃贿十恶死罪不赦自犯徒以下特宜放免回日闻奏务在钦恤以称朕怀【开元二十六年四月】

以春令减降囚徒勅

国之用刑兼在於慎恤王者布泽亦在於乘时所以大易陈规必议於狱周官设教遵於中典朕恭临宝位忧念黎元乾乾之心日慎一日况兵戎未息政役尤烦哀此下人无忘夕惕如闻州县之内多有累囚圜圉之间动淹时序每切纳隍之虑常怀解网之仁属阳春和布品彙咸達宜覃在宥之泽俾叶生成之化其天下见禁囚徒死罪从流流罪以下一切放免其十恶反逆及造伪头首强盗劫杀官吏犯赃枉法等害政既甚在法难容不在此限其诸供司及作曹非切要外并宜减省京畿诸色和采一切并停其天下百姓有灼然单贫不存济者缘租庸先立限长行每乡量降十丁尤恐编户之中悬磬者衆限数既少或未优矜其寔不支济者宜令每乡量更矜放待资产稍成任依恒式以天下未宁频申赦令公私庶务优恤盖多载覃有过之恩庶及措刑之美宣示中外知朕意焉【乾元二年二月】

以春令减降囚徒德音

乘时布泽有国之彝训议狱缓刑前王之典由是洽其靡卵殷汤宏解网之仁顺彼阳和汉后有録囚之诏育物施惠仰惟旧章朕纘服鸿业祇膺宝位日旰忘食中夜求衣虑一物之失所忧四方之未乂虽身居黄屋而志在苍生今寇孽为虞征输未息尤恐提戈释耒未有厚於人时寘棘理梧或虑盈於幽系属三阳启泰万物遂生宜覃在宥之泽庶叶惟新之令其天下见禁囚徒死罪降从流徒以下并宜释放京城宜令中书门下即分往府县御史台大理寺即亲自按问决讞具状闻奏诸州府各委所由长官准此处分诸色流人及左降官等所由类例并与量移仍委中书门下覆奏取处分其先缘安禄山伪署三司有名应在流贬者原情议罪负国诚深朕已舍其殊死窜於荒徼固当与衆共弃长为匪人然皆邦家旧臣常挂纓冕使其终没裔土永匿慙魂不若贷以殊私俾令効节亦准例处分兼委中书门下量轻重类例奏取处分比缘窃盗之内干戈胁从白刃临颈胡宁忍决所有陷於凶党苟免者多前後诏书频已该及其史思明将士及伪署官属等有束身归顺并率衆来降官爵如初一无所问以城邑等降者仍别加封爵其凶党之流亦同此例天寔临照朕无食言王者设教务农为首今土工方起农事将兴敦本劝人寔惟政要宜令天下刺史县令各於所部亲劝农桑百姓中有勤劳稼穡积其菽粟或贍於闾里或能益军储委所由长吏具状奏闻当特与甄赏仍令有司第高下量酬五品以下官勲其百司及州县兴工力役不急之务一切并停诸军兵健应在行营有羸老病疾不任战阵者各委节度使速拣择放还路次州县量加济恤诸色番役各令所司减省放其营农且寇孽未平军戎尚备眈庶之内征赋尤烦朕所以亲帅公卿躬行节俭而诏书屡下蠲免盖多至国计军储取给而已犹欲累加损抑以惠黔黎宜令中书门下勾当令度支使与诸供司一切减省应可蠲免每司各条件闻奏当使施行【上元二年正月】

原免囚徒德音

元首之义以人为心外有凋伤内怀惨怛罪归於己情见乎辞伯禹深泣辜之仁汉王下哀痛之诏与理同道惟刑是恤朕志宏覆载运属艰难思措大刑俾登壽域风以解愠时当发生国有旧章已悬书於象魏恩成在宥宜释罪於狴牢其天下见禁囚徒罪无轻重一切放免其官典犯赃法虽难恕特从寛典许以自新宜纳赃放所犯罪左降官等即与量移近处诸色流人及効力罚镇人等并即放还其有亡官失爵亦与收叙比来兵革不息米谷未丰百姓流离至

於困弊战士暴露颇闻阙乏或有结聚及有违军令但能改过自効前事舍而不论艰虞以来多冒刑辟道存善贷屡有德音庶其最灵咸自改励宣示中外知朕意焉

大历四年大赦

勅至理之代先德後刑上欢心以临下下欣然而奉上祸乱不作法令何施去圣久远薄於教化简书填委狱讼繁兴苛吏舞文冤人致辟思欲刷耻改行厥路无由岂天地父母慈爱之意也朕主三灵之重托羣后之上夕惕若厉不敢荒宁内访卿士外咨方岳日不暇给八年於兹而大道淳风鬱而不振四郊多垒连岁备边师旅在外役费尤广赋与转输疲耗吾人困竭无聊穷斯滥矣下愚闇昧不见刑网戎士在军未习法令犯禁抵罪其徒寔繁狴牢之间未详其事寔吏议不决动淹夫时序伤沮和气屡彰咎徵此皆朕之不明教之未至上失其道而绳下以刑敢不罪己以答灾眚且人者君之支体害之则君有所伤刑者教之辅助失之则人无所措虑有冤滥惨然忧伤用明慎罚之典俾宏在宥之泽其天下见禁囚死罪降从流流以下罪释放其左降官及流人并移隶等并与量移仍委本司即勘责送名中书门下奏听进止如闻州县官比来率意恣行麤杖不依格令致殒使毙深可哀伤频有处分仍闻乖越自今以後非灼然蠹害者不得辄加非理仍委观察节度使严加捉搦勿令有犯如违録名闻奏宣示中外宜悉朕怀

大历五年大赦

门下惟辟奉天作人父母若天垂戒於上人不安於下则修德勤政以尽至诚恤刑狱之冤抑痛閭閻之疾苦招纳谏诤旁求贤良允迪前烈率由兹道朕获承宗庙之重托於王侯之上夙夜斋栗莫敢荒宁推诚以抚万邦屈己以安百姓忧勤之至日慎一日服御之给损之又损而涉道犹浅烛理不明国经王度多有废阙加以寇戎骤犯军国频劳赋重人竭困之岁歉田荒业废逋散相仍每深忧悼频有蠲降兼亦简求良吏以惠矜人去除奸凶用達幽枉大变风俗更张刑政冀人和之渐洽何天眚之屡彰固以朕德之寡昧化之衰薄其咎不远在予一人亦由郡邑之政未尽条理或贪以害物或扰以伤农有凌弱暴寡之冤有不均失中之政人无所措多陷刑辟盖由教道未至岂忍以文法绳之惨然忧嗟深自引慝虽靡草麦秋之候方断薄刑而薰风长养之时宜寬庶狱大决疎网与之更新其天下见禁囚徒死罪并降从流流以下并释放内外文武官及前资官六品以下并草泽中有硕学专门茂才异等智谋经武讽谏主文者仰所在州府观察牧宰精求表荐如所由搜扬未尽遗免林间者即宜诣阙自举亲当策试量能擢用朕每览汉文诏书至阳和之时草木羣生之类皆有以自乐而吾百姓或阡於死亡而莫之省缅然遐想感叹增怀哀今之人又甚於昔思有贍恤安其居食观察节度使及刺史各宜训励所部使奉科条变贪官之节激廉吏之行其清白明着政理殊尤者具以名闻必加獎擢若冒於货贿紊我纪纲紕絜勿缓当峻刑宪其官人犯赃经恩免罪者并宜申报中书门下及所司不得容其却上自王室多故积有岁时皆我文武之臣中外戮力今天下既定崇德报功与之剖符传代不絶至於莅官述职各宜明慎典刑貽庆子孙永同休戚於戏武德贞观之间有若魏徵王珪李靖李积房玄龄杜如晦等扶翼大运勤劳王家尊主庇人匪躬致命咸有一德格於皇天缅然常怀风烈尤在其後嗣沉翳特加优獎如庙宇荒毁即宜修葺无德

不报何日忘之其鰥寡惻独老幼贫穷不能自存者委州府县吏取诸色官物量事赈给仰招携户口劝课桑农应所在州府有兴功役处非灼然急切者宜并停之五岳四渎名山大川神明所居风雨是主宜委中书门下分使致祭以達精诚孝子顺孙义夫节妇事迹着者特加旌表颁示中外知朕意焉

大赦京畿三辅制

门下古者以春季之月布德行惠恤刑振乏朕亲执牺牲玉帛获奉於上帝神祇九年於兹矣克己思理明不能烛昆夷未叙王略犹虞岁会三秦之师日有千金之费悉索币赋疲於馈军候甸之间徵求耗竭百谷翔贵关中小歉穷则斯滥安能惧刑因而成盗多有犯法至於军戎之士致使廩赐不充困之逃亡或抵邦宪事非获已情亦可察近以露濡之思明发有怀属禁火之令节方荐飭於园寝圣祖敷佑景灵告祥先天後时载荷嘉贶以陰以雨又助发生固宜顺曲成之仁布维新之命赦罪育物旷然涤除其京兆府及三辅并京城内诸司诸使见禁犯死罪以下特宜释放有犯未发觉者罪无轻重一切放免如妄论告者以其罪罪之其官典犯赃不在免限顷者鱼朝恩夙着功勲委之戎事而徵求黎庶空竭闾阎加之广有贸易夺人贿赂利京城之内擅置刑狱恣行忍虐幽执无辜部领师人乖於抚驭资粮刻薄劳役烦苛恶稔衅盈日嬰沉痾念其勲旧许以优闲令罢其兵权遂其养疾而宗社降鉴明神所殛羸瘵不起旋至毙亡既往无追一切不问所管将士等同於王事各効辛勤是朕牙爪自致勲业并宜仍旧勿有忧惧盖以朕诚未感物明未知人失於授任而臻此也今则虚怀引咎亲御禁戎必加优宠以表劳绩其资圣寺禁人并追捕勘责等即宜并停然以王畿艰弊矜恤疲人蠲税罢徭与之休息尚恐流佣罕复贫弱未安益用忧勤谅资约损京兆府百姓承前应欠官物等委所由勘责寔百姓腹内者一切放免其在所由腹内者不在免放畿内官人手力资课及府官充职掌名额稍多有所祇供不免烦费并诸县邮通路次馆驿诸色徵科一物以上并委中书门下与京兆尹即计会取责色目一一商量条件处置务令减省以息劳费其诸司使回易一切并停不急之务亦宜且罢农隙之後然後常式宣示中外知朕意焉

唐大诏令集卷八十四

卷八十五

<史部,诏令奏议类,诏令之属,唐大诏令集

钦定四库全书

唐大诏令集卷八十五

宋 宋敏求 编

政事

恩宥三

大历七年大赦

大历八年大赦

大历九年大赦

宥京城禁囚勅

赦京城囚徒制

元和十三年大赦

长庆四年正月一日德音

恩宥三

大历七年大赦

门下济於道者化醇而刑措善於理者纲举而网疎朕涉道未宏烛理多昧常亦遐想太古高挹玄风保合太和在宥天下盖德薄而未臻也是用因时以设教便俗以立功务尽平恕用申哀恤又教浅而多犯也加以边虞未戢井赋犹繁荒療之余寇攘斯起遂令圜土嘉石之下积有累囚危章互简之中困於法吏属盛阳之候大暑方蒸永念狴牢何堪鬱灼所以沮伤和气感致咎徵天道人事岂相远也如闻天下诸州自春以来或????时雨首种不入宿麦未登哀我矜人何恃不恐皆由朕过益用惧焉惕然忧嗟深自咎责所以悉减常膳别居斋宫祷於明神

冀获嘉应仲夏之月静事无刑以助宴陰以宏长养断薄决小已过於麦秋继长增高宜顺乎天意可大赦天下其大历七年五月十五日昧爽以前已发觉未发觉已结正未结正应天下见禁囚徒罪无轻重一切并宜放免所由不须类例闻奏宜令诸道节度观察及州牧县宰等於当官内所有名山灵迹各精诚致祭祈降甘泽冀获丰稔永思流弊庶振风猷其巴南诸州仍岁水旱迫於冻馁或至流离因有剽求苟全性命惧刑网之所及始啸聚以相依抑有由焉盖非获已永言其弊用軫於怀如能相率来归各安生业并无所问咸许自新敢以赦前事相告者以其罪罪之亡命山泽挟藏军器百日不首复罪如初赦书日行五百里宣示中外咸使闻知

大历八年大赦

自古帝王顺时行令当此时之炎燠应南风之长嬴必事无刑解网申惠叙麦秋之气而代天理物矣朕获奉珪璧?恭郊庙二纪有余承累圣之鸿业为兆人之父母战战兢兢恐惧不济而天地幽赞陰阳化育关辅之内农祥荐臻嘉谷丰衍宿麦滋植闾阎之间仓廩皆寔百货低贱寔曰小康此皆上帝报贶列祖储祉卿士存诚元元尽力之效思与万方百辟咸共乐之而未能也况或抵常宪累然就拘辨对官曹置闭狱户永惟械系之惨追犯冒之由皆自王化未醇风教有阙俾人忘耻格俗亏礼让陷在刑典久於狴牢当顺阳助生之时积冤蔽感伤之气百姓有过在予一人顾諟钦恤诚切伤痛用申在宥之旨庶洽惟新之令其大历八年五月二十九日昧爽以前天下见禁囚徒及已发觉未发觉已结正未结正死罪并降从流流以下并宜放免敢以赦前事相告者以其罪罪之亡命山泽挟藏军器百日不首复罪如初夫人君承天之序则三时有成自中刑外则四海蒙福嗟尔庶士谅悉予怀

大历九年大赦

朕诞膺天命以抚方夏夙夜兢惕保佑惟人惧庶狱之未孚俾一夫之不获思用哀恤与之和宁顷属夷夏多虞干戈是务徵赋颇重黎元不康内迫艰穷外乘师旅因行盗窃自陷典刑累然圜土之下停剿视?之命永念愚惑惻焉疚心而寰区之间举类斯衆今火中惟夏长嬴及时鬱然沉系致伤和气万方有罪在予一人将洽至淳之化更布维新之理其大历九年四月二十四日昧爽以前大辟罪以下已发觉未发觉已结正未结正罪无轻重一切并宜放免敢以赦前事相言告者以其罪罪之其在军将士有刀箭所伤久婴沉疾者戮力疆场身当锋刃各委所由量给药物厚加优赏其阵亡将士亦仰本使随事优恤妻子各申锡赉其百姓鰥寡孤独不能存济者困穷无主诚可哀伤所在府州县长官每年以诸色官物量加贍恤令其得所亡命山泽挟藏军器百日不首复罪如初在宥之典既周动植纯嘏之锡庶延子孙凡在品彙各宜迁善宣示中外令悉朕怀

宥京城禁囚勅

顷属烦暑差候????阳积旬处於高明之中犹有鬱蒸之叹而况幽闭狱户辩对官曹甫临秋期将正时宪重循钦恤之道载宏全宥之仁其京城内外禁囚犯流以下罪并宜释放

赦京城囚徒制 常袞

朕以寡薄获守丕图恭默思道克谨天戒常恐至诚不達景化未敷寅畏之诚寢兴在虑自纯阳用事霖雨???旬麦虽有秋禾未长亩有阻三农之候将貽万姓之责是用齐心涤思禱於上下神祇云从自郊月未离毕膏泽不降忧勤益深虽水旱成灾陰阳恒数而政刑失中或致???伏岂简孚有爽衷敬未诚欤嗟我矜人陷於刑辟当炎蒸之序在縲紲之中久积幽冤有伤和气所以引成汤之六事过寔在予寬大禹之九刑诚存育物期於作解以救如焚其京城见禁囚徒死罪以下降从流流以下罪一切释放仍委中书门下即速与处分讞闻奏虽罪疑从轻或谓之长恶宥过无小宁失於不经庶空夏台用缓秋典宣示中外令知朕意

元和十三年大赦

朕闻王者法天作则与衆守邦奉天无私居兆人上当恭已向方之际切临深馭朽之怀忧勤靡遑今古何远所重者兵革不试轨度自贞熙仁育和以至大道朕顾惟菲德祇奉睿图承昊天之眷命纘列圣之丕绪旻食以求至理虚心而俟昌言兢兢业业常惧失坠逮今十有四年矣道且希於广运意尝在於包荒推诚则深感物未至顷岁蜀川浙右怙乱阻兵人神共诛剪灭相次姑务偃革期於措刑方箫勺以惩奸庶干羽以成化淮蔡寇孽稔祸挺灾问罪兴师盖非获已念征行之暴露軫馈给之烦劳中宵惕然载益祇厉妖凶既珍黎庶有康斯皆宗社垂休中外协力将勤施於下土冀昭答於上玄朕兹思所以与羣公卿士励精於庶政也属献岁发春授时惟敬勾萌尽達幽蛰咸苏徽纒可矜鰥寡存念俾疎网之是决与庆泽而惟新可大赦天下元和十三年正月一日昧爽以前大辟罪以下咸赦除之

长庆四年正月一日德音

朕以寡昧获守重器兢厉畏惕於兹五年皇天之事罔不修备而大典有阙举而行之粦以元正御示正殿百辟咸序万方来庭思欲推至仁以布和奉天时而施令况上玄貽庆列圣垂休默辅予躬以至宁复爰思士庶同被庆灵并兹囚隶亦合流泽自今年正月一日以前犯死罪者并降从流流罪以下逋減一等其故杀官典犯赃十恶者并不在降免之列降官未经量移者与量移近处流人各据本年限与減一年如本限止一年放还朝贺之礼国之盛事肃恭班位敷赞威仪俾升庆贺以示宏普其应元日缘朝贺行事官三品以下赐爵一级四品以下加一阶文武常参官六品以下及宗子应加陪位者并诸贺正使各赐勲一转诸番陪位各赐有差今兵革甫宁典常粗举虽慙至理可谓小康唯水旱犹虞蒸黎重困公私蓄积颇有未丰宜令诸道观察使刺史各具当处利害其有弊事可革有益於人者何术可以渐致富庶附驿以闻亦不用专使诣阙以省烦费其封畿之内百姓利病以委京兆河南尹具以条奏束带立朝必资忠谏济时利物式伫謏猷其文武百寮所上封事极言得失无有所隐事可施行者便委中书门下量加獎用朕以执契收馭时贤在典化教明至道期致太和凡在臣寮宜知此意

唐大诏令集卷八十五

卷八十六

钦定四库全书

唐大诏令集卷八十六

宋 宋敏求 编

政事

恩宥四

曲赦京畿德音

大中十三年正月赦

咸通七年大赦

咸通八年五月德音

咸通十二年五月疏理刑狱勅

光启三年七月德音

时令

令史官条奏每月应所行事诏

岁初处分德音

开元二十四年岁初处分制【阙】

恩宥四

曲赦京畿德音

王者爱人如身推己及物恤其寒燠之苦适其舒惨之宜俾叶太和用臻至理恭默思道忧勤在怀时属严沍念深徼繹当霜雪之候滞圉圉之中馈饷为劳逮捕斯扰沍寒所迫愁叹必多

惻然疚心思有矜怜宣布在寬之令使无留獄之嗟應京百司及畿內諸縣見禁囚徒應犯死罪特降从流以下者遞減一等如欠負官錢情非巨蠹責保填納不要禁系唯故殺人者及官典犯贓不在此限仍委京兆尹及諸司官長制下當日速決聞奏朕司牧黎元存誠康濟封甸殷廣京師浩穰憫觸法以罹辜式加恩而有罪庶止无告宁失不经宣示中外令知朕意【大和八年十二月】

大中十三年正月赦

天將發生萬物也則必假以暄妍潤以風雨王者之在宥四海也期必滌其瑕穢施以渥恩固頻啟於幸門豈无彰於皇澤朕以菲德獲纘丕圖常慕唐堯之無為漢文之恭儉宵旰不暇乙夜觀書萬務靡有不親一夫尤慮失所兢兢業業不敢荒寧十有四年至於茲矣每懼風俗之未厚賦役之尚繁政令之未明刑獄之多濫思用克濟浩无津涯上荷昊穹垂休宗社深佑下賴股肱翊化岳牧懋功五稼屢登四夷內附懷仁庶同於行葦納諫无愧於从繩俾疵疠不生飛翔遂性日月所燭庶為小康顧予寡昧何以臻此近者藩方之任抚理或乖泯棼日聞俶扰相次虽興師殄寇本於為人而殘殺戕生良多愍納而又緣河數郡暴水成災念其蕩飄深自忧軫乘此三元之庆宜宏肆眚之恩可大赦天下自大中十三年正月一日昧爽以前大辟罪以下罪无輕重咸赦除之唯十惡叛逆故殺人官典犯贓不在此限

咸通七年大赦

我國家膺天明命光宅萬方二百有五十載矣梯航所及昭顯於夏殷文軌攸同復逾於漢晉朕承十六聖之業居億兆人之上猥惟眇身祇荷丕構遠奉貞觀開元之至理近宗憲祖宣考之宏規常慕虽休勿休豈敢自暇自逸然而仁不遂於百姓德不參於二儀莫致感通更延災沴近者兵革未弭虫蝗相仍方懷徵發之勞又获已飢之叹虽頻加錫賚累有蠲除尚慮澤未徧通信未旁及是用連宵假寐每食忘飡思所以拯我黎元臻其壽考或多方以革弊盡慮以鼎新庶或上下咸从人欲况善為國者以好生为首行王道者惟憫物是先苟可勝殘去殺亦冀止戈為武於戲誠明之旨既悉於斯渙汗之恩夫何所愛可大赦天下自咸通七年十一月十日昧爽以前大辟罪以下已发觉未发觉已結正未結正系囚見徒罪无輕重咸赦除之唯犯十惡叛逆以上故殺人官典犯贓不在此限持杖打劫必欲害人苟遇支敵必行殺戮拒敵追捕肆意奸凶并故殺人者虽已傷未死已死更生意欲殺傷偶得免者并同殺人法处分其賣毒藥開劫坟墓及別獄之內官吏推断不平因成冤濫无問有贓无贓不在原宥之限朕君臨四海子有兆人常恐萬類之中一物失所况云南素推誠節久慕華風顧帥臣抚御乖失不諭朝旨遂令侵扰邊隅初陷交邑旋侵越嶲積移星歲弥纵干戈靡思量力之言曾無事大之礼軼我疆理勞我堤防爰用徵兵諒非获已鋒刃之下必有殺傷每念於懷良深慚悼宁屈已以徇衆不穷兵以害人斷自予懷更宏招諭應南安邕州西川等道諸軍兵士各守疆界不用進師乃委劉潼審詳事机明加曉諭如能重修和好信使如初朕當虚懷一切不問云南先差專使昨已有詔旨处分其先配隶习讀質子各本道供給續當指揮安南邕管西川三道將士皆踰山越海擐甲荷戈志切勤王誠深報國固內侵之封域收已失之城池盡欲捐軀咸思賈勇深明历數終始一心言念忠勤誠用嘉叹今南蠻已加抚招冀就弭宁日下但严守封疆且

备要害虽未用更图攻讨亦未可便絶训齐其将士等义感风云志谐金石屯营既久立效已多大功将成悬节无夺候其归欵别有指挥仍委刘潼高骈李耽等具此慰劳以副予怀其三
道军粮地界悬远致其尽力当有充肠如诸道戎兵未免饥馁因之殒命尤用伤怀宜令常宙
刘潼严加条疏丁宁期限无缺供馈或致失时其赴府三道行营兵有亲老及妻子在家者各
委本道切加存恤勿使冻馁凄惶俾无回顾之忧以励当锋之志其诸将士勇敢用命当锋殁
身义节可嘉孤弱是念并委本道节度使据所申报各须安存如血属单弱不能自存者即厚
加给恤遗骸在野深可悯嗟今春已降德音尽令优给收葬尚虑暴露未契幽陰今更举明用
慰泉壤宜令所在长吏访寻收斂如法瘞藏仍以酒醪殷勤奠酬应三道兵士经过累路州县
供应顿递徵配间里水程船夫陆路车役劳弊斯甚疲瘵可哀其岳州湖南桂管邕容管内沿
路州县今年二月二日德音已蠲放今年夏秋两税各一半尚恐乡村未泰更要加恩宜於今
年夏税正钱每贯量放三百文沿路州县亦甚凋伤先未沾恩今须优假宜於来年夏税正钱
量放一半仍各委本处长吏亲自点检明閱簿书勿使恩不布於疲羸幸或生於桀黠副予深
意必及远人诚信之道蛮貊可行苟或未孚其肯怀惠应安南邕州容州黔南西川诸溪洞酋
长首领务加优恤谕以恩信若须节级颁赐官秩赏给者委当管速具分析闻奏京畿之内蝗
旱为灾稼穡不收凋残可悯其京兆府今年青苗地头及秋税钱悉从放免仍并出内库钱二
十四万五千三百六十贯赐官府司充填诸色费用河南及同华陕虢等州遭蝗虫食损田
苗奏报最甚除合放免本色苗子外仍於本户税钱上每贯量放三百文如今年秋税已纳即
放来年夏税其诸道有蝗虫甚处并具奏闻亦议蠲减其河南府水灾之後仍岁飞蝗想彼蒸
黎尤多凋瘵宜别赐盐鉄河陰人运米三万石委崔璟充诸色用其诸道州县应有逋悬两税
斛?青苗地头榷酒等钱既存书簿不免徵剥咸通三年以前者并一时放免从四年至七年其
中有准勅蠲者亦不得因此重徵京畿之内供亿事繁色役差科曾无虚日黎人困苦深可悯
伤更有逋悬日久徵迫无由收斂徒系簿书应京兆府诸县从大中八年後至咸通六年应欠
诸司税草斛?糖棘番匠知食使玉苏及府司欠延资并度支户部钱物及赈贷折籾粟并诸县
欠填省修堰埭等钱正庄宅监察使拆寺并佛堂材木树等价及欠左右神策军捉贼赏钱及
诸县应欠咸通三年至六年合送府夏秋税钱物斛?并赵越庄田地租及诸县咸通三年至五
年赈贷粟并长安县大中八年先借太仓粟充赈贷除已纳外余欠斛?等并从放免兼簿书一
时毁序从今年以後别立帐内库一年支放费用虽广有司积久追呼固多虚系簿书颇为烦
弊朕方宏俭约深軫凋残特示优矜用蠲逋责应度支积欠大盈库年支正段丝钱从太和八
年以後至咸通元年以前并宜放免及欠琼林库年支金银锡器银棱器皿杂物等自开成五
年以後至咸通元年以前并宜放免左降官量移近处已经量移者更与量移如後资者任取
本官选所数集丁忧放还者服阙日各与量移并别勅因责降除正员官所司亦与处分其左
降官及流人先有官者如已亡歿各还本官失爵痕累禁锢者并从洗涤左降官并流入元勅
令终身勿齿及长流远恶并云纵逢恩赦不任量移者并与量移如已亡歿者并许归葬如缘
葬事困穷不能自济者委所在官吏量给棺槨优恤发遣中外前资见任官中其有顷因瑕累
未阶録用者并左降官如事情可恕才行足称者委中书门下量加简拔随能録用戎狄欵塞
边陲无虞或使臣因备制弛慢切在搜访利病济便兵农勿以久安遽忘远虑所宜常加备境
每切训戎将宏绥抚之功须为经久之计其边上方镇本军兵数节度使皆位崇元帅誓立殊
功必能閱军实以静边抚单寒以和衆素有定额固非空文然亦虑或过犯逃匿死亡停解不
便招募缺额遂多并须检勘分明仍委御史三司院并加察访即时闻奏江淮诸州百姓只合

输本分苗税不合分外差科多为所在长吏权立条流临时差配或强名和市都不给直自今除纳本分苗税外一切禁断牧守之任慈惠为先欲安远人须求廉吏如闻邕容桂广等道管内刺史每州皆管三县人户不少其间选用尤要得人访闻本道观察使所奏监州官多是本土富豪百姓兼杂色人例皆署为本道军职或作试衔便奏司马权知军州事既不谙熟文法又皆纵恣侵欺多取良家以为奴婢遂使豪酋构怨溪洞不安若不条流生人转困其邕容桂广等道管内自今以後刺史必须精选贤良久历官途不越资序者然後许奏请其军职试衔并不在奏署限藩条之例刺举是资郡政之方邑宰是选斯纪纲具设次第相临苟皆推公必无败政如闻近者廉车殊无刺举牧守率务并容邑宰非才疲人罹弊必在惩革以惠惇婺自今以後委观察使专刺举之职如郡守不理或临财不廉酬饮是营狱讼靡息以时奏劾按罪定刑如藩方不谨察廉或致下人上诉推覆得实观察使别候勅旨本判官远加谴罚其郡守亦仰察访县令如或有过不举停任後别有处分録事参军重加削罚如刺史县令有异政灼然可举者仰其録奏必议超升人命至重在慎典刑国章苟隳必多枉挠近日执法之吏罕得其人或制勅不行曾无提举或奸巧为患莫能辨明遂使可死者生可生者死而又縲紲繁捆断决淹延乃致怨嗟或成灾沴予怀憯怛寢食靡宁宜委御史台刑部大理寺慎择官吏皆须素能折狱俾务尽心则人必无冤法当尽理天下州县官等皆罕习律令莫知重轻唯任胥徒因多枉滥委本道观察使觉察闻奏又刺史县令多务游宴不思官常决遣既妨囹圄自满永言冤滞岂不由斯委观察使表率条流以惩深弊度支盐鉄户部三司欠负钱物频有赦令据年额节级矜蠲如闻所司尚有徵迫妄行可徵可放多因奸吏恣情遂使恩不及夫穷危事无补於经费其诸色人户所由等应欠三司钱物自大中十二年以前并宜放免县道之间邮亭具列行李供亿格勅着明如闻节度观察刺史等所经过不遵品式公券之外私费至多或在道途有六百七百人行行李所在地主务求交欢别差吏人号为置顿必皆率配弊及疲人自今以後所在长吏切加遵守格文不得违越赦令所在欲苏疲瘵如闻远处州县告示不得分明今要条流永为定制赦书到後各委本道全写録於县门榜示但缘事理烦细纸数烦多减放矜蠲头项埋没乡村百姓无因得知宜令所在长吏细详各据本处百姓合得免科段一一竖项作小榜於要路晓谕令百姓知悉宗室子孙不合凌替班列之内人数至稀宜令宗正寺搜择宗子有行义文学吏事堪有清实者具名闻奏委中书门下量才叙用如在郡县年已蹉跎士行可弊困於寒馁宜委所在长吏随分驱策优假如闻编户之中素非宗室因缘识故写録诸书投入宗枝妄认房籍恃凭搅扰侵害乡村近日此徒败露非一虽已行法未絶根源从今以後委所在长吏切加收获如涉疑妄即收録闻奏当痛惩治用安里闾前代为宾崇德理合颁恩二王三恪及文宣公各赐物五十疋衡琫拱卫执玉会同俾申怀远之恩用展酬劳之锡神策六军威远营金吾及皇城应缘御楼立仗将士等各赐物有差鸿臚礼宾院应在城内蕃客等并节级赐物功播一时名流千古念其後裔观以将来故尚父子仪赠太师晟赠太尉秀寔各与子孙中二人八品官顔杲卿张巡许远南霁云子孙中各与一子出身中书门下仪制官及内侍省内教并特加一阶勲着燮和道彰镇抚牧守宣力卿士叶心永言尽瘁之诚宜给追荣之典中书门下及节度使带平章者祖父母父母并与赠官封已经追赠者更与改赠京文武常参官东都留守度支盐鉄等使诸道节度观察都防御经略等使及神策金吾六军将军大将军威远营镇国军等使父母已歿未经追赠者量与赠官已追赠者亦与改赠父歿母存未封邑号者父见存未有官者量与致仕官其赠任常参官出为刺史县令分司等官今已得替兼前资郎官以上官其父母并准有见任常参官例与追赠挂冕相先悬车自遂纪纲之

仆轩陛攸陈宜升阶级之荣式进勲封之宠内外文武及见任及致仕官三品以上赠赐爵一级四品以下加一阶神策六军金吾威远营皇城等将士普恩之外各赐勲两转天下百姓年九十以上各赠米五石绢二疋绵一屯羊酒有差仍令本县令就家存问今州府方员多不给付所用无几系体则深宜令以上供余钱物充给乞各具分析闻奏

咸通八年五月德音

朕闻唯天为大唯尧则之施及文王昭事上帝朕退思古训顺考前闻仰止於皇王之间规范於尧文之际始如徒涉而望超溟渤中若策蹇而求蹶云霄思逮於三希之则至由是力於恭已说以济人九载於兹一致不怠然而德未甚腆信未甚孚虽怀汔可之诗敢企康哉之咏尚赖社稷降祉祖宗垂休兵革向宁朝野斯乂自顷诞施渥泽冀获霏流犹虑莫及昭苏逾多困乏今则夏田丰稔倍於常时不足之忧暂免兴虑又以西成未保虫蝗是虞永惟惠恤之宜庶叶销禳之要苟能利於百姓赖於四方可使稼穡有年边疆无事则唯恐不及岂憚於必行是用更理阙遗载新提举一阳斯始爰开荡涤之恩晏陰将成式经矜蠲之令副我诚切在尔司存应京畿天下见禁囚徒暑毒之时要令疎理牢狱之内虑有滞冤宜令台府及该军司并所在州县长吏据见禁囚徒德音到後七日内亲详罪名疏理乞闻奏不得更延引时日除非巨蠹有碍去年赦条外余并节级递减一等从轻处分左降官及诸色流人虽累有赦令皆已沾恩欲其悔过自新岂恡频施沛泽经去年赦条已得量移者更与量移合复资者准前例处分其去年十一月十日後至今年五月以前续有左降官及流人亦便与量移如令放还者所司速与处分内人久在宫者常膺使令不唯勤劳可悯固亦亲爱是思宜令拣选五百人放出各归其家属俾无离怨用叶推恩见在宫人尚令拣放诸节进奉宜有指挥应诸亲及公主等每年端午及延庆并妃嫔生日所进女口自今以後宜并停进鹰鹞之设本为畋游朕端居穆清不好驰骋所宜解放以遂物情左右神策军各放二十联五坊放三十九联飞龙放一十一联其左右神策军每年进鹰鹞於数内停减春秋二社两进九月十五日各停进鹰一联共停一十四联应租庄宅使司产业庄磴店舖所欠租斛?草及舍课地头等钱所由人户贫穷无可徵纳年岁既远虚系簿书缘咸通七年赦条不该入宜从大中三年以後至大中十三年以前并宜放免京兆府奏云阳等一十二县百姓论去年宿种麦苗下子之後旋被蝗虫食损今年尽不滋生虽京畿之间去冬蠲放不少但以疲人恳诉须务哀矜已令府司差官巡检如有损处特与减放今府司具合放数诣寔闻奏戍役辛苦道途绵历将还乡土在贍供须安南邕州已奏放回北军其於顿递过本州县界须如法先自备办擺排比切不得临时差配百姓及借索扰人仍録前後德音赦条於乡村分明榜示不得违越仍委所在长吏严立条制专加觉察枷禁所施在防奸蠹举便欠负未涉重条如闻府县禁人或缘私债及有锢身监逐无计营生须有条流俾其存济自今日以前应百姓举欠人债如无物产抵当及身无任职请俸所住州县及诸军司须寬行期限切不得禁锢校料令其失业不许利上生利及回利作本重加徵收如有违越勘实奏闻去年德音赦令条流事件极多贵其普及生灵惠沾寰宇闻所在未尽施行今重举明俾无留滞宜令天下长吏差清强判官专事勾当切更分明检校一一据节施行乞闻奏如更因循必行朝典所差判官速具名衔分析闻奏好生之德宜及禽鱼卵育之时须加条制旧勅每年起三月一日至五月末不许采捕蜚禽走兽虽有勅禁尚恐因循宜令台府及诸军司及时禁之月严更提撕勿使违犯俭德之修圣贤所重近日俗多浇靡时尚矜夸朕慕

素风思遵俭制去岁赦文之内已曾明有指挥所宜克副朕心用革奢僭东川每年进?浸荔枝道路遥远劳费至多自今已後宜令停进布告中外称朕意焉

咸通十三年五月疏理刑狱勅

勅慎恤刑狱大易格言曰如得其情则哀矜而勿喜而狱吏苛刻务在侮文守臣因循罕闻亲事以此械系之辈溢於狴牢追捕之徒烦於简牒实伤和气因致沴氛况时属煊蒸化先茂育并赦罪戾式顺生成应天下所禁系罪人十恶忤逆及故意杀人合造毒药持杖行劫开发坟墓外余并宜疏理释放如或信任人更多有生情系留续察访得知本道观察使判官州府本曹官必加惩遣以诫慢易勅到後十日内疏理分析闻奏

光启三年七月德音

朕闻天以阳居大夏地以陰居玄冬是明任德而不任刑也在帝舜则举两阶之干羽在成汤则开三面之网罗是明君好生而不好杀也朕以眇身嗣膺大宝垂三百年之宗社奉十七圣之威灵夕惕乾乾不忘寤寐岂谓衅生於地谪见於天烟尘暴起於两京虵豕交横於四野宗庙之飨干戈莫寻盖获戾於上玄俾流灾於下土前岁才归大国又及播迁信由倚任之非良有愧精诚之下至贬衣损食庶塞乎????违履薄临深每增於战惧方修郊庙且复京畿而驻蹕才安还宫可候?诚罔通於穹昊兵革又起於藩维盖以朕不敏不明君临兆民仁不能叶生成之旨义不能符断割之几智无周物之明信寡应时之用?蒸黎於涂炭致王室之艰难绵历岁时於兹八稔顾兹颓紊职朕之由且朕深宫九重跬步千里目虽视而不见耳虽听而不闻罪在朕躬痛入骨髓但仰天而投泣恨无地以容身抚几兴言何嗟及矣今则素服避殿减膳撤悬食无海陆之珍耳絕管弦之乐唯加惕励冀遂感通将宏及物之恩在布惟新之令应天下见禁囚徒除十恶忤逆官典犯赃持杖劫杀合造毒药开发坟墓其余罪轻重递减一等左降官各与详所犯量移如已经两度量移者宜并放还仍仰所在州府限德音到日准勅处分讫分析闻奏左降官及流人身有死者并许归葬其凤翔府所管吏军百姓等切令招葺务令归安纵与李昌符关连情非巨蠹及父兄在陇州城内事出胁从者一切不问其陇州城内吏军百姓不得辄令损伤戴礼之文务先掩骼应有未葬骸骨及横尸在路委所在长吏速与收斂藏瘞其自兵荒以来杀伤之处委所在州县以孟冬行赏死事之日於北郭除地用鸡豚设祭所贵以导和气且慰幽魂前年冬未出京之时如闻文武朝臣惶惶奔窜或因冻馁或遭锋刃遂致毙踣深可悯伤自累年来朝臣有因谪官遂致殒身或制使遽闻枉横宜令中书门下寻访各与赠官孝弟承家忠贞奉国既显扬名之道宜加布泽之荣应内外文武臣及诸道节度观察防御使随驾诸军头亡父母并准旧例各与追赠追封如有母亲见存者各与进封左右神策及随驾诸部兵士等荷戈负羽侍卫勤劳既効节以输诚寔竭忠而排难永言勲绩宜有甄酬其随驾诸部宜各与勲爵未有功臣名号其将士次第填补不得虚被衣赐有案典章如覆视不寔节度使奏取进止本判官重加贬责其边地沃壤极多岁收可望如闻耕牛素少戍卒苟安唯长蒿菜俱乏衣食委节度使良田之处更议添人均配膏腴令其耕种制置利便须令酌中其南山及平下党项尽是百姓须令保安长吏若能抚绥蕃人自然宁息切不得妄有侵扰致其怨嗟常须使商旅往来部落不得阻塞致理必先於尚俭伤风莫甚於穷奢朕苑囿

不修珠玉不宝所思敦朴每务去华如闻卿大夫士庶近者竞崇侈靡莫辨等威服翫车舆皆越制度蠹於教化朕甚悯焉卿大夫当助我纪纲为人表则宜修俭约以变浇风其京师应有奢僭违令式者闻之当行朝典应诸道申奏有草贼州县本皆齐人迫於馁冻窃聚徒侣遂肆猖狂并仰所在长吏明加晓谕有能自新有罪一切不问如稔恶不悛事状难恕委所在长吏设法擒捕不得漏网上京诸司及天下州府负犯逃走罪人今春已降德音除本罪合至死者从咸平五年以前并停追捕归还故土其数至多虑被奸人递相恐动悉委所在告谕令其乐业无致惊惶如归复者恶迹贯盈不能改过更有违犯寻勘不虚便仰并举前????一时痛断不得容隐侵害良善江淮商贾业在舟舡如闻近日官中攄借甚苦或倾夺以充运米或题关以备载军非理滞留散失财货州县虽云和雇商人焉敢请钱本求锥刀番成损折纵有冤屈岂能申论道路怨嗟莫甚於此自今以後委所在长吏切加禁断其所合供过军等舟舡唯许容载航舡便给见钱雇召如见装货物者切不得强令腾倒其州县所合雇舡脚多无本色钱物皆是率配疲人起今以後并仰以上供钱充给如有茶盐舟舡关系三司榷课者任准元勅处分自蛮寇侵扰连岁用兵耗蠹生灵海运为甚驱我赤子深入沧波覩骇浪而魂飞泛洪涛而必死继有覆溺多不上闻仍遣陪填急於风火哀其已死之衆不可复追念兹将毙之徒用延余息应江淮四道运粮所有沉覆损米损船纲官所由舡尸及元发州县合陪填者并从放免更不得校料追徵应阙海运留系勘者并一时释放唯造舡官吏须有勘覆者不在此限近日虫蝗米谷翔贵所在州府须使通流况闭籴之条着在格令近闻州府通舟舡处不得约勒商人固违勅旨等候江淮钱物到各宜优赏以身许国致命捐躯攄兹尽瘁之诚宜饰始终之典应自兵兴以来所在都头大将身歿王事未曾经赠官者仰本道各与分析闻奏量功劳优与赠官如有子孙仰本道各与补职务令存济行营将士如身歿王事者其衣粮并仰给与兄弟男侄如有父母无给养者切在安存勿令冻馁虽累有处分可一切施行或有义士忠臣图功立事身当国难身歿贼锋者宜委中书门下优与赠官兼访子孙俾沾禄任用伸激劝冀洽恩荣扈从之劳辛勤不忘若无升进何以奨酬其到兴元文武官等宜令优与迁改如已经奨擢者特与量加阶爵自贞观之後建中元年以来翊戴皇家扶持宗社勲绩已铭於鼎鼐谋猷实在於册书如闻子孙或多凌替赠太师汾阳王子仪临淮王光弼西平王晟咸宁王浑瑊赠太尉秀实顔真卿顔杲卿以下子孙宜各与一子九品正员官其子孙有才术可称委中书门下量才叙用以劝勲贤律有駮率之科是宜原宥人无险詖之路固可矜寛其陷伪庭官寮多因迫胁旋宜叙用勿使栖迟左右神策军及沿边诸镇将士或堤防藩寇或控扼封陲戴甲荷戈眠沙卧碛无抱子弄孙之乐有离乡去里之嗟自乱离以来衣粮多缺顾兹疲弊深軫朕怀盖缘诸道赋税未来致使如此宜委度支部及盐鉄使各委官吏催促江淮及三川上供钱物充给两军及边镇将士衣赐如催勘有序其官吏各与优奨如全无次第必议惩治於戏朕以寡昧托亿兆之上不能克相上帝宠绥四方履地戴天痛心疾首实在股肱叶力藩翰同心保列圣之洪基佐冲人之薄德共成兴运以副殷忧为政之方实资共理且一邑之政由乎令长一郡之政由乎牧守一方之政由乎藩翰之臣夫政修於上则化行於下可以安人治国可以阜俗康时此古今之通理也自乾符以後广明之前节制廉问之臣州牧县宰之吏或抡拟不当或詮择非良镇藩翰者则惠养抚绥之术蔑闻居牧宰者则贪恹苛虐之风益甚或淫刑滥杀或剥衣及肤业亡家破父南子北多使饥者不得食寒者不得衣奔窜道途踰藏山谷耕桑甚废旱沴相仍结为仇讎聚为盗贼冤愤之气上達於九天激怒之威横行於千里?刘郡邑屠戮生灵怀逆节者得以逞其凶桀恣为暴扰蘊忠诚者虽欲平其祸乱益费机谋既往难追将

来可保切在通加激谕渐致和平倘或刺史知惠养之方县令有抚绥之术公清克己廉慎当官绩效彰闻当与迁擢如或贪残不理害我疲人委中书门下重加惩殿仍令诸道长吏观察判官切加察访每岁具善恶奏闻自属兵戈全妨耕稼遂令墾亩尽变污莱盖以杀伤之余流亡益甚宜加招抚渐复农桑如有刺史县令招收户口开垦荒田置买耕牛修置农具者委所在观察使精加勘具数闻奏当据课効高低优加升獎朕端拱穆清思弘理道用忧勤而补过守慈俭以律身上展孝思下康庶务其於祀事尤在精崇常忧多难以来有乖敬恪至於牲币之数醯醢之宜必尽吉蠲免或简易宜委所司切切钤辖不得因循夫俭者德之恭侈者恶之大唐尧土阶三尺夏禹菲食卑宫先圣遗风後王轨范其有司合进常膳三分宜减一分六宫嫔御见在者人数不多此外不令更有添置或有因缘寇盗流落外方宜委所在长吏便与嫁遣任自营生不用送到驾前冀免虚有劳费自此诸道更不用进声乐及女弟子歌舞衣服纹组绣雕镂珠玕颇害女工实妨农事奇技淫巧往哲所讥况遇艰难尤宜俭素其诸道不得进奉纹绣宫锦雕镂轻靡彩章之物五坊鹰犬以备时蒐方当勤恤之时宁有畋游之乐其鹰犬并今解放不用更置诸道亦不须进送艰难已久增修未知展端披图良多内愧且以为白鸟丹鹊不如子孝臣忠甘露醴泉未若风调雨顺自今以後诸道所有祥瑞并不要图画进献补成教化实在贤良用副旁求必资博采宜令文武常参官举刺史县令有异政殊绩者沦滞山林有奇文异行者所期表异无或面欺孝子顺孙义夫节妇各加旌表以示乡闾父老有年九十以上者赐帛二疋粟五石仍令所在以上供物支付瘖聋跛躄鳏孤独者委所在切加存恤无所恟惶名山大川兴云致雨冀保顺成之岁宜申望祀之仪太清宫及骊山华岳南山广惠宫炭谷湫凤翔启圣宫邠州要册湫宜各差官祷谢其诸道应有祠庙标於祀典及先圣灵迹各委长吏差官精诚启告凡关百姓安危利病俾其苏息切在抚绥讹弊既多固难徧举仰所在长吏审详利害一一奏所冀凋残渐成完缉勿辜委遇副我忧勤於戏朕为人君父累属夫乱离一发言未尝不兢忧一举足未尝不愧悼徒思罪已安敢尤人中外臣寮宜悉朕意

时令

令史官条奏每月应所行事诏

王者钦若天道率由时令考六官之化修五纪之法故得灾害不生休徵沍委朕绍膺洪业於兹六年每惇政理思致和平而陰阳未调蝗水仍集天之垂诫朕甚惧焉夫正月东郊祈春赏事孟冬北陆迎寒恤孤参四序之运行稽五材之动用弗协所尚或罹於咎且事必师古礼重执文将命有司允迪厥训自今以後每入月史官条奏应所行事当斟酌古典用孚於休宣布朝廷使知朕意【开元五年十月】

岁初处分德音

勅天地以大德生羣有圣人以大宝守万物古者受命之君谓之承天之序明有所代夫岂徒然若道无钦崇命不永保帝实临汝人曷戴君朕所以每期庶乎合於仁覆之意也夫伏羲神农黄帝尧舜或诛而不怒或教而不诛彼亦何为独臻於此朕自有天下二纪及兹虽未能画

衣以禁亦未尝刑人於市而政犹踳駁俗尚浇醺当是为理之心未返於本耳凡人岂不仁於父母兄弟不欲於饮食衣服乎而卒被无孝友之名不温饱之困其故何哉盖未闻义方不识善道或任小智而为诈或见小利而苟得致远则穷继之以暴已而身受戮辱家不相保愚妄之徒类多自?狱讼之弊恒由此作吁可悲乎亦在教之不明也盖刑罚者不得已而用之天下黔黎皆朕赤子以诚告示或知所归何必用威然後致理先务仁恕宁不怀之且五常循行岂须深识六亲和睦何待丁宁自宜勉之以副所望刑措不用道在於兹今献岁之吉迎气伊始敬顺天常无违月令所由长吏可举旧章诸有姬伏孕育之物蠢动生灵之类慎无杀伐致令夭伤九土异宜三农在候聚衆兴役妨时害功特宜禁止以助春事至若家有征镇人或孤惻物向阳和此独忧悴良可悯也亦宜所由随事优恤盖不体仁无以为长人不知道无以为用心故道者衆妙之门而心者万事之统得其要会义可以兼济於人失其指归生不能自全於已故我玄元皇帝着道德经五千文明乎真宗致於妙用而有位者未之讲习不务清静欲令所为之政何从而至於太和也百辟卿士各须详读勉存进道之诚更图前席之议至如计校小利综缉烦文邀名直行去道弥远违天和气生人怨心朕甚厌之所不取也各励精一共兴玄化俾苍生登於仁壽天下还於淳朴岂远乎哉行之可至其老子宜令士庶家藏一本仍劝习读使知指要每年贡举人量减尚书论语一两道策准数加老子策俾敦崇道本附益化源朕推诚与人有此教诫必验行事岂垂空言今之此勅亦宜家置一本每须三省以识朕怀【开元二十一年正月一日】

唐大诏令集卷八十六

卷八十七之卷九十八并阙文

唐大诏令集卷八十七之卷九十八并阙文

卷九十九

钦定四库全书

唐大诏令集卷九十九

宋 宋敏求 编

政事

建易州县

置乾封明堂县制

置鸿宜鼎稷等州县

却置潼关制

置营州都督府制

改梁州为兴元府诏

城盐州诏

置宥州勅

置行蔡州勅

置遂平县勅

置孟州勅

分岭南为东西道勅

降徐州为团练勅

建徐州为感化军节度勅

升华州为兴德府勅

修复故事

诸卫队仗绯色幡改赤黄色诏

复尚书省故事制

厘革匭函进状勅

厘革诸留中不出状勅

建易州县

置乾封明堂县制

鸾台元天着象於紫微厚地区域於赤县外崇四岳伊帝阐其宏规旁别九州玄王劭其丕绩所以料兹物土画野分疆相彼人事观时济俗开物成务理则有然高祖皇帝诞应灵命肇开景业括囊轩项孕育胥庭太宗文皇帝大圣登期自天纵哲扑崑仑之猛燎拯沧海之飞流巍巍荡荡无得而名朕以虚薄夙奉瑶图承累德之鸿猷履会昌之嘉运中外禔福远迩乂安仰荐成功升禋岱嶽緼维严配祗建合宫感事开元聿光先德俾我黎献永赖隆平宁济之方实资寛简鉴寐凝想思致厥涂以为翼翼上京率土攸仰剪华抗堞贯渭流瀾城阙崇严都邑夷敞户口盈积市狱殷繁东西两县官曹尚少在於抚字事或难周至於词讼综理时阙须分所职各使兼济其长安县宜置乾封县万年析置明堂县并於京城内近南安置其户口即於两县逐便割隶应须官寮并公廨等一事以上并准长安万年两县各令所司处分奏闻庶使忧勤之怀独映於前古建元之庆长垂於後业【总章元年十一月二十日】

置鸿宜鼎稷等州制

鸾台朕闻先王疆理天下也莫不料其土宇相其地宜分五服以应财成宅三川而适通变辨方树辟协和之道以隆置郡罢侯经始之图载远而区分或异制度罕同连率法於在镐牧守议於起沛官稀则政毁地狭则人劳义在随时期於致理我大周席蓂闡化梦梓登期通三授玄扈之滨得一昇翠汾之汭维高设险耸危峯於少室在河称防导洪波於太史卜兹洛食是曰奥区物产孔殷形胜斯在朕仰膺睿命俯叶乐推即瀍涧之基恢鼎革之运珍符宝贶赉发郊藪佳气荣光昭焕州泽建明堂而陟配立清庙以严禋方闡隆周之业以光卜年之兆况成王定鼎此则余基永言朝贡实归中壤是霜露之所均当水陆之交会庶齐劳逸无隔遐迩作制王畿虽宪章於故实緼惟帝邑未折衷於新规宜弘自我之典式广来苏之泽但京兆之地旧号秦中廼睠编氓最为繁殖一州独治事多壅滞宜令雍州管内析置五州其间以雍州以西安置潼关即宜废省然以千里之内旧制通畿征赋所出事资广远又王侯设险以固其国

若无襟带何以为守雍州并所析州同州太州并通入畿内洛州南面北面各置关庶食采之地自分汤沐之邑弃繻之客更从轩盖之游其雍州旧管及同太等州土狭人稠营种辛苦有情愿向神都编贯者宜听仍给复三年百姓无田业者任其所欲即各差清强官押领并许将家口自随便於水次量给舡乘作数次进发至都分付洛州受领支配安置讫申司録奏闻朕闻人惟邦本本固邦宁将以不肃而成既庶而富欲令率土黔黎咸得遂性劳来安堵人不失业其有诸州人或先缘饥岁流宕亡归或父兄去官因循寄住为籍贯属恐陷刑名荏苒多时未经首出卫士杂色人等并限百日内首尽任於神都及畿内怀郑汴许汝等州附贯给复一年复满便依本番上下其官人百姓有情愿於洛怀等七州附贯者亦听应须交割及发遣受领并委本贯共新附州分明计会不得因兹隐漏户口虚蠲赋役并新析五州三面及雍州以西置关处所司具为条例务从省便奏闻【天授二年七月九日】

却置潼关制

鸾台山河作固肇自往图关梁是修仰惟前典朕情存大朴志在无外成臯姬险勿用咽喉函谷秦封解其衿带欲使雁行靡拾鶉居不扰而毗俗浇弊浮惰者多非所以禁絶末游作限中外事资权变理贵从宜其潼关便可由旧安置应须修补及官典兵防一事以上所司速准例处分其神都四面应须置关之处宜令检校文昌虞部郎中王玄珪即往检行详择要害务在省功斟酌古今必令折衷还日具图樣奏闻【圣历元年五月十九日】

置营州都督府制

朕闻舞干戚者所以怀荒远固城池者所以欵戎夷我国家顷有营州兹为虏障使北戎不敢窥觐东蕃由其辑睦者久矣自赵?失於镇静部蕃因此携离颇有负涂之睽旋闻改邑之叹高墉填堑故里为墟言念於此每思开复达奚饶乐郡王李大酺赐婚来朝已纳呼韩之拜契丹松漠郡王李失活遣子入侍弥嘉稔侯之节咸申恳请朕所难违宜恢远图用光旧业其营州都督宜依旧於柳城安置

改梁州为兴元府诏

勅自昔多虞顺时而动古公避狄兆永祚於岐下高帝徙蜀建雄图於汉中王迹所兴子孙是奉覲迁居之遐阻知致业之艰难矧天下为家不常厥邑王者所至四方会同崇号设都於是乎在朕遭罹寇难播越梁岷蒸庶烦於供亿武旅勤於扞卫凡百执事各奉厥司人皆竞劝物以丰给嘉乃成绩予怀不忘今大憝已除京邑甫定将旋法驾展敬园陵眷於是邦复我兴运宜其崇大以示将来古者天子省方则问百年恤百姓以颁庆赐以懋勲荣用弘布泽之恩式慰来苏之望宜改梁州为兴元府其署置官资望一切并与京兆河南府同南郑县升为赤县诸县并升为畿县见在州县官各令终考秩至考满日放选依本资处分耆壽与板授五品仍并赐绯先已赐绯者并赐紫典正等各赐勲五转百姓除先减放税钱外更给复一年洋州宜升为望州见任州官亦令终考秩并诸县官等各减两选无选可减者各加三阶应山南西道节度下将士除扈从迎驾已经改官者余并即与甄叙宣示有衆明知朕怀【兴元元年六月

】

城盐州诏

设险守国易象垂文有备无患先王令典况修复旧制安固封疆按甲息人必在於此盐州地当冲要远介朔陞东達银夏西援灵武密迩延庆保扞王畿乃者城池失守制备无据千里亭障烽燧不接三隅要害役戍甚勤若非兴集师徒繕修壁垒设攻守之具务耕战之方则封内多虞诸华屡警由中及外皆靡宁居深惟永图岂忘终食顾以薄德至化未孚既不能复前古之封致四夷之守与其临事而重扰岂若先备而即安是用思久远之谋修五原之垒使边城有守中夏克宁不有黷劳孰能永逸宜令左右神策军及朔方河中绛邠宁庆兵马副元帅浑瑊朔方灵盐丰夏绥银节度都统杜希全邠宁节度使张献甫左神策行营节度使邢君牙夏绥银节度使韩潭鄜坊丹延节度使王栖曜振武麟胜节度使范希朝各於所部简择马步将士合三万五千人同赴盐州左神策将军兼御史中丞张昌宜充右神策军盐州行营节度使权知盐州刺史兼御史大夫杜彦光可盐州刺史兼御史大夫应所板筑及缘修城杂役等宜共取六千人充其余将士皆列营布阵戒严设备明加斥堠以警不虞其修城板筑功役将士各赐绢布有差其盐州防秋将士三年满与代更加给赐仍委杜彦光具名闻奏悉与改转其防遏将士等毕事便合放归仍赐布帛有差其诸军吏士都赐帛七十疋朕情非为已志在靖人咨尔将相之臣忠良之士输诚奉国陈力忘劳勉茂功勲永安疆场必集兵事实惟衆心各相率励以副朕意【贞元九年二月】

置宥州勅

勅天宝中宥州寄理於经略军宝应以後因循遂废由是昆夷屡扰党项靡依蕃部之人抚怀莫及朕方宏远略思复旧规宜於经略军置宥州仍为上州郭下置延恩县为上县属夏银绥观察使【元和九年五月】

置行蔡州勅

淮蔡近郊久隔皇化本殲凶虐在拯生灵况今贼党携离相继効顺思俾阡危之俗尽沾收养之恩劳徕招绥今之所切其新除蔡州刺史杨元卿宜令与李愬商量计会且於唐州东界选择要便权置行蔡州如百姓官健有归顺者便准勅优恤存抚令知国恩必使全活【元和十年三月】

置遂平县勅

勅文城栅将士百姓等胁污之中同心効顺率此危疑之俗尽为忠义之人言念乃诚思加獎异爰图改邑之制用表移风之美其蔡州行吴房县宜改为遂平县仍於文城栅南新城内置便为上县权隶唐州【元和十二年四月】

置孟州勅

勅昔冯异之守孟津已建军号近光弼之保伊洛先据三城盖以河有造舟之危山有摧轮之险左右机轴表里金汤既当形胜之地实为要害之郡今所置制岂限常规积万庾於敖前尤资地利列二矛於河上须壮军声其河陰宜割属孟州仍改为望县其河清县却还河南府收管县官等并准前勅处分其东都镇遏兵马依前属东都防御使郑滑汝州防戍兵各一千令敬昕权挥使平後续有处分【会昌三年十月】

分岭南为东西道勅

勅岭南分为五管诚已多年居常之时同资御扞有事之际要别改张邕州西接南蛮深据黄洞投两江之犷俗居数道之游民比以委人太轻军威不振境连内地不并海南宜分岭南为东西道节度观察处置等使以广州为岭南东道邕州为岭南西道别择良吏付以节旄其所管八州俗无耕桑地极边远近罹寇扰尤甚凋残将盛藩垣宜添州县宜割桂州管内龚州象州容州管内藤州岩州并隶岭南西道收管【咸通三年十月】

降徐州为团练勅

勅徐州本贯支郡先隶东平建中初李洧以畏忌归降遂创徐海使额贞元初张建封以威名宠任特贴濠泗两州当时缘拒扞淄青犄角光蔡务张形势广树藩垣自寇孽冰销区域无事武宁一道翻长乱阶曾靡悛心殆成逋数须为制置以削凶残徐州宜改为本州团练使除当州诸县镇外别更留兵二千人隶属兗海节度使收管濠州本属淮南节度收管宿州地居垆口路厄彭门北接睢阳南临淮甸当漕运之要盖水陆之冲宜置全师以临列郡仍置宿泗等州都团练观察处置等使便以宿州为理所王式且充武宁军节度使兼徐泗濠宿等州制置使其兵马除留在徐州外仍令王式与玄质量其多少分配宿州团练使及泗州兵马留後濠州涡口城使下如人数犹多即分隶属淮南浙西天平兗海淄青等道逐便收管各给本分衣粮其家一任相随官中接借发遣令其存济其割配诸道将士缘皆有家属须令装束每人各赐绢两疋以户部物充其徐州诸县先有镇堡处亦量要害轻重差配人数守捉武宁军大将如素有军功及营官已至中丞大夫以上者各具名荐闻别加委用其余割送兗宿两道军前收管如情愿住徐州者亦听稳便王式玄质一切共为制置待公事分配总毕必知宁帖无事即令王式与崇宪等自领两道兵马直到汴州分付仲齐及滑州节将各押领送归本道王式玄质俟许滑将士归後既无公事便赴阙廷别加劳獎其衙内银刀等将官健有逃匿未捉获者若能束身首所在归役者便一切不问仍准前勅割配诸道与衣粮并家口任去勅到後一月内不出陈首者即不在此限余准诏旨处分【咸通三年八月】

建徐州为感化军节度勅

勅徐州地当沛野军本骁雄实为壮国之都固叶建侯之制况山河素异土俗甚殷岂欲削卑挫其繁盛盖缘此稔祸或至乱常罪由已招孽非天作桂林叛卒继有逆谋涂炭生灵首尾两

岁杀伤黎庶污染忠良所不忍言寻皆翦?是以卑其镇额隶彼藩方近属大兵以来饥年荐至且闻军人百姓深耻前非愿行旧规却希建节朕每怀轸念思致雍熙欲示渥恩特议改易既崇军府要备供须宣赐宣徽库内绫绢一十万疋助其宴犒必获周丰累岁用兵甚费国力特与借助功在节量如初有胁从後成亡命或未还乡里或逃匿诸州加意招携各归本业若称自乐所止亦可循其私情贵衆士获安恐一物失所用期昭泰必在均平典故具存废兴不昧仍更镇额盛彼军威冀覩封疆永保宁谧其徐州都团练使仍改为感化军节度徐宿豪等州观察处置等使【咸通十一年十一月】

升华州为兴德府勅

勅有虞氏之为君始言省狩周襄王之告难乃曰出居或肆覲於他邦或播迁於近服然则地图之内车辙所临备庶官而取象拱辰入九贡而以时述职是云守宇皆可建都昔者德祖省方平戎服国昇汉中之列郡同诸府以正名藩翰之光典章寔重朕越在关辅屡经岁时苟宽失驭之忧盖获视朝之所镇国军节度使韩建始者星驰感愤雪涕奉迎邀天力以来同激人情而共固以兹驻蹕安类覆盂邑无夜犬之惊野有春耕之乐今则元龟告吉六马将还望山河而信是金汤顾宫室而若无风雨眷言至此我寔怀之俾慰衆心爰遵故事宜改为兴德府其所署官员资望一切与五府同郑县升为次赤诸县为次畿其将校等并赐华州安驻功臣【光化元年八月】

修复故事

诸卫队仗绯色幡改赤黄色诏

三王继统质文互於相袭五德承运服色遵於必正旗常改制駢翰异宜所以表军国之容合声明之度事之大者安可因循而已焉国家应枢轴之期清黄锺之历宪章垂范运既属於惟新旗帜用色义必在於改故顷者俯纳羣议式明统绪故得天人致和风雨时若岂朕躬菲德克广睿图寔累圣弘休允应景运稽古之大既有昭明文物之资理宜详正其诸卫应队仗所用绯色幡等改为赤黄色庶克遵於通变谅有叶於从宜其诸节度并营内军使等亦宜准此【天宝七年七月】

复尚书省故事制

唐虞之际内有百揆庶政惟和至於宗周六卿分职以倡九牧书曰龙作纳言帝命惟允诗云仲山甫王之喉舌皆尚书之任也虽西汉以二府分理东京以三公总务至於领録天下之纲练核万事之要邦国善否出纳之由莫不处正於会府也令仆以综详朝廷丞郎以弥纶国典法天地而分四叙配星辰而统五行元元本本於是乎在九卿之职亦中台之辅助小大之政多所关决自王室多难一纪於兹东征西伐略无宁岁内外荐费徵求调发皆迫於国计切於军期率以权便裁之新书从事且救当时之急殊非致理之道今外虞既平罔不率俾天时人事表里相符宜昭画一之法大布惟新之令甄陶化源去末归本魏晋有度支尚书校计军国

之用国朝但以郎官署领办集有余时艰之後方立使额参佐既衆簿书转烦终无弘益又失事体其度支使及关内河东山南西道剑南东川西川转运常平盐鉄等使宜停仪礼之本职在奉常往年置使因循未改有乖旧制寔旷司存委太常卿自举本职其使宜停汉朝丞相与公卿以下五日一决事帝亲断可否且国之安危不独注於将相政之理乱固亦在於庶官尚书侍郎左右丞及九卿参领要重朕所亲倚固当朝夕进见以之匡益也顷以边陲未宁日不暇给又省事之务多有所分简而无事旷而不接今大举纲目重颁宪章并宜详校所掌明徵典故一一具面陈损益如非时须有奏议亦听诣阁请对当览其意择善而从朕受昊天之成命承累圣之鸿业斋心涤虑夙夜忧营顾以不敏不明薄於德化致使旧章多废至理未弘其心媿耻终食三叹虽诏书屡下以申赉恤而朝典未举犹深鬱悼思与百辟卿士励精於理俾国经王道可举而行各宜承式以恭尔位【大历五年三月】

厘革匭函进状诏

勅匭函所设贵達下情近省所投文书颇甚烦碎或论列祖曾功业或进献自己文章无补国经有紊时政极言不讳岂假匿名今後如知朝廷得失军国利害寔负冤屈有司不为申明者任投匭进状所由即时引进不得拥滞余不在投匭之限宜委匭使准此仍留副本【开成五年四月】

厘革请留中不出状诏

近因李延龄告李芳固大逆其状请留中不出朕亲览之际已得其情及令鞫问果辨欺诈比者朝官论人过失亦请留中且嫉恶除奸人臣明义知其隐慝足得显陈深务盖藏必因嫌恨事不由於直道情乃近於谗邪危人者得骋私怀罹谤者何从自辨无裨政理适长冤诬昔汉宣帝时章文必有敢告之字乃下前王令典寔可遵行宜起今後应有朝官及上封事人进章表论人罪恶并须证验明白状中仍言请付御史台按问不得更云请留中不出如军国要务机事密切者不在此例推勘後如得事寔必獎奉公苟涉加诬当令返坐如此则人知畏法事免构虚各示中外令知朕意【会昌元年六月】

唐大诏令集卷九十九

卷一百

钦定四库全书

唐大诏令集卷一百

宋 宋敏求 编

政事

官制上

致仕官在任官上诏

定三品至九品服色诏

置三师诏

厘革伎术官制

择拣刺史诏

令御史録奏内外官职事诏

命新除牧守面辞勅

诫百官与供奉人交通制

诫励御史制

简京官为都督刺史诏

复置十道按察使勅

诫励尚书省官勅

洗涤官吏负犯勅

诚励诸州刺史诏

刺史令久在任诏

京官都督刺史外送用勅

诚励吏部兵部礼部掌选知举官勅

诚励兵吏部两司勅

置十道采访使勅

处分县令勅二道

处分选人勅

吏部引见县令勅

官制上

致仕官在见任官上诏

尚齿重旧先王以之垂范还章解组朝臣於是克终释菜合乐之礼东胶西序之制养老之义遗文可觀朕恭膺大宝宪章故实永言遗事弥切深衷然情存稽古踵世浇季而策名就列或乖大体至若筋力将尽桑榆且迫徒竭夙兴之勤未悟夜行之罪其有惊心止足行堪激励谢事公门收骸闾里能以礼让固可嘉焉内外文武羣官年在致仕抗表去职者朝参之班宜在见任官上【贞观二年九月】

定三品至九品服色诏

车服以庸昔王令典贵贱有节礼经彝训末代浇浮采章讹杂卿士无高卑之序兆庶行僭侈之仪遂使金玉珠玕靡隔於工贾锦绣绮縠下通於皂隶习俗为常流遁忘反因循已久莫能惩革朕继踵百王钦承宝运思弘典制垂范後昆永鉴前失义存厘改其冠冕制度已载令文至於寻常服饰未为差等今已详定具如别勅宜即颁下咸使闻知【贞观四年八月】

置三师诏

朕观前代明王圣主曷尝无师傅哉况朕踵百王之末智不周物其无师傅何以匡朕之不逮诗不云乎不愆不忘率由旧章宜依古道置三师之位【贞观六年二月】

厘革伎术官制

量才授职自有条流常秩清班非无差等比来诸色伎术因营得官及其升迁改从余任遂使器用纰缪职务乖违不合礼经事须改辙自今本色出身解天文者进转官不得过太史令音乐者不得过大乐鼓吹署令医术者不得过尚药奉御陰阳卜筮者不得过司膳寺诸署令【神功元年闰十月】

拣择刺史制

朕闻彰善瘅恶有国之常典纠寃济猛为政之通规朕以薄德谬膺明命瞻言赏罚未适时宜致使亿兆未安贤良未进小人未退贪吏未惩亡流者未归怀冤者未理仓储府库未免其空卿士大夫未任其职在予之责有愧良深然不能致君於尧舜者亦羣公卿士之所耻也今当励精为政革弊创业卿等将何以规补致使咸亨各以状闻朕当亲览且共理天下者在良二千石宜令中书门下於外内官内拣择必取才望兼优公清特着可以宣风导俗者具以名闻但有司承寃共为苟且事多????咎无复纪纲各令本司长官审善恶有才职不相当限十日进状【景云元年十一月】

令御史録奏内外官职事诏

寅亮天功弼谐庶绩宰臣之任也彰善瘅恶激浊扬清御史之职也政之理乱寔此由焉朕丕膺鸿绪三年於兹日旰而食夜分而寝万乘非乐四海为忧思欲小康蒸人允答羣望惩劝之诏岁月相仍然耳不闻弹劾之声目未观刚正之举岂内外吏咸未徇公耶将有司回避隐不闻耶每念於此怒焉如疚言而不行责在薄德知而不奏谁其过欤御史等不树纪纲合从屏黜但缘未亲处分志在含忍宜许自新以收後效内外文武官有老弱疾患贪暴侵渔不举职事材职不相当者三日内各録状进外州刺史上佐多不简择内外之职出入须均京官中有才干堪理人者量与升官有清慎者与京官【景云二年十月】

命新除牧守面辞勅

勅自古帝王莫能独理爰树侯伯所以分政则今刺史是已盖欲亨之毒之纳於富壽不夭不札以致和平朕受天睠命作人父母殷鉴远图罔知攸济顷者都督刺史惟良是求而寂寞厥声孰副虚想岂六条察举未询事以考言将三载黜陟不责寔而求当遂令进之则易吏烦於送迎退之则难人务於苟且岂所谓安孤老长子孙之意耶汉宣由是兴言刘广为之长叹诚有旨也今事谋伊始邦政维新俾凝庶绩思改前弊自今以後都督刺史每欲赴任皆引面辞朕当亲与畴咨用观方略至任之後宜待四考满随事褒贬与之改转诸州上佐五品以上应改转限亦宜准此夫类其才则适用久其事则有恒致用执恒未闻不至於理也凡尔在位可弗勉哉【先天二年七月二十四日】

诫百官与供奉人交通制

勅朕闻事君者必在至公行己者贵於独立如闻供奉近侍之輩比日因循广有招携未能周慎爰与朝列颇相闕茸苟非亲表不合数至门庭多行请托便涉趋附眷言此弊须革前非宜体朕怀深自戒励自今以後百官辄不得与入内供奉人往还

勅励御史制

勅御史之职邦宪是司先正其身始可行事当须举直错枉不避亲讎纠慝绳违务从公正如闻????过陰自鼓动不即弹射自树恩私曾无忌憚仍有请托将何以寄之鷹隼用屏豺狼如此当官深负所委自今以後不得更然

简京官为都督刺史诏

朕闻天为大者孰先於育物最灵者莫甚於爱人故树之后王以康兆庶朕缅鉴前烈深惟远图惧德之不修化之未偃寅畏夙夜如临泉壑然则畴咨命於四岳黜陟存乎三载既已百姓为心非以一人独理今之牧守古称侯伯贤者任之则循良之迹着不贤者任之则愁苦之声作每冀精於所择委之俞往岂时或颓靡苟且尚多吏之殊尤寂寥不嗣静言政要朕用恍然间岁水旱周於郡国仓廩不蓄闾阎荐饥加以出摄颇多冗官增弊至於处置皆凭刺举当於京官内简宏才通识堪致理兴化者量授都督刺史等久在外藩频有进状者量授京官使出入常均永为恒式课最超等必议升迁循默守常必加黜免昭昭赏罚可不慎欤昔国侨相郑以致和平曹参相齐贵於清静清静则不扰不扰则和平和平则不争不争则知耻爱费而与休息除烦而从简易自当农者归畎亩蚕者勤纺绩既富而教乃克有成道德齐礼不远斯复庶几在位弘朕此心焉【开元二年正月】

复置十道按察使制

古者圣王协和万邦畴咨四岳柔远能迩明目达聪以变於人也自朴散醇醪割方四直失於德者格之以礼失於礼者助之以刑故惧罗网而畏简书必振其纲而操其柄庶乎政之要也间岁天下诸州岳牧先充本道按察诚以今之刺举昔之连率盖欲为吏之黜陟以审人之愁苦中念作奸犯科获罪相次弃木或尤於拙匠采葑不遗於下体由是申命有司咸多叙用至於按察暫令休罢夫泉有鱼矣虽见则不祥林有兽焉而为之不采与其存而勿用孰若狎以玩之俾乂於时复修其银青光禄大夫政益州大都督府长史姚雋处置兵马使上柱国兗国公陆先等早蕴宏量深甄大体清能励俗仁以维风必将检驭权豪昭明淑忒宜兴化以树善仁责成而求当可依前件余各如故一事以上并准旧例处分本道所隶之州有偏远不稳便者仍令所司量宜分割永为定额讫奏闻主者施行【开元二年闰二月】

诫励尚书省官勅

尚书礼阁国之政本郎官之选寔藉良才如闻诸司郎中员外怠於理烦业维养望凡厥案牒每多停拥容纵典吏仍有货财欲使四方何以取则事资先令义在能改宜令当司长官殷勤

示语并委左右丞勾当其与与夺不当及稽滞稍多者各以状闻【开元二年六月】

洗涤官吏负犯制

黄门朕闻顔回知过不无过也蘧瑗知非不无非也孔子曰过则勿惮改过而能改善莫大焉此则古之贤人所未能免朕只膺骏命光阐鸿猷思革颓风以清贪吏作程者不要於密贵於必行行令者不要於严贵以适中比岁或使者廉按或宪司绳纠未能发明大体颇亦委曲小疵殊异恢恢之言遂行察察之事一从过误永点彝伦铨管不许其弃瑕簿书寧容其刷耻怀才则每岁见斥登用则终身蔑闻静言思之诚未为得夫学以从政禄以代农不可易业从政不可紊序永鉴前弊当无废人改而更张朕之志也官人负犯经洗涤赦宥者宜并除痕选用量旧资依选例处分诸使通状事或有枉断岂无失承前要须却累通状人当始为雪各惧罪及致有冤人其诉枉屈人任申牒刑部事状似枉者为牒本使勘问尽其道理无本使者追本案为其寻究应雪者本司断後委左右丞更审详覆然後牒所由司除痕并牒紫微黄门附簿诸处百姓若被勾徵使人贪功既不纳理州县承勅又不敢放或已输已役重被徵收或先死先逃勒出邻保欲令贫弱何以安存自今以後有隐欺须勾者宜勾当年若事连去年者亦通任勾隔年以去更不在勾限其官典及前官隐贓在腹内者不在此例布告天下咸使闻知【开元四年四月四日】

诚励诸州刺史诏

朕闻御寰瀛者不可以乖化养黎献者必存於从理故专一方亲百姓有愁苦之声非牧伯之德所以精求台阁历选缙绅常举百寮之要以光出刺之重虚想佳政用成庶绩自冬入计者则循名责实询事考言虽无等差终未有殊异得非岁时或浅风教未洽耶故一切不迁各再临所典至於敬耆老恤弱止奸盜伏豪强人不忍欺吏不敢犯田畴开垦狱圉空虚徭赋必平逋逃自复门杜请谒庭无滯留若是者乃闻举职思可以力致至於弭灾眚集休祥尚德义崇礼乐儒风大长化道旁流耕夫克让织妇知节草木不夭昆虫咸遂扇彼淳源登兹壽域若是者亦弘之在我仁远乎哉岂惟禄秩就加当以公卿入拜其或靡副朝獎不恭朕言陟既有之黜故宜及勉旃俞往各勤我之休命【开元五年七月】

刺史令久在任诏

与我共理惟良二千石久於其政然後可化成前代以来颇多侥幸但因入考即有改转自今以後非灼然应黜陟者更无迁易敦此风俗冀革苟且又旧例别驾皆是诸亲顷年以来颇多余色先授者未能顿已此後自循旧章去冬有因计入朝不可更令却往过事考了并量材叙用【开元六年二月】

京官都督刺史中外迭用勅

勅刺史古之通侯公卿国之重任百揆时叙必在得贤万邦咸宁期於共理郎官出宰抑惟前

事方伯登台闻之往躅顷来朝士出牧例非情愿缘沙汰之色或受此官纵使超资尚多怀耻亦有朝廷勲旧黜镇外台却任京都无辞降屈且希得入衆以为荣为官择人岂合如此自今以後诸司清望官阙先於牧守内精择都督刺史却向京官中简授其台郎以下除改亦於上佐县令中通取俾中外迭用贤良靡遗庶绩其凝九功惟允即宜铨择以副朕怀【开元八年七月】

诚励吏部兵部礼部掌选知举官勅 孙逖

勅官邪则败国赏僭则利淫自昔至言政之明诚朕祇膺大宝岂忘兢惕临御以来且踰二纪期大道之成化冀天下之为公凡百卿士岂不协力而选举之司委任尤重若名器失序则劝沮何施近者流外铨曹颇多踰滥有尘清议寔紊彝章胥吏之徒虽则微贱仕进之路终为厥初必澄源流无杂泾渭不慎於细其伤则多小既不可不惩大亦不可不诫其吏部兵部礼部掌选知举官等各宜飭励当尽至公必须杜邪枉之门塞请托之路何止一变仍图永清且铨综九流必仗贤俊取诸赏鉴立断可知何至淹时致稽团奏开门之後余甲未终既滞官曹长前罪过旧选未毕新格复修此乃因循实为烦弊自今以後吏部选人三月三十日以前团奏事毕兵部二月内毕其流外铨及武举专委郎官恐不详悉共为取舍适表公凭每至留放之时皆就尚书侍郎对定既上下检察庶在得人而覆车尚存殷鉴非远法不可废宜识朕怀

诚励兵吏部两司勅

勅设官分职将以奉法禁非实在上下叶心中外一德共熙庶绩用絶奸源如闻百司颇皆寬纵遂令胥吏得以挟私近者兵部令吏因令推鞠或在选曹增减文状虽小人过则惟其常永言在司官亦为疎略朕今申之寬宥许以自新庶观将来冀能効节至如兵吏两司是掌衡镜进趋者非一揆奸巧者亦百端推而言之或所未免无谓幽昧朕皆察焉宜各尽心靖恭尔位

置十道采访使勅 张九龄

勅岁比不登人或流冗言念菜色朕用疚怀而牧宰是寄惠养犹缺黎元为本赋歛未均当宁思之良所於邑且十道为率六察分条周汉以还事有因革帝王之制义在随时其天下诸道宜依旧逐要便置使令采访处置若牧宰无政不能纲理吏人有犯所在侵渔及物土异宜人情不便差科赋税量事取安朕所责成贵在简要其余常务不可横干其便宜令中书门下即简择奏闻朕将亲览【开元二十二年二月十九日】

处分县令勅二道 张九龄

勅旨语诸县令等自古致理其在命官今之所切莫如守宰朕每属意尤重此官有善者虽远必升无能者纵近而废固已维取才寔非务官资事亦坦然天下所见而浮竞之辈未识朕怀俾其宰邑便为弃地或以烦碎而不专意或以僻远而不畏法侵染成俗妨夺为恒嗷嗷下人

於何寄命朕所以寢兴軫念思有以濟之故令吏曹精選才干卿等各膺推擇用簡朕心若能化績有成聲寔相副朕必有超擢終不食言如其謂人不知唯利是視徒速負敗兩喪身名智者所圖應不至是各宜勉勵以副勤屬【開元年】

又

勅新除河南府密縣令張稷等令長之任黎庶尤切比嘗選衆未盡得人然而勇進之流乃非其好矯弊之政豈無所革令既各膺獎用當盡良能周月有成聲謠若着所列清要唯待才賢既爾有聞不患無位各宜勉勵以副朕心【開元年】

處分選人勅

勅朕憫茲下人不忘鑒寐庶乎富教寄在牧宰所以推擇才能親加考核卿等各膺時用副朕虛求亦既得人伫聞佳政若能精銳為理聲績有稱即當待以不次信斯言之可復如其政不能舉行且有遺豈獨敗於厥躬必將坐於舉主此亦明訓不得不然各宜勉之以成名節今賜卿少物各宜領取並於朝堂坐食食訖好去【開元年】

吏部引見縣令勅

唐虞致理命以子男周漢建官間以令宰朕稽古前?寤寐全才委之銓衡慎擇銅墨至於上敷朝政下安淳人親其農桑均其力役使惇嫠者視之猶父母俾匱乏者賴之以安全然後八使類能六條舉最擢以含香粉署獎以秋簡霜台是乃立身効官移忠入仕榮家報國豈不美欤若徇己冒私擾人敗政有懷潤屋無懼害公豈唯刑網貽忧抑亦名節隳替蓋士君子之不取亦名教之罪人鴻漸於盤豈不勉哉今卿等將欲赴官朕之所言提撕之耳所謂听訟吾猶人也必也使無訟乎況今之人也與古人不殊今之官也與古官無別則谷璧銅印其猶昔榮而卓茂魯恭迴然無繼將獎勸之道不致豈淳朴之風未還抚事君臨載深惕厲今者庶乎卿等能副此心賞既超倫刑必當法各宜自勉敷我皇猷無謂蓋高四聰必達并即於朝堂坐食食訖好去【天寶十三載五月】

唐大詔令集卷一百

卷一百一

<史部,诏令奏议类,诏令之属,唐大诏令集

钦定四库全书

唐大诏令集卷一百一

宋 宋敏求 编

政事

官制下

改太史监为司天台勅

加散骑常侍员品诏

升中书门下品秋诏

减京畿官员制

停河南淮南等道副元帅制

减京兆尹以下俸钱制

减刺史县令録事参军诏

处分别驾令録勅

复先减官员勅

赐常参官钱勅

置上将军及增诸卫禄秩诏

朝臣薨卒给俸料賻赠诏

罢百官正衙奏事勅

停河南水陆运使等勅

停诸道度支营田使勅

停宰臣监搜诏

条贯两省台官导从诏

厘革选人勅

文武官参用诏

官制下

改太史监为司天台勅

建设邦都必资悬象分别曹署皆应物宜灵台二星主观察云物天文正位在太微西南今兴庆宫上帝庭也考符之所合置灵台宜取永宁坊张守珪宅以充司天台所司量事修理【乾元元年二月】

加散骑常侍员品诏

朕欲左右有人朝夕进善发自中禁刑於四方献替於可否之间论思於密勿之际通天下之志断天下之疑作而行之道不远矣与我共此者唯左右常侍乎散骑之班日亲帷幄切问近对之地文章侍从之臣贤不厌多才不厌盛寔将助益广以置官重其任者崇其位劝其善者厚其禄中书门下省各加置散骑常侍四员其官并为正三品禄俸之外优给杂料仍委中书门下商量处分必求望寔以寘周行臣哉邻哉汝为汝翼慎兹高选副朕意焉

升中书门下品秩诏

春秋以九命作上公而谓之宰则宰臣者三公之职汉制中书令出纳诏命典枢密侍中上殿称制参议政事魏晋以还益重其任职有分於公府事不综於尚书虽出纳启沃之谋未专宰相之称所以委遇斯大品秩非崇至於国朝寔执其政当左辅右弼之寄总代天理物之名典领百寮陶熔景化岂可具瞻之地命数不加固当进以等威副其位望侍中中书令宜升入正二品门下中书侍郎历代清贵所掌要重多用此官参於枢务以地则密以阶未峻宜升入正三品式存班制永作典常其见任官宜依新升官品

减京畿官员制

夫计人而置官度事而赋任因时立制损益在焉吏足以理人人足以奉吏则官称其事禄当其秩然後上下相乐公私不匮昔光武时及魏太和中并减吏员兼郡邑致理之道此其一隅今连岁戎旅天下凋瘵京师近甸烦酷尤重比屋流散念之惻然人寡吏多困於供贡欲其苏息不可得也设令廉耻守分以奉科条犹有禄廩之烦役使之弊而况贪猾纵欲动踰典章作威以虐下厚歛以丰己者乎古者惟置县大夫一人牧养百姓奚必贰佐分掌而後理耶且京畿户口减耗大半职员如旧何以堪之岂可以重困之人供不急之吏使人不倦其在变通制事之宜长安万年各减丞一员尉两员昭应减县丞一员主簿一员尉两员好畤同官美原各减丞一员尉一员其所减官据阙便停如无阙简择勒停应得减官委吏部条件处分

停河南淮南等道副元帅制 常袞

勅古者分建戎号以张威武必因事而制亦有时而戢以天下征伐之重方镇之大宜有总一则以元老抚和之乃者国家平定之後复理之始与其休息则以诸侯训缉之自河之南至於沧海往属难故久劳师徒连城之镇累百授钺之将十数主其经略委在台臣号令耳目以之咨稟服柔灭叛罔不肃清今万里无尘思解戎备况分阃之重各任勲贤悉心忧国所统皆理何必更有所属适重其烦军书取决又失要会息人罢镇诚亦便之河南淮南西山南东等道副元帅宜停其兵马宜充东都留守兵马张延赏宜权知东都留守事常休明宜充副留守兼东都镇守兵马使

减京兆尹以下俸钱制 常袞

勅輶轂之下封畿之内承前户口五千余万京兆禄廩不过二百石俸钱不过三十贯降至下吏差次可知自顷艰虞且踰星纪岁有事边之役人多尽室之行闻井萧然百不存一而府县之俸十倍平时官高者因其使名数处请受位卑者假以职掌恣加优给致令所典之务移在他曹虽齐等伦顿异丰薄皆是常税之外重歛而供侵弊则多因循未改减我军国之用困其疲耗之人岂计人置官之意度农制禄之法也四方取则其若是乎比下诏书务於勤恤将求致理切於澄源遂委中书门下条録奏闻朕躬亲括巨细精详览其名实之状深叹过差之极革其既往制在惟新爰据高卑以之均节使人足以奉职吏足以资家务有不急悉皆除去仍量闲剧权省官员胥徒厮役亦有蠲减费用既少困穷自安唯出正租更无徵率其京兆府官及县官月俸除正断外不得辄有增加如判司参军丞簿尉等有犯科録事参军及县令如令长及録事参军及少尹有犯坐京尹画一之令当在必因劝百之义固非末减各儆於位无近於刑

减刺史县令録事参军诏 杨炎

勅旨弛张刑政兴化阜俗使吏息贪污之迹下无愁怨之声者不惟良二千石亦在郡主簿县大夫亲其教训举其纲目条察善恶惠养困穷方伯得以考其殿最故汉置刺史临课郡国周

制官刑糾繩邦理其義明矣朕思舉舊典以清時俗頻詔長吏精擇此官如聞近日猶有奸濫或未習政事素無令聞因依請托尸曠祿位邪枉附法懦弱廢官人弊於下怨歸於上聞并減耗賄政日聞豈所謂建明職守共副憂勤者也又別駕秩位頗崇若郡守廢闕掌同其任舊制補署或匪其才一不稱職則多傷害自今以後別駕縣令錄事參軍有犯贓私及暗弱老耄疾患不稱所職戶口流散者并委觀察節度等使與本州刺史計會訪察聞奏與替其犯贓私者便禁身推問具狀聞奏其疾患者准式解所職老耄暗弱及無贓私才不稱職者量資考改與員外官余官准前後勅處分其刺史不能覺察仰觀察節度使具刺史名品聞奏如觀察節度管內不能勾當郎官御史出入訪察聞奏

處分別駕令錄勅【文同上篇】

復先減官員勅

王者建設庶官允厘九有量戶口之衆寡定都邑之盛衰制其職員約以名數俾吏足成務而下克奉公其有弛張必在通濟朕頃緣蕃戎棄信深犯封疆興師備邊資用日費而黎人困弊難更徵求遂權減天下州縣官員姑務集事皆由朕不明不德以至於斯近聞新授官人皆已隨牒之任扶老携幼盡室而行俸祿未請歸還無所嗷嗷道路實疚於懷雖蒸庶之間供應有省而衣冠之弊流寓無依苟便於時豈憚沿革凡百君子所當悉知其先減官員并宜仍舊

賜常參官錢勅

百辟卿士實惟股肱頃屬艱虞損家徇節累經寇難靡不困窮洎復上京荐遭歉歲官俸既薄公田不收外弓導從之儀內懷凍餒之戚朝列尚爾蒸人何堪軫於深衷良用愧惻應文武常參官等宜共賜錢七萬貫委度支據班秩職事及所損職田多少量等級從今至明年四月以來隨月支給凡厥多士宜悉朕懷【貞元年】

置上將軍及增諸衛祿秩詔

左右金吾及十六衛等將軍故事皆擇勲賢出鎮方隅入居侍衛其左右金吾等衛自天寶艱難以後雖衛兵廢闕而品秩本高此誠文武勲臣出入遷轉之地宜增祿秩以示優崇并宜加給料錢及隨身干力糧課等條件處分以優寵功臣令其充給仍舉故事置武班朝參其廊下食等亦宜加給其十六衛各置上將軍一人秩從二品左右金吾上將軍俸料等并同六軍統軍諸衛上將軍次於統軍支給將求致理必藉兼才文武遞遷不令隔限自今內外文武闕官於文武班中才望相當者參叙用仍各依本事於本衛量置衛兵所司即條件聞奏【貞元年】

朝臣薨卒給俸料賻贈詔

君臣之際義莫重焉每聞薨殂深用惻悼宜厚哀榮之禮以申終始之恩文武朝臣有薨卒者

自今以後其月俸料宜全给仍更准本官一月俸料以为贖贈若诸司三品以上官及尚书省四品官仍令有司举旧令闻奏吊祭之礼务从优厚用称朕怀【贞元十年正月】

罢百官正衙奏事勅

朕励精庶政博求嘉言比者百官正衙奏事至有移时者公卿庶寮属当寒暑为弊亦深在於朕意岂谓优礼自今勿正衙奏事如陈奏者宜诣延英门请对【贞元元年】

停河南水陆运使等勅

朕於百执事羣有司方澄源流以责寔効转运重务专委使臣每道有院分督其任今陕洛漕引悉归中都而尹守职名尚仍旧贯又诸道都团练使足修武备以靖一方而别置军额因加吏禄亦既虚设颇为浮费思去烦以循本期省事以便人其河南水陆转运陕府转运润州镇海军宣州采石军越州义胜军洪州南昌军福州静海军等使额并宜停所收使以下俸料一事以上各委本道充代百姓阙额两税仍具数闻奏如闻河南府两处比来所给皆是置本息利不破工钱勒便添充两处食钱杂给不要徵纳庶我爱人之心岂止於惜费立制之意必在於正名【元和五年】

停诸道度支营田使勅

事关军旅并属节制务系州县悉归廉察二使所领孰非管辖诸道度支营田承前各别置使自艰虞以後名制因循方镇除授之时或有兼带此职遂令纲目所在各殊今者务修旧章思一法度去烦就理衆心为宜唯别勅置营田处置使且令仍旧其忠武凤翔武宁魏博山南山东横海邠宁义成河阳等道度支营田使及淮南度支近已停省其余诸道并准此处分【元和十三年七月】

停宰臣监搜诏

元首股肱君象臣类义深同体理在坦怀夫任则不疑疑则不任自魏晋以降参用霸制虚仪搜索因习尚存朕方推表大信寘人心腹庶使诸侯方岳鼓洽化道夷貊飞走畅泳性分况吾台宰又何间焉自今以後紫宸坐朝衆寮既退宰臣复进奏事其监搜宜停【太和年】

条贯两省台官导从勅

勅宪官之职在指佞触邪不在行李自大侍臣之职在献可替否不在道途相高并列通班合知名分如宜喧竞亦已再三既招人言甚损朝体其省台与供奉官同道听先後而行遇途任祇揖而过其从人各随本官之後少相僻避勿信冲突又闻近日以来应合有导从官手力多者街衢之中行李太过自今以後应有合导从官行李传呼前後不得过三百步【太和年】

厘革选人勅

朝廷悬爵赏之科设抡材之政言其藻鉴在乎清通况当求理之时方切任贤之日将宣至化实赖平衡宜於取舍之间必叶公忠之论如闻羈栖旅食贫苦选人守数考而方及选期望一官而时希寸禄注唱才毕旋又更移多被逗遛莫遂便稳脂膏之地须因有贿而升迁避之官即是孤寒所受言斯猥弊乃积岁年纵有条流寻亦隳改况今行在方溥渥恩不欲使叹惋栖迟吁嗟屈滞归乎允当倚在有司宜令中书门下切在条流如选人寔有考课堪理繁剧者临时注拟可以甄升系生民之惨舒在铨衡之慎择勿令留滞切速指挥仍将朕意宣示百寮及吏部三铨并选人等各令知悉【中和四年二月】

文武官参用诏

文武二柄国家大纲东西两班官职同体咸匡圣运共列朝廷品秩相对於高卑禄俸皆均於厚薄不论前代只考本朝太宗皇帝以中外臣寮文武参用或自军卫而居台省亦由衣冠而秉节旄足明於武列文班不合清浊优劣近代浮薄相尚凌蔑旧章假偃武以修文竟弃本而逐末虽蓝衫鱼简当一见而便许升堂纵拖紫腰金若非类而无由接席以是显扬荣辱公别重轻遽失人心尽隳朝体致其今日寔此之由须议改更渐期通济今文武百官自一品以下逐月所有料钱并须均匀数目多少一般支給兼命使诸道亦依轮次差遣既就公平必臻交泰叶羣情於天下崇故事於国初凡百庶官宜体朕意【天佑二年四月】

唐大诏令集卷一百一

卷一百二

钦定四库全书

唐大诏令集卷一百二

宋 宋敏求 编

政事

举荐上

京官及总管刺史举人诏

采访孝悌儒术等诏

求访贤良限来年二月集泰山诏

荐举贤良诏

搜访才能诏

河南河北江淮采访才杰诏

采访武勇诏

访习天文历算勅

访孝悌德行诏

京文武三品每年各举所知诏

求猛士诏

访天下奇才异行制

博采通经史书学兵法诏

文武官及朝集使举堪将帅诏

诸州举寔才诏

搜扬怀才隐逸等勅

求访武士诏

举荐上

京官及总管刺史举人诏

择善任能救民之要术推贤进士奉上之良规自古?王弘风阐化设官分职唯才是与然而岩穴幽居草莱僻陋被褐怀珠无因自达寔资选衆之举固藉左右之容义在搜扬理归精确是以贡士有适爰致加锡之隆无益於时必貶貶黜之咎末叶浇伪名寔相乖举非其人滥居班秩流品所以未穆庶职於是隳废朕膺图馭宇宁济兆民思得贤能用清治本招选之道宜革前弊惩劝之方式加恒典苟有才艺所贵适时洁已登朝无嫌自进宜令京官五品以上及诸州总管刺史各举一人其有志行可録才用未申亦听自举其陈艺能当加显擢授以不次赏罚之科并依别格所司颁下详加援引务在奨纳称朕意焉【武德五年三月】

采访孝悌儒术等诏

朕以寡薄嗣守鸿基寔资多士共康庶政虚已侧席为日已久投竿舍筑罕值其人自亲巡东夏观省方俗兴言至治夕惕兢怀然则齐赵魏鲁礼义自出江淮吴会英髦斯在山川所感古今宁殊载伫风猷寔劳梦想宜令河北淮南诸州长官所部之内精加采访其有孝弟淳笃兼嫺时务儒术该通可为师范文词秀美才堪着述明识治体可委字民并志行修立为乡闾所推者举送洛阳官给传乘优礼发遣当随其器能擢以不次若有老病不堪入朝者具以名闻庶岩穴靡遗俊乂可致务尽搜扬之道称朕意焉【贞观十一年四月】

求访贤良限来年二月集泰山诏

朕遐观前载历选列辟莫不贵此得人崇兹多士犹股肱之佐元首譬舟楫之济巨川若夫构大厦者采衆材於山岳善为国者求异人於筦库是以陶唐有虞揖让之圣帝也非元凯不能成茂功商汤姬发革命之明王也非伊吕无以定祸乱况乎齐桓中人之才器非濬?汉武嗣业之主志在骄奢犹赖管仲隰朋之用平津博陆之辅既为五霸之长亦称万代之宗是知得士则昌失人则乱朕冕旒夙夜虚心政道虽天地効社宗社降灵区宇晏如俊乂咸事尚恐山林藪泽藏荆隋之宝卜筑屠钓韞萧张之奇是以躬抚黎庶亲观风俗临河渭而伫英杰眺箕颍而怀隐沦亟移日月空劳梦寐而骊龙莫兆商歌寂寥岂混迹驾骀未逢良乐之顾将毓德岩穴不追禽向之游望云增想其可叹息可令天下诸州搜扬所部士庶之内或识達公方学综

今古廉洁正直可以经国佐时或孝悌淳笃节义昭显始终不移可以敦风励俗或儒术通明学堪师范或文章秀异才足著述并宜荐举具以名闻限来年二月总集泰山庶独往之夫不遗於板筑藏器之士方升於廊庙务得奇伟称朕意焉【贞观十五年六月】

荐举贤能诏

朕遐想千载旁览九流详求布政之方莫若荐贤之典是以元凯就列仄微可以立帝功管隰为臣中人可以成霸业朕缅怀曩烈虚已英奇断断之士必升於廊庙九九之术不弃於闾阎犹恐在陰弗和独善难夺永言髦杰无忘鉴寐是以去夏之中爰动翰墨披雾丹腑畴咨海内尺木既树思覩游露之羣云罗宏举伫降翔庭之翼而诸州所举十有一人朕载怀仄席引入内殿借以温顔密访政道莫能对扬相顾结舌朕仍以其未覩阙庭能无战悚令於内省更以墨对虽构思弥日终不達问旨理既乖违词亦庸陋岂可饰丹漆於朽质假风云於决起者哉宜并放还各从本色其举主以举非其人罪论仍加一等然则今之天下犹古之天下也宁容仲舒伯起之流偏鍾美於往代彦和广基之侶独絶响於今辰故其见知也则平津与乐安并进其不用也则敬通与亭伯同悲淮陰所以兴言子长所以貽叹因斯论之良由俊造难进或固栖迟之节牧宰循常未尽搜扬之道抚事长息弥增恍然今州县依前荐举皆集今冬奇伟必收浮华勿采无使巴人之调滥吹於箫韶魏邦之珍沉光於汉水务尽报国之义以副钦贤之怀【贞观十年二月】

搜访才能诏

高明之天资星辰以丽象博厚之地藉川岳而成形况帝王体元立极临驭万物字养生灵者乎所以致理之君远谗佞近忠良屈已以申人故能成其化为乱之主亲不肖疎贤臣虐下以恣情用能成其乱明君遵彼而兴国暗主行此以亡身是以御朽临冰铭心自戒宵兴旰食侧席思贤庶欲博访丘园采搜英俊弼我王道臻於大化焉可令天下诸州明扬侧陋所部之内不限吏人其有服道栖仁澄心砺操出片言而标物范备百行以综人师质高视於琳琅人不间於曾闵洁志於丘园扬名於里闾或甄明政术晓達公方稟木铎於孔门受金科於郑相奇谋间发明略可以佐时识鉴精通纬才堪於干国或含章杰出命世挺生丽藻適文驰楚泽而方驾鈎深覩奥振梁苑以先鸣业擅专门词成载笔或辩调春囿谈莹秋天发研几於一言起飞电於三寸蓄斯奔箭未遂扬庭并宜推择咸同举荐以礼将送具表状闻限以今冬并与考使同赴庶拟焚林之举咸矫翼於岩廊尺木之阶方振鳞於游雾翹心俊乂称朕意焉【贞观二十一年六月】

河南河北江淮采访才杰诏

朕受命上玄嗣膺下武每肃?旒冕延想英奇俯振鹭而企贞臣仰飞鸿而慕良辅云台仄席玉管屡移宣室整衣金壶亟改寂寥靡覩鉴寐兴怀比年虽常进举遂无英俊犹恐栖岩穴以韬奇乐丘园而晦影宜令河南河北江淮以南州县或纬俗之英声驰管乐或济时之器价逸萧张学宰帝师材堪谏辅者必当位之不次可明加采访务尽才杰州县以礼发遣【显庆元年

十月】

采访武勇诏

济时兴国寔伫九功御敌威边亦资七德朕端拱宣室思弘景化将欲分忧俊乂共逸岩廊而比贡英奇举非勇杰岂称居安虑危之志处存思乱之心如不旌賁远近则爪牙何寄宜令京官五品以上及诸州牧守各举所知或勇冠三军翹关拔山之力智筹百胜纬地经天之才蘊奇策於良平驰功绩於卫霍踪二起於吴白轨双李於牧守赏善而万衆悦罚片恶而一军惧如有此色可精加采访各以奏闻【显庆二年六月】

访习天文历筭诏

南正北正司天地之职羲氏和氏统日月之官盖所以幽赞神明发挥历象经百王而不易涉千古而无替慎竈叠迹於前甘石比踪於後莫不仰稽次舍俯察祿祥克穷盈缩之端备极陰阳之际朕临御区多历年岁睠彼清台罕闻其妙岂人不逮昔将求之未尽虽天道难知固以不言示教而时君取戒宁可遐弃厥司宜令诸州及诸司访解占天文及历筭等人务取有景行审密者并以礼发遣速送所司勿容隐漏【贞元三年二月】

访孝悌德行诏

山东江左人物甚衆虽每充宾荐而未尽英髦或孝悌通神遐迩推敬或德行光裕邦邑崇仰或学综九流垂帷觀奥或文高六义下笔成章或备晓八音洞该七曜或射能穿札力可翹关或丘园秀异志存栖隐或将帅子孙素称勇烈委巡抚大使咸加采访伫申褒獎亦有婆娑乡曲负材傲俗为讥议所斥陷於蹶弛之流者各宜选择具以名闻

京文武三品每年各举所知诏

京文武职事三品以上官每年各举所知或材蘊廊庙器均瑚琏体王佐之嘉猷资公辅之宏量或奇谋异筭决胜千里或投石拔距力冠三军或蹇谔忠亮志存匡弼或绳违纠慝不避权豪或威惠仁明堪居牧守之重或公正廉直足膺令长之任咸宜搜访具録封进朕当详览量加獎擢【仪凤二年十二月】

求猛士诏

朕君临宇宙司牧黎元普天之下罔不率服蕞尔吐蕃僻居遐裔吐谷浑是其隣国遂乃夺其土宇往者暂遣偏裨欲复浑王故地义存拯救事匪称兵辄肆昏迷潜相掩袭既无备豫颇丧师徒因兹鸱张每思狼顾除凶伐叛王者所急前岁将发六军问其罪戾复以小寇无劳大举按甲息兵庶其改过不思惠养更起回邪敢纵狂惑专为寇盗或攻围镇戍或驱抄羊马烽燧频举烟尘不息候隙乘间倏来忽往比者止令镇遏未能即事剪除莫怀寬大之恩遂长包藏

之计恶盈祸稔当自覆灭今欲分命将帅穷其巢穴克清荒服心寄英奇但秦雍之郊俗称劲勇汾晋之壤人擅骁雄宜令关西河东诸州广求猛士在京者令中书门下於庙堂选试外州委使人与州县相知拣有膂力雄果弓马灼然者咸宜甄采即以猛士为名【仪凤二年十二月】

访天下奇才异行制

朕克缵丕业肇膺景命宪章昔典钦若前王永言政途庶几沿革犹恐学校多阙贤俊罕登庠序者风化之本人伦之先宜令州县劝导令知礼让天下有奇才异行者沉伏不能自达及官人有能极言时政得失并令本州具状封进乡饮之礼废日已久宜令诸州每年遵行乡饮之礼【唐隆元年七月】

博采通经史书学兵法诏

才生於代必以经邦官得其人故能理物朕膺大宝慎择庶寮延伫时英无忘终食思欲萧艾咸采葑菲不遗而商山幽僻渭滨寂寞夫以贵耳贱目殊通方之论舍近谋远非应务之术今四方选集羣才辐凑藻斧伐柯求之不远其有能明三经通大义者能综一史知本末者通三教宗旨究精微者善六书文字辨声象者博雅度曲和六律五音者韬略孙吴识天时人事者畅於词气聪於受领善敷奏吐纳者咸令所司博采明试朕亲择焉【景云元年十二月】

文武官及朝集使举堪将帅诏

将帅之任军国斯重御侮扞城良才是急顷者武臣多阙戎政莫修聆鼙鼓以载怀筮熊黑而未遇古今一也何代无人南仲方叔之俦亦在用人而已宜令文武官及朝集使五品以上各举堪将帅者一人明幽仄无限年位务求寔用以副予怀【先天元年十二月】

诸州举实才勅

致化之道必於求贤得人之要在於徵实顷虽屡存贡帛无辍翘车而骏骨空珍真龙罕覩岂才之难遇将举或未精且人匪易知取不求备瑰琦失於俗誉韬晦嗟於後时宜其博询州里明幽仄使箴库无遗迈轴咸举其诸州有抱器怀才不求闻达者命所在长官访名奏闻武勇者具言谋略文学者指陈艺业务求实用以副予怀【先天二年六月】

搜扬怀才隐逸等勅

勅立政之本惟贤是切朕祗膺天历殷监远图扬於王庭生此王国朕之所望久矣岂徵辟为事未极於岩薮而高尚絶尘见遗於草泽将何以举逸而劝责然来思且才之或偏犹器不求备故非臧文之智则尚其言收曲逆之奇则捐其行过而能改仁远乎哉天下诸州有怀才隐逸跼弛不调及失职冤人等事并令诸道检察使博访具以名闻副朕饥渴之怀庶广搜扬之

义【先天二年十一月四日】

求访武士诏

武设五兵所以安人禁暴臣称三杰所以战胜攻取蜀乃一方之主尚得孔明齐为九合之君斯由管仲况宇宙至广人物至多岂乏英贤无闻韬略盖用与不用知与不知今边境未清统遏须将顷林胡颡扰柳城非捷北虏忽惊西军莫振罪由失律过在无谋曹刿不言宁知登轼之効淮陰非荐孰膺推轂之勲长想古今是思擢用恐虽沾簪绂犹晦迹於下流或蘊智谋尚沉名於大泽不加精访何以甄收其两京中都及天下诸州官人百姓有智合孙吴可以运筹决胜有勇齐贲育可以斩将搴旗或坐镇行军足拟万人之敌或临戎却寇堪为一队之雄各听自举务通其寔仍令州府具以名进所司速立限期随表赴集朕当亲试不次用之其有身见在诸军统押者但録所能奏闻未须赴集【开元九年九月】

唐大诏令集卷一百二

卷一百三

钦定四库全书

唐大诏令集卷一百三

宋 宋敏求 编

政事

举荐下

诏天下搜贤俊制

访至孝友悌诏

处分举荐人诏

令常参官举人诏

搜访天下贤能勅

搜访兵术贤才诏

按察上

遣使巡行天下诏

遣十使巡察风俗制

处分朝集使勅八道

举荐下

诏天下搜贤俊制 贾至

朕闻惟理乱在庶官是以先王旁求俊彦思皇多士以倡九牧阜成兆人顷者奸臣执权专利冒宠惟正直是丑惟邪佞是能此壅塞贤路罔蔽天听使忠臣不得进其谋才士不得展其用

废三载之黜陟寝九德之推择多有老於郎署滯於丘园吏称无人才不给位朕以薄质嗣守大宝寇戎未殄王业维艰兢兢乾乾日慎一日緬惟尧舜求贤之意周公吐握之义思欲广进髦义辅宁邦家寔赖公卿大夫弘我视听易曰方以类聚语曰举尔所知凡宰相王臣宜加搜择其常参官及郡县长吏上佐等皆从历试而践通荣如各知其密行异能博学深识才堪济代术可利人名不彰闻位不充量湮沦屠钓流落风波者一善可録便宜公举远则封表附驿近则进状奏闻勿避亲讎无限侪伍其有独负奇才未逢知己即仰投匭并所在陈状自论长官登时与奏夫兹荐士非止一举永为恒典有即登闻昔荀彧子立翟之功士伯受瓜衍之邑柳下惠贤而不举臧文仲被窃位之名春秋书之千载不朽凡百在位可不勉欤宜宣示中外令知朕意【至德二年四月八日】

访至孝友悌诏

至和育物大孝安亲古之?王必由斯道朕往在春宫尝事先后问安靡阙侍膳无忘及同气天伦聯华棣萼居尝共被食必分甘今皇帝奉而行之未尝失坠每有衔命而来戒途将发必肃恭拜跪涕泗交连左右侍臣罔不感动间者旭日抱戴瑞亦自天白狼之瑞接武荐臻此皆皇帝圣敬之符孝友之感也故能诞敷德教弘乎四海信可以光宅寰宇永绥黎元者矣其天下有至孝友悌行着乡闾堪旌表者命县长官采听闻奏孝子顺孙乐於玄化也【至德二年正月】

处分举荐人诏

推荐之道必务於至公赏罚之间亦资於不滥其诸色举人等须有处分令荐所知寔任才能用施政理自宜慎择以副虚怀古者劾官三岁考绩善恶既着褒贬斯存举之得人必受旌能之赏举之失选亦加惩治之罚赏罚之典期於勉行凡百具寮宜知朕意【宝应元年七月】

令常参官举人诏

勅知人则?尧舜犹难类能而举古今常式自顷中原多故汔求小康州县屡空守宰多阙摄官承乏者颇无举职之能怀才抱器者或有後时之叹朕所以宵衣不寐侧席未遑思弘致理之规冀及大中之道而庶尹卿士备列朝廷岂无叶赞之心以助旁求之义其内外文武官如有堪任刺史县令及出身前资人中堪任判司丞尉者宜令京常参官各慎择所知具状奏闻及诸州刺史县令既藉寮属宜亦准此古者得人受赏速不踰时增秩赐金有国通典其或任非称职举不当事颇多附下之心亦无不适之罚其所举人受官後如政事尤异清白着闻三考後仰本道观察使闻奏其举主及所举人并量加进改如懦弱不举及暴政处置乖宜并冒犯赃私等罪论刑当亦连坐宣示中外知朕意焉【宝历元年九月】

搜访天下贤能勅

济国安民兼先得士怀才抱器所切逢时苟获贤能何难任使自从近岁颇乏丰年百姓凋残

四方空竭邕交防戍邛蜀征行租赋罄於东南衣粮耗於西北欲全国力须整边防所恨利於国者或迷之而未行害於人者或遣之而未去天下有洞谳边事深会兵谋或决胜於干戈或运筹於帷幄及有苦心吏术深達政经曾观已试之能可致必成之理各仰自见所在长吏先共讨论有可取者发遣赴京量事资送或安贞守道隐遁山林或勤学知书博通今古并仰所在长吏搜访闻奏冀有才者得伸有能者得用凡思报国无若荐贤如得非常之材必加不次之赏布告天下知朕意焉

搜访兵术贤才诏

朕每念艰难之本切思拯救之图治少乱多古犹今也盖搜扬之未至非爵赏之不行况自乡里沾虚物情贾怨朝市有争先之党山林多独往之人彼岂自穷驱而莫返其有文包经纬道贯儒玄贞遁自肥浮名不染岂无加等之爵以待非常之流今委使臣远近徵访必行备礼以耸羣方且机贵研深用惟体要运当无事固垂拱而可待时属多虞非援奇而不振或有材优将略业洞兵铃辨胜负於风云计短长於主客妙得神传之诀耻成儿戏之名不俟临机方期制变或销声於屠钓或屈志於风尘勿媿自媒当期致用至乃旁窥国病动适时宜深探货殖之源备得富强之术排於浮议鬱彼良图又有志擅纵横久潜緇褐材推超异见辱侪流苟全一艺之工不必万夫之敌亦有推研历象校步星辰言必効於机先术岂疑於亿中是资奇器孰曰异端亦在勤求仁加殊赏噫功名可慕少壮几何在君亲则忠孝相资於国家则安危同切勿甘流落犹狗彘安并委使臣胜示访求长吏津置发遣同心体国无使淹延悬赏俟能必期升擢朕虽踵艰否亦谓忧勤高祖太宗之在天固当垂佑社稷生灵之有主夫岂乏贤達我敷求咨尔将命勿虚翹瞩苟自因循其间儒学优游军谟弘远密陈时务愿就制科者已从别勅处分跣弛遗才沉沦末位不得文武并须升闻布告天下咸使知悉【光启五年五月】

按察上

遣使巡行天下诏

昔者明王之御天下也内列公卿允厘庶绩外建侯伯司牧黎元唯其淳化未敷名教或替故有巡狩之典黜陟幽明存省方俗遐迩遂性情伪无遗时雍之宜率由此道朕祗膺宝命临御帝图稟过庭之义方荷上玄之嘉祉四荒八表无思不服而夙兴夕惕勤躬约已日慎一日虽休勿休欲万国欢心兆民有赖推诚待物近取诸身实谓羣官受拜咸能自励乃闻连帅刺举或乖共治之寄县司主吏尚多黷货之罪有一於此责在朕躬是用中夜恍然晨景辍食宜遣大使分行四方申谕朕心延问疾苦观风俗之得失察政刑之苛弊耆年旧齿孝悌力田义夫节妇之家疾废惇嫠之室须有旌贤赈贍听以仓库物赐之若有鸿材异等留滞末班哲人奇士隐沦屠钓宜精加搜访进以殊礼务尽使乎之旨俾若朕亲覲焉【贞观八年正月】

遣十使巡察风俗制

古之御天下者以大宝为公器以崇高为外物仰则乾符顺性命之理俛思坤载成厚博之德

将以治成至道保邦静人用清三徵以齐七政能臻夫此者岂一人之力哉寔赖羣方共康庶绩自季叶沦替倘弃公道官匪其人教无所习怀才修洁者则依违以自容通方宏伟者则放荡以求利由是淳化日削浇风岁长典章讹弊毗俗凋残逶迤陵颓莫能振理朕以薄德丕承宝命夙夜惟寅忧劳无怠昧旦端冕心被寰瀛日晏罢朝念周黎庶顷者励精推择傍求牧宰冀闻善政惠康乃人虚已励勤美化犹怠贪官傲吏屡黜於爰书失职流亡几沦於版籍岂刑赏之柄不叶其中将宵旰之诚未孚於下永言国本良深轸悼古者天子巡狩省方观俗而锡鞶备驾或以为烦故分命輶轩博采謡诵以彰善瘅恶激浊扬清散皇明以烛幽扬仁风以被物寔资令德允属通才惟怀永图式鉴成宪宜於左右台及内外五品以上官识理通明立性坚白无所诎挠志在澄清者二十人分为十道巡察使二周年一替以廉按州部俾其董正羣吏观抚兆人议狱缓刑扶危拯滞若能抗词直笔不惮权豪仁恕为怀黜陟咸当别加獎擢优以名器如脂韦苟全籛籛戚施高下在心顾望依附者将迁削屏弃肃以宪章咸竭迺心以副朕意【神龙二年二月】

处分朝集使勅八道 苏頌

勅朝集使等朕自临万邦倏已三载何尝不兢兢业业励精政道思欲弃末敦本阜俗安人寰瀛之间日月以冀所以急於务农不夺人时富而教之庶乎可致夫苛政甚於猛虎贪人比之强贼顷虽临遣使臣未能澄正此弊或刻以害物或扰以妨农或背公向私或全身养望至使钱谷不入杼轴其空捐?相仍流庸莫返且四方事广非一人独化共理之寄非卿而谁卿等至州逖相勗励勤恤孤弱劝率耕桑各効清勤无或隳怠【开元三年二月十五日】

又

勅朝集使等朕闻御寰瀛者不可以独化养黎献者必存於共理故专一方亲百姓能致循良之术必无愁苦之声非牧伯之贤畴能於此所以精求台阁历选缙绅当举百寮之要以先六刺之重虚想准政用成庶绩自去冬入计者则循名责寔询事考言虽不无等差终未有殊异得非岁时或浅风教未洽耶故一切不除各再临所典至於敬耆老恤?弱止奸盗挫豪强人不忍欺吏不敢犯田畴垦辟狱圉空虚徭赋必平逋逃自复门杜请谒庭无滯留若是者乃关乎职思可以力致至於弭灾眚集休祥尚德义崇礼乐儒风大长道化滂流耕夫克让织妇知节草木不夭昆虫咸遂扇彼淳源登兹壽域若是者亦弘之在我仁远乎哉岂惟禄秩就加以公卿入拜其或靡副朝獎不恭朕言陟既有之黜故宜及勉旃俞往各勤我班瑞之分命【开元六年二月六日】

又

勅朝集使朕闻天生蒸人溥於四海天有成命孚於万邦必内立公卿外建侯伯后非贤罔使贤非后罔事借耳以广听假目以遐览则谕上旨通下情庶政谐而羣萌乐矣由是三考黜陟百官会同古昔之训炳然共守朕以薄德只膺宝位受乾坤之顾荷宗庙之灵櫛乎若涉春水如馭朽索责在司牧所赖分忧曷尝不想望贤才馨香至化七年於兹矣咨尔羣岳寔邦之良

服勤政途深伫嘉绩岂为吏罕久与人未信何殊尤异絕寂寥厥声恭惟永图当副虚属孔子曰苟有用我者三年有成汉宣曰庶人安田里无愁恨之声者政平讼理也以为太守数易则下不安诚哉是论矣今之牧守古之诸侯宠数特加情寄尤切故躬飧廷内则饮食晏乐帑帛筐篚入至朕前则敷衽以陈命席而对所冀仁且不远言之必行以朕忧劳之心托卿勤恤之助卿等宜慎厥始成厥终往钦哉祇守尔典操一州之统分六条之察念兹在兹用光我班瑞之命有赏有罚朕无戏言并即好去【开元七年三月十一日】

又

勅朕自君临区域子育黎庶岁年是慎夙夜惟寅而诚或不孚政犹未洽所在旱涝屡覩章表因饥饉而为理竭忧劳以养人非夫二千石孰应斯委下户给之高户贷之所须賑恤并先处分至於常赋则着恒典检据成损蠲减有条又近日以来中外少事差科调发殆至於无处馭通融当免於弊不知卿等从州来日百姓间得以安稳否其间阎未便勅令有阙具以陈闻副我深寄时寒涉路并平安好其三两日寻亲识後取曹司进止【开元七年十月二日】

又

勅朕闻诸礼曰刑禁暴爵举贤则政均矣好恶着则贤不肖别矣其道然耶朕以虚薄祇膺景命荷宗社之灵当亿兆之责曷尝不旻朝晏坐畏天爱人思欲保其和乐跻於仁壽则与我共理者其惟良二千石乎每计吏还州与之陞见示其赏罚钱以筐篚亦云命而已矣而朝集使豫州刺史裴纲分典荆豫为政烦苛顷岁不登公议蠲复部人有诉便致科绳县长为言仍遭留系御史推按遽以寔闻虐政弊人一至於此朕夙夜乾惕匪遑宁居寻遣使存问其诸道有损处已量加賑恤水旱不时寔朕之过惠养失所分刺之由是用黜纲於岭裔儆彼羣岳朕於苍生若保赤子为之均田邑制庠序必欲其时和年登远安迹肃托於牧宰代以躬亲故历难其官诚经国致理之意也夫德惟善政政在养人故土烦则草木不长水烦则鱼鳖不大必也寬恕贵乎清静诸刺史都督宜问疾苦拯贫穷杜侵渔察冤狱至於赋役务从减省深刻为事人何以堪私惠苟行法或将坠理须折衷用存令式其百姓有稳便者随事条奏将亲览焉钦尔有官各勤为政如风化允穆课绩殊尤当擢之不次旌乃厥美凡百庶邦敬听朕命【开元八年二月十九日】

又

勅朝集使古者覲羣后比万国黜幽陟明循政思理罔或废也朕以虚薄属当期运受命穹昊司牧黎元何尝不中夜求衣分昼忘食欲其日月所烛霜露所坠不独亲其亲不独子其子五谷丰殖万物阜安百姓无事与能共化於兹八年矣而淳流未还至道犹鬱岂朕之不德邪将吏之不贤耶徭赋或繁耶纲维或紊耶故延入阶陛躬问得失悉如卿所对则朕无忧矣书曰非知之难行之惟难语曰仁远乎哉我欲仁斯仁至矣卿等宜祇典厥职克正其身修於国章允兹朝寄因乎风俗示之训诱必也道德齐礼以公灭私田里絕愁叹之声邦家闻寬厚之化乃及优赏如或依势作威倚法以削流亡未至教令不行加以常罚自余宜依别勅处分勤恤

人隱以副朕懷并仰好去【開元八年三月十一日】

又

勅朝集使等朕承天丕命子育万方樹之師長俾敷景化將以固茲邦本致諸昇平而大道淳風未暢租賦頗減戶口猶虛水旱相仍耕桑莫贍蓋朕之不德而吏之無方永言於茲良增嘆息往歲河南失稔時屬荐飢州將貪名不為檢覆致今貧弱萍流外境責在致理有從貶黜因茲以來率多妄破或式外奏免或捐中加數至如密州去秋奏滂管戶二萬八千八百不損者兩戶而已無田商賈之流雷同入數自余州不損戶即丁少得損戶即丁多天災流行豈應偏并皆是不度國用取媚下人曩之刻薄也如彼今之踰濫也如此不副朕意一至於斯疎怠之愆雖已會赦尸曠之迹豈不多慙當令所司比類澄汰卿等與朕共理寔惟分憂各勉思政途以匡不逮其百姓間事物去冬赦書已處分訖若人有疾苦鄉有奸豪不勤農桑不崇學校并宜敦勸以正風俗逃亡之戶必藉招携差科之間務令停減如台省處事有不穩便於時者具利害聞奏勿復依隨以損百姓卿等至州之日宜一留意綏我庶人并即好去【開元十年正月十一日】

又

勅朝集使等朕臨內子育黎元何嘗不簡易愛人勤恤庶政天下至廣不能獨任故樹之方牧資其共理而淳化未敷至道猶鬱庸賦未減戶口且虛水旱相仍倉儲莫贍無聞慈惠之政未息凋弊之流豈朕之不明而吏之無術言念於此用惻於懷卿等是行勉思厥政百姓間有鰥寡惸獨不能存濟者務令優養游業浮惰不勤稼穡者特令懲肅敦以學校勸以農桑差科之間務使平允逃亡之戶兼藉招携令其下人使得蘇息諸州遭滂之處多是政理無方或堤堰不修或溝渠未泄頻已處分竟無承稟當被租庸是何檢校至州之日各宜勸勉應合修塞開導宜預施功若不慙勞何以獲利今令御史分知訖宜勵所職勿犯常科今考績深者已有除改資歷淺者更任良能應還州人已令所司各與賜物待駕發後三五日別親識并即好去【開元十年二月二十七日】

唐大詔令集卷一百三

卷一百四

钦定四库全书

唐大诏令集卷一百四

宋 宋敏求 编

政事

按察下

处分朝集使勅五道

遣陆象先等依前按察制

遣王志愔等各巡察本管内制

置使河南河北道观察利害诏

诚励京畿县令勅

遣御史大夫王峻等巡按诸道勅

遣使黜陟诸道勅

席建侯等巡行诸道勅

黜陟杨懋等诏

察访刺史县令诏

遣诸道黜陟使勅

褒劝

甄奖陷贼守节官诏

录用邓州归顺官诏

按察下

处分朝集使勅五道

勅朝集使等弘风善俗寄於良吏求瘼恤隐职在亲人朕并建藩牧择其师长钦若古训俾人用康而教化或未洽黎甿或未宁攘窃者时有犯禁逋亡者罕闻复业岂朕教谕之道尚阙而牧宰之训未明欤永念於此不忘旰食卿等咸承朝寄分掌外台共理之道期於康济至若率身以正驭衆以仁而下不化者未之有也卿等还州宜禁侵渔絶浮惰悍独鰥寡尤资惠育盜賊妖讹特宜禁断其征镇人家每须优赏科敛之事必在均平顷者水灾荐及河朔思无不至忧彼元元发仓廩漕江淮以赈之蠲租税停征役以安之今属春阳布和农事方起虑有乏絶致防农桑虽已遣使安抚或恐事未周赈如有不支济者即更量事赈给诸道有损之处亦宜准此朕不欲一物失所衆情不遂纳羣生於仁寿跻大化於昇平卿等各宜恭守朝章宣布朕意虽万方有罪莫忘在予而三载考绩须徵行事安人称职可不勉欤并宜好去【开元十六年十二月二十七日】

又

勅朝集使等朕恭已承天守文继位布一心於兆庶明四目於万方恒恐道或未周物不遂性傍求俊乂共理黎元於兹羣辟宁不我副方今政要略有四端衣食本於农桑礼义兴於学校流亡出於不足争讼由於无耻先王务其三时将以厚生也修其教化将以淳俗也有国有家同知此义不患不知患在不行耳且长吏敷化政教屡移在官当为国理人各扬其职不当冒荣干进苟利其身浇俗不可不革淳风不可不长近令刺史在任四考方迁实欲始终其情黜陟斯系必若县得良宰万户息肩州有贤牧千里解带仁政不远行之则是皆能励节朕复何忧且如浮逃客户所在安辑征镇人家每事优赏仓廩惟实役赋惟均鰥寡抚存盜賊禁止邮驿无弊奸讹不生念兹八事朕常属想嗟尔庶尹可不用心卿等还州逋相劝勉遵此王度恤彼下人敬顺天常无违月令夫星列躔次土分区域休咎之徵惟人所感善必知主恶亦有由每至岁成当加赏罚宜知朕意并即好去【开元十二年三月十三日】

又

勅朕临御天下二十余载每思至理实仗羣贤何常不敷求循良共底於道隼旃熊式光宠有加甘露凤凰寂寞无纪岂朕之不德感致所然抑为庶尹所能已极於此是用寤寐增叹殷忧永怀更为後图或未晚也且羣吏之政系一人之能泉源既清蓬麻自植为长吏者可不勉之卿等至州逋相慰诲以副共理之意用光分命之委且如河南江左爰及山南岁小不登人亦菜色皆由好逐朝夕之利而无水旱之储卒遇凶年莫非艰食此则致乖虑始人无劝分欲免流庸不可得也夫萌者宴也岂能自谋政者正也当矫其弊所由长吏可不勉欤相其物土之宜务以耕桑之本时无妨夺吏不侵渔既富而教奚畏不理至若征镇役重孤弱命穷特须哀

矜以遂仁恕其余常科所禁自可举而行之岂烦缕说方振纲领乃者庚子制书已明理要徐思其意勿谓空言若风教未弘议能盖阙竟入朝计冀幸迁除勿曰不知将自诬也方牧参佐各宜思之朕所待贤能不惜官秩唯声实是与唯理治是凭古者刺史入为三公出宰百里岂有恨也何以汲汲不安於理郡哉诚须励精以俟後命并即好去【开元二十一年闰正月一日】

又

勅朕受命于天义兼君父思致可封之地无忘终食之间自有万邦几将二纪而刑政或殊风俗尚浇行所望而未至顾本怀而自失虽朕之不德在予之过有归而卿等共理患已之诚宜剖至如典州当侯伯之尊宰邑敌子男之宠好进之辈且不务於政成欲速之心独未思於义取朕所以敷戒勅以见意增禄秩以劝能何尝有公方清白者不异道理循良者不用若声绩未着黎庶未康牧守来朝而辄迁参佐踰年而竟入此独为人资地耳岂是责成之意耶如故一切还州将矫弊也卿等至彼明谕朕意知不以中外为隔以亿兆为忧顷以天下浮逃先有处分所在招附便入差科辄相容隐亦令纠告如闻长吏不甚存心致令流庸更滋前弊未革自昔行法即有奸生逃者租庸类多乾没长吏明察岂其然乎每年别须申省比类多少以为殿最又狱讼所寄人命是悬近恐妨农特原轻系俾加閱实仍多幽枉都邑尚尔郡县可知各已贬官用惩主吏自今以後系囚非应申覆知证在远而就中稍重者不得过十日次不得五日其余轻科量宜决遣不得因此复加楚毒具申外台省长主之至如礼义不兴耕桑不劝孤寡不恤徭役不均不肃吏人不消盗贼不惩侵暴不絶奸讹有一於此是谁之过其游僧幻道诳诱愚人穷其根萌时须禁絶诸军征镇每遣优矜如闻比来未免辛苦时其抚恤使得安存今农戾戒期耕夫在野事非急切不得追呼卿等至州一一宣示当遣察问勿不用心即宜好去【开元二十一年四月一日】

又

勅十道及朝集使等信赏以劝能必罚以惩恶谓之二柄所以一人朕念彼黎元比遭水旱而赋役不等浮惰相仍且无缉宁日用凋弊所以重择长吏兼命使臣宠数所加亦云不薄智能自効岂未是图政之殊尤永用虚伋且郡县所理黎庶是切善为政者防於未萌均其有无省其徭役事事有预早为之所虽遭岁恶固亦人安况在丰年不能招辑遂使户多虚挂人苦均摊务欲削除更成诡诈若已逃者未必即得则为奸者因此便除一启其端岂胜其弊向若州有明牧县有良宰而精心缉理岂若是乎卿等至州县将朕此意优柔慰勉各令用心招抚流庸缀居本业使免捕逃之费是为救弊之先此不存心更知何理且刺史县令专任不轻自有非违将何率励至於亲识游客凭恃威权嘱托下寮摇动狱讼或差遣不当致令损失或处置有乖便至烦扰兼有不肃诸吏惟知自谨一身奸豪盗贼无所畏惧是虚荷荣宠徒资禄秩此而可容孰为尸旷并委诸道条察具状奏闻今甘泽以时耕桑为重不急之务先已勒停宜更申明勿妨春事诸处百姓贫空者多虽有墾亩或无牛力劝率相助令其有秋所系囚徒速宜决断无令冤滞致有妨夺鰥寡悍独征镇之家倍须存抚勿有科唤朕所悬爵秩惟待贤能若政举一州惠施一县使者廉问必以状闻既能副於朕怀亦当待以不次诚可复也岂食言哉

并宜好去【开元二十一年】

遣陆象先等依前按察制

黄门古者协和万邦畴咨四岳柔远能迓明目达聪以於变黎人也自朴散醇醪割方曲直失於德者格之以礼失於礼者助之以刑故惧文网而畏简书必振其纲而又操其柄庶乎政之要也间岁天下诸州岳牧先充本道按察诚以今之刺举昔之连率盖欲为吏之黜陟审人之愁苦中念作奸犯科获罪相次弃材或由於拙匠采葑不遗於下体由是申命有司咸多叙用至於按察暫令休罢夫泉有鱼矣虽见则不祥林有兽焉而为之不采与其存而勿用孰若狎以玩之俾乂於时复修其政银青光禄大夫益州大都督府长史姚儒处置兵马使上柱国兖国公陆象先等早蘊宏量深甄大体清能励俗仁以敦风必将检御权豪昭明淑慝宜兴化以树善仁责成而求当可依前件余各如故一事以上并准旧例处分本道所隶之州有偏远不稳便者仍令所司量宜分割永为定额讫奏闻主者施行【开元二年闰二月七日】

遣王志愔等各巡察本管内制

黄门上天降祸大行太上皇厌代升遐俾予一人??在疚攀号荼毒触向摧陨百辟卿士等上遵遗诏下徇羣心寰区任殷社稷务重资於听断不可暫缺遂力哀迷甫从劝请恭惟顾托之旨思致和平之化虽在荒瘁敢忘负荷是用泣血抚膺执丧视事夫后王者代天理物师长者助朕理人天之所以茂育人之所以蕃庶盖遂其性而安其业也朕每置旌告善仄席翹贤恐间阎有愁苦之声草泽无明?之主吏或慢法官或非才因之致理且未为得其何以廉败政恤冤刑问惇嫠招茂异寬赋斂节更徭使天下为无为事无事也顷分连率则曰使臣将求人瘼克宣朕命诸道按察使扬州长史王志愔广州都督宋璟蒲州刺史程行谔汴州刺史倪若水魏州刺史杨茂谦灵州都督强循润州刺史李濬荆州刺史任昭理秦州都督张嘉贞洪州都督杨虚受梁州都督张守洁并迈迹垂宪伟才通识有其直方无所回避宜令各巡本管内官人有清介独立可以标映士林或文理兼优可以润益邦政者百姓中有文儒异等道极专门或武力超伦声侔敌国者并精访择具以名闻其官人有老弱及久病妨於政理并才用劣下全不称职者上佐以下委使人便停务其官紧要者便简清勤人权摄其京官及畿内州县委御史大夫及吏部长官准此详察錄奏诸道僻远州及岭南道委使人量差判官分道巡按其天下囚徒虑有冤滯宜令大理及本巡所在理滯流罪以下非犯名教及官典取受并听減一等收赎即是非理均事可疑者并杖以下罪并宜放免缘山陵所科夫匠等有父母年老家无中男以上者容其侍养不须差遣其河南河北遭蝗虫州十分损二以上者差科杂役量事矜放百姓间有不稳便事委按察使与本州长官商度随事处分奏闻布告遐迩令知朕意主者施行【开元四年七月六日】

遣使河北河南道观察利害诏

伊昔明王奉若天道所宝惟谷所使惟贤故能稼穡劝分兴利除害朕以薄德纂承洪绪政期克已诚不动天顷岁河南河北诸州蝗虫为患虽当道当遣使驱除瘞埋恐今仍生育天戒若

此朕甚惧焉罪实在予殃岂移岁但牧宰之任朝廷所委苟得良材式敷惠训古有寿张飞逝中牟不入者斯其效也刺史县令等当各竭乃心用攘厥患方考休咎大明黜陟惟尔凡百可不勉欤宜令户部郎中蔡秦客往河北道试御史崔希乔往河南道观察百姓间利害便与州县等筹度随事处置还日奏闻【开元五年二月】

诫励京畿县令勅

诸县令等亲百姓之官莫先於邑宰成一年之事特要於春时卿列在王畿各知人务宜用心处置以副朕怀农功不可夺蚕事须勿扰狱市任简典政宜肃徭赋须平豪强勿恣凡着贤能必无旷职宜即好去【开元八年七月】

遣御史大夫王峻等巡按诸道制

苛慝不作人斯无怨寛猛相济政是以和故周礼以官刑糾邦理以官叙正羣吏允迪前烈式惟旧章且夫寰宇至大不可以周览黎甿至殷不可以独化熙我庶政实惟具寮苟非其才难以称理是以夙夜不遑晏宁开元之初分道遣使按部糾摘奸犯颇闻惩息以其事久则烦寻亦从其停废绵以岁月浸成寛弛今闻在外官寮多违宪法牧守则寄任滋重令长则禄秩且优亟闻侵窃屡有章奏虽赐金为惠未媿张武之心还珠表德罕见孟尝之政岂敦谕之意未孚於就列将贞高之节有谢於前修永怀於此良用沈叹且政寛而慢法弊则通弛而张之其可致理御史大夫王峻等并识通政要位以才达茂其声实弘此宪章宜分命巡按以时糾察巡内有长吏贪扰狱讼冤抑暗懦尸禄苛虐在官即仰随事按举所犯状并推鞠准格断覆讫闻奏仍便覆囚夫牧宰之职教道是先録曹之任纲纪斯在其有政理殊尤清直独立者咸以名荐余官有清白着称及诸色不善各别为科目同状奏闻其寻常平状并不须通俾夫善取其尤罚无所濫疎而不漏察不为苛必将正其源流弘彼纲目不可总此烦碎扰其吏人应是州县当务事非损益者使人更不干预其百姓有不支济应须处置有不便於人须厘革者与州县商量处分讫奏闻宜体虚仁之怀以光澄清之举【开元八年八月】

遣使黜陟诸道勅

三载考绩以鉴吏能八使观风因求人瘼兹事体大致理之由朕受命昊穹临御寰夏虑一物有所未安遍万户无劳軫念而宇宙之间官吏至多倘有政失其宜即万人受弊崔翹等或文学见称或清白流誉通於理要秉是公心俾尔澄清式当委任至如黜陟之道国之所务苟有不当将何劝人顷年使臣例皆通状其尽善者以多有请托求选课之资不善者以凡碎见轻贵奏课之数若此銜命岂副虚怀卿等所到之州宜宣朕意其百姓间事或有须厘革者宜与所管商量处置回日闻奏其官吏中贪冒赃私及犯名教或衰老疾病或无政理者刺史以下宜停务奏闻其守职公清为政尤异事堪激劝远近知者具以名闻其诸道有遭损之人应须赈给先频有处分犹虑凋弊岂忘矜恤亦宜审与州县商量务令周济又闻河堤穿决使有漂流谅由州县寛疎不时备塞亦便检行处置勿使更然其天下道学固已有置者并乡学者等此并切於生人比来未复若为教导各宜敦劝使有成益其征镇之家或有单贫老弱不自存

济者宜令所司倍加优赏其浮寄逃户等亦频处分顷来招携未着长策又江淮之间有深居山洞多不属州县商量处置一时録奏卿等既当巡按委寄非轻宜勉尔良图以副朝选无或致有回避不竭公忠朕之责深各宜自効【开元二十九年十月】

席建侯等巡行诸道勅

勅黜幽陟明所以察风俗求瘼恤隐所以慰黎蒸不有其人孰可将命礼部尚书席建侯等亮直清节经通大才多识前言备娴时政或久应任使常参八使之列或夙蕴公忠必副四方之委永怀兆庶用寄澄清建侯巡河北道镇巡京畿关内及河东道隐之巡东畿及河南道见素巡山南东江南黔中岭南等道麟巡河西陇西碛西等道翹巡剑南及山南西道光誉巡淮南及江南东道其百姓之间及官吏之辈如事或未该须有厘革者仍委量事处分回日奏闻其岭南黔中碛西途路遥远若使臣一一自到虑有稽迟各精择判官准旧例分往【天宝五年正月】

黜陟杨懋等诏

朕忧彼黎元寄之牧宰常虑受任非当抚御乖方所以设举亲之科广得贤之路爰初诣阙亦既明试以言及乎从政必欲深考其实悬之赏罚要以始终近日分遣使臣因之巡察善恶之验事足可明惩劝之端言斯可复其杨懋等七人黜陟使并奏请状宜与改转其所举六品以下付所司准此处分五品以上各赐一上下考李连等七人既奏善状至选日各减三两选仍稍优与处分所举主并赐一中上考赵愷等六人俱犯赃私罪法科断其举主各量犯者罪状轻重贬黜仍宣示中外咸使闻知【天宝五年十月】

察访刺史县令诏

朕闻効官者必量力而受任致理者亦择才而简能况风化之源本资於长吏升降之义用明於朝典古之建方国亲诸侯盖以抚绥黎人宣布至化则今之令长古称子男矜孤恤贫均徭省赋皆是职也朕以薄德忝膺宝位属残孽犹聚戎军未戢虽忧国之计且务於济时而恤人之心每深於惠物将求厚俗必在审官至於刺史治中皆制命所授辨其才术盖在朝廷先令中书门下精加访择务得其良如非理人之才即并量宜改授且诸县令员数应多如闻处理之间廉平者少或使司所奏以功见称或主司所拟循资而授倘乖任使空忝亲人或有案牒之间曾未娴於令式征赋之际或委任於胥徒由是吏转生奸遂为蠹政人不堪命流而失业兴言及此良用怆然夫易柱以调弦声之和也革弊而从善政之体也汉宣帝云与我共理天下者其惟良二千石乎固知方岳之任足以委黜陟之权矣况诸道节度皆备职防戎政在理兵岂遑廉问必令郎官御史分命巡察则乘驿暂往难於委寄谅无益於澄清反有增於劳扰其天下县令各仰本州府长官审加详择如有衰髦暗弱或贪财纵暴不娴时政为害於人并具名録奏即与改替其才职相当者并依旧奏定以後有不称者所由官量加殿黜庶理人之职无或谬焉又入仕之流本期展用且无事实岂可徒劳今员外之官所在甚衆既不厘务空効驱驰将适乡闾复拘职守念其旅寓良可优矜应州县见任员外郎官并任其所适计考秩

滿後各与成资仍於本色内減一两选与留其先缘罪累貶授者不在此限如员外官中材识干济曾经任使州县所资者亦任量留每上州不得过五人中州不得过四人下州不得过三人上县以上不得过一人古之任官必寄成政如长吏数易则纲条不恤所以人怀苟进之心俗靡居常之业比者或闻此弊实谓未便於时自今以後刺史县令更不得数有移改善政闻於上则当议擢迁如道失厥中亦自懲誡黜陟之道固有典章又比来刺史任皆先奏州县官属苟有改作敦勉因情自今以後除带使次判官外一切不得奏改官吏到任之後察有罪累及不称职具状奏闻得请然後令所由与替其刺史非兼节度但有防御使副使判官委於本州官中推择亦不得别奏并委中书门下省着为恒法庶使官无失位政有常经宣示天下宜知朕意【乾元二年八月一日】

遣诸道黜陟使勅

朕闻唐虞圣主之理三载考绩黜陟幽明两汉施教之君亦命八使澄清天下朕纂承大业思服训谟虽王公卿士内勤夙夜藩岳守将外尽公忠而兵革未宁戎马未静纪纲未振法令未敷封圻郡县赋税不一师旅上下劳逸不均所以终宵积忧监寐增惕爰命羣士往代予言行乎四方以听於理举其百事以归於正朕之深愿可不勤副也【建中】

褒劝

甄獎陷贼守节官诏

勅沮劝二柄国之大纲獎善惩违固不可废顷以贼臣构乱京邑震骚惟兹士人奔窜无所有从其诱胁遂染污名有守以纯诚竟全贞节昨所司奏议但举刑章奏累者各已条流守节者并无甄异忠而不报岂朕意焉应在京百司及京兆府长安万年两县去年十月三日见任职事官在城陷於贼中潜藏不受逆命并前资官在城被署官爵频遭迫胁者始末不出事迹昭着衆所明知并委御史台访察磨勘核其事实勿容虚滥仍限今月内具名衔状闻奏五品以上及常参官已受替者委中书门下即与处分六品以下各減三选不拘考例听集其未得资被替者非时放选仍稍优与处分已丧亡并与追贈恩加存没以称朕怀

录用邓州归顺官诏

勅迫以凶威陷於寇境义不受污忠诚奋感履重险而不回处疾风而愈劲忘躯徇义献款投诚足以励彼勤王激其污俗去顺効逆固先典之攸嘉懋德赏功在彝章而不昧咸从序用俾服官常

唐大诏令集卷一百四

卷一百五

钦定四库全书

唐大诏令集卷一百五

宋 宋敏求 编

政事

求直

令羣臣直言诏

听百寮进状廷争勅

令台省详议封事勅

令百官言事诏

许刺史言事勅

崇儒

置学宫备释奠礼诏

兴学勅

集学生制

命张说等两省侍臣讲读勅

令明经进士就国子监谒先师勅

求儒学诏

选集贤学士勅

崇太学诏

求直

令羣臣直言诏

朕闻尧舜之君自愚而益圣桀纣之暴独智以添愚故寓逆顺於忠言则殊荣辱於帝道朕登摄宇内字育黔黎恐一德之或亏惧小瑕之有累候忠良之献替想英俊之徽猷而諫鼓空悬逆耳之言罕进谤木徒设悖心之论无闻昔惟魏徵每显余过自其逝也虽过莫彰岂可独非於往时而皆是於兹日故亦庶僚苟顺难触龙鳞者欵所以虚已外求披迷内省言而不用朕所甘心用而不言谁之责也自斯以後各悉乃诚若有是非直言无隐【贞观二十年十二月】

听百寮进状及廷争勅

勅朕以薄德只膺睿图何曾不虚已淳源励精至道将致俗於仁寿思纳人於轨训幸乾坤交泰风雨咸调中外百寮尽知戒惧夷夏万姓颇亦小康犹恐人或未安政有不便乃令外司置匭听侧门进状封章论事靡所不达轩陛进规於何不尽曾无逆旨之罚实有推心之期岂朕之不诚何人则未谕如闻朝廷之内噂????纷然进不昌言退多讪议悬书以谤国侨之患邓析伪言而辨孔子之诛少正昔为国蠹宁不在兹将求政理固宜惩絶自今以後制勅有不便於时及除授有不称於职或内怀奸忒或外损公私并听进状具陈得失五品以上官仍许其廷争若轻肆口语潜行诽讟委御史大夫以下严加察访状涉疑似推勘奏闻【开元三年十月七日】

令台省详议封事诏

为政者宣之使言择言者稽之於衆切於求道务以从人将明目而达聪亦审理而去惑经国之体庶无阙焉文武百官及诸色人等有论时政得失上封事状者出後宜令左右仆射尚书及左右丞诸司侍郎御史大夫中丞等於尚书省详议可否具闻奏某时上封事除常参官外及有词理可观或干能堪用者亦宜具言如详议官中或见不同者即任别状闻奏

令百官言事诏

昔予文祖太宗之御天下也功格二仪不私於己化覃万事犹问於人外与公卿大夫讨论政典内与鸿生硕老演畅儒风日旰忘劳时称至理犹复旁求谏诤俯察讴谣广延不讳之书载建登闻之鼓於时中朝无阙政四海无疲人历代是遵列圣相范朕承天序只奉睿图战战兢兢日慎一日於兹十六年矣何尝不励精理道思得忠贤虚已清心日有所惕直词谏议时或罕闻五七谏臣其人安在眷怀於此感叹良深顷以任非其人事多拥弊自今以後谏官所献封事不限早晚任进状来所由门司不得辄有停滞如须侧门论事亦任随状面奏即便令引

对如有除拜不称於职诏令不便於时法禁失宜刑赏未当征求无节冤滥在人并宜极论得失无所回避以称朕意其常朝参六品以上亦宜准此其击登闻鼓者委金吾将军收进不得辄有损伤亦不须令人遮拥禁止其理匭使但以任投匭人移表状於匭中依常进来不须勒留副本并妄有盘问方便止遏万邦之事无隔於九重献替之谋不遗於听览也又自顷军严未解政或随时多逐权宜未归理本宜委中书门下即与诸司长官各举所司遗阙商量厘革处置作条件闻奏俾昭宣轨度永备彝伦便俗安人典章式叙宣示中外咸使知闻

许刺史言事勅

勅列位选能功於守土分忧求瘼谅在亲人言念疲黎载深注意自今以後刺史如有利病可言者不限时节任自表闻奏不须时节申报节度观察使

崇儒

置学官备释奠礼诏

六经茂典百王仰则四学崇教千载垂范是以西胶东序春诵夏弦说礼敦诗本仁祖义建邦立极咸必由之自叔世浇讹雅道沦缺绵历岁纪儒风莫扇隋季以来丧乱滋甚睠言篇籍皆为煨烬周孔之教阙而不修庠塾之仪泯焉将堕非所以阐扬徽烈敦尚风轨训民调俗垂裕後昆朕受命膺期握图馭宇思弘至道翼宣德化永言坟典深存讲习所以摅摭遗逸招集散亡诸生胄子特加獎劝然而凋弊之余湮替日多学徒尚少经术未隆子衿之叹无忘兴寝方今函夏既清干戈渐戢缙绅之业此则可兴宜下四方诸州有明一经以上未被陞擢者本属举选具以名闻有司议等加阶叙用其有吏民子弟有识性开敏志希学艺亦具名申送入京量其差品并即配学明设考课各使厉精琢玉成器庶其非远州县及乡里并令置学官僚牧宰或不存意普便颁下早遣修立若夫安上治民莫善於礼出忠入孝自家刑国揖让俯仰登降折旋皆有节文咸资端肃罔习末业随时废絶凡厥生民各宜勉励又释菜之礼致敬先师鼓篋之义以明逊志比多简略更宜详备仲春释奠朕将亲覽所司具为条式以时宣下【武德七年二月】

兴学勅

自古为政莫不以学为先学则仁义礼智信五者俱备故能为利深博朕今欲敦本息末崇尚儒宗开後生之耳目行先王之典训而三教虽异善归一揆岂有沙门事佛灵宇相望朝贤宗儒辟雍顿废公王以下宁得不慙朕今亲自观讲仍徵集四方胄子冀日就月将并得成业礼让既行风教渐改使期门介士比屋可封横经庠序皆遵雅俗诸公王子弟并宜率先自相劝励赐学官胄子及五品以上各有差【武德七年二月】

集学生制

門下朕聞古之教者家有塾黨有庠術有序國有學蓋立訓之基也故上務之則敦本下由之則成俗豈可使顓門殆絕或乖其義入室將廢莫知其道乎朕承百王之末接千歲之統虛心問政早朝晏罷勵精求古忘寢與食思所以奉前聖之典謨矯茲深弊致後生於軌物遵我大猷去歲京畿不稔倉廩未實爰命樂羣暫停謀藝遂令子音罔嗣吾道空歸居無濟濟之業行有憧憧之嘆雖日月以冀而歲時迭往今者甫經嘗麥且周於黎獻永言釋菜寧於生徒每用惕然良非所謂其國子監學生等麥熟後并宜追集務盡師資諸州牧宰亦倍加導誘先勤學教必使俊造無濫名實有歸庶博士弟子京邑由斯日就鴻生鉅儒海內為之風化有司可即詳下稱朕意焉主者施行【景龍四年四月二十八日】

命張說等兩省侍臣講讀勅

勅先王務本君子知教化人成俗理國齊家必由於學矣朕往在儲副旁求儒雅則張說褚無量等為朕侍讀詩不云乎如切如磋如琢如磨斯之謂也咸能發揮啟迪執經尊道以微言匡菲德者朕甚休之自奉聖訓只膺大宝冀天下學士靡然向風實獲我心登於近侍復欲勉聽虛仁論思獻納孔子曰德之不修學之不讲是吾憂也豈食而不知其旨耕而不知其耨將何以因於義求於善補朕之闕海人罔倦哉宜令銀青光祿大夫守中書令上柱國燕國公張說銀青光祿大夫右常侍崇文館學士兼國子祭酒上柱國舒國公褚無量等公務之暇於中書與兩省侍臣講讀其有昌言至誠可裨要經遠者仍令銀青光祿大夫行黃門侍郎昭文館學士上柱國中山郡開國公李義銀青光祿大夫行中書侍郎兼知制誥上柱國成安縣開國男蘇頌與左右起居隨事編錄三兩月進朕將親覽庶施乎海內始自京師風詔擅鴻都之游中書有稷下之事應須紙筆鋪設等令中書檢校供擬【先天二年十一月八日】

令明經進士就國子監謁先師勅

古有賓獻之禮登於天府揚於王庭重學尊儒興賢造士故能美風俗成教化先王之所繇焉朕以寡德欽若前政思與大夫羣士復臻於理竟日訪道有時忘食乙夜觀書分宵不寐晤專經之義篤知學史之文繁永懷覃思有足尚者不有褒崇孰云獎勸其諸州鄉貢明經進士見訖宜令引就國子監謁先師學官為之開講質問其義仍令所司優厚設食兩官及監內得舉人亦准此其日清質官五品以上及朝集使并往觀禮即為常式易曰學以聚之問以辨之詩云如切如磋如琢如磨此朕所望於賢才矣【開元五年九月】

求儒學詔

朕聞以道得人者謂之儒切問近思者謂之學故以陽禮教讓則下不爭以陰禮教親則遠無怨豈無習不利教所由生者乎朕所以厚儒林辟書殿討論易象研核道源冀淳風大行華胥非遠而承平日久趨競歲積謂儒官為冗列視之若遺謂吏職為要津求如不及頃亦開獻書之路觀揚己之人闕下之奏徒盈席上之珍蓋寡豈弘獎之義或有未孚將敦本之人隱而未見天下官人百姓有精於經史道德可遵工於著述文質兼美者宜令本司本州長官指陳藝業錄狀送聞其吏部選人亦令所由銓擇各以名荐朕當明試用觀其能若行業可甄待以不

次如妄相褒进必加明罚【开元十四年六月】

选集贤学生勅

古者立大学教胄子所以延俊造扬王庭虽年谷不登兵甲或动而俎豆之事未尝废焉顷年以来戎车屡驾天下转输公私匱竭带甲之士所务赢粮鼓篋之徒未能仰给由是诸生辍讲弦诵蔑闻宣父有言是吾忧也投戈息马论道尊儒用弘庠序之风俾有箠瓢之乐宜令所司量追集贤学生精加选择使在馆习业仍委度支准给厨米敦兹儒术庶有大成甲科高悬好学者中敷求茂异称朕意焉

崇太学诏

理道同归师氏为上化人成俗必务於学俊造之士皆从此途国之贵游罔不受业修文行忠信之教崇只庸孝友之德尽其师道乃谓成人然後扬於王庭考以政事徵之以理任之以官寘於周行莫匪邦彦乐得贤也其在兹乎朕志於求理尤重儒术先王设教敢不底行顷以戎狄多虞急於经略太学空设诸生盖寡弦诵之地寂寥无声函丈之间殆将不扫上庠及此甚用悯焉今?县又宁文武兼备方投戈而讲艺俾释菜以行礼四科咸进六艺复兴神人以和风化浸美日用此道将无间然其诸道节度观察都防御等使朕之腹心久镇方面眷其弟子各奉义方修德立身是资艺业又恐干戈之後学校尚微僻居远方无所谘禀山东寡闻质疑必就於马融关西盛名尊儒乃称於杨震负经来学当集京师并宰相朝官及神策六军军将子弟欲得习学者自今以後并令补国子学生欲其业重羸金器成琢玉日新厥德代不乏贤其中身虽有官欲附学读书者亦听其学官委中书门下即简择行业堪为师范者充学生员数多少所习经业考试等第并所供粮料及学馆破坏要量事修理各委本司作条件闻奏务须详悉称朕意焉

唐大诏令集卷一百五

卷一百六

<史部,诏令奏议类,诏令之属,唐大诏令集

钦定四库全书

唐大诏令集卷一百六

宋 宋敏求 编

政事

制举

处分举人勅

处分制举人勅

孝悌力田举人不令考试词策勅

建中元年试制举人策问

贞元元年贤良方正科策问

又博通坟典科策问

又试洞韬略科策问

放制举人诏

贞元四年贤良方正策问

元和元年尚书省试制举人勅

才识兼茂科策问

放制举人勅

元和三年试制举人

长庆二年试制科举人勅

策问

放制举人诏

除制举人官勅

宝历元年试制举人勅

策问

放制举人诏

太和二年亲试制举人勅

策问

放制举人勅

贡举

条流明经进士诏

令贡举人勉学诏

令礼部掌贡举勅

处分高道不仕举人勅

亲试四子举人勅

条流习礼经人勅

厘革新及第进士宴会勅

制举

处分举人勅

勅求贤济理询事考言务取由衷以观深识顷年策试颇成弊风所问既不切於时宜所对亦何关於政事徒徵隐僻莫见才明以此择贤良未得所卿等各膺推荐副朕虚求宜其悉心各尽所见勿复仍旧空载游词各宜就食讫就试【开元年】

处分制举人勅

勅君子之道所以正其志全贞吉也逸人之举所以励天下激浮躁也朕钦崇先训以道化人思致栖真之士用光咸在之列是以频降旌帛冀空岩薮虚怀式伫明发不忘卿等来膺辟命远至城阙周文多士既叶於旁求虞舜畴咨亦在於金议爰命台省询於道业或善行无迹名实难窥或大器晚成春秋尚杪津涯未测抡别何施事且隔於行藏道遂分於出处其马尚曾常广心贺兰迪等三人宜待後处分崔从一王元瞻韩宣胡贲赵玄奘等五人年鬓既高稍宜优异各赐绿衣一副物二十段余并赐物十段不夺隐沦之志以成高尚之美并宜坐食食讫好去依前给公乘还都

孝悌力田举人不令考试词策勅

勅孝悌力田风化之本苟有其实未必求名比来将此同举人考试词策便与及第以为常科是开侥幸之门殊乖敦劝之意自今以後不得更然其有孝悌闻於郡邑力田推於邻里两事兼着状迹殊尤者委所由长官特以名荐朕当别有处分更不须随考试例申送

建中元年试制举人策问

问朕闻古之善为国者未尝不旁求正士博采直言勤而行之辅成教化者也朕临御日浅政理多阙每期忠义切投药石子大夫戢翼藏器思奋俟时今启心以沃予当有犯而无隐朕不自满假企慕前王上法羲轩下遵尧舜返已散之淳朴振将颓之纪纲使礼让兴行刑罚不用而人犹轻犯吏尚徇私为盗者未奔不仁者未远岂臣非稷契而致是乎抑君谢禹汤使之然也设何谋而可以西戎即叙施何化而可以外户不扃五谏安从三仁孰最周昌比干高於桀纣刘毅方晋武於桓灵但见含容两无猜忌故君不失圣臣不失忠子既其俦应详往行四贤优劣仁辨深疑在於朕躬所有不逮条问之外悉书之必无面从以重不德【二月十五日】

贞元元年贤良方正直言极谏科策问【试官鲍防独孤慆】

皇帝若曰盖闻上古至道之君垂拱无为以临海内不理而人化不劳而事成星辰轨道风雨时若邈乎其不可继何施而臻此欤三代以来制作滋广异文质之变明利害之乡威之以刑道之以礼敦其俗而弥薄防其人而益偷岂浇醇必系於时耶何圣贤间生而莫之振也朕只膺累圣之业猥居兆人之上恭克厉如恐失坠忧济庶务夕惕晨兴永惟前王之典谋是宪则师大禹以崇俭法高宗以求贤兴夏启之征作周文之罚旌孝弟举直言养高年敦本业平均

徭税黜陟幽明励精孜孜勤亦至矣然而浮靡不革理化不行暴乱不惩奸犯不息五教犹郁七臣未臻乡党废上齿之仪蒸庶无安土之志赋入日减而私室愈贫廉察日增而吏道愈滥意者朕不明欤何古今之事同而得失之效异也思欲剗革前弊创立新规施之於事而易从考之於文而有据备陈本末将举而行无或惮烦略於条对自顷陰阳舛候祲沴荐兴仍岁旱蝗稼穡不稔上天作孽必有由然屡降凶灾其咎安在传曰时之不义厥罚恒阳又曰尧汤水旱数之常也二者乖反其谁云从今人靡盖藏国无廩蓄朕屡延卿士询访谋猷至乃减冗食之徒罢不急之务既闻嘉话亦已遵行而停废之余所费犹广候转输於江徼则远不及期将搜粟於关中则扰而无获节军食则功臣怀怨省吏员则多士靡归中心浩然罔知攸济子大夫蕴蓄材器通明古今副我虚求森然就列匡朕之寡昧拯时之艰危毕志直书无有所隐【九月二十五日】

博通坟典达於教化科策问

问皇帝若曰朕承祖宗之鸿休获主神器任大守重惧不克堪思与士大夫共康理道虚襟以伫侧席以求而羣议纷然所见异指或率古义而不变或趋时会而不经七年於兹矣国制多缺朕甚恶焉今子大夫博习坟典深明教化褒然充举咸造於庭其极思研精思以谕朕之未寤仲尼叙礼乐删诗书修春秋广易道六经之义所尚各殊岂学者修行理当区别将圣人立意本异宗源施之於时孰为先後考之於道何者深浅差次等伦指明归趣执其本乃能通於变学於古所以行於今用之教人则异於是工祝陈乐之器而不知其情生徒诵礼之文而不究其事欲人无惑其可得耶将革前非固有良术尧舜率天下以义比屋可封桀纣率天下以暴比屋可戮然则上之化下罔或不从而三仁四凶较然同异有教无类岂虚言耶作乐移风闻诸昔典夫至味必淡至音必希文侯列国之贤君犹曰则唯恐寝矧彼流俗其能化乎将使天地同和灾沴不作黎人不佻奸慝不萌何施何为以至於此王者制礼必同其时故忠敬质文更变迭救三代之际罔不由之自秦剗古法汉杂霸道纷纶干纪王教不兴国家接周隋之余俗未淳一处都邑者利巧而无耻躬田亩者朴野而近愚尚文则弥长其浇风复质则莫救其鄙俗立教之本将安所从自古哲王唯此三正互用後之术士乃言五运相生以汉应火行则周为木德礼犹尚赤义则颇乖永言於变莫识厥理九流得失之论历代兴亡之由王郑言礼之异同公谷传经之优劣必精必究用沃虚怀

识洞韬略堪任将帅科策问

皇帝若曰朕遐览典谟详求至理三代之制粲然可徵未尝不文武并兴农战兼务故能居则足食动则足兵兵足则暴乱息食足则教化行兴国之本实在於此秦汉以降王制不修选士废射御之仪教人无蒐狩之礼即戎者不知其稼穡力本者罕习於干戈於是异文武之人分农战之道守则乏食征则鲜兵历兹千年竟莫能复抑知之者盖寡将行之者惟艰朕念之甚勤思继前躅良以军旅之事役戍靡宁勲庸既多爵秩咸贵俾服田亩虑兴怨咨仰於县官不可胜计由是版图频蹙阡陌日荒水旱小????廩饟咸竭欲使军人悦归於耒耜儒者兼达於韬铃田莱尽耕攻取必胜诱人甚易其术安施王者之师本於立德兵家之法方务出奇德以信成奇以诈胜理有违反将何适从宋襄成列而败军见嘉鲁册韩信决囊以摧敌取贵汉朝然

则丧国亡家岂霸王之道冒危乘险非仁义之心所宜讨论以定褒贬夫衆寡不敌尅必以谋乐生下齐孙子破楚魏武之胜袁绍宋高之灭姚泓成败之由备陈本末古有言曰诛伐不可偃於天下又曰善为国者不师二端异焉其有深旨子房叙次兵法任宏论撰军书指明异同详录名氏所闻高略择善而行

贞元元年放制科举人诏

朕只膺祖宗之业猥临亿兆之上任大守重不敢康宁永怀万事之统惧有所阙夕惕若厉中夜以兴求贤审官期於致理而政化犹郁太平未臻思得海内忠良竭陈匡谏洎经术之士才略之臣以明教化以立武事惟兹三者政之大经虑岩穴之间尚多遗逸故科列条目广延异能贤良方正能直言极谏韦执谊等达於理道甚用嘉之位以旌能宜其秩叙其第三等人委中书门下即超资与处分第四等人即优处分第五等人即与处分嗟乎强学以待问进德以及时昔之孙弘犹闻十上失之正鹄必反诸身凡为多士宜各自勉

贞元四年贤良方正策问

皇帝若曰朕闻王者统御寰宇司牧黎元一人之聪不足以周听一人之目不足以徧观敷求贤良用辅闻见朕以寡德纂承丕绪托於人上十载於兹虽多难仅宁而昇平未复永惟前古之理布在方册宪章典礼可得而详考之则易遵行之则难至中夜忘寝莫知所以然子大夫学览该通待问斯久歛襟应召朕甚嘉焉各启尔心以祛予惑成王致理刑措不用孝文励精断狱四百太宗皇帝萧勺羣慝削平八隅圉圉空虚又踰前代一岁所决二十九人今者官署尚存法令明具封域之内可谓小康而黔首上僚尚资科禁循源究本其故何哉岂朕教之不明将或人之多僻伫敷旨要当酌其宜文王建邦经制斯备周公立政礼乐增修然而朝命六卿揆分百度乡间有长林泽有官计以职员动以万数农夫不充於缉伍编籍不给於虞衡以是制人义或安在永言师効良用为疑唐虞设规九载三考俾安其位将尽其能列授羣司寄之衆务一官不理事有所隳一吏非人官有所废罚宁俟於终日赏不待於踰时若官废而後求人事废而後变法政将滯浇其道如何今欲济天下於太和致羣生於仁寿劝农务本何术为先敦学崇儒何礼为切何方可以顺风雨何典可以序神祇成汤遇灾何七年而後禱高祖伐叛何历载而不宾辨於古者通於今鑑於事者明於理备陈终始朕亲览焉【正月】

元和元年尚书省试制科举人勅

朕以寡薄获奉睿图严恭寅畏不敢暇逸永惟万邦之广庶务之殷而烛理未明体道未至思欲复三代之盛烈覲十圣之耿光是用详求正言思继先志子大夫等藏器斯久贡然而来白驹就维洪钟待扣膺兹献纳朕甚嘉之言观国光宜有廷试本将询事岂忘临轩园邑有期营奉是切永言诚感未暇躬亲爰命公相泊於卿士亲谕朕意延访嘉谋至於兴化之源才识攸重练达吏理详明儒术当是三道副朕旁求意或开予靡有所隐条列所问毕志尽规当酌古而参今使文约而意备朕将亲览择善而行并宜坐食讫就试

才识兼茂明於体用科策问

皇帝若曰朕观古者君人受命兢兢业业敬天顺地靡不思贤能以济其理求说直以闻其过故禹拜昌言而嘉谏罔伏汉徵极谏而文学稍进匡时济俗罔不率繇厥後相循有名无实而又设以科条增求茂异舍斥已之至谏尚无用之虚文指切着明罕称於代兹朕所以叹息郁悼思索其真是用发恳恻之诚咨体用之要庶乎言之可行行之不倦上获其益下输其情君臣之间驩然相与子大夫得不勉思朕言而茂明之我国家光宅四海年将二百十圣弘化万邦怀仁三王之礼靡不讲六代之乐罔不举浸泽於下升中於天周汉以还莫斯为盛自祸阶漏坏兵宿中原生人困竭耗其大半农战非古衣食罕储兹念疲氓遂乖富庶督耕植之业而人无恋本之心峻榷酤之科而人有重斂之困举何方而可以复其盛用何道而可以济其难既往之咎何者宜惩将来之虞何者当戒昔者主父惩患於晁错而用推恩夷吾致霸於齐桓而行寓令精求古人之意用启迪哲之怀睿兹洽闻固所详究又执契之道垂衣之言委之於下则人用其私专之於上则下无其効元帝优游於儒学盛业竟衰光武责课於公卿峻政非美二途取舍未获所由余心浩然益所疑惑子大夫熟究其旨属之於篇兴自朕躬无悼後害【四月二十八日】

放制举人勅

构大厦者必总於羣材成大川者亦资於百谷故思理之主求贤罔遗所以昭宣令图广大前绪观文缉化其在兹乎朕以寡昧获奉丕业虚已问政实始於兹考言求益敢不只若故命左右辅弼泊有位之臣会於中台必究其论緘密以献省自朕躬果获贤能副予饥渴才识兼茂明於体用科人第三次等元稹韦惇第四等独孤郁白居易曹景伯韦庆复第四次等崔韶罗让元修薛存庆韦珩第五上等萧俛李蟠沈传师柴宿达於吏理可使从政科第五上等陈岵咸以待问之美观光而来询以三道之要复於九变之选得失之间粲然可观宜膺德懋之典或叶言扬之举其第三次等人委中书门下优与处分第四等第五上等中书门下即与处分元和三年试制举人策问【考官杨於陵郑敬李益韦贯之】

皇帝若曰盖闻古之令王体上圣之姿御大宁之时犹惧理之未至也求贤以致用犹惧动之不中也谘谏以闻道矧惟寡昧膺受多福思负荷之重警风浪之虞求贤谘谏是敢怠忽至若穷神知化以盛其德经纬文武以大其业考古会极通教化之源明目达聪周听之表实亦夙夜之所志也子大夫将何道逮而致之乎自三代已还求理继作皆意其砥砺而効难彰明莫不欲还朴厚而浇风常扇莫不欲遵俭约而侈物常贵莫不欲远小人而巧谀常进莫不欲近庄士而忠直常疎莫不欲勉人於义而廉媿常不修莫不欲禁人为非而抵冒常不息其所缪盪岂无根源爰自近岁仍敷大泽霜露所坠沾濡必同滌瑕秽以道人心省徭役以丰物力蠲田租以厚农室葺国学以振儒风督废职以补维纲备衆官以序贤俊庶继先志臻乎治平而改行者未闻输劳者未艾务农者无以免艰食学者无以通微言立事之绩未纪於庶工乏才之叹未辍於终食蠹於法者无不去而法未修明切於政者无不行而政未光大岂不变其俗道广而难济乎岂不得其门事繁而愈失乎仁闻嘉猷言无或隐周之受田有经制汉之力田有恒数今疆畛相接半为豪家流佣无依率是编户本於交易焉得贫富以卑贫相欲因循

是以损多而益寡酌於中道其术何如取人以行不必文采命官以性不必资考然则行非造次而备察才非错综而遍知不必文采为轻重而事可进退不必资考为程准而吏有条贯适变矫枉渴於良规何方可以序六气来百祥何施可以寿羣生仁衆姓由於前训而可据设於当代而易从勿猥勿并以称朕意【三月二十三日】

长庆二年试制科举人勅 李德裕

勅古人有言常引一代之人以理一代之务虽隽贤茂彦不乏於时然亦在敷纳以言精核其实若决川渎以导其气叩金石以求其音使抱忠义者必尽其诚知古今者必宣其虑朕纂承鸿业以抚兆人尝欲究三代之理修列祖之法犹念和气之未洽休祥之未臻百姓之未安五兵之未戢故详延修洁之士庶得闻乎未闻将以达天地之心究俗化之变研安危之虑探理乱之源子大夫殫思於六经驰鹜於百代得不讲求至论以沃朕心方直者举朕之阙政术者体时之要慕古远者卑其论瞻文词者抑其华言经者折衷於圣人以明教化论将者先之以仁义无効纵横於戏子大夫当朕之时必冀思自达且古之翼其君者尚委辂纳说荷担吐奇由壶关以上言自南昌而讽刺况文陛之下负展亲临若藏器不耀结囊而去顾朕深志复何望焉当体予衷无惧後害宜坐食讫就试【十月二十三日】

策问【考官白居易陈祐贾餗】

皇帝若曰盖闻舜禹之有天下也起於侧微积德累勤多历年所夫经盛圣之虑岂有遗哉然犹好问察言勤求贤士盖以承天之任重忧人之志深也况朕长於深宫涉道日浅奉列圣之洪绪抚万之黎人夙夜严恭不敢懈怠实惧烛理未究省躬未明所以详求说言以辅不逮子大夫是宜发所蕴蓄沃予虚怀当极意正词勿有隐讳昔王政之兴必臻於康泰霸道所立犹致於富强我国家提封溢於三代酌宪兼乎百王无尧汤之灾积祖宗之化而人未蕃庶俗尚凋讹家无盖藏公阙储卒乘之数货币之资统而校之莫继前代岂率土生植变於古欤将阜时政令失於今欤因以揣摩必穷利病明徵末失之渐具陈兴复之谟且文武兼学以成身士农迭居以丰业故家给人足可以恋土本末周备可以应时近古各徇一端不相资用致令从事异心难以成课民佚无守轻为惰游指明共贯之方欣合二途之利永言化理期酌厥中施为或差得失斯远将修睦劝义则在下难知将任数驭情则人心尽伪思闻旨要得合诚明旌别比周之情敷详忠厚之道知人则哲从古攸慎九愆恐泥五事难精或望可服人而才非周物或言皆诣理而行有乖方宜陈取舍之端用彰真伪之辨至於朝廷之阙四方之弊详延而至可得直陈退有後言朕所不取子大夫其勉之

放制举人诏

朕自郊上玄御端门发大号与天下更始思得标明四科命羣公卿士暨守土之臣详延下位周於草泽成列待问副予虚求昧爽临轩俾究其论正辞良术精义宏谋绎之旬时深见忠益言刈其楚列而第之贤良方正能直言极谏第三等人龐严第三次等人吕术第四等人韦署姚中立李经第四次等人崔□崔龟从任畹第五上等人韦正贯崔知白陈在锡博通坟典达

於教化第四等人李思立详明政术可以理人第四次等人崔郢军谋宏达堪任将帅第三等人吴思第五等人李商卿咸以懿学茂识扬於明庭况当短晷之晨颇尽论思之美璨然高论深沃朕心永言藏器之规岂忘絜驹之美宠之命秩允答嘉猷其第三等人第四次等人委中书门下优与处分其第四等人第四次等人第五上等人中书门下即与处分【长庆二年十二月】

除制举人官勅

昔仲尼之门以四科品第诸生所得十哲今吾徵四海九州之士而登名者十有五人搜罗简拔非不勤至以今况古可谓才难是用诏爵以嘉獎其忠超擢以光明其道俾岩石之下人思自奋晁董之盛远以为邻延登谏垣式伫匡益储书结绶皆曰显途循其袂次亦视科等服我新命曷哉远猷可依前件

宝历元年试制举人诏

朕闻心术顺道天下可一言而兴聪明自壅堂上有千里之远故唐虞而降则考试观俗汉魏之际则诏策求贤朕纘绍丕图抚临方夏实惧诚有所偏信鉴有所求周乃前岁诏六官九卿方岳尹正有位之士逮於庶僚高悬四科博存羣产将访衆政之阙酌至论之中子大夫庭列俨然各应其品是用宵兴前殿永日渴求条列坦明咸本经意固子大夫之所讲摩矣当竭诚尽虑无有蕴藏宜坐食讫就试【二月二十八日】

策问【考官郑函崔琯李虞仲】

皇帝若曰朕恭守宪祖中兴之运穆宗绍宁之业寅畏兢翼亦免荒坠诸侯忠上而奉职卿士循法而恪官四夷内向兆人休息至於属统垂文程示後代终有致义之意未有理人之术古人云希顔之徒亦顔之流也又曰舜何人也予何人也予窃不让欲追踪乎三代俯视乎两汉陶今俗於至道济乱人於太和子大夫皆蕴器应荐愤愤悱悱思所以奋者於日久矣当极其虑开予郁滞夫礼乐刑政理之具也礼乐非谓威仪升降铿锵拊击也将务乎阜天时节地财和神人齐风俗也刑政非谓科条章令繁文申约也将务乎愧心格耻设防销微也必有其论何方致之四人混处迁於异物历代以降皆所苦患士本於儒而有诡道之行农尚笃固而多损本之心工繕用物而作雕靡之器商通有无而齎难得之货思矫其弊必有其术汉高之基称萧曹孝宣之兴称邴魏朕观其书粲然尽在我国家之盛其纪年则曰贞观开元其辅相则曰房杜姚宋朕观其书则拔羣絶类者不能相远然两朝之盛四子之能不可诬也将与元化合德谟谋而无际坎为史官词志不能久其事业坎口食至多而垦辟者墮供亿至衆而财官是空官无阙员而家食者告困德泽仍臻而鰥弱者未贍必有其旨何以辨之无泛无略无游说无隐情以副虚求朕将亲览

放制举人诏

朕深居法宫高处宸极常虑天下多务壅於上闻朝廷大猷阙於中兴至於伏陛叩颡造膝犯顏皆驟迁显荣宠以优锡犹思物不得茂遂道有所郁堙是用虚中访贤侧席前殿緘密以献閱自朕躬切磨予违无所回忌第於上下扬於正朝吾之不宏亦可谓信於海内矣贤良方正能直言极谏科举人第三等唐伸韦端符舒元褒第四等萧敞杨曾士杨俭来择赵祝裴憚第四次等王繇李昌实严荆田必崔璜第五上等李滢萧夷忠冯球元晦详闲吏理达於教化科第五上等韦正贯军谋宏远材任边将科第三等裴俦第四次等侯云章咸以说言正词兵符教本应问如响不穷於衆着之於篇烂然尽在宜膺中鹄之选用叶靡爵之经其第三等人委中书门下优与处分第四等第四次等第五上等中书门下即与处分

太和二年亲试制举人勅

士志於道盖道以致君为先代实生才盖才以济理为务不索何以获其实不言何以知其志故帝尧垂询衆之训殷宗首沃心之术其传曰嘉言罔攸伏又曰俊乂用彰汉魏以还诏策时作暨於我唐遵为故事由是善政惟乂魁能间出朕只荷大宝勤恤兆人明不烛於幽昧惠未流於鰥寡御朽兢虑求贤永图是以诏命有司会羣材列稽疑延问阙政子大夫达学通识俨然来思操觚濡翰条海宿滞慰我虚伋必弘嘉猷故临轩命书策以审访继烛俟奏其悉乃诚辞各宜坐食食毕就试【三月二十九日】

策问

问朕闻古先哲王之治也玄默无为端拱司契陶甿心以居正凝日用於不宰立本以厚下推诚而建中繇是天人通陰阳和俗跻仁寿物无疵厉噫盛德之所臻邇乎其莫可及已三代令王质文递尚而巧伪滋炽流失寢多自汉魏以降足徵盖寡朕昧理道只荷丕构奉若谟训不敢荒宁任贤惕厉宵衣旰食詎追三五之遐轨庶绍祖宗之鸿休而心有所未达信有所未孚由中及外阙政斯广是以人不率化气或堙戾灾旱竟岁播植愆时国廩罕蓄乏九年之储吏道多端微三载之绩京师诸夏之本也将以观理而豪猾时踰检太学明教化之源也期於宣化而生徒多堕业列郡在於颁条而科禁或未絶百工在於按度而淫巧或未衰俗堕风靡积讹成蠹其择官济理也听人以言则枝叶难辨御奸以法则耻格不形其阜财发号也生之寡而食之衆烦於令而鲜於理思欲救此繆盭致之治平兹心浩然若涉泉水故前诏有司博徵羣彦伋启宿懵冀增时雍子大夫皆识达古今明於康济造庭待问副朕虚怀必当箴主之阙辨政之疵明纲条之所紊稽庶富之所急何施斯革於前弊何泽斯惠於下土何修而理古可近何道而和气克充推之本源着於条对至若夷吾轻重之权孰辅於理严尤底定之策孰叶於时元凯之考课何先叔子之克平何务惟此龟镜择乎中庸期在洽闻朕将亲览

放制举人勅

王者谨天戒酌人言叶时凝资赞理斯为令典也朕以菲德只膺大统岁属凶旱人思底宁庶察弊以勤理因举能而询衆科别条问临轩致诚载搜尤魁果副虚伋贤良方正能直言极谏科举人第三等裴表第三次等李合第四等南卓李甘杜牧马植郑亚崔璵第四次等崔说王

式罗郡京崔渠慎田苗惜韦昶崔博第五上等崔换王宾详闲吏理达於教化科举人第四次等宋昆军谋宏远堪任将帅科举人第四等郑冠李栻等皆直躬遵道博古知微敷其远猷志在弘益实能攻朕阙政究天人交际之理极皇王通变之义指切精洽粲然可观既効才於明世宜旌能於受禄其第三等第三次等人委中书门下优与处分第四等第四次等第五上等人中书门下即与处分

贡举

条流明经进士诏

学者立身之本文者经国之资岂可假以虚名必须徵其实效如闻明经射策不读正经抄撮义条才有所解进士不寻史传惟读旧策共相模拟本无实才所司考试之日曾不拣练因循旧例以分数为限至於不辨章句未涉文词者以人数未充皆听及第其中亦有明经学业该深者唯许通六经进士文理华赡者意无甲科铨综艺能遂无优劣试官又加顔面或容假手更相属请莫惮紕绳由是侥幸路开文儒渐废兴廉举孝因此失人简能任贤无方可致自今以後考功试人明经每经摘试麓十帖得六以上者进士试杂文两首合文律者然後并令试策日仍严加捉搦必才艺灼然合昇高第者并即依令其明法并书箒贡举人亦量准此例即为恒式【永隆二年八月】

令贡举人勉学诏

古之学者始入小学见小节大学见大节知父子长幼之序君臣上下之位然後师逸功倍化人成俗莫不由之予不云乎远而有光者饰也近而愈明者学也故道行於上禄在其中所贵於有成不惟於迟达自顷州里所荐公卿之绪门人衆矣孰嗣子音国胄顒然未臻吾道至使鑽仰之地寂寥厥化贵於责实务於求士将去圣滋远尚治浇薄为敦儒未弘不行劝沮朕承百王之末居四海之尊惟怀永图思革前弊何以发後生之智虑垂先王之法朕甚惧之敢忘於是天下有业擅专门学优重席堪师授者所在具以名闻自今以後贡举人等宜加勸勉须获实才如有义疏未详习读未遍辄充举送以希侥幸所由官亦寘彝宪有司申明条例称朕意焉【开元二年五月】

令礼部掌贡举勅 张九龄

勅每岁举人求士之本专典其事宁不重欤顷年以来惟考功郎中所职位轻事重名实不伦故尽委良吏长官义铨猥积且六官之职例体是同况宗伯掌礼宜主宾荐自今以後每诸色举人及斋郎等简试并於礼部集既衆务烦杂仍委侍郎专知【开元年】

处分高蹈不仕举人勅 孙逖

勅古之贤君贵重真隐者将以励激浮躁敦厚风俗传不云乎举逸人天下之人归心焉盖谓

此者朕緬稽古訓思弘致理以為道之為體先崇於靜退政之所急實仗於賢才是用求諸岩薮假以輶傳虛伧之懷亦云久矣卿等各因旌賁來赴闕庭誠合盡收以光是舉然孔門荷篠惟數七人商山采芝空傳四老今之應辟其數頗多朕頃緣幸湯粗令探蹟或全誠抗迹固辭避於呈試或含光隱器不耀穎於文詞未測津涯難於處置語默之際用舍遂殊其弟子春等并別有處分自余人等宜各賜物十段用成難進之美以全至高之節宜皆坐食食訖好去仍依前給公乘還貫其華陰郡李崗等十六人雖所舉有名或稱疾不到宜令本部取諸色官物各賜二十段以充藥物之資

親試四子舉人勅

朕听政之暇常讀道德經文列莊子等書文約而義精詞高而旨遠可以理國可以保身朕敦崇其教以左右人也子大夫能從事於此甚用嘉之夫古今異宜文質相變若在宥而不理外物而不為行邃古之化非御今之道适时之術陳其所宜又禮樂刑政所以經邦圖聖智仁義所以序人倫使之廢絕未知其旨道德經曰絕學無憂則乖進德修業之教列子力命曰汝奚切於物又遺懲惡勸善之文二旨孰非何優何劣文子曰金積折廉壁裘且申其義莊子曰恬與知交相養相徵其言使一理混同二教兼舉成不易之則副虛伧之懷【開元二十九年九月】

條流習禮經人勅

王者設教勸學攸先生徒肄業執禮為本故孔子曰不學禮無以立又曰安上理人莫善於禮然則禮者蓋務學之本立身之端居身之大猷致理之要道屬辭比事而不裁之以禮則亂疏通知遠而不節之以禮則誣實百行之本源為五經之戶牖雖聖人設教罔不會通而學者遵行宜有先後自頃有司定議計功記習不量教化淺深義理難易遂使博學者例從冬集習禮經者獨授散官敦本勸人頗乖指要始務弘獎以廣儒風自今以後明經習禮記及第者亦宜冬集如中經兼習周易若儀禮者量減一選應諸色人中習三禮者前資及出身人依科目例白身人依貢舉例每經問大義三十條試策三道仍主司於朝官學官中簡擇精通經術三五人聞奏主司與同試問質定通否義策全通為上等轉加超獎大義每經通十五條以上策通兩道以上為次等依資與官如先是員外試官者听依正員例其習開元禮人問大義一百條試策三道全通者為上等大義通八十條以上策通兩道以上為次等余一切并准習三禮例處分其諸館學士愿習三禮及開元禮者并听仍永為恒式

厘革新及第進士宴會勅

勅進士策名向來所重由此從官第一出身誠宜行止端莊宴游儉約事務率醵動合兢修保他日之令名成在此之慎靜豈宜縱逸惟切追歡近年以來澆風大扇一春所費万余貫錢況在麻衣從何而出力足者樂於書罰家貧者苦於成名將革弊訛實在中道宜令禮部切加減約每年有名宴會一春罰錢及鋪地等相許每人不得一百千其勾當分手不得過五十人其開試開宴并須在四月內稍有違越必舉朝章仍委御史台當加糾察【乾符二年正月】

唐大诏令集卷一百六

卷一百七

钦定四库全书

唐大诏令集卷一百七

宋 宋敏求 编

政事

备御

閱武诏

置十二军诏

修缘边障塞诏

寬繕治器械功程诏

骊山讲武赏慰将士诏

镇兵以四年为限诏

诚励诸军州牧将诏

遣使选择边兵诏

遣荣王琬往陇右巡检处置勅

禁诸道将士逃入诸军制

禁诸道将校逃亡制

命郭子仪出师制

停河中节度并耀德军诏

发兵屯守诸镇诏

优獎西北庭将士诏

还马燧赏军士家财诏

遣胡证巡边诏

岭南用兵德音

备御

閱武诏

安人静俗文教为先禁暴惩凶武略斯重比以丧乱日久黎庶凋残是用务本劝分冀在丰贍而人蠹未尽寇盗尚繁欲畅兵威须加练习今农收已毕煞气方严宜顺天时申曜威武可依别勅大集诸军朕将躬自巡抚亲临校閱【武德九年十月】

置十二军诏

天生五材司物资其器用武有七德拨乱所以定功故黄帝垂衣尚有阪泉之战放勳光宅犹兴丹浦之师禁暴安人率由兹道创业垂统莫此为先以是周置六军每习蒐狩汉增八校毕选骁勇故能化行九有威震百蛮奸宄不萌?刘息志季叶凌替军政湮亡行列不修旌旗舛杂部伍符籍空有调发之名逗挠怯弱竟无讨袭之用遂使夷狄放命盗贼交侵战争多虞黔黎弥丧朕受天命抚育万方爰自我师克成帝业至如超乘之士莫匪百金穀骑之材岂唯七萃今虽关塞宁谧荒裔肃清伊洛犹芜江湖尚梗役车未息戎马载驰武备之方尤宜精练近以各因部校序其统属改授钲鼓创造徽章取象天官定其位号庶使前茅後劲类别区分玉帛綵宫刑德允备蹈兹汤火譬彼椒兰大定戎衣止戈斯在【武德二年七月】

修缘边障塞诏

城彼朔方周朝盛典缮治河上汉室宏规所以作固京畿设险边塞式遏寇虐隔碍华戎自隋氏季年中夏丧乱黔黎凋尽州城空虚突厥因之侵犯疆场乘间幸衅深入长驱侵暴滋甚莫能御制皇运已来东西征伐兵车屡出未遑北讨遂令胡马再入至于泾渭蹂践禾稼骇惧居民丧失既多亏废生业朕分命师旅挫其锋銳频获名王每夷渠帅然而凶狡不息驱侵未已御以长算利在修边其北道诸州所置城寨粗已周遍未能备悉今约以和通虽云疲寢然蕃情难测更事修葺金曰宜之朕以板筑之功方资力役畚鍤之用兴发且多念彼劬劳用深忧惕加以普给优复诏书始下旋即科召有若食言百姓将疑谓予不信但民惟邦本本固邦宁丑虏凭凌实为民患其城寨镇城须有修补审量远近详计功力所在军民且共营办所司具

为条式务使成功宣示闾里明知此意【武德元年九月】

寬繕治器械功程诏

周氏设官分掌邦事汉家创制先定章程故百工咸理五材毕举虽沿革有时而此途莫爽但钦明之后役自子来昏乱之朝形尽民力或祁寒隆暑未获小康或俾夜作明继之以烛淫费不已凋丧为期朕只奉明命抚临亿兆爱育之心发於寤寐每咨谋卿士询访葛藟何尝不以节俭为德忧矜在虑自非田畴□获军国资须未曾别使一人辄求一物每有丁匠之所但申戒作之司令其寬立功程务从闲逸少府僚属莫不闻知而营造牟铠催督非理竭人之力以求已功朝夕左右尚乖期约远方劳役何以克堪虽四海之内无余经始然繕治器械修葺城隍及堤防浸决桥梁毁坏既不获已必藉人功皆须慰彼民心缓其日用宜颁告天下以知朕意【贞观元年七月】

骊山讲武赏慰将士诏 苏頌

门下传不云乎兵之设久矣所以威不轨而昭文德圣人以兴乱人以废皆兵之由也故文事必有武备耀德在於观兵所以外清蛮貊内辑华夏其经济之致欤自有隋失道三灵改卜我唐受命百姓与能四罪而天下服一戎而天下定航海梯山何不率俾休牛归马示不复用化资羣物刑清百年而制军为旅先王分职在祀与戎前史垂训则未学也孰可弃之往以韦氏构逆近又凶魁作祸则我之宗社危如缀旒故斩长蛇截封豨戮梟獍扫欃枪使武之不修人何克义朕以薄德昔奉圣谟济邦家之多难畏君父之严旨抚兹亿兆若临泉谷虽重译云归和亲日至遂五兵之不教虑七德之未康今孟冬戒时农事爰隙骊山之下鸿门在望横层阜以南属耿长川而北流严霜初霁疾风始至以时而命羣帅得地而临武臣料其胜负详其进退以振国威用蒐军实故披坚执锐干戈有容练卒陈师金鼓以节上应於天也下顺於人也三光之灵可接五行之德斯用将孙吴不达颇牧同时非熊所期怒蛙知劝布三令询九章且閱宣场之仪若观莘墟之礼情兼慰赏义弘宠锡惟此畿甸比经水旱总集士马颇有烦劳曲念元元更资勤恤其讲武使各赐物一百段将军各八十段中郎将各六十段郎将及左右军长史各四十段折冲果毅各三十段押官六品以下各二十段新丰百姓宜免来年地繇置顿使赐物一百段缘顿踏践麦苗给米酬直主者施行【先天二年缺月十三日】

镇兵以四年为限诏

王者制五服绥四方申画郊畿慎固封守是乃选徒兴役御备边疆钦若前载率由兹道朕以薄德绍膺丕运奉天明命为人父母永隔绥养鉴寐以之每念征戍良可矜者其有涉河渡碛冒险乘危多历年所远辞亲爱壮龄应募华首未归矧言劳止期於折衷但碛西诸镇道阻且长数有替易难於烦扰其镇兵宜以四年为限散支州县务取富户丁多差遣後量免户内杂科税其诸军镇兵近日通加年限者各依旧以三年一年为限仍并不得延留其情愿留镇者即稍加赐物征人愿往听复令行惟贵劳逸且均公私咸适宣布遐迩识朕意焉【开元五年正月】

诫励诸军州牧将诏

分命督将保宁封疆且变无知之俗长为不叛之臣必也仁明在乎备整若脂膏不润毫发无私开怀纳戎张袖延狄彼当爱官吏犹父母安国家如天地欲其亡散庸可得乎若其心不至公所视惟利放纵部曲阿容子弟此乃求鹰鹯以驯乳使豺狼以掌牧欲其辑宁庸可得也往年黠在荣府绥通乖方近日张知运在单于徵调失所遂令东胡扰乱北虏披猖爰遭征伐之勤颇烦疮痍之诰言念於此可为深戒今诸番归降色类非一在番者则汉官押领入附者或边陲安置风俗未通言语不达至於畜养实务绥怀宜令所在军州牧将等倍加抚恤申其冤尽其理同疾苦知饥寒公私不得相侵巨细必令无扰徬处馭多僻威恩不孚龟玉之毁典刑斯及御史出日仍诏察以闻【开元五年八月】

遣使选择边兵勅

为国之道莫不欲家给人足令行禁止而旅谈者苦疆场之戎役偶语者伤户口之凋残且夫怀土重迁人之常性离邦去里孰无其情或委非其才或政非其要致令父不保子兄不宁弟井邑有流离之怨道路有吁嗟之声静言思之良可叹息是以昼旰不食夜分不寝庶息彼弊政就此淳风故发使车以巡郡县其承前处置不利於人即宜当处商量随事厘革其缘边兵士等或远辞乡壤久事戎旃饥寒而衣食不充疾病而医药不拯边烽忽警将何以堪宜令使人各视劳苦其有年齿衰暮或抱疾羸弱即与军司选择给粮放还行人之家【开元十二年九月】

遣荣王琬往陇右巡按处置勅 孙逖

勅遏寇防边在於有备兴师训卒用戒不虞陇右诸军地当戎虏尤资振旅以壮边威宜令陇右节度经略支度营田大使开府仪同三司兼京兆牧上柱国荣王琬自往陇右巡案处置庶弘庙略因达诚怀宜於关内及河东纳资飞骑并诸人中间召取健儿三五万人赴陇右防扞至秋末无事放还仍於当道军将内铨择一人与所由简召应给粮赐所司速作条例处分

禁诸道将士逃入诸军制

勅顷以寇难未平师徒尚聚嗟我有衆勤王积劳各隶戎麾安於所属恩信素给久而益怀亲同父子之军战有手足之扞上下相得死生以之爵禄相先慰荐亦厚或有见利而动不顾所从弃军畔官改事新将且携阻而至虽纳而见疑将欲饶求必乖始望至於任用之际赏劝之间必以同劳苦之人又服习於事既亲又信委任及之当不使後居其上亲废其旧也况貳於统部挠我师律弃恩不义犯教不忠何名节之顿亏亦功劳之可惜今未息边患犹张威武实赖干城致命之臣叶心戮力勤悴於外忠卫王室也所以解衣推食恤其暴露念东山之不归歌采?以勤息未尝一日而忘於怀休戚必同终始宜保岂轻於去就而自取累哉如闻诸节度及团练使下官健多有逃入诸军亡而不追浸以成弊议於军令事则非经念以戎勲恕其既往自今已後切宜禁絶应有此色诸军不得辄容差人遁还各付所统其额内官健有逃死者

不须更填宣示军州各知朝旨

禁诸道将校逃亡制 常衮

勅军兴以来十有四载未息戎备尚劳师徒各以名数隶於麾管朕念三军之勤役率万姓以供馈躬自节俭而贍济之定尺籍伍符厚其资粮扉履掖庭织室俾给戎衣鈎盾弄田亦调军食推诚惠养靡不至焉虽感激忠义勇於赴难而差次官赏固不遗劳诚宜戮力以永所事如闻诸节度及团练使下官健多有逃入诸军去其所从犯我明禁在於国令固合惩奸眷其戎勲尚容改过自今已後切宜禁止应有此色诸军不得辄容差人遁还各付所统其额内官健有逃死者不须更填宣示军州令知朕意

命郭子仪等出师制

自古圣帝明王之临御也莫不法乾坤之覆载体山川之受纳立德於太上还淳於至道清静无事保合太和济於羣生洽於四海岂垂意兵革劳心战争也盖有德化之所不绥招怀之所未谕不式王命毒流生人故有除暴禁淫之师安人止戈之武则神农黄帝尧舜禹汤之所不免也朕君临万邦十有三载薄德内愧中夜以兴至如易简寬仁?默恬澹素怀所慕终食岂忘然自承统以来属当多难伊川有盗国之孽朔野有叛君之将江湖海岛伏戎数辈其在右武安能解严所以请於宗庙亲授经略诛诘奸宄摧殄暴强三年之间方内底定此皆皇天佑我烈祖羣后戴予一人是用集大勲於国家保万姓於区夏岂伊寡薄能及此耶每思偃兵姑务柔远将息马以论道期舞干而修德而西戎负约间岁犯边朕常弃细过庶弘大体疆臣兵吏亟请长驱屡有诫勅不令掩袭兼约游骑不许擒生或误得之亦使还遣固以亭育之义岂隔华夷绥抚之恩宁疎远迹故布文告以训之叙舅甥以睦之彼亦尝遣聘臣来修旧好玉帛之礼才至於上国烽燧之候已及於近郊长其无厌昧於事大去冬踰我关陇入我邠岐驱人之马牛掠人之士女朕许其通好本在人安乘此不虞翻贻我诈每一兴念悼於厥心岂朕不叶於亲隣岂朕有负於恩信犹期惩艾未忍讨除今大閱甲兵以增扞御且崇不战之道用举边备之常所以然者念其载勤欸疏求继嘉姻事或由衷义从割爱因之宁远岂复顾私当罢四方之师永全二国之好倘更侵冒必示威刑宜令子仪以上郡北地四塞五原义渠稽胡鲜卑杂种步马五万严会洵邑充北旧军抱玉以晋之高都韩之上党河隍义徒汧陇年少凡三万衆横絶高垒斜界连营马璘以西城前庭车师後部兼广武之戍下蔡之徭凡三万衆据於朝那遏当路之塞忠臣以卢龙柳城泊右北平汉东诸镇江黄申息之师凡三万衆屯於回申张大军援忠诚以武落别校右地奇锋凡二万衆出岐阳而北会希让以三辅太常之徒六郡良家之子自渭而合汴宋淄青河阳幽蓟总四万衆分别前後魏博成德昭义永平总六万衆大舒左右朕内整禁旅亲誓诸将资以千金之费锡以六牧之马其戎装战器军用边储各有司存素皆精办咨尔将相文武宣力之臣夫师克在和善战不阵各宜保据经界屯据要冲斥堠惟明首尾相应若能悔过何必劳人如或不恭自当伐罪然後眷求纯一以制诸军进取之宜俟於後命各敬尔事无黷武经赏罚之科国有明典宣示中外知朕意焉【大历九年四月】

停河中节度并耀德军诏

自中原有事海内不康殲厥渠魁人自为战其死亡者不可胜纪若非其父兄即其子弟责罚由朕祸非自天念兹匆匆痛入骨髓明神厌乱元恶就诛四胡既平罔不相贺遂欲衣裳为会天下偃兵备七德之武同五星之色成朕之志实惟良臣关内河东副元帅朔方河东节度使司徒兼中书令汾阳郡王子仪迈德济时尽忠忧国笃勤王之义急偃伯之期思拯生人免其汤火善陈利害屡进封章以艰阻匪宁务於清浄地非要害不可犹开幕府事无防遏不可更置辕门请停河中节度并耀德军宜依罢兹凶器姑欲息人离散可安疮痍可复率是道也仁远乎哉朕心所嘉期於至理宣示中外明政体焉【广德二年六月】

发兵屯守诸镇诏

在昔圣王之御^也常修文德以胜武威故能协和神人抚宁方夏盖有国之令图也朕自君临万邦於兹三载明发求理中夜靡遑常惧祖宗之威灵顾惟黎元之未洽是用君臣之际推人腹心赏罚之道俾无僭滥每发一诏施一令罔不本之以德义後之以威刑期戢五兵思弘七教庶乎胜残去杀之理有耻且格之道而眇身薄德肺腑未亲四方诸侯义信犹阻近闻曹濮数州加兵籍马采听飞语容纳奸谋交质往来邀结外援虽各在封略言备寇攘而汴郡士庶颇闻惊扰闻并奔散如避寇讐迨兹春中首理未入朕为人君父不能以诚明感达股肱之佐不能以慈惠覆育黔黎之类使其骨肉相出情义不通终宵咎责心用震悼亦以社稷之计亿兆之命防微虑远不得不然至於君臣之道进退之理虽造次颠沛所未尝忘也是以分命节制及诸禁军於汴宋怀郑之间使其屯守发令之日尝言诚非有侵不令议战但田里复业农桑及时下无愁怨外絶师旅偃旗卧鼓朕愿斯毕於戏惟天地日月实鉴我心山川鬼神尚弼予志布告中外咸令知悉【建中元年】

优獎西北庭将士诏

二庭四镇统任西夏五十七蕃十姓部落国朝已来相奉率职自关陇失守东西阻絶忠义之徒泣血相守慎固封略奉遵礼教皆侯伯守将交修共理之所致也其将士叙官可超七资【建中年】

还马燧赏军士家财诏

忠臣之事君也愿隳家以奉国良将之养士也或均财以周惠爰自古昔其俦盖鲜故窦婴陈金於廊庑赵奢分财於部曲皆受之天府不取私门犹能垂名史册遗劳千载而况执上将之旗鼓率先登之士卒将行命赏罄乃家财上以彰忧国之诚下以竭奉公之効不有褒美孰旌忠贤河东节度使马燧诚美夙着宏略载宣克扬经武之规实重安人之寄属河朔干纪磁邢当寇而能忠义奋发奉辞问罪出师之际宣布明诚誓将赀产分给战士故得三军之衆相与感激百胜之绩於兹竟劝朕当遂其恳诚以成厥美殊常之迹古人所难举而行之用明信赏仍班王府之货式表忠臣之节宜令度支出钱充给将士马燧家资并却还仍宣付史馆【建中年】

遣胡证巡边诏

周礼政官之属掌道王志以巡天下邦国况六郡分统二庭縣邈居必申儆动当摄怀自顷东夏有虞近郊多垒沙朔之外剪为寇戎亭鄣烽櫓之严遐张塞下使译道途之要远属湟中今妖氛可息思欲肃关陇之右地制昆吾於盛秋而虑师无见粮卒有虚藉乏守御之全备积愁叹之余音临轩永怀宜俾宣导非夫忠良陈达文武兼资信厚足以得人心恪恭足以奉王事则何以膺兹选任布我忧劳至於问戎役之勤详山泽之要稽军实之名数计馈饷之盈虚宿弊有未除衆情有未达兵机虏态一以上闻冀在此行所至循拊宜令左金吾卫大将军兼御史大夫胡证充京西京北巡边使所经过州镇与节度防御使刺史审度商量利害具事实闻奏

岭南用兵德音

朕以寡昧获承高祖太宗之丕构六载於兹矣罔畋游是娱罔声色是纵罔刑戮是滥罔邪佞是惑夙夜忧惕以忧以勤庶几乎八表用康兆人以泰而西戎款附北狄怀柔独唯南蛮奸宄不率侵陷交趾突犯郎宁爰及嶺州亦用攘寇劳我士卒兴吾甲兵骚动黎元疲力飞挽每一軫念惻然疚怀顾惟生人罹此愁苦宜布自天之泽俾垂及物之仁如闻湖南桂州是岭路系口诸道兵马纲运无不经过顿逋供承动多差配凋伤转甚宜有特恩潭桂两道各赐钱三万贯文以助军钱充以馆驿息利本钱其江陵江西鄂州三道比於潭桂徭配稍简宜令本道观察使详其闲剧准此例与置本钱邕州以西黎旧界内昨因蛮寇平有杀伤宜令本道收拾埋瘞量设祭酹徐州土风雄劲甲士精强比以制驭乖方频致骚扰近者再置使额却领四州劳逸既均人心甚泰但闻比因罢节之日或有避罪奔逃虽朝廷频下诏书并令一切不问犹恐尚还疑惧未委招携结聚山林终成诖误况边方未静深藉人才宜令徐泗团练使选授召募官健三千人赴邕管防城待岭外事宁之後即与替代归还仍令召满五百人即差军将押送其粮料赏给所司准例处分淮南两浙海运虏隔舟船访闻商徒失业颇甚所用纵舍为弊实深亦有般运货财委於水次无人看守多至散亡嗟怨之声盈於道路宜令三道据米石数牒报所在盐铁巡院令和雇入海 船分付所司通计载米数石外辄不得更有隔夺妄称贮备其小可短□至江口使司自船有不在更取商人舟船之限如官吏妄行威福必议痛刑於戏万方靡安宁忘於罪已百姓不足敢怠於责躬用伸钦恤之怀式表忧勤之旨【咸通五年五月】

唐大诏令集卷一百七

卷一百八

钦定四库全书

唐大诏令集卷一百八

宋 宋敏求 编

政事

营缮

建玉华宫於宜君县凤皇谷诏

玉华宫成曲赦宜君县制

停修金仙玉真两观诏

停修大明宫诏

大明宫成放免囚徒制

改明堂为乾元殿诏

兴庆宫成御朝德音

禁约上

关内诸州断屠酤诏

关内诸州断屠杀诏

废潼关以东缘河诸关不禁金银绫绮诏写书御名不阙点画诏

官人百姓衣服不得逾令式诏

禁断大酺广费勅

焚珠玉锦绣勅

禁奢侈服用勅

营缮

建玉华宫於宜君县凤皇谷诏

朕闻上代无为檐茅而砌土中季革用彫玉而台琼燥湿之致虽同奢俭之情则异朕承皇王之绪执造化之纲包万类於心端图八紘於目际夷夏一轨区宇大同虽则德有劣於难名道方参於至有若乃制衣服裳之后环井羈马之君强弧制矢之奇运车浮舟之智济时为美功亦大焉至若浩浩九龄炎炎七载融山坼地滔天襄陵生人之艰劳亦极矣彼数德者功莫高乎吞狄此两灾者劳又甚乎裁宫今虽菲食卑居有慙於曩哲安人济难不慙於前贤然而人皆轻见重闻贵耳贱目德虽微也以其古而为着功虽巨也以其今而成小不以谬哉每流鉴於前经常披怀而自勗思所以收骄闲逸卷欲除华而频年已来忧劳烦结暨於兹岁风疾弥时嗟乎济世之心患攢躬而靡制摩天之力痛沈已而难移重以景炽流金风汤溽暑遭回几席旭暮增烦俯仰岩廊寝兴深弊唯冀廊景延凉荡兹虚憊近因羣下之志南劳翠微本絶丹青之工才假林泉之势峰居隘乎蚊脚山迳嶮乎焦原虽一已之可娛念百僚之有倦所以载怀爽塏爰制玉华故遵意於淳朴本无情於壮丽尺版尺筑皆悉折庸寸作寸功故非虚役犹恐遐迹乖听方兴怨咨非其乐劳人而竭力好峻宇而雕墙但以养性全生不独存私存已怡神祈寿良以为国为人比者屡有征行非无疲顿前岁问罪辽左去秋巡幸灵州皆以剪害除凶怀柔服叛岂欲矜轍迹骋游盘而已哉今复土木顿兴营缮屡动永言及此深念人劳一则以爲慙一则以无愧何则匈奴为患自古弊之十月防河人血丹於水脉千里转战汉骨浩於塞垣当此之疲人不堪命尚兴未央之役犹起甘泉之功今毳幕穹庐聚为郡县天山瀚海分为苑池去既往之长劳成将来之永逸避回一年之力役创此新宫想志士哲人不以为言也布告黎庶明此意焉【贞观二十一年七月】

玉华宫成曲赦宜君县制

昔周武应天剋瑶台而靡处汉高作极获负阳而不居散服桃林革命先於卜洛既迁粉社创制肇於疏龙朕御九成有乖斯义以兹抚事尤须改作何者大营仁寿槩日凌云炀起乾阳衔珠带璧比阿房而竞爽犹且有加拟倾宫而骋丽全为具体隋德云谢其徵在兹朕悼於怀为日既久故违其侈义显然令辰加以心怀济育事切於肌肤亟犯风霜疾纏於腠理每至隆曦届候大火摘芒虽对寒泉如升头痛之坂或居珍簟若涉炎火之林由是岳牧忧惶公卿骇惧因累陈丹款请建山宫历载深惟切爱百金之费详思至理宜顺万姓之心朕往冒兵凶为黔首而忘已今兹清暑岂劳人而取安但以上奉宗祧下宁兆庶身非已有不可自轻敬思休摄之方兼履古先之道发明二指创此一宫即涧疏隍凭岩构宇土无文绩木不雕鏤矫铺首以荆扉变绮窗而瓮牖负扆协幽贞之赏垂紵体嘉遁之情振此冲规方垂帝范今既成之不日赖洽普天宜顺发生弘兹霈泽可曲赦宜君县官及百姓并督作官人丁匠等大辟罪以下常

赦不免者不在赦例其营造监当官人量加品秩及卫士已上并节级赐物先在宫苑内住移出外者给复三年【贞观二十二年二月】

停修金仙玉真两观诏

营造创造必有所因岂欲劳人盖不获已朕顷居谅闇?疚於怀奉为则天皇后东都建荷泽寺西京建荷恩寺及金仙玉真公主出家京中造观报先慈也岂愿广事营构虚殫力役朕每卑宫菲食夕惕宵衣惟木从绳虚心启沃所欲修营两观外议不识朕心书奏频繁将为公主所置其造两观并停其地便充金仙玉真公主邑司令窦怀贞检校所有钱物瓦木一事以付公主邑司收掌诸处供两观用作调度限日送纳邑司朕当别处创造终不劳烦百姓此度修葺公私无损若有干忤当寘於刑【景云三年三月】

停修大明宫诏

卑宫致美爱人之力灵台罢营重费之广景彼前烈吾无间然顷以所居殿院素非弘敞时方暑雨颇有郁蒸上禀圣慈式遵时令将修别寝顺彼高居虽复工徒所须止於蕃匠补葺所拟无烦外力然以麦秋爰及农务方勤维夏在辰执役为弊营之则衆物有劳而一已逸罢之则我躬未泰而萌庶安夫生人树君将利之也劳人自奉予所不为其修大明宫宜即停待至闲月方使毕功宣示百寮使知予意所有先役工匠即优还价直勿令悬欠仍即放散【先天二年正月】

大明宫成放免囚徒等制

黄门朕闻养人者谓之司牧非逸於人上事天者谓之帝王盖御於天下故作为栋宇以避燥湿居於台榭以顺高明斯乃奉时而行政也朕以不德只膺睿图宝什家之产爱兆人之力未尝兴功於土木役思於池籞冀之休艾以致雍熙自律应长赢时方大暑溽云屡起温风且至伏以太上皇晏居颐卫涤虑清闲迹不往於甘泉心每期於汾水朕侍於左右以奉晨夕助玄默之化则亏於听理当炎蒸之序又黷以器烦惕焉载怀敢忘顺色然文明创兆先圣所营即旧不加因时而往千门万户外虽谓於别宫一日三朝中自连於复道下所以寧问安之?上所以资习静之娛实获我心俾康政理古有服珍裘者则念人之寒居夏屋者则念人之热况比岁阻饥甫田不稔或愚人陷罪圜土称冤凡厥庶寮将何以恤两京及诸州宜令长官亲理冤狱除犯名教及官典犯赃并缘妖伪以外余罪徒以下咸宜放免其有茂才异等拔衆超羣缘无绍介久不闻达者咸令自举朕当亲问其应宣抚使名闻举人试第四等宜准旧例别加优獎见任人各量与改转前资常选人至各依选例与处分其未出身者并授散官先天以来军将押官等在临阵战亡者令本军勘绩奏闻其妄说灾祥诬惑闻里并令州县长官等严加捉搦仍令御史金吾访察绳纠有能直言极谏补朕之阙者各封状进朕将亲览如有可采当加獎擢其皇亲诸亲其东宫承值任员外捡试等官近停今至冬处分者有家道贫迫情愿外任者亦令所司勘绩阙量才注拟其缘坐流人处置有轻重不类者令所司勘会奏闻主者施行【开元二年六月八日】

改明堂为乾元殿诏

古之操皇纲执大象者何尝不上稽天道下顺人极或变通以随时爰损益以成务且衢室创制度堂以筵因之以礼神是光孝享用之以布政盖称视明先王所以厚人伦感天地者也少阳有位上帝斯歆此则神贵於不黷礼殷於至敬今之明堂俯邻宫掖此之严祀有异肃恭苟非宪章将何轨物由是礼官博士卿大夫广参羣议钦若前古宜存路寝之式用罢辟雍之号可改为乾元殿每临御宜依正殿礼【开元五年八月】

兴庆宫成御朝德音

朕昔在藩国此维邸第乾坤未泰陰阳尚蒙则有神物効灵祥符肇配飞佳气於在田之际涌瑞池於或跃之日惟此旧居式加新宇周墙仅板於百堵卑宫不阶於五尺栋梁之用毁撤所余聊以纪天地之休徵貽子孙之俭约耳属春令爰始时惟发生万方来朝千官入贺既称觞以献寿宜施惠以布德况农祥在候稼穡正兴或幽彼囹圄独隔阳和之泽或迫於征徭不遂农桑之务言及於此軫叹良深其徒以下罪且令责保并应当番兵丁匠等灼然单贫者所由勘会并各营农所在诉讼长官随事疏理勿使冤滞非军国所要余不急之务一切并停仍加劝课循植农穡其河北水损户既属春事虑有乏絕不支济者宜委使与知县相知量加賑恤诸处行人之家及鰥寡惸独不能自存者州县长官亲加优抚使得存济应有差科量事矜放且宣风布化职在令长有司铨藻之次特宜审择其才惟德与刑为政之要顷无關於风化多取威於櫜楚理人之道其若是乎愚昧之流或轻抵犯宜加晓谕使识章程其含生之类不得辄有屠杀天下捕猎亦宜禁断仍严加捉搦百司各遵时令务弘寬大之典使政理无失称朕意焉【开元十六年正月】

禁约上

关内诸州断屠酤诏

酒醪之用表节制於欢娛刍豢之滋致甘旨於丰衍然而沈湎之輩絕业亡资惰窳之氓骋嗜奔慾方今烽燧尚警兵革未宁年谷不登市肆腾踊趋末者衆浮冗尚多肴羞麴蘖重增其费去弊之术要在权宜令关内诸州官且断屠酤【武德二年二月】

关内诸州断屠杀诏

有隋失驭丧乱弘多民物凋残俗化踰侈耽嗜之娛竞逐旨甘屠宰之家恣行刳杀刍豢之畜靡供肴核之资胎卵之羣莫逐蕃滋之性伤财墮业职此之由攘斂穿窬因兹未息礼曰君无故不杀牛大夫无故不杀犬豕庶民无故不食珍非惟务在仁爱盖亦示之俭约方域未宁凡须节制凋弊之後宜先长育岂得恣彼贪暴残殄庶类之生苟徇目前不为经久之虑导民之理有未足乎其关内诸州宜断屠杀庶六畜滋多而兆民殷贍详思厥衷更为条式【武德三年四月】

废潼关以东缘河诸关不禁金银绫绮诏

远至迤安昔王令典通财鬻货生民恒业关梁之设襟带要冲义止惩奸无取苛暴近代掊刻禁御滋彰因山川之重阻聚珍奇而不出遂使商旅浸废行李稽留上失博厚之恩下畜无聊之怨非所以绥安百姓怀辑万邦化洽升平克备至治朕君临区宇情深覆育率土之内靡隔幽遐欲使公私往来道路无壅货宝交易中外匪殊思改前弊以清民俗其潼关以东缘河诸关悉宜停废其金银绫绮等杂物依格不得出关者并不须禁【武德九年八月】

写书御名不阙点画勅

孔宣设教正名为首戴圣贻范嫌名不讳比见钞写古典至於朕名或剩其点画或随便改换恐六籍雅言会意多爽九流通义指事全违诚非立书之本意也自今已後缮写旧典文字并宜使成不许随义改易【显庆五年正月】

官人百姓衣服不得逾令式勅

勅采章服饰本朝贵贱升降有殊用崇劝奖如闻在外官人百姓有不依式令遂於袍衫之内着朱紫青绿等色短衫袄子或於闾野公然露服贵贱莫辨有蠹彝伦自今已後衣服上下各依品秩上得通下下不得僭上仍令所司严切禁断勿使更然【咸亨五年四月】

禁断大酺广费勅

勅礼存率俭书戒无益酌费嗇财为国之本至如赐酺合宴正欲与人同欢广为聚斂故非取乐之意况自徇於奢是不减也心劳於伪是不经也殷鉴於此良用恍然自今已後两京及天下酺宴所作山车旱船结彩楼阁宝车等无用之物并宜禁断【先天二年八月】

焚珠玉锦绣勅

勅朕闻珠玉者饥不可食寒不可衣故汉文云雕文刻镂伤农事锦绣纂组害女工农事伤则饥之本女工害则寒之源又贾生有言曰夫人一日不再食则饥终岁不制衣则寒饥寒切体慈母不能保其子君焉得以有其人哉朕以眇身托於王公之上曷尝不日旰忘食未明求衣思使反朴还淳家给人足而仓廩未实饥馑相仍水旱或???糟糠不厌静思厥故皆朕之咎致有浆酒藿肉玉食锦衣互相夸尚浸成风俗夫令之所施惟行不惟反人之化上从好不从言是以古先哲王以身率下如风之靡何俗不易此事近有处分当以施行朕若躬服珠玉自玩锦绣而欲公卿节俭黎庶敦朴是使扬汤止沸涉海无濡不可得也是知文质之风自上而始朕欲捐金抵玉正本澄源所有服御金银器物令付有司令铸为铤仍别贮掌以供军国珠玉之货无益於并即焚於殿前用絕争竞至诚所感期於动天况於凡百有违朕命其宫掖之内后妃以下咸服澣濯之衣永除珠翠之饰当使金土同价风俗大行日用不知克臻至道布告天下知朕意焉【开元二年七月】

禁奢侈服用勅

勅雕文刻镂衣纨履丝习俗相夸殊涂竞爽致伤风俗为弊良深珠玉锦绣既令禁断准式三品已上饰以玉四品已上饰以金五品已上饰以银宜於腰带及马衔鐙酒杯杓依式自外悉铸为铤妇人衣服各随夫子其已有锦绣衣服听染为皂成段者官为市取天下更不得采取珠玉刻镂器玩造作锦绣珠绳织成帖绢二色绮绫罗作龙凤禽兽等异文字及坚栏锦文者违者决一百受雇工匠降一等科之两京及诸州旧有官织锦坊悉停【开元二年七月】

唐大诏令集卷一百八

卷一百九

<史部,诏令奏议类,诏令之属,唐大诏令集

钦定四库全书

唐大诏令集卷一百九

宋 宋敏求 编

政事

禁约下

禁断锦绣珠玉勅

禁断腊月乞寒勅

禁别宅妇人诏

禁止街坊轻浮言语勅

禁杀害马牛驴肉勅

禁断寒食鸡子相餽遗诏

条贯立戟勅

禁天文图?诏

禁大花绫锦等勅

禁车服第宅踰侈勅

申禁公私车服踰侈勅

禁岭南货卖男女勅

禁约下

禁断锦绣珠玉勅 苏頲

勅朕闻召公曰弗作无益害有益孔子曰奢则不逊俭则固斯乃圣贤之至言矣叔代迁讹僻王骄纵颇荣於玉杯象箸不务於捐金抵璧好之者君也习之者人也即用匹帛服长纓之类欬朕爰在幼冲每期质朴手未曾持珠玉目未尝观锦绣愿言其志造次不忘寅奉休图勉康政道常想汉文衣绋之德晋武焚裘之事竟未能令行禁止敦本弃末朕甚惧之今王侯勲戚下洎厮养所得者重於远所求者贵於异至於雕文刻镂衣纨履丝习俗相夸殊涂竞爽有妨於政无补於时岂朕言之不明教之未笃也且一夫一女不耕不织则天下有受其饥寒者今四方晏如而百姓不足岂不以尚於珠玉珍於锦绣垦田畴而夺其务出布帛而害其功欬珠玉锦绣等自今已後切令禁断如更循旧弊并归罪长官仍令御史金吾严加捉搦州牧县宰劝督农桑待至秋收课其贮积使人知礼节俗登仁寿有司仍为条例称朕意焉【开元二年七月三日】

禁断腊月乞寒勅 苏頲

勅腊月乞寒外蕃所出渐渍成俗因循已久至使乘肥衣轻竞矜胡服闾城溢陌深点华风朕思革颓弊返於淳朴书不云乎不作无益害有益功乃成不贵异物贱用物人乃足况妨於政要取紊礼经习而行之将何以训自今已後即宜禁断【开元二年十二月七日】

禁别宅妇人诏

别宅安妇先弛禁令往年括获特已寬容何得不悛尚多此事国有常宪宜寘於理方画一於後刑故三令以先德俾从轻罚以愧其心今所括获者见任官徵纳四季禄前资准见任自余诸色并准九品官禄数纳粟妇女并放出掖庭即令京兆尹李朝隐求正配嫁之行京都作戒天下敢更犯者一依常格【开元五年七月】

禁断止街坊轻浮言语诏

尧屋可封孔门无倨此由淳风被洽德教弘之在人职归所属如闻輶轂之下闾閭之内口无择言行不近礼则失长幼之序岂止仪刑之缺宜令府县长官左右金吾明知训导捉搦若有犯者随事科绳【开元五年十一月】

禁杀害马牛驴肉勅

勅自古见其生不食其肉资其力必报其功马牛驴皆能任重致远济人使用先有处分不令宰杀如闻比来尚未全断羣牧之内此弊尤多自今已後非祠祭所须更不得进献马牛驴肉其王公以下及今天下诸州并诸军宴设及监牧皆不得辄有杀害仍令州县及监牧诸军长

官切加禁断兼委御史随事糾彈【开元十一年十一月】

禁断寒食鸡子相餽遺勅

勅天地之德莫大於生成阳和之时先禁於卵殯比来流俗间每至寒食自皆以鸡鶩鸭子更相餽遺既行时令固不合然自今已後永宜禁止朕每思俭朴深恶浮华诸色雕镂等已令变革其公私宴会比者多假菓及楼园之类虚为损耗竞务矜夸亦宜禁絶有违者准今月八日勅

条贯立戟勅

勅立戟官中大夫守京兆尹上柱国临淄县开国男赐紫金鱼袋元义方朝议大夫守尚书户部侍郎判度支护军赐紫金鱼袋卢坦立戟虽令式所着似有阙文而台阁相承久为定制卢坦元义方如有所见即令上闻造次而行殊乖审慎宜各罚一月俸料其戟仍令所司收纳左司郎中陆则勾检之任发付不精礼部员外郎崔备工部员外郎元右等或以礼许人或守官假器比於申请其过尤甚各罚一季俸料缘兵兴已来勲赏超越其所立戟须有明文宜令所司准旧制待官阶勲至三品然後申请仍编於格令永为常式【元和六年十二月】

禁天文图?诏

勅天文着象职在於畴人?纬不经蠹深於疑衆盖有国之禁非私家所藏虽裨竈明徵子产尚推之人事王彤必验景略犹寘以典刑况动皆讹谬率是矫诬者乎故圣人以经籍之义资理化之本侧言曲学实紊大猷去左道之乱政俾彝伦而攸叙四方多故一纪於兹或有妄庸辄陈休咎假造符命私习星历共肆穷乡之辨相传委巷之谈作伪多端顺非而泽荧惑州县詿误闾阎坏纪挟邪莫逾於此其玄象器局天文图书?书七曜历太乙雷公式等私家并不合辄有自今已後宜令天下诸州府切加禁断各委本道观察节度使与刺史县令同为捉搦仍令分明榜示乡村要路并勒隣伍逋相为保如先有藏蓄者限勅到十日内齎送官司委本州刺史等对衆焚毁如限外隐藏有人纠告者其藏隐人先决杖一百仍禁身闻奏其纠告人先有官及无官者每告得一人超资授正员官其不愿仕者官给赏钱五百贯文仍取当处诸色官钱三日内分付讫具状闻奏告得两人以上累酬官赏其州府长史县令本判官等不得捉搦委本道使具名弹闻奏当重科贬两京委御史台切加访察闻奏准前处分咨示方面勲臣洎十连庶尹罔不诚亮王室简于朕心无近宵人慎乃有位端本静末其诫之哉【大历三年正月】

禁大花绫锦等勅

勅王制命市纳贾以观人之好恶布帛精粗不中数广狭不中量不鬻於市汉诏亦云纂组文绣害女工也朕思以恭俭尅已淳朴化人每尚素玄之服庶齐金土之价而风俗不一踰侈相高浸弊於时其来已久耗日用之本贪锦绣之奢异彩奇文资其夸竞今师旅未戢黎元不康

岂使淫巧之功更亏恒制在外所织造大张软锦透背文及???锦竭凿六破以上锦独窠文四尺幅及独窠吴绫独窠司马绫等并宜禁断其长行高丽白绫杂色锦及常行小文字绫锦等任依旧例造其绫锦花文所织盘龙对凤麒麟狮子天马辟邪孔雀仙鹤芝草万字双胜及诸织造差樣文字等亦宜禁断两都委御史台诸州府委本道节度观察使切加觉察如违犯具状闻奏【大历六年四月】

禁车服第宅踰侈勅

盖闻俭以足用令出唯行着在前志实为理本朕自临四海悯元元之大困日昃忘食宵兴疚怀躬絕文綉之饰尚愧茅茨之俭亦喻卿士形於诏条如闻积习流弊余风未革车服第室相高以华靡之利资用宝货固啓於贪冒之源有司不禁侈俗滋扇是朕之教导未敷使兆庶昧於趋尚也其何以足用行令令臻於郅理欤永念慙叹迨兹申勅自今内外列职位之士其各务素朴弘兹国风有僭差尤甚御史列上主者宣示知朕意焉

申禁公私车服踰侈勅

理道所关制度最切近者风俗踰侈岁月滋甚人隳本业用多费财爰命有司撮举彝制务从简朴度可久行将使尊卑有备刑罚少息其丧葬婚嫁吉凶凡物皆有着定尤闻僭差虽不在条件之物亦委所司准令或勾当仍切加捉搦不得辄有容纵军国异容古今通理禁军仗卫杂饰及诸道节度等使应缘军装服即不在此限或有留令慢法委御史台弹奏当坐长吏用清颓风

禁岭南货卖男女勅

勅朕自临御已来常恐一物失所以伤陰阳之和致灾伤之变而重困吾民故推教化之源务率先之道减服御絕玩好苟利於民者无不行阻挠於政者无不改而郡县灾疫相继屡奏流亡惨怛之怀疚於寤寐将何以臻於富庶哉苟害生民岂惮厘革如闻岭外诸州居人与夷獠同俗火耕水耨昼乏暮饥迫於征税则货卖男女奸人乘之倍讨其利以齿之幼壮定估之高下窘急求售号哭踰时为吏者谓南方之俗夙习为常适然不恠因亦自利遂使居人男女与犀象杂物俱为货财故四方鰥寡高年无以养活岂理之所安法之所许乎纵有令式废而不举为长吏者何以副吾志哉自今已後无问公私土客一切禁断勅诸州刺史各於界内设法铃制不得容奸依前为市如敢更有假托事由以贩卖为业或虏劫谿洞或典买平民潜出券书暗过州县所在搜获据赃状依强盗论纵逢恩赦不在原宥之限仍仰所在切加把捉如违节级科断其方镇及监军使命并州府寮吏等自当谨守诏条率身奉法倘有踰犯当重科绳其白身除准勅常数进送亦准此处分其百姓两税定额各据土地所出方圆收纳不得坚立色目妄配乱徵致令艰愁莫相保守如有贫穷不能存济者欲以男女庸雇与人贵分口食任於行止当立年限为约不得将出外界还同交关各委本道长吏专加纠察仍先具条流闻奏其余州县更有积弊深害百姓而因循未革者亦具分析闻奏当酌量处分粗安黎庶称朕意焉【大中九年闰四月】

唐大诏令集卷一百九

卷一百十

钦定四库全书

唐大诏令集卷一百十

宋 宋敏求 编

政事

诫諭

诫表疏不实诏

令内外官相存问诏

令有司劝勉庶人婚聘及时诏

诫励氏族婚姻诏

诫励风俗勅四道

诫諭天下诏

不许羣臣干请诏

诫励官寮制

诫勗内外郡官诏

令州县以制勅告示百姓勅

诫示诸道制

诫励风俗诏

令藩镇俟诏方得入覲勅

告諭宗閔德裕亲故更不问罪勅

誠諭藩鎮詔

休假

許百官旬节休假不入朝勅

誠諭

誠表疏不实詔

前政多僻人不聊生怨讟如讎曾无控告黎民易子而食郡县犹有余粮遂使聚斂无厌穷兵不已忠良屏迹邪佞当涂以妖怪为祲祥能希旨为奉法至於亡灭上莫知之静言其事可为太息者也朕恭膺宝历救斯兆庶思革前弊念兹在兹起军以来於今期月军书羽檄日有百数一言一事靡不覽焉未明求衣中夜不寐恐一物之失所虑一理之或屈但四方州镇习俗未惩表疏因循尚多虚诞申请盗贼不肯直陈言论疾苦每亏实录妄引哲王深相佞媚矫托符瑞极笔阿諛乱语细书动盈数纸非直乖於体用固亦失於事情千里伫於一言万几湊於一日表奏如是稽疑处断不知此者谓我何哉宜颁告远近知朕至意【武德元年五月】

令内外官相存问詔

立人之道曰仁与义为国之基德归於厚自隋氏驭宇政刻刑烦上怀猜阻之心下无和畅之志遂使朋友游好庆吊不通卿士联官请问斯絕至乃里閭相接致胡越之乖艰棘在身忘救恤之义风颓俗弊一至於此化民以德岂斯之谓朕纂历膺期思弘至道因兆民之所赖洽万国之懽心凡厥庶僚咸使辑睦君臣之际期於无隐永言前失特宜敦励自今已後内外官人须相存问勿致疑阻有遇疾疹递加诊候营救医疗知其增损不幸物故及遭忧恤随事慰省以申情好务从笃实各存周厚朝廷无拘忌之节交游有久要之欢遵道而行率礼不越斯则上下交泰品物咸亨惠政所加达於四方布告天下咸知朕意【武德九年十二月】

令有司劝勉庶人婚聘及时詔

昔周公治定制礼垂裕後昆命媒氏之职以会男女每以仲春之月顺行时令蕃育之理既弘邦家之化斯在及政教陵迟诸侯力争官失其守人变其风致使謡俗有失时之讥鰥寡无自存之术汉魏作教事非师古道随世隐义逐时乖重以隋德沦胥数鍾屯剥五都俱覆万方咸蕩暨參墟奋旅救彼艰危区县削平总斯图籍顾瞻禹迹提封尚存乃眷周余匝地咸尽痛心疾首寤寐无忘惟上玄之大德曰生蒸民以最灵为贵一经丧乱多饕豺狼朕夙奉天命为人父母平定甫尔劬劳未康厚生乐业尚多疎简永言亭育实切於怀若不申之以婚姻明之以顾复便恐中饋之礼斯废絶嗣之衅方深有怀怨旷之情或致淫奔之辱宪章典故实所以庶

几宜命有司所在劝勉其庶人男女之无室家者并仰州县官人以礼聘娶皆任同类相求不得抑取男年二十女年十五以上及妻丧达制之後孀居服纪已除并须申以媒媾命其好合若贫窶之徒将迎匱乏者仰於其亲近及乡里富有之家哀多益寡使得资送其鰥夫年六十已上寡妇年五十已上及妇人虽尚少而有男女及守志贞洁者并任其情愿无劳抑以嫁娶刺史县令已下官人若能使婚姻及时鰥寡数少量准户口增多以进考第如其劝导乖方失於配偶准户口减少以附殿失【贞观元年正月】

诚励氏族婚姻诏

氏族之盛实繁於冠冕婚姻之道莫先於仁义自有魏失御齐氏云亡市朝既迁风俗凌替燕赵右姓多失衣冠之绪齐韩旧族或乖德义之风名虽着於州闾身未免於贫贱自号膏粱之胄不取匹敌之仪问名惟存於窃货结褵必归於富室乃有新官之辈丰财之家暴其祖宗竟结婚姻多纳货财有如贩鬻或自贬家门受屈於姻娅或矜其旧望无礼於舅姑积习成俗迄今未已既紊人伦实亏名教朕夙夜兢惕忧勤政道往代蠹害咸已惩革惟此弊风未能尽变自今已後明加告示使识嫁娶之序合典礼称朕意焉

诚励风俗勅四道

勅建立州县列树官司所以导俗宣风惩奸息暴顷以承平既久中外晏安人怀弛坏之心官无警觉之意遂使綏宋二州屡奏乱常之党荆并两府频言构逆之徒发露虽复数州包藏犹虑未絶此等妖衅寻自伏诛旬日之间惊害良善诚由按察寬纵禁止不明或使无辜陷於非命兴言及此深用隐恻自今已後所在州县官僚各宜用心检校或惰於农作专事末游或妄说妖讹潜怀聚结或弃其井邑逋窜外州或自术医占诱惑愚昧诸如此色触类旁求咸须防紕勿许藏匿又属当首夏务在田蚕虽则各解趋时亦资官府敦劝若能肃清所部人无犯法田畴垦辟家有余粮所由官人宜加考第功状尤异者别加升擢若为政苛濫户口流移盗发罕能自擒逆谋为外境所告轻者年终贬考甚者非时解替御史及台郎出使审加访察各以状闻宜宣示诸州各令所在知悉【文明元年四月十三日】

又

门下朕克纘丕业诞膺景命宪章昔典钦若前王克已励精缅思至道宵衣旰食勤修庶政夙夜寅畏匪遑底宁若涉泉水罔知攸济顷属殷忧啓运多难兴邦礼章载复品物咸茂思欲致万姓於仁寿归六合於昇平永言政途庶几沿革犹恐学校多阙贤俊罕登牧宰不存政理农桑未加劝导樽俎之仪不习冠婚之礼莫修朕所以当宁兴叹载怀兢惕者矣庠序者风化之本人伦之先仰州县劝导令知礼节每年贡明经进士不须限数贵在得人先圣庙及州县学即令修理春秋释菜使敦讲诵之风天下有奇才异行沉伏不能自达及官人百姓有能諫言时政得失者并令本州责状封进乡饮礼废为日久尊德尚齿弘益极深宜令诸州每年遵行乡饮之礼今有劝慕王公卿士务存训獎子弟成立则有冠婚婚礼糟粕或存冠礼久为废阙自今已後并行冠义责以成人之道使知负荷之难食为人天农为邦本綏抚萌庶劝课农

桑牧宰之政莫过乎此刺史县令有课最尤异委廉察使名闻当别加甄擢县令字人之本明经为政之先不稍优异无以劝獎县令考满考词使状有清字无负犯明经及第每至选时量加优赏若属停选并听赴集真如设教理归清淨黄老垂范道在希微僧尼道士女冠之流并令修习真寂严持诚行不得假记功德扰乱閭阎令州县严加检察私度之色即宜禁断诸州县官有不因选序别犯赃贿非时除授官等皆依倚形势恣行侵剥如有此色仰州长官録事参军速勘责奏闻讫宜停务时进止仍委吏部兵部速勘责处分诸州百姓多有逃亡良由州县长官抚字失所或住居侧近虚作逃在他州横徵隣保逃人田宅因被贼卖宜令州县招携复业其逃人田宅不得辄容卖买其地在依乡原例纳州县仓不得令租地人代出租课寺观广占田地及水碾磴侵损百姓宜令本州长官检括依令式以外及官人百姓将庄田宅舍布施者在京并令司农即收外州给贫下课户凡此数事或宜区分系乎风俗义存獎劝刺史县令等各申明旧章勉思抚辑罢雕弊之务归淳厚之源训导黎蒸宣我朝化书不云乎德惟善政政在养人布告天下咸知朕意【唐隆元年七月十九】

又

黄门朕闻天为大者孰先於育物物最灵者莫甚於爱人故树之后王以康兆庶朕緬鉴前烈深惟远图惧德之不修化之未偃寅畏夙夜如临泉壑然则畴咨命於四岳黜陟存乎三载既以百姓为心明非一人独理今之牧守古称侯伯贤者任之则循良之迹着不贤者任之则愁苦之声作每冀精於所择委之俞往岂时或颓靡苟且尚多而吏之殊尤寂寥不嗣静言政要朕用怵然间岁水旱周於郡国仓廩不畜閭阎荐饥加以出掇颇多冗官增弊至於处置皆凭刺举当於京官内简宏才通识堪致理兴化者量授都督刺史等久在藩屏有昇进状者量授京官使出入常均永为恒式课最超等必议昇迁循默守常必裁贬黜昭昭赏罚不可不慎属冬朝礼成春事方起朝集使等俾还所莅钦若朕言官寮间或干济清苦或贪滥侵渔称职及不称职并委都督刺史审察奏闻罔或阿容自贻悔咎诸道虽遣使存问尚切忧劳牧宰等深体朕怀各宜隐恤交至乏絶者速量事优劳公私债负停徵至秋州县差科务减常日昔国侨相郑以至和平曹参相齐贵於清淨清淨则不扰不扰则和平和平则不争不争则知耻爱费而与休息除烦而从简易自当农者归陇亩蚕者勤纺绩既富而教乃克有成道德齐礼不远斯复庶几在位弘朕此心凡厥遐迩各令委悉主者施行【开元二年十月十三日】

又

勅国家祖武宗文重熙累洽克清寰极大庇生人玄德独化与乾元而资始至道无名含帝先而首出自削平区宇混一车书六合晏然百有余载则我文武之业有大造於生灵朕嗣守丕运纂我鸿绪恐不能敷弘前烈光阐睿图夙夜祇畏若临泉谷曷尝不龚然思道寤寐勤政从人之欲每以百姓为心屈已之劳常矜於一物失所且夫法久而弊法弊则通制国以立法为先教人以地着为事自属清晏人多媮怠国章或弛毗伪实繁今正朔所及封疆无外虽户口且增租赋不益莫不轻去乡邑共为浮惰或豪人成其泉藪或奸吏为之囊橐逋亡积岁流蠹自滋虽朕之薄德罪则在予亦官无其政吏不守法耳今欲去其末而归其本闲其邪而正其德使法有所立人知向方是用恤穷逸寛逋贷式广自新之路俾由莫厚之恩

诫谕天下制

顷属昊穹降祸云驭上僊外戚成挟主之谋奸臣起移国之计皇太子基见危而起补天立极朕方息肩朱邸拭目清时幸太平之无事期小山之自逸温王以推崇叔父固禅万几基以克獎帝图进登储贰此则明有日月幽有鬼神朕不敢执私而废公违衆而专意也今君臣既定天下已安钦奉鸿业思臻至理推心兆人之上毕至千秋之下犹望始终一德无有贰心人其视余天实知我如闻在外尚有浮言睥睨朝廷窥测间隙或云朕意欲脱屣宸居或云东宫乃主器非长呜呼无识曾莫之思昔唐尧帝摯之弟也昇於帝位王季太伯之少也立为太子能明俊德光啓邦家比闻中外屡有流言潜图废立止以为中宗之时吾乃一王耳忧危不暇今基静祸难安社稷天下利之所谓非常之事不可以常礼议之【唐隆元年七月】

不许羣臣干请诏

设官分职本期致理惟贤是任匪私亲昵若使才胜其任望重於时一月累迁固未为速如或代工无取考绩非明十年不调岂应论屈顷者官失其序侥幸路开人不务德惟速是视在职无几已希迁陟又每谒见之时多请仗下奏事不闻公议惟乞荣班王爵与能岂由干请朕虽远慙圣哲多媿大明自临寰宇斯焉两载卿士人材皆所知悉不被昇擢盖自取之当务责躬何宜往诉且难进而易退君子格言後已而先人往哲明训周文多士虞舜举才克让满朝故称为理今位参台省阶列通班惟务趋竞余何足纪朕方欲大革浇浮俾归淳俗自今以後谒见之日若更有干冒祈荣者虽地处亲勲才称俊秀皆当格之清议一从屏黜崇廉耻之节洽昇平之化【景云二年十二月】

诫励官寮制 苏頲

门下法之所设本以惩非令之必行期於禁止致理为要何莫由斯至如官典受赃国有常法承前虽有处分在外多未遵奉且不戒视成为暴不令而罚为虐岂含容之自久将训导之未明欤朕情存划一过欲不貳恐愚人陷罪莫识堤防奸吏徇私自嬰徽纆永言於此明发兴怀今日已前既往不咎从今已後有纪必绳朕不食言尔无荒怠所以勤勤恳恳预戒凡百盖以罚止罚可不慎哉告示遐迩令知朕意主者施行【先天二年九月七日】

诫勗内外郡官诏

国之设法本以闲邪苟无所施虽立安用朕以寡昧纂承丕业夙夜忧惕恐不克胜馭朽徒凜未知攸济是用寤寐永叹常思罪己冕旒不欲见其臧否黻纁不欲闻其是非隐忍含容十载於兹矣不能使令行禁止讼息刑清家知礼让之教人知廉耻之节此朕之不德也河南府洛阳县主簿王钧贪残其性暴虐其心轻侮我章程割剥我黎献处事不遵乎法理黷货不知其纪极此而可恕孰不可容且犖轂之下事犹如此想於远处人何以堪然而当发生之时属阳和之月朕情存恶杀不加殊死宜从杖罪以肃朝端可於朝堂集衆决杀自今以後内外官有犯赃贿至解免已上纵使逢恩获免并宜勿齿终身御史宪司职当推劾不存紕举多有顔情

纲纪不施谁任其咎又府县寮案上下相蒙犯法公无检勘若知而故纵即是职务不举各自思审何以当官自今以後所进拟御史皆须历职清白衆所推者不得虚相引进侥幸祈荣凡厥朝行宜悉朕意【开元十年二月】

令州县以制勅告示百姓勅

勅凡制令宣布皆所以为人如闻州县承勅多不告示百姓使闻巷间不知旨意是何道理宜令所由提撕应有制勅处分事等令终始勾当使百姓咸知如施行有违委御史访察闻奏【开元十六年六月】

诫示诸道制

勅王者省方诸侯述职以时受计其来久矣自銮舆南幸而巴蜀底宁俾予小子受命讨难越自河陇及於朔陲兼北狄兵车亿万同至待收秦中後定河洛狂寇穷窘不日剪灭朕以百姓为心敢忘终食中夏未清虑有惊扰且吏者人之师非吏何以安人良化惠风在於循吏当用兵振旅之际事充政重之时必去烦苛存乎慈惠须岳牧令长以镇抚者也且惩恶劝善激浊扬清寻有使车黜陟当备知之朕每命中官使诸山使所至郡县妄宣口勅徵求赋敛便即奏闻不可容隐朕以军政孔殷朝会未备礼犹阙於筐篚时且急於甲兵卿昭宣国令以示民庶履新之庆与卿等同之【至德二年正月三日】

诫励风俗诏

昔者卿大夫相与让於列士庶人相与让於齿周成王刑措不用汉文帝耻言人过真理古也朕甚慕焉中代以还争端斯起掩抑其言则专弊诱掖其说则侵诬自乏责实循名不能彰善瘴恶故孝宣必有敢告乃下光武不以诡辞遽行语称讪上之非律有匿名之禁皆所以防三至之毁重两造之明是以爵人於朝则皆劝刑人於市则皆惧罪有归而当於事也未代偷巧内荏外刚卿大夫无进思尽忠之诚多退有後言之谤士庶人无切磋琢磨之益多销铄浸润之谗进则谀言谄笑以相求退则羣居州处以相议留中不出之奏盖发其阴私公论不容之谈是生於朋党擢一官则曰恩皆自我黜一职则曰事出他门比周之迹已彰尚称独介由径之踪尽露自谓贞方居省寺者不能以勤恪莅官而曰务从简易提纲纪者不能以準绳检下而多密奏风闻献章疏者更相是非备顾问者互有憎爱苟非秦镜照胆尧羊触邪时君之德安得不惑参断一谬俗化益讹祸发齿牙言生枝叶率是道也朕甚悯焉我国家贞观开元同符三代风俗归厚礼让偕行兵兴以来人散久矣姑欲导之以德不欲驱之以刑然而信而未孚理有未至曾无耻格益用凋削小则综核之权见侵於下辈大则枢机之重旁挠於薄徒尚多因而化之亦既去其尤者而宰臣等惧其寝染未克澄清备引祖宗之书愿垂诫励之诏遂申告教颇用殷勤各当自省厥躬与我同底於道凡百多士宜体朕怀【长庆元年四月】

令藩镇俟诏方得入覲勅

方面大臣皆吾股肱心膂思与相见无时暂忘想其恋阙之心愿修朝覲之礼其於忠恳悉亦可知但缘兵革未停务先安辑或地隣戎寇须有防虞或镇重军雄切於绥抚临机处分要合便宜自今以後诸道节度都团练防御经略等使有请朝覲者但先献表章候得诏旨允许即任进发务使行止之际临时不失事机故此宣示遍使知悉

告谕宗闵德裕亲故更不问罪勅

朕承天之序烛理未明劳虚襟以求贤励寛德以容衆顷者或台辅乖弼亮之道而具寮扇朋附之风翕然相从实斲彝宪致使薰蕕共器贤不肖并驰退迹者成後时之夫登门者为迎吠之客繆盩之气堙鬱未和而望陰阳顺时疵疠不作朝廷清肃班列和安自古及今未尝有也今既再申朝典一变浇风扫清朋比之徒匡飭贞廉之俗凡百卿士惟新令猷如闻周行之中尚蓄疑惧或有委相指目令不自安今斯旷然明喻朕意与宗闵德裕或亲故及门生故吏等除今日以前黜远之外一切不问各安职业勿复为嫌布告中外令其知悉【太和九年九月】

诫谕藩镇诏

我国家天历自归君临无外十七圣滂流玄泽积惠生灵三百年保定鸿基方延运祚其间数纒灾否祸起凶狂才闻窃命之妖已触震雷之怒或腹心生变或骨肉相图近事可明灵诛不漏盖人祗之共愤乃宗社之储休亦赖中外重臣匡时薄德大耻复雪小康可期须申告谕之勤用致绥怀之旨而宗权藩垣所属倚仗特深虽章表继来臣诚可验而兵戈失戢物论犹疑是生交构之端益惑亲隣之听况位崇将相爵极王侯图功则国祸可平快志而家冤已雪劝忠贞於部伍莫若率先鉴成败於古今当思择福犹冒属猷之诫适摇怙乱之机且患难虽繁封疆有制各图侵軼自掇悔尤高浚之下泽州将攻伪帅周岌之窥临汝本利危邦翻为致寇之资盖昧啓讐之衅得土地为他人所有得货财亦他人所资势敌则相倾力均则相忌害莫深於归怨利莫厚於图安况并邑皆空耕桑尽废叹疮痍而未复軫哀痛而难忘且洛邑通都非列藩之所并河阳要地亦诸夏之必争若不制自本朝岂可公然窃据节旄宠授须候王人赋税均输合资国用至於封疆隣接续可商议指撝但将还旧京尤藉近镇继闻蒲陕已被攻围河外既事於支吾阙中自妨於完辑回车或阻奉图逾亏今者先在息兵各令守境爵位幸非爱惜君臣足保初终尚或执迷方知误计若法制不行於一处即征计须徇於衆情人亦有言理难为党虽万方之罪当责朕躬而九重之威更凭天力纵以黄巢顷盗宫阙曾会师徒既戮元凶须遵後命所以寝兴念虑诏示殷勤犹期远保宿心不欲便乘衆怒山河着誓当明指日之心圣哲好生必用舞干之德仁披深志勉蹈良图【中和四年十二月】

休假

许百官旬节休假不见朝诏

百工允厘彰乎奉职十日休澣义在优门方贵无为之风以弘多暇之政朕钦崇至道思致和

平今寰宇克宁朝廷无事将欲叶於淳古岂惟臻於小康当与羣寮畅兹娱乐顷旬游宴赏已於入朝节假常参未敷後命公私叶庆千载一时上下同欢自中及外自今以後每至旬节休假中书门下及百官并不须入朝外官等其日亦不须衙集【天宝五年五月】

唐大诏令集卷一百十

卷一百十一

钦定四库全书

唐大诏令集卷一百十一

宋 宋敏求 编

政事

田农

劝农诏

温彦博等检行诸州苗稼诏

置劝农使安抚户口诏

听逃户归首勅

劝天下种桑枣制

废华州屯田制

赋敛

简徭役诏

禁止迎送营造差科诏

罢三十六州造船安抚百姓诏

关内庸调折变粟米勅

减徵京畿丁役等制

制置诸道两税使勅

平糶

置常平监官诏

命诸道平糶勅

令御史巡定诸道米价勅

田农

劝农诏

有隋道丧区宇分离百姓凋残弊於兵革田亩荒废饥馑荐臻黎元无辜坠於沟壑朕膺图馭极廓清四海安辑遗民期於宁济劝农务本蠲其力役然而边鄙余寇尚或未除顷年以来戎车屡出所以农功不至仓廩未登永言念此无忘寤寐今既风雨顺节苗稼实繁普天之下咸同盛茂五十年来未尝有此万箱之积指日可期时惟溽暑方资耕耨废而不修岁功将阙宜从优纵肆力千亩其有公私债负及追徵输送所至之处宜勿施行寻常营造工匠等事非急要亦宜停止见在系囚事未决断傍引支证未须追摄百司常务并宜且停内外官人行署以上量事分番皆尽九月三十日军机急速及贼盗之事不在停限州县牧宰明加劝导咸使戮力无或失时务从简静以称朕意【武德六年六月】

温彦博等检行诸州苗稼诏

虫霜为害风雨不时政道未康咎徵斯在朕祇奉明命抚育黔黎爱愍之至实切怀抱轻徭薄赋务在劝农必望民殷物阜家给人足而陰阳不和气候乖舛永言罪已抚心多愧河北燕赵之际山西并潞所管及蒲虞之郊幽延以北或春逢亢旱秋遇霖淫或蝥贼虫灾严凝早降有致饥馑慙惕无忘特宜矜恤救其疾苦可令中书侍郎温彦博尚书右丞魏徵治书侍御史孙伏伽检校中书舍人辛诣等分往诸州驰驿检行其苗稼不熟之处使知损耗多少户口乏粮之家存问若为支济必须子细勘当速以奏闻待使人还京量加赈济【贞观元年九月】

置劝农使安抚户口诏

有国者必以人为本固本者必以食为天先王於是务其一时前圣所以分其五土劝农之道实在於斯朕抚图御历殆踰一纪旰食宵衣勤乎兆庶故兢兢翼翼不敢荒宁顷岁以来虽稍丰稔犹恐地有遗利人多废业游食之徒未尽归生谷之畴未均垦以是軫哀念遣使臣恤编户之流亡阅大田之衆寡至如百姓逃散良有所由当天册神功之时北狄西戎作梗大军之後必有凶年水旱相仍逋亡滋甚自此成弊至今患之且违亲越乡盖非获已暫因规避旋被兼并既冒刑网复捐产业客且常惧归又无依积此艰危遂成流转或依人而止或佣力自资怀土之思空盈返本之途莫遂朕荷丕构子育万人立德非冥而兹弊未革纳隍馭朽实切於

心既深在予之责思弘自新之令其先是逋逃并容自首如能服勤陇亩肆力耕耘所在闲田劝其开辟任遂土宜收税勿令州县差科征役租庸一皆蠲放若登时不出或因此更逃习俗或然以为抵法是阻我诚信是紊我大纲爰及所由须加严宪至天下风壤多有不同地既异宜俗亦殊播固当因利兴事不可违人立法宜令兵部员外郎兼侍御史宇文融兼充劝农事使巡按郡邑安抚户口所在与官寮及百姓商量乃至赋役差科於人非便者并量事处分续状闻奏务令安辑勿使劳烦当行责罚之科各竭公忠之力所到之处宣示百姓达我勤人之心【开元十二年五月】

听逃户归首勅

朕临御天下二十四载何尝不孜孜问政业业兴忧以一德心与万人请命故宗庙降福乾坤致和使匈奴成父子之乡犬戎为姻好之国西南邛笮皆曰内臣东北林胡是称边圻何奉天之德能远洽於戎夷而安人之政独不行於诸夏使黎甿失业户口凋零忍弃粉榆转徙他乡佣假取给浮窳求生言念於兹良深惻隐岂惟朕德所未及教有未弘欤亦由牧守专城莫能共理令长为邑多或非才俾猾吏侵渔权豪并夺故贫窶日蹙逋逃岁增若不开恩何从迁善天下逃户所在特听归首容至今年十二月三十日内首尽其本贯有产业者一切令还若先无者具户数闻奏当别有处分其有限外不首潜匿亡归靡怀亭育之恩仍蓄逋亡之计即当分命专使在处搜求散配诸军以充兵镇惩其犯命替彼居人仍各委采访使及刺史县令明加晓谕使知朕意【开元二十四年正月】

劝天下种桑枣制 常袞

勅诗有豳风陈王业也八月剥枣以助男功蚕月条桑俾修女事贍人之道必广於滋殖分地之利非止於耕耘益之以织紵杂之以菓实则寒有所备俭有所资如旨蓄之御冬岂无衣以卒岁顷属多难艰食必资树艺以利於人庶俾播种之功用申牧养之化天下百姓宜劝课种桑枣仍每丁每年种桑三十树其寄住寄庄官?官家每一顷地准一丁例仍委节度观察州县长吏躬亲勉率不得扰人务令及时各使知劝一一勉谕讫具数奏闻

废华州屯田制 常袞

勅间者戎旅未息徵求烦重四郊之赋乃至五税其一居人荡析邦廩空虚遂命宰臣大修农政天下郡国散诸屯转漕入关以资均济兼诏中尉左右内史表属州县闲田分署农官俾其耕凿南至於华濒渭而东林麓洲渚之间榛莽窳邪之处非吾人所占者悉举籍劝分载芟载柞稼多丰硕亩获数锺岁既少殷军储差贍郡县之税於是十而减七数从其旧殆复厥常今宿麦颇登秋苗益茂私田加辟公用渐充华州人户土地非广其屯田并宜给与贫下百姓自顷关中乏牛力封圻千里半是丘荒置屯田已来皆变良沃惠散其利以及困穷藏之於人孰与不足宣示郡邑宜悉朕怀

赋敛

简徭役诏

诗不云乎民亦劳止汔可小康爰自夫隋氏失驭刑政板荡豺狼竞起肆行凶虐徵求无度侵夺任已下民困扰各靡聊生丧乱之余百不存一上天降鉴爰命朕躬廓定凶灾义宁区域念此黎庶凋弊日久新获安堵衣食未丰所以每给优复蠲其徭赋不许差科辄有劳扰义存简静使务农桑至如大河南北乱离永久师旅荐兴加之饥馑百姓劳弊此焉特甚江淮之间爰及岭外涂路悬阻土旷人稀流寓者多尤宜存恤此等诸处往隔寇戎自经开泰岁月未久犹恐士民积习不改前弊州县官人未称所委迎送往来尚致劳费其河南河北江淮以南及荆州大总管内诸州所司宜更班下自今以後非有别勅不得辄差科徭役及迎送供承庶其安逸明加检约称朕意焉【武德六年三月】

禁止迎送营造差科诏

隋末丧乱豺狼竞逐率土之衆百不一存干戈未静农桑咸废凋弊之余饥寒重切永言念此悼於厥心今寇贼以平天下无事百姓安堵各务耕织家给人足即事可期所以新附之民特蠲徭赋欲其休息更无烦扰使获安静自修产业犹恐所在州县未称朕怀道路送迎靡宇营筑率意徵求擅相呼召诸如此类悉宜禁断非有别勅不得差科不遵诏者重加推罚布告天下咸知此意【武德六六四月】

罢三十六州造船安抚百姓诏

朕以寡昧纂承鸿烈肃展岩廊之上凝襟华裔之表驭奔深於日慎储祉存於勿休勉已励精详求大化往为奉成先志雪耻黎元是以数年之间称兵辽海虽除凶戡暴义匪储身疲人竭财役兴於下泛沧流而遐济践危途而远袭风涛竞骇或取沦亡锋镝交挥非无陨仆顾惟菲德事有乖於七旬在躬延责情致慙於四海汤年罪已鉴寐斯存汉载富人周回切念日者翺车联映贵帛相耀庖鼎之前犹潜秀异殿陛之下未尽英奇伫延翰於西雍认殊珍於东序比王师荐发戎务实繁州县官寮缘兹生过力役无度财赂公行蠹政伤风莫斯为甚前令三十六州造船以备东行者即宜并停讫凡百在位宜极言得失悉心无隐以匡不逮仍分遣按察大使问人疾苦黜陟官吏兼司元太常伯窦德玄往河南道并即持节分往其内外官五品已上各举岩薮幽素之士广加询访旁求謡俗式企英材允毗阙政必使八紘之内咸得朕心万之中同夫亲览宜速颁示率土知此意焉【龙朔三年八月】

关内庸调折变粟米勅

勅关辅庸调所税非少既寡蚕桑皆资菽粟常贱棗贵买损费逾深又江淮等苦变造之劳河路增转运之弊每计其运脚数倍加钱今岁属和平庶物穰贱南亩有十千之获京师同水火之饶均其余以减远费顺其便使农无伤自今已後关内诸州庸调资课并宜准时价变粟取米送至京逐要支用其路远处不可运送者宜所在收贮便充随近军粮其河南北有不通水利宜折租造绢以代关中调课所司仍明为条件称朕意焉【开元二十五年二月】

减徵京畿丁役等制 常袞

勅天之所命俾朕义人岂敢怠遑期於康济劳精极虑十有四载务从省约以训天下访其疾苦屡有蠲除公私之差仅从盍彻宫卫之备仍罢践更兼捐服御用资军国大去烦弊以休邦畿游食之人悉归南亩垦田之数渐复平时神降嘉禾岁乃大熟震於珍物景福纷委盖上天玄烈圣之储祉也岂寡昧之德而臻此耶夙夜祇惕永怀增惧然以令有缓急物有重轻粟轻而易散钱重而难聚古人所谓余之至贱与贵其伤一也如闻闾阎未免告病至乃以数斛易钱一缗杂以他徭难於偿卖辅用所宝念之惻然深可重惜所宜节省其京兆府诸色番役等访问诸司或有徵课比缘时俭资数稍多物估皆贱不可仍旧其掌闲彊骑三卫及桥堰丁匠如有司顷徵资并纳钱三千米六斗其青苗地头天下诸州每亩率钱十五顷以京师烦扰供应颇多苟从权宜遂倍其数自今以後宜准诸州例徵率朕以帝王之教人如父母之训子所以至纖至微必躬必亲苟或使之岂惮烦也宣示百姓知朕意焉

制置诸道两税使勅

两税法悉总诸税初极便人但缘约法之时不定物估粟帛转贱赋税自加人力不堪国用斯切务须通济令其便安欲遣使臣巡行国邑邮驿所届岂免烦劳轺车遽驰曾未周悉度支盐铁泉货是司各有分巡置於都会爰命帖职周视四方简而易从庶叶权便政有所弊事有所宜皆得举闻副我忧寄其盐铁使扬州留後宜兼充淮南浙西浙东宣歙福建等道两税使度支山南西道分巡院官宜兼充劔南东川及山南西道两使其峡内五监旧属盐铁使宜割属度支使便委山南西道两税使兼知参货各奉所职期於悉心

平余

置常平监官诏

朕祇膺灵命抚字氓黎方缉隆平跻之仁寿田亩之赋一切蠲除锱铢之律悉皆停断是以特建农圃用督耕耘思俾济民既庶且富锺庾之量冀同水火宜置常平监官以均天下之货市肆腾踊则减价而出田亩丰美则增余而收触类长之去其太甚庶使公私俱济家给人足抑止兼并宣通壅滞【武德九年九月】

命诸道平余制 常袞

勅四海之内方叶大宁西戎无厌独阻王命不可忘战尚劳事边朕顷以兵革之後军国空耗躬率节俭务劝农桑上天储休仍岁大稔益用多愧不知其然虽属此人和近於家给而边谷未实戎备犹虚因其天时思致丰积将设平余以之馈军然以中都所供内府不足租充常入之数岂济倍余之收其在方面苾臣成兹大计共佐公家之急以资塞下之储应诸道每岁皆有防秋兵马其淮南四千人浙西三千人魏博四千人昭义二千人成德三千人山南东道三千人荆南二千人湖南三千人山南西道二千人劔南西川三千人劔南东川三千人鄂岳一

千五百人宣歙三千人福建一千五百人其岭南江南浙西浙东等亦各准例恐路远往来增费各委本道节度观察都团练等使每年取当使诸色杂钱及回易利润赃赎等钱物每人计二十千文每道各据所配人数都计市轻货送上都左藏库贮纳充别勅和采用并不得剋当军将士衣粮充数仍以秋收送毕【大历九年五月】

令御史巡定诸道米价勅

河东河北诸道频年水旱重以兵革农耕多废粒食未丰比令使臣分路赈恤冀其全济得接秋成今诸道穀价尚未减贱而徐汴管内又遭水潦如闻江淮诸郡所在丰稔困於甚贱不免伤农州县长吏苟思自便潜设条约不令出界虽无严榜以避诏条而商旅不通米价悬异致令水旱之处种食无资昔春秋之时列国异政分灾救患犹载册书况今朝典大行远近一统禁钱闭采具在赦文州县因循多不遵奉宜令御史台拣御史一人于江南道巡察但每道每州界首物价不等米商不行即是潜有约勒不必更待文榜为验便具事状及本界刺史县令观察判官名衔闻奏如河南通商旅之後淮南诸郡米价渐起展转运接诸处直至江西湖南荆襄已来并须约勒依此举勘闻奏仍各令观察使审详前後赦条与御史相知切加访察不得容蔽【太和年】

唐大诏令集卷一百十一

卷一百十二

钦定四库全书

唐大诏令集卷一百十二

宋 宋敏求 编

政事

财利

用旧钱诏

禁铸造铜器诏

议放私铸钱诏

禁京城沽酒勅

行乾元重宝钱勅

行重轮钱勅

令百官议罢新钱诏

重棱钱减价行用勅

放邕府金坑勅

放天下榷酒勅

减塩价勅

条贯江淮铜鉛勅

条贯钱货及禁采银勅

停淄青等道榷盐勅

财利

用旧钱诏

泉布之兴其来自久实古今之要重为公私之宝用年月既深伪滥斯起所以采乾封之号改铸新钱静而思之将为未可高祖掇乱反正爰创轨模太宗立极承天无所改作今废旧造新恐乖先旨其开元泉货宜依旧施行为万代之法乾封新铸之钱令所司贮纳更不须铸仍令天下置鑪之处并铸开元通宝钱【乾封二年五月】

禁铸造铜器诏

古者作钱以通有无之乡以平小大之价以全服用之物以济单贫之资钱之所由急也然丝布财谷四者为大若本贱末贵则人弃本而务贱故有盗铸者冒严刑而不悔藏镪者非倍息而不出今天下泉货益少布币颇轻欲使流通焉可得也且铜者饒不可食寒不可衣也既不堪於器用又不同於宝物唯以铸钱使其流布宜令所在布知铸钱委按察使申明格文禁断私卖铜锡仍禁造铜器所有采铜锡鉛官为市取勿抑其价务利於人【开元十七年九月】

议放私铸钱勅 张九龄

勅布帛不可以尺寸为交易菽粟不可以抄勺贸有无故古之为钱以通货币盖人所作非天实生顷者耕织为资乃稍贱而伤本磨铸之物却以少而致贵顷虽官铸所入无几约工计本劳费又多公私之间给用不贍永言其弊岂无变通往者汉文之时已有放钱之令虽见非於贾谊亦无废於贤君况古往今来时异事变反经之义安有定耶终然自拘必无足用且欲不禁私铸其理如何公卿百寮详议可否朕将亲览择善而从【开元年】

禁京城沽酒勅

为政之本期於节用今农功在务廩食未优如闻京城之中酒价尤贵但以麴蘖之费有损国储游惰之徒益资废业其京城内沽酒即宜禁断麦熟之後任依常式【乾元元年二月】

行乾元重宝钱勅

钱货之兴其来已久盖代有沿革时为重轻周兴九府实启流泉之利汉造五铢亦弘改铸之法必令小大兼适母子相权事有益於公私理宜循於通变但以兵戈未息帑藏犹虚卜式献助军之诚弘羊兴富国之筭静言立法谅在使人御史中丞第五琦奏请改钱以一当十别为新铸不废旧者冀实三官之资用收十倍之利所谓於人不优从古有经宜听於诸监别铸一当十钱其文曰乾元重宝其开元通宝着亦依旧行用所请采铸捉搦处置即条件奏闻【乾

元二年七月】

行重轮钱敕

九府陈规百王不易或轻为重盖取适时以重为轻用为救弊则有形分龙马势写刀龟子母相沿变通斯在今国步犹阻帑藏未充重敛乃人困不堪薄征则军赋未足是以顷令改铸务於济时自开元行用以来颇亦公私弘益今可於绛州诸鑪加樣起铸更增新郭不变旧文每以一钱用当五十利丰费约实允事宜其钱以二十斤成贯自余钱监并听依旧享兹厚利足以富国人安俗阜朕复何忧仍令铸钱使即勾当起铸新钱或有奸滥所由奉法何至寬容仰州县明示钱樣切须捉搦勿使违越在京官寮比无俸料桂玉之费将何以堪宜取绛州新钱给冬季俸料即仰所由申请计会支給且艰难之际家国当同顷者急在军戎所以久亏禄俸眷言优恤恒愧於怀今俯及授衣略为賙给庶资时要宜悉朕怀【乾元二年八月】

令百官议罢新钱诏

泉府之设其来尚矣或因时改作则制有重轻往以金革是殷邦储稍阙属权臣掌赋变法非良遂使货物相沿谷帛腾踊求之輿诵弊实由斯夫易柱调弦政之要者今欲仍从旧贯渐罢新钱又虑权行转资艰急如或犹循所务未塞其源实恐物价虚腾黎人失业静言体要用藉良图且两汉旧规典章沿革必朝廷会议共体至公盖明君不独专法当从衆议庶遵行古之道俾广无私之论宜令文武百官九品以上并於尚书省议讫委中书门下详择奏闻【乾元三年三月】

重棱钱减价行用敕

因时立制顷议新钱且欲从权知非经久如闻官鑪之外私铸颇多吞并小钱踰滥成弊抵罪虽衆禁奸未絶况物价益起人心不安事藉变通期於折衷其重棱五十价钱宜减作三十文行用其开元旧钱宜与乾元钱并行用仍令京中及畿县内依此处分诸州待後进止【上元元年九月】

放邕府金坑勅

勅朕闻致理之君克勤於德不贵远物所宝惟贤故尧设茅茨禹卑宫室光武舍去宝劔顺帝封还大珠朕以眇身获守丕业仰止前王之德思齐太素之风未尝缘情於服翫措手於珠玉庶乎捐金抵璧返朴还淳邕州所奉金坑诚为润国语人於利非朕素怀方以不贪为宝惟德其物岂尚兹难得之货生其可欲之心耶其金坑宜委康泽差择清强官专勾当任贫下百姓采斲不得令酋豪及官吏影占侵扰闻奏当重科贬俾夫俗臻富壽人识廉隅副朕意也【大历十四年七月】

放天下榷酒勅

勅朕闻孟子曰国不以利为利以义为利钦若前训贤哉是言故务德崇贤理之先也趋本弃末政之兴也禹贡以财赋周礼入其货贿皆贍国用无夺人业汉接秦弊时匱费殷置筭緡之科下榷酤之令郡国发奸於下公卿言利於朝贾谊所以云天下之大残也朕获奉宗庙之祀永惟淳风犹闻江淮之间顷缘兵食未足榷酒收利权以救时虽广储蓄之资实隳商贾之业方敦礼节渐致和平岂财悖而入与百姓争利者耶其转运使下先诸道榷酒宜停俾利归於人化臻知耻仍宣示中外知朕意焉

减盐价勅

三代立制山泽不禁天地财利与人共之王道寢微强霸迭兴於是设祈望之守兴榷筦之法以佐兵赋以寬地征公私之间犹谓兼济历代遵用遂为典常自顷寇难荐兴已三十载服干櫓者农桑其尽居闾里者杼柚其空革车方殷军食屡调人多转死田卒污莱乃专煮海之利以为贍国之术度其所入岁倍田租近者军费日增榷价日贵至有以谷数斗易盐一升本末相踰科条益峻念彼贫匱何能自资五味失和百疾生害以兹天毙实用痛伤呜呼朕丕承列圣之绪遐览前王之典既不克静事以息用又不获弛禁以便人征利滋深疲甿重困予则不恤其谁省忧应准并峡州榷盐宜令中书门下及度支商量裁减估价兼厘革利害速具条件闻奏削去繁刻杜塞奸讹务於利人以称朕意

条贯江淮铜鉛勅

钱贵物贱伤农害工权其轻重须有通变比者铜鉛无禁鼓铸有妨其江淮诸州府收市铜鉛等先已令诸道知院官勾当缘令初下未尽颁行宜委诸道观察等使与知院官切共勾当事毕日仍委盐鉄使据所得数勘会闻奏【元和年】

条贯钱货及禁采银勅

勅泉货之法义在通流若钱有所壅货当益贱故藏钱者得乘人之急居货者必损已之资趋利之徒岂知国计斯弊未革人将不堪今欲着钱令以出滞藏加鼓铸以资流布使商旅知禁农桑获安义切救人情非欲利然革之无渐物或相惊已日之孚在乎消息天下商贾先畜钱者宜委所在长吏分明晓谕令其收市货物官中不得辄立程限逼迫商人任其货易以求便利计周岁之後此法遍行朕当别立新规设蓄钱之禁所以先有告示许其方圆意在他时行法不贷朕志久定固无二言又有银之山必有铜鑛铜者可资於鼓铸银者无益於贫人适开翫好之端岂救饥寒之患况欲加铸理须并功得不权其重轻使务专一其天下自五岭以北见采银坑并宜禁断恐所在坑户不免失业委本州府长吏劝课令其采铜助官中铸作仍委盐鉄使即作法优赏条流闻奏於戏人之求利厥路固殊斯道炳然言之不惑凡百有位明悉朕怀

停淄青等道榷盐勅

兵革初宁方资榷筦閭閻重困斯可蠲除如闻淄青郛三道往年榷盐价钱近收七十万贯资
费优贍有余自盐鉄使收管已来军府顿絶其利遂使经行阵者有停粮之怨服陇亩者兴加
税之嗟犯盐禁者困鞭撻之刑理生业者乏盐酱之具虽县官受利而郡府益空俾人获安
我节用其盐鉄先於淄青兗郛等道管内置小铺榷盐巡院纳榷起今年五月一日已後一切
并停仍各委本道约校比年节度使自收管充军府逐急用度及均減管内贫下百姓两税钱
数至年终各具榷盐所得钱并均減两税闻奏【元和年】

唐大诏令集卷一百十二

卷一百十三

钦定四库全书

唐大诏令集卷一百十三

宋 宋敏求 编

政事

道释

禁正月五月九月屠宰诏

为殒身戎阵者立寺刹诏

道士女冠在僧尼之上诏

僧尼不得受父母拜诏

释教在道法之上制

条流佛道二教制

禁葬舍利骨制

僧道齐行并进勅

令僧尼道士女冠拜父母勅

断书经及铸佛像勅

禁断妖讹等勅

诚励僧尼勅

不许私度僧尼及住兰若勅

僧尼拜父母勅

禁三元日屠宰勅

玄元皇帝临降制

停京都检校僧道威仪勅

令天下寺观修功德勅

条贯僧尼勅

禁天下寺观停客制

禁僧道卜筮制

修亳州太清宫诏

条流僧尼勅

拆寺制

迎凤翔真身德音

道释

禁正月五月九月屠宰诏

释典微妙净业始於慈悲道教冲虚至德去其残杀四时之禁无伐麋卵三驱之化不取前禽盖欲敦崇仁惠蕃衍庶物立政经邦咸率兹道朕祇膺灵命抚遂羣生言念亭育无忘鉴寐殷帝去网庶踵前修齐王舍牛实符本志自今以後每年正月五月九月凡关屠宰杀戮网捕畋猎并宜禁止【武德二年正月】

为殒身戎阵者立寺刹诏

至人虚已忘彼我於胷怀释教慈心均异同於平等是知上圣惻隐无隔万方大悲弘济义犹一子有隋失道九服沸腾朕亲总元戎致兹明罚誓牧登陬曾无宁岁其桀犬愚惑嬰此汤罗衔须义愤终身握节各殉所奉咸有可嘉日往月来逝川斯远虽复项籍放命封树纪於丘坟纪信捐生丹书着於图象犹恐九泉之下尚沦鼎鑊八难之间永纏水火愀然疚怀用忘兴寢

思所以树立福田济其营魄可於建义已来交兵之处为义士凶徒殒身戎阵者立寺刹焉【贞观三年闰十二月】

道士女冠在僧尼之上诏

老君垂范义在於清虚释迦遗文理存於因果详其教也汲引之迹殊途永其宗也弘益之风齐致然则大道之行肇於遂古源出无名之始事高有外之形迈两仪而运行包万物而亭育故能兴邦致泰反朴还淳至如佛法之兴基於西域爰自东汉方被中华神变之理多方报应之缘匪一泊乎近世崇信滋深人冀当年之福家惧来生之祸由是滞俗者闻玄宗而大笑好异者望真帝而多归始波涌於闾里终风靡於朝廷遂使殊方之典鬱为衆妙之先诸华之教翻居一乘之後流遁忘反於兹累代朕夙夜寅畏缅惟至道思革前弊纳诸轨物况朕之本系起自柱下鼎祚克昌既憑上德之庆天下大定亦赖无为之功宜有改张阐兹玄化自今已後斋供行玄法至於称谓道士女冠可在僧尼之前庶敦本之俗畅於九有尊祖之风贻诸万叶【贞观十一年二月】

僧尼不得受父母拜诏

释典冲虚有无兼谢正觉凝寂彼我俱亡岂自尊崇然後为法圣人心主於慈孝父子君臣之际长幼仁义之序与夫周孔之教异轍同归弃礼悖德朕所不取僧尼之徒自云离欲先自贵高父母之亲人伦已极整容端坐受其礼拜自余尊属莫不皆然有伤名教实斲彝典自今已後僧尼不得受父母及尊者礼拜所司明为法制即宜禁断【顯庆二年二月】

释教在道法之上制

朕先蒙金口之记又承宝偈之文历教表於当今本愿標於曩劫大云阐奥明王国之桢符方等发扬显自在之丕业馭一境而敦化宏五戒以训人爰开革命之阶方啓惟新之运宜叶随时之义以申自我之规虽实际如如理忘於先後翹心恳恳畏展於勤诚自今已後释教宜在道法之上缙服处黄冠之前庶得道有识以归依极羣生於回向布告遐迩知朕意焉【天授二年三月】

条流佛道二教制

佛道二教同归於善无为究竟皆是一宗比有浅识之徒竞于物我或因怱怨各出丑言僧既排斥老君道士乃诽谤佛法更相訾毁务在加诸人而无知一至於此且出家之人须崇业行非圣犯义岂是法门自今僧及道士敢毁谤佛道者先决杖即令还俗【圣历元年正月】

禁葬舍利骨制

释氏垂教本离死生示灭之仪固非正法如闻天中寺僧徒今年七月十五日下舍利骨素服

哭泣不达妙理轻徇常情恐学者有疑曾不谤毁宜令所管州县即加禁断【圣历三年五月】

僧道齐行并进制

朕闻释及玄宗理均迹异拯人救俗教别功齐岂有於其中间妄生彼我不遵善下之旨相高无上之法有殊圣教颇失道源自今每缘法事集会僧尼道士女冠等宜齐行并进【景云二年】

令僧尼道士女冠拜父母勅

勅夫孝者天之经地之义人之行故自天子下至庶人资於敬爱以事父母所谓冠五帝之表称百行之先如或不由其何以训如闻道士女冠僧尼等有不拜父母之礼朕用思之茫然罔识且道释之教盖惩恶而劝善父子之仪岂缘情而易制安有同人代而离怙恃哉哀哀父母生我劳瘁故六亲有不和之戒十号有报恩之旨此又穷源本而啓宗极也今若为子而忘其生傲亲而徇於末曰背礼而强名教伤於教则不可行行教而不废礼合於礼则无不遂二亲之与二教复何异焉自今已後道士女冠僧尼等并令拜父母丧纪变除亦依月数庶能正此颓弊用明典则罔亏爱敬之风自叶真仙之意【开元二年闰二月三日】

断书经及铸佛像勅

佛教者在於清静存乎利益今两京城内寺宇相望凡欲归依足申化敬下人浅近不悟精微覩叶希金望?思水浸以流荡颇成蠹弊如闻坊巷之内开铺书经公然铸佛口食酒肉手漫羶腥尊敬之道既亏慢神之心遂起百姓等或缘求福因致饥寒言念愚蒙深用嗟悼殊不知佛非在外法本居心近取诸身道则不远溺於积习实藉申明自今已後州县坊市等不得辄更铸佛写经典须瞻仰尊容者任就寺礼拜须经经典读诵者勤於寺赎取如经本少僧为写供诸州观并宜准此【开元二年七月】

禁断妖讹等勅 苏頌

勅释氏汲引本归正法仁王护持先去邪道失其宗旨为般若之罪人成其诡怪岂涅槃之信士不存惩革遂废津梁眷彼愚蒙将?坑穽比有白衣长髮假托弥勒下生因为妖讹广集徒侣称解禅观妄说灾祥或别作小经诈云佛说或辄畜弟子号为和尚多不婚娶眩惑閭阎触类实繁蠹政为甚刺史县令职在亲人拙於抚驭是生奸宄自今已後宜严加捉搦仍令按察使采访如州县不能觉察所由长官并量状贬降【开元三年十一月十七日】

诚励僧尼勅

释迦设教出自外方汉主中年渐于东土说兹因果广树筌蹄事涉虚玄眇同河汉故三皇作

又五帝乘时未蒙方便之门自有雍熙之化朕念彼流俗深迷至真尽躯命以求缘竭资财而作福未来之胜因莫効见在之家业以空事等繁风曾无所悔愚人寡识屡?刑科近日僧尼此风尤甚因依讲说惑煽间阎谿壑无厌唯财是敛津梁自坏其教安施无益於人有蠹於俗或出入州县假托威权或巡历村乡恣行教化因其聚会便有宿宵左道不常异端斯起自今已後僧尼除讲律之外一切禁断六时礼懺须依律仪午夜不行宜守俗制如有犯者先断还俗仍依法科罪所在州县不能捉搦并官吏辄与往还各量事科贬【开元十九年四月】

不许私度僧尼及住兰若勅

夫释氏之教义归真寂爰置僧徒以奉其法而趋末忘本去实据华假托方便之门以为利养之府徒蠲赋役积有奸讹至使浮俗奔驰左道穿凿言念淨域浸成道奸非所以叶和至理弘振王猷宜有澄清以正风俗朕先知此弊故预塞其源不度人来向二十载访问在外有三十已下小僧尼宜令所司及府县括责处分又惟彼释道同归凝寂各有寺观自合住持或寓迹幽闲或潜行间里?於非僻有足伤嗟如闻远就山林别为兰若兼亦聚衆公然往来或妄托生缘辄有俗家居止即宜一切禁断【开元十九年七月】

僧尼拜父母勅

道教释教其归一体都忘彼我不自贵高近者道士女冠称君子之礼僧尼企踵勤诚请之义以为佛初灭度付嘱国王猥当负荷愿在宣布盖欲崇其教而先於朕也自今以後僧尼一依道士女冠兼拜其父母宜增修戒行无违僧律兴行至道俾在於兹【开元二十一年十月】

禁三元日屠宰勅

道家三元诚有科诫朕尝精意祷亦久矣而物未蒙福

念不在兹今月十四日十五【日】是下元斋日都城内应省屠宰宜令河南尹李适之勾当总与赎取其百司诸厨日有内科亦责数奏来并百姓间是日并停宰杀渔猎等兼断肉食自今以後两都及天下诸州每年正月七月十月三元日起十三日至十五日兼宜禁断【开元二十二年十月】

玄元皇帝临降制

大道混成乃先於天地圣人至教用明其宗极故能发挥妙本弘济生灵使秉志者信徵迷方者知复以此救物故无弃人其孰当之莫若我烈祖玄元皇帝矣朕纘承宝业重阐玄猷自临御以来罔不夙夜每涤虑凝想斋心服形礼谒於尊容未明而毕事将三十载矣盖为天下苍生以祈多福不谓微诚上达睿祖垂鉴顷因假寐忽梦真容既觉之後昭然以观瞻奉踰时殊相自然与梦相協谓降仙府永镇人寰告我以无疆之休德音在听表我以非常之庆灵贶有期乃昊穹幽赞宗社储祉岂朕虚薄能致兹事若使寢兴乃申祇敬宜令所司即写真容分使

送诸道采访使令当道州转送开元观安置所在道士女冠道士等皆具威仪法事迎候像到七日夜设斋行道仍各赐钱用充斋庆之费自今已後常令讲习道经以畅微旨所置道学须倍加敦劝使有成益是知真理深远弘之在人不有激扬何以励俗诸色人有能明道德经及庄子列子文子者委所由长官访择具以名闻朕当亲试别加甄獎至如道有三宝兹居一焉钦若至言爰兹宥过天下见禁囚徒其十恶罪者及造伪头者并谋杀故杀奸讹宿宵人等特宜免死配岭南官人犯赃据情状轻重事贬降余一切免且夫爱人之义长育之务宜存清淨合於简易至如州县造籍之年四围定户皆据资产以为升降其有小葺园庐粗致储蓄多相糺讐便被加等朕情为敦本义在劝农欲使野絕游人田无旷土安可得也自今已後且三五年间未须定户其中或有家资破散检覆非虚不可循旧差科须量事与降今者真容应见古所未闻福虽始於邦家庆宜均於士庶其亲王公主郡主县主及内外文武官等并量赐钱至休假之辰宜以酒食用申庆乐诸道节度及将士等亦宜准此其两京及诸州父老亦量赐钱同此欢宴其钱以当处官物况伊尔公卿逮乎黎献宜勉崇玄化共复淳源宣布遐迩使知朕意【开元二十九年五月】

停京都检校僧道威仪勅 孙逖

勅道释二教必在护持须置威仪令自整肃徒衆既广统摄尤难更相是非却成烦弊自今已後京都检校僧道威仪事宜并停或恐先有猜嫌因此妄相糺诉所由亦不须为理

令天下寺观修功德勅 孙逖

勅道释二门玄通衆妙济时育物皆有明徵是所依凭岂忘尊奉其天下寺观并令修功德用齐三圣之教以答百灵之心宜副虚怀各陈至敬

条贯僧尼勅

道释二教用存善诱至於像设必在尊崇如闻州县公私多借寺观居止因兹?瀆切宜禁断务令清肃其寺观除三纲并老病不能支持者余并俾每日二时行道礼拜如有弛慢并量加科罚又崇敬清淨礼避嫌疑其僧尼道士非本师教主及斋会礼谒不得妄托事故辄有往来非时聚会并委所由长官勾当所有犯者准法处分亦不得因兹搅扰分明告示咸使知悉【宝应元年八月】

禁天下寺观停客制 常袞

勅释教本以助化道家先於理国惩恶劝善以齐死生薰然慈仁美利天下所庇者大所益者深故历代崇尚而弗易也朕以玄元烈祖庆我昌运西方圣人福兹下土常所尽敬敢忘致诚且至真之体尚於精洁流俗所尊不宜?慢如闻天下寺观多被军士及官吏诸客居止狎而黷之曾不畏忌緇黄屏窜堂居毀撤寢处於象设之门庖厨於廊庑之下緬然遐想愧叹良深自今已後切宜禁断其军士委州县长吏与本将商量移於稳便处安置其官吏诸客等频有处

分自合遵承仰勅到当时发遣应尊像有损坏处俾随事修补其有诸神所居载在祀典灵迹昭着福及生人者如有毁废亦宜增葺且王者以清静统法圣人以神道设教精意所在感而遂通非徼福於朕躬期降祥於黎献申明诏旨用悉劳怀

禁僧道卜筮制 常袞

勅左道疑衆王制无舍妖言蠹时国朝尤禁且緇黄之教本以少思寡欲也陰阳者流所以教授人时也而有学非而辨性狎於邪輒窥天道之远妄验国家之事仍又托於卜筮假说灾祥岂直閭閻之内恣其诳惑兼亦衣冠之家多有厌胜将恐寢成其俗以生祸乱之萌时艰已来禁网疎阔致令此辈尚有矫诬害政之深莫过於此将归正道必絶奸源宜令所司举旧条处分

修亳州太清宫诏

圣人立极教本奉先王者配天义惟尊祖我大圣祖玄元皇帝肇开宝运垂祚有唐致六合於大同跻羣生於壽域保兹鸿业实赖贻谋如闻亳州太清宫频经水潦颇已摧毁永惟诞圣之地敢忘崇本之诚宜令宣武军节度使李程兼充亳州太清宫使仍委渐加修葺以时致敬称朕意焉【太和】

条流僧尼勅

朕斋居法宫详念至理思欲建皇极端化源大苏生灵渐复古道矧伊耗蠹必在澄清而释氏一宗来自西国殷周已前何尝有此唐虞之际宁匪盛时捷至汉明因梦以言徵传毅粹词而臆对远承像教从此流行荡然相传垂七百祀黎庶信若空之说衣冠敬方便之门异同之论虽多俗尚之讹未革遂使风駈成俗云构满途丁壮苟避於征徭孤穷实困於诱夺永言斯弊宜峻科条自今已後京兆府委功德使外州府委所在长吏严加捉搦不得度人为僧尼累有明勅切在提举惟我元元务在长育擅有髡削亦宜禁断比来京城及诸州府三长斋月置讲集衆兼戒懺及七月十五日解夏後巡门家提剥割生人妄称度脱者并宜禁断且僧尼本律科戒甚严苟有违犯便勒还俗若有自愿还俗者官司不须制立如闻两街功德使近有条约不许僧尼午後行游虽曰緇徒无非赤子有妨自遂亦轸予怀从今以後午後任行其僧尼在城委功德使其诸州府委本任长吏试经僧尼并须读得五百纸文字通流免有舛误兼数内念得三百纸则为及格京城勅下後诸州府勅到後许三个月温习然後试练如不及格便勒还俗其有年过五十以上筋力既衰及年齿未至夙婴痼疾并瘖聋跛躄不能自存者并不在试经限若有戒律清高修持坚苦风尘不杂徒衆共知者亦不在试经限天下更不得创造寺院普通兰若等如因破坏即任修葺於戏理国之本在正风俗故王化首婚姻之道所以序人伦霸图着胎养之令所以务生聚况一夫不耕人受其饥一女不织人受其寒安有废中夏之人习外夷无生之法略期疎涤用洁源流俾尔齐眡去末归本庶富之渐其在斯乎凡厥司存勉率吾教各勤检驭称朕意焉【太和年】

拆寺制

朕闻三代以前未尝言佛汉魏之後像教寢兴是逢季时传此异俗因缘染习蔓衍滋多以至於蠹耗国风而渐不觉以至於诱惑人意而衆益迷泊於九有山原两京城阙僧徒日广佛寺日崇劳人力於土木之功夺人利於金宝之饰移君亲於师资之际违配偶於戒律之间坏法害人无逾此道且一夫不田有罹其馁者一妇不织有罹其寒者今天下僧尼不可胜数皆待农而食待蚕而衣寺宇招提莫知纪极皆云构藻饰僭拟宫居晋宋齐梁物力凋残风俗浇诈莫不由是而致也况我高祖太宗以武定祸乱以文理华夏执此二柄足以经邦岂可以区区西方之教与我抗衡哉贞观开元亦尝厘革剷除不尽流衍转滋朕博览前言旁求輿议弊之可革断在不疑而中外诚臣叶心正意条疏至当宜在必行惩千古之蠹源成百王之典法济人利衆予不让焉其天下所拆寺四千六百余所还俗僧尼二十六万五千人收充两税户拆招提兰若四万余所收膏腴上田数千万顷收奴婢为两税户十五万人并隶僧尼属主客显明外国之教勒大秦穆护拔二千余人并令还俗不杂中华之风於戏前古未行似将有待及今尽去岂谓无时駈游堕不业之徒已踰百万废丹雘无用之屋何啻亿千自此清淨训人慕无为之理易简齐政成一俗之功将使六合黔黎同归皇化尚以革弊之始日用不知下制明廷宜体予意宣布中外咸使闻知【会昌五年八月】

迎风翔真身德音

朕以寡德纘承鸿业十有四年矣顷属蛮寇猖狂王师未息朕忧勤在位爱育生灵遂乃尊崇释教致敬玄门迎请真身盖为万姓祈福今者观覩之衆隘塞路岐载念陞庭寢兴在虑嗟我黎人?於刑辟况渐当暑毒系於縲紲或身积幽冤有伤和气或门连追扰有妨农务其京畿及天下州府见禁囚徒除十恶五逆故意杀人官典犯赃令造毒药放火持仗开发坟墓外其余罪无轻重节级遞减一等其京城军镇限两日内疏理讞闻奏天下州府勅到三日内疏理闻奏【咸通十三年四月】

唐大诏令集卷一百十三

卷一百十四

钦定四库全书

唐大诏令集卷一百十四

宋 宋敏求 编

政事

祥瑞

诸符瑞申所司诏

不许奏祥瑞诏

令诸道不得奏祥瑞诏

医方【疾病附】

诸州置医学博士勅

榜示广济方勅

颁广利方勅

三卫彊骑疾病给食料勅

收瘞

收瘞隋末丧乱骸骨诏

掩暴露骸骨诏

瘞突厥骸骨诏

剗削京观诏

收葬隋朝征辽军士骸骨诏

埋瘞暴露骸骨勅

收葬阵亡将士及慰问其家口勅

收瘞京城骸骨诏

禁錮

禁錮隋朝弑逆子孙勅

杨素子孙不得任京官制

杂錄

隋代公卿不预义军者田宅并勿追收诏不许言中兴勅

改丹水为怀水勅

江王下教

祥瑞

诸符瑞申所司诏

自昔帝王受天明命其有二仪感德百灵锡祉莫不君臣动色歌颂相趋朕恭承大宝情深夕惕每见表奏符瑞慙慙增怀且安危在乎人事吉凶系於政术若时主昏虐灵贶未能成其美如治道休明咎徵不能致其恶以此而言未可为恃今後麟凤龟龙大瑞之类依旧表奏自外诸瑞宜申所司奏者唯显瑞物色目及出见处更不得苟乘虚饰徒致浮词【贞观二年九月】

不许奏祥瑞诏

朕以寡昧纘承丕业永思至理所宝惟贤至如嘉禾神芝奇禽异兽盖辅化之虚美也所以光武形於诏令春秋不书祥瑞朕诚薄德思及前人自今已後所有祥瑞但令依式申报有司不须闻献其珍禽奇兽亦宜停进宣示天下知朕意焉

令诸道不得奏祥瑞诏

朕以菲德祗膺大宝深求理本将致时雍以慈惠恭俭为休徵以人和年丰为上瑞夙夜思省无以过之至於嘉穎连理之祥飞禽走兽之异出自邦国来献阙庭虚推功德非予所尚岁晏奏陈於清庙元正列荐於上朝探讨古今亦无明据恭惟灵圣岂候荐闻事匪经常允当厘正庶使溥天之下知予务实之心其诸道应有三等祥瑞并不得更有闻奏亦不要申牒所司其腊飧太庙荐献太清宫并元日受朝奏祥瑞仪注宜停

医方【疾病附】

诸州置医学博士勅

勅神农尝草以疗人疾岐伯品药以辅人命朕铨览古方永念黎庶或荣卫内拥或寒暑外攻因而不救良可叹息今远路僻州医术全少下人疾苦将何恃赖宜令天下诸州各置职事医学博士一员阶品同於録事每州写本草及百一集验方经史同贮其诸州於録事各省一员中下州先有一员者省讫仰州补勲散官【开元十一年七月】

榜示广济方勅

朕顷者所撰广济方救人疾患爱民育物惠彼黎元特念僻远之家未能缮写闻阎之内或有不知悦医疗失时因至天横性命之际宁忘惻隐宜命郡县长官就广济方中逐要者於大板上件録当村坊要路榜示仍委采访使勾当无令脱错【天宝五年八月】

颁广利方勅

勅立国之道莫重於爱民育物之心期臻於壽域故安其性命顺其节宜使六气不差百疾不作斯亦救人之要也朕以听政之暇思及黎元母虑温湿不时壅鬱为疴或僻远之俗难备於医方或贫匮之家有亏於药石失於救疗遂至伤生言念於兹载深忧軫属春阳在候寒暑方交闾里之间颇闻疾患每因服饵尤感予衷遂閱方书求其简要并以曾经试用累验其功及取单方务於速効当使疾无不差药必易求不假远召医工可以立救人命因加纂集以便讨论类例相从勒成五卷名曰贞元集要广利方宜付所司即颁下州府闻阎之内咸使闻知

三卫彊骑疾病给食料勅

育物者所贵於从宜养人者必资於遂性况加疾苦岂忘哀矜内外廊三卫彊骑等如闻因当上染患者番满之後既不胜致还乡又不容在职掌思彼进退无据何所依投沟壑是忧岂谋朝夕永言及此深軫於怀自今已後如有此色宜移就三卫厨给食料将养各委左右金吾将军存意检校所须药物仍与太常计会量事供拟并差医人救疗其诸门及街铺职掌人等各委将军以当卫诸色残官等且量事支給其医药宜准内外廊例自余色当番人等有痰疾者并准此处分其有身死者各委所由随事埋瘞当日牒报本贯令家人亲族运致还乡【天宝三年八月】

收瘞

收瘞隋末丧乱骸骨诏

自隋室不纲政刑荒废戍役烦重师旅荐兴元元无辜墮於涂炭转死沟壑暴骨中原室党沦亡邑居散逸坟陇靡托营魂无归朕受命君临为民父母率土之内情均亭毒一物失宜寝兴軫虑念兹道殣义先吊恤虽复令已颁下普遣葬埋犹恐吏不存心收瘞未尽宜令州县官司所在奉行掩骼埋胔必令周悉使邮亭之次先复游魂窀穸之下各安所厝姬文惠化恩及枯骸庶踵於前此焉非类【武德年】

掩暴露骸骨诏

隋运将尽羣凶鼎沸干戈不息饥饉相仍流血成川暴骸满野朕往因军旅周览川原每所临视用伤心虑自祗膺宝命义切哀矜虽道谢姬文而情深掩骼诸色骸骨暴露者宜令所在官司收敛埋瘞称朕意焉【贞观二年四月】

瘞突厥骸骨诏

突厥种落往逢灾疠疾疫饥饉殒丧者多暴骸中野前後相属幽魂靡托醪奠无所本官矜悼有怀惻隐宜令所司於大业长城以南分道巡行但有骸骨之所酒酺致祭速为埋瘞务令周悉以称朕意【贞观四年九月】

剗削京观诏

甲兵之设事不获已义在止戈期於去杀季叶驰竞恃力肆威锋刃之下恣情剪馘血流漂杵方称厥意屍若乱麻自以为武露骸封土多崇京观徒见安忍之心未弘掩骼之礼静言念此悯叹良深但是诸州有京观无问新旧宜悉剗削加土为坟掩蔽枯朽勿令暴露仍以酒酺致奠焉【贞观五年二月】

收葬隋朝征辽军士骸骨勅

诏自隋师渡辽时非天赞从军士卒骸骨相望遍於原野良可哀叹掩骸之义仰惟先典其令并收葬之【贞观十九年四月】

埋瘞暴露骸骨勅

移风易俗主化之大猷掩骼埋胔时令之通典如闻江左百姓之间或家遭疾疫因此致死皆弃之中野无复安葬情礼都阙一至於斯习以为常乃成其弊自今已後宜委郡县长官严加诫约俾其知禁勿使更然其先未葬者即勒本家收葬如或无亲族及行客身亡者仰所在邻

封相共埋瘞无令暴露庶叶礼经诸道有此同者亦宜准此【天宝元年三月】

收葬阵亡将士及慰问其家口勅 贾至

勅自寇戎猾夏干戈不戢涉三载矣而忠臣义士死王事者何可胜言兹朕痛悼於厥心若挟疮痍是用枕戈寝胃亲总六师恃神祇之佑凭宗庙之灵亦冀剋清载造京邑近者诸军告捷屡摧贼衆天意人事若将叶符而战士阵亡多委沟壑已令收瘞犹虑或遗抚存哀歿朕之所切宜令节度使与郡县长官计会悉收骸骨埋葬致祭仍勘责姓名续行奏闻将褒赠其官爵优恤其妻子仍伸本道使者郡县勿差科其家庶乎幽明慰怀知王师之不得已也【至德二年】

收葬京城骸骨诏

凡在生灵合登仁壽自逢艰阻多致伤残或寇盗为灾毙於锋鏑或岁时不稔道殣相望枯骨转屍多未埋瘞朕为人父母良深悯恻将何以示掩骼之礼希葬骨之仁永念前修岂忘言训其京城内外应有旧骸骨宜令京兆府即勾当收拾埋瘞仍令中使与所申计会致祭【宝应年】

禁錮

禁錮隋朝弑逆子孙诏

宇文文化及弟智及司马德戡裴?通孟景元礼杨览唐奉义牛方裕元敏薛良马举元武达李孝本李孝质张愔许弘仁令狐行达席德方李覆等大业季年咸居列职或恩结累世任重一时乃包藏凶慝罔思忠义爰在江都遂行弑逆罪百阎赵衅深泉獍虽事是前代岁月已久而天下之恶古今同弃宜从重典以励臣节其子及孙并宜禁錮勿令齿叙化及既为魁首僭窃名号一门之内凶恶尤甚但其弟士及不预逆谋虽云昆季仅免诛戮委贄皇朝勲庸克着彰善瘝恶伸有旧章士及一房不在此例布告天下咸使闻知【贞观七年正月】

杨素子孙不得任京官勅

隋尚书令杨素昔任前朝早荷殊遇稟凶邪之德怀谄佞之才惑乱君上离间骨肉摇动冢嫡宁唯掘蛊之祸诱扇後主卒成请蹕之衅隋室丧亡盖唯多僻究其萌兆职此之由生为不忠之人死为不义之鬼身虽幸免于竟族诛斯则奸逆之谋是其庭训险薄之行遂成门风刑戮虽加枝胤仍在岂可复随近侍齿列朝行朕接统百王恭临四海上嘉贤佐下恶贼臣常欲从容於万机之余褒贬於千载之外况年代未远耳目所存者乎其杨素及兄弟子孙已下不得令任京官及侍卫【圣历三年五月】

杂録

隋代公卿不预义军者田宅并勿追收诏

隋政不纲行止无度东西驰骋靡岁获宁遂使父子乖离室家分拆亲老絶晨昏之养婴孙无抚育之恩人怀恋本之心家有望乡之叹朕上膺灵命下字黔黎一物失宜情深轸悼思俾惠泽逮於鰥寡其隋代公卿以下爰及民庶身往江都家口在此不预义军者所有田宅并勿追收若困穷粮食交絶具録名簿速加赈贍【武德元年七月】

不许言中兴勅

勅朕承天宰物光宅中区嗣祖宗之丕基承圣善之洪业向明冕屨实奉成规往自永淳至於天授奸臣称乱?运不安则天大圣皇后思顾托之隆审变通之数忘已济物从权御宇四海由其率顺万姓所以咸宁唐周之号暂殊社稷之祚斯永天宝实固所由於兹朕所以抚璇玑握金镜事惟继体义即纘戎岂若文叔之起春陵少康之因陶正中兴之号理异於兹宜革前非以归事实自今已後更不得言中兴其天下大唐中兴寺观宜改为龙兴寺观诸如此例并即令改【神龙三年二月】

改丹水为怀水勅

勅不息恶木?渴盗泉行道之人避恶名也朕尝览上古记称秦坑赵卒血流丹峪名其水为丹水者方经此路怀古惻然邑号获嘉地称修武前王故事将有所凭宜改丹水为怀水改丹水府为怀仁府其乡里名号亦仰州长官随事改易【开元十三年三月】

江王下教

大行皇帝听断英明临下以法将期致理以靖区宇而奸凶构祸矫宣遗言不询羣臣专断神器寡人义重君臣毒甚手足乃亲率左右护军中尉心腹近臣及诸职事官等并左右神策六军使兼诸军使及将士并飞龙将士等搜摭伏慝大擒诸贼或血刃当辜或赴井而毙其头首刘克明田务澄王嘉宪石定寛等二十八人并正刑书罔有漏逸此皆宗社威灵文武协力岂伊菲薄敢贪天功凡百多士中外藩岳致兹刷愤哀庆当同大行皇帝正枢於太极殿前率依光陵故事有司条上务尽诚敬其冢宰司空平章事裴度当摄立功将士节级各有优赏布告遐迩咸使闻知【宝历年】

唐大诏令集卷一百十四

卷一百十五

<史部,诏令奏议类,诏令之属,唐大诏令集

钦定四库全书

唐大诏令集卷一百十五

宋 宋敏求 编

政事

慰抚上

淮安王神通山东道安抚大使诏

皇太子等巡京城诸县诏

鄮国公轨等益州道安抚大使诏

张镇州淮南道安抚诏

存问并州父老诏

遣毕构等慰抚诸道诏

遣杨虚受江东道安抚诏

遣卢绚等诸道宣慰赈给勅

宣慰西京逆官勅

宣慰京城僧道父老勅

安缉京城百姓勅

慰谕朔方将士勅

遣使安抚制

遣郑叔清江淮宣慰制

遣刘晏宣慰诸道勅

慰抚

淮安王神通山东道安抚大使诏

隋德下衰政荒民散九州辐裂四海瓜分元元无辜困豺狼之吻悚慄黔首罹兵革之灾朕祇膺宝图救其危坠一物失所情深纳隍今赵魏之人顷承大化海岱之境思稟朝章然而尚迫寇戎受拘凶暴经途遐阻末由自达宣风布教必伫循良柔服招携事资明庶右翊卫上将军淮安王神通地惟近属功参运始杖节建旛久当重寄可山东道安抚大使其山东诸道军事并受节度下【武德元年十月】

皇太子等巡京城诸县诏

隋末道消运属阳九盗贼蠭起饥馑荐臻四海之民坠於涂炭是以上天降鉴爰命朕躬绥静黎元克定元丑府库仓廩所在开发流冗之民随加赈抚言念亨育鑒寐匪忘然年谷不登民多困乏一物失所有甚纳隍宜加存问救其疾苦可令皇太子建成巡京城侧近诸县秦王巡京城以东左仆射襄寂巡京城以西诣彼闾阎见其耆老亲省风俗廉察吏民乏絶人量加赈恤有如冤滞并为申理高年疾病就致束帛【武德二年闰二月】

鄴国公轨等益州道安抚大使诏

朕受天明命抚育万方康俗齐民无忘鉴寐西蜀僻远控馭巴夷厥土沃饶山川遐荒往者隋末丧乱寇盗交侵流寓之民遂相杂挠游手堕业其类实繁寇攘矫?因此而作王业伊迓务从草创牧宰庶僚随事迁易州县分并权宜废置然而王道未洽民瘼犹存静言思之夙夜軫念澄原正本义在更张可令秦州摠管鄴国公轨御史大夫滑国公无逸为益州道安抚大使宣扬朝典进擢廉平贬黜苛暴申理冤滞忠孝贞节表其门閭鰥寡孤惻量加贍恤事有便宜并委处分

张镇州淮南道安抚诏

三楚之地江山遐阻五岭之表经途辽复自有隋失馭盗贼交侵声教莫迓方隅久絶朕受图膺运君临寰宇率土之滨情均抚字方今函夏肃乂文轨一同尉侯无虞要荒率职然而江蠡之????或阻寇戎闽禺之乡未闻正朔左武侯将军黄国公张镇州大将军合浦县公陈知略二方首族早从历任思展诚効缉宁州里镇州可淮南道行军摠管知略可岭南道行军摠管以

安抚之【武德四年八月】

存问并州父老诏

昔隋末丧乱百姓凋残酷法淫刑役烦赋重农夫释耒工女下机徵召百端寇盗蜂起人怀忿怨各不聊生水火之切未足为喻先朝不忍涂炭思济黎元朕纂承神筭奋劔南起与彼境英雄同心叶力不顾躯命以救苍生爰自晋阳起兵唱义推锋接刃栉风沐雨除凶去暴以德行仁天下又安戎车止息九夷八狄莫不来庭以至於今二十余载岂予一人所能致此实赖天地之仁宗庙之福贤人君子为朕股肱文士尽其才智武夫宣其勇力朕端拱无为庶几王道然汉高悲歌常思丰沛晋皇吟咏惟在温原此人之情也况并部之地创业之基与诸父老首立大事引领北望感慕兼深思与父老一日叙旧怀之在心所不忘也但海内殷旷万几事多省巡四方未遑图息父老宜约勒乡党教导後生亲疎子弟务从忠孝必使风俗敦厚异於他方副朕此心光示远近使旌表门闾荣耀乡里书名竹帛岂不美欤夏序甚热想各平安善自怡养动静闻奏故有此勅想见朕心【贞观十五年六月】

遣毕构等慰抚诸道制

昔者明王之治天下也内有公卿允厘庶绩外有侯伯司牧羣黎犹惧至道不孚淳风或替故有巡狩之典黜陟幽明行人之官省方察俗用能遐迩清宁情伪无作於变时雍率其道也朕祇膺嗣德恭守帝图上禀过庭之谋下凭庶士之力竭精思理两载於兹冀逮小康渐及至化而区宇遐远风教未同负宸长怀责深在已近者奸回究切衅起萧?宗社降灵应时殲殄今又恭承圣训揔统大猷率彼百官齐兹七政恐仓廩不实礼节未兴吏靡息於贫贱人或及於幽枉永言於此明发疚心今卜征未习远迈非宜分命輶轩慰抚黎庶毕构等操履公清识具明允茂绩彰於历试嘉誉满於周行宜膺行李载光原隰所至之处申谕朕心并合屏絶浮华敦崇仁厚务修孝弟勤事农桑耆老鰥嫠人家口不自存者咸加恤问举以言扬唯贤是急若有良材异等藏器下僚哲人奇士隐沦屠钓栖迟闾阎官人内有贪致苟得背公徇私循默自守养望充位者还日各以名闻所至之州县令宣布求瘼恤隐称朕意焉应须判官及典準例驰驿即发遣【先天二年七月】

遣杨虚受江东道安抚勅 苏頌

勅淮海是称谿险山川重复水陆殷溱去岁田收稍乖丰稔念兹人庶颇致饥乏朕为人父母深用惕然近闻雨泽应节秔稻有望目前之困糊口犹切思从蠲省用救荒弊宜令给事中杨虚受往江东道安抚存问不急之务一切除减观察疾苦量宜处置刑狱冤滞委使详理百姓间有伟识异才潜藏鳞羽隐沦屠钓栖迟闾阎官人内有贪致苟得背公徇私循默自守养望充位者还日各以名闻所至之州县令宣布求瘼恤隐称朕意焉应须判官及典準例驰驿即发遣【开元二年四月十一日】

遣卢绚等诸道宣慰赈给诏

言念苍生心必遍於天下自牧多福泽偏润於京师所以历选列城聿求连率岂徒判察将委
缉宁朝散大夫检校御史中丞关内宣慰赈给使上柱国卢绚等任寄已深声实兼茂咸贯通
於理道益纯固於公心或华髮不衰或白圭无玷可以轨仪郡国康济黎元间岁以来数州失
稔颇致流冗能勿殷怀而吏或不畏不仁或不安不便诚须矫过必仗贤能凡此使车不无殷
监比事掣肘务欲摠权小有举於毫髮大莫振於纲领本令调察却致烦苛永言所期岂云自
弊今既各膺重寄允谓通才以蠲疾苦之原当叶大中之义若令行一道利及万人朕所设官
以俟来者朝之优秩必归令誉言可复也宜副朕怀【开元二十二年二月】

宣慰西京逆官勅 贾至

勅西京官吏等逆寇构祸暴犯京邑我国家图必胜之劳取万全之功是以避狄而西外饬师
旅遂使卿等奔窜无所力屈狂寇既闲之以师旅又临之以兵戈或强逼駈驰或伪置官爵事
不获已皆是胁从朕深悉焉无怀反侧今天既悔祸宗庙垂灵王师东征雷击电扫逆徒剿絶
关辅载清卿等代承国恩家传禄位乃祖乃父为我纯臣虽?贼中固深忧愤是用惻隐矜悯于
怀宜各自安更勿惶惧朕与人更始岂求録微瑕哉旬日之间与卿等相见【至德三年】

宣慰京城僧道父老勅

勅西京缙黄耆壽百姓顷者逆兵暴至侵逼长安王事西巡修集兵马遂使卿等?於贼首不得
奔逃或骨肉之间枉罹屠害女子之輩多遭虏掠朕每念此流涕痛心又比来米盐匱竭人多
饿死道殣相望或贼徒逼胁駈使事穷力屈尽是胁从朕甚闵焉今已京城再复贼寇殲灭岂
独宗庙之福祉稷之灵京师等兆民恳诚感达天地之所致也方与卿等雪耻辱布维新大弃
疵瑕弘宥罪戾恐未达意或惶恐焉各宜宁居勿怀反侧各令宣谕与卿等不久相见【至德
二年】

安缉京城百姓诏

勅京城之人久?凶丑亦既平定莫非王臣比屋可封唐之人闔境皆戴商之旧复以宗庙之器
府库之资散在闾阎紊烦纲纪主守者阙以供事窃取者冒其常用所以遣其检括必使当实
如闻小臣失所遂使流言寇攘资财惊扰士庶官吏不修其法豪强横有纵暴或得一官物即
破人家产或捕一奸吏则傍累亲隣仍有不逞之徒因兹恐吓大为侵暴百姓冤苦永言哀念
良深叹息委京兆尹兼御史大夫李岷勾当诸使检括一切宜停妄有欺夺宜即推捕奏闻仍
榜坊市务令安缉副朕之意焉【至德三年正月】

慰谕朔方将士勅 贾至

勅朔方将士等自寇逆乱常殆涉三载卿等被坚执銳暴露原野东征西伐未尝暂宁雪霜风
雨之间白刃鸣镝之下衆勤至矣朕甚悯焉顷者出并陘收赵地还破同罗逋虏复入河东故
郡累有功绩王室赖之昨者清渠之战师徒不利亦闻卿等伤夷甚多兵者危事一挫何损但

当勉励以为後图神祇助善天地厌祸仗顺招逆无忧不平知卿等所在集兵更加训练便於再举思灭残徒此忠臣义士感激之深也已令江淮转运布帛到日议赏非遥今关中麦秋见将收获六军粮备实资於此通须相勗勿犯田苗甲杖刀枪已令支送诚宜磨励大雪前耻事平之日卿等并封侯金帛珪璋无所爱惜故令宣慰知朕意焉【至德元年】

遣使安抚制

勅厄运者天之时也理乱者人之政也是以轩辕不能止蚩尤之患帝舜不能无有苗之征盖在於人君修刑德以除之也顷者羯贼凶害当争战之地则肌骨多毙於锋镝在遐僻之方则杼柚其空於征赋离乡去邑弃业亡家契濶冻馁飘飏是逼朕每永念心折涕零是用严奉睿谟行天罚躬被甲胄大率戎夷扫清中原诛斩蛇豕岂朕薄德皆建功业盖人心竭节于本朝而戮力于寇难也所以给其优复减其赋税省其聚歛息其征徭赈其匱乏宥其罪戾空其仓廩舍其逋悬养其伤痍恤其死事将使百姓永登仁壽犹虑抚字有阙尚疾苦之未除於是分遣使臣亲访闾里夫人君高居天位非可以目遍四海耳周八极必仗贤能以广视聽顷之使臣咸未称职多俯仰经略未尽至公遂令远人冤不上達弊不下去今择朝端忠贞仁惠之士饮水乘駟巡抚四方其有政教烦苛勅令不便妨於耕稼害於桑徵损於人无论小大咨尔兆庶必闻原委又有官吏科虐豪猾侵渔扰於黎甿冒於货贿上无隐也当悉惩之朕方以百姓为心苍生为壽非欲自贤自圣而为理舍暴惠奸而随人率土之滨宜悉朕意【至德二十年二月】

遣郑叔清往江淮宣慰制 贾至

勅逆旅未平师旅淹岁军用匱竭常赋莫充所以税亩於荆吴校练於淮海从权救弊盖非获已夫法明则吏不欺歛均则人不怨辑事无扰系乎使臣度支员外郎叔清贞固干事用节爱人考志视成可历斯任宜以本官兼御史充江淮东西道宣抚使【至德二年七月十二日】

遣刘晏宣慰诸道勅

岁之不易征伐繁兴河洛萧然江外尤剧供上都之国用给诸道之军须庶务徵求未遑少息火耕水耨夏葛冬裘充馈运而屡空壹戎衣而不足农人少而转困编户流而卒归自北之化未淳大东之词方切君为心也朕甚痛焉今区宇渐宁凋残已甚惕然躬已姑务息人惧憊嫠之无告思省方以亲问时迈未可日昃增劳载怀鸿雁之诗用解吾人之愠必资循行以周爰咨諏皇皇者华以申喻朕志宜令太子宾客兼御史大夫刘晏往诸道宣慰应百姓有徵科烦重人户逃亡及水旱所损不能支济者并与本道节度使计会蠲削安在遂便处置讫具状上奏官吏之政在邦必闻知无不为公道斯在其租庸使刺史县令录事参军有精於政理赋均役平州县之间称为良吏者具名以奏别有甄异如或残忍慢法贪污脏官有害於人不应当时务者具状以闻仍与本道节度观察使计会举按四海至广九重至深思使下情上通常令上旨下達务於审慎朕之意焉

唐大诏令集卷一百十五

卷一百十六

钦定四库全书

唐大诏令集卷一百十六

宋 宋敏求 编

政事

慰抚中

李涵河北宣慰制

李涵再使河北制

刘晏宣慰河南淮南制

喻安西北庭诸将制

宣慰湖南百姓制

宣慰岭南制

奉天遣使宣慰诸道制

收复京师遣使宣慰制

安抚淮西归顺将士制

处分淮西赦

建中四年伐两河叛帅慰劳本道百姓勅贞元元年慰抚平卢军先在淮西将士勅遣使安抚水灾诸州诏

令潘孟阳宣慰江淮诏

慰抚中

李涵河北宣抚制 常袞

门下河朔一隅地方千里外扞夷狄内辅成周抚勤王之师修任土之贡顾其方镇可谓崇重眷我侯伯是有勲劳将相国之股肱兆庶君之支体事同休戚宁忘鉴寐思抚巡而未获念征镇而永怀爰命宗臣往申旨谕银青光禄大夫行尚书左丞襄武县开国公李涵朕之茂亲腹心攸寄纯固所以致命文质所以经邦温恭礼让信诚易直励匪躬之节秉忧国之心美其公才尝所委任再令宣抚皆合事经既合谦诚之辞兼陈理化之迹慰我忧心意甚嘉之今秋冬在候徭戍未宁将校有介冑之劳黎元有赋税之役代予亲问谕尔使臣仍兼副相之荣式重登车之务可兼御史大夫充河北宣慰使本官勲封并如故

李涵再使河北制

勅书有施命以告四方礼有诵志以巡邦国明王所以垂拱而天下理者非家至而日见之也实赖腹心耳目之臣审训念於中外俾德泽教化敷於四海情有所达事适其宜上下交畅则天地和应矣喻我朝旨寄於宗英银青光禄大夫行尚书兵部侍郎襄武县开国公李涵志以足言学於古训安和孝敬慎静尚宽服居大僚常所亲信每受重寄必扬休声往以幽蓟渤碣之间戎府方州之大俾付正命以亲诸侯至於再三秉此纯一尽人臣之节罔或辞难徇国家之利岂惮勤远信以协忠惠以交福周爰咨度不遑后处边陲宁晏敬赖亲贤今以侯伯之勲劳师人之戍守顾其功效宜有抚巡高选中朝尤承兹命加以丞相之副增其原隰之华时惟懋哉无替厥服可兼御史大夫充河北宣慰使余如故

刘晏宣慰河南淮南制

勅书曰元后作人父母又曰一夫不获则日时予之辜政或不平讼或不理则人受其弊气生其灾噢咻连声愁苦无告州县长吏莫之省忧念兹疚怀中心夜三叹朕以否德托於人上永言理道敢不励精自兵乱一纪事殷四方耕夫困於军旅蚕妇疲於饷馈欲求无事岂可得乎致令户口减耗十无一二而河南淮南又甚诸道得非菟乘补卒之数急赋横税之烦致使忧骇匪宁流庸不复兼亦亲人之职少有政术称者放富役贫多患不均靡室靡家皆籍其谷无衣无褐亦调其庸虽节制廉察务令调理而贪官暴法未绝奸原诛求无厌鰥寡重困永叹遐想过实在予巡抚之寄资於硕德某官某相政府之旧道在安人自河之南天下之半底慎财赋衣食京师久於倚任多所弘济因其旋南将命攸属所至之处宣示诏书抚将校之勤劳问黎元之疾苦事有未便法或不行委之厘革归於允当或假其征徭私有聚敛或托其贡献公然乾没厚取於人归怨於上亏损时化朕甚惧焉宜委某官与节度观察切加疏理勿令冤滥以副忧劳其官吏有犯便禁身推问具状闻奏当峻刑典以息贪残

喻安西北庭诸将制 常袞

勅天下既定万里宁一岂王者独运而臻此耶实赖文武将守腹心之臣宣力强任扞御於外也往以蕃戎并暴纵毒边表乘衅伺隙连兵累年城门昼闭王师遐阻遮杀汉使盗取节印恣

睢甚橫厉逆天理而国朝未暇袭远置於度外实五京二庭存亡危急之秋也河西节度使周鼎安西北庭都护曹令忠尔朱某等义烈相感贯於神明各受方任同獎王室率辛李之将用甘陈之谋与羌骑校尉王侯君长以下自金河玉关至於南北戊午跨流沙至西海蒲类破白山战事致命出於万死赖天之灵以战则尅不动中国不劳济师横制数千里有辅车首尾之应以威以怀张我右掖棧振於絕域烈切於昔贤微三臣之力则度隍隰陇不复汉有矣每有使至说令忠等忧国勤王诚彻骨髓朝廷闻之莫不酸鼻流泪而况於朕心哉遐想盛烈感叹何已或恐凶丑狡譎反复离间妄说国难摇动人心今所以疏其事实一以相报近有流落蕃中十数年者至阙庭知犬戎恶稔上疑下阻日就残灭加之疾疫灾及羊马山谷填委天亡之时及囚奴自速其祸诸蕃连衡以功进取力屈气衰已逃於苦寒之地西北边患荡然以清至於九夷南尽百越玉帛来朝於魏阙苞茅入贡於王祭党项内附回中大宁天下郡国一其教理王畿征调渐复平时子仪移镇於邠郊抱玉进攻於天水士马百万当令悉西方垣翰之寄所宜協心戮力抗厉威武同赴戎会也勉卒志业以时康功庆流子孙永久无替高映勲典岂不休哉每念战守之士十年不得解甲白首戎阵忠劳未报心之惻怛不忘终食要当候大师所指穷荒荡定悬爵位以相待倾府库之所有以答西川贤士大夫忘身报国之诚遣诏諭意非一二所能尽也

宣慰湖南百姓制 常袞

勅震泽之南数州之地顷以水潦暴至沱潜溃溢既泛城郭复瀦原田连岁大歉元元重困餒殍相望流庸莫返加之以师旅烦之以赋税哀我矜人何以堪命朕君临之道方鬱牧养之政未弘咎之所降谅在於此虽天灾流行厥有恒数而夕惕厉岂忘责躬夫振人育物大易之明文也自汉魏以来外军之处必遣人巡问以安集之国朝因其制亦命近臣抚慰俾諭求瘼之意宜令中散大夫给事中贺若察往湖南宣慰处置其百姓遭损不能自存者应须振急蠲宜与本道观察使商量处置了闻奏仍賫诏书躬自问恤宣示郡邑令知朕心

宣慰岭南制

勅理天下者先务於安远本人情者必令其上达或刑罚不中德施未孚则生怨咨是以申喻朕以服岭之表方隅之大南尽百越专制万里择将置守常亦难之至於临遣屡有明诫俾施惠政以恤疲人而长吏议法不平作威以逞因其猜阻我忠良冯季康何如瑛等南方右族累代纯臣協其义烈之心积有艰危之効惑於所譖虐用其刑无状致辟遂生边患朕比托人上每劳日昃天地之生成父母之慈爱闻此滥罚惕然疚怀寻亦辨明特令昭宣如闻溪洞尚有纷扰哀我士庶劳於甲兵岂不求安良有以也所以更谋良帅先用旧德兼御史大夫徐浩历典中外长於抚绥素所亲信玄冬之首当至彼方必能大布风化永清麾管仍令尚书比部员外郎莫藏用往岭南宣慰问以疾苦恤其死丧其季康等遇害之家躬自存抚切加贍恤务令得所以慰孤遗其军州有所给聚申明中旨已悬示大信但归附即同平人岂惟复业安居当亦随才命职兼至桂州宣慰应水旱所损或须蠲免宜与观察使商量勉膺朝寄以称朕怀

奉天遣使宣慰诸道诏

古者天子有巡守之义以考国典以观人风在时多虞或所未暇乃命卿士使於四方问人疾苦廉吏善恶苟因所任则如亲临在安平之时得资勤恤当祸乱之际得无省忧朕不敏不明肆於人上抚御失道诚信未孚寇盗烦兴阻兵拒命哀我臣庶?於匪人顾兹田畴鞠为茂草不念柔服遂事徂征徵发甲士万里必至暴露营垒连年不息冒於?刃继以死伤?嫠无依父母废养存者积思家之怨歿者倍异乡之痛又以军资滋大公储不充厚取於人罔率厥典科条虽设诛敛无常农工废弃於生业商贾咨嗟於道路军储日益闕閤日空凋瘵日穷徭赋日甚以财力之有限供求取之无涯暴吏肆威鞭笞督责罄彼黔首控告何依怨气上腾咎徵斯应疫疠荐至水旱相承罪非朕躬谁任其责朕自嗣位逮及六年连兵不解以逾四稔虽本非获已义在济人而事有重劳敢忘咎已皆以朕躬寡昧居安忘危致寇之由实始於此予则不德人亦何辜愧恨积哀痛心疾首昨者改元施令悔往布新将使反侧获安则干戈自弭赋役差减则衆庶就康还定流亡与之休息犹惧思虑不周於庶务诚感未达於遐方一理失中一夫不获则何以谢天遣致人和俾代予言其在良弼宜令门下侍郎同中书门下平章事萧复充山南东西荆南湖南鄂岳江南江西淮南浙西东岭南福建等道宣慰安抚使呜呼往率厥职敬此朕命慰勉征戍劳徕困穷访

其所要察其所弊淹滞必达凶【阙】勿憚幽远而不被无略细微而不恤泊於编氓比屋咸若朕之躬亲股肱惟良则予有赖其诸道将士并准今年正月一日制严备疆界勿使侵扰仍各令本将速具名衔等第上奏悉与甄叙其有殊功劲节越超常伦别条事迹当与优獎百姓每年两税定额外自余徵率一切并停课勉农桑各令安业寇难既定渐率干戈朕当躬先简约庶务节省两税之外亦更减除其诸事缘急切交须处分者即所在节度观察商议裁度处分务合便宜其余利害还日上奏朕当详省以求厥中宣布远迩咸知此意

收复京师遣使宣慰制

朕获承先顾付以大器惧德不类貽列圣羞?躬惕励罔敢暇逸将欲立法一致和平小信未孚羣心遂阻理化乖当百度失中君臣之间鬱堙不达致寇虽深於罪已兴戎犹昧於省躬期静乱以济人反劳师而黷武行者被伤杀之苦居者重齎送之勤四海骚然靡有宁处京輦之下杼柚亦空环列之中遣戍殫尽略内而勤远安居而忘危贼臣诱奸乘间窃发豺狼秽於宫阙士庶?於涂炭作威以毒仇视我人万姓嗃嗃呼天无告有殒踣以抗节有胁从以俟命且一夫不获辜实在予予以君临万邦作人父母既才谢克复育非仁义从而咎之其心愧悚一食三叹退舍内讼介於梁岷庶乎有瘳以答譴戒皇天悔祸宗社降灵腹心爪牙奋谟宣力元恶稔慝脱身遁逃余党归诚率衆来附敛沴氛而辟闔闔剪鲸鲵以清郊原函夏再宁室家相庆非将相夹辅王室卿士交修予违军旅叶心毕命尽敌岂伊寡昧克复兴运戡定大难载感予怀宜令吏部侍郎班宏充上都宣慰使劳问将士抚绥蒸黎招集流亡安慰反侧朕续当整驾?日还京告谢於祖宗请罪於天地策勲行赏以报忠良明宣所怀咸使知悉

安抚淮西归顺将士勅

勅李希烈首乱淮渚又侵荣汴凶威之所及罔不胁从百姓既罹於网罗将士兼质其家口哀

我衆庶厄冤莫伸虽欲归降何由自达朕为人父母不克保安遂使忠良横遭胁污兴言及此
悯悼载深自余胁从一切不问如能去逆效顺因事建功明设科条以示褒劝其有以一州降
者便授刺史封异姓王实封五百户以一县降者便授县令封郡公赐实封二百户以万人以
上降者授刺史封国公赐食邑三百邑其余各以功效节级甄升列爵建官以俟能者朗然明
信朕不食言宣示远人各令知悉

处分淮西赦

勅乃者希烈乱常阻兵窃号污胁士衆残虐蒸黎朕志在好生诚深罪已为人忍耻不忍加兵
惟兹一军代着忠节果殲元恶不替旧勲询於衆情请拜戎帅人亦劳止期於小康屡乖恤下
之方重致丧身之祸由朕薄德俾人不宁抚此万邦且愧且悼犹赖将校士旅秉其诚心邦人
不惊军部无挠以此节効良有可嘉所宜慰安俾洽寛泽应将士吏人承前所有罪犯无轻重
一切释放旷然昭洗咸与更新其先受庄宅财物等各以见管为主将士衣粮并家口粮等一
例并准旧例以时给付不得停减先令优与赏叙亦准元勅处分务令丰厚以称朕怀仍如晓
谕各令知悉

建中四年伐两河叛帅劳慰本道百姓勅

勅朕嗣守大业於今五年承祖宗之威烈受明灵之耿命何尝不损已求瘼视人如伤思徭
赋以康邦俗纳羣生於壽域跻大化於升平而德固虚薄志不昭感叛人未附戎马方殷在予
之责鉴寐多惧自两河背叛凶逆相因杀害无辜窃盗城邑摇荡我边鄙荐食我黎元劳我师
徒费我征赋累更时岁未克底宁朕子育万人务康暴乱弃其细故待以初诚申之以大信示
之以好恶将冀迷乃知复困则能通亦欲先德後刑有征无战不劳师旅以致和平而包藏乎
祸心自相构衅侮慢朝旨偷恤甲兵去顺効逆曾无悛志谓天可罔谓责可逃缓之则为患益
深逼之则违命不顺挟藏诈匿诡毒万端陷此忠良申雪无路朕为人父母实所痛心岂可忍
此奸回为之覆焘是以大整师旅肃尔天诛载清?县以息黎庶事不得已而至於斯顷以军兴
飞挽相次军供之费馈运之勤屡扰农商或擅其利州县征赋重及疲人朕心在止戈日冀蠲
复先志未就後虑继之徵责既加名目犹广百姓私养无以自贍惟是夙夜不遑晏宁岂不知
耕织之艰难转输之劳苦每一念至载深忧吁上玄垂佑烈祖降灵凭将帅之谋股肱之力
俾我一戎永清四海则颁赋名目悉停两税定数亦各减放以便万姓咸与昭苏各委节度观
察刺史县令所在郡邑明加晓谕使知予意朕鬱於大道远还未臻必假人力以清多难宣布
中外咸使闻知

贞元元年八月慰抚平卢军先在淮西将士勅

勅淮宁军将士等顷自平卢来越赴国难涉溟海不测之险灭凶贼作乱之徒其後分镇淮西
防秋壠上奉我王事久着勲劳或耆老见存或子弟相继举其诚効并是勲臣顷被李希烈胁
从无路申雪永言勲旧实可悯伤迺者已勅诸军不加征伐冀能相率归保功名副我念旧之
心成其自新之节其陷在淮西将士应有亲族在节度观察使及刺史县令等切使安存使皆

得所如有在宅店舖奴婢六畜产业等各任如旧不得辄有侵扰如全家没在淮西更无亲族为主者即官为检校待当主复即时检付仍分明布告咸使知之

遣使宣抚水灾州军

朕以薄德托於人上励精庶政思致雍熙而诚不动天政或多失陰气作沴暴雨洊臻自江淮而及荆襄历宋亳而施河朔其间郡邑遇有水灾城郭多伤公私为害坏损田舍次及田苗或亲戚之漂沦或资产之沉溺为之父母所不忍闻兴言疚怀良深惻悯夙夜祇畏悼於厥心是用寢不获安食而忘味时宜賑恤庶洽幽明宜令中书舍人奚陟往江陵襄郢随鄂申光蔡等州左庶子姚济梧往陈许宋亳徐泗等州秘书少监雷成往恒冀德棣深赵等州京兆少尹韦武往扬楚庐壽徐润苏常湖等州百姓因水不能自存者悉宣慰使以賑给死者各随物故所在官为收敛埋瘞其田苗所损委宣抚使与所在长吏具奏於戏一夫不获一物失所刑罚不中赋敛不均皆可以失陰阳之和致水旱之沴其系囚及狱讼久未决者所在长吏即与决之务从寬简俾无冤滞贪官暴吏倚法害公特加懲肃用明典宪灾伤之後切在抚绥咨尔方镇之臣洎予守宰宜悉乃心力以恤凶灾宣布中外咸使知之

令潘孟阳宣慰江淮诏

理天下者先修其国国命之重寄在方镇共理宜人列城为政系乎属县然则匹夫之耕匹妇之织积微成着以供国用永念蒸庶厥惟艰哉顷年以江淮租赋爰及榷税委在藩服使其平均太上皇君临之初务从省便遂令使府归在中朝或恐巡院既多职因交替新制未立旧目已紊况汴河而东濒海之右多名都奥壤疆理接连如或征赋不均徵输难济物轻货重法弊人劳又闻江淮数道比???时雨深忧黎庶之不足军国之阙供政有所不宜事有所未便宰政有课绩官吏有否臧爰选使臣申我休命宜令度支及诸道盐铁转运副使户部侍郎兼御史大夫潘孟阳专往宣慰谕安疲甿询访便宜蠲除疾苦安人利国称朕意焉

唐大诏令集卷一百十六

卷一百十七

钦定四库全书

唐大诏令集卷一百十七

宋 宋敏求 编

政事

慰抚下

宣慰魏博诏

宣慰镇州诏

宣慰幽州诏

遣使宣抚诸道诏

为将漳王事安抚中外勅

令李践方充西州宣抚使勅

遣使宣慰诸道诏

命李回宣慰幽镇等道勅

遣使宣慰安南邕管勅

遣使宣慰徐宿二州勅

安恤天下德音

宣抚东都官吏勅

遣使宣慰蕲黄等州勅

慰抚下

宣慰魏博诏

奉君亲竭忠孝人伦之大端也贤智所以尽心赏功劳懋名节国家之急务也皇王所以致理朕嗣服丕业恭临万邦每念政之未孚化有不暨忧惕惟励载勤於怀常以为宵旰稟灵皆思向善亦在甄明抚导推示至诚树绩必使其先扬罹患必图其安缉永言及此终食岂忘魏博大藩东夏作屏军戎勇於见义黎庶怀於有仁自中原始兵革之虞河朔为用武之地抱才器者或思忠而尽力申节効者果因事而彰明时将大宁斯获予志昨者季安薨谢其子幼童奸邪凭依妄肆威福一境危栗惧致覆亡比屋凋伤疲於杼柚田兴仗义奋发剪去憺人大安方隅屡献忠恳达三军奉上之志激千里望阙之诚誓遵典彝丕变旧俗忠谏指切感於朕心是用特授旌旄俾靖封略言念将士同德叶谋守正如金石之坚凌寒挺松柏之操垂令名於不朽示臣节於将来清风载扬丹款可鉴嘉尚叹息劳於寢兴赏不踰时式示旌劝其管内百姓等身劳耕稼力竭征徭念切於怀用当忧悯宜令司封郎中知制诰裴度往魏博宣慰亲谕朕意仍赐钱一百五十万贯以河陰院诸道合进内库绫绢絁等支送充赏给将士及六州县百姓差科宜给复一年使之苏息州县之中或有残破偏甚者委田兴逐一便宜处分朕以布泽之时务从人欲好生之德期洽衆心魏博管内宜赦见禁囚徒其与叶心立功大将及判官等委田兴具名衔闻奏当有甄昇如有父母在别加优恤当道从前已来官吏将校等或忠义可嘉而刑戮滥及如有此色委田兴条録闻奏当加赠如有家口见存宜厚加优恤管内高年者或天宝遗人夙沾皇化或孤独废疾不能自存田兴差官存问仍量给粟帛管内有清勤奉职为衆所知者田兴具事疏奏闻当加进改如身在丘园行义素着或才兼文武名节可称亦委田兴具名闻奏赠太尉季安姻戚旧臣尝任将相饰终之典宜示优崇其葬事委田兴差官勾当礼物之间务从周厚田怀谏在疚之初政出羣小因致军府骚然不宁以其幼年不问保善念功惟恐不及恤人厚下惟恐不丰庶乎大治雍熙遂橐弓矢为仁由已其道信然树德务滋在乎终始凡百多士宜悉朕怀

宣慰镇州诏

朕闻帝王之宅定四海子育羣生如天无不覆如日无不烛其发号施令也如风其行庆布惠也如雨故能上符天道下感人心朕自嗣守宝图将欲恢宏王略常惧化有所未至思有所不周乃冀方初丧戎帅念乎三军之士泊乎四州之人或怀志积诚而思用莫展或灾荒兵役而望恤何阶今则昌运一开忠诚着效王承元首陈章疏愿赴阙庭思父兄之名固君臣之义已加殊獎别委重藩又念成德军将士等叶心向义丹款载申方欲効其器能各宜列於爵秩大将史重归牛元翼等已并超授荣宠令更都加厚普示深恩兼以四州贫下百姓当敷賑贍之惠俾识含育之仁宜令谏议大夫郑覃往镇州宣慰亲谕朕意仍共赐钱一百万贯以内库及户部见在正段支送充赏给将士兼代四州贫下差科州县之中有残破甚者委弘正量便宜优恤务令存济朕又以王泽所洽大纲方收宥过释冤与人休泰其管内见禁囚徒罪无轻重并宜赦免其大将等虽已颁赐官爵或虑有遗并判官等宜委弘正具名衔闻奏如或父母在者别具上闻当加优恤当道从前已来官吏将校等或忠义可嘉而刑戮滥及如有此色亦条

錄奏聞當加追贈如子孫見在厚加優恤仍具奏聞四州之內有高年惇獨或承平遺老夙觀皇風或孤独廢疾不能自存者差官就問量給粟帛四州之內有奉職清勤惠及百姓者具事迹聞奏當量加進改如有隱居山谷退在丘園行義素高名節可尚或才兼文武卓然可獎者具名荐聞朕以武俊之勲勞光於彝鼎士真之恭恪繼被節旄承宗感恩亦克立効永言十代之宥俾錫一門之榮承宗兄弟并已授官爵如或未盡沾及亦當具聞奏其承宗葬事亦差官勾當禮物之間務令周厚嗚呼錄其遺忠延乎後嗣旌其衆善被於一方國有美財不愆於恤隱朝有好爵無愛於賞功庶使八表大同五兵永戢宣示中外宜體朕懷

宣慰幽州詔

昔我玄宗明皇帝得姚元崇宋璟使之鋪陳大法以和神人而又益之以張說蘇頌嘉貞九齡之徒皆能始終彌縫不失紀律四十年間海內滋殖風俗謹朴君臣和平人無爭端卿大夫無以贓罪鞠人於聖代矣況伺察乎由是網漏吞舟視盜不謹寇羯乘衅?為氛妖天下持兵垂七十載朕顧眇末獲承祖宗分不得見四方無姑息之臣而九有復昇平之境矣上帝念我賚予忠賢盡獻提封恢纘舊服使遼陽八州之衆重觀開元之儀者時予侍中總之力也名藩重位予何愛焉劉總已極上台仍移重鎮兄弟子侄各授官榮大將賓寮亦宜超擢百姓等給復一年宜賜軍士錢一百万貫以內庫錢充仍令宣慰使給事中薛存慶親諭朝旨與節度使丞相弘靖計會大將判官甄獎未及有父母在者并具名列上郡縣中有殘破甚者量便宜優恤平時旧老始見胡塵重觀朝儀得無淒拚遐想抚其兒稚自此免於兵鋒言念於茲用加優給管內有高年惇獨或廢疾不能自存者委弘靖差官就問量給粟帛管內州縣官吏有奉職清勤惠及百姓委弘靖具事聞奏當與量加進改燕趙之間古多奇士隗台如在代不乏賢如有隱山谷退丘園行義素高名節可尚或才兼文武卓然可獎者其委弘靖具名荐聞於戲古人云安不忘危魏徵對太宗以守成之不易茲朕小子亦又何知而鎮冀克和幽燕復古栗栗夙夜不遑荒寧實惟祖宗之休尚賴股肱之力咨爾輔弼至於方岳爾當勉於姚宋之功予無忘於天寶之戒宣示中外宜體朕懷

遣使宣撫諸道詔

朕纂承寶位司牧黎元夕惕朝乾期於康乂一夫不獲實疚於懷如聞淮南等道歉旱頗甚比頻救接尚未底寧言念流庸豈忘宵旰又慮災荒之際賦斂以興不有矜寬能無重困故令宣撫俾克慰安令殿中侍御史盧貞往浙東浙西道殿中侍御史李行修往江南宣歙等道安撫其淮南管內減放今年夏稅錢二十万貫文浙西道七万貫文浙東道二万貫文宣歙道一十万貫文并委宣撫使與所在長吏計議量管內諸道州縣災歉重輕於上供及留使州內均減作等級蠲放其應令徵者亦須優容立限與長吏商量度其分具數條奏其四道管內州縣刑獄并令疎理以絕冤滯如有枉濫官吏不能奉法貪冒奇慘令百姓由此不安者察訪以聞仍審以觀察使已下商量據所在事宜利病務於綏葺苟有利於人者便施行訖聞奏又訪聞江淮諸道富商大賈并諸寺觀廣占良田多滯積貯坐求善價莫救貧人致令閭里之間翔貴轉甚夫哀多益寡着在格言周急勸分亦惟善政應早歉處州縣有富商大賈及諸寺觀貯蓄斛?委所在官吏切加曉諭速令減價出糶者如不出糶即令貸借量取利各立文記至秋熟後勒

填还其商贾及寺观亦宜安住不得因兹妄有搅扰所有斛斗纵是盐商亦令准例出棗所放人户徵科远定分数书时榜州县令早知委用安其心

为将漳王事安抚中外勅

朕以菲德奉兹丕构虽?恭修已不敢暇逸而诚亮格物未能弘敷遂使奸凶怀非觊之端藩戚?无君之责外珪宰臣傍连禁吏怵惕自咎中宵靡宁亲临鞠讯改寘刑典顾惟大义实愧御家犹虑险狡之徒忿怨相冒遂至诬引或连非辜载怀惕戒宜谕深旨应缘漳王及宋申锡被论告事除今月六日已前准勅旨处分并捕捉王师文一人余并一切不问宣示中外用体朕怀

令李践方充西州宣抚使勅

盖天人之际相应如响祥祲之来各惟厥事乃者兵革始罢黎庶甫宁而蜀土载罹震惊方务绥辑今又水潦为沴沉溺实多载省奏章益深軫虑谅以朕泽不逮下诚无感通五事致咎此方何罪夙夜兢愧悯叹良深宜令户部郎中李践方充西川宣抚使应遭水人户委与本道观察使计会各量税额所漂损多少等第分数蠲放今年夏秋税钱及租子等如上常平义仓有斛斗处亦委德裕遵古开仓赈恤更量加优当使得生聚禁察苛暴存安老疲以副忧属称朕意焉

遣使宣慰诸道诏

大河而南幅 千里楚泽之北绵亘数州近以水复暴至堤防溃溢既坏庐舍复损田苗言念黎元罹此灾沴或生业荡尽或农收索然困馁凋残岂能自济是用忧灼疚於中怀今故遣使臣详问疾苦纾其垫溺之苦申以劳徠之方勉谕师徒安存孤老将我惠泽冀苏疲人宜令给事中卢弘宣往许郑滑郢曹濮等道宣慰於戏朕自君临励精求理常恐一物失所每以万物为心诚无感通时有灾害夙夜愧悼不知所以宣示藩方喻兹诏命使寛其徭役禁其侵渔多方葺绥俾速完复布告毗庶知朕意焉

命李回宣慰幽镇魏等道勅

勅成德魏博皆出甲兵俯临贼境秋气已至攻取是时元逵弘敬制胜伐谋必有成筭固须命使远访嘉猷又回鹘虽已遁逃尚存余烬今朔风始劲寒草具腓犹未革臬音敢怀狼顾迫於饥窘侵扰边城仲武久欲荡除俾无噍类成其志业壮彼威声亦在使臣往谕朕意各宜奋励早建殊功解甲劳旋免及祁寒之候止戈除患庶臻仁壽之期咨尔帅臣副予委遇宜令刑部侍郎兼御史中丞李回充幽州镇魏等道宣慰使【会昌三年】

遣使宣慰安南邕管勅

勅四海九州莫非吾之赤子念兹远俗尤用軫怀如闻日南自郭细为乱之後溪洞频有不安

郎宁去岁已来屡为南蛮侵轶远思裔俗载想疲黎有枉莫伸无辜受戮者多矣想思朝廷之吊问若大旱之望膏泽也是用特诏执事聿求使臣内外通班文武多士爰择敏达副吾选求银青光禄大夫检校太子宾客兼右千牛卫大将军侍御史上柱国宋涯早列和门夙通军志公忠有素文武是经信义彰美於禁营政绩茂宣於汾隴吾所求者尔其人乎昔司马相如奉汉廷之命通西南夷路飞檄晓谕不劳师征夜郎牂牁等皆生梗之俗犹能永奉汉法於今称之而况安南邕管皆吾藩方虽远朝廷咸遵法理尔其将我悯怜之意深访疾苦之源贫者抚之富者利之老者安之少者怀之尽尔公廉究兹利病因宜制变临事合权能安远方克致宁谧岂无崇秩以獎勤劳俾增石室之荣以盛轺车之贵无憚遐役伫立厥功可守本官兼御史中丞充安南邕管等道宣慰使【大中十一年四月】

遣使宣慰徐宿二州勅

勅徐宿二州将士百姓等去岁徐州戍卒专擅回戈杀戮都头剽夺器仗当时远近言论朝廷便欲诛锄朕以好生为心怀土可恕不令究诘但任归还将及本州又自疑阻复兴悖乱遽恣猖狂因辱廉使监军害我小使大将邀求符节专挠城池朕再三招怀丁宁慰谕后自新之路垂宥过之言奸计逾坚慢辞弥犯涂炭百姓虐毒四封近年已来剧贼无比爰思止杀乃命兴戎稽缓灵诛殆将周岁然则凶党之外平人甚多皆被胁从遭其驱使每闻胜捷倍所叹伤今既底宁专令宣抚申绥柔之令委使臣除弊利人蠲税节用军士衣赐俾其计量种麦是时已令给恤仍遣临时裁度唯务便安皆负周才以展良术军人百姓罹此横祸灾数致然勉於营生安兹乐土其余事件并在德音指挥使臣专临重此颁述今遣左散骑常侍刘异兵部郎中薛崇宣慰想宜知悉【咸通十年十月】

安恤天下德音

自累年已来四方多故虽已宁谧尚切防虞居安不忘於虑危有备可期於无患况海隅封略犹集戎兵天下租庸半资军食而又徐泗战争之地疮痍仅平江淮灾沴之乡流亡未占遂使物力凋耗人情艰危言念蒸黎良深悯惻朕临宝位十有四年忧勤无一日之安怵惕居兆人之上绍先王之遗训守列圣之丕图所以未明求衣分夜方寝静思致理罔敢怠荒顾臣寮而委以腹心视寰宇而同於掌握管弦娱乐不劳於万几稼穡艰难每临於千亩今又物惟丰茂岁获顺成宜弘覆焘之恩用作生灵之福应诸道州府军人百姓委所在长吏各承诏旨切务慰安疮痍仅平者尤在抚绥流亡未占者倚深招谕物力凋耗之处速致安全人情艰危之时无更侵扰远年逋欠且缓併徵近日归还勿更加税劝农重谷以备饥荒训卒练兵用防寇盗但躬行俭约政不烦苛省宴乐则务贍军须絶饷遗则尽资公用渐使疲羸苏息帑藏充盈减朕之忧勤宽朕之怵惕虽臣子之分必竭其忠诚而君父之心宁忘其诫励我有爵赏以训有劳我有宪令以惩不一凡在方镇岳牧邑宰僚佐各扬尔职克副予怀【咸通十四年六月】

宣抚东都官吏勅

勅东都留守王溥河南尹刘充章及分司御史官僚皇城将吏府县官僧道耆寿百姓等朕端

居上京默念东洛常恐宗庙不得严肃宫阙或至萧条省寺荒凉井廩凋耗府县有疲羸之苦郊原貽蝗旱之灾虽銮辂翠华末期巡幸而临轩负扆常注忧勤昨者草寇凭凌王师讨伐勤劳车甲绵历星霜巡环於十二郡间涂炭於数千里内方闻剪灭又致猖狂王仙芝等纵胁生灵联攻县邑才收阳翟又破郡城不日复汝州兼掳郡守监军使凶党既盛人心易摇寻闻洛邑震惊都城纷扰旧相护几筵回避羣官絜妻子奔逃工商失业以无依黎庶舍家而竟出朕每闻奏报弥切惊忧心如纳隍手若驭索便罢重阳内宴以示焦怛之怀而宗社降灵神祇助顺寻闻寇盗不敢侵踰吹燎火以南旋却洪波於北注今则官兵渐集王室顿安公卿可以还旧居闾巷足得复生业况闻秋田大稔物价稍低虽蹙履於艰危必终成於康济今差左谏议大夫扬授工部员外郎李巢专往宣慰凡居长吏官僚等切在条理安存必令减节征徭均平赋税无使虐吏重困疲人诸道师徒多已屯集累勅有司官吏不令供馈阙遗亦委使臣劳谕将卒专俟凯旋之日当行庆赐之恩【乾符三年九月】

遣使宣慰蕲黄等州勅

君后惻隐之心必先於济物朝廷发生之泽本务於吊人纳隍虽軫於四维灭燎尚延於数月朕每念愁毒良增震嗟王仙芝尚君长等迹自椎埋结成啸聚呼泽而豺狼相应掠地而鸡犬无遗是以所寇州城便为荆棘黔首尽逃於山谷遗骸欲遍於丘墟皆由时平不务於构兵岁久遂至於忘战以至望风丧败迎刃殲夷县道皆空人灵胥怨叹凶徒之未服念赤子之无辜盖朕诚信未能感昭慰晓莫能通达须渐资於完复俾稍慰於流离爰命腹心往询疾苦今故遣国子司业李夷遇将我惠渥恤彼荒残拯涂炭之沈沦解疮痍之呻痛应汝随申安蕲黄等州凡经王仙芝尚君长所攻劫处悉加抚育遍问存亡其有已归复人户仰所在州县各酌量遭罹重轻减放租税其今年并至来年春季内所有差役并宜放免其田苗如经军马践踏兼人户有战阵死亡者全与放免其有衣冠士族乱兵横罹杀戮者仰於属省钱内量给衣衾构槨速与葬送并为设祭慰其营魂衆暴骨遗骸委在城郭郊野无亲故收认者宜作大塚以瘞之将校常主牙旗新曾加战折股断臂解脰陷胷进不念身誓思报国亡歿者当与褒赠见在者终身不停衣粮仍令本州县官吏遇难不挠临危向公枉陷兵锋合嘉名节仰所在録名奏闻当与追赠其有道路邮馆之所传递警急之时或驿吏惊奔贼徒焚爇仰宣慰使量所在物力重为经营冀备追风免妨乘駟其衣冠将吏军人百姓遭焚劫甚者委州县审细检勘以义仓斛賑救且令粗济饥危所在府库困仓亦有不经劫盗或恐奸吏乾没隐欺切仰勘验虚实分析申奏其有留州留使钱物皆是十月已秋赋之初须仗循良渐自收敛节其横费酌彼军须讲於耕战之余用济公私之急其须添器械更峻城隍犹防乌合之徒重有鲸冲之势推我隐忧之意俾观急病之能况十室之中必有忠信数郡之内渐复人烟所宜牙佩韦弦重张琴瑟全由良吏善抚疲人应有缓急之间便宜所切州县之利病奏请之未行仰宣慰使与所在刺史县令细详事由逐件闻奏兼期知我万机之重俟黎元而共安九重之深愿风俗而同泰委是将命以布朕心【乾符四年九月】

唐大诏令集卷一百十七

卷一百十八

钦定四库全书

唐大诏令集卷一百十八

宋 宋敏求 编

政事

招谕

遣裴敦复往江东招讨海贼勅

谕西京逆官勅

招谕仆固怀恩诏

招谕金商邓州界逃亡官健制

谕泾州将士诏

谕梁崇义诏

招谕朱滔诏

招谕河中李怀光诏

诏谕河中勅

招谕淮西将吏诏

授王武俊司徒李抱真司空制

讨李希烈不许诸军侵抄诏

招谕讨刘辟诏

招谕剑南诸州诏

招谕蔡州诏

讨王承宗招谕勅

讨镇州禁侵掠诏

招谕王庭凑诏

令镇州行营兵马各守疆界诏

招谕

遣裴敦复往江东招讨海贼勅

勅近闻江东少有寇盗多因诖误或被胁从辄聚萑蒲遂为草窃固当自毙岂足在怀犹虑郡县遐远江山阻濶百姓之间妄有惊扰河南尹裴敦复频更委任夙着高名必能慰谕毗俗肃清奸宄安人禁暴实仁良图宜掇御史大夫仍持节即往江南东道宣抚百姓并招谕海贼仍便处置回日奏闻

喻西京逆官勅 贾至

勅西京应被逆贼安禄山胁从官张通儒田乾真邓李阳安神威及诸官吏等咸听朕命我国国家统天立极奄有四海百四十载於兹矣缉唐虞之旧政恢周汉之鸿业蛮夷戎狄罔不敬从山川鬼神罔不祇肃鸟兽鱼鼈罔不宁阜五圣之德洽於人心中推精诚以御下和平致理垂五十载而禄山贱?大逆负恩以羶臊犬羊之士受节制熊黑之寄潜图悖乱诱逛奚羯盗我府库窃我朱紫偷我甲兵假我威力而锡与我将士駟役我边人胁惑三军举兵向阙载籍已来恶逆?悖未有如禄山之甚也夫国家屯厄自古有焉夏有夷羿之灾而少康克复周有大戎之难而宣王中兴汉有猾莽之衅而光武底定盖厄运数时也亦天将稔凶族之恶延国祚之意哉朕今亲搃六师次於岐下使郭子仪领朔方精骑三万步卒五千并回纥兵二万人使王思礼领安西北庭河陇马步五万合其势东收长安冯翊平阳河东绛郡一麾已拔不劳血刃又令刘正臣领平卢精兵连奚契丹南收范阳又令李光弼程千里领马步七万出太行收河洛人百其勇华夷一心指期克日扫荡区宇卿等或累叶崇勲或清时良吏乃祖乃父忠贞本朝一朝苍黄遇胁狂寇想皆被诖误应非本心退为兵刃所临遁有妻孥之累□俛受死逼迫畏威权从贼命遂失臣节便复惶恐归顺无由朕深察之可以言恕且为不善於昭明之中者人得而诛之为不善於幽暗之中者鬼得而诛之天道固然神不可罔自昔作乱首祸孰有不诛夷灭戮者哉卿等宜审鉴是非自图成败翻然改过转祸为福或率徒侣归顺或以一身来投官军皆舍其罪如能转杀逆党兼以兵降当加厚锡非止免戾尔无反侧朕

不食言今故使人持诏往谕去就之计即宜报来无杀使臣以厚尔过若须達表疏亦别遣行人朕必全之却令报去春秋有反经之义吉凶之势在於斯须【至德二年】

招谕仆固怀恩诏

佐命之臣自天所授纳於将相委以腹心休戚实同始终无易太保兼中书令灵州大都督府长史单于镇北副大都护充朔方节度关内支度营田盐池押诸蕃部落副大使知节度事六城水运使兼河中副元帅上柱国大宁郡王怀恩朕之元辅上帝赉予道备五才能包三杰长策制敌精诚感神夙奉先朝志平多难授旗朔野扈跸岐山前驅启行所指皆剋收关河之襟带复都邑之衣冠以义断恩毁家殉国躬擐甲胃駢驰十年遇战则酣逢坚必脆摠统戎旅通和夷狄决策东向殲厥渠魁扫清氛莩薙薶道梗海隅万里一举荡平遂欲息马投戈坐而论道当朝大政并以咨之听载赓之歌为千古之式移军汾上方欲凯旋疑隙之端构於羣小浮言初起且以强大自嫌邪说又生或谓功高不赏以兹淹恤因有沈猜抚之若惊喻之未解朕以白日旌信明神鉴心若有负功臣是大欺天下为人君者岂有此乎寻闻聚族而谋知欲垂囊入覲其子瑒犹怀反仄更有迁延少年轻佻操履非正私庭跋扈违背君亲朔方义师心如父子怒其怀贰遂共梟悬凶子既诛大军方扰苍黄奔窜远在边州察其深衷本无他志盖缘忧惧渐及於斯眷念之心无忘鉴寐况勲书盟府像列云台録功念劳岂以小而累大君臣之义情实如初厚禄荣班固宜仍旧但以河北诸将自竭义诚朔方三军已有管属不可更置统领复为节制其前任灵州大都督府长史单于镇北副大都护及河北副元帅朔方节度使宜并停其太保兼中书令上柱国大宁郡王并如故但当诣阙更亦不疑再三言提庶早牵复欲令方寸悬示万邦尔无我虞朕言不爽久劳於外必无成功收之桑榆殊未为晚甘言之诱王者不为危而悔之何嗟及矣切令宣示远副朕怀

招谕金商邓州界逃亡官健制

勅军兴十年征戍未息御侮之士服劳干戈各着戎勲岂忘臣节或统隶之处失於抚循致令离遏军麾播迁山谷言念於此怆然伤怀金商及邓州界逃亡官健等往以数州之间道路氛梗哀我将校属当寇虞战守之功始终可録诚宜自爱共保令名岂赏罚所加或非适中而资粮不给由此无聊遽至流亡因相结聚窜身重险求活草中迫以困穷焉能自固既非义取又惧刑章岂不怀归良有以也且君示人以信必有推诚臣事上以忠莫如迁善悦翻然相率敛衽而来自合弃瑕况其无过朕当舍而不问咸与惟新智者见於未萌古人重其改往邇相勗勉早决良图仍委刺史县令自齎诏书亲至山谷分明谕旨一一招携所有怀附切加慰纳问其所欲各使便安若愿归田农当恤生业如请入军伍亦听食粮务令悦从以洽朝化宣示将士知朕意焉

谕泾州将士诏 杨炎

告泾州将士等朕自临?县体道未弘施政未洽顷以原州在西郊内地密迩王畿而夷狄往来於焉畜牧戎心既启边事益劳所以议筑其城将为久计不能远徼夫役遂使近借军人故命

賫四十日粮拟令事毕即放朕卒然改易军使不及与将校商量而狂谬之流扇动生变遂令尔一州士衆狼狽失图在予阙询谋之义俾尔陷反侧之党而事不得已至於用兵既有攻围颇有伤杀哀我将士忽为寇讎静言思之孰甚兹痛是以夙夜軫念思宥其辜况尔等服劳王家积有年岁肃宗因尔以正天下代宗因尔以安封域备历艰险莫非诚効朕方倚尔为股肱之卫视尔如父子之军岂谓事起苍黄变善成恶今重围已令诸道悉会欲引泾水以灌州城念尔一城之人亡命相守城陷就戮岂可求生朕是用隐然疚心益加悯悼况吐蕃和使见在阙下回纥可汗来受册命积年外患今既底宁伊尔小失理宜容贷今既遣命官特赦尔罪自闻喜之下一无所问尔欲求之戎狄予不汝违欲散入诸军亦惟尔志衣粮之不备者并令资给道路之不达者亦令导送亡者勿得追捕来者厚加礼接朕方责已悔往示大信於天下终不罔尔将士而为诱诈予言不信天实弃予呜呼朕子育黎元因其得所而令尔一州士衆进不获尽忠於国退不获自保其家围守之中败亡是惧将何昭宣大号抚柔夷夏朕之自咎天監於衷尔尚听予之言无惑兹训【建中元年】

谕梁崇义诏 杨炎

勅朕闻君臣之分义固金石将相之职任同安危在昔哲王罔不注意体合股肱则付之以大位道睽终始则载之以丹书所以保亲诸侯弘树一德者也朕自纂统於兹三载兢兢业业日慎一日任夫难任安夫难安实赖公侯藩辅作镇於外将帅戎士尽瘁勤王冀忠贤之同德跻亿兆於仁壽思达寤寐动推至诚大开胷怀彰示天下虽奸邪不逞构造异端离间往来反白作黑下动危疑之势上陈似是之言焚其表章前後数四未尝不寘以极法甯於穷荒庶夫谗谀杜口谣妄卷迹中外上下俱臻太和岂止同体之不疑万方之知我而已金紫光禄大夫检校刑部尚书襄州刺史山南东道节度使梁崇义往以邦家不宁襄汉未静奋自诸将累建戎勲忠谋壹一保大安衆授钺南纪表正江山勤辑士人克谨侯度惠化周洽俗阜风移踰二十年绩用光备内修贡职首课方州朕夙茂勲德用崇爵命而忠规益励亟请来朝期启乃心以成吾事寻以郭晞郑茂勲郑和叔等奸谋参会庸狡妄作朕虽听断无惑寘以严科犹闻疑贰不安外求援助是何颠沛以举谓我齷齪而今怆然怀想深用叹惜夫禹汤前古之圣后也一夫不获有纳隍之惧齐桓霸者之中人也举讎弃怨致九合之功朕上而为君子有万国涉道日浅诚明未敷使心腹耳目之臣负义怀忠之士坐相猜阻交质往来构此异端顿亏大节顷亦频遣将命谕达至情近得章奏犹云隔在恩外言之有犯岂为是乎终用咎悔永思更始今予命尔检校户部尚书同中书门下平章事余并如故兼赐以铁券其勲庸期於永终与国无极是表至公之举用昭勿贰之怀呜呼其敬之哉无再听邪说无外蓄私心唯臣道是固惟图章是守天命可畏敬顺予言其管内诸将三军官健久勤征镇咸着忠劳数年已来未更叙録比类诸道实合甄收其大将委中书门下即条件进拟自余委本使一月内具名闻奏仍令殿中侍御史张着与使孟游仙同往宣谕布告军府令悉朕怀

招谕朱滔诏

朱滔受任蓟门累着诚绩委遇既重禄秩亦崇臣节中亏自贻伊阻泊贼泚构乱僭窃上京弟兄之亲在法无舍朕以罪不相及情有可原待以如初之诚广其自新之路执迷不复固败是

求蹙丧而归既困方悟累献款疏深陈恳诚省之惻然良用悯叹虽将相嫉恶之志固所难容以君上怀柔之情未忍拒絶且善莫大於改过德莫盛於好生宜令武俊抱真开示大信深加晓谕若诚心益固善迹先彰朕当掩衅録勲与之昭雪宣告衆庶咸使知闻

招谕河中李怀光诏

李怀光往因职任颇着干能朕嗣位之初首加拔擢托为心膂授以旌旄顷岁河朔不宁令往征讨任兼将相恩极宠荣及朱泚狂猖诱奸作乱扰动京邑逼迫奉天怀光率领全军奔赴国难凶逆逃遁宗社再宁保安朕躬实有所赖委元帅河中之权兼太尉中书令之秩广增实封赏及宗亲人臣之盛莫与为比岂朕报怀光不崇京邑未收嫌衅已构被朱泚潜使奸人说诱又受张昭等惑乱之给曾不觉知自生疑阻遂与元恶通和往来朕志在推诚事皆掩覆礼遇转厚委任益隆都不悛心稔恶日甚勅书慰问将士怀光并不令宣三军咸欲收城怀光并不令出自云已共朱泚定约并不能更事国家兼朱泚所遣来人见宣慰勅使公言迫胁无复君臣朕以眇身获承鸿业务全大计迁幸山南苍黄之间犹历危险赖朔方等将士保守忠义耻陷恶名不谋同辞誓守臣节怀光知将士之意不可改移径往河中偷安朝夕据其罪迹情实难原然以奉天解围尝着勲烈昨又遣男瓘等谢罪恳请束身归朝朕悯其改过之诚念其赴难之効以功赎罪务在优容令给事中兼御史大夫孔巢父齎先授怀光太子太保勅牒往河中宣慰讫三日内便与怀光同赴上都所在保护不得邀截惊动违者按以军令仍许怀光将百人已下随身防援如欲便令家口同行亦听怀光若到阙庭必保全终始厚加恩宠待之如初仍赐实封五百户子孙承袭代代无絶信如皦日朕不食言朔方军素推忠义国家每有危难未尝不立大功子仪再收京城皆是此军之力昨又远从河北来赴奉天逆贼畏威望风奔遁眷言殊绩朕岂暂忘其军将士人竭忠至诚叶心戮力横遭迫胁无路自申每一念之痛心自咎昔者君臣阻隔只为怀光一人今怀光自请入朝犹舍其罪况诸将并是功臣各宜坦然更勿忧虑所有官爵实封并赐名定难功臣一切如故仍准元勅超五资与改转

招谕河中勅

勅朔方及诸军应在河中绛州朝邑将士等并以义烈继代勲业冠时艰虞已来常济国难肃宗代宗再复京邑皆是朔方将士之功去岁朕在奉天凶党攻逼解围赴急亦赖此军故尝深念爪牙情均骨肉济朕危厄感之岂忘顷以怀光背恩自生猜阻荧惑将士污胁忠良朕频降诏深恻於衷今王师四临即至尅捷将士百姓欵附甚多或弃其乡园或损其家族脱身効节良有可嘉时宜抚绥以獎诚効应令淮西及界内及郑汴等州将士归顺者委所在节度防御等使收管切加存恤优给资粮仍具名衔奏闻当与甄叙并给遣衣赐其百姓从贼界归者亦委所在观察使刺史量以本道本州钱物赈给令得存济如情愿便住者即配死户田产使营生业若欲赴诸州县者随其所之当时给文牒发遣止遏所至之处准备优当率土之滨莫非王臣虽陷寇中谅非获已効顺即是平人务於招绥副朕所恤

招谕淮西将吏勅

勅朕临御已来连兵不息自经播越方历险难耳闻鼙鼓之声目覩杀伤之苦由是觉悟悔於兴师既省已以知非欲人之迁【此下有阙文】即据界首及行营军额分配定数逐便支送仍委本道统节度防御都团练使即条録功第名衔闻奏并与甄叙其行营将士仍各放归本道明加宣谕令悉朕怀

授王武俊司徒李抱真司空制

勅三公之职论道经邦序五行之和任百事之理历代崇重不常厥官天祚皇家茂生才杰比义齐烈同寅協恭以德允台阶之望以勲当井赋之锡聿膺并命式副具瞻开府仪同三司检校司空同中书门下平章事使持节恒州诸军事守恒州刺史成德恒冀深赵等州节度观察处置等使琅琊郡王王武俊秉心沈密临事果断忠而能力勇且有仁奋发之初渠魁即戮危疑之际大节克彰开府仪同三司检校尚书左仆射同中书门下平章事潞州大都督府长史充昭武军泽潞磁邢等州节度观察处置度支营田使上柱国符阳郡王李抱真质重气和内精外朗智穷变化守必以恒克着明诚动有攸利经猷屡告规益弘多皆戮力尽瘁志匡王室陈师鞠旅同讨不庭仗大义而万众叶心体至公而千里同契合军於呼吸之顷决策於指麾之间并轡载驰执俘亲鼓凶徒殄殲河右廓清国家无北顾之忧奸慝沮南侵之计时乃厥功茂焉敷五教以阜人均九土以居衆俾尔更践徧受洪休仍加真食以貽後嗣武俊可检校司徒同中书门下平章事实封五百户余并如故抱真可检校司空同中书门下平章事赐实封五百户余并如故呜呼古人有言唯治乱在庶官矧惟辅臣与国同体明听朕命尔其钦承朕嗣位不明经费尚力可以静暴慢谓刑可以惩奸邪德之不修乱是用长士马疲耗蒸黎流离罪在朕躬谁任其咎自去岁遭变再经播迁历山川之险难知军旅之劳苦惟省前过悔愤盈怀追往事而不及庶後图之可补以九庙为重屈身以百姓为心而不专私欲苟可以保安社稷休息甲兵宏济苍生蠲省徭赋含垢忍耻予无难焉而不憚再三晓谕皆被怀光隐匿兼亦妄有加减朕之诚怀竟未宣布夙夜自愧寢食不安今时属严凝例颁衣赐岂以怀光一人拒命遂令将士并不沾恩朕於功臣义存终始其朔方及诸军应行营河中绛州朝邑将士等令眷冬衣赐并准三月二十一日制缘赴奉天解围功等第给赏钱物等宜令所司并许科别收贮待道通流即当时支遣其归顺者给其将士等先赐实封一切准元勅并配州给牒马燧浑瑊逐分送付令其差人赴彼领受仍明加宣谕招抚务令忠义之士各悉朕意

讨李希烈不许诸军侵抄诏 陆贄

勅李希烈阻兵淮右虐害蒸人朕哀悯无辜横遭胁制若兴师行讨即玉石俱焚所以频下诏书再三开谕曾无悛革但益凭凌忠勇之徒皆思奋击朕悔於征伐务在含容岂以一夫无良遂令万姓罹祸安人忍耻是朕素怀今东作方兴麦秋在近愼行侵掠深害农功一方之人实足矜愍应与淮西接界州县各委本道都督节度防御团练等使申明前勅严设堤防务使农人遂其耕获贼若不先侵軼但自保守封疆勿令越境暴犯田苗及其侵抄务宣朝化以洽远人仍於所在界首明加招谕咸令知悉

招谕讨刘辟诏

劍南西川疆界素定藩鎮守備各有區分頃因元臣薨謝隣境不睦劉辟乃因虛構隙以忿報讎遂勞三軍兼害百姓朕志在含垢道務安人遣使宣諭委以旄鉞如聞道路壅塞未息干戈輕肆攻圍擬圖吞并為臣之體義在勝殘命將興師蓋非獲已宜令山南西道節度使嚴砺領當道土馬與劍南東川節度使李康犄角應接仍令神策行營節度使高崇文領馬步五千人為左軍左右神策京西行營兵馬使李元奕領馬步二千人為攻軍并相續繼發仍仰高崇文等各差人先與嚴砺計會齊進朕以三蜀之人本無過犯征鎮將士各著勲勞迫於威制不能自拔各宜分明曉諭令悉朕懷如劉辟稟奉朝經抽兵却歸本鎮朕務存誠信必當委待如初其効順之誠臨陣歸款高位重賞當不食言如尚執迷自貽覆滅法既無赦令在必行宜一乃心恭守所職其置頓糧料等仍委度支使差官勾當無令缺失

招諭劍南諸州詔

朕聞皇祖玄元之誡曰兵者凶器也不得已而用之恭惟聖謨常所祇服故雖文告有所不至誠信有所未孚姑務安人必能忍耻朕之此志亦可明徵近者德宗皇帝舉柔服之規授宰衡之任弘我廟勝遂康巴庸故得南詔入貢西戎寢患成績始究元臣喪亡劉辟乘此變故坐邀符節朕以枉成命者雖乖於理體從權便者所冀於輯寧竟違卿士之謨遂允僥求之志朕之於辟恩亦弘矣曾不知負牛羊之力飽則逾凶畜梟獍之心馴之益悖誑惑士伍圍迫梓州誘陷戎臣塞絕劍路師徒所至燒掠無遺干紀之辜擢發難數朕為人司牧有彼黎元如辟之罪非朕敢舍是用叶羣率之謀除百姓之害永清妖孽底定一方伐罪吊人於是乎在其逆賊劉辟在身官爵宜并削除今王師鼓行尋濟天險梓潼城守已解攻圍壓卵注蜚坐看撲滅其西川將士如有乘此聲勢翻然改圖梟斬凶魁以效誠節必當特加爵秩高位重賞朕無愛焉其餘將吏等俾能去逆効順以所領歸降者超三資授官以一身降者亦與改轉長行官健歸順者并与叙錄仍加賞給其西川管內刺史等當其阻亂孰克靜柯雖章表未通而哀誠可見今能歸款亦仍舊職如或乘機立効因事建功并特加酬賞務極優厚夫皇王之道吊伐所加義在除殘情非樂戰故脅從罔理必誠於徂征焚溺是哀俾興於僭怨禁暴止亂其在茲乎況有迹凶徒心非黨惡歸我無路遂至淪胥言念斯流尤深軫惻所以明諭將帥罪止渠魁其餘染污一切勿問布告遐迩宜悉朕懷

招諭蔡州詔

勅朕嗣膺寶位於茲十年每推至誠以御方夏庶以仁化臻於太和宵衣旰食意屬於此今淮西一道未達朝經擅自繼襲肆行寇掠將士等迫於受制非是本心遂令此軍若墜淵谷朕每念此為之興懷思去三面之羅庶遵兩限之義故擇慈惠之長授之鄰封俾申朝旨敷我大信山南東道節度管內支度營田觀察處置等使金紫光祿大夫檢校司空使持節襄州諸軍事兼襄州刺史御史大夫上柱國鄭國公食邑三千戶嚴綬信能及物寬以服人道融謙光志尚柔克一登揆務三命齊壇戎機吏術靡不更練必能招懷不類敷我國恩宜授兼申光蔡等州招撫使仍與鄰道將帥等即同紮率共申曉諭其淮西將士官吏等如有歸國仰量其高下便授職任仍具聞奏即起授官爵縱舊有罪犯一无所問吳元濟如束身歸朝亦當棄瑕錄用其百姓有歸投者任便給糧食仍與田宅務加存恤使其安堵待事平之後淮西將士宜共賜錢

二百万贯百姓给复三年诏书所不该者委严绶量其所宜条件闻奏庶尽绥怀之义以申生育之恩若尚敢执迷不能迁善至於问罪自有常刑宜以诚怀使其知悉

讨王承宗招谕勅

勅自古哲王之有天下也惩其暴乱则法所宜加察其情衷则罪有不及故太尉兼中书令武俊忠扶邦国节着艰难览视册书想见风檠而承宗毁弃门户违悖君亲遽肆奸凶自贻讨伐桀盈干纪宁忘武子之勲萧延绍封无废鄴侯之嗣矧忠而见节礼以议贤宜降深恩庶行中典载明樵采之禁兼茂归降之制好生之德俾洽人心止杀之源用孚朕志其王士率士则并宜各守旧官其武俊实封仍特赐士则承袭镇州大将并着茂勲言念其劳每用增叹其有食封者并且依旧不须停给如领兵军将以所领归降者超三资与官赐实封三百户仍赏钱一万贯文其武俊士真松楸坟墓行营诸军并不得辄有毁伐除暴胜残事非获已布德施泽仁岂远乎用彰吊伐之师式示皇王之道宣布内外宜悉衷怀【元和四年十月十七日】

讨镇州禁侵掠勅

勅镇冀管内诸州百姓等莫匪王人皆同赤子盖恋生业遂迫凶威暴赋急征既嗟於无告冒触刃又虑其俱焚言念於兹良深悯恻其应讨镇州诸军所到之处宜先存抚百姓使安其业勿令虏掠伤害以副朕心

招谕王庭凑诏

朕初抚天下实在便安故委同捷节旄处以华壤顾彼童孺岂克当之然蔑弃君亲不宜容覆忠臣义士咸同忿嫉非朕主事致於兴戎廷凑承累朝恩荣据四郡士衆将谓率先问罪以图策勲而乃影援逆寇干犯王旅诸道使命系为累囚内兵沧州抗战四境交支郡之管龠弃邻好之姻亲无恩於家忘义於国而犹特降中使许其转环词旨坚执曾无少悛近者又令宰臣遗书许以効顺王诰一去寂尔无闻朕以成德一军代建勲力聆风拭目待之实殊岂为庭凑一人致使伤及百姓今迫藩臣恳请连章继至宣示羣公卿士参详可否以观衆情义不容殊列状斯在今亦酌其简便以适事机亦以尝在先朝曾効忠欵宠獎逾等骤至三公开其自新以全臣节朕之恩义亦不负矣其诸道与镇州隣接处宜并絶其进奉严加警备其有突犯及随指挥并宜依诏旨处分诸道须有移军出界并不得焚庐舍横加残害归授者抚之拒命者御之如有忠臣义士以一州或城镇降者并依讨沧州例处分其上都进奏院宜令御史台京兆府切加守捉禁其出入待後处分如庭凑翻然改悔乞効忠勲上表陈诚须有闻奏亦委隣界当时转与进止不得停留於戏朕示以帝王至仁以安兆庶以黄老清净用宁寰宇文告屡放而不从兵革在郊而未戢德不能洽诚有未孚致费训词良多愧叹【太和二年八月】

令镇州行营兵马各守疆界诏

圣人之教先德後刑王者之师有征无战朕以寡昧嗣守丕业威不能禁暴叛戢干戈德不能

济生灵完物力以至於起师戎之役陈原野之刑然谓有功固已多愧始者逆贼李同捷统戎专地弄兵恃宠不受文告不服朝廷本贵清静唯务含宏常欲安其反侧匿其瑕秽曾不悔祸是用徂征赖天地降灵中外叶力凶渠就戮沧海甫安我本兴师事止於此言念士衆以及里闾并遭胁从久陷涂炭杀伤之外残瘵可哀已各有獎录及令賑恤王庭湊因缘同捷遂此沈迷及交锋刃益纵豺豕今沧德既已平殄庭湊犹未悛愆合乘兵威使图攻讨然欲更令思省未忍重有伤残又行营诸军久劳於外悯其暴露且议放归其镇州四面行营兵马并宜各归本界且自休息使耕农不废儲峙有常见在者苟获阜安未来者亦将焉往其幽州河东易定齐德昭义魏博等但要保境勿相往来唯庭湊以四郡之地三军之衆率诚归阙翻然効顺则不独弃其旧恶兼亦别议新恩唯此一事与达表章余并勿听信於戏我理天下但恐道化未至不虑寇孽不平若以宗社之灵风教所及四夷八蛮犹当梯山航海慕化而来岂四郡独能拒命夫退修教而降崇不戮人而克敌予之所尚今也其时凡在中外庶僚羣帅宜悉力竭忠尚弼予理【太和年】

唐大诏令集卷一百十八

卷一百十九

<史部,诏令奏议类,诏令之属,唐大诏令集

钦定四库全书

唐大诏令集卷一百十九

宋 宋敏求 编

政事

讨伐上

令秦王讨王世充诏

讨辅公佑诏

亲征安禄山诏

贬田承嗣永州刺史诏

讨李希烈诏

削夺李惟岳官爵诏

讨吴少诚诏

讨李錡诏

削夺王承宗官爵诏

讨李希烈诏

王承宗絶朝贡勅

讨镇州王承宗德音

讨吴元济勅

讨王承宗制【阙】

讨伐上

令秦王讨王世充诏

取乱侮亡圣人於是致治安民和衆大武所以成功兵革之兴义资靖难出军命将盖非获已自隋氏数穷天下鼎沸豺狼变争黔庶凋残朕受命临御志存宁济率土之内咸思覆育声教所覃莫不清晏唯彼伊洛尚隔朝风世充作梗肆行凶暴虐害良善拥迫吏民悖道乱常日月滋甚祸盈衅积天亡有徵心腹猜携党援孤絶农亩荒废粮廩内空城隍社稷势将奔溃吊民问罪今实其时可令陕东道行台上柱国秦王某总统诸军东踰崤澠分命骁勇百道俱进救彼涂炭诛其凶渠凡此授律义在拯民府库资财一无所利尅敌制胜効策献功官赏之差并超恒典其有背贼归欵因事立勲即加宠授务隆厚劝【武德三年七月】

讨辅公佑诏

禁暴戢兵昔王於是致治乱常干纪有国所以明刑东南道行台尚书左仆射上柱国舒国公辅公佑本自凡伍素无艺用往因扰乱连结徒旅与吴王伏威同心协力保据江淮早率所部远归朝化録其功力授以官爵任管方隅荣宠兼至不能厉身奉上克保名节遂乃包藏祸心图为不轨自伏威入朝之後公佑即行专擅违犯朝宪不顾典章徵歛谷帛掠夺子女肆其残忍妄行诛杀驱役士民招集奸盗毒流衆庶怨结遐迩国家务存含养未申刑罚每加惩戒冀其自改今乃称兵内侮假相署置驱扇蚁徒敢行钞窃惟彼凶逆速宜剿定命将授律义在安民已令天策上将军太尉领司徒尚书令陕东道大行台雍州牧领十二卫大将军上柱国秦王某为江南道行军元帅重率骁勇风驱电撃麾旆所临当即奔溃凡此罪恶止在魁渠胁从之徒一无所问纵有已陷贼党非其本心扳难而来因立功効此之等类皆与官赏江淮以南比遭毒螫吏民困辱各不聊生平定之後并宜优给即令抚慰各令安堵勲赏之科具如别格宜明宣布咸使闻知【武德六年九月】

亲征安禄山诏

黄轩抚运既统蚩尤之旅炎汉应期亦有陈豨之伐虽德合仁覆或震雷霆之武功侔载物匪容原野之罪盖所以除残禁暴伐罪恤人圣帝贤君孰能无此朕以菲薄缵承丕构乘时御宇慙继统於百王旰食宵衣軫纳隍於一物多历年所亿兆咸知安禄山本自细微擢之行伍进小忠而自售包巨猾以贪天予每含容冀其迁善列在衣冠之右授之师旅之权赐与无涯邀求罔极凡经宠任中外毕闻今遂窃我干戈欺我将士妄宣密旨假托妖言人畏凶残苟从逼胁称兵向阙杀掠无辜此而可原孰不可忍前所出师命将足以除凶去孽仍闻阻兵西路左次南辕朕义在救焚情存拯溺虽螳螂举斧自当屠溃而蜂虿有毒必籍讨除今亲总六师率

衆百万铺敦元恶巡幸洛阳将以观风因之扫殄太山压卵未可喻其重轻洪波注蜺不暇收其光?宜令所司即择日进发其河西陇右朔方除先发蕃汉将士及守军郡城堡之外自余马步军将兵健等一切并赴行营各委节度使统领仍限今月二十日齐到既缘剪除凶逆暂赴东京宫掖侍从并令减省至於供亿都无所须其扈从文武官及飞骑闲廐马家并诸色人等应食公粮者并以官物支供仍从此身齎锅幕缘路并不须置顿在於黎庶固免劳烦布告遐迩宜知朕意【天宝十四年十二月】

贬田承嗣永州刺史诏

自古屈法申恩与之更始者为君之道也务善改过期於自新者为臣之节也其或弃瑕含垢弘贷之泽已深而佞伪藏奸干纪之情转露则亦中外同弃刑宪不容西汉伏信越之诛东京举萌宠之罚此皆前王典式也魏博节度支度营田观察处置等使开府仪同三司太尉检校尚书左仆射同中书门下平章事兼魏州大都督府长史上柱国雁门郡王田承嗣出自行间策名边戍早参戎秩效用无闻尝辅凶渠駟驰有素泊再平河朔归命辕门朝廷俯念遗黎久罹兵革自禄山肇祸瀛博流离思明继衅赵魏埋厄粉榆井邑靡获安居骨肉室家不能相保念其雕瘵思用抚宁以其先布欵诚寄之为理所以委授旄钺之任假以方面之荣期尔知恩庶能自效崇资茂赏首冠朝伦列异姓之苴茅登上公之礼命子弟童稚皆聯台阁之华妻妾仆媵并授国邑之号人臣之宠举集其门将相之权兼领其职夫宰相者所以匡辅王室庥庇生灵献可替否救灾恤患而乃据国家之封壤仗国家之兵戈安国家之黎人调国家之征赋掩有资实凭窃威灵内包凶邪外示归顺陷悞良善贼害平人骋其乐祸之心俾叶同恶之体且相卫之略所管素殊而逼胁军人使之翻溃因其惊扰便进军师事迹暴彰奸邪可见不然者岂志清之乱曾未崇朝子期光朝会於明日足知先有成约指期而来是以蔑弃典刑擅兴戈甲既云相州骚扰隣境救灾旋即更并磁州重行威武此寔自相矛盾不?始终三州既空远迹惊陷更移兵马又赴洺州实为暴恶不仁穷极残忍又薛雄乃卫州刺史固非本藩忿其不附横加凌虐一門尽屠无复噍类酷烈无状人神所冤又四州之地皆列屯营长史属官擅请补署精甲利器良马劲兵全军之旧资农藏之积实尽收魏府迴无子遗更复收管将士其本部刼质妻子给我资粮观其所为益在无舍且藏庾者平人之膏血恣行贪窃甲兵者干城之腹心辄为举动欲行讨问正厥刑书犹示含忍冀其迁善俾予东夏之人终免无辜之酷抑于典宪务使慰安遂遣知在远奉诏书喻以深旨命承昭副兹麾钺抚彼旧封而承昭又遣亲将刘浑先传诏命承嗣逼巡相卫仍刼知在偕行先令侄悦潜扇军吏至使引刀自割抑令腾口相稽党衆誼器请归承嗣论其奸状足以为凭此而可容何者为罪今尚全其首领更授藩条贷以朝章用遵时令其承嗣宜贬授永州刺史兼许十岁已下一男一女随身便路赴任委河东节度使兼御史大夫薛兼训简练马步一万五千人即赴邢州取承昭处分逐便招抚应变权宜成德军节度使检校左仆射宝臣精选骁雄马步三万二千人屯集深冀贝州等路进取幽州节度使留後兼御史大夫朱滔举马步军二万五千人进逼沧瀛权宜招讨淄青等节度使检校左仆射正已率所管马步三万人北临德博淮西节度使检校右仆射忠臣永平军节度使兼御史大夫李勉汴宋节度使留後兼御史大夫中丞田神玉并河阳泽潞等道兵马共六万五千人直据淇园皆擐甲厘戈犄角相应如承嗣不时就职尚在执迷则所在进师按于军法今数郡之地迫受其兵深哀士人重遭剽掠丁壮离於农田工女废於蚕桑胡宁忍之盖

非获已?思涂炭过在朕躬其昭义军管内五州宜给复二年仍委承昭抚慰务使苏息且圣人之教必也胜残王者之师存於止杀其魏博磁相等将士并怀忠义皆被胁从但恐玉石俱焚当宜各思自拔除其首恶咸与惟新事定之时罪止元凶一身并其侄悦其余官吏将帅爰及弟侄等能自归顺者一无所问如有擒执渠魁下其城邑便以承嗣在身官爵资财田宅一切回赐自余立功者节级酬赏夫军行除害本以安人将吏所经薪刍必禁秋毫之犯律有常刑凡在师人各宜深诫於戏天地之大德时或降霜皇王之至仁亦闻用钺顾惟寡薄之理昧於授任之明以至兴戎多慙黎庶布告天下令知朕怀

讨李希烈诏

李希烈顷梁崇义叛逆使之专征既集勲庸大加恩礼名极台辅赏延子孙而乃负德弃身去忠効逆攻劫道路擅攻邓州而又图汴州攘夺尉氏攻围郑圃暴犯汝坟已勅神策汴滑河阳东汝州淮南山南荆南湖南劔南江西鄂岳等道十五万衆尅日齐进吊人靖乱罪止元凶有能斩希烈归降者四品已上以希烈官爵授之五品已下封异姓王实封四百户诸军将士斩希烈者亦准此例封赏以军城降者便以其职授之赐其实封贼平後除供当道外百姓给复三年朕德之不明化有不洽未跻仁壽尚劳甲兵中心咎悼无忘鑒寐

削夺李惟岳官爵诏

李惟岳其父宝臣有忠劳於王室夷险之际犹全诚効而惟岳隳废父业蔑弃国恩縈絰之中擅掌戎务矫陈悃欵冀邀爵禄外结凶党益固奸谋不孝不忠宜肆原野朕尚念其前绪容以自新俾护父丧以其属归阙待以好爵遇之如初告谕既勤罔有悛革蠢尔狂狡自取灭亡除暴去邪国有恒典其惟岳在身官爵并宜削除罪止元恶余无所问其属吏将校能以所部兵马州县来降者便授以本职仍加封赏斩惟岳首

讨吴少诚诏

吴少诚非次擢用授以旌秩居端揆之荣任总列之重期申报効奉我典常而秉心匪彝自底不类凶狡成性扇诱多端外肆矫诬内怀疑阻毁忠废信弃德崇奸擅动甲兵屡赴封境壽州茶园辄肆纵夺唐州诏使潜构杀伤干黷国章已在无赦朕以王者之德在乎好生人君之体务於含垢寧屈己以宥罪不残人以兴师是以上稽宗社之威外抑忠贤之请庶其悛革当议优容今更幸隣境之丧逞贪乱之志焚掠县邑残暴平人朕冀其知非为之忍耻亟颁诏令未许出师至乃攻逼许州肆其蜚毒恣行杀戮流害黎蒸恶稔祸盈人神同弃兴言致讨寔悼予衷宜令宣武军河阳三城郑滑等州节度东都汝州等军犄角相应同逼申光蔡州指冀幽州淄青魏博易定泽潞太原淮南等州徐泗山南东道鄂岳等军各发士马逐便犄角齐进同为讨伐大军四合计日殲夷嗟我忠良受兹诬误或心存愤激而力屈凶威玉石俱焚良增悯惻其所收得少诚管内州县百姓官吏等宜加慰抚各示安存淮西将士等夙着勲庸素怀忠义为其胁制深可哀矜若能因事建功舍逆効顺朕当复其职位待以官封其吴少诚在身官爵并宜削夺其有叶心同谋擒斩少诚者先有官未有官者并授御史中丞及大夫封异姓王赐

封五百户赏钱万贯庄宅各一所子孙承为功臣先有御史中丞异姓王及刺史者即超转三资改转官赏其才器行业为衆所推者便授节度使如有以怀忠愤谋斩少诚被其屠戮者先无官者追赠三品赐实封二百户先有官者赠二品官赐实封三百户仍各与一子正员五品官已有官者超三资与正员官其所在百姓有能团结士衆讨除梟斩少诚者准例封赏人臣之所保者忠天地之所助者顺报功宥善朕不食言於戏朕司牧黎元为之宗极化有所未洽信有所未孚致兹兴戎增用媿悼然不暂劳无以逸俗不诛暴无以安人咨尔藩镇方州列属连帅所宜戡剪大憝永康兆人其戮力一心以副朕意应诸道准勅赴蔡州许州将士等皆竭忠诚尽心奉国并怀感激叶心勤王若能梟斩少诚者亦准前例赏荣勲之典朕所必行如少诚平後应赴行营将士起三资改官其赏物节级当绩有处分其将士月粮在後回给家口宣示中外咸令知悉

讨李錡诏

朕闻好生者天地之仁不任乎肃杀止戈者帝王之武不尚乎诛鉏恭惟至言可谓明诚朕祇荷前训纘承丕图每思道以自弘岂佳兵而在念虽邦陞阻命有戡乱之征蜀郡兴妖猷夷凶之捷而所伤皆及於百姓所费寧止於千金静言思之往往兴叹非不得已岂复用师李錡属列宗支任居方伯穷赫奕之贵饱绸繆之恩待以亲贤报之以逆节授以师律用之以乱常肖圆首方足之形无五常百行之性顷者累陈章疏勤请会朝奸态不形伪官甚悬朕颇谓诚志久方允从乃降诏书俾修覲礼示以後命委其深心而梟音骤呼虺毒横厉初则诈疾後乃纵兵寮属以献规受屠使臣以传命见胁朕务於含垢未忍明言累降中人令遵前旨无辎车之戒路有沴气之?天加以日逞淫刑冤痛者无告日兴暴赋杼柚者皆空赤子咸罄於餽粮白刃屡加於颈血为之素志罪人无状邦有常刑顾惟纪纲岂敢废坠其讨伐之师并已有处分尅期齐进其李錡在身官爵阶勲等并宜削除仍令宗正等削一房属籍其两都及诸州府应有李錡庄宅钱物等并委所由官簿録闻奏浙西将士素非同恶朕所深知迫於凶威不能自達但王师进讨因事立功梟斩渠魁以効节诚必当特加爵秩超异等伦其将吏等以所领归降者超三资授官以一身降者亦超资改转官健归顺者以厚加赏给仍与叙録明谕将士罪止一夫其余染污一切不问於是诏淮南节度使王锬充诸道行营兵马招讨处置使仍以内官右监门卫大将军薛尚衍充都监招讨宣慰使宣武义寧武昌之师各三千并淮南宣歙之师并取州路进讨江西兵士三千人取信州进讨浙东兵士取杭州路进讨

削夺王承宗官爵诏

天地以大德煦物而高秋励肃杀之威帝皇以至道育人而前王设黜罚之典於是有版泉之役有舟浦之威情岂佳兵义存禁暴朕嗣膺宝历於兹五年以惕厉居於人上以仁恕抚於天下?惟文祖之训敢以武功为先昨者吴蜀兴妖师徒猷捷朕每念陈原野之衆行鈇钺之刑虽举彝章颇怀慙德盖不获已岂乐於斯王承宗顷在苦庐潜窥戎镇而内外以事君之礼将而必诛分土之仪专则有辟朕念其先祖尝有茂勲贷以私恩抑於公议使臣旁午以告谕孳童俯伏以陈诚愿献两州期无贰事朕欲收其後効用以曲全授节制於旧疆齿勲贤於列位况德棣本非成德所管昌朝又是承宗懿亲俾抚近隣斯诚厚泽外虽两镇中实一家而承宗象?

怀奸肖貌稔口欺褻武於得位之後縲昌朝於受命之中豺狼之心饱之而逾发梟獍之性养之而益生加以表疏之间悖慢斯甚神祇所以不佑天地所以不容智士所以奋怀义夫所以兴愤式遏乱略期於无刑龚行天诛示於有制其诸道诸军进讨已从别制处分王承宗在身官爵并宜削除其镇州管内将士官吏久在戎行未知朝典或陷於邪说或迫以凶威虽有忠诚无由自达但能效顺即是王人岂止惟新当加宠渥其有能回戈弭寇因事立功特有褒崇不拘资次贵爵厚禄设之而高悬实封名藩待之以茂赏其以一州归顺者便与当州刺史仍赐实封二百户先是刺史以州归顺者超三资与官仍赐实封三百户以一县归顺者超两资与官赐实封一百户其长行官健归顺者当与优厚褒赏如将校内有翻然改图梟斩元恶者授以不次之位宠以殊赏之封王承宗如能革心悔过束身入朝待之如初一切不问仍准旧官爵秩宠授於戏王者之师盖除於暴乱止戈之武岂愿於伤残而承宗不能负荷旧勲秩承新命自贻其咎寧怨於天遽此兴戎至於用钺固非素意用叹於怀百辟万方宜谅朕志

讨李希烈诏

朕临御万方失於君道兵革不息於今五年悯衆庶之劳悔征伐之事而李希烈蔑义弃德反道畔常朕哀彼生灵陷於涂炭苟存拯物不憚屈身故於首春特布新令赦其殊死待以初诚使臣才及於郊畿巨猾已闻於狡窃酷烈滋甚吞噬无厌将相大臣咸怀愤激继陈章疏固请讨除朕以天诛本欲去害兵戈既接玉石难分言念忠良遭罹胁制虽欲改节厥路无由受污终身衔冤没代沦胥以逆诚足痛伤岂孽自一夫而毒流百姓为民父母宁不疚怀宜令诸节度使将欲进军先加晓谕王师致讨准在元凶所是胁从一切勿问如能去逆効顺因事建功设科以示褒劝

王承宗絕朝贡勅

勅天地至广有自絕者不得容皇王至仁有当诛者不敢赦朕纘承丕业?奉睿图乐战佳兵每思圣祖之诚纳污藏疾尝佩先哲之言罪有难原事非获已成德军节度管内度支营田恒冀深赵德棣等州观察处置等使银青光禄大夫检校吏部尚书兼恒州大都督府长史御史大夫上柱国王承宗洗涤疵瑕累加獎授列在藩方之重待以忠正之途谓怀君父之恩克励人臣之効而动思弃命恣逞非心傲狠反常横厉无畏以其先祖常立忠勲每为含容庶闻俊革曾不知陰谋逆状久则逾彰凶德祸机盈而自覆乃敢轻肆指斥妄陈表章潜遣奸人窃怀兵刃贼杀元辅毒伤宪臣纵其凶残无所顾忌推穷事迹罪状彰明周覽狱词良用惊叹今罪人咸伏首恶有归虽当去害之诛犹軫録功之念宜令絕其朝贡使自惩省冀其翻然改过束身归朝攻讨之宜更俟後命傥或不能迁善即当续有处分所为指使盖自承宗其事不在於三军其辜未延於百姓所以但絕朝贡未加讨除如不自新止於有罪咨尔成德之衆勉於忠顺之机博野乐壽之郊本范阳管界总自授朝寄常罄公忠既有维於能劳则宜仍其旧服其博野乐壽两县并却赐刘总收管太中大夫检校左散骑常侍兼少府少监驸马都尉赐紫金鱼袋王承宗亦由勲伐之後锡以姻戚之荣莫顾宠私用包淫慝交通谋虑叶比奸凶抚兹情状合正典刑俾居遐远犹示寬弘宜於黔府安置朝请郎守太子左赞善大夫赐紫金鱼袋王承迪朝请郎守丹王府司马上柱国赐紫金鱼袋王承荣国有彝章亦宜从坐承迪宜於归州安

置承荣宜於通州安置仍并驰骑发遣各委本道具道州府月日奏闻云麾将军上护军王士平忠列武将军守左神武将军军事兼御史大夫赐紫金鱼袋王士则并志秉恭德家承茂勲既申劝善惩恶之义亦以全功臣绍续之庆示朝典旌别之宜委中书门下即加獎授於戏朕方以五常之道刑于万国之风犹有弃德而崇奸兴秽以自臭惟训导之不至顾菲薄而自惭尚欲依违务弘天讨而公卿庶尹多士具僚继有陈论咸请诛言沉吟軫虑未忍加兵屈法申恩兹未惩絶迫於公议难徇衷怀宣示中外咸令知悉

讨镇州王承宗德音

上天垂象耀弧矢之芒先王取威陈鈇钺之柄盖所以昭宣七德保乂兆人故穷陰有助於岁功而大刑无废於国典朕承累圣之休祉奉苍穹之眷命道思格物心岂佳兵期致俗於和同庶纳人於轨度缅窥钟鼎无忘卫国之荣永惟带砺每存延代之故太尉武俊顷因多难首建大勲悬捧日之明诚遏天之逆竖武烈有过於震电壮容具纪於丹青余风凜然虽死不朽是宜子孙席宠邦国同休而王承宗坠於弓裘隳其门户不思祖考之德忍与梟獍同谋不顾天地之恩敢以豺狼为性饱则逾悖抚之不驯凶狂屡见於表章戕贼窃加於宰辅四方同骇千古所无朕以思人爱树投鼠忌器优游而不断隐忍而未征屈其宪法絶其朝贡俾之思过且将革心而乃先动干戈屡犯城邑焚烧剽劫流毒於人罪恶既不可容诛讨盖非获已况四面征镇愤激咸同中朝卿士奏议相继虽覆以天道欲更含弘而迫於羣情须正刑典宜令河东幽州卢龙义武横海魏博昭义等节度兵马计会进讨其承宗在身官爵并从削夺言念乃祖尝着功庸蠹兹狡童自取废絶其所袭实封宜回赋役子右金吾卫将军士平俾之纂承元之祭祀若承宗翻然改悟束身入朝必议加恩不唯贷法如沉迷自若讨伐遂行则罪止一身其駭胁之徒一切不问大军既临计即戡殄其成德将士等或染污俗或迫凶威虽有忠诚无自阶達但能去逆効顺因事立功随其高下厚加宠赐如有梟斩渠魁及执送南兆以効诚节者其承宗在身官爵土地等便以回授仍与实封五百户庄宅各一区钱二万贯如有能率所管兵马及以城镇来降者并超三资与官仍实封二百户钱一万贯其以州降者便与刺史仍赐实封二百户如本是刺史更超三资与官赐实封三百户以县降者超两资与官赐实封一百户其以一营一栅降者节级褒昇务从优厚其诸军行营将士如有先登陷阵屠城下邑者亦准此处分其接近贼界诸道应副行营将士如有能梟斩承宗者亦准前例处分其接近贼界州县自军兴已来供馈繁并嗟我疲瘵良增悯然应免元和十年两税斛斗钱物在百姓腹内者并十一年夏税并宜放免其有城镇将士百姓守节拒贼身死王事者各委长吏优给其家仍具事迹闻奏当加褒赠其有潜谋诛斩承宗被其屠戮者优加追赠并赐钱帛仍与一子官六州百姓莫匪吾人坠於涂炭深用嗟惻兵之所至不得妄戮及焚烧庐舍掠夺资产并有拘执以为俘馘事平之後给复三年其六州管内百姓能率来归顺者所在安存各加优獎方当春候务切农桑边界之人虑妨耕织应缘军务所须并不得干扰百姓如要车牛夫役工匠之类并宜和雇优给价钱贼平之後应立功将士并与超资改官节级赐物续有处分於戏朕正位凝命端诚向方劳谦为心慈俭为宝而化未陶於顽傲泽未浸於隐微荐兴甲兵布在原野中宵愧叹当宁忧兢命将除奸非曰尚武宣示中外宜体至怀

讨吴元济勅

勅天地之化由肃杀而成岁功帝王之道以威武而辅文德朕祇荷鸿业抚临庶邦务先含弘每慎征战俾怀仁者有耻且格畏罪者见善则迁而或昏迷不共造命不及固兴悖乱之孽自速原野之诛除害正刑国有彝典吴元济逆絶人理反易天常不居父丧擅领军事谕以诏旨曾无敬恭荧惑一方之人迫胁三军之衆以其父少阳尝经任使为之軫悼命申奠祭临遣使臣凌虐封疆遂致稽阻絶朝廷之礼意忘父子之恩情旋又掩袭舞阳伤残吏卒焚烧叶县骚扰间阎恣行寇攘无所畏忌朕尝念赏延之义重伤藩帅之门尚欲纳於忠顺之途处以显荣之列未能飭法犹为包荒再以诏书俾申招抚而蚕毒滋长奸心靡悛壽春西南又陷镇柵穷凶稔恶纵暴挺灾覆载之所不容人神之所共弃良非获已致此兴戎盖以方伯连帅同请讨除伐罪吊人故兹申命宜令宣武忠武太原武寧淮南宣歙等州兵马合势山南东道及魏博荆南江西劔南东道兵马与鄂南计会都防御使与淮汝节度及劔南义成军兵马犄角相应同为进讨吴元济旧有官秩宜并削除大军既临计即戮殄嗟我淮右之衆本为勤王之师虽是胁从频已招洗念此勲力未尝弭忘近罹狡童又此诖误心怀忠顺迫在凶威苟能率诚即可收効其淮西将士有能梟斩凶渠者先是六品已下官授三品正员官其先授五品已上官者节级昇进仍与实封五百户庄宅各一区钱二万贯如能率所管兵马以城镇来降者亦与改转仍赐钱帛诸道应赴行将士斩元恶者亦准处分吴元济如能束身归朝并与洗雪若不能改过罪止一身其余污胁一切不间接贼界州县百姓军兴已来供馈繁併言念疲瘵良增悯然元和九年两税斛斗钱物等在百姓腹内者并十年夏税并放免其有城镇将士百姓守节拒贼身死王事者各委长吏优给其家仍具事迹闻奏当加褒赠并赐钱帛仍与一子官三州百姓莫匪吾人诸军所至不得妄加杀戮焚烧庐舍据夺资产并有拘执以为俘馘事平之後给复二年三州内有自置义营保柵王师所至能相率来降各加酬獎时当春候务切农桑应缘军务所须并不得干扰百姓如要牛驾夫役及工匠之类并宜和雇仍给优价贼平之後立功将士并与超资改官节级赐物於戏朕率循理道靡敢荒寧思致中和以康亿兆而德之寡薄化未昭宣爰及用兵良深愧叹顾非重武其在止戈宣示中外咸令知悉

卷一百二十

钦定四库全书

唐大诏令集卷一百二十

宋 宋敏求 编

政事

讨伐下

令百僚议征李师道勅

讨李师道诏

讨淄青禁焚烧庐舍勅

讨镇州王庭凑德音

讨王庭凑诏

讨李同捷诏

处分沧州行营勅【阙】

讨凤翔郑注德音

讨潞州刘稹制

讨伐王郢诏

讨草贼诏

讨杨师立制

削夺李敬瑄官爵制

削夺李罕之官爵制

讨董昌制

讨伐下

令百僚议征李师道勅

李师道潜包祸心伪布诚恳缘自淮西用兵已後愆衅屡彰累有疏陈请舍凶逆当道租税频年不送陰通信使数致帛书又逆党訾嘉珍等蓄聚凶徒谋烧洛邑所图不轨临发事彰又使其徒烧劫河陰库仓沮国大计中使李重秀宣谕到本道又纵官健凌暴况又元和十年六月伤害宰相事之端本实启潜谋凡此罪名皆当不赦朝廷以新平淮寇贵且息人素为含容令其献効师道自知罪过难掩羣言累违崔承宠王玄同自将表陈请令长子入侍兼献沂密海三州林英续来又献三州图印并奏其男发日国家务每弘贷屈法招绥今忽翻然尽变前意应所陈列无相忘言其师道并军将健儿表共三道词颇悖慢宜出示百寮议可征可舍以闻

讨李师道诏

天覆至弘为恶者每闻於自絶国章具举干纪者难追其常刑玄言至戒於佳兵丹浦本非其乐战朕纘承鸿业祇奉睿图居轸纳隍动思济物仗以大信御兹万邦省躬靡忘於忧勤弘道必先於抚谕犹以庶政多乖至诚未孚兢兢之心岂自暇逸近者淮右致讨宿兵累年宗社降灵妖氛克殄方橐弓而匣刃期阜俗以息人旋议徂征谅非获已李师道代荷宠荣谬居垣翰功不列於勲籍过难掩於简书尚复潜包祸心果是伪布诚恳顷属问罪蔡上徵师合围助彼寇讎敢为影援陰通信使密致帛书累抗表章请舍元恶所图不轨事匪一端遂至伏聚奸凶震惊洛邑焚劫内库扰动河陰皆欲挠军旅之深机阻邦国之大计加以擅兴甲兵侵軼徐方駟逼戎行凌胁中使恶逾滋蔓志益猖狂乃者盗发京师实启端本又常赋不入自致愆违凡此罪名皆在不赦朕以新除淮寇务息征师素为含容令其献効而乃怀其积恶惧彼羣言将佐交驰频疏叠至疚心首罪请命求哀时降使臣往加宣谕而师道请令长子入侍阙庭愿献三列上归图印指期而发飞奏以闻诈为纳地之谋翻稔?天之逆凡所陈列无非怨望露其悖慢之词备在封章之内明示百辟衆怒一心咸请致诛以惩无上犹为伏念至於旬时乃闻遽越封疆寇掠德棣焚蕪村落纵暴挺灾大肆?张曾无畏忌斯则人神之所共弃天地之所不容罪恶贯盈自当扑?宜令宣武魏博义成武寧横海等军节度兵马分路并进同力攻讨相为犄角其李师道在身所有官爵并宜削夺其淄青将士如能梟斩凶渠者先是六品已下官授三品正员官其先是五品已上官者节级超獎仍与实封五百户庄宅各一区钱二万贯於戏动衆兴师诚有乖於至理养灾蓄患恐流毒於生人數信未化於穷凶格物深慙於菲德甫於寇难遄务讨除宵旰在怀良深愧叹庶将去暴永用止戈宣示中外咸令知悉

讨淄青禁焚烧庐舍勅

勅寇孽背恩自取诛剪黎元不幸久陷凶残王师有征义先拯物苟加残暴谅匪予怀况诸军讨伐已毕百姓归投相继既足嘉悯尤宜抚存时属春阳各务农业陶我惠化当令便安其淄青四面诸道兵马应入贼界收城所至百姓明加晓谕任其营生辄不得妄行伤杀及有拘繫焚烧庐舍掠夺资产开发坟墓等事并宜禁断诏下之初已有处分今更申勅切在遵行

讨镇州王庭凑德音

朕尝读玄元书至於佳兵者是乐杀人因念自孩提之逮於羈紲不三十年必宜以安人为国本不以穷武为威力顾予寡昧敢忘遵承为追念以兴师已极君臣之分以軫忧而舍罪岂非帝王之道况王庭凑仓卒之际本非始谋接之以恩荣自当展其志义委之以镇戎必冀效於勲庸祸福无门行之则是弛张在我用亦何常苟推信顺便保忠顺苟得其衆孰非吾人推而用之式示荣宠宜特舍雪仍授检校右散骑常侍兼镇州大都督府长史御史大夫充成德军节度镇冀深赵等州观察处置等使应成德军将士官吏一切依旧待之如初仍令兵部侍郎韩愈充宣慰使於戏朕於彼三军惠非不至於彼阖境恩非不周今弘寛大之典以应阳和之令使离散者见亲爱之乐暴露者归室家之安各宜感悦以就宁泰布告中外体朕意焉

雪王庭凑诏

帝王之御大器也上法天意下顺人情何尝不欲舞干羽以致怀来涤旧垢而宏惠贷朕以寡昧获守昌图享二百余年之丕基纂十三列圣之洪业而涉道犹浅烛理不昭德未洽于生灵信未孚于微隐至使河朔残梗藩臣阻絶既多在予之责每軫纳隍之念顷者沧州拒命将帅专征有国彝章非朕敢赦谅功成于九伐当事止於一方况成德本军早列勲籍庭凑初意亦献嘉谋因缘细隙互构【阙】闻朝廷【阙】挂刑书虽欲上陈固难自达及沧德剪定甲兵偃戢拜章辨数纳欵隣封爰【阙】台臣俾通王命备闻恭惕延望私恩感激而情动三军叹呼而声驰四郡朕猥居兆人之上常惧一物失所虽外示君臣之义实内犹父子之亲岂可使覆载之中不沾雨露照临之下犹隔辉光断自予衷靡听輿议既改之而不【阙】则待之而如初俾服官荣载膺寄任爵服尽在恩礼用加其王庭凑可依前授金紫光禄大夫检校司徒兼镇州大都督府长史御史大夫上柱国太原郡开国公食邑二千户充成德军节度镇冀深赵等州观察处置等使於戏天道之所助者曰顺人伦之所重者曰忠为君在于不疑为臣在于不贰然後上下交畅以底泰宁当宏令猷勉收来効凡百卿士宜体朕怀

洗滌长庆乱臣支党德音

门下皇王之令凶慝必置於严诛天地之仁含育亦存乎在有除恶务絶其根本原情必諒於亲疎虑兴洼误之嫌用安反侧之举寛大之典尽涤瑕痕追维长庆之初乱臣贼子之輩人神共愤天地不容顷以论刑是从流窜而东宫亲昵之党亦参帷幄之谋顾愉冒以取恩陷君父於不义必资惩创以荡奸源议法当然非朕敢赦而曾不知过交构流言兴谤道途扇惑人听盖以从前搜捕未尽巢穴犹存再令根寻果获支党无非近戚咸伏其辜在臣节而既亏於国章而难追并已从别勅处分除窜逐遐荒及配诸陵守当外应诸恶党从祖兄弟子壻妻旅内

外亲戚门生故吏及比来别居并从疎远等降德音後一切不问诸司诸使更不用寻勘务徼寬恕俾絕忧疑惟先推鞠得合流者虽已逃窜如获日准前勅处分顷者屡降明诏以顺人心重此究穷盖非获已今则更无余孽永絕猜嫌抒愤之志既申惩恶之刑亦至乘春布泽大与维新明示中外咸知予意主者施行【大中八年正月十一日】

讨王庭凑诏

雷霆霜雪天上所以成物明罚勅法圣人垂之易象岂春阳不可以独化将辅理固在於刑威乎则遏乱禁非法天齐俗谅有为而然也李同捷罪暴寰宇告之则悖宠之益凌乱君臣父子之纪纲弃覆育生成之恩义则綏讨之命盖不得已焉而王庭凑作我藩臣久膺宠命致爵位于扰叛之际齐恩泽于忠义之伦而首扇同捷便自墨纓怙恶之心剧於武兕负法之丑逾于梟獍藩方统帅飞疏互来朝右公卿恳章继奏皆期鸣鼓问罪奋戈启行朕道希包荒志在含垢多端曲护大开坦途喻之使致奇功告之将酬重位而傲狠弥甚凶肆不悛形恶言于报章资盗粮于狡寇屡有降卒备验奸踪潜军入援德棣纵燎以焚瀛莫河东易定被毒骚然若尚为包容则孰分逆顺其王庭凑在身官爵并宜削夺应诸道与镇州接界处各宜逐便攻讨其镇州将士如有梟斩庭凑者六品已下便授三品正官先是五品已上官者节级超獎仍赐庄宅一区钱二万贯如有能率所管兵马以州来降超三资与官仍便正授刺史钱一万贯以城镇来降者超三资与官仍赐钱五千贯如庭凑束身归朝并与洗雪若执迷安祸罪止其身其於胁污一切不问於戏原野陈师虽前王亦所难免干戈屡动谅菲德之所兴愧咨示辅弼之臣暨於藩守之帅尔尚悉乃忠力匡予寡昧

讨李同捷诏

王者之御天下也惟其忠诚格以大顺臣子之奉君父也効以奔走竭其忠贞故能上下交感家邦用宁其有专上周旋干纪悖戾息弃彝典矫诬当时固人神之所不容古今之未能制者也朕以菲德祇荷鸿业将跻俗於至厚之域致人于无过之地永用劳虑惻然于怀李同捷幸席旧勲不思纒绪斩焉未几私行墨纓毒杀忠良扰惑将校稽之国宪难追常刑朕以顷在先朝已稽申旨实遵成命未议改图庶乎舞阶以服有苗因垒而降崇国使臣旁午优诏指明而又越留务之权授之戎帅负海之地置之中华推恩含垢斯亦至矣之惠昭我好生之德若迷而忘复用不自通天网难寬国刑难追应诸道节度有别镇行营兵马比令权受指麾者并依前收管不在抽移之限仍委有司准前调计资粮器械与诸帅类使之丰备勿有阙遗其李佑所统兵马多至既逼德州自是本道粮馈不乏进取已深宜令依前於当处守御用图克捷昔汉破先零营平资粮粟之备晋摧苻寇安石谨上流之师远猷既恢殊伐斯至且战期无敌师克在和问罪既彰於有名出征必俟于先胜咨尔列位当体朕怀

讨凤翔郑注德音

门下王者之御天下也推至诚以格物委大信以任人故能邦家用宁上下交感所以诏禄爵而不愠待臣下而无疑岂谓变起股肱患生毗倚鉴昧兴叹难弭於怀且负德背恩干纪悖戾

而古今未有能济者盖人神之所不容逆贼郑注气本凶狂志怀奸逆害时蠹政卜射张皇行诈而缘术多端黷货而谿壑难满情惟点白口可铄金罔冒包藏为恶滋甚朕九重之内不得备闻擢於妄庸骤列华贯入司喉舌出纳爪牙唯务废忘不思报国弃生成之恩义乱君臣之纪纲妄兴妖言前古未有罪同梟獍法在必诛况诏旨既追已离城邑险谋且败中途遽迴又迤邐使人迎接逆贼李宪稽之国宪岂追常刑其郑注在身所有官爵并宜削夺将士如有能奋扬义勇执戮渠魁者先是五品以下官者便授三品正员官先是五品已上官者节级超獎仍赐庄宅各一区钱二万贯如有能率所管兵马以州郡来降者超三资与官便正授岳牧仍赐钱帛诸道将士虽各守疆土非为进攻如被侵掩因事立効者亦准前例节级处分贼能从义悔过束身归朝并与洗雪仍加宠獎幽明可鉴朕不食言欵诚自通即委诸道与奏若不能悛改自取诛夷罪止一身其余胁污一切不问其有迫於凶威曾着失节顾存家族事出权时待其平宁并从寬宥将士如有潜谋立功效顺被其屠戮者并优加追贈并赐钱帛仍与一子官应州县百姓陷在暴虎莫保性命诚可哀矜诸军还境不得妄加杀戮并焚熱庐舍掠夺资产及有拘执以为俘囚如有归投者诸道据丁壮老弱量加优恤仍给与空闲田宅使就生业事平之後愿归本贯者亦听凤翔一军素着忠义每临霜雪之际实见松筠之心凜然义风简在朕志其大将军及军士并宜坦怀自处勿以为忧兵革既平宠待如故郑注初到镇日闻有优赏军将常例不足为疑州县百姓亦当复给勉於自効以报令图於戏佳兵者圣祖之所诫文德者前哲之所崇肆予寡昧敢忘丕教然以齐庶方者号令立人纪者君臣斯言苟违大伦安设今则絶其奔轶示以申严怀柔诚贵於止戈执恶何慙於用武布告中外咸知朕怀【大和九年十一月二十四日】

讨潞州刘祜制

门下定天下者致风俗於大同安生人者齐法度於画一虽晋之桀赵家有旧勲汉之黥彭身为佐命至于干乱纪律罔不梟夷禁暴除残古今大义刘悟顷居海岱尝列爪牙属师道阻兵问罪三面开网一境离心乘此危机遂能归命宪宗嘉其诚欵授以南燕穆宗待以腹心委之上党招集死士固护一方逮于末年已亏臣节刘从諫生稟戾气幼习乱风因跋扈之资以专封壤恃纪纲之力以袭兵符暂展珪之仪终上缓之情隙驹为喻魏豹姑务於絶河井蛙自居孙述颇闻於恃险诱受亡命妄作妖言中诃朝廷潜图左道接壤戎师屡奏陰谋顾苕卵之可矜岂泉鱼之是察暨於沉痾曾靡哀鸣犹驻将尽之魂恣行邪僻之志罔感旧恩自树狡童中使挟鰲莫覩其朝服近臣衔命不入於垒门逆节甚明人神共弃其赐官及所授官爵并刘祜在身官爵并宜削夺成德军节度使何弘敬姻连王室任重藩维恳陈一至之诚亟扬九伐之命吴汉任职受诏而初无办严卜式朴忠未战而义形於内况成德军尝以骁骑横阵百破朱滔战气方酣再迴鲁阳之日鼓音不息三周不注之山魏博军亦以大旆涉河竟殲师道建十二道之旗鼓以列降人削六十年之厉阶尽归皇化士传余勇军有雄名必能稟鄴侯之指纵成葛亮之勋伐咨尔二帅朕所注怀成德军节度镇冀深赵等州观察处置等使金紫光禄大夫检校司徒兼镇州大都督府长史御史大夫驸马都尉云骑尉元达宜守本官充北面招讨泽潞使余如故魏博等州节度观察处置等使银青光禄大夫检校户部尚书兼镇州大都督府长史御史大夫上柱国何弘敬宜守本官充东面招讨泽潞使余如故潞府曩者烈祖在藩先天启圣节瑞昭晰绩事浹於泗亭銮辂巡游金石刻於代邸斯实可封之俗久为仁壽之乡

艰难以来颇着诚节必非固恶咸许自新其昭义军旧将士及百姓等如保初心并赦而不问昭义旧大将等如能舍逆効顺以州郡人衆归降者必厚加赏如能擒送刘禎者别授土地以报庸其乡村百姓所在团结归者亦如爵赏刘悟郢州旧将及刘从諫近招至将士等喻以善道宜听朕言凡秉义立名须明大顺未有终於所奉上悖君亲昔郤至有言受君之禄是以聚党有党而争罪孰大焉田横能得士心人多致命伏於海岛莫敢猖狂及汉高召之奔走向阙岂尝违拒汉使止留田横雄暮殉以成仁不相从而非乱故得其主歿延殊宠光显令名尔等既有义心宜思改悔如能感喻刘禎束身归朝必当待之如初特与洗雪尔等旧校亦并甄酬仍委陈夷行刘沔王茂元各进兵同力攻讨其诸道进军并不得焚烧庐舍发掘丘墓擒执百姓以为俘囚桑麻田苗皆许本户为主罪止元恶务安生灵於戏藩维大臣抗疏於外髦隳旧老昌言于朝戒朕以祖宗之法不可私一族刑赏之柄所以正万邦宜用甲兵陈于原野朕以恩不听羣臣以义固争询日命谋谅非获已布告中外明体朕怀【会昌三年】

讨伐王郢诏

王郢江乡贱卒营伍微才忽抚御之小乖敢凭陵而构乱迫胁将相恣窃干戈却资财於建邺之城聚徒党于狼山之戍寻则浮江泛海掠镇攻城焚漂三州伤残万户又於福建管内毒害生灵陵犯纪纲悖违天地朕为人屈法恶杀好生累降勅书曲存招谕王郢包藏奸慝惑军师诈示归降密为抗拒昨者拘留复鲁已验凶狂今闻再犯温州显与官军鬪敌鲁实陷在舟楫王师败於锋刃两浙震惊百姓忧扰滔天之罪擢发难书然以分野兴灾虽关定数神祇助顺必剪羣凶既违雨露之恩宁追雷霆之殛是以别诔名将更益雄师兼福建之精兵杂番禺之战士水陆俱发腹背齐攻须克旬时必破妖孽除先徵诸道五千一百人及福建南海并吉嚮婺等州兵士外令更抽忠武军一千五百人感化军五百人泗州五百人宣州五百人都讨一万五千已上前左武军大将军宋皓负关张勇智有韩白英雄累着战功再居环卫思豺狼之未灭耻荆棘之犹存誓愿长駟速清羣丑今除授检校左散骑常侍守右龙武大将军兼御史大夫充江南诸道招讨使应新旧行营兵士悉取指挥各宜愤激忠诚淬励戈戟识机翦扑取势芟夷速立殊勲迎俟超獎其王郢部下徒党等或本同谋议或偶被胁从或因穷饿依投或遭俘縲指使所宜舍逆就顺去暗趋明勉图富贵荣华勿受駟除翦戮如生擒及所得王郢头归顺者当授四品正员官并赏钱一万贯赐庄宅各一区如能率衆于所在解甲归降者亦当厚与爵赏明垂信誓必不欺渝凡在忠烈之徒皆宜贾勇增气【乾符三年六月】

讨草贼诏

乱常干纪天地所不容伐罪吊人帝王之大典历观往代遍数前朝其有怙衆称兵凭凶构孽或疑迷于郡县或残害於生灵初则狐假鸱张自谓骁雄莫敌旋则鸟焚鱼烂无非破散而终盖以逆顺相悬幽明共怒近者龐勛拒命王郢挺灾结聚至多猖狂颇甚寻则身膏原野喉毙仆姑资财分散于他人亲戚诛夷於利刃则有方从叛乱忽悟归降回吉凶于反掌之间变祸福于立谈之际诸葛爽今为刺史朱实见作将军弘霸郎任职于禁营宋再雄策名于淮海莫不身名光显家族义安近者诸道奏报草贼稍多江西淮南宋亳曹颖或攻劫郡县抗拒官军或窘厄商从俘掠进奉出彼入此鸟逝风驱虽云浚利于一时岂不忧危于终日以有限之逆

党敌无数之王师寧论岁时必自殲灭朕以寬弘为理慈愍居心每念苍生皆同赤子恨不均其衣食各致丰肥宁忍迫于锋鋌断其身首是以诞敷文诰且务招携如或不共用兵无悔其王仙芝及诸道首贼头目等见制勅後各宜洗心悔过解甲投兵诸所在州府投降便令申奏必当超授官爵厚赏资财永作忠臣常居禄位其节级自补职掌等亦于大藩镇内量材与职额衣粮其抛弃田园胁从队伍者并当抚绥慰劳各令归业营农是谓舍暗从明得生逃死依朕命者岂不休哉如或顽傲不悛凶强自恃犹纏兵甲尚困乡闾使田者不耕蚕者不织则须为人除害非曰黠武佳兵宜令诸道帅臣选练骁勇将卒分兵诸道併力合威必务剪除不得纵翫其主兵大将若全擒戮得一火草贼数至三百人已上者超授将军仍赏见钱一千贯文如斩首级移兵攻破徒党收夺资财器械覆验摭实者据其功绩高下授官赏财如逢贼不追临阵不战贪黠逗挠败失师徒宜令本州道勘寻准军法处分应乡县田园之内有材杰敢勇之人若能糾率丁夫扞御寇贼搴旗斩将破阵成功者委所在长吏速具奏闻亦与官职优赏如郑湓汤羣之辈皆以分领郡符朝廷必不食言乡党所宜助顺於戏宿麦将实秋苗正滋渐及蒸燠之时岂是战争之日唯愿务农偃甲布德行恩遍告州闾各宜知悉【乾符四年三月】

讨杨师立制

朕以眇身恭临大宝唯思克相上帝宠绥四方而况于垣翰之中臣僚之内岂不能掩其瑕衅而欲肆之法网乎其或包藏祸心违拒君命罪恶既彰其悖乱诛锄难追于彝章迫于羣情盖非获已光禄大夫检校司空兼尚书右仆射上柱国中山县开国公食邑二千户杨师立本实庸才曾无远虑幸因薄伎久列禁军遂委节旄盖循事例必谓保其富贵励乃忠贞况自朕出狩巴庸频加渥泽进水上之剧任兼辅相之殊荣不敢上报国恩而乃敢亏臣节昨因制置防遏不肯发兵遂有替移寻昇端揆罔思宠待辄恣凶谋扬潼水之惊波作佐绵之沴气不遵诏命偷固戎藩动衆兴师欲收其郡邑重门守险显絶于朝廷据绵州奏闻杨师立已于涪城屯兵下寨又差都将郝勰等占夺绵州带甲数千去州十里赖有奉国兵士御敌杀戮大挫锋鋌城池方遂保全士庶免罹涂炭续据劔州申报杨师立与刺史姚卓文欲领兵士直赴西川兼署姚卓文充指挥应使仍与镇县书板反状具明况闻广集庸丁教习武艺税外恣行掊歛支郡无处完全别置亲军用为心膂及令扞寇莫整鼓旗大校阻谋延颈被戮而又致害监军家累骨肉泊於叛官元从无不罹殃又杀送官告内使更无噍类深用惊叹此固覆载之所不容人神之所共弃其杨师立身在官爵及先父所赠官兼母所封邑号等并削夺令西川节度使太尉兼中书令陈敬瑄以义制事君拥銳敏之师徒擅训齐之政令必能剿除逆?镇定蜀川已兼三州都指挥等便宜令差兵攻讨处分应杨师立叛官及将校官吏等如或不同谋议及衣冠僧道百姓等临事胁从者宜各审详情状切务安存无令误有杀伤致其冤滥其将校等如有梟擒杨师立归顺者朝廷别议獎酬其立功将校等委敬瑄等第奏闻冀行赏典呜呼作孽者诚自投于法网矣亦由吾理化之道未信於人焉负展凝思良深自咎布告天下咸所闻知【中和四年二月】

削夺陈敬瑄官爵制

朕以赏罚二柄不可废也助顺诛逆自古行之陈敬瑄出身屠沽骤窃旌钺包藏奸逆侮慢朝廷敢行专杀之威尤显不臣之节恶昭图之直笔溺贍於中流傲狠之心唯思残害猖狂之志日甚沉迷先皇帝再幸梁洋方当叹否广张行势欲胁乘輿全蜀赋租不供天府百城牧守皆出私置近者爰命台臣往持戎律冀因交代亦许罢归而又结党连羣以拒王命深沟高垒辄恣兵威罪既滔天诚宜共弃其陈敬瑄在身官爵并宜削夺儿侄等委中书门下商量处分【文德元年十二月】

削夺李罕之官爵制

勅朕闻君天下者先赏而後罚立教化者贵德而贱刑其或道之以爵而不劝是稟匪人之性岂悛不救之谋虽军旅屡兴有慙区宇而干戈勿用何去顽嚚邢磁洛等州节度观察处置等使金紫光禄大夫检校司徒同中书门下平章事守邢州刺史上柱国陇西郡王食邑三千户李罕之閭閻下品窟穴微生凭厉气以感时依凶徒而干纪剽劫郡县攘害蒸黎水絕安流陆无砥道先皇帝舍於斧鑕委以招修唯闻屠伯之人宁有孚人之称而又擅离河内窃据东郊谿壑贪心涸伊瀍而不润乌鸢利觜陷刺廓以成空旋逃原野之诛还聚萑蒲之衆时以上京初复羣情未安宥十死之正刑委三城之重地仍加相印俾掌兵权冀怀再造之恩永戢无厌之暴而乃复招逋逸辄留贡输始则结王友遇而寇攘终则投李克用而侵軼且山北以邢洛为要害尔则引戎马以屠攻洛京以怀孟为咽喉尔则肆爪牙而搏噬调其当路终可欺天不知祖宗垂休祐予纘继中外陈恳成我荡平专攻之令才行同德之捷已献度其鼎釜无一安存降以丝纶用彰攻伐其李罕之在身官爵并宜削夺注毁委招讨使宰臣张濬骆全雍悉加存恤於戏祸福无门唯人自召尔为将相而不能全身授尔旌旗而翻闻起乱罪在不赦朕安敢私凡百同盟共惩始祸布告中外咸使闻知【大顺元年五月】

讨董昌制

夫雷霆霜雪上天降以成物明罚飭法哲王垂以理人是则阳春不可以独为岁功仁恕不可以专为君德威刑之作其在斯乎朕以眇身祗膺大宝奉祖宗之丕训荷天地之洪休八年於兹一日无怠迺於志者必本於情苟惩诫之不明惧典章之斯废威胜军节度使检校太尉同中书门下平章事陇西郡王董昌出於行伍属遇艰难权握兵戎位崇将相器方盈而自覆鼎必折而遂倾因凭生祠辄有狂计假陈妖异惑乱邪巫鼓噪危楼伪为建国不思理代徒生犬吠之音欲就丛祠妄举狐鸣之兆赖浙西节度使钱鏐与诸州等皆忠诚愤激壮志坚高始以逆顺之理飞章谕之而不悛次以攻伐之谋与约胁之而不回至于率兵直以鬪垒虽假言诱惑止遏凶邪终为闭壁偷安不使束身归罪是其陰诈犹欲张皇鱼戏鼎而虽亦可哀螳怒辙而终为不率天讨有罪渠魁必诛其董昌在身官爵并宜削夺仍委钱鏐进兵攻讨越城之内士庶且多宁无勇敢之徒善以功名自许如有梟戮生擒董昌者授三品正员官赏钱一万贯如有官者超三资酬獎如是董昌威制曾助妖谋翻然改过图功转祸有所自効者罪并不问赏即与之於戏恶杀好生人君令德伏顺伐逆武夫令猷鸣鼓而攻既非获已奋戈而起亦宜愤诸勿发勿焚无悞无失罔俾观听者谓我黠武而佳兵也【乾宁二年五月】

唐大诏令集卷一百二十

卷一百二十一

钦定四库全书

唐大诏令集卷一百二十一

宋 宋敏求 编

政事

舍雪上

原刘武周宋金刚等诖误诏

宥刘武周余党诏

赦河南诸州为王世充诖误诏

寬宥逆人亲党勅

矜放缘坐勅

原免两京被贼逼授伪官诏

受贼伪官令均平改拟诏

宥田承嗣诏

复田承嗣官爵制

宥李忠臣诏

宥李怀光示谕河中将士诏

诛李怀光後原宥河中將吏并招谕淮西诏放李希烈將士还本道诏

诛李希烈原宥淮西將吏诏

舍雪上

原刘武周宋金刚等诖误诏

朕发迹太原陈师汾浍底定京室廓清函夏惟彼晋魏事等丰宛近者妖祲凭陵侵斥郊境害虐良善拥遏吏民大军东讨义存拯难芟夷丑类实在吊民凡厥渠魁已就殲殄胁从之辈情有可原宜许自新义申荡涤其晋州潞州隰州并州等四总管内自武德三年四月二十一日以前被刘武周宋金刚等所诖误者罪无轻重皆赦除之各令复业一皆不问州县城堡有固守忠节抗御凶徒者具録闻奏别加褒赏

宥刘武周余党诏

祝网泣辜彰乎旧典赦过宥罪着自前经往者刘武周窃据边陲拥逼良善石岭以北咸罹其弊虽武周逋窜寄命蕃夷而残党余氛尚怀旅拒致使朔漠犹警关塞未宁屡动干戈久违声教代州总管定襄王大恩勤绩克着安辑边境讨击未宾率其从化朕君临天下义存抚育念彼凋弊若纳诸隍但朔代黎元逆命日久今虽归附仍怀反侧其代州总管府内石岭以北自武德四年二月二十九日以前所有愆犯罪无轻重悉从原宥可并令安居复业勿使惊扰

赦河南诸州为王世充诖误诏

朕初膺灵命抚育万邦一物失宜忧责在己是以昧旦丕显旰食忘劳思流恩惠被於率土日者世充作梗僭擅一方侵虐士民阻絶声教巩洛之地比邑连城受制凶威莫能自免翹足引领乞师请命朕愍彼黎庶独为匪民命将出军用申抚字兵威所震丑徒懾服元恶顿颡而缚军门殄灭氛?混同文轨拯彼遗民出乎涂炭宜从荡涤与之更始可赦河南诸州旧为世充所诖误者自武德四年六月四日以前皆除其罪若有率其部衆保全城邑因事立功以归朝化者量其効绩就加职任奇才异行随事旌擢鰥寡孤独以时恤理亡命山泽诏书到後三十日不来归首者复罪如初

寬宥逆人亲党勅 苏頲

勅朕闻古先哲王临御天下以刑止杀罪疑惟轻惩恶劝善义不相及管仲实讎自为良佐嵇康既戮子为忠臣昔人美谈前事非远间者元恶大憝实繁有徒仗顺行诛法在抚舍朕惟薄德获承丕运敬记羣公之上固以百姓为心且逆?支党及其亲娅顷属多难念彼伋离与之洗涤用徇於寬惠多令迁贬孰安於反侧故一切勿论欲明本体而有司所奏尚未该详缘累黜削或乖平反岂朕受天明命作人父母之意欤将朕之诚心且未能谅将义者多绪不厘其失思之怵然甚非所谓其亲累人贬拘者所司宜更详审务令折衷重申朕意咸使坦怀俾尔周行以凝庶绩【唐隆元年七月六日】

矜放缘坐勅 苏頲

勅朕闻古先帝王受天之命承天之序万方罪已百姓为心者盖司牧於至公岂崇高於大宝朕猥守丕绪克恭严训答神祇之睠资敬爱之道二祀於斯矣顷逆贼窦怀贞等首谋逆乱敢肆凶悖交羽林而窃发指王堂而睥睨虽触瑟之兆祸积於猖狂而援旗以问变生於仓卒太上皇震威电激睿略天断命朕龚行应时戡翦衆所共弃人其义安已而承姑射之期奉华胥之志爰释重负鍾於薄德顾如临而益惧思若济而罔知将何以承四圣之休成一人之教伏以太上皇比亲庶绩念於朕躬逸於承欢未知为政而内有声乐外有畋渔从魏文河曲之游追汉宣杜陵之好因时命赏几忘在予之贵他日为言非专代天之理令退而自省殷鉴前弊损之为戒仁岂远乎朕其再思当不二也俾尔卿士下洎元元体朕至诚勉遵大化欲使阳和时雨之惠利有攸往肃杀严霜之威紓而不作故事非获已期在无刑悯然永怀将布宽典书不云乎罚不及嗣古之制也其逆人亲缘坐合死者特令放免配为城奴仍差使领送自余支党往还一无所问与更始者令安反侧与再生者特垂哀悯屈彼寻常之法矜其至重之命庶有光武焚书之事成汤解网之恩凡厥远近咸遣知悉【先天二年七月十三日】

原免两京被贼逼授伪官诏

朕闻古先哲王慎罚以恤人命胁从罔理罪疑惟轻成汤有解网之仁光武有焚书之令盖惠彼至理宽其刑章是以法不滥加罚所以措也间者时遭祲逆患在干戈衣冠之流逼迫者衆事不获已情稍矜焉顷者委在三司穷其五听议重者累申刑典稍轻者犹被勾留况时久淹延人皆窘乏衣食且犹不给家属又悉乖离艰难之忧无甚於此岂朕泣辜宥罪作人父母之意耶况德泽频加科条通减原其事状稍近平人岂可稍议迁贬增其反侧万方有责罪实在予一物失所忧将若厉永言悯念用惻於怀其两京官应被贼逼授伪官三司所推问未了者一切放免其贼中守本官至各方选曾受駟驰既宽刑典免其贬降并至来冬放选合得官时仍委所司量事轻重注拟其已贬官续有处分【乾元元年六月】

受贼伪官令均平改拟诏

刑政之本皇王大要政事或失厥中帝道则有乖於御下王者所以持平慎恤盖在於斯朕缵服鸿绪躬临庶政何尝不内轸泣辜之念外覃解网之恩诏书所下期於必当往以衣冠之任受职贼廷量其轻重俾申贬黜比闻三司处置未甚均平或同科之中升降有异或谪任之所风议不一颇招情故殊匪至公是以缙绅之间不无窃议有司奉公其若是耶又流降量移久申诏令省司类例事尚稽迟遂使岭嶂踰时积流荒之叹雨露凝泽壅如丝之旨逖听遐迩颇闻咨嗟斯乃主者殆官甚无谓也宜令中书门下类例三司先所贬官各据科目均平改拟仍审勘前後制勅应合沾恩并速处分准制合量移人亦令吏部速比类闻奏又缘顷经逆乱中夏不寧士子之流多投江外或扶老携幼久寓他乡或失职无储难归京邑眷言悯念实惻予怀宜令中书门下牒本道责取其应五品已上官并即与进改六品已下官合序用名品可收者亦量材叙用仍据中外员阙均融授官其授京官者仰本道勾当装束即合赴京授外官者各令之外任余不合授官是士流者所在州县一切安存无害公私勿令干扰【乾元二年八月】

宥田承嗣诏

臣子之义违而必惩春秋之辞服而先舍故武威以制其不恪文德以怀其自新田承嗣悞惑奸邪辄干纪律朝有彝宪当举典刑犹示含容薄令降黜冀其迁悔全彼平人而不赴所贬之官再任造端之将避回师旅绵引旬时朕犹悯胁从悞兹併命其人何罪顾悼增怀深思改过之期以救无辜之祸而承嗣果能剋责频献诚词泥首束身请归庭阙输心沥恳备在封章而正已地迺藩陲具昭诚款遂屡有陈奏達其深哀故以悔非之诚全其改枉之志翻然効顺颇用嘉之即宜与子侄家口等同赴上都当待以殊恩永守终吉岂不美欤其魏博所管官吏将士僧道耆老百姓等初因迫胁曾受駟驰或久拒官军辞不获已或徵科郡邑出入门庭皆惧於不全盖素非元恶既往之咎并与惟新一无所问或先在昭义军管内诸州军者并宜却还本贯各安旧业昭义所管官吏将士截耳军健身及家口先在魏博等州者妄有駟逼各被质留原其初心本非旧恶既因诬误先合蠲除仰即归本州亦一切莫问各守所务无相夺伦王典无私信存赏罚胁从罔理前圣嘉谋归命者必全知过者皆宥今既纳承嗣之恳请亦以虚怀舍胁从之前非悉令原免如其譎诡时日犹事逗遛国有常刑法难屡屈过期不至获罪如初诸道兵马即宜同力协心大军克期不可追悔转祸为福唯在此时至於再三非不深切想及官吏将士已下奉而行之知朕怀也

复田承嗣官爵制

昔在虞舜舞干羽於两阶而苗人服洎汉高帝遣陆贾而赦南越光武亦下玺书招附窦融然则太上以德抚人其次因其制事或有阻兵便地未纵纪律将畏刑以纾祸俟文告而斯怀则明恕之道宥有过为大其来久矣永州刺史前魏博等七州节度观察处置管内支度营田等使开府仪同三司太尉检校尚书左仆射同中书门下平章事兼魏州大都督府长史上柱国鴈门郡王食邑实封一千户田承嗣顷封壤之外或牧郡邑以下尺一之诏徵县道之师贬刺零陵式彰典宪而国家十连将帅千里旌旗军骑襁属於山河楼船鎖结於淮海而承嗣辕门宿将方面旧臣授钺持衡素经委遇乃缮甲陈备越河应敌然未离魏郡婴垒自固频遣章奏闻欵申诚至祈革心永用迁善又闻聚族兴叹恒思更新废食遗寝沉忧成疾夫为君上者承天於人兼育广覆一夫不获则曰时予之辜今河南河北之人皆朕之人也岂可不念隐恤求逞其心令其父兄乘城子弟攻取矢石之下骨肉相残邑里之间敌讎交毙而兵连祸结廩饥取资异赋急征井闾殫竭男释耒耜女废蚕桑流离冻馁挤於沟壑而欲劳师黜武必举彝章终夕惟虑诚所未忍且使苍生罹此涂炭皆由朕司牧无方朕实不德谁之过也今将损膳撤悬内省归咎以寬承嗣本身官爵仍委在彼勾当军州事不须入朝弟庭琳及子侄等凡所连坐贬降者一切释放并还本官仍依旧职掌駟使其魏县将吏百姓及宋汴过河将袁奉珪祀舜并将士等并从原宥一无所问於戏以欲使人必求诸道泽渚时禁仁有被於泉鱼麋卵不伤德可怀於鸟兽今则偃干戈之务全亿兆之人庶兹明诚上合天睠公卿百辟悉朕意焉

宥李忠臣诏

纳忠引过人臣之大节録用念功帝王之彝典虽藩镇之守秉律或亏而股肱之良懋勲斯在

不忘求旧特用优贤淮西节度观察处置使开府仪同三司检校司空同中书门下平章事汴州刺史上柱国西平郡王李忠臣纪性直方深衷厚实自然文武之器雅有将帅之才勇则本仁谋常制胜顷者王室多故戎事方殷奋不顾私义形於色远自辽海首投全军拥义勇之师徇邦家之急出入百战勤劳两河委以旌麾寄在淮右不俟驾而赴命每先期而即戎俾镇大梁实参元辅倚赖之重中外式瞻戎部之间政刑或挠虽在危急能布公忠恋阙勤诚再驰道路降服请罪至於再三言念劳臣良深悯叹酌於军志失政有惩举以朝经议勲可恕罢其方面之务省内台阁之烦论道之司仍处三公之列分土之爵尚居五等之封用亦优崇服我嘉命可检校司空同中书门下平章事散官勲封如故朕与功臣本同休戚其於任遇岂易始终庶将传庆子孙寧止保其禄秩凡百卿士宜悉朕怀

宥李怀光示谕河中将士诏

间者变兴京邑朕播越奉天李怀光仗义帅师自远赴难逆党奔溃危城解围録其茂勲嘉其明节所以任崇元帅位极上台而禄位满盈思虑回惑信受间谍自生疑贰昔以匡服大计籍其成功晓谕将相礼代殊厚而野心不革往顾逾甚欺诱羣帅袭夺衆军诬陷信臣拒违诏命与朱泚结固通使往反放肆凶威彰示狂逆务为刼胁迅发丑言万情失图诸将咸愤所以重兹巡狩越次梁岷违奉宗祧沦污士庶抚心自咎良增愧叹实由朕格物之诚不至知臣之鉴不精永惟此军功着王室安禄山之作乱肃宗以朔方之衆复区夏仆固怀恩之纵逆代宗用朔方之师静关塞洎朕涉此多难露处奉天内则擐甲登埤外则历险赴艰寒不挟纩夜不释戈邦固不倾寇讎斯屏竭诚致命万衆一心朕方期收复皇都策勲命赏永固休戚大报功劳岂谓余孽未平叛臣连祸临制将士莫由自申愤激於衷誓不同恶每一念此惻然疚心犹以怀光旧勲务於容贷其副元帅太尉中书令河中尹朔方等诸道节度观察等使宜并罢免改授太子太保其所管兵马委本军自举一人功高望重者便宜统领速具奏闻当授旌旄以从人欲应朔方及诸军在行营并奉天兵士春衣等时方暄热并未支給每想暴露岂遑安居今江淮转运轻货般次即至续当支遣朕知朔方将士忠顺惜朔方将士功名所以殷勤再三视远如迺斯言必信无自弃焉

诛李怀光後原宥河中将士并招谕淮西诏

朕闻自昔哲王以道化下不竭物以充欲不劳人以树威亿兆之心如戴父母兵革不试四方来同苟昧於德绥务以力胜士旅疲耗蒸黎困穷幸以成功岂云有补李怀光久从凶逆淹历岁时被服干戈略无寧息赖兹勤効是有成功宜共赐物三十万端足以充宴赏仰度支即般次归本道仍令所司叙録即超资与转改其中大将及功效殊尤者委本使速具名衔闻奏先与处分其先在河中将士亦宜赐钱宴设如本是奉天定难功臣准勅合给赏者度支排比支付呜呼自国家多难二纪於兹朕嗣位七年连兵五载追惟往事悔恨盈怀今二孽继诛诸方甫定哀彼淮右独为匪人其帅不龚其衆何罪朕晨虑夕惕念之於怀数穷战争则流祸及於天下利病之势较然相悬俾人罹殃寧我忍耻今勲贤列镇疆理有经纵未偃戈是以保境况天地之大无所不容岂令是邦永隔朝化因兹大庆使洽鸿恩诸道应与淮西接连宜各守封境非彼侵軼不须进讨仍委所在长吏明加招谕宣布朕怀李希烈若能归降待之不死其余

将士官吏百姓等一切洗涤与之更新先有官封亦皆仍旧如能去逆効顺因事建功理当甄升加以褒劝其所优赏科条并准前来处分朕思与海内去危图安有过自新虽大必宥朗然明信彰示兆人期尔庶邦自求多福无有远迩咸使闻知

放李希烈将士还本道诏

李希烈负恩作乱劫胁平人朕念生灵无辜务欲息兵舍罪累行赦令皆许自新言必再三事出诚素此朕含垢忍耻屈法为人之心天下所明知也希烈固执凶图駭胁将士违我诏令犯我甲兵今月三日遣伪署申随唐邓四州都知兵马使杜文朝率马步五千人入襄州北界山南东道节度使樊泽勒兵马与战大破其徒斩级生擒荡除略尽又於阵上生擒杜文朝及大将马坦然等此皆朕德不昭感杀未敢行致使平人胁从逆命首帅有罪其人何辜朕所以有哀悼心感事增叹犹冀改过尚可息兵再明屈已之心式洽好生之义其阵上生擒将士马坦然等七百九十人宜令樊泽给衣粮食并令放还并写前後赦文勅命宣示朕怀将士等有能向化者准赦令一切不问官爵如初其有伤痍坏支体者并委醫疗令其得所其阵上所杀人宜差由官於侧近埋瘞兼立碑记无使暴露鬱吾春和其杜文朝身领全军事得由已不得归顺力屈就擒得当日有处分诛李希烈原有淮西将吏诏 陆贄

勅反易天常悖逆人纪衆之所弃罔或逃诛李希烈蔑德背恩穷奸极暴谓神器可以力取谓生灵可以诈欺志在凶残躬行僭窃罪无所比法所难容朕以君德不修致人於祸究其端本过实在予不忍蒸黎重相攻战屡施诏命务欲怀柔抑羣帅奋发之诚驻诸军讨逐之势不憚罪已期於息人希烈曾无悛心益逞骄志虐毒滋甚吞噬无厌恶贯既盈自底夷?开府御史中丞临郡王陈仙奇忠勇有谋沉毅能断摠阖境受污之愤导三军思顺之心唱义一呼羣情响附廓清氛祲殲戮渠魁驿书上闻函首入献方隅既乂戎役其休悬赏之科是宜必信其以仙奇为检校工部尚书兼蔡州刺史御史大夫充淮西节度使仍赐实封五百户应淮西管内将士官吏百姓等顷迫凶威遂从胁制既诛元恶俱是平人除李希烈一家其余并准前後赦勅原免更无所问其将士等或本属平卢或久镇淮右素推忠义累着勲庸果能协志同谋输诚奉顺以兹节効良有可嘉委仙奇即以诸邑官钱优与宴劳其中首建谋议同斩希烈人等宜并条録闻奏节级褒赏比年以来有潜图効顺仗节着明计或未行为贼屠害者亦宜审加访察具事迹以闻如有子孙仍録名闻奏百姓等久经沦陷兼被伤痍想兹凋残实足矜悯除供当道用军之外宜复二年应被希烈差点兵马及团练子弟并放散其本额将士之中有不乐在军愿归农业者委刺史量给逃死户田宅并借贷种粮优复终身使之存济宜令尚书左丞郑叔则充淮西宣尉使呜呼往欽哉自希烈叛命於今五年王泽不通下情亦阻所宜宣我信令以释危疑敷我惠慈以慰疲瘵涤清污俗咸与惟新底绥一方以称朕意

唐大诏令集卷一百二十一

卷一百二十二

钦定四库全书

唐大诏令集卷一百二十二

宋 宋敏求 编

政事

舍雪下

重原有淮西将士等诏

放淮西生口归本贯诏

释放妖妄人李广弘支属勅【阙】

雪王承宗诏

宥淄青大将诏

赦镇州德音

雪王庭凑诏

洗涤长庆乱臣支党德音

复陈敬瑄官爵制

舍雪下

重原有淮西将士等诏 陆贽

勅乃者希烈乱常阻兵窃号污胁士衆残虐蒸黎朕志在好生诚深罪已为人受耻不忍加兵惟兹一军代着忠节果殲元恶不替旧勲询於衆情就邦兴戎人亦劳止期於小康旋乖恤下之方重致丧身之祸由朕薄德俾人不宁抚临万邦且愧且悼赖将校士旅秉其诚心邦人不惊军部抚挠以兹节効良有可嘉所宜慰安俾洽寛释应士吏人承前所有诸色过犯罪无轻

重一切释放旷然昭洗咸与更新其先请受庄宅财物者各以见管为主将士衣赐节料并家口衣粮等一切并准旧例以时给付不得停减先合优与赏设亦准元勅处分务令丰厚以称朕怀仍加晓谕各使知悉

放淮西生口归本贯诏 陆贄

勅迁徙家乡分离骨肉有生之酷莫甚於兹朕抚育兆人庶臻理道愆过不可以不罚原情不可以不矜将推内恕之心用广自新之路应从李希烈作乱以来诸道所擒获淮西生口配隶岭南黔中等道宜一切释免放归本贯其投降人等权於诸州县安置者亦任各从所适

雪王承宗诏

帝者承天子人下临万邦观乾坤覆育之施常务其曲全用德刑抚御之方每先其弘贷叛则必罚服而舍之稽於典謨亦尚斯道朕祇符前训纘嗣丕图底宁方隅荡涤氛祲上以摅祖宗之宿愤下以致黎庶之阜康思厚者生务去者杀至於包荒掩愆屈法伸恩苟衷诚之可矜则有过的无大王承宗顷居丧纪常见卖於邻封後领藩垣或受疑於朝野国恩维厚时宪未容戚实自贻宠非我絶百辟卿士昌言在庭四方诸侯飞奏盈篋竞请致讨争先出车尚复广示招怀务存容纳至於动衆事岂愿然阖境悯罗其杀伤退舍为休其士伍取陷救溺能无惨嗟以其先祖武俊有劳王室书在甲令铭於景钟虽再驾之师每从人欲而十代之宥常切朕怀近以三代私庆八表流泽广此鸿霈开其自新而承宗果能翻然改图披露忠恳远遣二子进陈表章緘图印以上闻献德棣之名部发困奉粟并竈贡烟地愿复於职方物请归於司会且天子所临莫非王略析兹旧服将表尔诚谅申効顺之心悉见纳忠之志抑而不抚何以示怀朕念此方其犹赤子一物失所寝兴靡宁忍黜乐土之人令就陈原之戮既克剪暴常思止戈予之此心天地昭鉴况常山师旅旧有功劳将改往以修来誓酬恩而迁善鑒精诚之俱切俾涣汗之载敷旷涤乃愆断在朕志复此殊渥当怀永图其王承宗所有瑕衅特宜洗雪依前守银青光禄大夫检讨吏部尚书兼镇州大都督府长史御史大夫上柱国充成德军管内支度营田镇冀深赵等州观察处置等使应成德军将士官爵实封等一切仍旧待之如初其管内四州百姓委承宗厚加安慰令守生业官吏已下各守旧职於戏祸福无门善败由已所鉴既因於克念易辙因获其就安行之维艰守在勿失凡百庶士宜知朕怀

宥淄青大将勅

勅魏博及义成军节度送到擒获逆贼李师道下都知兵马使夏侯澄兵马使朱澄等共四十七人附丽凶党拒抗王师国有常刑悉合诛戮朕以其人居污俗皆被胁从况讨伐已来时日未几纵怀转祸之计未有効欵之由情似可矜朕不忍杀况王军百姓孰匪居人诏令颁行罪止师道方欲拯於涂炭是用活其性命诚为屈法庶使知恩并宜从宽释放仍令邮递送至魏博及义成军各委节度收管馭使如缘父母血属犹在贼中或羸老疾病情切归还者仍量事优赏放去务相全贷何所疑留

赦镇州德音

门下仲尼有言诗云执轡如组审此言可以为天下也盖为圣人组修其身而成文於被故伯益赞禹则曰满招损谦受益所以报有苗夏后啓亦云吾德未至教未善故能尅有扈荀齐俗以礼化人以躬而可感於神明柔於蛮貊累圣遗教昇平旧风坚金在熔为人之所铸猛兽在柙由人之所驯因而抚之敢忘前训朕以菲德纘承鸿绪属先皇扫刷中?康济兆人八表晏然五兵咸息常兢怀於继述思致理於和平岂以乐战为心佳兵在念而镇州以承宗云亡自归诚歟幽州以刘总悬志愿释兵符相继来同无思不服非服勤於远略力以致之亦能绥柔咸加霈泽不爱金帛以惠於戎士不吝爵赏以宠其偏裨复以一二台臣尝推谨愿庶将朕志以靖方隅而佚於既安莫能思患曾未累月旋闻叛离朕亦欲因其人心命将兴师顾念弘正尽忠先朝身婴残害家受屠戮为之元首能不痛心是用下制先申告谕求其凶恶冀释幽冤仍令四面节度各守封境不欲遽加诛讨所望自効忠诚而将士等惧罪以相保王庭凑为衆之所迫固其封壤扞以兵锋每闻战争永言黎庶为之君父又可忍乎是用辍食忘寝书夜万虑恭惟烈祖之训必用兼爱之心务以安人为国本不以穷武为威力顾予寡昧敢忘遵承为追念而兴师已极君臣之分为轡忧而舍罪岂非帝王之道况王庭凑仓卒之际固非始谋接之以恩荣自当展其志义委之以戎镇必冀效於勲庸祸福无门行之则是弛张在我用亦何常苟推信诚便保忠顺苟得其衆孰非吾人擢而任之式示光宠宜特舍雪仍授检校右散骑常侍兼镇州大都督府长史御史大夫克成德军节度镇冀深赵等州观察处置等使应成德军将士官爵一切依旧待之如初仍令兵部侍郎韩愈充宣慰使於戏朕於彼三军惠非不至於彼闔境恩非不周今弘寛大之典以应阳和之令使离散者见亲爱之乐暴露者归室家之安各宜感悦以就宁泰布告中外体朕意焉主者施行

雪王庭凑诏

帝王之御大器也上法天意下顺人情何尝不欲舞干羽之报以致怀来涤尘垢而弘惠贷朕以寡昧获守昌图享二百余年之丕基纂十三列圣之洪业而涉道犹浅烛理不昭德未洽於生灵信未孚於微隐至使河朔残梗藩臣阻絶既多在于之责每轡纳隍之念顷者沧州拒命将帅专征有国彝章非朕敢赦谅功成九伐当事止於一方况成德本军早列勲籍庭凑初意亦献嘉谋因缘细微互构瑕衅且闻朝廷已挂刑书虽欲上陈固难自達及沧德翦定甲兵偃戢拜章辨数纳疑隣封爰悬台臣俾通王命备闻恭惕延望私恩感激而情动三军欢呼而声驰四郡朕猥居兆人之上常惧一物失所虽外示君臣之义实内犹父子之亲岂可使覆载之中不沾雨露照临之下独隔辉光断自予衷靡聽輿议既改之而不愆则得之而如初俾服官荣载膺寄任爵服尽在恩礼用加其王庭凑可依前授金紫光禄大夫检校司徒兼镇州大都督府长史御史大夫上柱国太原郡开国公食邑二千户充成德军节度镇冀深赵等州观察处置等使於戏天道之所助者曰顺人伦之所重者曰忠为君在於不疑为臣在於不贰然後上下交畅以底泰宁当弘令猷勉收来效凡百卿士宜体朕怀

洗滌长庆乱臣支党德音

門下皇王之令凶慝必寘於嚴誅天地之仁含育亦存乎在宥除惡務絕其根本原情必諒於
親疎慮興誹誤之嫌用安反側之舉寬弘之典盡滌瑕?追惟長慶之初亂臣賊子之輩人神共
憤覆?不容頃以論刑是從流竄而東宮親昵之黨亦參帷幄之謀顧偷冒以取恩陷君父於
不義必資懲創以蕩奸源議法當然非朕敢赦而曾不知過交構流言興謗道途扇惑人聽蓋
以從前搜捕未盡巢穴猶存再令根尋果獲支黨无非近戚咸伏其辜於臣節而既虧於國章
而難追外廷徵兵欲戍邊塞此皆狂詐扇動人心況今边上甲兵足以備御欲令知委故重宣
明仍委所在節級將以此告諭昔者堯舜之俗比屋可封虞芮之人讓畔可感仁義則水火可
蹈忠信則蜚貊可行由是言之亦在化之而已逮我長理何其遠哉豈朕之滿假荒寧自聖而
不可教也將朝之魁梧骨鯁自持而莫我念邪二者之來皆朕不敏內省終夕其心浩然於虛
封域之中干戈作矣廊廟樽俎無忘弭寧布告朕懷以須良善主者施行【長慶元年八月十
四日】

復陳敬瑄官爵詔

大海所以長百川者下流必納大地所以載萬物者有質皆容?後體之事無常世吊人拯溺則
糞發王師錄舊棄瑕則大開法網斷自朕志又何愧焉陳敬瑄發迹禁軍遂各居大鎮因緣遭
遇窮極寵榮先皇帝頃屬艱難遂至巡狩敬瑄當鎮都會頗罄忠誠大則有天下赴難之師皆
求宿衛次則有官司奔走之吏重剋朝廷玉帛波輸梯航露集實竭勇智備極經營庭支日費
而未省告勞供饋星繁而竟無橫斂全由盡節果叶中興朕初奉宗祧未熟政理遽忘前績俄
至興師責楚子之包茅爾雖曠職望公孫之豆粥予亦無恩致我勞臣冀明素志近者視朝無
事乙夜觀書則盧綰之在四夷尚堅夙衛周勃之居一縣足表厚誣前史具存殷鑒何遠矧朕
冲眇敢忘勲勞相印兵符高爵顯位既從昭雪寵加如初勉思禍福之門重契君臣之分抑人
情而遵天道既已無疑思福善而滅禍盈使當自省王建顧彥朗等久屯師旅頗罄忠勤盡懷
頗伏之謀俱奉及瓜之戍眷言勲効常所嘆嘉今則大布寬仁永安誣誤在稟垂囊之令勿辜
偃革之恩便令部領師徒各歸所任其回戈將士等仰彥朗王建以奉本道上供錢物量事優
賞乞奏兼聞楊晟等深知逆順首率歸投陳勁草之心備宸輿之禮書之信史永播忠規敬瑄
重作藩侯列牧復為州將勉斯如叶以保初終無構厲階重貽伊戚敬瑄可開府儀同三司太
師兼中書令成都尹上柱國潁川郡王食邑四千戶食實封八百戶充劍南西川節度副大使
知節度事管內觀察處置統押近界諸蠻及西山八國雲南安撫制置營田供軍糧料等使於
戲刻舟求劍取笑古人膠柱調弦故難忘理以茲通變冀息干戈苟有利於蒼生又何辭於改
作布告遐邇咸使聞知【大順二年三月】

唐大詔令集卷一百二十二

卷一百二十三

<史部,诏令奏议类,诏令之属,唐大诏令集

钦定四库全书

唐大诏令集卷一百二十三

宋 宋敏求 编

政事

购募

募擒王世充爵赏诏

购杀武元衡贼勅

平乱上

平窦建德赦

平王世充後赦

平辅公佑赦

皇太子建成齐王元吉伏诛大赦

平内难赦

收复西京还京诏

收复京师诏

至德二年以收复二京大赦

平朱泚後车驾还京赦

购募

募擒王世充爵赏诏

世充僭逆苟逼黎元向化之途无由自达朕恶烦百姓不欲兴戎久厌兵威未穷征讨然而纵逆弥甚暴虐不悛悯彼方隅又遭涂炭贼既粮尽计竭衆叛亲离恶稔贯盈亡徵已见今则分命骁勇步骑齐趋直指洛滨冲其巢穴招降纳附拯救阽危务在安人岂求宝利兵马所到有因事立功擒凶制胜者重颁爵命厚加褒赏其金玉宝藏分赐士卒酬赏之科仍依别格宜明申布咸使闻知【武德三年七月】

购杀武元衡贼勅

朕以不德恭临万邦不敢自逸每怀兢惕而凶狡窃发殲我股肱是用当宁废朝通宵忘寐永怀匡辅何痛如之宜亟搜擒以摅愤毒天下之恶天下共诛念兹臣庶固同愤激宜令京城及诸道所在同捕逐有能获贼者赐钱一万贯仍与五品官以有官序量加超授如本虽同谋或曾停止但能纠告当舍其罪仍同此科敢有藏匿全家诛戮布告远近使明知之【元和十年六月】

平乱上

平窦建德赦

自隋氏失驭致民流离盗贼交侵区宇离析喋喋黔首俱被焚溺之灾元元无辜并困豺狼之吻朕受天明命君临八极克除暴乱大拯氓黎声教所覃无思不服唯彼赵魏尚隔朝风建德往因丧乱连羣结党窃州?邑擅置官僚叛换一隅恣行凶虐朕愍彼河朔久遭涂炭纳隍軫虑无忘兴寝但以凋弊之後恶烦士衆且事含弘未先讨击然而游魂放命数贯稔盈驱率犬羊图为侵斥与王世充欲相救援辄来举斧以抗天军兵威所临丑徒崩溃生擒建德囚致军门凡厥徒党皆就虏获历稔逋复一举廓清荡涤生民与之更始可赦山东诸州为建德诖误者自武德四年五月八日以前皆赦其罪

平王世充复赦

诏曰天生蒸民树之司牧光宅区宇抚字黎庶日月照临文明於是统极雷雨作解顺时所以布化往者隋季道衰刑政废缺九服云扰五岳尘飞率土之民坠於涂炭瞻天踊地控告无所朕愍彼横流志存拯溺投袂鞠旅肇建义旗伐暴除残克宁宇县灵祇叶赞遐迩乐推归运所集祇膺宝位戡剪多难抚辑遗民溥被万方情均覆育然而世充方命扰乱周朝建德游魂?刘赵魏虐害良善阻絶朝风古念匪民久罹凶毒满堂之乐犹有向隅纳隍之叹无忘旦夕是以出车命将伐罪吊民宗庙威灵卿士效节旌旗所拂丑徒冰泮三凶授首万方廓清书轨大同氛祲澄荡边侵解析燧燧无虞振旅休兵涂歌里忭既九围宁谧八表乂安思与吏民厉精更

始朕惟寡德政道多违陰阳不调致使亢旱深思惕惧震悼於怀解网崇恩宜流恺泽可大赦天下自武德四年七月十二日昧爽以前大辟罪已下已发露未发露悉从原放自武德二年十二月三十日以前亡官失爵者量听叙用天下民庶给复一年其陕鼎函虢等六州供转输之费幽州管内久隔寇戎给复三年身死王事量加褒赠律令格式且用开皇旧法孝子顺孙义夫节妇所在详列旌表门闾奇才异行随状荐举高年惇独量加赡恤

平辅公佑赦

诏曰自有隋失驭盗贼交侵四海羣飞六合云扰上天降鑒爰命朕躬戮尽凶灾廓清宇县然而江湖之外水乡僻远向化之民未能自達逆贼辅公佑构扇凶丑蚁聚蜂屯侵虐黎民摇动城邑悯兹涂炭义在吊抚命彼偏师聊申薄伐沿流而下乘机剋定氛祲清荡遐迩义安文轨大同朝野咸庆今朱明戒序时方长育宜顺天心播兹大惠可大赦天下自武德七年四月一日昧爽以前大辟罪已下已发露未发露系囚见徒悉从原免凶恶刼贼官吏枉法受财主守自盗及常赦所不免流配已上者并不在赦例亡命山泽收藏军器百日不首复罪如初其江州道行军经涂攸远非无劳供运转输及从军役者并宜给复二年从军内有犯罪除解官人立赏勲效者并复官爵仍依本品随才处分扬越之民新沾大化见在民户给复一年其与贼同心共为逆乱者非被迫胁情状难原者不在赦限

皇太子建成齐王元吉伏诛大赦

朕恭膺宝位临驭万方绥育黔首於兹九载欲仁惠之政達於天下德义之方孚於宇宙岂谓莫大之衅近发萧墙反噬之恶灭於天性皇太子建成戚居嫡长属当储贰处以少阳冀克负荷光昭远近狎比羣小听受邪谋蔑弃君亲离阻骨肉密图穀逆潜为梟獍司徒齐王元吉寄深磐石任惟翰屏宠树既厚职任非轻背违天经协同元恶助成隐慝遞相驱扇丑心逆迹一旦尽彰惟彼二凶罪穷数稔祸不旋踵自取屠戮念兹丑恶慙恨盈怀今祸难既除氛祲澄荡国步夷坦政道惟新思与万民涤除更始可大赦天下自武德九年六月四日申时以前罪无轻重已发露未发露禁囚见徒悉从原免凶逆之事止有二人自余徒党其被誑误一无所问各从洗荡其僧尼道士女冠宜依旧定国朝之事皆受秦王处分

平内难赦

大盗移国朝有贼臣见危受命家多义士朕以凶閔触绪靡清奸?构祸倾陷宗社潜图欲发机兆未萌相王第三子临淄郡王某糾合同盟忠勇奋怒志除凶党保护邦家逆贼韦温马秦容叶静能宗楚客纪处纳武延秀赵履温杨均业等密行鸩毒先圣暴崩朕志不图全枕戈泣血风云玄感情计陰通太平公主男卫尉卿薛宗疎与前同州朝邑县刘幽求总监锺绍京日夜共谋誓诛逆党凶徒惊恐投窜无所今天衢交泰氛祲廓清宜由靖难之恩以纪升平之化自唐隆元年六月二十一日昧爽以前大辟以下常赦所不原者咸赦除之其逆贼头首咸以斩决自余支党一无所问内外官三品以上赐爵一级四品以下加一阶某讳可封平王实封一千户赐帛五千段锺绍京可银青光禄大夫守中书侍郎颍川开国公食实封一百户赐物一

千段前同川朝邑县尉刘幽求可朝议大夫守中书舍人仍参知机务中山县开国男食实封二百户利人府折冲麻嗣宗可云麾将军行左金吾卫中郎将赐物一千段

收复西京还京诏

圣人有作?矢爰兴历代已来征伐靡废自逆胡已死余孽犹存所统蕃人多以利合亦有因事从便被胁强从朕誓雪国仇余无所问中夜痛愤志安苍生其假息偷生披城自守鼎鱼幕燕何以论慈广平王及各诸将分队夹攻迎军破败横屍遍野积甲如山二十里可知多少其中逼迫同被杀伤言念於兹良深悯悼今兵马乘胜便取东京平卢节度兼令契丹五方又收河北天下之事计日可平缘京城初收要安百姓又扫洒空閒奉迎上皇以今月十五日还京一应供顿务须减省事除愆尤官别优赏宣示百姓令知朕怀【至德二年十月】

收复京师诏

国家出震乘乾立极开统讴歌历数启圣於今文物声明握图六合安祿山夷羯贱类顽凶残孽复以扞边有功专制方面同人者貌谓报効恩私异人者心乃包藏逆乱以为中原无備干戈可动而毒深流祸变起仓卒涂炭万姓兴言痛愤朝市之内忽肆凶残衣冠之中咸被点污朕作人父母志雪国仇是用中夜奋发提戈问罪自灵武聚一旅之衆至凤翔合百万之师亲总元戎扫清羣孽出师之日仍下寛令殲厥渠魁余无所问有能翻然归顺自缚军门复其官爵仍加优将士等以大军一举玉石俱焚元恶就诛凶残并戮僵屍遍野正马不遗今西土罢兵咸以宁辑河洛氛祲一朝剪除广平王俶受委元帅能振大声左仆射子仪决胜无前成大业复有回纥叶护及云南子弟并绪番人马等皆竭诚向化助战贾勇事同破竹易若摧枯朕入城之日百姓等咸思戴商复喜覩汉烟云风景皆是祥光里巷欢呼唯闻相庆朕早承圣训尝读礼经义切奉先恐不负荷今复宗庙於函洛迎上皇於巴蜀导銮輿而反正朝寝门而问安寰宇载宁朕愿毕矣且复人将有生敢当天地之心必兴王在德实凭社稷之佑京城百姓诸道耆壽百姓比者时谷翔贵新刍不给困穷之极朕尝系心缘初收京城仓库未积国用稍足岂忘施惠其诸色行人因阵败没并坊市百姓及诸色番胡召募并本是元恶凶党昨因破贼所在潜藏并仰於府县及御史台陈首一切原其罪如有不首被人言告捉获者并从军法其京城内外文武官有受贼补署罄其心腹自祖及父皆承国恩就逆背顺顽志臣节或有守旧官者请俸料为贼判事者或判事之际中间得替免有掇贼伪官兼知职掌其中有京官外官及前资白身皆受擢用其中有隐迹不出故辞疾病色类既广人类又多宜令御史台宪部大理三司据状勘责条件闻奏其有外官充使及先有职掌并事故及隔絶未赴任在城者亦委三司勘责奏闻又贼中台府坊市所由人等比与逆贼追捕皆是事端损害忠良仍夺财物为蠹尤甚情不可容宜令崔光远禁身切推按鞫具状闻奏勿令漏网其内侍省及左右龙武羽林军闲廐飞龙诸武官应先合从驾人等其中临行潜避遂受贼驱使各并委本司使括责量情状轻重奏闻其有隐盗仓库及偷刼逆贼家钱或受贼寄附与贼货易与贼请禄料等因此隐没者并限勅到十日内各於所由陈首其物便準数送纳本处并还不须科罪虑以有破用徵纳难辛仍舍分放三分以弘寛待其近日逆人及隔絶人庄宅宜即括责一切官收又闻人家子女多被侵逼且非本情一切不须寻问或与逆贼所居住隣近及作意故往来情非

切害一时之事有殊逆党宜释放其有受贼伪度人宜令所司括责并勒还俗其僧道各改本色所在寺观勿许居止今西京无虞三灵通庆可以昭事其事宜在覃恩待上皇到日当更有处分咨尔有衆知朕意焉【至德二年】

收复两京大赦

诏曰轩辕有版泉之战帝尧有丹水之师汤有葛伯不祀周有玃狁孔棘古之王者奉若天命不敢不治乱常干纪不得不诛日者逆?猖狂敢行称乱朕嗣守鸿业钦承睿图枕戈尝胆抚劒泣血罔不夙夜若涉春冰赖天地疾感社稷凭怒上皇丕烈万国允怀因时致讨为人请命由是义夫奋发田纥籍兵邦圻閔辅之士汧陇河隍之衆沙朔羌戎之骑微卢蛮貊之人万里云趋四方雾合既张我伐咸启乃心蠹兹蜂虿之余尚负螳螂之力自京南合战洛北追奔百万摧锋一戎而定昔夏以有穷之乱克之者四十年汉以新莽之篡复之者六千日从无岁周末再氛祲廓清风振海而波荡雪破山而石裂寰区重开日月增辉此皆三灵叶赞累圣垂祉岂予小子能集大勲须以先扫宫室奉迎銮驾紫宸初正黄屋未归耆老之顒望则深庭闱之依恋犹积所以自天之泽必本於承顔作解之恩尚稽於俟命今六飞届正万姓昭苏义奉君亲庆深家国不失旧物与俗惟新宜弘肆眚之典共喜以康之福可大赦天下常赦所不免者咸赦除之其逆人能自投降率衆欵附及杀获逆人具以郡县军城降者并加超赏应与安禄山同谋反逆枝党及李林甫王鉷杨国忠等一家并不在免限开元及蜀郡灵武元从功臣有守土没死王事者并加优赠各与子孙一人官乘輿幸蜀天步多难人心且摇无复固志太子太师幽国公韦见素开府仪同三司内侍监齐国公高力士开府仪同三司右龙武大将军颢川郡公陈玄礼开府仪同三司左龙武大将军田长开府仪同三司左龙武大将军张崇俊特进右龙武大将军杜休祥等勇不顾死危能致命或竭诚羽翼仰北辰而环拱或叶契心膂聚东井以全归畴兹锡祉之永以誓带河之义见素加开府仪同三司实封三百户力士加实封三百户玄礼进封秦国公实封三百户长进封雁门郡公崇俊进封南阳郡公休祥进封冯翊郡公各实封二百户朕恭行天罚誓兵朔野幸以一旅之衆遂成九有之师言念经纶岂忘締构银青光禄大夫尚书右仆射裴冕识宇冲深体局贞固输忠佐命肇契兴王加开府仪同三司封冀国公食封三百户光禄大夫殿中监同正员判行军李辅国志除凶恶忠诚济危加开府仪同三司殿中监依前判行军事封成国公实封五百户银青光禄大夫宗正卿兼工部侍郎李遵义功维成勲参定国家加特进封郑国公实封二百户开府仪同三司兼鸿臚卿同正员中军都知兵马副大使管崇嗣能训戎律以佐兵权进封钜鹿郡公实封三百户中军都虞使特进兼鸿臚卿同正员李鼎加开府仪同三司进封保定郡公云麾将军右卫大将军右羽林军宿卫内供奉王玢加特进太原县侯仍各实封一百户自寇戎奸宄王师未攻瞻言京邑尚聚犬羊广平王俶修学好古令德孝恭志存邦家誓雪仇耻爰鞠其旅元戎启行可封为楚王食实封二千户银青光禄大夫尚书左仆射兼武部尚书同中书门下平章事兼灵武大都督府长史单于安北副大都护持节充朔方节度关内支度营田盐池押诸番部落副大使节度事六城水运朔方管内采访处置使子仪才光三杰功格十臣克焯皇威载昌天叶加司徒兼尚书右仆射进封代国公食实封二千户平章事已下并如故开府仪同三司兼鸿臚卿同正朔方右厢兵马使同节度副使姑臧县子仆固怀恩进封丰国公实封三百户开府仪同三司兼右金吾卫大将军同正仍充四正伊西北庭行军兵马使李嗣业履险忘危破敌匡难兼卫

尉卿同正封虢国公食实封二百户银青光禄大夫守司徒兼户部尚书同中书门下平章事进封冀国公鸿胪卿大原尹北京留守河东节度副留使蓟国公光弼全德挺生英才间出干城中侮生甲安边可司空兼兵部尚书同中书门下平章事进封蓟国公食实封八百户开府仪同三司御史大夫兼工部尚书持节先招讨西京并定威武武兴平等军兼关内节度河西陇右伊西四镇行军兵马使王思礼养锐先声蓄奇後殿可开府仪同三司行工部尚书兼御史大夫封霍国公实封五百户光禄大夫太常卿同正兼御史大夫淮南西道节度采访使颍川太守来瑱可开府仪同三司兼御史大夫封颍国公余如故特进太仆卿南阳太守兼御史大夫权知襄阳郡事金乡县公鲁灵蘊是韬略副兹节度可开府仪同三司兼御史大夫封祁国公仍各食实封三百户兼京兆尹持节充京畿采访计会招召宣慰处置使崔光远毁家成国制命前茅可特进行礼部尚书封邺国公食实封三百户开府仪同三司李光庭慎固封守克敌殊勲进封范阳郡公食实封二百户贤非后不享后非贤罔义社稷之任必在良臣左相留晋卿忠不忘君才惟济代弼成大业保义王家可特行侍安封韩国公食封五百户宪部尚书同中书门下平章事李麟蘊德成务含贞轨物发挥常业润色皇猷可金紫光禄大夫刑部尚书同中书门下平章事崔圆允厘庶绩康济艰难一匡天下大庇生人可特进行中书令赵国公食封五百户朝散大夫守中书侍郎同中书门下平章事河南节度采访处置使赐紫金鱼袋张镐谋猷惟允网纪立程总兹戎律懿是谋府封南阳县公余如故银青光禄大夫太子少师房琯尝以经术辅导朕躬加金紫光禄大夫清河郡公银青光禄大夫守太子少保嗣虢王匡顷以宗支居守京邑加金紫光禄大夫越国公岨兼总元戎克寧全蜀可赐金紫光禄大夫户部尚书银青光禄大夫守吏部尚书银青光禄大夫守礼部尚书李岷馈军周给开物成务可光禄大夫行御史大夫兼京兆尹封梁国公中大夫文部侍郎赐紫金鱼袋苏震供亿蒸徒临事益办可银青光禄大夫行吏部侍郎其赴蜀郡灵武元从官及在路扈从官三品以上与一子官已下与一子出身六品已下量与进改功臣将士勲业高者当别有处分应见任五品已上当别各与本官阶其阵亡人令所在郡县收骸骨瘞埋具酒食致祭谅与追赠其家给复三载诸郡县或隔絕贼境则困於凶残或犒宴官军则弊於贼歛其来载租庸三分放一分其天下百姓应诸色自徵及欠负官物一切放免宜令中书门下简使即分道宣慰往郡县审问百姓间利害有须厘革处置者一一奏闻其园苑内有闲地安闲廐使总监各据所管地界耕种所收草粟以供军马其宫女及狗豹鸡雁之类宜即停减屋宇车舆衣服器用并准或珠玉宝劔脱金泥织成刻绣之类亦然学官则精选务令讲习简择郎官有堪任太守县令者委京官清资五品已上及郎官御史开荐其郡县官有灼然清白理行尤异百姓中孝悌力田不求闻達者宜委采访使闻奏其文经邦国学究天下博於经史工於词赋善於著述精於法理军谋制胜武艺絶伦并任於所在自举委郡守铨择奏闻不限人数其律令格式未折衷者委中书门下简择通明识事官三两人并法官一切则定近日改百官额及郡名并官名一切依故事顷以上皇在蜀朕亦居岐蜀郡宜改南京凤翔郡为西京西京为中京蜀郡改为成都府凤翔郡府尹以下官寮并同三京名号吴山改为吴岳其祠享官属并准五岳故事天柱山老君庙改为洛圣宫京五品以上官上郡太守及见在无官及官卑者并与五品官父祖先亡歿者赠一人官祖母亡歿亦追赠邑号忠臣事君有死无贰烈士狗义虽没犹存其礼愷卢奕顏杲卿袁履谦许远张巡张分然蒋倩龐坚等即与追赠访其子孙厚其官爵家口深加优赏其内外文武官有遭逆贼杀害及申赴本朝并逃难山谷其父子兄弟伯叔等与贼捕捉损害及谋翻成人言语泄漏因遭贼戮并勘实奏闻当与追赠天下耆老八十以上版授有差并赐绯

鱼袋太原遭围逼给复三年上兵等郡县坚壁多时力穷方下絶食尚守情亦可矜宜各给复三载其好時奉先两县进退御寇徵求复多各给复三载蜀郡上皇亲幸万乘久居明年租赋且依常式起後载给复三载良姊张氏脱望气如归当能见节可册为淑妃进封南阳郡王杰为朝赵王新成王仅为彭王穎王间为兗王第七男佖封涇王第九男徭封襄王第十男佖封兴王第十一男倓封杞王第十三男侗封定王俶已下所司择日即行册命虽知子之明慙於往哲而伏亲之义盖所随时特盈尊师及仪王以下各赐全物五百疋诸掌公主各与一子官嗣郡县主各与一子六品官皇五等已下及九庙子孙及亲等人见任者并与转改内外文武官三品已上赐爵一级四品已下各加一阶应纪叙三品五品量加減两考蜀郡凤翔扈从官九品已上更赐勲两转溥天之下赐酺五日主者施行

平朱泚後车驾还京赦

门下致理之体先德後刑礼义兴行故人知耻格教令明当则俗致和平然後奸匿不萌暴乱不作古先哲后莫不由斯国家受命百七十载八圣储庆敷佑下人迈种寬大之德累蠲苛酷之令盖仁之所积者厚故泽之所流者深兹予小子获主重器暗於治乱之理溺於因习之安授任不明赏罚无当立法以齐衆而犯命愈甚兴戎以除害而长乱益甚繁赋蓄奸乘衅窃发九庙乏祀兆人靡依猘肆其吞噬豺狼聚於宫阙岁未云半载罹播迁仰慙穹昊俯愧臣庶致或賁越苟全眇身诚惧益纵寇讎重辱宗社忍耻誓志庶补前愆赖亿兆之心不忘先德将帅戮力恭行天罚俾予寡昧再膺多祐乾纲於既紊复天柱於将倾言旋镐京不改旧物宗祧以序朝享有期责重庆深弥增感叹呜呼君者所以恤民也君若失位民将安仰朕既不德致寇兴祸使生灵无告受制凶威苟全性命急何能择或亏废名节或贪冒货利陷於法网事匪一端其所由自我而致不能抚之以道乃欲绳之以刑岂所谓恤人罪己之诚含垢而和之义滌清污俗咸与更新可大赦天下自兴元元年七月二十二日昧爽以前大辟罪以下已发觉未发觉已结正未结正系囚见徒常赦所不原者咸赦除之今年五月二十八日已前左降官即与量移已经量移未复咨者更移近处流人及配隶罰镇効役并即放还亡官失爵放归不齿量加收叙未复资者更与进改其黜免人等有素着行能傍遭譴累特加録用勿以为负不有忠者谁复社稷不有劳者谁从巡狩连帅之重所以殿邦御戎也二千石之任所以分忧共理也方镇将校勤奉戎役中外寮吏恪居官次国有大庆所宜同之内外文武及致仕官三品以上赐爵一级四品以下赐加一阶仍赐勲两转司徒兼中书令晟膺时杰立光辅中兴再定皇都一匡天下推恩之典貽庆无穷宜与一子正官员京官侍中城沉邃忠厚服劳王家保全危城诛殛大憝嘉乃懋绩次於宠章宜与一子六品正员京官镇国军潼门节度使检校右仆射骆元光瓌京畿渭南商州节度使检校右仆射尚可孤邠宁等州节度使检校左仆射韩游环奉天行营诸军节度使检校右仆射戴休顔等咸秉大节着於艰难同勲叶忠翼我兴运各与一子七品正员官诸道节度使及行营都知兵马使都虞候兴元扈从左右金吾大将军等各与一子八品正员官诸道团练观察处置等使各与一子九品正员官应诸军赴上都收复将士俱以纯诚奋其勇节连年带甲百战摧锋有忘身以効命有亲以徇义誓平国难如复私讐竟扬貔武之雄克清梟獍之业策勲行赏传嗣荣亲播乃功名与国终始自去年冬以来未经甄叙者即与超八资改转已经甄叙者更与超三资进改三品以上祖父母父母在先无官封者量授致仕官及邑号亡者并与追赠四品以下父母在先无官封者亦授致仕官及邑号

亡者与追赠其赏钱即委所司依元赦支給应扈从将士三品以上赐爵两级四品以下各加两阶仍并赐勳三转其祖父母父母官封追赠及支給赏钱并准收京城将士例处分应扈从官普恩之外三品已上更赐爵一级四品以下更加一阶若常参官祖父母父母先无官封者量授致仕官及邑号亡者并与追赠诸州刺史普恩外赐爵一级诸道进表官陪位者进加一阶其奉天定难及元从功臣宜令本库军本使即定名闻奏所司各准元勅优赏其诸道镇军及行营将士三品以上赐爵一级四品以下加一阶仍准今年正月一日制速与甄叙成德淄青魏博等节度下并诸道运应归顺将士等各蕴诚义积着功劳由朕失於抚绥顷岁暂怀疑阻寻能励节不替旧勳是资宴犒俾洽王泽即约额支计各赐钱赏设仍委本道节度准前後赦速条流甄叙其朔方并诸道应在河中管内并同州将士等自远赴难解其重围念兹功劳并未酬报虽遭胁制情有可怜应到行营未经甄叙者并准元赦超五资改转其赏钱比收京将士例各给一半委本军兵马使速条奏闻所司即计给付其食实封者配类令其请受应天下诸道州府将士如有年老及疾患羸弱不任军旅愿归乡里者并给终身优复州县力如存恤勿令侵扰如无家业可归者给田宅使得全济见危致命先典所尚况忠卫社稷杀身成功朕於斯人义有加等赠太尉秀实天授贞烈阻兹奸邪苍黄之中独蕴神断将纾国难诡收寇兵凶谋既隳吾事果济忠诚奋发手击渠魁英风凛然振迈千古宜差官致祭并旌表门闾府县护其丧事塚葬所要一切官供仍於墓所立官碑以扬徽烈其所赐实封五百户嫡子授正员三品诸子各授正员五品官委中书门下即准元赦处分应诸道诸军将士有身亡王事委本道本使具名衔闻奏即与褒赠仍以在身官爵授其子孙内外文武官及诸亲诸色人等有横遭杀害者各听其家及亲戚於所司陈牒勘责闻奏亦与追赠如迹着忠烈衆所明知仍访其子孙量加优恤尚齿养老王风之省三代制理未或遗年朕将遵古典以兴化本人心而教孝用优秩赐式慰闾里京兆府耆壽年八十已上并与板授刺史仍赐八十已上及诸州府迎驾耆壽并与板授本县令仍赐绯天下侍老耆壽等亦各与板授本官如九十已上者州县长吏岁时躬亲省问贫弱不能自守者重赐粟帛顷属多难人俗流弊加之以师旅因之以饥馑赋役繁起农桑失时哀我瘠人汙可小息然以国计犹歉军资靡充未尽复除良增愧悼应天下建中四年年终以前所有诸色负欠在百姓腹内者一切放免百司诸军诸使举放利钱今年六月以前百姓欠负未纳者亦并停徵京兆府百姓普恩之外给复一年其供顿官吏委京兆府类例具名衔闻奏量与优赏古者计户以署吏因时而建职此不乏士亦无冗员令田亩污莱版籍凋耗齐人编户托庇官曹贪吏点胥诱为囊橐后奸隳业为害尤甚应京百司色役人及流外等委御史大夫即与诸司诸使长官审商量?见所掌事之闲剧定额闻奏仍挟名送中书门下务宜减省副朕忧人以後须署置并定名先奏仍永为恒式今年正月一日赦书节目未行者并举而行之赦书或有不该即此类条件闻奏敢以赦前事相言告者以其罪罪之亡命山泽挟藏兵器百日不首复罪如初赦书日行五百里布告遐迩咸使闻知【兴元元年七月二十三日】

卷一百二十四

钦定四库全书

唐大诏令集卷一百二十四

宋 宋敏求 编

政事

平乱中

诛李惟岳後优恤易定等道诏

平李怀光诏

平李希烈诏

破淮西李希烈诏

平李迺诏

平刘辟诏

平李錡德音

平吴元济诏

破淄青李师道德音

破汴州李?勅

平乱中

诛李惟岳後优恤易定等道诏

李惟岳蔑弃父业不率王命敢肆狂狡援结顽凶朕初示容贷伋其迁善欲明天讨未即加诛故谕之祸福先之诚诰忠良感激义勇争劝元恶梟戮方底寧定立千载之勲安兆庶之命此

朕所以当展兴怀感念成功者也张孝忠廉日知王武俊等勲书竹帛分掌方镇文武之任寄同心臂既举加封之典宜弘善贷之命其易定深赵恒冀节度观察管内幕府将士州县官吏比在迫胁之中制非由已今元恶授首理合惟新以前过犯舍而不问自官军出征所有诛戮并令州县瘞埋勿令暴露有家属者并许收葬管内百姓除本道所用外者给三年

平李怀光诏

朕闻自古?王以道化下不竭物以充欲不劳人以树威亿兆之心如戴父母兵革不试四方来同苟昧於德绥务以力胜士旅疲耗蒸黎困穷幸以成功岂亦有补李怀光出自戎伍颇着忠劳拔於等伦授以旄钺誓师河朔奔难奉天秉心匪彝自底不类怙衆贪乱附奸胁君朕用再迁几危宗社泊股肱宣力贼泚就诛率土之人咸怀奋激朕独排羣议未忍加兵命复官封志期全贷昏迷不返悖慢逾彰残害使臣侵败王略上帝悔祸元臣叶谋克集茂勲以夷大难盖以诚信未着抚御失宜至使功臣陷於诛戮谓之尅敌能不愧心然以怀光一家在法无舍念其昔居将相尝委腹心罪虽挂於刑书功已藏於王府以奸诈之迹固合灭身以赴难之勲所宜有後务从寛宥俾洽幽明宜以怀光男一人为嗣赐庄宅各一所仍还怀光首及屍任其收葬其怀光妻子孙在室女等并迎逋澧州委李臯遂便安置使得存立其出嫁女及诸亲戚并宜释放应先陷河中将士等皆因迫胁无路申明一切并与洗雪先有官爵实封者亦许仍旧河中府及同州百姓并经陷贼生业废弃兴言軫念良用悯然宜各给复三年河中保宁节度并管内诸军节度副元帅检校司徒平章事北平郡王燧惟岳降生鬱为时杰奉上有匪躬之节谋师怀尽敌之谋嘉谟屡闻能事毕备朔方河中同绦陕虢等州节度及管诸军行营兵马副元帅侍中咸寧郡王瑊坚持不夺之心亟陈必胜之略辑睦士旅崇功允集惟乃二帅其诚心奉行天诛同獎王室是加宠命以答殊勲燧可兼侍中仍与一子正员五品官并阶余并如故华州漳关镇国军节度检校尚书右仆射骆元光邠寧庆节度观察等使检校尚书左仆射韩游环鄜坊丹延等州节度观察使检校兵部尚书唐朝臣等并节着艰危功成讨罚各赐实封二百户仍各与子六品正员官并五品阶余并如故应诸军同讨怀光将士宜封共赐三十万端足充宴赏并放归本道仍令所属收叙録即超资与改转呜呼自国家多难二纪於兹朕嗣位七年连兵五载追惟往事悔恨盈怀今二孽既诛诸方甫定哀彼淮右独为匪人其帅畔逆其衆何罪诸道应与淮西连接宜各守封境非彼侵軼不须进讨仍委所在长吏明加招谕宣布朕怀李希烈若能归降待之以不死其余将士官吏百姓等一切洗涤与之更新斯尔庶邦自求多福无有远迓咸使闻知

平李希烈诏

李希烈弃义背恩穷奸极暴谓神器可以力取谓生灵可以诈欺志在凶残躬行僭窃罪无与比法所难容朕以君德不裕致人於祸究其端本过实在予不忍使蒸黎重相攻战屡施诏命务欲怀柔抑羣帅奋发之诚驻诸军讨逆之势不憚屈已期於息人希烈曾无悛心益逞骄志虐毒滋甚吞噬无歇恶贯既盈自取夷?开府仪同三司兼御史中丞陈仙奇忠勇有谋沉毅能断摅阖境受污之愤导三军思顺之心倡义一呼羣情向附廓清氛?殲戮渠魁驿书上闻函首入献方隅既乂戍役其休悬赏之科是宜必信检校工部尚书蔡州刺史御史大夫淮西节度

仍赐实封五百户应淮西管内将士百姓等顷迫凶威遂从胁制既诛元恶俱是平人除希烈一家其余悉从免宥更无所问将士等悉委仙奇诸色官钱优与宴设其中道首建谋李同斩李希烈等宜并条録奏闻节级褒赏百姓等久经沦陷兼被伤夷想兹凋残实足哀悯除供当道军用之外宜给优二年将士之中不乐在军愿归农业者委节度使刺史量给逃户田宅并借贷种粮优复中身使存济宜令尚书左丞郑叔则往淮西宣慰嗟乎自希烈叛命於兹五年上泽不通下情亦阻所宜宣我信命以释危疑爰敷惠和以御伤瘵涤清污俗咸与惟新底绥一方以称朕意【兴元年】

破淮西李希烈勅

勅朕纂奉丕业托於人上仁不被物义不胜奸颂声蔑闻暴乱连起叛臣希烈窃拒淮沂诚彼夫无良亦由朕不得抚御之道失之於始师旅一兴绵联莫解服劳者从役不暇受污者无路自新通邑化为丘墟遗骸遍於原野每念及此心伤涕流且自昔劳师靡有不悔以虞舜之圣屈於苗人汉武之强弊於戎虏矧乎德犹不逮力或未全我其永怀亦已自惊乃者下哀痛之诏布寛大之恩普天载新殊死毕宥然则尚劳师旅作梗封陲有累岁离弃家室有经时不解甲冑忠虽为国咎实在丁君人若斯寧不知愧赖将相士旅一其诚心奋扬武威慎固疆宇远人思服元恶既诛蒸黎方致於安寧役戍永期於休息懋官以旌美赐宴以劳旋赏不逾时式遵彝典都检校司空同中书门下平章事刘玄佐宜与一子正员五品官节度使检校尚书右仆射兼御史大夫李澄检校兵部尚书兼御史大夫典环检校户部尚书兼御史大夫樊浑等与子孙一人六品正员官防御使兼工部尚书贾耽都团练使检校左散骑常侍兼御史大夫卢玄卿御史大夫张建封等并与子孙一人八品正员官检校司空同中书门下平章事李抱真检校司空同中书门下平章事李纳检校尚书左仆射同中书门下平章事韩滉检校户部尚书兼御史大夫田绪等并追将士五千人赴河南行营同讨不庭厥有成绩抱真纳滉绪并与子孙一人六品正员官应与淮西接界州县本军镇守及诸道赴行营将士等宜共赐物三十万端足以充赏设度支郎约据界首及行营军额上配定数目逐便支送仍委本道都统节度都坊御都团练使即条録具名衔闻奏并与甄收其行营将士仍各放归本路明加宣谕令悉朕怀【贞元二年六月】

平李迺诏

干纪挟邪罪在无舍立忠効节赏不踰时善恶之理明惩劝之义着李芳劳男乃包藏奸险违背君亲悖慢朝章扇动军旅纵其豺狼之性徇其枭獍之心迫胁使臣妄有希觐厌蛊其父谋害其兄名教之所不容臣子之所同弃而又恣为不道虐及无辜伊屡说张伍刘叔向并是忠良横遭诛戮万荣卧疾不能制正永言及此深用轸怀李迺稔恶贯盈宜正刑典其伊屡说等委却三人委中书门下则与追赠仍令与一子八品正员官应在汴州将士等志坚金石节厉冰霜叶奉邦家咸怀愤激不受荧惑问疾奸凶执缚军中传献阙下勲庸特茂遐迩所知宜獎忠劳各加优赏并与进秩仍令董晋三日内具名衔闻奏仍共赐钱三十万贯委董晋逐便取盐鉄转运使钱物分给宣武军节度都虞候兼御史大夫邓惟恭都押衙兼御史大夫杜皓大将王应凤曹元偁杨燕奇刘惟清陈文朝陈沛张庭芬薛文翰赵臧周李庭光宇文澹李国信

并竭忠效诚绩用昭着惟恭可检校左散骑常侍依前兼御史大夫赐实封百二十户一子七品正员官并赐物四百疋杜皓英干并可右散骑常侍依前兼御史大夫应凤已下各加官赐贯庭芬仍同节度副使十将等二百六十五人并优与改官在城将士被李迺胁从邀逼制使者事不由已朕所深知并一切不问宋州刺史兼御史大夫刘逸淮亳州刺史兼御史大夫食封五千户许孝常颍州刺史兼御史大夫高五立等咸竭为臣之节各怀奉国之心并可检校右散骑常侍各赐实封一百户其本官并如故仍各赐物二百五十疋其三州将士令别赐钱十万贯亦并委董晋准前逐便收取盐铁转运使钱物分给仍委董晋速具名闻奏当与甄录

平刘辟诏

朕闻去天下之害者受天下之利故陈诸原野非为乐战法彼震曜本乎爱人五材不闻去兵七德必於禁暴皇王之道岂不信欤逆贼刘辟时之妖孽处肖形之内罔识君亲同人代之间别为梟獍因元臣之蓄聚恃庸蜀之江山诱误生灵扇惑桀逆朕荷祖宗之丕业邦国之大纲人之乱常法所不舍乘兹怀愤爰我徂征兴戈矛於关西发介马於并郡五营禁旅七萃神兵合貔武之雄投鹰扬之帅守无絶险进靡坚营麾城而壁垒皆空接刃而揜抢尽扫瓦解冰泮涣焉无余微卢彭濮从兹广定荡三蜀之流患除一方之大残岂予寡德能致於此斯皆宗社降佑启无疆之休将帅叶谋成永康之福祇若灵眷嘉乃衆心予怀惕然若陷氷谷其收复成都诸大将并擒获刘辟军将等委崇文与都监军使俱文轸条流等第闻奏即有甄升其赏物等委崇文等节级分赐务令复原投降将士亦委崇文轸条流闻奏西川诸州镇刺史大将及参伍官吏将健百姓等复应被彼胁从补署职掌一切不问西川百姓久遭凶逆不免伤残其两税钱等委本道观察使量事矜减其东川州县及山南西道当凶徒闻惕之後王师攻取之辰发挽馈军饷白补缺一日之贵岂止十金三军所资尽出百姓永言劳弊朕所轸怀其东川元和三年上供钱并放留州留使钱委观察使量事轸减仍具数奏闻山南西道元和二年上供钱粮放一半官军阵亡将士等并委崇文监军审勘具名衔事迹申奏即与褒赠家口等并委本军优赏五年不停衣粮并委所在州县速为收葬仍量事致祭陷在贼中官吏百姓等应有节义着明无辜受戮者并委节度使具名迹奏闻当与追赠仍优给其家不分疆设都盖资共理形或坏制亦在稍均将惩难与销明在立防而有素故贾生之议以楚益梁宋氏之规割荆易郢酌於前事宜加变通其西川资简陵荣昌泸等六州宜割属东川於戏制理经邦必垂意於未乱而养灾畜患固难策於已然扑彼燎原至於用钺永言迷复载轸具闻咨尔多士依予深志布告天下咸使闻知

平李錡德音

天地之德佐助者忠良鬼神之灵毙踣者盈贯故有无状之衅颠越以败常则有不夺之诚感慨以明节易所谓功业见乎变书所为不善降百殃积恶必至於身见几寧俟於终日应若影响昭然着明李錡受恩三朝受任千里勺水卷石以至高深润草涂原岂酌亭毒而弃我厚德稔其奸心天以肆其逆谋推法未穷其丑行乃者式举式旃申严国刑将鼓雷霆之威以诛梟獍之罪镇海军左厢兵马使兼御史中丞子良等外弘智虑内激精忠擐甲执兵取凶人之柄肝尝胆怀劲草之风回戈以掩其羽毛竟夕遂擒其魁首天府无一金之费已静江流王师无

一战之劳已降人害莫大之节卓然无伦非常之功斯谓不朽高位重赏予何爱焉殊加荣宠宜显旌劝其张子良等超异酌赏并从别勅处分其立功将士等并准平西川仍节度优赏甄叙其厢官健等素闻勅効顺亦宜沾赏并从别勅处分王澹赵錡等仗节死义杀身成仁无罪无辜受兹残酷所宜褒表并劝忠贞即加追赠故仍令州县致祭收葬其王澹如有子弟服满日与一子八品正员官如更无辜受戮及脱身効顺者亦委元素具事闻奏当有褒赠及加甄録如受戮之中长行官健勿停粮赐优给其家浙西管内官吏及职掌人若被逼胁駈使者但情非同恶一切不问每念疲亡久罹虎政而又迫於逆命駈以饋军攫歛则准以漏卮伤残则烈於猛火永言於此如纳诸隍宜申蠲贷之恩冀息呻吟之苦其润州今年秋税徵纳者一切放免其管内诸州县如李錡作乱之后横加徵剥委元素审加勘责具色目闻奏其榷酒钱亦宜处置闻奏应副伐之师如未出本界者委本道量加赏给如已出界者仰具闻奏朕惟前王之训钦慎典刑今为恶者就诛而建勲者已録应将囊弓偃革遂物之生成力穡劝农分致於富寿覆车垂永鉴之辙端展扇无为之风咨尔万方宜知朕意

平吴元济诏

朕闻天地之於万方也道深昭育而雷电震曜将时警其不庭帝王之临九有也德尚抚绥而原野师徒亦必加於有罪是以将伐而舍义在止奸祸召由人孽固难追朕嗣膺宝历?守丕图自靖乱也庸除妖海浙勘剪羣慝将期理平全保太和非欲生事逆贼元济审可稔恶凭固阻兵擅释父丧悖违君命行亏天性义絶人伦厉残忍之声豺狼是类忘生成之德泉甍为心大告屡加逆谋转甚宜用社至出军犹宜吊伐之方必冀兼讨论之命元臣统护授帙之深谋上宰专征运庙堂之诚筭羣帅毕力万旅一心战以力摧袭由奇胜李愬全师直进坚壁洞开元凶就执於城池余孽奔降於草莽雾销冰泮淮瀆水清斯皆宗社垂休人神协赞仰荷灵眷俯嘉衆诚共协勤劳式副予志惕然衷怀载益之厉颁爵授赏予何爱焉其收蔡州擒吴元济节度及诸大将等宜从别勅处分诸立功将士等委韩弘裴度行营诸道节度使速条流等第闻奏即有甄升其赏物等已令节给优厚支遣亦具别勅处分其授降士亦委韩弘裴度与诸道节度使计会条流闻奏其中有是亲差子弟兵使放归营农仍具数闻奏其淮西诸州县官吏将健等虽被胁污皆非本心除同恶巨蠹者一切不问其淮西百姓等陷此凶逆久罹残伤莫匪吾人宁忘优恤宜准元勅给复二年仍委州县长吏设法安抚其淮近贼四州自王师问罪供亿实繁频有优矜放其税赋尚虑人多困极务俾昭苏其来年夏税亦宜放免比来诸州府供行营劳役尤甚宜令放委有司条流闻奏议优恤自经战伐所有伤痍至於徇国捐躯效忠立节每加悯叹寤寐是怀官军阵亡将士并委韩弘裴度与诸军审勘具名衙事迹申奏即与褒赠其家口等并委本军优赏仍五年不停衣粮并所在州县速为收葬仍量事致祭於其家将士有因战阵伤损以致残废者各委本军厚致优恤仍给衣粮其陷在贼中官吏将士百姓等应有节义着明无辜受戮者宜令州县府长吏致祭收葬仍委节度使具名迹闻奏当有褒赠仍优赏其家先以褒赠者委长吏访其子孙闻奏当与甄録其家亦准例优赏於戏制理垂规每思去杀而乱常作逆多自干诛爰念兴师至於殄寇累年之内徵役靡宁除害虽本於爱人敷化终慙於用钺宵衣永叹所良贵焉咨尔万方宜谅予志

破淄青李师道德音

門下朕聞三光下燭懷忠秉義者其節必彰四海奠維作逆崇奸者其禍必大況乎恩有負於覆載禮自悖於君親罪盈而神怒既加惡稔而人謀乃發衆所共弃誅何可逃逆賊李師道包稔逆凶背德蔑義動皆干紀言必欺天固海岳之山川為蛇豕之池宅忘寵祿於累代恣殘忍於一方怙亂自至於身誅戮難窮於擢髮朕祇臨寶位仰奉丕圖除暴本務於好生用武尚慙於耀德肆命羣帥會兵龜蒙旗鼓相望城垒連下淄青都知兵馬使金紫光祿大夫試殿中監兼監察御史劉悟義勇中激沉謀外通據三軍向順之誠申列郡受污之憤戈首唱萬旅轉從渠魁就殲梟獍同戮載馳駟騎函首上聞氛祲廓清方隅底定功有卓異理當優崇旌善勸能用昭必信其劉悟所酌官賞並從別勅處分其同立功將士等賞物已處分支遣委宣撫使楊於陵與本道計會速條流功效等第聞奏續加甄獎魏博以全軍濟河俯壓賊垒攝推凶狡導致叶良謀作為保授既剪逆豎宜甄茂勲諸道行營咸盡忠力攻於戰取剋捷既聞應緣討伐將還之際合有宴勞賞賜等並從別勅處分委各本道條流有功將士聞奏當議甄錄其淄青管內州縣官吏軍鎮將健及諸色職掌人等久罹脇污自拔無由撫事量情亦可矜恕除同惡巨蠹者其餘一切不問其淄青道百姓等陷此凶逆久被殘傷昨同阻兵尤肆暴虐吾人是念豈忘優矜宜給復一年仍委本道州縣長吏設法撫綏其管內有高年廢疾并鰥寡惇獨貧弱尤甚者委官察到日差官存問並量與粟帛訪問比者賊中有斛皆被收納今春農時貧乏者衆恐不辦耕桑失生業者宜令存問如有此色取所舊貯斛量事給與令充種食得存濟其賊中雜差子弟夫役便放還本處其中有不能自存者量事優恤百姓商旅諸色人中有被分外無名賦歛者並當勸停自興討伐言念傷痍扞患捐軀納忠殉國良深隱憫寧舍寤懷其官軍有陣亡將士等委本軍審勘具名銜事迹申奏即與褒贈仍令本軍優賞其家三年不停衣糧並委所在州縣速與收葬量事致祭其將士有因戰陣傷損尤甚以致殘廢者各委本軍厚加優恤仍勿停解其陷在賊中官吏百姓等應有節義著明無辜受戮者宜令州府長吏致祭收葬仍委節度使到日具名迹聞奏當有褒贈仍優賞其淄青封域歷稔氛昏管內名山大川在祀典者宜令宣撫使舉本鎮計會差官備禮致祭其祀廟中應緣陳設器服等物是賊中所置者並宜廢撤特加修援用處致誠於戲朕恭已向明撫御九有推情以恕出令在寬而凶逆反常自貽天討迷於告諭速彼誅鋤轉禍必有其忠臣為亂竟同於覆轍既除逋寇庶洽大和偃戢干戈諒從此始布告遐邇咸使聞知主者施行【元和十四年二月二十一日】

破汴州李?勅

勅理天下者務於安遐迤致康濟者資於懷兆人朕統馭萬邦式敷王度任藩方以俾乂冀干戈之載戢恭惕厲未始暫忘推懷是心布乃中外昨乃夷門逐帥逆將興師蒼黃變生黎庶無告逆賊李?駟掠忍害流離毒痛在浚之郊君鼎將鑾逼脅我軍盜竊我戈鋌駟馳外垌敢肆蜂虿朕所以不降明命未行天誅容革其心以示迷復蓋以一方軫念三面開羅將弘愛物之私用廣好生之施而梟音資戾丑狼凭凶危巢已焚禽猶自若光顏韓充曹華智興等感激忠勇揮戈誓師雷霆鼓旗所向風靡逆黨殲殄平原霧清熊黑之師漸及摩垒夫疾風朝來斯勁草方辨熾火將燎而良金益明果聞義烈之臣奮起轅門之內一揮斬首三令無喧嚴城洞開以候來師永言忠効是錫寵章其梟斬逆賊李?宣武軍都知兵馬使李質已從別勅處分忠武兗海武寧鄭清滑等軍將士等感主帥之忠誠忘身赴敵視寇仇而忿嫉決命爭登高簡以睢陽一郡之師當蛇豕奔冲之勢咸能剿其丑類如刈草菅各振軍聲用宣威略其忠武兗海寧鄭

滑应付行营及宋州将士等并节给各有赏物以别处分支给委本军据功劳额烈级散归还之时仍加宴劳朕念彼无辜坠此涂炭横为凶狡駟胁伤夷其汴州管内县州官吏军将镇健及诸色职掌人等顷罗胁污自拔无由事非获己情亦矜恕除同恶巨蠹者其余一切不问仍榜示如或妄有恐吓言告者科其反告之罪干戈暂兴里闾必害春言农亩是废耕桑其汴宋郑三州罹此凶逆士马屯集供亿殷繁虽事乃徇时而人亦劳止予怀轸念岂忘优矜其三州管内有兵马所到县百姓或被惊扰处且於今年秋税三分内量放免一分仍委州县长吏切加绥抚其贼中杂差点子弟夫役放还乡里俾安生业其中有不能自存者量事优恤应百姓中有被分外无名赋歛者并宜当时劝停义士忠臣见於死节赏功褒美冀及殇魂惠恤其孤庶明报効军有阵亡等并李?为乱已来有潜谋効顺诚节可嘉并因此遇害者并委本军审勘具名衔事迹申奏当与申獎及加褒赠仍令本军优给其家三年不停衣粮并委所在州县速为收葬董事致祭其将士有因战阵伤损尤甚以致残废者各委本军厚加优恤仍勿停解掩骸埋骨国之令典迫於凶丑良可伤嗟念其本亦吾人盖事非获己其经战阵处所有贼中遗骸随令所在州县随在收瘞勿致暴露呜呼吊伐之道予遵格言靖寇安人岂忘终日朕载橐弓矢思保黎首而雨露所均动植所系一夫窃叹朕每兴怀况兹浚郊都邑之会所以慎择将帅期於乂安今寇孽已清封壤宁息师之处用軫於中将申宥恤之恩庶息疮痍之痛布告中外咸使闻知【长庆二年八月二十五日】

唐大诏令集卷一百二十四

卷一百二十五

钦定四库全书

唐大诏令集卷一百二十五

宋 宋敏求 编

政事

平乱下

平张韶德音

破李同捷德音

诛兴元乱兵勅

诛王涯郑注後德音

诛王涯等德音

诛王涯等告诸陵诏

平潞州德音

平徐州制

平杨师立诏

平杨师立宣示中外制

平孙儒德音

平杨守亮等勅

平乱下

平张韶德音 韦处元

朕祇荷大构属当冲眇九庙之严因予以轻重四海之大由我以惨舒每怀推诚不敢自用大布利泽嘉闻说言庶无???尤少释重负岂虞信不及於物德不动於人以怀宴安遽罹此寇张韶苏玄明等駢率工徒劫携兵刃白昼窃发暴犯宫闈震惊朕躬近幸禁垒即时勒五营骑士七萃熊罴少命偏师才分左广自申及西扑?皆尽斯实上玄降鉴宗社垂休愍予冲人俾无颠覆其两军立功将士已节级优赏诸将校其日部领军士者委有司条流甄奏獎具名闻奏其逆贼亲属同知情之外一切不用追扰尚恐因缘?隙告诉平人自今已後纵为妖党有小诖误者并许自新亦不须勘问於戏秦皇车碎於博浪汉祖心动於栢人或不悟而终亡或自新而流祚齐晋多难而啓国宋卫无难而伤国盖谓忧勤则福兴安肆则祸稔天其意者警於予乎而今後知玄眷可以德归神器难乎力恃咨尔股肱辅臣庶寮百辟洎方郡侯伯有位之士无或弃予谓不可教其有违道伤理徇欲怀安面刺庭攻无有隐讳成王之绍文统武帝之开高业皆溢祚日早享国岁深夫岂他哉盖大臣维之而不跌也使朕无羞於二主者繫尔多士乎

破李同捷德音

勅王者诛暴乱恤伤残明赏报功拯弊绥衆盖为邦之大纪也李同捷顷自先朝擅谋专土辄抗成命私行墨纁暨朕临御实思含垢授之以充海谕之以诏书使臣相望凶妄自若而更挺妖结党劫衆阻兵毒流无辜害被闔境由是藩臣?悬卿士献规至於兴戈谅非得已自元戎环壤王旅进攻卵窥危巢颺振枫叶动必乘於机会退皆扼其咽喉故戴义启入郛之殊庸李佑展下城之胜略累稔逋寇一朝削平此诚天人合符中外叶力永言勲効无忘晤思其戴义及李佑应加爵命并幽州及齐德两道行营将士各有赏赐并已从别勅处分其赐物仍委度支逐便速与支送仍命使臣分往宣慰各於当处厚加宴劳其立功军将未经宠授者委戴义李佑即差次等第速具闻奏即有甄封獎用各答勲勤李同捷力屈计穷勉图转祸朕好生存信初议贷刑而面缚在途陰怀狡计夜纵火号潜诱家童更谋网漏自速臬谳悯彼凶魁坐沉家族顾兹貽戚载軫予怀其母孙氏妻崔氏并男及家口等并宜特从寛宥今於湖南管内诸州容有寛闲处安置其归将卒不涉翻覆者委戴义李佑审勘责各与衣粮分配駢使其沧景等州将士有谋执凶党竟遭诛夷或虽被罗致能全名节者并委李佑按实条奏量加赠録其沧景德棣等四州百姓有是近日被贼点名团结者并放归营农除非同恶相济以死拒命者余一切不问四州百姓久陷污俗每罹威虐莫非吾人今既脱难当施德令并宜给复一年不能自存者量给种食刺史县令仍令中书门下慎择循良俾加存抚应诸将校自经战伐或致死亡载念捐躯每深悯叹并委戴义李佑审勘定具名衔事迹申奏即与褒赠其长行官健阵亡者并令所在长吏量移与收葬同为祭酹其有家口者各委本军优恤仍三年勿絶粮赐其有因中矢石遂至残废者各委本军厚加存养仍给衣粮三年不絶勅旨有未该者委李佑戴义比类更作条件奏闻其昭义武等军行营在贼境者比相犄角皆有功勤各别有处分於戏整师除害义切於安人抚俗策勲道存於布泽爰申彝典且义新邦咨尔多士宜悉朕意【太和二年五月十二日】

诛兴元乱兵勅

乃者蛮寇入犯蜀川令兴元招募一千人随事防遏云蛮既退赏设放归莅事之间亦为得所奸臣犯乱戕害元戎遂择新师委之穷境果副朕意尽诛羣凶八百余人一时梟斩并诸叛将同日诛夷省伏念切嗟赏何极其卫志忠已下将吏等委温造节级分付讫奏闻王景延等以下遇害时皆能誓身殉节奋不顾生宜委中书门下即与褒赠其王景延仍与一子官兼委温造优恤家事务令得所宣示中外咸使知闻【太和年】

诛王涯郑注後德音

门下朕以翼翼之心孜孜求理十年之内庶政未宁日夜焦劳志存博采聿亲奇士冀获长才取其节焉不顾发迹故李训郑注咸得进言既望沃心每许造膝邪人奸色顺非而泽信行听言深心厚力包藏不轨伪辨无疑梟獍之心祸乱忽作意欲剪除中外悉去大臣志愿非常自谋安泰赖上天垂佑宗社降临同恶虽多奸谋竟败忠臣输力保护朕躬是日弭已尝敷告上闻闾里未悉予心犹有浮言谬相诳惑朕君臣之际疑间不行致此妖狂慚非惠前月二十一日王涯贾餗舒元舆李训郑注李孝本韩约罗立言王播郭行余魏逢等亲率金吾兵仗又郭行余王播领部下将健持兵上殿叶谋不轨倾覆社稷谋害中外况此凶徒悉已梟戮絕其遗类以谢庶人卿士百辟体予前志宜即自安无惑浮言尚相恐怖式布惟新之庆宜申在宥之恩京百司禁囚徒流死罪遞減一等未结正者推问毕日准此处分诸色所由长吏陷於胁从虽有名籍涉於诬误者一切不用更问仍付左右神营两金吾京兆尹御史台并准恩赦处分休更追捕其有潜藏回避者限日令出各归本司逆人亲族已处置外其余周亲已上一切不问所在更不用系留闻报其先有定名捕捉者所在寻逐获日闻奏不得漏网昨者有擅入逆人家盜掠财物拥无故之利生怙乱之心尚犹纵酒聚徒妖言惑衆志於劫掠恐吓居人假托军司辄持兵器及以前月二十一日事妄相告诉者委御史台京兆府严加伺察擒捉奏闻所在决杀不在恩赦之限於戏齐晋之难桓文是兴注训之妖朕志方定识邪正之路辨消长之言觀衆臣宣力於急难见禁旅摧凶於顷刻当时危之际识臣节之勤藏於心腑何日可忘宣示中外宜体朕言【大和九年十二月十六日】给事中臣承瑕等臣闻干纪之臣窃发之寇三代以降不能无之陛下御谋神断电击天诛刑虽慎恤人鲜幸生躬夏禹泣辜之心行成汤解网之惠纳隍軫恤释缚施仁涣汗旁流殊私遐布旬月之间再有恩荡有以见惠下愍物之心也而又大啓刑书赦除中外不疵小过恩辟大猷虽法设狴牢物无维繫咸许自新与之更始好生之德達於上玄含垢之恩洽於下土用和在宥乃圣人之心去杀胜残属贤者之事岁聿云暮节及春阳顺覆载发生之始敷雷作雨解之时则率土同心孰不欣幸臣等忝居近侍获觀德音无任忭跃庆悦之至谨奉制书如右请奉制外施行谨言

诛王涯等德音

朕以寡德祇荷图於兹十年夙夜寅畏恐至诚不達景化未敷屈已以安四方推信以待百辟不谓患生毗倚变起奸凶亦以失於任人致此氛祲朕为人父母子育生灵忧万姓之靡宁惧一物之失所况至理之代先德而後刑所以上下欣康中外清宴虑有连累即伤太和宜赏不踰时式彰褒劝其今月二十一日推难宣力功成谋议及能梟斩郑注者节级各加官赏其次立功及卓队将士合在赏给者即有差等处分其将校等合与改转委本军条流具名闻奏谋

逆之人已断腰领子戮家破俾当极诛元恶与李训郑注王涯家族除已处置外妻女奴婢并入资货产业天下所在切加检责据数闻奏其余亲党除同居知情外不同谋者一切不问诸色官吏所在由其日受逆长指令欲出力同恶者并以两军推问寻捕处斩讫尚虑因缘仇隙妄告平人自今已後纵同官司微涉诬误一切不问潜藏疑惧者许三日内各归本司不得辄相恐动韩约首为诈恶逆罪?天虽罗捕未获终天网不漏宜委御史台京兆尹两金吾速催促所由齐搜出获日闻奏如辄有人隐藏不告者罪及一门如知去处隐藏密来告说者必加赏原鸣呼求理之心唯才是与聽言信行不虑包藏岂谓邪人负我如此其中诱陷必有胁从须挂州名载深冤叹其中节目踈理未尽须更商量者委中书门下续即条奏宣示远迩咸使闻知

诛王涯告诸陵诏

勅凶徒窃发震骇京师中外协心即时擒斩昨者将戮叛党咸告庙社国之大事合谒诸陵宜令所司即择日撰仪差官奠告【大和九年十一月】

平潞州德音

门下朕闻覆载之内逆命者必灭其身日月所临乱常者必覆其族矧有恩孤亭毒义背君亲罪恶贯盈人神共弃咎将自执祸岂能逃逆贼刘稹包祖父之奸谋肆豺狼之狠戾动干纪律力逞凶顽招亡命而为心腹凭山川而为险固胁从百姓残忍一方积恶成殃擢髮难数朕恭承宝位祇畏上天每戒佳兵常思去杀然事关除暴理合兴师遂命戎臣会兵攻伐鼙鼓震雷霆之怒戈鋌行原野之诛恶党既诛元戎就戮载驰驿骑传首上闻文献不絶降书既至是用丕变弊俗洗荡妖氛式布新恩获全旧土念彼战争之地谅当凋瘵之余租税且蠲征徭合减其泽潞五州兵给复一年迺河南府当路州县太原府及接昭义界县河阳怀州陕晋绛及当路州县今年秋税并宜放免酌忠旌善爵赏宜加其行营立功节度使并别勅处分其已下委本道各具功效闻奏续有处分诸道行营咸尽忠力至於攻取剋捷屡闻应缘讨伐将士归还之际并有优赏已从别勅处分离乡征役固有勤劳临阵杀伤倍深惨惻行魏祖吊魂之礼施周文葬骨之仁其行营将士阵亡者先已有勅便令子弟填替如无填替三年不停衣粮有因战阵伤损手足永废者并不得停衣粮阵歿将士骸骨先令所在埋瘞不许令便将归今已事平如家口迁取委所在州县量事应接发遣如无亲属来取者重与改瘞勿令暴露仍与设祭诸道行营陷没将士见在昭义者各放归本道其泽潞五州百姓先因用兵逃散在诸处者令委元逵弘敬刘沔元式石雄安存发遣各令归业仍委卢约设法招携务於绥辑其有刘从諫已後暴赋加徵害於百姓者并宜放免用兵已来刘稹所招收团练官健营生五州内百姓如有家事荡尽交切饥饿者委卢约且以军粮赈贷如先有食已被贼收管未破用者并还本主其庄田已为人占夺者亦并令还秋方当种麦如自无麦种子者且以官种贷借如五州又自无麦种子者共借三万石令供军县逐便支付其先贤坟墓有碑记为人所知後被发掘者却与掩藏仍量事致祭其诸色人内如有文学节行比来藏避刘从諫隐迹山林者并以搜访具以名闻又自刘悟从諫至刘稹逆命已来如有忠义之徒曾谋归国为残害者并具闻奏当有赠恤应五州界内战处所在骸骨如无主者并与收拾埋瘞今遣吏部侍郎高铢给事中卢弘

正专往宣慰有存问疾苦抚恤凋残回日各宜具利害闻奏於戏朕以四海为家兆人为子一夫不获心所歉然务欲太和遐迩闻知当体予意主者施行【会昌四年九月十八日】

平徐州制

朕以眇身获承丕业?恭惕厉十载於兹况荷十七圣之鸿休绍三百年之庆祚将求理本敢忘宵衣虽诚信未孚而寅畏不怠既絶意於园囿无心於畋游业业兢兢日慎一日休徵罔应沴气潜生南蛮渐罢於战争徐寇忽孤於惠养招谕不至虐暴益深窃弄干戈擅收州镇将邀符印辄咨凶残不畏神祇自夷覆灭股肱之臣以罪恶之难舍腹心之衆为悖逆之可诛爰聚甲兵用拯涂炭上将宣力内臣叶心选用皆得於良材扫荡才及於周岁絶干纪反常之丑类销乱臣贼子之奸谋今则已及偃戈重康黎庶畴庸之典在丝髮以无私懋赏之时贵纖毫之必当其四面行营立功节度使既成茂勲宜加酌獎并取别勅处分应诸道行营都将已下节级军将各委本道具功劳名衔分析闻奏当续有处分如有功效高者仍别具本道已后仍节级与迁改职名及向后本军有职掌员阙先於行营军将中选练任使以獎勤劳披坚执銳冒涉寒暄解甲囊弓还乡复业颁赠帛赐免差役之征应四面行营将士今既平宁宜令次第各归本道其赏赐匹段已从别勅处分置本道后仍令节度使各加犒宴放归私第便令歇泊未用差使如行营差科色役如本厢本将自今後有节级员阙且先以行营官健量材遞相差署用酌征伐之劳回戈将士赏级匹段各以支給发遣讫各令印使押到军前仍四面将帅及大都大將於本道营内与中使劝面给付不得辄令下吏所由刻剥一尺一寸应回戈将士经历州县令供颁遞朝廷并各有处分宜令长吏切加勾当准备供给不得欠阙临敌用力屈殒身须慰伤魂以彰忠节起与职事仍加任使如无父兄子弟只有妻女者即委州使厚加赠恤常令存息如是都将至都虞候阵亡者具名衔闻奏当与赠官应阵没将士有父兄子弟愿从军者令本道填替如无父子兄弟仍且给衣粮三年不得停给因战阵伤损手足永废者终身并不停给应阵没将士百姓衣冠为贼杀害者其骸平宁之後如有家口亲属取归本道收葬仍令所在州县量事接应发遣如无亲属来取者即令所在州县重与改瘞勿令暴露兼仰与设祭王者以仁恕为本拯济是谋元恶既已诛锄胁从理宜寬宥除庞积亲属及桂州回戈逆党为贼胁从及纵因战阵拒敌官军招谕不悛惧法逃走皆非本恶盖锋刃所临今并释放一切不问委西面将帅州县镇戍所在要路分明榜示四散招携仍许两月内所在陈首并长吏便放归还本管任自营生不得妄有搅扰其中如有才艺超异者便收録馱使应徐?濠三城内收复之後见在军人百姓除龐积及桂州逆党亲属并为龐积腹心谋议凶戮须加刑戮外余并一切不问应旧将官吏节级所由既已释放并令却还本职驱使用示殊恩地经战伐率多流户闾巷既已归还征税先宜蠲免其徐宿濠泗等州应合徵秋夏两税及诸色差料色一事已上并从十年蠲放三年州县兵马所由辄不得妄入乡村搅扰百姓待三年已後量其事力续议条流处分余则近州县为贼烧劫令本道检勘伤残甚处分检析闻奏待奏到续议放免编氓失业丘井无人桑柘粉榆鞠为茂草应行营处百姓田宅产为贼残毁烧爇者今平宁之後百姓既已招携并许识认各本主便自收管州县及官吏权要并不得妄有侵夺如百姓有家业为贼虏劫荡尽交攻饥饿者委所在长吏令逐便供军使量加给恤如百姓先有仓窖被贼收管者并还本主应行营处镇砦曾为打劫占?收复之後须却令官吏主持除见在杀降将吏官寮及先是本官勾当外余委所在州县选择良吏委之缉理俾令百姓有所归投舍逆从顺

臣节既显及禄册勲官常斯切应有效顺投降军将官吏节级立功劳虽有爵以及有未沾恩者委四面将帅更仔细重分析闻奏待到处分应募征行已从犒赏还乡休役合与优容应诸道差赴行营诸将士其中本非旧额官健因缘讨召募差行者回戈了後如有不愿食粮听从其便亦准前项除两税外放三年杂役九原可作千载不忘尚禁樵苏宁伤陇丘应有先贤坟墓碑记为人所知被贼发掘即却与掩藏仍量置祭十室之邑尚有所师道若大路闔门独行高节拒不义之召絶无厌之求重穴莫寻焚林可取其徐宿濠等州县官内有素怀忠义不从凶徒树谋归国为贼残害者具名闻奏当与赠恤如诸色人内有文学节行因用兵藏避隐迹山林并令搜访存抚自用兵已来郡邑皆罹窃劫远念惊挠尤在慰安今遣左散骑常侍刘冀兵部郎中薛崇专往宣抚军人百姓恤问间里疾苦回日具利害分析闻奏呜呼朕以四海为家兆人为心一物失所每轸纳隍之忧一方未宁常负陆危之戒今元凶就戮逆党诛夷载戢干戈永销氛祲庶卒妖氛允洽嘉祥遐迩知闻当体朕志【咸通十年十月】

平杨师立诏

杨师立趋走庸流甄箝残品因缘禁旅忝冒藩方迷天地覆载之恩亏臣子忠孝之道积祸既久怀奸已彰爰自在州擢居右揆敦君臣之分益覆育之仁殊不知梟獍逾凶豺狼难养敢违诏命速害使臣据蛙井以睢盱固牛涔而旅拒敬瑄开张武略并奏睿谋选将果得於雄才练兵莫非於教士舞梯冲而将平雄将整旗鼓而已挫虫沙行高仁厚攻心之术成郑君雄反掌之计果梟逆首尽载凶徒吉音才奏於九天喜气自浮於四海殊勲盛烈前古无俦已赐诏命獎示讫其首级宜令西川节度使准例处分【中和四年六月】

平杨师立宣示中外诏

朕子育万方为人父母常欲含哺四海均养九州去三面之网罗惟一心於教化共跻仁壽永使治平岂於将帅之间勲旧之内不思终始遽及诛鋤但杨师立本无汗马之劳擢取建牙之任年才五十位及於公侯恩被一门荣沾於骨肉有弟与子皆列朝班自母及妻毕开邑号师立之爱君体国未见一毫唯朕优遇宠为异等而不知逆顺但肆贯盈初则寝废诏书扇动军伍後又容纵盗贼残害乡里且巡扇是朝廷官员有除移则不许交代监务是庶支公事遣区分则坚拒勅文未道不屯甲兵妄占土供钱物命使寻究虚有支分害监军使於本城杀官吏使於近邑干纪之谋有素不臣之迹转彰中外臣寮共知狂悖包含掩慝未忍疵瑕竟迫於多难之臣时须明国法止杀义难顾私恩遂命西川节度使兼太尉中书令颖川王敬瑄点校土军仍委行在都指挥使十军军容令孜量抽三两道迎驾兵士指期齐进同议讨除三令五申正禽元恶戢兵禁暴不损平人整真师而易若建瓴殲叛卒而势同破竹初虽闭垒旋乃下城果见其党离心凶渠付首不假别令将帅不劳远取干戈警歎之余遂夷梟獍代宗朝同华节度使周智光亦因国家多难敢逞凶心擅杀杜菟一家以报私憾及逆节萌露又劫诸道供献及掠剽行路衣冠将谓朝廷力不能制亦将命征讨已为帐下所戮师立之事颇类智光猘磨牙豺狼当道若存凶逆必长乱阶朕知人不明爵赏踰量盈兹小器烦我大刑况善阵不交曾无大枉未劳一矢便戮元凶诸道节度观察防御等使位重藩镇义均休戚未覩平戎之奏常深许国之诚副我分忧国同庆快郑君雄显分逆顺知有功名拂秋水以捐躯向锦川而拜首

姜胆遽剖袁颇遂梟须议加恩激励忠节已後别勅招受官资仍赐庄宅锦彩银器宝注服等余准诏宜处分【中和四年六月】

平孙儒德音

朕以冲眇嗣守丕图思我高祖太宗创业之劳宪宗宣宗理平之道何尝不兢兢业业旰食宵衣上冀绍於耿光次期臻於无事不懈一月於兹五年然近者藩镇五年未宁兵伐屡动复以辰垂贰运行斯每摧爱物之诚深轸纳隍之念销兵罢战前古之佳猷有过涤瑕当今之令典将敷濡泽以遂羣伦淮南浙西宣州三道自孙儒结衅以来涂炭益甚郡邑多成灰烬里闾变为丘墟父母妻孥不得相保田园第宅无以自安如闻州府急於征徭官吏切於课绩日夜徵科罕有完肤禁禁狴犴更无生路苟纵如此何以和其元气何以致於太平须示优宽将臻富庶其淮南三道管内州县自太顺二年以前诸色逋悬并宜放免自景福九年已後夏秋两税委长吏斟酌乡县人厚薄其有凋残甚处别议矜放纵有稍可任持亦在薄其徵歛所冀逋逃渐复封境义安不惟减九重之焦劳抑且显诸侯之风化又孙儒未破之日兵力方强侧近专城固难支敌当不免与之来往时有供需盖是胁从岂皆情愿淮南节度使杨行密位冠侯藩之上名兼相卿之崇自当推原下之观修睦邻之好无乘时以兼微弱无小事而结仇讎应与孙儒踪迹交涉者并宜免罪不在究寻各保封疆用苏疲瘵易称作解史载泣辜庶将罪已之兴亦冀从人之叹应京畿及关辅内见禁囚徒除官典犯赃及杀人外并宜逋减勅命分析限赦文到後三日踈放闻奏被褐怀玉固逸代之奇才灌园鬻蔬亦超时之独行将期至理岂所遗贤应天下山林之中衡泌之下或悬头刺股枕石漱流有士未言无媒自达者委所在长吏速以名闻仍接借入京委中书门下量才奨用其乡里父老八十以上及鰥寡孤独并瘖聋跛躄者委所在长吏量加优恤勿使栖迟於戏天子也如手足之奉軀左右上下动须保持本或不宁亦难知济凡曰股肱宜体朕意宣布内外咸使闻知【景福元年八月】

平杨守亮等勅

勅夫胜残去杀古圣之格言阜俗安人前王之令典逆贼杨守亮复恭杨守信等结於党援聚作奸邪谓天可欺谓神可罔言唯讪上既验於无君动即谋非又习於不道枉杀元舅沈溺一家坐拥旌旄阻留恩命隔西川之贡奉絶数镇之纲商欲使朝廷使费不充又使藩方资粮有阙擢髮不足以数罪靡躯未足以当辜万姓脂膏苛歛作奉身之具一方丁壮尽驱为不轨之兵以至夫不得耕妇不得织愁叹寻盈於道路疮痍几遍於乡闾每切焦劳不忘顷刻昨日幸赖股肱重寄心膺元臣共兴貔武之师尽破豺狼之窟今则烟尘顿息戈甲以宁成怀堵之期用遂肩之泰不得去其前蔽示以新恩爰兴惻隐之心乃降优弘之命内及洋州金商等州兵火伤残之後各委长吏切加安存至於赋税并宜酌量矜减其杂色差役亦仰权停如有百姓军人前资任凡有诖误一切不问其京畿界内有兵马屯驻之处亦委京兆府量宜蠲免俾令通济无令重使疲瘵其凤翔邠宁泰州东川华商等道将士等二年于役苦战摧凶竟於荡平宁忘酌奨应立功大将节级等各委本道节度使定其功状具名衔闻奏当议处分又飞挽之劳宴赏之费尽出方面不在朝廷成日嘉谋亦由叶力应用军已来本判官并主掌官吏各仰分析奏闻各与奨拔於戏夫王者为心不欲一物失所君人御宇岂忘四海为家全资有土之

臣共贊无私之化布告中外咸使闻知【乾宁九年八月】

唐大诏令集卷一百二十五

卷一百二十六

钦定四库全书

唐大诏令集卷一百二十六

宋 宋敏求 编

政事

诛戮上

刘洎自尽诏

杨慎矜自尽诏

王鉷自尽诏

李林甫除削官秩诏

处置受贼伪官陈希烈等勅

周元干等死没制

李岫自尽制

决李少良等制

姜敬初自尽制

刘希?自尽制

诛元载自尽勅

诛刘晏自尽勅

诛刘辟勅

诛李錡并男师回勅

诛杀武元衡贼张宴等勅

诛戮上

刘洎自尽诏

诏曰小人在列为蠹则深巨猾当枢怀奸必大侍中检校户部尚书清苑县开国男刘洎出自间伍言行罕称於国无涓滴之劳在朕匪粉榆之旧但以駮策情久颇有吏能擢於凡琐之间收其鸣吠之用超伦越次使居常伯纁青袭紫摄职文昌冀有葵藿之情知慙雨露之泽朕行履小乖和豫凡百在位忠孝纏心每一引见涕泗交集洎独容顏自若密图他志今行御史进状奏洎乃与人切议窥窬万一谋执朝衡自处霍光之地窥弄兵甲擅总伊尹之权猜忌大臣拟皆夷戮朕亲加临问初犹不承傍人执证方始具伏此而可恕孰不可容且皇太子某春秋鼎盛声溢震方异汉昭之童幼非周成之襁褓鰥生负图之望是实无君之心论其此罪合从孥戮但以夙经任过不忍梟悬宜免家累赐其自尽【贞观十九年十二月】

杨慎矜自尽诏

左道乱常邦家所禁凶谋逆节天地不客户部侍郎兼御史中丞杨慎矜潜蓄回邪率由艰险猥承门绪得齿朝行爰自卑微谬加超擢寄之帑藏总被均输不知外矫清廉内怀贪冒起伏百变以此狗身首鼠万端恣为罔上触途苛刻归怨国家还俗僧史敬忠凶慝逆徒狂愚贱品乃妄陈?纬别觊异图密与交通将期委质仍自以亡国之後克获攸归遂妄托灾祥窥觐时变用肆恶悖心在不臣恶迹既彰疑骇咸服戴天履地面目何施梟首夷宗未云塞责但以务弘大体心在寛刑尚免严诛容其自毙其杨慎矜宜赐自尽其兄少府少监慎余洛阳令慎名等不令随从并为固恶亦宜令自尽其史敬忠首建逆谋实为臣蠹宜决重杖一百鲜于赧称敬忠当王附会凶人宜决重杖六十长流范滔妄说妖言与之昵狎宜决六十长流岭南临江郡其上庭耀既为论佣作终不论告决四十配隶黔中郡杨慎矜叶生前通事舍人辛景湊别致非类成此祸端宜决四十配流岭南晋康郡其义阳郡司马嗣号王臣虽则不涉凶谋而与敬忠相识宜解却官於南宾郡安置其任太府少卿张瑄素以妄庸专行险詖比缘慎矜荐引骤历班荣因此结交潜为党援况犯赃私情逾难恕宜决六十长流岭南临封郡其威卫执戟天马监副监万俟承晖妄畜图书与慎矜解说潜相党附为蠹实深宜决重杖六十其间廐使殿中监卫衢忝膺重寄宜存公道受慎矜嘱请为承晖奏官諂黜愈彰比周斯在宜贬与远官应配流及安置人等所在即差网驿领送其杨慎矜及兄弟并史敬忠有庄宅等宜并官收其家口男女等并令所司准法即配流岭南诸郡其张瑄及万俟承晖鲜于赧等男女并一房家口亦准此配流岭南诸郡凡其内外近亲不可尚列班荣及居京穀宜令三司使即括责闻且臣之事君有死无二匹夫徇义或志亡軀岂有六卿任兼三独父子相续俱承重委兄弟不次皆列通班而更陰图不轨潜觊异望静言思此良可叹息除恶务本与衆共之令在惟行盖非获已中外寮庶咸使闻知

王鉞自尽诏

勅曰人臣无将有必诛之义王制所禁在难舍之刑银青光禄大夫御史大夫兼京兆尹殿中监闻廐使陇右羣牧监使及天下户口色役利市和籴方作园苑长春宫栽接并京畿及关内采访等王鉞性本凶愎行惟艰险徒以早膺擢用累践崇班持宪尹京委重斯大八闲六尚宠寄惟深殊不知外饰公忠干冒非?内怀奸诈包藏不测任海川狂愚不逞妖惑无良而乃潜与通情乃希非望及觉彰露使令灭口幸会闻此事迹话於私庭遽令追掩殒於县狱邢縡久怀逆谋专构逆党其弟焊始终结约常与交通托云弟职其实由已今神明所殛凶党伏辜纵刑且踈欲逃其罚然天地虽广何所容身宜赐自尽户部郎中王焊蓄积梟獍之心包藏狂悖之计与逆人邢縡久托深交供其资粮同为凶恶自申欸昵十载於兹所有逆谋咸共谋画此而不罚其若法何犹寛除死之典俾从杖刑之责宜於朝堂集衆杖杀

李林甫除削官秩诏

为臣之道二则有辟事君之致将而必诛故左仆射兼右相吏部尚书上柱国晋国公赠太尉广陵大都督李林甫爰因宗室獎以班序建履清贯尤特矫饰鄙诚患失狡迹多端朕待以勿疑任当殊重恩私踰分崇高至极乘据枢衡二十余载岂知外表广慎内藏凶险筹谋不轨覬觐非望服此庸细潛害惠良悖德反经师心蘊慝祸福生於喜怒荣辱由其爱憎使縉绅箝口行路侧目淫祀夜祷於神祇厌胜家崇於蛊道遵空养奸实繁有徒既毕禴禴旋剿其命阿布斯振降塞上委於綏緝敢行结交输竭深夜里严室焚香要之誓信指期撤警纵以叛离且肆犬羊之羣侵軼我疆场方申犄角之契图危我宗社可隱之状所不忍言以亲党荐引咸归朝班子息蕃多曾无教诲贪叨纳赂倚依成奸?墙属闻败官相次作伪滋久晚节颇彰含垢在予犹示弘厰鬼得铕而溢尽恶布露而难容建从询鞫事皆昭着殲夷噍类曷足懲愆鞭斲屍棺未云塞责但以常经使任特寛恒典其在身官秩并宜追除则卑同凡庶许其殯掩男前将作监岫率由劣行不承教勗骄恣越度过失弥深且配流岭南及黔中延德郡前司储郎中嵎配流苍梧郡前太常少卿屿配流临封郡仍并除名即网驰驿领送自余有官者令所司即勘会亦除名各配流岭南及黔中逆恶羣女在室并男未有官者取其情愿任随兄弟朕念其驱策尚怀仁恕既贷生成之恩赦其殒嗣之罚仍每房各乞奴婢三两人并与缘身衣服粮食使其存济自余资产一切官收男孙有官者解却无官者勒随父并家口并续逋途流所至彼捉搦勿许东西纵会恩赦不在量移之限其林甫男女妻等有罪非妄惟其子壻諫议大夫杨齐宣覩其不善寻有薄心迹异同恶颇申诚欸并自余至亲应合累者续有处分噫尧谓達聰四凶在列周称盛德三监俶扰知人之美诚愧格言明罚斯加非无累叹凡任咸自诚焉

处置受贼伪官陈希烈等诏

人臣之节有死无二为国之体将而必诛况乎委质贼庭宴安逆命耽受宠禄淹延岁月不顾恩义助其効用此而可宥法将何施達奚珣等或受任台辅位极人臣累叶姻聯戚里或历践台阁或职道中外夫以犬马微贱之畜犹知恋主龟蛇蠢动之类皆能报恩岂曰人臣曾无感激有膺面目事於寇讎乱臣贼子何以过也自逆贼作难倾覆邦家凡在黎元皆含怨愤杀身

殉国者何可胜数此等黔首犹怀国恩岂有列在崇班荷兹禄位不思君亲之分唯与凶逆同心受任於梟獍之间咨谋於豺虺之辈静言思此情何可矜朕志欲含弘法务寬貸然凶恶之类自招其咎人神所弃天地不容原其本心皆合殊死就中情状仍有区分達奚珣等一十八人并宜处斩陈希烈等七人并赐自尽前大理卿张均特宜免死长流合郡

周元干等死没制

勅大逆不道抵夷族之诛同恶相济当弃市之法以惩干纪式按彝章周元干贼臣之子元恶成性与交阶乱厥罪惟均邵贲敢有包藏恣其悖虐怙侈灭义攘斂矫?戮及无辜罪浮於师其周元曜薄罗汉尹元经毛密彬李尚林等共肆丑图且明反状犹舍斧鑕俾全腰领其刘宪周壽崔劝等同附奸邪俱行扇惑以情斯蠹法当死没并依前件朕自君临万国思措五刑不虞凶残有此冒犯寘以明宪期於止杀凡百卿士知朕意焉

李怙自尽制

勅恃衆专杀谓之乱常合族併命谓之不道按以春秋宜加重责况自悖人理实生厉阶合从弃市之论尚就议亲之减李怙幸以宗属列於藩任政之不修乱是用长轻侮法令动摇军州御史姚爽巡到所部其弟参於佐理诸将素有猜嫌故加之罪不可无状遂言使者之来事在不测俾其完聚兵甲变更将守潜疏其意以构祸萌而怙亲自点窜诈云爽之遗队以此疑衆因而合谋弟兄家党咸尽沦胥而毙又陷数家勒兵抗威以拒所统人不堪命一方骚然顷发近信审问按理丑图既露奸状甚明示有小惩以从远斥询於羣议颇屈常典朕思以道德在宥天使一代之人登於仁壽之域风化犹薄正教不明致令长吏专此威暴无罪无辜横分身首冤气惨结有伤元和惕然增怀深自咎责期於止杀不可措刑寬其斧鑕之诛降从盘水之礼宜赐自尽虽不掩义道在无私而礼有缘情实亦多愧王者之法敢忘至公凡百卿士宜悉朕意

决李少良等制

勅李少良卫从等凶险悖戾反常逆理恣其谗说将构祸阶离间君臣矫诬中外丑图奸状按验皆明殿中御史陆班幸任清宪之职仍参儒馆之事交结非类包藏不测岂有周行之列容此一凶亦槩同恶法当均罪并宜付京兆府痛决一顿朕每以君子小人只同心异德必先观行然後察言岂兹潜讒能回聽断夫招贤纳諫君之休也献直尽规臣之节也常亦仄席思理伫闻政道岂谓奸慝紊兹彝伦须判忠邪以正刑典凡百有位宜悉朕意

姜敬初自尽制

勅不敬之大在於毀犯园陵自擅之重切於矫诬诏令有此乱常之道必貽无赦之责姜敬初自以顽劣得参姻娅録其先効擢在西台素无行能已速官谤朕永感霜露式瞻松柏以其职司俾往底事辄於禁域擅凿连冈当衣冠之出游临岁月之所建既有犯於神御大不利於王

室其不可固有所专一昨临遣再三戒勅无君弃命凶蠹尤深书不云乎刑故无小况释之有陵土之议申屠致庙垣之诛死未塞责不忘私眷特缓严刑宜赐自尽史忠烈王臣子等忝从所职敢有挟邪事既同科法当均罪亦宜赐自尽其家资并收没其驸马裴仿虽不知情合当缘坐宜削官爵拘於私第永清公主亦随在宅仍絶朝参使知警惧朕自君临每思刑措岂图戚里干我国章任匪其人有慙所鉴议法难恕抚怀增伤百辟卿士知朕意焉

刘希?自尽制

勅合一体者君臣之分持二心者天地同诛构兹乱阶与衆共弃开府仪同三司行太仆卿兼御史中丞充神策军兵马都虞使淄川郡王刘希?幸以微谬荣秩典司禁戎作我心膂外虽承命内不尽忠泄漏朕言几危吾事念常自任使冀以自新分委戎柄授之经略而干冒货赂溪壑无厌恣以苛刻师人积怨辄怀顾望潜蓄异图假谈咎徵上悖天理诱吾忠良之士妄言祸乱之端恶状已彰情在难恕赖重贤竭力沮发奸凶遂命公卿兼之法吏再三讯鞫情款昭然戮市尸朝未云塞责?纓盘水尚许归全特从寛典宜赐自尽朕临驭万邦於兹九稔每以外攘夷狄未戢干戈常亦推食解衣躬抚将校义均休戚期保终始神明所知诚契未负禁网踈阔小过必遗岂虞奸臣有此干纪罪成恶稔以寘严科天下之法不可私也刑其无舍良用抚然文武庶寮宜悉朕意

诛元载勅

任贤去邪悬於常典獎善惩恶急於时政和鼎之寄匪易其人中书侍郎同中书门下平章事元载性颇奸回迹非正直宠待踰分早践钧衡亮弼之功未能经邦成务挟邪之志恒以罔上面欺陰托妖巫夜行解祷遂行图非望庶追典章纳受赃私货鬻官秩凶妻忍害暴子侵婁曾不堤防恣其凌虐行僻词矫心狠貌恭使沉抑之流无用自達赏罚差谬罔不由兹顷以君臣之间重於去就冀其迁善掩而不言曾无悔非弥益凶戾年序滋远衅恶贯盈将肃正於朝猷俾神明於宪纳宜赐自尽朕涉道犹浅知人不明理绩未彰遗阙斯衆致兹刑辟悯愧良深弔勉行之务申沮劝凡在中外宜悉朕意

刘宴赐自尽勅

乱常干纪罪莫大焉除恶去邪刑其无舍忠州刺史刘宴性本奸回志惟凶慝顷司邦赋历践朝伦割削为功毒痛黎庶按问赃贿不知纪极朕将崇政本不去憊人犹是含垢务全大体俾从降黜尚列藩侯黷乱之辜掩而不问旋乃结聚亡命擅兴师徒罔有悛心力行无度违於人神恶迹彰闻受命连率閱实其罪而蒐乘补卒遍於乡间执銳被坚出乎郊境拒扞朝旨威胁使臣人之无良一至於此孽由自作法所不容正其典刑以惩奸蠹宜赐自尽仍令庾准差官勾当处置闻奏

诛刘辟勅

刘辟生於士族别蓄梟心驱劫蜀人拒扞王命逞其狂逆诖误一州俾我黎元肝脑涂地贼将崔纲等同恶相扇至死不回咸宜伏辜以正刑典刘辟男超郎豺狼丑类难议生全务尽之刑同类九人并宜处斩

诛李錡并男师回勅

李錡幸国宗属早列方隅德宗藉有土之权委之以泉货顺宗重维城之寄授之以旌旄恩深两朝荣溢当代朕恭承宝祚首命端揆君臣之分益亲天地之恩弥渥伪词三上恳请入朝推以至诚许其重任曾不知居不疑之地怀不测之端有梟獍噬食之心恃牛羊项领之力久蓄亡命敢有乱常谓干戈可得而恃悖言肆口逆状滔天灭身之辜擢发难数国有大典与衆弃之为人除害非朕敢舍致兹用辟终所愧怀李錡并男师回准法处斩其余支党已从别勅处分

诛杀武元衡贼张宴等勅

勅张宴李惠嵩李寓严清受命孽臣害我良弼凶虐之甚古今所无虽奸源不穷而天网难漏擒捕斯获兵刃俱存自相证明遂得情实宜从极法以快衆心并康少贲造端合谋不可异等宜并处斩张公佐李少宁徐良李胡弟奴高志巡田再兴杨日晖李进胡袍直刘宪生秦詮及李惠嵩妻何马等并合从坐况属同情宜付京兆府决痛杖一顿处死苏表藏畜兵器街耀军谋朋游悉无赖之徒取受多不轨之物属当搜索爰得其人京辇之下岂容此辈宜决杖八十配流费州其妻阿康奴绿耳等不识陰情难书罪罚赵环等妻何樊阿唐张宴女二初则不知终然同恶悉京兆府各决二十放其镇州进奏赵环并官健及王承宗行官家人魏昇朝等一十八人并赴京兆府收管待後疏理处分侯伦李莫虽言已归本道欲於何处逃刑待搜获日准例处分张宴赵环等七人如更有亲族并宜搜检准今年八月勅处分其刀劒器械等并付所由准法处分

唐大诏令集卷一百二十六

卷一百二十七

<史部,诏令奏议类,诏令之属,唐大诏令集

钦定四库全书

唐大诏令集卷一百二十七

宋 宋敏求 编

政事

诛戮下

诛吴元济勅

处置李?勅

诛王涯等勅

处置杨弁勅

刘从谏剖棺暴尸勅

诛郭谊勅

诛张谷等告示中外勅

杨收自尽勅

严譔自尽勅

诛黔州刺史秦匡谋勅

处置萧遘等勅

诛江让能宣示天下等诏

崔昭纬自尽勅

王抔自尽勅

柳璨自尽勅

诛戮下

诛吴元济勅

勅吴元济豺狼丑类敢悖天常不知覆育之恩辄肆猖狂之计拒扞成命焚劫邻封诖误我平人残伤我赤子县邑黎庶号呼屡闻朕为人父母得不兴愧亦常告谕曾靡悛心稔匿挺灾日滋月甚所以命貔貅之旅致原野之谋雷霆所当巢穴尽覆获此凶?正其刑书与衆弃之斯为国典宜准法处斩其余支党别从勅处分

处置李?勅

汴州逆贼李?窃据城池坐邀符节率其凶党敢拒王命令槩梟首於阙下宜令所司准式其男道原道枢道伦道安等叛逆之子固不可原理须正刑集衆处斩

诛王涯等勅

勅王涯等身为宰臣委任至重与其从党恣其凶恶潜构奸谋郑注草莱卑末宠遇殊常而乃切发殿庭同为之扶?邪险之状古今所未闻赖宗社之降灵重以叶力斯须销灭京师晏宁天下之人所同欢快谋恶之罪国有常刑其王涯贾餗舒元舆王播郭行舆李孝本罗立言宜令左右神策军差兵马防援准旧例领赴郊庙及两市令衆讫於独柳树下并令准法处分

处置杨弁勅

勅杨弁起於卒伍获在偏裨方属徂征敢为桀逆迫逐师旅啸聚叛徒朕姑务苟安未加显戮舍置悖乱令赴行营遂驻南辕之盛已盗北门之管战备符玺并而窃之咨石会之重关潜输逆镇释贾羣之纆继俾远奸谋成榆社之义心召汉水之同恶蚤毒近发於怀袖蚁壤几类於江河康政等被汾邑之遗风习莘墟之有礼遽忘臣节仍助凶恶抗弦登陴曾不兴感以卵投石自取灭亡虽禁暴除残国之大典然致陷辟终用愧怀

刘从谏剖棺暴尸勅

勅前代张角王陵伏罪之後皆以身死并加追戮抑有旧章刘从谏疾困之时置刘稹兵权潜谋继袭虽先以削夺合正刑书宜令剖棺暴尸就潞州市号令三日夜便随事埋瘞【会昌四

年八月】

诛郭谊等勅

勅理髑髏者不可以嬰芒刃图草蔓者必在乎絕本根故代甲兵以正其刑钟鼓以声其罪爰用重典以清乱邦逆贼郭谊等狐鼠之妖依兵穴而自固牛羊之力得水草而逾凶久从叛臣皆负逆气顷者刘从谏皆得振义掩贼藏奸积怙其乱母非亲吏计刘公直安全庆各凭地险屡抗王师每肆悖言罔怀革面吴寇将贼周尚务於陆梁陇向平王健称其力死况郭谊王协开邢沼归疑惧义旅复巢卖孽童以图全据坚城而请命擐甲以祈於抚纳要君以盖其前愆天地神祇所难容舍昔伍被诣吏不免就诛延岑出降终亦夷族致之大辟无用愧怀郭谊王协刘公直安全庆李道德李佐尧刘武惠宗可武并宜处斩其余支党并宜别勅处分

诛张谷等告示中外勅

勅顷者刘从谏与李训郑注结刎颈之交以济其奸谋以图不轨张皇兵势胁制朝廷自擅一方以为三窟张谷陈扬庭等凶愚无行狡诈多端皆在京师人皆嫌恶自知险薄无所庇身投迹戎藩寄命从谏多怀怨望得肆陰谋或妄设妖言成其逆志或为草表章饰其悖辞无孝於君亲曾不愧天地自朕君临方宇姑务含容而怙乱益坚包藏未息诱受亡命招聚异图志犹恃於金汤心不利於王室近又敢为狂计扶取孽童污我忠义之军叶其豺狼之党天之所弃神得而诛逆贼刘稹弟植曹九满郎五娘君郎肆娘堂兄汉卿匡周堂弟会卿匡尧穗逆贼张谷并男涯解愁何大偃即孙男小告兄台男小曾门奇牵郎修文千驹陈庭杨并男巢郎宣力男丑奴张沿并男欢郎三实门客甄伎术人郑谿蒋党逆贼李训兄仲景郭行余男台王涯侄孙羽韩约男茂章茂实王播男掘并就昭义梟斩讫夫为善者天报之以福为不善天报以殃今沴气既消逆节咸服方布和於四海息庶於五岳宣示中外各令知悉

杨收赐自尽勅

勅驩州流人杨收谬承獎擢任以台衡意每肆其贪吸迹颇彰於黷货欺天罔上罪不可贷母俾生全宜令内养郭全穆所在赐自尽【咸通十年二月】

严譔自尽勅

勅前镇南军节度使检校尚书严譔器本琐微志惟凶险广用贿货结交奸邪致杨收不顾刑章恣为威福以桂林江西之重举尔为名纳陈珍奇宝之私切我良守所令按复不欲追穷顷闻海隅多难徵发为备变寇未息供馈方繁或擅纳衣粮或广补戍卒克剥求取知无不为罔地欺天何尝自愧而又因推使罔奏阙庭欲以资财用为排抑杨收既尝极典严诛将令肃振朝纲贵免紊乱邦宪中外臣庶当体予怀宜所在赐自尽【咸通十年】

诛黔州刺史秦匡谋勅

勅黔南旧制兵数不少者盖沿天远地连昆夷外有溪夷内可固守以数百兵置於要害则千万衆不能夺冲秦匡谋守土四年曾无少备但闻侵扰溪洞贪冒资财人有离心兵多虚额致羣蛮如风火而至使阖郡灰烬之余莫顾黎元惟为酷毒自携金帛抛弃城池报奏之间谬妄非一况统衆失律负国深恩天地不容人神共怒祸将福灭恶满贯盈虽偿弃市之诛未塞乱常之罪膏於鉄钺显示华夷欲使将来知我用法宜夺在身官爵委京南节度使集衆处斩其家口资财并籍没仍令御史台及诸道长吏检查并以其亲属令当连坐者委御史台及诸道提获具名闻奏如待奏到指挥处分

处置萧邁等勅

勅逆贼伪宰相萧邁郑昌图裴彻皆代荷国恩身极人爵或两府钧衡之任或骤握兵赋之权所宜罄竭丹诚祇膺茂宠而遽违臣节辄肆逆谋挟扶千万之人遂成篡夺駟胁端良之士大恣猖狂惑藩方驰书檄妄徵故事欲动人情并居伪廷同於相位事主之道何以为心赖远近输诚祖宗垂祐忠臣发愤妖孽就诛今则兴复有期庙朝重正顾惟凉德益所兢慙然则刑赏之科所以示天下而申惩劝也其於用舍朕不敢私抚事论辜难逃极典宜令所在集衆斩讞闻奏天下宜体朕怀【光启三年三月】

诛杜让能宣示天下

夫赏有功而刑有罪治国明规去邪心而任无私君人大节其有显犯典宪谋危宗祧难贷大刑式谢四海崖州流人李周钟驩州流人段诩儋州流人西门重遂雷州司户参军杜让能等结为奸党请发禁军假言防托山南心及攻伐近镇倾危宗社谗构忠良包藏祸心附会狂计昊穹降鉴宗庙炳灵大臣继有封章列藩?悬论奏朕亲鞫问罪状显然须行宪章谅非获已於戏朕以眇身嗣膺丕图任用之间固无疑事而让能一居台鼎八换星霜必谓能罄忠诚不辜所任殊不知手探国柄身作乱阶政以贿行化由财进举枉错直爱憎系於一时鬻爵卖官聚歛逾於巨万仍复举倍息之利恣兼备之心市肆货财田归私第隣伍店宅旋入所居政事决於胥吏奢华纵於妇女丘某一家杖杀曾不奏闻湖外二年兵戈曾由败易或以盖藏或以误枉交通匪人朕以久务含弘未能决谪一旦彰露万口咨嗟重遂等人始终同谋表里相济约货则更相问遗谋人即放还至於烟尘四郊迭起纷被九陌拥兵而固请巡幸差人而纵寇宫中顷刻之间警蹕无禁缀流垒卵未足为危四罪既诛天下乃服国法斯在朕何敢私尚虑道途传闻远近误谬四海之内未委事端故降命书明示天下凡在臣庶宜体朕怀【景福元年六月】

崔昭纬自尽勅

勅朕猥以眇身恭临大宝修前王之法度奉列圣之纪纲未尝以喜怒之心行其赏罚惟务以诚信之道示於寰区有功有劳既不吝其爵禄负恩负法宁可贷其诛夷是谓至公庶臻理道左降官崔昭纬顷居内署粗着微劳擢於侍从之司委以燮调之任而不能忠贞报国端慎处身潜交结於奸臣致漏泄於机事星霜累换匡辅蔑闻其罪一也而又快其私忿辄恣陰谋托

崔铤之嶮巇连行瑜之计策遂令引兵向阙怙衆胁君故宰臣韦昭度李磎并被无辜杀戮几危宗社显辱君亲其罪二也及行瑜败国甫安而乃自惧欺诬别营附托又於藩阓潜请荐论不惟苟免罪愆兼亦再希任用贪荣冒禄僭滥无厌败俗伤风贤愚共鄙其罪三也又将厚赂欲结诸王轻侮我之宪章玷瀆朕之骨肉货财之数文字具存赖诸王作朕腹心嫉其僭窃尽将昭纬情款兼其亲吏姓名直具奏闻拒其求托昭纬曾居宰辅备历清崇但欲逞其固邪都不顾其事体观其成见实骇听闻其罪四也自奸邪既露情状难容尚示宽恩未行极典投於荒裔冀其自新不能退省罪尤恭承制命速赴贬所用守常规而敢犹务宴安寻闻所在留驻搅扰藩阓侮慢朝章曾无凜畏之心可验包藏之计罔知僭咎诽谤朝廷其罪五也朕以恩泽者帝王之雨露刑法者邦国之雷霆无雨露则庶物不荣无雷霆则万方不肃朕体天道以化育遵王度以澄清罪既昭彰理难含垢凡百多士宜体予怀其崔昭纬宜差所在赐自尽中书门下准此处分【乾德三年五月】

王?自尽勅

王?村类萧韦器劣瓶筭乘钩无数于时情畜志常多於奸计结朋纠党蠹物害公包聚货财肥浓家室馆领官职贍济一门虽行降黜之宽恩未塞衆心之忿怒须归极典方正朝纲宜令内养似先知賛於其所在赐以自尽【光化三年六月】

柳璨自尽勅

密州司户柳璨交通悖逆胁负明恩每念祸於偷安欲危人而自固罔知畏憚惟肆奸恶既凶罪以贯盈实朝野而共怒况复聚贪爵秩恣逞威权据其狡猾之端须降诛锄之命宜除名配崖州充长流百姓委御史台差人所在赐自尽【天佑二年十二月】

唐大诏令集卷一百二十七

卷一百二十八

钦定四库全书

唐大诏令集卷一百二十八

宋 宋敏求 编

蕃夷

绥附

抚镇夷狄诏

令蕃客国子监观礼教诏

赐入朝新降蕃酋诏

放诸蕃质子各还本国勅

遣牛仙客往关内诸州安辑六州胡勅放不从乱吐蕃使人四人归国勅

放吐蕃使归国勅

命官

葛逻禄叶护开府仪同三司制

回纥叶护司空封忠义王制

温没斯怀化郡王制

温没斯归义军使制

封立

薛延陀真珠毗伽可汗诏

突厥李斯摩为可汗制

封突厥夫人李氏孙氏等制

黠戛斯为可汗制

议立回鹘可汗制

遣使册回鹘可汗制

绥抚

抚镇夷狄诏

昼野分疆山川限其内外遐荒絕域刑政殊於函夏是以昔王御世怀柔远人义在羈縻无取臣属渠搜即叙表夏后之成功越裳重译美周邦之长等有隋季世陆续耀兵万乘疲於河源三年伐於辽外构怨连祸力屈賫殫朕祇膺宝图镇抚四极悦近来远追革前弊要方蕃服宜与和亲其吐蕃浑已修职贡高句丽送远诚欵契丹靺鞨咸求内附因而镇抚允合机宜分命行人就申好睦静乱息民於是乎在布告天下明知朕意【武德二年二月】

令蕃客国子监观礼教勅

勅夫国学者立教之本故观文可以知道敷文可以成化庠序爰作皆分泽於神灵车书是同乃范围於天下是戎狄纳欵日夕归朝慕我华风敦先儒礼由是执於干羽常不讨而来宾事於俎豆庶既知而往学彼蓬麻之自植在桑葚之怀音则仁岂远哉习相近也自今已後蕃客入朝并引向国子监令观礼教【开元三年十二月二十二日】

赐入朝新降蕃酋勅

勅关内河东河西入朝新降蕃酋等曰嘉尔蕃酋慕我朝化相率归附载变炎凉而忠恳不渝诚勤则励深宜辑乃成洛扞彼方隅使烽火无惊障塞咸谧则厚赏崇班当取富贵朕因此加贷尔实安堵犹衣服尽未充灾患且未息永言於此良用怵然其人春不入朝都督衙官并箭头将军在蕃者已令王峻张说杨敬述等取军中库物各量以赐尔等衣副都落中有疾苦便量给药物无令田陇废业含养失所通相勉谕以悉朕意【开元八年三月】

放诸蕃质子各还本国勅

勅我国家统一寰宇历年滋多九夷同文四隩来暨夫其袭冠带奉正朔颀颀然向风而慕化列於天朝编於属国者盖亦衆矣我则润之以时雨煦之以春阳淳德以柔之中孚以信之玄

风既同祥物兹遂莫不自天壤穷海域蹶角以请吏执贄而来庭唐皇之德於此为盛今外蕃侍子久在京师虽威惠之感自远毕归而羈旅之意重迁斯在宜命所司勘会诸蕃充质宿卫子弟等量放还国契丹及奚近通质子并即停追前令还蕃省领等幽州且住交替者即放去朕欲鸟兽咸若华夷共安来则纳其朝謁之心去则遂其生育之意含弘之施德莫厚焉

遣牛仙客往关内诸州安辑六州胡勅

勅古之降虏皆置边郡将遂畜牧之性以示柔怀之德河曲之北先有六州羣胡编列积百年序往缘康时宾等辄构凶党自取诛夷詿误蕃落损害良善因兹多隶令其失业永言恋本宁不怀归朕每念及昆虫犹虑失所况於此辈岂忘安辑如闻已有逃在关内诸州及先招携在灵庆州界者宜委并侍中牛仙客於监夏等州界内选土地良沃之处都置一州酋量户多少置县其有先所隶州未来者亦放归各另据簿籍勘会勿容虚假处置讫闻奏

放不从乱吐蕃四人归国勅

刘辟招诱外蕃用资叛乱西蕃顾盟竟无助逆维使在其间而义无所失其吐蕃并分敬则送赴本界以其寒沍涉远各给衣物粮食发遣【元和年】

放吐蕃使归国勅

朕临御万邦推布诚信西戎纳款积有岁时中或亏违亦常包贷我有殊德宁不是思重译贡珍道途相继申恩示礼曾无阙焉昨日蕃使奉章又至京辇将君长之命陈和好之诚临轩召见馆饩加厚复以信币谕之简书亦既言旋才及郊甸遽闻蚁聚来犯封陲河曲之间颇为暴扰背惠弃约斯谓无名公议物情咸请诛絶朕深惟德化之未被岂虑夷俗之不宾其国失信其使何罪释其维繫以遂性示之弘覆以忘怀予衷苟孚庶使知感其使论矩立藏等并後般来使并宜放归本国仍委凤翔节度使以此意晓谕【元和十四年正月】

命官

葛逻禄叶护开府仪同三司制

葛逻禄叶护特进顿毗特禀英姿擅雄荒服威信馭衆知终超【阙】以立节竭至诚而向顺逆虜布思丘山积衅天地匪容未就【阙】遂能率引弓之旅佐转战之师生缚凶渠咸类虽不长元恶顾神理之必诛而与我同仇乃忠勇之斯美畴其民绩宠以殊荣可开府仪同三司金山丕依旧充业护禄俸於北庭给其叶护妻及母并封为国夫人【天宝十二年九月】

回纥叶护司空封忠惠王

功济艰难志存邦国万里絶域一德同心求之古今所未闻也回纥叶护特禀英姿挺生奇略

言必忠信行表温良才为万人之敌位列诸酋之长属凶丑乱常中原未靖以可汗有兄弟之约与国家兴父子之军奋其智谋讨彼凶逆一鼓作气百万摧锋三旬之间两军克定力拔山岳精贯风云蒙犯曾不辞其劳急难无以喻其分固可悬之日月传之子孙岂惟裂土之封誓河之赏夫位之崇者司空第一名之大者封王最高可司空仍封忠义王每岁送绢二万疋至朔方军宜差使受领【至德六年十二月】

温没斯怀化郡王制

昔秋髻献筹归忠於大国日逐避祸纳款於明廷宣帝加其一心宠之优礼或存故王之印绶或赐归德之美名爰举旧章式从新命回纥温没斯特倜傥慕义沉雄有谋馱馱之生势超千里鸢鸟之击气厉九秋屡献款诚布於边将寻执反虏不遗君亲戢其饿殍之徒曾靡秋毫之犯旋观所履大节甚明朕与回纥代结亲姻久敦隣好念其狂乱义在固存莫若抚其酋豪显其大顺使诸蕃知我招携之礼更逾往昔之恩仍加带砺之封俾度爪牙之寄服兹休宠可不敬哉可特进左金吾卫大将军员外置同正员仍封怀化郡王【会昌二年五月】

温没斯归义军使制

回鹘代雄絶汉名镇北番而乃厌金革之强慕朝廷之礼愿袭冠带思覩汉仪蝉蜕自改於洁清豹变独慰其文彩不有英杰孰啓壮图温斯稟气陰崧降精斗极生知忠孝神付庄矜自强之心隐如敌国鋭上之器森若戈矛果能因乱布诚覩机立节深叶怀柔之志不因告谕之辞昔者取士殊隣秦能致霸将贤异国晋实用材是宜优以宠光处之权贵崇褒纳忠之効显锡归美之名俾建旆於新军示絶席於诸将勉修以节服我官常可检校工部尚书兼左金吾卫大将军同正充入归军使怀化郡王【会昌二年六月】

封立

薛延陀真珠毗伽可汗诏

天地之德平分於四时帝王之道无偏於万国故能亨育黎庶覆焘区夏声教咸泊於远方爵命不遗於殊俗薛延陀真珠毗伽可汗器宇沉毅识具允明夙时见机早稟正朔忠诚峻节克着於塞外贡献琛賫不絶於王府加以训勗子嗣辑宁种落俱率蕃职咸慕朝风其子沙耽弥叶护拔酌逵度莫贺咄没颉利苾并志怀敦确气干强果或心竭忠款乃心阙庭或远经朝覲拜首轩陛言念丹诚良以佳尚宜锡徽号用申褒宠拔酌可锡叶护可汗仍赐狼头纛四鼓四颉利苾可汗逵度莫贺咄叶护赐狼头纛一鼓二仍令左领将军梁方师持节备册命【贞观十二年九月】

突厥李思摩为可汗制

天地大德覆载极於八荒日月贞明煦照普於万物是以?王抚运圣人垂法经邦立正之道取

則於萬化興亡繼絕之義靡隔於華夷唯彼北戎代居荒塞養畜牧於天山之外擅勇敢於瀚海之濱逮其本叶狂愚嗣位侵盜之衅禍結於諸華殘暴之風毒被於大漢酋豪異心部衆離阻革面若相望於道路請命皆慎委於闕庭朕情切納忠志存懷遠乃命上將拯其將溺元戎才動倒戈相繼而屠耆歸命單于反接分地之長解結而來王引弓之民天落而內附龍城既附狼塞遂空朕愍其破亡恕其輟衅解縛焚衾賜以再生收雷回霜宥以寬政於是選內外之職分珪組以授之擇肥饒之地設州縣以處之開倉府以恤其飢寒馳輶軒以問其疾苦恩同中夏禮均舊臣十載於茲矣受命三靈殫思百姓爰初薄伐非求辟土之功泊于克定實弘安民之道久存其亡國反其遺萌尚恐瘡痍未瘳衣食不足今歲以積年谷屢登種衆增多畜牧蕃息繒絮無乏咸棄其毡裘菽粟有余靡資於狡兎使得復其舊庭繼其統緒歸三祠於沮澤旋十角於盧山使復命【闕】林弥其依風之思重涉安水遂其向日之歡然而左方既建右地以設必俟其君長享王自非率責種醯落忠誠何以宣布朝化輯寧番服右武侯大將軍化州都督懷化郡王李思摩器懷沉深識用詳明早慕皇風肅生丹款爰寵以賜姓榮以高爵內典循徼之重外受連帥之任譽光朝右職簡朕心宜錫以藩紹其宗祀可乙弥泥孰俟利苾可汗并賜之鼓纛仍令就其部備禮冊命突厥及胡諸州安置者并令渡河還其舊部俾夫世作藩屏同之帶砺長保邊塞傳諸後昆【貞觀十二年七月】

封突厥可汗夫人呂氏孫氏等制

門下突厥可汗夫人呂氏孫氏等毳幙來賓錦車將命單于侍子榮已列於漢庭闕氏貴人寵宜加於蠻邸呂氏可封瀚海夫人孫氏可封納歛夫人主者施行【先天二年八月二日】

黠戛斯為可汗制

勅我國家光宅四海君臨八荒聲教所覃冊命咸被況乎族稱宗姓地接封疆爰申建立之恩用廣懷來之道有加常典得不敬之點戛斯國生窮陬之卿稟玄朔之氣少卿之後胄裔且異於蕃夷大漢之中英杰自雄於種落日者居於絕徼隔以強隣止馳向化之心莫通事大之體旋能奮其武勇清彼朔陲萬里歸誠重譯而至時既富於無外人更在於固存是用時降徽章載明深恩加其美號錫以丹書貽厥後昆遂荒有北舉茲盛典章示遠方戒服寵光永孚恩化可冊為宗英雄武明誠可汗命右散騎常侍兼御史中丞季拭持節充冊立使所司擇日備禮冊命【會昌五年五月】

議立回鶻可汗詔

朕聞王者立德必本於念功天下歸仁莫先於興滅回鶻久為與國嘗建民勲累申式配之儀兼展稱蕃之禮天寶末興兵之際國步未夷憤彼凶妖率其忠勇控弦而至革車之會增威止戈而歸犀毗之賜甚寵殊庸盛禮煥烈縑緡是為親隣成其邊衛牧馬遠迹於朔野烽火罷照於甘泉雖去華夷歡若親戚會昌中虜廷喪亂可汗淪亡狼顧既困於歲牧鼠竊或行於邊州是時奸臣作軸邊將操戈因樂禍以乘危遂興戎而生事不念救災之義盡為助順之攻驅彼離窟為徒隸情懷土自北南寇之悲迹則亂甯北風之思旧國空瞻其茂草名王猶困於族人

想彼穷荒宁无慨叹朕君临万方子育兆人雨露之所沾濡日月之所照烛欲令自遂必念好还乃眷朔易之雄况当勲力之後每思报德实用疚怀所以顿遣诏书俾勤寻访穹庐莫覩瓠脱已平万骑岂无其忠臣六角冀存其贵种颇劳寤寐屡閱岁时沙漠既空并遥犹在近有回鹘来欵朔方帅臣得之送至阙下又有回鹘随黠戛斯李兼至朝廷各令象骨徵其要领音尘可访词旨必同愿复本邦仍怀化育皆云靡今为可汗尚寓安西衆悦所附扬宰相以忠事上誓复龙庭杂虏等以义向风颇侧消释至契素愿慰悦甚多俟其归还衙帐当议特举册命今且遣使臣且往慰论况情深振抚道既切於还来而切济艰难义岂忘於继絶至如待呼韩以殊礼约冒顿以和亲止予嘉其来朝亦或虑其为患今则因此离散追彼功勲立国於狼居稍聚义於乌合再寻旧好宜举良图报告天下咸知朕意【大中十年二月】

遣使册回鹘可汗诏

夫兴灭继絶有国之懿图推亡固存先王之令典在春秋时齐秦列国之诸侯也秦穆尚存於晋嗣齐桓犹继於莒土况我国家超迈皇王并包宇宙昔者回鹘可汗在武德之初始毕効力於太宗在天宝时叶护有功於京洛乾元至德之际与子仪叶心大破西虏自尔以降联为舅甥岁有通和情无诡诈会昌中其国实遇天灾莫能地着尽皆散徙遂至灭亡朕自纂承丕图常多軫恻爰命使者将远抚之讯厥存亡俾求嗣立轺车不至於灵武蕃使已及於塞垣迨至阙庭深陈血恳可汗已立诸部宾归实资神祇之卫乃薄忠勲之力能果克绍叶纂旧图颇协人愿深契朕志尚恐未为诸蕃所信犹疑新造之邦是用特命使用遵行册礼於戏布德茂功柔远祇迓前代之所以称礼也使若教民之元后何以劝善须布中外咸使闻知表朕中怀不问夷夏可册为温祿登里罗汨没密於合俱録毗伽怀建可汗命检校秘书监兼御史中丞王端章持节册使仍令所司择日备礼册命【大中十年十二月】

唐大诏令集卷一百二十八

卷一百二十九

钦定四库全书

唐大诏令集卷一百二十九

宋 宋敏求 编

蕃夷

册文

册突厥李思摩为可汗文

册疎勒国王文

册莫贺咄吐屯为顺义王文

册突厥苾伽骨吐禄为可汗文

册骨吐禄三姓毗方伽□利发文

册突骑施黑姓可汗文

册回纥为英武威远可汗文

册新罗王金乾运文

册新罗王太妃文

册新回鹘可汗文

册回鹘可汗加号文

册回鹘彰信可汗文

大中十一年册回鹘可汗文

盟文

扶余与新罗盟文

与吐蕃会清水盟文

賑恤

遣使賑恤抚回鹘制

舍雪

原吐谷浑制

宥吐谷浑诏

洗雪平夏党项德音

册文

册突厥李思摩为可汗文

於戏突厥部衆代居沙漠尤戒才举龙城克定三部种类十角酋渠咸袭冠带俱为臣妾朕光宅六合亭育万品爰降大造存其亡国既复故庭乃树君长惟尔右武侯大将军化州都督怀化郡王李思摩器量明远识用弘通地称贵种望高赐姓忠孝之节简於朕心明智之材重於蕃落朕是用命尔为乙弥泥孰侯利苾可汗传之子孙为唐蕃屏上鉴自古下亲近代守诚节者咸保其国人为凶恶者必及於覆败往钦哉尔其鉴兹往事祇聽朕言奉国以丹赤为先御下以信义为本勉正尔身勤恤尔衆无昵邪佞无远忠良无自骄奢无逞贪暴兢兢业业以绥尔疆土可不慎欵【贞观十三年七月】

册疎勒国王文

维开元十六年岁次戊辰正月戊辰朔十四日辛亥皇帝若曰万邦述职无隔华夷五等疏封式固藩屏咨尔疏勒阿摩支知王事左武卫将军员外置裴安定诞灵蒲海稟秀葱山緼义以立名蹈仁而成德虽日月所照莫非王土而烽燧时惊犹曰虏庭遂能扞彼边陲归我声教载阐畴庸之义俾弘利建之风今遣大理正摄鸿胪少卿裔梦松册尔为疏勒王於戏允迪由庚勿替敬典绥厥戎落永为汉藩往钦哉

册莫贺咄屯为顺义王文

维开元二十八年岁次庚辰三月丁亥朔一十二日戊申皇帝若曰於戏茂秩攸升疏封有命宠荣斯及必在英贤咨尔石国王莫贺咄吐屯代袭诚节器标果断尽忠淳化作扞藩陲顷以苏祿残妖尚为边梗乃能因其隣国授以良图候彼疆场相为表里致令克清边徼远辑殊方实赖心膂载宣勲力静言褒异非尔而谁是用册尔为顺义王尔其敬慎王猷抚宁部衆永保藩辅可不慎欤

册突厥苾伽骨吐祿为可汗文

维开元二十八年岁次庚辰三月丁亥朔二十六日壬子皇帝若曰於戏乃瞻陰方代有君长至於膺我盛礼荣彼殊隣必择其人谋无虚授咨尔突厥苾伽骨咄祿可汗气稟崆峒材雄朔漠见事无惑执心不渝先代以来结好中国自纘承旧业克维前修远遣使臣来朝阙下义之所感情实加焉不有褒称孰彰忠顺是用册尔为可汗今遣从弟左金吾卫将军质持节札册往钦哉可汗其丕承徽章益励名节永保多福以昭后昆可不慎欤

册骨吐祿三姓毗方伽頡利发文

维天宝十二载岁次癸巳九月己亥朔六日甲辰皇帝若曰咨尔骨咄祿伊难如三姓毗方伽頡利发夫崇德报功帝王之事讲信修睦人臣之礼卿久佐藩部备吏戎落知荐居不可以苟安早宾朝化蕃俗不能自理远仗皇威深悟正变之通克知成败之理岂惟欸塞之悬常有扞边之心言志披诚有增嘉叹今授卿左羽林军大将军员外置同正员兼赐册书鉄券永执蕃礼无替华风克终令名常保祿位可不慎欤

册突骑施黑姓可汗文

维天宝十二年岁次癸巳九月己亥朔六日甲辰皇帝若曰咨尔骨咄祿毗伽突骑施黑姓可汗特进登里伊罗密施立国推姓表贤在忠既効信以推诚亦旌忠而懋赏卿才略备举知勇兼资强足抗敌威能率下故得甲兵孚训族类怀仁既向顺以移风亦事大而知礼是用载加显秩式崇锡命今授卿特进为突骑施可汗卿敬勉良图光昭盛典保我疆场恶我寇讎俾业固山河福绥种落永私恩宠可不慎欤

册回纥为英武威远可汗文 贾至

维至德二年岁次丁酉十一月某日皇帝若曰夫定祸乱者曰武建功名者曰义惟武与义是谓明德回纥毗伽可汗生而英姿迈越前古代济威赫主祀北天与唐唇齿累叶姻好安祿山窃弄边兵暴乱中夏诱胁戎卒毒蠹黎人而可汗感激义动天地爰命叶护统率銳师叶赞官军駟除凶逆或掎其足或角其首一旬之内雍洛扫清振古已来义莫斯大朕是用式遵典礼封崇徽号敬册可汗为英武威远可汗每载赏绢五万疋於戏陰阳和而天地泰四时和而万物阜北土未靖有唐封而固之中原多难可汗义而助之惠好和洽与日月永子孙百代克享鸿休钦哉其无替朕命

册新罗王金乾运文 常袞

维大历三年岁次戊申正月朔二十八日皇帝遣其官某乙持节册命曰於戏建万国者不独於中夏嗣一姓者必求於令德咨尔新罗王金宪英男乾运爰自祖宗抚有东表克生明懿载茂勲伐采章文物久治华风忠敬孝恭率由纯性用藩君子之国能执外臣之礼夫继代之重择贤而立是用建尔冢社祚于青丘敬其所守纂其旧服忠以奉上惠以抚下永修东蕃之职无替先君之命肃膺典礼可不慎欤

册新罗王太妃文

维大历三年岁在戊申二月景子朔十日皇帝使某官某乙持节册命於戏于承家嗣作藩辅之臣每加尊称盖春秋之义咨尔新罗王金乾运母素推勲族雅有华风其德可尚其仪可则鉴於图史式是礼容俚东方君子之国处中壺贵人之位事上以敬接下以仁睦我亲隣亦资内助有教子之明训膺继代之新命固可以崇峻徽章光昭盛德是用册曰新罗王太妃修乃慈范抚其嗣君永怀前人无改其道钦承典册可不慎欤

册新回鹘可汗文 白居易

维长庆元年岁次辛丑四月丙寅朔二十一日丙戌皇帝若曰唐有天下垂一百载列圣垂拱八荒即叙舟车之所及日月之所照威绥仁量罔不向化惟此之气积厚而灵灵发象生生象豪杰义信武烈代为名王南西东方亦有君长其雄图鬪智莫之与京国朝已来?清风泽或効功伐或申昏媾同和协比以讫於今今朕不德继嗣大统推义布信以初为常矧乎柔远申恩睦隣典礼兹惟旧典垂自祖宗?奉恭行安敢失坠咨尔九姓回鹘君登里罗羽録没密施句主録毗伽可汗地生奇特天赐勇智英姿所莅雄略所加诸戎杂虏爱畏率服风靡山立清宁一方宜人有土受天百禄时惟代嗣实来告予曰予一人实降册命是用遣使朝议大夫检校左散骑常侍兼少府监御史大夫云骑尉赐紫金鱼袋裴通副使朝议大夫守少府少监兼御史中丞袭卫国公食邑三千户赐紫金鱼袋贾璘等持节备物册为登里罗羽録没密施句主録毗伽可汗於戏善必有隣德无不答此崇恩礼则彼竭信诚克保大义永藩中夏昭昭天地实闻斯言

册回鹘可汗加号文

维长庆元年岁次辛丑某月朔某日皇帝若曰北方之强代有君长作殿玄朔宾於皇唐粤我祖宗锡乃婚媾五圣六纪二邦一家此无北伐之师彼无南牧之马兵匣锋刃使长子孙叶德保和以至今日咨尔回鹘君登里罗羽録没密施句主録毗伽可汗义智忠肃武力勇健天之所授时而後生故东渐海夷西亘山狄惠宁威制鳞帖草偃声有闻於天下气无敌於荒外而能事大图远纳忠进贤请仍旧姻誓嗣前好朕惟睦邻是务柔远为心既降和亲之命遂申纳配之礼礼物大备宠章有加喜动陰山光增?宿夫以回鹘雄桀如彼庆荣若此虽自贵曰天骄子未称其盛虽自号曰天可汗未称其美宜赐加号以大夸将来今遣使某官副使某官某等

持节加信义勇智雄重贵壽天亲可汗於戏厘降展亲大德也进册加号大名也宜思大德称大名懋哉始终钦若唐之休命

册回鹘彰信可汗文

维太和七年岁次癸丑某月日皇帝若曰王者运神功以清九有敷至德以柔四夷虽万国建邦皆有君长而一时縟礼特厚亲隣用昭絶汉之荣式示徽章之贵克膺盛典允属雄材咨尔九姓回鹘爱登里罗汨没密施合句録毗伽彰信可汗代济公忠时推英毅刚明有守信实不渝总北方劲悍之师慕中华清静之化克绍前训实怀远图庆叶承家愿申永好彼无侵軼此务绥安两国咸欢六姻弥重事大之义而志合春秋相向之诚而皎如日月信使旁午贄币交驰词意绸缪礼自恭恪是嘉诚信宜赐宠光必饰虔受新恩纂乃旧服今遣使宁远将军兼御史大夫上柱国紫金鱼袋嗣唐王弘实副使大夫将作少监兼御史中丞赐紫金鱼袋嗣泽王容等持节备礼为九姓回鹘爱登里罗汨没密施合句録毗伽彰信可汗於戏海内四域惟唐旧封天下一家与我同轨今兹典布於神明尔其慎固封疆祇守名器罔坠先烈载扬今猷钦承礼文以作来范

大中十一年册回鹘可汗文

皇帝若曰我国家诞膺天命光泽中土君临九有包举八荒声教所加册命咸及而况回鹘北方之强代济之烈惠行邻境俗慕华风立国以来尝效臣节代为甥舅每岁通和推诚不疑为我与国当会昌之际自属天灾人罕粒食上下离散牙帐为灵地多种落所侵国甚委离之难自登宝祚每軫素怀爰发使臣访其後嗣轺车既出蕃使员来咨尔回鹘可汗挺此雄材生於贵族能收既絶之烬常怀再振之心愿嗣天骄载归地着发使请命诚辞可哀夫亲仁善隣国家之宝兴灭继絶王者之宜况朕布德滂仁施於海外尔乃坚诚励节行乎域中所以公侯子孙道在必复华夏屏卫理宜长存既将还定旧封式承坠绪克绍崇媾用迓鸿休今遣使臣朝议郎检校秘书监兼卫尉少卿御史中丞上柱国赐紫金鱼袋王端章副使臣朝议郎检校尚书工部郎中兼国子礼记博士御史赐绯鱼李浚持节备礼册命为九姓回鹘温祿登里罗汨没密施合俱録毗伽怀建可汗尔其服我恩荣膺兹位号勉修前好恢复故疆宜克已於蹕林长归心於魏阙无怠尔志永孚於休【大中十年十二月】

盟文

扶余与新罗盟文

往者百济先王迷於逆顺不敦隣好不睦亲姻结托高丽交通倭国共为残暴侵削新罗剽邑屠城略无宁岁天子悯一物之失所怜百姓之无辜频命行人遣其和好负险恃远侮慢天经皇赫斯怒共行吊伐旌旗所指一戎大定固可瀦宫污宅作诚来裔塞源拔本垂训後昆然怀柔伐叛前王之令典兴亡继絶往哲之通规事必师古传诸曩册故立前百济太子司稼正卿扶余隆为熊津都督守其祭祀保其桑梓依倚新罗长为与国各除宿憾结好和亲恪承诏命

永为藩服仍遣使人右威卫将军鲁城县公刘仁愿亲临劝谕具宣成旨约之以婚姻申之以盟誓刑牲血共敦终始分灾恤患恩若弟兄祇奉纶言不敢失坠既盟之後共保岁寒若有背叛不恒二三其德兴兵动衆侵犯边陲明神鉴之百殃是降子孙不育社稷无守禋祀磨灭罔有遗余故作金书鉄券藏之宗庙子孙万代无敢或犯神之聽之是飡是福【麟德二年八月】

与吐蕃会清水盟文

唐有天下恢奄禹迹舟车所至莫不率俾以累圣重光历年惟永彰王者之丕业被四海以声教与吐蕃赞普代为婚姻固结隣好安危同体甥舅之国将二百年其间或因小忿弃惠为讎封疆骚然靡有宁岁皇帝践祚愍兹黎元俾释俘囚以归蕃落蕃国展礼同兹叶和行人往复累布成命是必诈谋不起兵革不用矣彼犹以两国之要求之永久古有结盟今请用之国家务息边人外其故地弃利蹈善坚盟从约今国家所守界泾州西至弹箏峡西口陇州西至清水县凤州西至同谷县暨剑南西山大渡水东为汉界着国守镇在兰渭原会西使临洮东至成州抵劔南西界磨些诸蛮大渡水西南为蕃界其兵马镇守之处州县见有居人彼此两边见属汉诸蛮以今所分见住处依前为定其黄河以北从故新泉军直北至大磧直南至贺兰山骆驼岭为界中间悉为闲田盟文所不载者蕃有兵马处蕃守汉有兵马处汉守并依见守不得侵越其先未有兵马处不得新置并筑城堡耕种今二国将相受辞而会斋戒将事告天地山川之神惟神照临无得愆坠其盟文藏於宗庙副在有司二国之成其永保之【建中四年正月】

賑恤

遣使賑抚回鹘制

自古令王抚宁荒服忠於国者则有系絶之恩顺於道者则有固存之义所以原其乡化优以报功回鹘累代姻亲人修臣礼服我声教保兹信诚尝以国难识其忠良严霜见其贞松疾风知其劲草永言勲力岂忘予怀如闻讫扞斯攻兵折衆叛畜产大耗国又荐饥流离转徙远逾沙漠近因大和公主遣使入朝已知新立可汗寓居塞下告穷请命未有所归每念艰危载深悯恻今欲救恤穷困抚慰伤痍使四方知朕不忘旧勲报其大顺昔匈奴乖乱呼韩近塞汉宣帝转粟賑救权而施宜故得三代称藩北边罢警前王令典可不务乎宜令左金吾卫大将军兼御史大夫王会持节充安抚大使宗正少卿兼御史中丞李师偃充副使专往慰问仍賑米粟二万石俾其安辑离散渐就汉南再复旧疆永保恩好宣示中外宜体朕怀【会昌元年十二月】

舍雪

原吐谷浑制

伐罪吊人前王高义兴亡继絶有国令典吐谷浑擅相君长窃据疆场?刘黎庶积恶既稔天亡有徵朕君临四海含育万类一物失所深责在余所以爰命六军申兹九伐义存活国情非黷武其子大宁王慕容顺隋氏之甥志怀明悟长自中土早慕华风爰见时机深识逆顺以其父悛谏违衆独陷迷途遂诛邪臣存兹大计翻然改辙代父归罪忠孝之美深有可嘉子能立功足以补过既往之衅特宜原免然其建国西鄙已历年代即从废絶情所未忍继其宗祀允归命胤可封顺西平郡王食邑四千户仍授赭胡吕乌甘豆可汗所司量遣使人备礼册命【贞观九年五月】

宥吐谷浑制

文德怀远列圣之弘规兴亡继絶至仁之通训吐谷浑发迹东胡窜居西域负险自固擅立君长爰在前代通使中原或为叛臣不恒厥德近者纂步萨体为主老而智昏迷而忘反志怀首鼠?刘疆场朕频命行人殷勤诱谕不纳忠信之言唯行蜂虿之毒及六军问罪尚令申谕遂无怀革以至灭亡其子顺困蹙事穷措身无所委命下吏輿櫟辕门故命解网释俘维其宗祀乃怀一志遵彼覆车曾未浹旬自貽屠戮子燕王诺曷鉢弱不好弄幼称通理统纂旧业即逢内难故遣旌节远申安抚遂能率其种类同竭欵诚尽落顷巢趋谒使者屈膝顿顔遵奉朝化请颁正朔愿入提封丹诚内发深可嘉尚宜隆宠章懋兹赏典可封河源郡王食邑四千户仍授乌地也拔勒顔可汗即遣使人备礼册命【贞观十年三月】

洗雪平夏党项德音

平夏南山虽云有异源流风俗本贯不殊我国家累圣以来许居内地久奉声教亦立功劳朝廷抚绥常存恩信近者边陲之归制御乖方遂有凶悍之徒不率父兄之教或侵暴州镇或攻掠道途告谕罔悛猖狂颇甚朕君临区宇深念黎元凡曰含生皆同赤子但欲为民除害固非黷武佳兵再覩杀伤深多悯恻是以去年特雪平夏駟除南山及闻穷困无归复有怀来之意遂令敏中李安业分统诸军先示招携仍加训练但知非则赦免不得已则诛锄王者之师义实在此近得敏中状申南山尽愿归降沥恳输诚唯思展効请般运粮料乞保护封闕其奏章深愜朕意昔者或有剽刼必推南山南山或有寇攘亦指平夏既相非斥互说短长终难辨明祇益仇怨今则并从洗雪咸许自新但能各务安全通相劝勉保其生业絶彼侵踰从前所有僭违自此一切不问准盐州深居沙塞土乏农桑军士衣粮须通商旅沿路堡栅事须修营令委李安业依朝廷制置差兵建筑防守犹恐部落忘怀疑虑仍令李安业驻军塞门朕之屈法从人斯为极矣若执迷不返干犯国章後悔难追唐大诏令集卷一百二十九

卷一百三十

钦定四库全书

唐大诏令集卷一百三十

宋 宋敏求 编

蕃夷

讨伐

命皇太子讨稽胡诏

讨吐谷浑诏

讨高昌王麴文泰诏

讨高丽诏

亲征高丽诏

高丽班师诏

命吕休璟北伐制

命薛纳与九姓伐默啜制

命姚崇北伐制

讨回鹘制

平乱

破高丽诏

降高丽颁示天下诏

破高丽赐酺诏

收复河湟德音

平党项德音

告庙

破薛延陀告庙诏

平戎告庙勅

讨伐

命皇太子讨稽胡诏

稽胡部类居近北边习恶之徒未悉从化潜窜山谷窃怀首鼠寇掠居民侵扰亭候可令皇太子建成总统诸军以时致讨分命骁勇方轨齐驱跨弥山谷穷其巢穴元恶大憝即就诛夷馘掠之民复其本业行军节度期会进止皆委建成处分【武德四年九月】

讨吐谷浑诏

近以吐谷浑恃其遐阻屡扰疆场肆行凶虐种类乖离爰命将士申兹吊伐有征无战所向摧殄渠魁窜迹自贻灭亡朝威远畅边亭静谧朕君临寰宇志在含弘不欲因彼危乱绝其宗祀乃立伏允之子大宁王慕容顺抚招余烬守其旧业而顺曾不感恩遽怀贰志种落之内人蓄怨愤遂创文义即加剿绝虽复权立其子所部又致搅乱竟动干戈各行所欲朕忧劳兆庶无隔夷夏乃睠西顾良用矜惕若不星言拯救便恐涂劳未已兵部尚书潞国公侯君集等咸才兼文武寄深内外嘉谋着於庙堂茂绩书於王府必能宣风阃外克定遐夷量其事机绥抚经略分遣使人明加晓谕如有不遵朝旨致兴异图即合精锐随便剪扑尽威怀之道称朕意焉

讨高昌王麴文泰诏

明罚勅法圣人垂惩恶之道命将出车王者成定乱之德故三苗负固虞帝所以兴师鬼方不恭殷宗所以薄伐朕嗣膺景命君临区夏弘大道於四方推至诚於万类凭宗社之灵藉股肱之力亿兆获义封疆无虞建木疎林山经靡记之域幽都大夏王会不书之君莫不革面内欵屈膝请吏袭冠带於魏阙均贡赋於华壤而高昌麴文泰犹为不轨敢兴异图事上无忠欵之节御下逞残忍之志往经朝谒备加恩礼溪壑难满曾无报効禽兽为心遽怀凶狡诏命之严稟承之诚既阙王人之重祇敬之礼亦亏自隋季道消沦丧衣冠之族疆场之人或寄命诸戎或见拘寇手及中州既定皇风远肃人怀首丘途经彼境皆被困系加之重役忍苦遐外控告

无所又伊吾之右波斯以东职贡不絕商旅相继探书遭其寇攘道路由其拥塞又西蕃突厥战争已久朕愍其乱离志在安戢乃立颉利侄可汗兄弟庶令克复旧基文泰反道败德世安好祸间譁酋豪交乱种落遂使羶裘之长亟动干戈引弓之人重罹涂炭又焉耆之地与之隣接文泰疾其尽节轻肆凶威城池有危亡之忧士女嬰刼掠之酷加以虐用其衆毒被所部官罚无章内外嗟怨善造宫室劳役日兴修营輿輦僭侈无度法令深刻赋歛繁重举手动足咸触网罗畜牧园果悉有征税衆力既尽人财已竭饥寒总至愤叹盈途比室运甕不胜苛政故老悲愁思沾王泽朕受命上玄为人父母禁暴之道无隔内外纳隍之虑切於兴寝録其旧勲仍怀愍怜所以频遣使人具申朝旨勗以为善之规示以自新之路庶知感悟无烦师旅而昏迷遂性荒怠不悛贯盈之衅既稔灭亡之期已及况复文武具僚戎狄君长请事君长者相属怀逐雀者比肩宜顺夷夏之心以申吊伐之典讨凶渠之多罪拯无辜之倒悬今遣交河道行军大总管吏部尚书侯君集副总管兼右屯卫将军薛万钧副总管左屯卫将军薛孤吴儿行军总管武卫将军牛进達董率衆军弘宣庙略乘驿进路同会虏庭莫不气夺风云精贯日月援枹怀愤拔距争先良将奋建瓴之威鋭卒効如貔之勇冀马燕犀犹迅雷之震击云梯地道若至神之变化以此制故事等摧枯以此屠城易於反掌然朕矜悯之心有怀去杀胜残之道无忘好生文泰面缚军门泥首请罪特弘焚櫟之泽全其将尽之命自余臣庶弃恶归诚并加抚慰各令安堵以明逆顺之理布兹寛大之德如其同恶相济敢拒王师俟尽大兵之势以致上天之罚明加晓谕称朕意焉【贞观十三年十二月】

讨高丽诏

行师用兵古之常道取乱侮亡先?所贵高丽莫离支盖苏文杀逆其主酷害其臣窃据边隅肆其蜂蛭朕以君臣之义何忍若不剪诛遐秽何以惩肃中华今欲巡幸幽蓟问罪辽碣行止之宜务存俭节所过营顿无劳精饰食惟充饥不须嘉饌水可涉度者无假造桥路通行者不劳修理御营非近州县学生父老等无烦迎谒隋室沦亡其源可覩良由志略乖於远图兵士疲於屡战政令失度上下离心德泽不加於匹夫刻薄弥穷於百姓当此之时也高丽之主仁爱其民故百姓仰之如父母炀帝残暴其下故衆庶视之如仇讎以思乱之军击安乐之卒务其功也不亦难乎何异入水而恶其濡践雪而求无迹朕缅怀前载抚躬内省昔受钺专征提戈拨乱师有经年之举食无盈月之储至於赏罚之信尚非自决然犹所向风靡前无横阵荡氛雾於五岳剪豺狼於九野定海内安苍生然则行军用兵皆亿兆所见岂虚言哉及端拱岩廊定策帷扆身处九重之内谋决万里之外北殄匈奴种落有若摧枯西灭吐谷浑高昌易於拾芥包絶汉而为苑跨流沙以为池黄帝不服之人唐尧不臣之域并皆委质奉贡归风顺轍崇威启化之道此亦天下所共闻也况今丰稔多年家给人足余粮栖亩积粟红仓虽足以兵储犹恐劳於转运故多馐牛羊以充食人无裹粮之费衆有随身之廩如斯之事岂不优於曩日加以躬先七卒亲决奇谋使攻无所守战无拒略言必胜之道盖有五焉一曰以我大击其小二曰我顺而讨其逆三曰我安而乘其乱四曰以我逸而敌其劳五曰以我悦而当其怨何忧不克何忧不摧布告元元勿为疑惧耳【贞观十八年十月】

亲征高丽诏

观乎天道鼓雷霆以肃万物求诸人事陈余革以威四方虽步骤殊时质文异制其倡攻杀禁暴虐戮干纪讨未宾莫不仗义而申九伐文德昭於率土因时而董三令武功成於止戈朕祗膺宝历居临宇县凭宗社之灵藉卿士之力神祇储祉夷夏宅心故上柱国辽东郡高丽王高建武夙效丹款早奉朝化忠义之节克着於嵎夷职责之典不愆於王会而其以莫离支盖苏文包藏凶慝招集不逞潜与计谋奄行弑逆冤酷纏於秽貊痛悼彻於诸华纂彼藩服权其国政法令无章赏罚失所下凌上替远怨迍嗟加以好乱滋甚穷兵不息率其羣凶之徒屡侵新罗之地新罗丧土忧危日深远请救援行李相属朕愍其倒悬之急爰命輶轩之使备陈至理喻以休兵曾不知改莫遵朝命窥窬亭障首鼠窟穴完聚更切赋歛尤繁丁壮尽於锋镝羸老弊於坂筑久废耕桑咸罹饥馑生肉表异显其亡徵雨血为妖彰其数尽比室愁苦闔境哀惶华发青衿不胜苛政延颈企踵思沾王泽昔有苗弗率劳大禹之驾葛伯仇饷动成汤之师况乱常巨寇案三纲而肆逆?天元恶穷五刑而莫大者哉朕所以宵分兴虑日时忘食讨罪之怀既深於投袂救人之义弥轸於纳隍类上帝而戒途诏夏官而鞠旅可先遣使持节辽东道大行军总管英国公积副总管江夏王道宗士马如云长驱辽左夺夷岳之威屠蛇豕於险渎成建瓴之势斩鲸鲵於鏖方行军总管执夫思力行军总管契苾何力等率其种落随机进讨契丹藩长于句榆溪藩长苏支燕州刺史李玄正等各率其衆絶其走伏使持节行军大总管张亮副总管常何副总管左难当等舟楫相继直指平壤新罗王金善德倾其城邑竭其府藏荷不赀之泽复累业之讎出乐浪而卫腹心临沃沮而荡巢穴百济王扶余义慈早着丹赤深识时机弃历稔之私交执顺动之公义羸粮蓄积惟命是从凡此诸军方里齐举顿天罗於浦【缺】横地络於辽阳朕然後经涂白狼之右亲巡玄菟之城执金鼓而戒六军载太常而麾八阵使流汤者鱼烂掘炭者冰消诛渠魁於恶稔吊黎庶於崩角其或拥衆立功或间行自拔宜弘寛大各复农土有劳者当加其赏怀能者不滞其才如其长恶莫悟迷途遂往斧钺既下必婴丧元之悲玉石一焚徒致噬脐之叹宜宣朕旨咸使闻知【贞观十八年十二月】

高丽班师诏

朕闻之圣人慎罚观兵於再驾明王举事制胜於三年合诸侯以讨逆既擒而且纵总海内以除残临刑而止杀其故何哉信由上天之德曰生王者之师曰义是以网开三面干舞七旬岂有恣欲凌威取鲸鲵而竭泽覆巢探穴罄麇卵以涂原者乎憬彼夷岛僻居鲸壑晋皇淹驾才克一城隋帝频师沦兵百万朕光承宝历司牧普天陶化紫宸法两仪而导俗推心黔首徇方?以劳神纖介不安终宵辍寝蛮貊未乂日旰忘飧是以远涉天涯比焦原而未险长驱若木譬平圃以非遥愤角辽阳躬亲节度撝金海表震曜灵威尅其玄菟横山盖牟磨迷辽东日岩沙卑陵谷银山后黄等合一十城凡获户六万口十有八万覆其新城驻驿建安三大阵前後斩首四万余级降其大将二大裨将及官人酋帅子弟三千五百人兵士十万人并给陈粮放还本土又获马牛各五万馆谷十旬不假运粮之费徒兵累万咸发兼乘之歌自夏涉秋系虏相次由燕及雍负戴不絶缅惟汤文取乱常怀偃伯之心虞夏胜残实弘光被之美有怀戢武再造何忘但以贼帅莫离支犹不授首本图未果志无旋旆忽属徼外霜严海滨寒沍念兹兆衆使命班师朕所向必摧上灵之祐也所攻无敌勇夫之力也方且仰酌玄泽展大礼於郊禋念此勤劳録摧锋於将士有勲者别颁劳命无勲者并加优恤诸渡辽海人应加赏命及优复者所司宜明条例具状奏闻朕将亲为详覽以申後命【贞观十九年十月】

命吕休璟等北伐制 苏頌

門下朕聞守在四夷蓋安人以和衆加於百姓豈窮兵而黷武然則日之所出弗俾於化故知天之所討必糞其罰自默啜?劉肆暴桀驁反常獨為匪人假命驕子者有歲時矣雖奉書就邸或遵於聲朔而控弦犯塞已毒於疆場朕惟務怀柔每在含忍遂使庶邦憤積稽其六月之師逋寇禍盈窮此百年之運金山道前軍大使特進賀腊毗伽欽化可汗突騎施守忠名寵外藩志勤中國兼遣弟古監衛將軍守節長駟沙漠直指金微默啜舉其種類來相抗拒殪於鋒鏑之下已若亂麻遠凭於廟堂之上將同破竹堅昆在右犄角而東并累獻封章請屠巢穴朕又聞不得已而用者孰若兵機不可得而違者廼符人事永言取亂宜戒征徂右領軍衛將軍兼檢校北庭都護卒宋鎮守使安撫十姓呂休璟心堅鉄石氣橫風雷始則知戎之類利得晉卿終而遂虜之功永邀漢將為金山道行軍大總管北庭副都護郭?瓘安处?等懷才抱器蓄銳俟時慣習軍容備知邊要并可为副大總管領瀚海北庭碎叶等漢兵及驍勇健兒五萬騎金山道前軍大使特進賀腊毗伽欽化可汗突騎施守忠領諸蕃部落兵健兒二十五萬騎相知計會遂便赴金山道行軍大總管右武衛大將軍攝右台大夫同中書門下三品上柱國韓公張仁亶文武將相莫之與京心腹爪牙是所系賴當分閫之任受昇壇之律嘗愿親先士卒不令賊遺君父與大總管右兼門衛大將軍魯受信等將蕃漢兵募健兒或用絶羣飛騎城傍等十五萬騎赤水軍大使涼州都督司馬逸客外寬內明正辭直道標慷慨之節曾不顧身蘊經營之志期於盡敵右武衛將軍陳家丘右金吾衛翊府中郎將李玄道副使左驍衛鹿陵府折冲能昌仁左衛神山府陳義忠等領當軍及當界蕃漢兵馬募健兒七萬騎豐安軍大使靈州都督甄蔡副使張趙壁常元寂等領蕃漢兵六萬騎防禦郡牧大使臨洮軍使甄亶領當軍莫門積石等軍馬募及秦蘭渭城等州大家子弟總二十萬騎建康軍使甘州刺史李守微玉門軍使肅州刺史湯嘉惠墨離軍使瓜州都督李思明伊吾軍使伊州刺史李?交等各領當軍兵馬與突騎施守忠呂休璟等計會共為表里莫不運其長策悉心而効六奇接以短兵指掌而論七縱使天陣齊舉云置備設賈勇於飲酌之夫一以當萬揚威於汗血之騎左縈右拂威系鼉斬蛟曳牛佩豕必能力 窮海聲壓大荒刈谷蠡之庭拔杈渠之垒不遑渭橋之拜已觀陰山之哭然則持旌節金鼓者所以問不賓誅首惡而比夫不滅復迷則凶俾存開網之仁預軫焚岡之嘆休璟所須兵馬甲杖一事已上仍依別勅处分主者施行【景龍四年五月十五日】

命姚崇等北伐制

黃門朕聞上古聖王之致理則教之以戰陣之以兵蓋威不恭而服不順也故始於禁暴終於偃戈迫斯不得已而用之朕以寡昧誕膺鴻業思欲率於動靜歸之教化豈要荒之外弃為匪人而亭育之中視則如子罔不遵我文軌終其貢賦歲時相望道路抵屬而默啜素稱裂駭鳴鏑於狼居頃自怀柔獻書於象魏朝廷所以許其通好議以和親使臣累齎賚繒帛侍子今褰冠帶庶中國無事長城罷守戢於干戈而銷劍戟者朕之意焉豈謂我盟不渝爾約斯背伊庭之際遂敢侵軼西北偏隅尚聞嘯聚雖摧其精銳而困於圍迫此不虞之失朕嘗憐之犬羊無親不可恃信而輕敵熊羆有勇咸能宣威而制勝朕由是詢卿士之奏攬英雄之心謀元帥而得佐軍恢遠圖而舉長策隨時之義其在豫乎兵部尚書兼紫微令監修國史上柱國梁國公

姚崇天假其才日新厥德礼义为质居有四科谟猷是光坐知千里以仲山甫之操管夷吾之能智涌泉而不穷精贯日而逾厉信庙堂之柱石鼎鼐之盐梅必能奋尔六奇光我三杰可持节灵武道行军大总管内诸军咸受节度右领军卫大将军兼检校单于大都护镇守军使张知运宽厚沈毅外方内直威而勇决自摄单于之台惠则抚循咸仰将军之树可中军副大总管权检校原州都督李钦宪家承将相器兼文武求古人之节临事不回读前圣之言好谋而断可左军副大总管检校左威卫将军灵州都督吕休璟惯知边要久探戎律诚期报国去病安用家为奋不顾身伯昭不使遗贼可副大总管左骑卫将军论弓仁古金吾卫大将军勿部珣左领军卫郎将摄本卫将军张真楷单于副都护臧怀亮右领军卫中郎将王海宾前朔州刺史刘元楷右武卫郎将杨楚客并州定清武果毅元萧然等颇牧为用关张其敌怀才偶倪尝邀百胜之功立志经营备习九章之训弓仁及珣并可前锋总管真楷可左虞侯总管怀亮可右虞侯总管海宾元楷楚客萧然等并可行军总管太仆少卿田崇璧鄜州刺史韩思复等强力从政精心在公知无不为利有攸往入敷事典省阁称其闲练出综条察吏人畏其严明崇璧可兼行军长史思复可兼行军司马兵部郎中李休光司勳郎中张敬中兵部员外郎杨钦明江州别驾李邕等或特達珪璋所谓登坛之宝或翩翩书记曾闻及溜之词可以光赞出车弘宣入幕并可行军判官灵武军兵加满十分人旧马既少宜於内外闲廐抽添马添满六万疋原夏等州要害处亦量加马其後军兵六万人马二万疋先来点定宜令卫尉卿李延昌左羽林将军杨敬述等至冬检閱且当处团结待後进止其有先锋破贼斩摧坚功效灼然者并委军将使定功赏不须定以常格总管以下有损失兵马不能力战弃军逃命者便斩其有弃军入贼不能死节者妻子依叛缘坐法凡此和衆誓於师兵统燕犀冀之雄屯斩蛟击龟之勇金鼓沸野旌旗彗云岂式遏於河塞方震惊於沙漠於是乎单醪以信之芳饵以赏之戮杨干之仆必行其令持穰苴之兵不枉其法坚壁清野投石而有余追奔逐北则扫尘而无类俾权宜於阃外仍布告於天下暨劳永逸在此行焉主者施行【开元二年二月二十八日】

命薛讷等与九姓共伐默啜制

黄门朕闻天所与者奉天命而不违人所弃者顺人心而致伐由是古先帝王光宅区县实仗威武用清荒戍时义远矣默啜以叛亡俄隶凶刃遗孽敢迷声朔独匪君人祸皆所居妖不自作举其巢穴尽其离心瞻我阙庭相望南面犹甯身於寒苦且寄命於旬时当寇运之已穷在轩兵而可逐九姓部落等忠诚贯日义烈闻风数其擢发之僭成於屈指之计请除骄子累遣使臣摧锋而愿先駟蓄銳而期後命右羽林军大将军朔方道大总管薛讷左卫大将军安北副大都护鄯王府长史平郡公张知运右羽林军将军兼京都督赤水大使杨敬术右骁卫将军大武军大使干仁誓右武卫将军大使杜宾客丰州都督西受降城吕休琳东受降城使邵宏左金吾卫大将军固纒伏帝匍左卫大将军浑元忠佐武卫大将军以和舒右武将军兼贺兰州都督契苾承祖等或出将入相有经济之才或敦诗说礼有韬铃之算或嫖姚仕汉有遮虏之勲或由余入秦有伐戎之策谋彼元帅择於左军可以授旗遂行推轂而进讷可中道大总管宾客宏休琳等为副知运可东道大总管弓仁仁誓等为副敬述可西道大总管伏帝匍元忠和舒承祖等为副各领马步五万人马九姓计会三军既整百道齐入吴鉤楚练照曜陰山之峯冀马燕犀张皇穷汉之地况彼寇恶积我师义动知存亡者观其兆摧枯朽者鲜其力庶使疆场罢侯从此息人边鄙不虞因而尽敌布告天下咸遣知闻主者施行【开元四年正

月二日】

讨回鹘制

天之所废难施继絶之恩人之所弃当用悔亡之道朕每思前训岂忘格言回鹘比者自恃强梁久为桀骜凌虐诸部结怨近邻圻圻斯潜师彗穷居瓦解种族尽膏於原野区落遂至於荆榛今可汗逃走失国窃号自立速踰沙漠寄命边陲朕深念伤残寻加赈恤每陈表章多诈谀之词接我使臣如全盛之日无伤禽哀鸣之意有困兽犹鬬之心去岁潜入朔州大掠牛马今春掩袭逼近城池可汗皆自率兵首为寇盗不耻破败莫顾姻亲河东节度使刘沔料敌伐谋乘机制胜发胡貉之骑以为前锋塞翎侯之旗弋彼在穴短兵鏖於帐下元恶轶於馘中况乘非六羸衆才一旅储备已竭计日可擒大和公主居处不同情义久絶怀土多思亟闻黄鹄之歌失位自伤宁免緑衣之叹念其羈苦常軫朕心今朕已於豺狼再见宫阙上以摅宗庙之宿愤以慰太皇太后之深慈永言归宁之乐良用欣感其回鹘既以破灭义在剪除宜令诸道兵马使司进讨河东立功将士已下优厚赏给续条流处分应在京外宅及东都修功德回鹘并勒冠带各配诸道收管其回鹘及摩尼寺庄宅钱物并委功德以御史台及京兆府各差官点检不得容诸色人影占犯者并处法钱物纳官摩尼寺僧委中书门下条流奏闻於戏昔汉宣帝值匈奴乖乱推亡固存呼韩单于携国归命入朝保塞汉后所以有拥护之恩郅支单于背叛礼义伤毁威重汉史所以明可诛之罪二虏祸福皆自致焉四夷百蛮当以为鉴布告中外深体朕怀【会昌三年正月】

平乱

破高丽诏

五兵爰始轩皇战於阪泉七德攸基唐帝尅於丹浦莫不降凶剪暴道济生灵斥土开疆威加四海朕钦承宝历削平天下六合之内咸以为家三光所临义无不照是环埤之表咸淼淼以航琛垓之中尽颀颀而輶賁而岛夷陪隶虐杀其君毒被朝鲜灾罹秽貊幼孤者不可苛暴忠槩者仰我来苏联言念匪人深怀夕惕亲御戎轩躬执金鼓意在以杀止杀仁被於羣生用刑清刑义戡於不惠廓滔天而调雨露禽狷夏以正封疆用此佳兵事非获已仰申天罚遂乃龚行先命行军大总管英国公积行军总管张俭等率领骁鋭元戎啓行北狄西戎之君咸为将帅奚灵契丹之旅北充甲卒如貔亿计跃马千羣总管萃辽东之城攻其南面副大总管江夏郡王道宗第一军总管号国公张士贵等率五陵之劲卒董六郡之良家分麾引道攻其西面申命前军大将军夔国公弘基等分絶猛士填其濠堑贼城临地险激梁水以环流耸堞陵云压颓山而靡惧於是云罗四合地道九攻危城倏以复隍汤池俄而失险犹且析骸穷垒壁巢幕以偷安转骨深沟坐积薪而待燎愍其涂炭申其再造频加海诱固执迷途由是猛士冲冠壮夫挺剑咸顿首於马前请因机而电扫难违衆议爰诏许之乃分命诸军四面云合朕登高远瞩授其节度又命检校太常卿鄂国公敬德领黄门之军乐奏玄云之雅歌将帅闻之增愤士卒由其作气冻雨初晴惊风渐急聊命纵火数处潜燃焚其楼雉并为煨烬合城男子面缚军门取彼渠魁属于司败千载逋寇一朝清荡斯并宗庙降灵上玄幽赞忠臣猛将尽节陈谋

劲卒勇夫轻身効命叶同心力成此大功岂朕一人独能致此今兹克捷普天同庆宜令颁下咸使闻知【贞观十九年四月】

降高丽颁示天下诏

上天之道先德而後刑王者之师有征而无战是以炎农剪暴夙沙自缚其君玄乙兴师有苗不固其险朕劳神济物以百姓而為心則天弘化環四海而開宇義非獲已由是舉兵每蓄哀矜深存宥罪自濟遼水先令告喻而蓋牟不革其面遼東猶抗其斧既觸天網遂縱兵鋒未展鷹揚已皆魚爛朕乃鼓行乘勝師次日岩凶徒相率登陴拒守因山構壘仰切浮雲縈澗沉隍下臨無地妖氛蝟聚如凭劍閣之深同惡張若負洞庭之險乃命行軍大總管英國公積等統阻垠冠鷄之將率擊翬斬蛟之士發石甚於星隕樓毀同於山坏朕憫彼同焚情深惻隱親御八駿責効三軍賊既倒懸方思轉禍積甲齊於熊耳獲庚方於海陵建十州之旗各復於桑梓反三韓之士不易於農肆焚櫟錫爵駢馳遼海之間齒井耕田編列下辰之野古人有言曰全國為上蓋斯之謂焉又燕碣土風素多霖沾軒皇遭召霧之師晉后苦涌水之失自朕出師上靈幽贊旭日澄霽雲輟陰所指未有堅城所向乃無完陣天道人事義等合符窮穴傾巢庶將非遠宜以大慶頒示普天【貞觀十九年三月】

破高麗賜酺詔

上帝明威鼓雷霆而震曜先王仗順用甲兵而吊伐故能經綸九野清滌八荒二十七征玄王創其鴻業五十二載黃運垂其大名騰有國之英猷光列代之通典朕荷構乾象大庇羣生池蒙汜而□扶桑紐入紘而疆域蠹茲皮服敢亂天常但折彼蠡肱何俟五丁之力射其雀目無假萬努之機然以先聖救焚成言如在自惟已任是用躬親故知矢石交前非勝岩廊之道介冑為飾不建旒冕之容若命將以授戈愧奉身而役物親征而沐雨務形勞以安衆一儀宜鑒所向弗違自涉遼陽受降之城累筑曾未期月獻凱之歌日奏傳烽告捷異往昔之照甘泉資敵為糧矯向時之挽紅粟復以今日中攻其安巾城重圍四布勢同三版之危縣命短辰哀其守陴之哭高麗偽主掃其境內罄茲驍銳咸登徒軍爰自平壤長馭影渡有徒十五萬連旗三十里烟火稽天若黃虵之吐霧轂騎橫野邁赤蟻之為羣朕心計利其地形屈指籌其破日分命衆將各稟新書臨事設奇因機制變行軍大總管李積率總管國公張士貴等馬步軍十四總管當其西南面又命馬步軍趙國公無忌率馬步軍二十六總管馳自東谷合其來道抵背扼喉塞其歸路朕乃潛師偃旆登於北山候彼交鋒於茲聳轡若處中天之樹俯周官於目前如登大岳之岑觀魯邦於掌內出其不意凶徒遂擾初為一阵四拒積軍及此三分因而大潰流血川溢滄波為之暫丹斬級彌山骸骨以之成岳蓋由鎬鋒交下玉石同湮雖則可哀理無兼濟其兵將大耨薩延壽惠真率其餘衆一時輸款但高麗國政本二人今總委偽軍只輪不返大慶允集益深祗懼可歸美清廟昭告懋功頒示萬邦賜酺三日【貞觀十九年六月】

收復河湟德音

自昔皇王之有國也何嘗不文以守成武以謀事參謀諸二柄歸乎太宰朕猥荷丕圖思弘景

业忧勤戒惕四载於兹每念河湟土疆绵亘遐阔天宝中犬戎乘我多难无力御奸遂纵腥羶
不远京邑事更十叶时近百年进士试能靡不竭其长策朝廷下议皆亦宜其直词尽以不生
边事为本图宜守旧地为明理荏苒於是收复无由今者天地储祥祖宗垂佑左衽输欵边垒
之降鬪耻達功所谋义尅实赖枢衡妙算将帅椎棱副玄元不争之文絶汉武远征之悔甌脱
顿空於内地斥堠全据於新封莫大之休指期而就况将士等栉沐风雨暴露郊原披荆榛而
刁斗夜严逐豺狼而穹庐晓破动皆如意古无与京兆此诚朴宜加宠赏泾源宜赐绢六万疋
灵武宜赐绢五万疋凤翔邠宁宜各赐绢四万疋并以户部产业物充仍待李荣叔明李玘君
绪各回戈镇度支差脚支送四道立功将士具名衔闻奏当议恩酬其秦威原三州送七关侧
近访闻田土肥沃水草丰美如百姓能耕垦种蒔五年内不加税赋五年后已量定户籍使任
为永业其京城有犯事合流役囚徒自今已後一切配各处收管温池盐利可贍边陲委度支
制置闻奏凤翔邠宁灵武泾原四道长吏能各於镇守处遣官健耕垦营田即度支給赐牛粮
於每年量得斛?多少便充军粮亦不限纳足数二州七关镇守官健每人给衣粮两分一分依
常年例支給一分度支給仍二年一替换其家口委长吏切加委存官健有庄田户籍者仰州
县放免差役秦州至陇州已来道路要置堡栅与秦州应接李玘与刘臯即便度计闻奏如商
旅往来兴贩货物任泽利润一切聽从关镇不得邀诘其官健父兄子弟通传家信开司并亦
不得邀诘阻滞如要垦辟种田依百姓例处分三州七关如少器械长吏量与据所在申奏除
刺史开使後三五月内差人巡检如有修筑部署课绩久深并训练有序者其刺史开镇使虽
新除官爵亦更与超昇其官健节级更与优赏山南西道剑南山川边界有没蕃州县量力收
复其兵士委本道差遣如要钱物接借亦具闻奏三州七关创置成九十且要务静如有边寇
羌戎潜来博易辄不得容纳委刺史切深禁断或有投降吐蕃到边上收取本道令长奏取进
止呜呼七闲要害三郡膏腴候館之残址可寻唐人之遗风尚在追怀往事良用兴嗟夫取不
在广贵保其金汤得必有时詎计於迟速今则便务修筑不进干戈必使足食足兵有备无患
载洽亨育之道永致生灵之安中外臣寮宜体朕意

平党项德音

冒法干纪岂限於华夷伐罪吊民固资於典训朕端拱御宇六年於兹兢兢业业不敢怠忽常
恐一物失所羣心靡宁旰食宵衣思底於道属者以党羌恣为侵叛尤苦农桑朕为民父母岂
无悯恻虽伤财害物非朕躬之愿而禁暴定功实武经之要是以爰兴师旅恭行天讨而凶渠
稔恶稽旷岁时师宿既勤物力将屈赖宗社储祉中外叶心大搜妖巢荡定关陇诚殫财而涸
力亦暂费而永宁今则军功以成制置将就息民解甲固在及时舍罪缓刑所宜布泽南山党
项为恶多年化谕不悛颇为边患既兴兵士经岁讨除拒官军者悉就诛擒惧法令者皆复逃
窜大开汤网已施去杀之仁远并尧时宁限可封之屋今闻残寇无所依归皆是王民岂忘恻
悯其南山党项已出山者或闻迫於饥乏犹行刼夺平夏不容无处居住今委李福丑先遣蕃
官安存招诱令就夏银界内指一空闲白地居住所有从前挂涉恶迹者令一切不问惟再犯
疆界刼入山林或不从指挥即召募平夏党项讨逐议不容舍如能革心向化愿同平夏即输
诚献欵迹効分明抚驭之间便同赤子如有屈事即任於本镇投告论理仍各令本界遣了事
军将安存平夏党项素闻为善自旬月已来发使安抚尤见忠顺一如指挥更不猖狂各守生
业自兹必令永载恩信长被华风或闻从前师在多怀贪尅部落好恶悉被诛求无故杀伤致

令怨恨从今已後必当精选清廉将帅抚驭羌戎明下诏条渐令知悉灵盐夏州邠宁鄜坊四道官吏自用兵已来责办公事亦甚辛勤军将皆已得官文吏未酬劳绩宜令每道拣选公勤有劳効官吏具名衔闻奏有官差者与依资转迁无官差摄者当与正官仍具差摄年月申奏直须公当不得转授嘱托如是将帅亲情亦须具言四道百姓徵歛不时差役至多疲瘵亦甚或屋宇被贼焚烧至於桑麻亦遭所伐生业既失须加安存宜各给复三年其无屋可居无牛可耕者委长吏量事接借一一奏闻仍须早设法招攜速令归复勿令豪富便占产业为主自用兵已来诸道应徵发之处所有将健或亡锋刃或存被疮痍虽经褒赠及曾优恤委本道更加存抚或因废疾不任在公者终身不停衣粮如情愿回於与子孙兄弟甥侄者便与补替应讨伐党项诸道在行营将士已颁赏赐使边上制置司叙绩节级放还仍委本道叙録其名闻奏当议甄獎自用兵已来京畿与鄜坊邠宁两道接界及当路诸县差役繁并物力凋残若无优矜必难存立其今冬季夏税钱及青苗钱每贯量放三百文其斛?量放一半仍委京兆尹差官仔细磨勘其或虽在乡村不曾经供应者不在准例放限仍一一条件等第闻奏如是分路处就中更校伪併者重加优恤必使均平其所放钱及斛?委户部以实钱支填仍令京兆府各下诸县散榜乡村要路晓示百姓务令知悉用兵已来城镇曾遭陷没官健百姓应被杀伤亲戚既无遗骸在野委所在长吏差人为收检如法埋瘞仍量事致祭应有增修城镇添置堡戍委所在将帅择其要害絶彼窥觐坊务坚完令可固守边上不以兵器作部落博易从前累有制勒约勒非不丁寧近年因循都不遵守自今已後委所在开律镇舖切加捉搦不得辄有透漏其有犯者推勘得实所在便处极法其所经过州县关津镇舖节级痛加惩戒议无容贷其间或情涉隐欺准所犯人处分党项本是边氓只合州县抚驭致令一朝侵叛由於处理乖方既往不可加刑从今必欲行法自此後边上逐界皆已有制置把捉如或更有羌寇侵盗即是将帅依前贪求当先加罪於本界边将然後剪逐寇贼通商之法自古明规但使处流行自然不烦馈运委边镇宜切招引商旅尽使如归除禁断兵器外任以他物於部落往来博易应缘徵兵处士马皆効勤劳亦已各有赏赐其本道将帅当续议量加酬獎京畿及鄜坊灵盐邠宁夏州等并泾州凤翔振武天德等道自用兵已来人频劳苦今颁德泽须及曲恩应见禁囚徒据罪逋减一等唯官典犯枉法?及贼中持杖劫人虽颁德泽不禁曲恩而若辈无故杀人等不在此限如有积年逋赋必加徵督不得者长吏条流闻奏准格律大功已上亲父女婿外甥不许连任自用兵已来诸道郎将及长吏权宜差亲表主持公事兵罢之後理当不然三族内亲并不得令主兵权及充要职如是元本军先充职长者亦须具名闻奏自用兵已来科配百姓事取济办多出权宜今既罢兵诸道节度防御刺史及旗镇使等不得更依前妄有科配仍令各具本管侵害百姓事须厘革者作条件闻奏自党项扰乱已来所在多被攻刼白刃之下必有孝子顺孙义夫节妇事迹有可称者委所在长吏察访优恤其家仍具名闻奏将加旌异於戏蛮夷华夏虽有其常规抚驭乖方致烦於薄伐伤夷生灵朕甚愧之是用覃恩以慰劳瘁布告中外咸使闻知【大历五年二月】

告庙

破薛延陀告庙诏

朕劳形育物尽敬承天蠢动不安栒风而罔倦荒隅未静救焚而靡息独运方寸贯彻上玄凝

想冕旒化行夷狄是知惟天为大合其德者弗违谓地盖厚体其仁者光被故能弥纶八极函盖两仪大帝福谦斯其效矣彼匈奴者与开辟以具生奄有龙庭共上帝而并列僭称骄子分天街於紫宸仰应旄头抗大礼於皇极流殃构祸乃於初运凌障犯塞连年压境射鵰驰骑亟饮渭川如豕腾氛频惊洛汭貽先皇之动色被黎庶之涂原社稷为虞轸情何似自朕御天下二纪於兹曩者聊命偏师遂擒颉利今兹始弘庙算已灭延陀虽则麾驾出征未踰郊甸前駢所□才掩塞垣长策风行已振金徽之表扬威电发远讐沙塲之外遂使?山之北无复单于龙烛之南大开封域其契苾车苾侯斥及鉄勒诸部落回纥胡禄俟利发等总统百余万户散处北溟远遣使人委身内属请同编列并为郡县引领翘足暴十月而仰油云延首求哀沉九泉而请营魄朕当暂幸灵州亲抚归附弘兹肆赦加以施生颁惠天隅惧威云朔收其瀚海尽入提封解其辫发并垂冠带混元以降殊未前闻无疆之业永貽来辙古人所不能致今既吞之前王所不能屈今咸灭之斯实书契未有古今之壮观岂朕一人独能宣力盖由上灵储祉锡以太康宗庙威灵成兹大定即宜备礼告於清庙仍以大庆颁示普天俾与黎元同兹有赖【贞观二年八月】

平戎告庙勅

勅边境为患莫甚於林胡朝廷是虞几烦於将帅车徒屡出刍粟载劳使燕赵黎民略无宁岁而山戎种落常为匪人近有野心穷而归我曾是怀附每所绥柔而不变梟声辄为兽搏幽州节度副大使张守珪等乘间电发表里奋讨积年逋诛一朝剪灭则东北之侵便以廓清河朔之人差寛征戍皆上凭九庙之略下仗羣帅之功今其凯旋敢不以献宜择吉日告九庙所司准式【开元元年】

唐大诏令集卷一百三十